

續修四庫全書

《續修四庫全書》編纂委員會編

續修四庫全書



上海古籍出版社

三二四・史部・別史類

元史新編九十五卷(卷一至卷五十七)

〔清〕魏源撰

.....

228/04

元史新編

光緒乙巳仲春月
邵陽魏慎微尚栞

元史新編 叙

敘

秀水朱竹垞先生嘗論唐以後國史成於官局未若成於一人一家者之專官書萃眾分撰彼此不相貫注其不免於紛歧複襲理固然也明初修元史前後集三十史官迫於速成總裁宋王諸公殆多未經閱視其中如列傳重出者多至數篇此豈難辨而亦不加察其他可知已在列史中最為草率近世嘉定錢氏大興徐氏皆有志重修竝未卒業先族祖默深先生自幼力學通究古今期於經世致用著述脫棄者先後二十餘種 聖武記海國圖志尤為士大夫攷掌故議邊防者之資久已彙傳海內晚復從事元史朔定體例獨出己裁其所徵據則元代官私之所

元史 敘

紀錄明初諸臣遺老之所記載遼金宋明諸史之所出入與夫佚事遺聞見於近人及泰西各家之說元元本本殫見洽聞載於各卷所注凡例所引者可按視也其書之特出於新增者則以開國啟宇遠軼漢唐西北所互沿革當章立太祖三朝平服各國傳中葉正朔不逾金山蕭牆內國盛衰攸關立東北叛藩傳至宮闈內治垂化之淑慝備書宗子維城傳嗣之榮枯悉譜聖武佐命補錄其元勳泰定承宗特紀其哀輔申春秋之義而書亡宋降臣慨宗社之墟而記末年羣盜其制度之不沿前代者禮志廣帳殿陵寢之篇版圖之原掌職方者地志辨和林阿母之域此皆詳舊史之所未詳也別傳分類相從以法侏儒名

字之惑則又列史之變例已本紀自世祖而下襲用邵氏類編藝文志氏族表全取之錢詹事擇善而從不必已出固史家之常歟其餘就三十史官之辭而損益之義歸謹嚴事求詳核論次略就而致繁落仁

和龔氏已而復入於莫君祥芝光憲承乏新疆聞王益吾祭酒言亟寫書索還值

國家多故鞅掌不遑弄存久之歲丁酉始屬歐陽輔之鄒改之兩茂才校葉凡八閱寒暑徐克臧事先族祖自敘篇末明言託時賢奏進而桑榆景疾卒蕤蘊弗果幸名流為之珍襲不燼於兵燹迄今五十年藉同里一二諸生從散佚後勉成完帙不可謂非神物呵護之功也原稿係册成有日無書者亦不止一處昔

元史 卷二

之良史所傳其非全書者多矣抑古人有言非史官不應為人作傳推之帝紀實錄更非私家所得為然此特為當代言之若修古史則義所不拘列史之不出於史官或何為史官而其書實出於私修者不知凡幾史記三國志南北史新五代史並非較譔而皆以正史著於

欽定四庫全書目錄即如康熙中邵戒三學士元史類編亦成於退休之日會

聖祖南巡進呈此尤

盛代近事之可援附者光憲慮歲遠遺彙就湮及時鏡梓倘當世大君子為加鑒定上呈

乙覽俾得與新舊唐書新舊五代史同列正史以傳之天

下後世是則先族祖神雷柱下及余小子拳拳二紀抱守殘闕惟恐失墜之志也夫
光緒三十一年秋七月邵陽魏光燾敘

元史 卷三

擬進呈元史新編表

賜進士出身江蘇高郵州知州臣魏源擬稿

臣源恭讀

欽定四庫全書提要云元史二百十卷成於明初承前代文

獻不足之餘加以纂修官宋濂王禕皆係文士疏於攷

訂昧於褒貶有史才而無史學史識八月成書是以疏

舛四出或開國元勳而無傳或一人而兩傳順帝一朝

之事雖經采補亦復不詳至其餘諸志刑法食貨百官

全同案牘在諸史中最高為荒蕪臣源攷

武英殿國子監頒行廿三史有舊唐書復有新唐書有舊

五代史復有新五代史皆於舊史之外重加整理往往

後勝於前

元史擬進呈表

國朝康熙乾隆閒詹事府詹事臣邵遠平臣錢大昕皆有

重修元史之事錢大昕惟成氏族表經籍志邵遠平元

史類編製鄭樵通志之重僅以天王宰輔庶官分題已

大備史法且有紀傳無表志於一代經制闕略未詳故

欽定四庫全書置之別史臣源於修海國圖志之時知元代

西域遠徼皆西北接鄂羅斯西南連五印度與今西洋

夷接壤自

國朝以前疆域未有廓於元者而史書之蕪蔓疏陋亦未

有甚於元者爰發憤重修采四庫書中元代各家著述

百餘種並彙搜元祕史元典章元文類各書參訂舊史

成元史本紀十二列傳表志凡卷敬敘其端曰元有天下其疆域之表海漕之富兵力物

力之雄廓過於漢唐自塞外三帝中原七帝皆英武踵

立無一童昏暴繆之主而又內無宮闈奄宦之蠱外無

苛政強臣夷狄之擾又有四怯薛之子孫世為良相與

國同休其肅清寬厚亦過於漢唐而末造一朝偶爾失

馭曾未至幽厲桓靈之甚遂至魚爛河潰不可救者何

哉大道之行天下為公公則中外一家不公則南北瓦

裂古聖人以紱冕當天之喜斧鉞當天之怒命討威福

一奉天道出之而不敢私焉明人好警前代每謂元起

朔方混一中夏創制顯庸以遼金新附者為漢人以宋

人為南人以此用人行政皆分內外三等內色目而疏

中原內北人而外漢人南土事為之制曲為之防其用

人則臺省要官皆據於世族漢人南人百無一二中葉

元史擬進呈表

以後破格知遇者官至集賢翰林院大學士而止從無

入相秉樞之事臣觀之殆不盡然方太祖太宗開枴

之初即以耶律楚材為相其所舉用立賢無方世祖混

一南北復相史天澤而劉秉忠參贊大計已同內相其

餘如趙璧宋子貞張文謙姚樞許衡葉李等並入中書

輔政初無內蒙古色目外漢人南人之見惟中葉以後

始分畛域凡臺省長官皆用蒙古舊人及其判署不諳

文誼不得已始取漢人南士佐之其如順帝之相賀太

平者十無一二焉中書政以賄成臺憲官皆議價得之

出而分巡競漁獵以償債帥不復知紀綱為何物至於

進士科舉置自元初中葉屢舉屢輟動為色目人所倚

撫順帝末年始一大舉行而國將亡矣兼之中原財賦

耗於僧寺佛事者十之三耗於藩封勳戚者十之二是以膏澤之潤罕及於南溟漉之恩悉歸於北界鴻溝於大宅自以為得親邇疏逃之道致韓山童偽檄有貧極江南富歸塞北之怨天道循環物極必反不及百年向之混一者復成輻裂乘除勝負理勢固然哉且元恃其取天下之易既定江南并大理遂欲包有六合日本瓜哇皆覆海師於數萬里外又不度中外形勢經畫兩斧外置嶺北嶺西諸行省動輒疆域數千里馬行八九十日方至內置江浙湖廣各行省舉唐宋分道分路之制盡蕩覆之旁通廣闊務為侈闊鞭長駕遠控馭不及於是阿里不哥海都諸王叛於北乃顏合丹諸王叛於東安南緬甸八百諸蠻叛於南窮年遠討虛敝中國如外

元史 擬進呈表 三

疆中乾之人軀榦龐然一朝痿木於是黃河潰於北海漕梗於南盜賊起於東大盜則一招再招官至極品空名宣敕逢人即授屯膏吝賞於未熾之初而曲奉驕子於燎原之後人心愈渙天命靡常二三豪傑魁壘忠義之士亦冥冥中輒自相蚌鷸潛被顛倒而莫為之所若天意若人事焉嗚呼孰使之然哉人知元史成於明初諸臣潦草之手不知其載籍掌故之荒陋疏舛諱莫如淡者皆元人自取之兵籍之多寡非動戚典樞密之臣一二預知外無一人能知其數者拖布赤顏一書譯言聖武開天記紀開國武功自當宣付史館乃中葉修太祖實錄請之而不肯出天庥修經世大典再請之而不肯出故元史國初三朝本紀顛倒重複僅據傳聞國初

平定部落數萬里如墮雲霧而經世大典於西北藩封之疆域錄籍兵馬皆僅虛列篇名以金匱石室進呈乙覽之書而視同陰謀深閉固拒若是以元一統志亦僅載內地各行省而藩封及漠北遼東西域皆不詳又何怪文獻無徵之異代哉是以疆域雖廣與無疆同武功雖雄與無功同加以明史館臣不諳繙譯遂至重紕屢繆幾等負塗不有更新曷徵文獻臣源伏思周監二代成斯文之郁郁彬彬書紀三科存前朝之渾渾噩噩敢以文章靖獻上報

屢朝養士之恩竊比柱下潛修整齊一代簡書之舊託浙撫之淵源隨奏疏而上進無上下古今之識特文省而事增於山海崇深之中聊管窺而蠡測無任戰栗隕越之至

元史 擬進呈表 四

凡例

一元史本紀之做世祖以前四朝失於荒陋世祖以後七朝失於缺其列傳之做亦於開國功臣失之疏而世祖以後諸臣失之尤其疏者雖以元勳碩輔而並佚其名氏如太祖諸弟諸子各僅一人有傳開國功臣首稱四傑而博爾忽赤老溫二人無傳博爾忽傳僅有子皆子孫事述與無傳同開國四先鋒而大將哲伯亦無傳和禮霍孫至元之賢相旭邁傑倒刺沙泰定之元輔皆不為立傳僅於表中虛列其名尙公主者莫盛於魯昌趙鄆而鄆國駙馬之傳亦闕至后妃一代母儀帝子諸王屏藩邦本而僅列二表且謫漏迭出其尤者或一人而二傳甚至數篇之多列傳有速不台又有雪不台有完者都又有完者拔都有石抹也先又有石抹

元史

凡例

阿辛至阿答赤忽刺出二人既附書於杭忽思直脫爾之傳矣而又別為立傳又昂吉爾已附於耶蒲甘卜傳而又有昂吉爾傳重喜已附於塔不己爾傳而又有重喜傳阿尤魯已附於懷都傳而又有阿尤魯傳此皆一人數傳疊見層出為從古史冊所未有如平宋大將不過伯顏阿尤阿里海涯董文炳張弘範等九人耳而濫至百餘傳之多今補其所必補刪其所必刪雖全無一字之博爾忽赤老溫哲伯等皆表其勳猷輝照史冊

一開國肇造之初以版圖疆宇為取重故新唐書敘平劉武周竇建德王世充等羣雄於各列傳之首宋史亦列蜀楚粵閩南唐吳越諸王世家於各傳之後而舊史太祖太宗所平漠北西域數十部無一傳何以知疆域之所至世祖中葉北藩東藩叛者數世竝無一傳何以

知邊徼之情形今特先敘各部各國并通之事復詳中葉疆場尾大之勢竝列於各傳之首以昭一代形勢至於末年羣盜韓徐陳張方明之屬舊史不立傳何以知亡國之由今附列傳末以垂鑒戒

一遼代世族以耶律氏蕭氏為綱其餘亦各有氏族金史以完顏氏為綱而有石抹氏蒲察氏烏古倫氏伊刺氏且宗室各有漢名如宗弼宗翰宗望宗幹宗強宗本及允中允蹈允鎬之類尙易稽察諸史諸臣工皆入列傳不分文武將相不分時代先後在漢唐宋史則可若元代臣僚則名字侏儒文武錯雜自非以事分人何由一目瞭然故於累朝文武將相功臣俾類相從以及天祚交兵末年討寇諸臣分別部居皆以各朝為先後可

元史

凡例

無舊史荒蕪傾倒之憾

一列傳既疏冗重複而其大臣數篇則又諱其所短與他傳牴牾阿里海涯屠江陵屠潭州占居戶數萬為奴見相威及張雄飛傳而本傳則諱之且敘其保全潭民之德安童與皇子同陷叛藩中數年而本傳諱不書完澤力勸成宗征八百媳婦國以繼世祖武功先後亡卒數萬而完澤傳亦不書皆据家狀粉飾於本傳而罪案別見於他傳一書自相矛盾至於本紀仁宗貶周王和世疎之詔不載所謂欲蓋彌章天祚誣泰定為潛通逆謀所謂欲加之罪當時諱莫如深何以異代修史亦不為之平反甚至不立倒刺沙之傳反立任速哥之傳直以泰定正統為仇賊而天祚叛臣逆臣為忠義糠粃昧

目四方易位此等史筆可垂百世乎

一列傳有當補者有不當補者史漢以來從無公主之傳惟唐以岐陽佐命之功太平安樂司履之禍皆關宗社安危故變例垂戒非如元代公主除高唐王監國長公主一人附其夫傳外餘皆毫無事迹而仁和邵氏元史類編嘉定毛氏元史彙均立公主傳以夫附妻顛倒陰陽全替史體至敵國降臣自當別為一傳舊史劉整呂文煥濫廁功臣而留夢炎王積翁蒲壽庚方回等不為立傳非所以示懲今別立宋降臣傳以昭筆伐

一元代功臣多與宋金史出入元末遺老降臣多與明史出入亦有宋元明三史皆不載而其人實足廉頑立懦如謝泉羽鄭所南趙若煥趙子固張旻褚師秀豈可

元史 凡例

三

因其遁世無聞而不表章之哉若楊維禎倪瓚雖名見明史而其傳寥落不足以傳其志節今更易之可以對勘

一舊史列傳之失昔人糾之備矣至其表志之謬陋更有出情理外者如八十八卷百官志中政院屬下有管領諸路打捕鷹房民匠等戶總管府所領四提舉司及十一提領所連敘兩次但文有餘簡一志之中雷同重複至宰相年表或開國元輔而表首無一字或官至平章左右丞參政其勳勞氣節載在史策而表中止書其姓者不可枚舉此皆顧亭林錢詹事糾繩所未及不知當日宋王諸臣何以全未寓目今一一攷紀傳補書以彌疏漏

一元史以麻志為最善蓋本郭守敬授時麻為全書之冠其五行志則諸史之重儻今已從刪惟天文志內有儀象一門今移附麻志之末以歸畫一其刑法志亦例禁之重儻今並芟雜其餘各志提綱挈領芟其蕪漫此外氏族表藝文志補自錢詹事大昕亦無遺憾今於禮志補宮室補陵寢而地里志於上都路則證以王惲口周伯琦紀程和林行中書省則證以歐陽原功高昌侯氏家傳張德輝和林邊埃紀程慈嶺以西阿母河行中書省則證以耶律楚材西游錄烏古倫北使記劉郁西使記長春真人西游記更加海國圖志中所載英夷印度之事而西北輿地頗如指掌舊史止據元一統志詳內地都省與十一行省視西北疆域如醯雞不知甕

元史 凡例

四

外有天今差雪斯憾

一元代人名重複尤俚本無定字亦由修史者不諳繙譯不定體例所致如帖木爾如海涯或作牙如拔都或作拔都魯或作魯如那顏或作那顏如火者貴稱即今所如荅刺罕功臣之如的斤番人稱其皆美號非名也又有稱某赤者如賽典赤直愷赤之類此以官連名如脫里王罕亦都護之類此以人連爵今凡名之連號連官連爵可省者省之如廉惠山海涯贊雲石海涯今止稱其不可省者酌畱之如燕帖木爾爾伯帖其俚名宜更者驢狗醜等字例以盧苟丑代之也兒等字例以耶爾代之其他傳可擇采者吾也而一作烏葉爾笑乃解一作蕭乃台桑哥一作桑葛伊刺一作耶律以及哲伯之作

元史語解略

元人以蒙古語命名或取於色察罕白也哈刺黑也兀
蘭紅也昔刺黃也曰闊闊曰孛羅皆青也或取於部族
曰蒙古台曰唐兀台曰兀良合台曰魯吉刺台曰塔塔
爾台曰遜都台曰散朮台曰肅良合曰亦乞列台或取
於行次耶孫九也塔本五也乃蠻八也朵羅七也朵爾
別一作榮魯班四也只爾瓦台六也乃顏八十也答蘭
七十也明安千也圖滿一作滿萬也或取於吉祥伯顏富
也只爾哈朗快樂也耶可大也耶先安也蔑兒千一作
傑多能也賽因好也或取於珍寶曰按彈曰速不台曰
帖木爾曰合失皆珍寶也曰答納都納石失綴大珠於
金錦也曰速不都納石失綴小珠於金錦也

元史語解

其官名異譯則主服御者曰速古赤主酒者曰答刺赤
主渾者曰邵刺赤主膳者曰博爾赤戶郎曰玉典赤圍
人曰阿塔赤佩弓矢侍左右者曰火爾赤亦曰闊端赤
佩寶刀侍左右者曰雲都赤以上見與服志及兵志典書記者曰
必閣赤見祭志治芻粟者曰孛可孫司城門者曰八刺哈
赤書寫聖旨者曰札爾里赤牧駱駝者曰帖麥赤牧羊
者曰火尼赤捕盜者曰忽刺罕赤奏樂者曰虎爾赤典
車馬者曰兀刺赤曰莫倫赤司鷹房者曰昔寶赤能快
行者曰貴由赤番直宿衛者曰怯薛耶可怯薛者言天
子自領之也見兵志又見博爾忽傳札魯忽赤謂斷事官也見赤
孫芒哥撒爾傳此元代第一尊官忠勇之士曰霸都魯
位在三公之上猶漢之大將軍也即今世之巴圖魯也諸部族軍非蒙古者
一作拔都一

曰探馬赤驛傳曰站赤以上皆見兵志官屬之長司總轄者曰
達魯花赤國語達魯花荷囊之口言政事啟閉於長官
猶囊口也譯官通事曰怯里馬赤見百官志
其稱謂通譯諸帝尊號太祖曰成吉思言天賜也世祖
曰薛禪大賢聰名之謂也成宗曰完澤篤言有壽也武
宗曰曲律言英傑人也仁宗曰普顏篤言有福之稱也英
宗曰格堅者明也明宗曰忽都篤言再來人也文宗曰
札牙篤者命也其曰大札撒者大法令也按答者定交
不易之友也折里麻者有謀略人也吾圖撒合里者長
壽人也月呂魯那演者能官也巴魯思者虎也默爾傑
者善射之尤者也蒙哥者長生也乞列思者野外繫馬
所也布渾察爾者許親酒也答刺罕者一國之長言得

元史語解

自由也答刺罕軍者征南蠻募勇悍為先鋒言縱恣無
禁也奧魯者軍出征其家在鄉里曰奧魯也八合識
者博士可為師者也刺馬者帝師也膽巴者微妙之法
也幹魯朵者一作窩謂宮室帳殿也質孫者一作直孫
一色服也畏吾者回紇之音轉也曰答失蠻曰耶里可
溫本紀免租稅皆有此二等人在僧道之外蓋回教之
師也元典章稱先生曰耶里可溫蓋可溫即今所謂阿漢也

元史目錄

邵陽魏源重修

本紀十四卷

列傳四十二卷

表七卷

志三十二卷

本紀

元史卷一

太祖上

元史卷二

太祖下

元史卷三

元史目錄

太宗
定宗

元史卷四

憲宗

元史卷五

世祖上

元史卷六

世祖下

元史卷七

成宗

元史卷八

武宗

元史卷九

仁宗

元史卷十

英宗

元史卷十一

泰定帝

元史卷十二

明宗

元史卷十三

文宗
寧宗

元史卷十四

順帝

列傳

元史目錄

元史卷十五

后妃

太祖母宣懿皇太后

太祖光獻皇后

太祖四斡爾朵諸后妃

太宗孛剌合眞皇后
乃馬眞氏諸后妃

定宗欽淑皇后

憲宗世祖母莊聖皇太后

憲宗貞節皇后
貞節后妹諸后妃

世祖四庭帳諸后妃

世祖順聖皇后
弘吉剌第三后

成宗母裕聖皇太后

成宗靜懿皇后 伯牙吾氏諸后妃

武宗仁宗母興聖皇太后

武宗惠聖皇后 明宗母亦乞列氏文宗母唐兀氏諸后妃

仁宗慈聖皇后

英宗懿聖皇后

泰定帝母淑聖皇后

泰定帝弘吉剌皇后 亦乞列氏諸后妃

明宗八不沙皇后 順帝母罕祿魯氏諸后妃

文宗弘吉剌昭宣皇后

順帝伯牙吾皇后

順帝奇氏二皇氏 龍淑妃

元史目錄

三

元史卷十六

皇子諸王

太祖諸弟 齊王合薩爾 遼王幹赤斤 定王別里古台 吳王合赤溫

太祖六子 朮赤大王 察合台大王 拖雷大王

太宗七子

睿宗十一子 楚王牙忽都

憲宗五子

世祖十子 明孝太子 鎮南王脫歡 梁王把匝剌 瓦爾密 晉王甘麻刺 懷王答剌麻巴刺

裕宗三子

武仁諸子

明文諸子

順帝子 愛猷識理達臘太子

元史卷十七

太祖平服各國

東北諸部 塔爾 蔑里吉 泰赤烏 東遼 東夏

漠北諸部 札答刺 克烈 乃蠻

東契丹耶律留哥

高昌

西夏

西契丹 北印度 欽察各國

元史卷十八

太祖憲宗兩朝平服各國

西域

西域藩封

元史目錄

四

元史卷十九

中統以後屢朝平服叛藩

東方叛王 乃顏合 等

北方叛王 阿里不哥 海都篤哇 蔑里等

元史卷二十

勳戚

特辟禪

孝圖

孝要合

元史卷二十一

開國四傑

木華黎 子李羅 孫塔思 速渾察 額都魯 曾孫乃燕 相威 玄孫阿魯圖 經的該

博爾朮 孫玉昔 玄孫阿魯圖 經的該

博爾忽 曾孫月赤察爾

赤老溫 曾孫芒哥撒爾

元史卷二十二

開國四先鋒二部長

速不台

哲伯 曷思麥里 布智爾

朮赤台

畏答爾

元史卷二十三

誓渾河功臣

札巴爾

鎮海

耶律阿海

懷都

雪裏堅那顏

塔海

忽魯渾

阿朮魯

耶律圖花

哈撒納

紹古爾

元史卷二十四

開國武臣

察罕益德 亦力撒合 立智理成

郭寶玉 子德海 孫侃

野里朮 昔里吉思

元史卷二十五

開國相臣

耶律楚材 子篤 粘合重山

楊惟中

元史卷二十六

開國文臣

岳璘 哈赤北魯 塔統阿

劉敏 李楨

元史目錄

六

元史卷二十七

平金功臣

石抹耶先 子查刺 膺魯華撒吉思不華 趙增

蕭乃台 烏耶爾 安札爾 耶律涅爾 闊闕不華

劉伯林 子巖 石天應

石抹明安 王楸 何質

按竺爾

史天倪 子揖 弟子樞 從弟天祥 王守道 王玉

張柔 子弘略 何伯祥 張榮 張宏

嚴實 子忠濟 忠嗣 張晉亨 趙天錫 王玉汝

董俊 子榮祖 李守賢

張子良 子懋 王珍 楊傑 奧敦世英

元史卷二十八

平蜀功臣

汪世顯 子德臣 良臣 孫惟正

阿巴赤

李德輝 呂瑩

李庭玉 楊大淵 楊文安

紐璘 子耶速答 劉元振 劉元禮 趙阿潘 郝

速哥 李進 石抹按只

元史卷二十九

平宋功臣

伯顏 孟祺

元史目錄

阿朮 趙璧 昂吉爾 芒兀台

阿里海牙 史格

董文炳 子士元 弟文蔚 阿剌罕

張弘範

李恆

博羅歡 焦德裕

塔出 校都百家奴

烏古孫澤

劉整 以下宋降臣附

呂文煥 范文虎

夏貴

雷夢炎 無傳

蒲壽庚 無傳

方回 無傳

元史卷三十

世祖相臣

史天澤

劉秉忠 張文謙

廉希憲

安童

不忽木 完澤 圖忽魯

全阿魯渾 子岳柱

葉李

徹里

元史目錄

元史卷三十一

世祖文臣上

姚樞

許衡

竇默

郝經

元史卷三十二

世祖文臣中

王暉 王構 高智耀

王鶚 高鳴 李冶 李昶 徐世隆

王磐 魏初 雷膺 胡祇通 高源 李謙

鐵哥 愛薛 撒吉思 納答思 又彙附色目三人

瞻思丁 子納速刺丁 忽辛

宋子貞 何榮祖 趙炳 劉肅

元史卷三十三

世祖文臣下

董文用 弟文忠 兄子士選

賀仁傑 子勝

賈居貞 張孔孫 多爾赤 千魯

耶先不花 劉漢卿

張德輝 馬亨

張昉 郝彬 楊混 吳鼎 梁德珪

賜師文 尚野 王利用 王思廉 孟攀錢 又集附張惠等八人

元史卷三十四

元史目錄

九

世祖言臣

崔斌 弟或

陳天祐 弟天祥

劉宣

姚天福 陳思濟 秦長卿 申屠致遠

張雄飛 馬紹 唐仁祖

程鉅夫

元史卷三十五

治麻治水漕運諸臣

楊恭懿

王恂 齊履謙

郭守敬

賈魯 尚文 成遵

羅璧 朱清 張瑄 李世雄

元史卷三十六

平叛藩諸臣

商挺 暗伯

李庭 伯帖木爾 塔出

昔班 鐵連

石天麟 劉好禮

玉哇什 劉哈刺 圖堅不花

土圖哈 子藏兀爾 張立 囊加台

阿沙不花 弟康里托托

元史卷三十七

元史目錄

十

平南夷東夷諸臣

兀良哈台 信其日 怯烈 愛魯 英楫 昔都爾

劉國傑 楊漢英 脫力世官

洪福源 子俊奇 張禧 王國昌

史弼 高興 亦黑彌什

趙良弼

梁曾

張立道

張庭珍 弟庭瑞

元史卷三十八

中葉相臣

哈刺合孫

李孟

拜住

元史卷三十九

中葉文臣

虞集 弟榮

白察罕 雅爾丁 脫烈海牙

馬祖常

夔夔 兄回回

白當 答里麻 月魯帖木爾

宋本 敬儼

郝天挺 曹伯啟 劉正 謝讓 王伯勝 韓若愚

吳元珪 戚夢解 陳顯

元史 目錄

十一

王都中

王克敬 劉敏中

元史卷四十

中葉言臣

陳思謙 秦起宗 李元禮

蓋苗

王約 王結

張養浩

張珪

楊多爾只 蕭拜住 趙世延 張思明 張起巖

元史卷四十一

天麻交兵諸臣

倒刺沙

義加台 諸王圖堅

燕帖木爾

柏顏

阿禮

元史卷四十二

元末相臣

塔識

多爾只 多爾直班

脫脫

賀太平 子耶先忽都

元史卷四十三

元末文臣

元史 目錄

十二

許有壬

蘇天爵

王思誠

李好文

李朮魯 子遠

呂思誠 崔敬 貢師泰 亦憐真班 達理麻識理

元史卷四十四

元末言臣

陳祖仁 王遜志 李復 歸賜

張楨 烏古孫良楨

元史卷四十五

至正討賊諸臣

泰不華 石林玄孫 邁里古思

李黼

星吉 納麟 卜顏帖木爾

荅什拔都魯

余闕

董搏霄 弟昂霄

慶童

耶速

察罕帖木爾 擴廓

元史卷四十六

儒林一

趙復

元史 目錄

三

金履祥

許謙 張樞

吳澄 鄭淵孫陶孫 牟應龍

熊明來 陸文圭

劉因 安熙

講料 韓擇 侯均 同恕 第五居仁

杜瑛

張特立

陳庚

儒林二

張璽 孔思晦 趙侃

耶律有尚

曾巽申 無傳

楊桓

贍思

袁桷

曹元用

儒林三

胡長孺 胡一桂 胡炳文 陳傑 陳滸

吳師道

韓性 程端禮端學 周仁榮仔肩 孟夢恂

黃澤

儒林四

董朴

元史 目錄

四

宇文公諒

杜本

孫轍 吳定翁

何中 危復之

武恪

陳深 無傳

黃許 陳樵

王毅 無傳

鄭玉 黃崙

顏師聖

吳當

元史卷四十七

文苑

姚燧

趙孟頫

黃潛

貫雲石

阿榮

戴表元

閻復

揭傒斯

歐陽玄

元明善

謝端

元史月錄

五

文苑

陳孚

范梈

楊載

陳旅

張翥

顧輝

周伯琦

李洞

楊維禎

元史卷四十八

良吏

譚澄

許楫

田滋

卜天璋

楊奐

韓鏞

袁裕

鄧文原

耶律伯堅

段直

諳都刺

楊景行

元史月錄

未

林興祖

觀音奴

周自強

白景亮

王良

盧琦

鄒伯顏

劉秉直

許義夫

元史卷四十九

忠義一

月里麻思 唐慶

石珪 李伯溫

攸哈刺 任志 耶律忒未

合刺普華 伯巴

劉天孚

昔班帖木爾 女刺八哈屯

忠義二

伯顏不花

道童

全普庵撒里 周鏗

聶炳 劉明孫等

高昌字羅 卜理牙敦

潮海 黃紹等

元史 目錄

汪澤民

忠義三

李齊 趙璉盛昭

石普

納速刺丁 樊執敬

褚不華

月魯不花

達識 昔化帖木爾

忠義四

普顏不花

福壽

閔本 拜住

趙弘毅

朴賽因不花 張庸

柏帖木爾

迭里彌實 獲獨步丁等

忠義五

張桓

郭嘉

周喜同 塔不台

王英

彭庭堅

王伯顏

劉濬

元史 目錄

多里不花

忠義六

顏瑜 曹彥可

喬彝 張昂起等

楊乘

劉鶚

元史卷五十

孝義一

蕭道壽

尹莘 孫希賢 卜勝榮

劉通

張旺員

孝德

匡國政

孝義二

高必達

劉琦

曾德

羊仁

黃覺經 章卿孫 魚全 李鵬飛

陳斗龍

趙一德

陳韶孫

孝義三

郭苟

元史目錄

九

樊淵

賴祿孫

王閏

郭道卿

田喜

張紹祖

李明德 石永 張維

孫抑

劉思敬

王初應

施合德

石明三

徐鈺

孝義四

長壽

梁外僧等

楊一 張本 張慶 元善

郭全 劉德等

吳好直

劉德泉 朱顯 吳思達 朱汝諧

劉廷讓

扈鐸 唐獻

孝義五

徹徹

邵敬祖 李彥忠 譚景星 郭成

何從義

孔全 張子夔 陳乞兒等

黃贊

元史目錄

十

靳昂

王克己

孝義六

丁越

王思聰

胡光遠 龐遵

王庸

丁文忠

李忠 吳國寶

李茂

王篤

梅應發

陸思孝

姜兼

湯霖

楊皞

余丙

宋杞

趙榮

甯諸苟 李家奴

畢耶速

王士弘

黃道賢

史彥斌 元史目錄

杜佑

孫瑾

孝義七

鄭文嗣

趙毓

張閏

魏敬益

訾汝道

孫秀實

黃國華

瞿嗣興

三

陳謙

顧德玉

秦君昭

元史卷五十一

遺逸 有目無傳

謝朝

鄭所南

趙若煥

趙子固

張旻

褚師秀

元史卷五十二

元史目錄

列女一

葛妙貞 畏吾氏三女

葛孝女

秦氏二女 孫氏女 許氏女 張氏女

閻氏 劉氏

馬英 趙玉兒

只魯花真

王德政妻郭氏

朱淑信

趙孝婦

白氏

胡孝女秦

三

任仲文妻林氏

張氏女 高氏婦

李景文妻徐氏

臺叔齡妻劉氏

李智貞

姚氏 方雷妻官勝娘 王氏女 劉平妻胡氏

列女二

周朮妻崔氏

武用妻蘇氏

江文鑄妻范氏 趙野妻柳氏

賈瓊妻韓氏

譚節婦趙氏

元史目錄

王婦

闕文興妻王氏

沈氏

李如忠繼室馮氏

霍榮妻段氏

朱虎妻茅氏

秦閏夫妻柴氏

鄭琪妻羅氏

陳淑貞 劉公翼妻蕭氏

左幼白妻龍氏

李伍妻張氏

焦士廉妻王氏

三

柯節婦陳氏

葛通甫妻丁氏

鍾秉敬妻黃氏

曹泰才妻劉氏

朵那

李哥

杭忽思妻

拜降母徐氏

高鯁妻葛氏 闕

李金兒

元史卷五十三

藝術 存二傳

元史目錄

李俊民

朱震亨

元史卷五十四

釋老 無目無傳

元史卷五十五

奸臣

阿合馬

盧世榮

桑葛

元史卷五十六

羣盜 有目無傳

韓林兒 劉福通

丙

徐壽輝
陳友諒
張士誠
方國珍
明玉珍
表
元史卷五十七
宗室世系
元史卷五十八
諸王
元史卷五十九
三公
元史目錄
宰相
元史卷六十一
氏族上
元史卷六十二
氏族中
元史卷六十三
氏族下
志
元史卷六十四
麻一
元史卷六十五

五

麻二
元史卷六十六
麻三
元史卷六十七
麻四
元史卷六十八
麻五
元史卷六十九
麻六
元史卷七十
麻七
元史卷七十一
元史目錄
地理一
元史卷七十二
地理二
元史卷七十三
地理三
元史卷七十四
地理四
元史卷七十五
地理五
元史卷七十六
地理六
元史卷七十七

美

河渠

元史卷七十八

禮

元史卷七十九

樂

元史卷八十

選舉

元史卷八十一

百官一

元史卷八十二

百官二

元史卷八十三

元史目錄

百官三

元史卷八十四

百官四

元史卷八十五

百官五

元史卷八十六

百官六

元史卷八十七

倉貨上

元史卷八十八

倉貨中

元史卷八十九

毛

倉貨下

元史卷九十

兵

元史卷九十一

藝文一

元史卷九十二

藝文二

元史卷九十三

藝文三

元史卷九十四

藝文四

元史卷九十五

元史目錄

外國

天

元史卷一

本紀一上

太祖上

太祖法天啟運聖武皇帝諱鐵木真姓奇渥溫氏蒙古部人金世所謂韃靼國也有白韃黑韃二部皆在漠北白韃部顏色稍皙在臨潢陰山之北盧胸河之東亦有生熟二種近漢地者為熟韃黑韃金史謂之兀族能種秫炊食介蕃漢之間其遠者曰生韃黑以游牧為生異於契丹之射獵金史謂之沙陀亦謂之阻鞏人強武而地不產鐵故無兵甲矢用骨鏃遼時互市鐵禁甚嚴及金世廢宋河東鐵錢不用皆歸塞外韃靼得之大作軍器又製魚皮為甲兵益強於是出沒為邊患金太宗天會間自稱大蒙古國改元天興號太祖元明皇帝金元朮以兵八萬討之連年不克

元史卷一本紀

乃多給金幣羈縻之故元朮臨終遺表以西夏北蒙為憂其後屢世倔強金世宗大定間童謠有達達趁官家之語或言此白韃患國之兆孟洪蒙達備錄金時童謠曰韃韃來韃韃去趁得官家沒去處金主金主乃下令每歲出兵向北剿殺必使雍開之驚曰此必無壯士謂之滅丁蒙古殘破分十餘部逃遁沙漠怨入骨髓至章宗明昌間始停此令生聚滋衍漸復蕃盛會金宗室愛王叛據遼東結西北契丹眾十數萬於是北阻鞏韃靼亦起應之金遣丞相完顏襄先後出師乃築長城塹山濬濠數百里為界以唐古兀部戍守之遼漠北諸部之衝此皆白韃部也元太祖則黑韃部在盧胸河之西當白韃強盛時金人或糾黑韃攻其後置東西招討使以統轄之及太祖興而白韃諸部先後來屬反為鄉道以攻燕此二

部之大略也白韃舊或稱蒙骨部或作蒙兀部後遂以部為氏即太祖時二蒙部之兀魯氏芒兀氏太祖初起慕蒙古為北方雄國故亦稱大蒙古云太祖先世居漠北幹難河源之布爾罕山下其十世祖曰孛端察爾者母夢金色神自天而下有身一乳三子孛端察爾其季也漁獵於統格黎河有居民數十家推為長三傳至曾孫曰海都長而豪勇有巴納忽人推為長遂以兵攻其仇耶刺伊而部臣屬之列營於巴達合黑河跨河為梁旁部歸者漸眾子孫蕃衍各自為族不相統屬海都三傳至葛不律始自立為合罕即太祖之曾祖也合罕即可汗乃葛不律汗生七子次曰巴里丹孫曰耶速該是為太祖皇考追諡烈祖神元皇帝初葛不律汗歿不以部眾屬其七子而以屬其從叔

元史卷一本紀

父之子俺巴海俺巴海汗為塔爾部譜於金被害部眾復立葛不律汗之子忽圖刺汗率族往復塔爾部之仇時烈祖以什夫長從行虜其部長鐵木真以歸適訶額倫太后生子因以鐵木真名之是為太祖皇帝帝生於金世宗大定二年歲在壬午時烈祖積功至百戶千戶略有土馬嘗救克烈部脫里罕於難約為兄弟閱九歲而烈祖歿時俺巴海之子泰赤烏自立為合罕其母與訶額倫太后有隙泰赤烏欺帝孤幼盡奪其部眾惟與母弟數人射獵為生稍長泰赤烏又忌其英勇屢謀害之語詳太祖削平諸國傳帝籍數載及壯有室始乞助於父執克烈部脫里罕及已所善疏族札木合各資以士馬始招還舊部與札木合連營逾年復有隙分軍而歸初黑韃部形短貌寢惟太

禮雄偉廣額長髯臂垂過膝豁達果決輕財好施與重信義與士同甘苦鄰部多苦其酋侵暴相與謀曰鐵木真太子衣人以其衣乘人以其馬獵則毆獸任人多獲真吾主也於是鄰部壯士相率來歸或自札刺爾部至或自塔爾忽部至或自乞顏部至或自巴魯刺部至或自兀良合部至或自別速部至或自速都部至或自晃豁壇部至或自朵別部至或自斡羅納部至或自巴阿林部至或自札荅刺部至或自主爾乞部至數年遂有眾數萬眾議於闊闊納活兒海子立為成吉思合罕成吉思者蒙古語天賜也時金章宗承安三年歲在戊午太祖年三十有六矣乃使博爾朮博爾忽等四人或掌弓矢或掌飲膳或掌修車或掌羊羣馬羣或掌護衛又使人告稱汗於克烈部里罕札

元史卷一本紀

三

荅刺部即札合時秦赤烏少施好奪屢攘其部下所有部人苦其虐多棄主來歸會札木合亦忘帝內隙明年秦赤烏遂合札木合十三部兵三萬來攻帝亦大集諸部兵分十三翼迎戰不利退保斡難河又明年歲在庚申金遣丞相完顏襄討塔爾部之叛逐其北走帝與脫里罕奉檄合兵邀擊塔爾部於納刺禿什圖之野獲大珠金銀綳車各一獻諸金金加帝官號曰札兀圖魯漢語招討使也并封脫里為王故脫里亦稱王罕又明年辛酉冬秦赤烏復約十三部推札木合為盟長來攻帝恐力不敵復約脫里王罕合軍以拒乘風雪大戰破諸闕奔壇之野王罕追札木合帝追秦赤烏又連戰於斡難河帝頸中流矢創甚麾下赫勒蔑夜入敵軍竊漣酪歸以飲帝詰旦復戰秦赤烏潰遁

其部壯士若赤老溫父子若折伯及其善戰之芒忽部兀魯部皆來歸盡有秦赤烏札木合二部之眾擴地至怯絲連河即魯連河也或作克魯倫河或作怯呂連河或時連河作盧胸河或作龍駒河或作陸局河或作龍居河時金章宗泰和元年太祖年三十九矣又明年壬戌太祖復破察阿安塔塔爾二部虜其四種奧魯是年王罕為乃滿所破乃滿一盡失部眾西走回紇困飢不能自存帝遣人迎還資以貲財士馬招還其部曲并代攻掠鄰部以益之王罕復為乃滿酋兒卜魯汗所襲魯汗一作魯汗一求援於帝借帝四良將率兵破乃滿奪回所掠王罕亦自攻蔑里吉部大獲而還復大振王罕德帝甚約為父子盟於土臘河黑林帝尊之曰翁汗而回屯客魯連河東北之巴勒渚海子即班居與王罕分牧地以客魯連河為界而札木合在王尼河也

元史卷一本紀

四

罕軍中不利王罕之與帝睦也日夜構其子奔刺合陰圖帝約往宴而害之帝不果行於是潛師來襲會其圍人泄謀帝亟移輜重於他所嚴兵四千六百騎分兩隊以待陣於合蘭只之野帝初戰不利復集士再三力戰始克之王罕父子敗歸帝使使往數其負德并詰兵端語詳削平各國傳使一再往返而奔刺合詞愈憤帝知勢不兩立乃假請合薩爾妻子為名而潛師隨其後遂大破庭帳王罕父子皆走死盡收其部眾方戰時王罕兵強盛帝未卜勝負退保班朱河一作班朱河乃約部下十九人同飲河水誓曰所不今日僂力同心他日世同休戚者有如河即所謂飲渾河十九功臣也時歲在癸亥金泰和三年太祖年四十有一威德日著擴地至土臘河乃滿部者在土臘河之西依

沈海山爲國而建牙於塔米爾河卽自昔北匈奴回紇王庭所謂和林者也土馬數十萬世雄漠北至太陽汗驕無紀律會諸部故酋敗投乃滿者多請兵報復而太陽汗聞帝吞并東北諸部惡其抗己乃遣人約東北白韃部夾攻蒙古白韃不從反執其使來告太祖議先發制之乙丑夏馬方瘦嚴議俟秋高馬壯舉兵帝謂馬之肥瘦敵軍同之不如乘其不備乃選軍馬立千百戶什夫長設六等徹爾必官仲夏祭纛興師溯客魯連河而上選死士千爲先鋒再戰於杭海山大敗敵眾禽太陽汗帝收其部眾牲畜盡有漠北之眾控弦數十萬與西回紇接壤語詳太祖削平各國傳明年歲在丙寅羣臣宗族大會幹難河其議以帝功德隆盛天順人從請上尊號曰成吉思皇帝乃建九旂

元史卷一 本紀

五

白纛卽皇帝位於幹難河之源國號大蒙古時帝年四十有四金章宗泰和六年也大資功臣木華黎博爾朮各授左右萬戶而納牙爲中軍萬戶惟木華黎封國王餘九十五人各授千戶又以舊人蒙力克曾諫赴王罕之宴豁爾赤早告頑兆均封萬戶謂芒忽兀魯二部勁旅爲國爪牙其各封四千戶又謂先鋒曰哲伯曰忽必雷曰速不台曰赭勒蔑四人摧堅陷陣所向有功其各授千戶又詔曰朕初止有宿衛八十人散班七十人今蒙天祐君長羣部其於各萬戶千戶百戶內選萬人爲宿衛以功臣十人分領之出征則爲前鋒平時宿衛分四班以四親臣領之惟扈帳殿御營不許調發又詔曰初立國者吾母今與幼弟幹赤斤共分一萬人吾長子朮赤與九千人次子察合台八

千三子窩闊台四子拖雷各五千諸弟合薩爾四千阿勒赤台二千孛勒古台千有五百時國俗無文書以草青爲一年月圓爲一月漣酪牛羊爲食皆騎軍無步卒馬皆自駒時教習馴擾千馬一羣寂無嘶鳴不控繫而不走逸畫不芻秣夜始牧放人有數馬日更一騎故無隕困起兵數十萬略無文字自元帥至千百戶什夫長傳令而行其發命令於遠方則遣使飛騎往返口傳無敢增損一字不知何國號年號及東征西伐得回鶻及金降人教之始用回鶻字行文於西域用漢字行文於女真自稱曰大朝曰龍兒年虎兒年兔兒年以紀干支中國或傳其稱龍虎紀年者非也以羊爲糧以馬乳止渴其內侵中國食羊盡則射兔鹿野豕爲食故屯數萬之師不齋糧餉臨敵不用命者

元史卷一 本紀

六

雖貴必誅軍無得私掠戰畢均分上下爲多寡必畱一分爲成吉思獻其大臣親王居守漠帳不臨戎者亦預分數焉凡征伐議於夏其定秋令所向各掃其部辟暑牧養至八月咸集雲中而後行帝既定漠北得白韃部及金降臣鄉道始議征金征夏

元史卷一終

元史卷二

本紀一下

太祖下

太祖即帝位之元年丙寅金主璟泰和六年宋寧宗開禧二年也時乃滿太陽汗甫敗死其兄布魯汗已獻女迎降復叛去太陽汗子屈出律汗亦誘已降之蔑里吉部叛據阿勒台山太祖既即位遂發兵復征乃滿餘黨時布魯汗獵於兀魯塔山禽之以歸又追屈出律蔑里吉二酋於耶爾的石河即今之額爾齊斯河也射殪蔑里吉酋惟屈出律奔西契丹帝遣速不台追之而回軍和林命長子朮赤征嶺北林木中部落闢地至北海盡有漠北之眾控弦數十萬與西回紇接壤初金有殺帝族祖俺巴海汗之仇會金叛宗愛王大辯自遼東遣使來具言金主璟殺戮宗

元史卷二 本紀

一

親荒淫日甚帝聞之始議伐金以西夏與金唇齒乃先用兵於西夏舊史謂金降俘來具言金主璟肆行暴虐乃議落安得有金降俘或即大金國志所述金愛王自遼東請援之信然大金國志全本於南遷錄而此錄子盾荒謬決不可信於明昌五年被誅後不書一事惟鑄王允中傳云允中於明昌五年被誅其子石古乃之號謀反被誅其子石古乃初未受王封也與定二年亳州民又造妖言愛王匿民間終當奮發云云是愛王必謂鄭王允蹈之子故愛王復仇之說民間明云是愛王必謂鄭王允蹈之子故愛王允蹈以謀反伏誅以財產分賜諸王公五年二月辛酉上京等九路并諸州府處置軍兵萬俟來春調發並命諸部及北阻鞬以六年夏會兵臨潢六年五月行省都事獨罪賜死六月承相清臣遣使來獻捷八月行省都事獨率駙馬都尉僕散揆等進軍大鹽澤分兵攻取諸營招撫北邊軍民明年改承安元年大鹽澤羣牧使移刺觀德壽等反泰州軍擊敗之十二月遣使勞賜北邊將士授官者萬一千人受賞者二萬人八月以邊事未甯詔集六匹錢三十二萬貫又承安二年八月以邊事未甯詔集六

品以上官問攻守之計於方略材武者破格選用又遺官分詣上京東京北京咸平臨潢西京等處招募漢軍不足則發補之此皆章宗時東北用兵之明證但謂章宗之名不知所謂何人正所謂欲益適損者耶王士之必有人冤故泰和七年詔追復允中允蹈王爵又為之改葬立後所以昭雪其枉而求解於愛王也南遷錄年號世次官名人名錯謬固多不可盡信而其東北用兵一事則同見金史本紀斷非無因其降俘諸蒙古求援亦見元史太非無因

二年丁卯金主璟泰和七年宋寧宗開禧三年也秋帝征西夏克幹羅海城是歲遣使於嶺北乞利吉思部既而野帖亦納里部阿里替耶爾部皆遣使來獻名鷹皇子朮赤將右軍征幹亦刺部用降人為鄉道遂征幹亦刺圖巴思諸部皆下之

三年戊辰金主璟泰和八年宋寧宗嘉定元年也春帝至自西夏夏避暑龍庭是年冬十月金主璟卒諡為章宗其

元史卷二 本紀

二

叔父衛王允濟立舊史以蔑里吉汗及屈出律汗之敗敘於此是年誤以元年事為二年事也據秘

四年己巳金主允濟大安元年宋寧宗嘉定二年也畏吾國亦都護遣使來貢帝入河西夏主李安全遣世子率師來戰敗之獲副元帥高合公克兀刺海城俘太傅西壁氏進至克夷門復敗夏師獲夏將鬼名合公薄中興府引河水灌之隄決水外潰遂解圍遣太傅訛荅入城招諭夏主夏主納女請和五年庚午金主允濟大安二年宋寧宗嘉定三年也春金謀來伐築烏沙堡帝命前鋒哲伯襲殺其眾遂略地而東初帝未即位受金職為招討使貢歲幣於金金主使衛王允濟受貢於靜州帝見允濟不為禮允濟歸請兵攻之既

而不果會允濟嗣位有詔至國傳言當拜受帝問金使曰
新天子爲誰金使曰衛王也帝遽南面唾曰我謂中原皇
帝是天上人作此等庸懦人亦爲之邪即乘馬北去自是
遂與金絕益嚴兵爲備數侵掠其西北部

六年辛未金主允濟大安三年宋寧宗嘉定四年也春帝
居怯綠連河西域哈刺魯部來降畏吾國亦都護來觀二
月帝自將南伐侵雲中九原敗金將定薛於野狐嶺取大
水濼豐利等縣初金將哈納邁住守北邊知蒙古將內侵
密請設備金主責以擅生邊釁至是問帝大舉南下大懼
集廷臣議軍事不決遣使求和帝不許七月命左帥哲伯
略地以金降臣耶律阿海爲先鋒乘勝破白登城遂攻西
京今大敗金留守紇石烈執中等一名胡沙虎追至翠屏山遂

元史卷二 本紀

三

取西京及桓撫州八月帝敗金師於宣平之會河川九月
拔德興府居庸關守將遁去哲伯遂入關中都戒嚴大軍
游奕城下金主議以細軍五千自衛奔南京會細軍五百
誓死迎戰蒙古兵多傷問所俘鄉民此軍有幾鄉民給曰
二十萬遂襲金羣牧監驅其馬而還遣皇子朮赤察合台
窩闊台分徇雲內東勝武朔豐淨等州下之是冬駐蹕金
之北境

七年壬申金主允濟崇慶元年宋寧宗嘉定五年也春正
月帝破昌桓撫等州援兵二十萬於野狐嶺秋遂圍西京
復誘敗金元帥奧屯襄援兵於密谷口盡殲其眾帝亦中
流矢遂解圍所克德興等城堡金人復取之帝將休兵漠
北會金降臣劉伯林等皆言金有天下十七路今甫得雲

中東西兩路然山前民不習戰已望風解體宜乘此取金
東京覆其根本中原可傳檄定帝乃引兵而南冬十二月
左帥哲伯攻東京不下伴解圍去遣人往諭而潛師隨其
後竟襲取之按耶律留哥傳太祖十年乙亥留哥破東京
破東京而秘史又謂哲伯襲破者東昌非東京種不
但此時元兵未至東昌而東京十餘年後尙爲萬奴所據
傳聞異詞姑並存之先是金上京留守徒單鑑上言國家與蒙古交
兵以來彼聚而攻我散而守以聚攻散勢所不敵不若入
保大城并力備禦昌桓撫三州素號富強可內徙其民以
益兵又奏遼東國家根本距中都千里緩急請報不濟可
遣大臣行省以鎮之金主謂徙民是自蹙境土且無故設
行省動搖人心不從至是西京東京相繼陷沒耶律留哥
復以上京叛而來降中外震動金主乃大悔

元史卷二 本紀

四

八年癸卯金主珣貞祐元年宋寧宗嘉定六年也春遼裔
耶律留哥起兵十餘萬於隆安自稱都元帥號遼王改元
元統敗金元帥完顏承裕之兵舊史言承裕之兵六十萬
古不暇何得有六十萬攻遼東之事止書於留哥傳而不
見本紀明爲留哥降元時虛張已功之詞不可信承裕一
名胡沙遣使來附秋七月蒙古軍克宣德德興二府進至懷
來及金行省完顏綱元帥高琪戰敗之追至居庸北口金
兵固守治鐵鋼關門布鐵蒺藜百餘里守以精銳蒙古兵
不能前乃趨紫荆關入敗金師於五回嶺拔涿易二州分
命哲伯同速不台由居庸關左開道反攻南口出居庸關
之背遂奪其險按舊史本紀言攻居庸關不入乃改趨紫
松林中開道入一事二計疑林中開道僅容一騎不足容
大眾故太祖自引大軍趨紫荆而別遣哲伯從速不台以
偏師數百由開道入蓋八月金胡沙虎兵敗懼誅遂弒其
奇正相兼而用之也

主允濟立豐王珣改元貞祐是秋帝復以一軍屯燕都城北綴金禁衛軍而別分兵三道命皇子兀赤等為右軍循太行而南取保州中山邢洛磁相衛輝懷孟諸郡直抵黃河掠澤潞遼沁平陽太原開皇弟合薩爾及幹陳那顏等為左軍遵海而東取薊灤及遼西諸郡帝與皇子拖雷為中軍取雄莫河間清滄景獻泰安濟南濱棣等郡每路皆以金降人為鄉道時金諸路兵皆調赴山後防邊內地虛空乃僉鄉民守城我軍盡驅其家屬來攻父子兄弟遙相呼應人無固志又下令降者免拒者屠故所向無不克凡破九十餘城兩河山東數千里城郭廬舍巨墟金帛子女牲畜盡歸沙漠惟燕京通順真定青沃太名東平德邳海州十一城未下是冬帝至燕三道兵還合屯大口以偏中

元史卷二 本紀 五

都是年冬十月金大將高琪以虜軍討胡沙虎殺之初胡沙虎弑逆國人懷怨言者多請正其罪金主貪其援立功不忍殺至是為虜軍所戮乃詔暴其罪宣示中外九年甲戌金主珣貞祐二年宋寧宗嘉定七年也初金忠獻王粘罕營燕城因遼人宮城於內城外築四城每城各三里前後各一門樓櫓池塹倉廩甲仗庫各穿地道與內城通時人皆笑其過計粘罕曰百年間當以吾言為信至是命京師富戶遷入東子城百官家屬入南子城宗室保西城戚里保北城各分守兵四千內城二萬盡運瓦石薪米入城既而積雪冰互北兵乏食正月北兵攻南順門破金人設拒馬於南街縱其入己半里自縱火燒四旁屋街狹屋倒崩北兵死傷甚眾北兵又攻內城四城兵皆迭自

城上擊之北兵失勢圍城自冬逾春不破舊史但言城不錄得之由則惟南遷三月以天暑將班師時軍在中都之北諸將請乘勝破燕太祖不從乃遣使諭金主曰山東河北郡縣悉為我有汝惟守燕京耳天既弱汝我復迫汝以險天其謂我何今大軍將還汝能犒師以弭諸將之怒否金主遣使求和奉衛紹王女岐國公主及金帛童男女車馬以獻帝遣使如金迎女師還金遣丞相完顏福興送帝出居庸金主以河北山東畿輔盡失蒙古兵朝發夕至且兵燹後市巷蕭條城外旱饑草莽彌望盜賊蠭起燕京不能守夏五月遂遷都於汴留平章完顏承暉及參政抹撚盡忠輔太子守忠固守中都帝聞之怒曰既和而復遷都是可疑心特以解和款我耳復圖南侵適金所招北邊虜

元史卷二 本紀 六

部二十五族為軍二千人以禦蒙古者至是扈衛南遷高琪下令鎧馬悉令還官軍憤怨作亂六月殺金將自推主帥來納款時帝避暑魚兒澳方怒金南遷遂遣石抹明安援之入古北口與虜軍合偏中都秋七月金主用高琪言并召太子守忠赴汴冬十月帝命木華黎征遼西舊作遼蘇天爵名臣高州盧琮金樸等以城降錦州張鯨殺其節度使自立為臨海王遣使來附始置行省於宣平以統金降民十年乙亥金主珣貞祐三年宋寧宗嘉定八年也春正月金右副元帥蒲察七斤以通州降二月木華黎攻金北京金元帥寅答虎以城降舊史作寅答虎烏古倫攸東平王辨姓名顯則以烏耶爾權兵馬都元帥鎮之遂進偏輿中

府元帥石天應相繼來降金主遣使招耶律留哥降不應乃命宣撫司完顏萬奴屯兵瀋州經略遼東舊史留哥傳領軍四十餘萬攻之又遣左副元帥伊刺都魯以兵十萬攻之皆為留哥擊敗案是時金已遷汴燕都旦夕不保何得有數十萬兵攻遼東舊史不書於本紀明亦留哥降元時自修攻伐之詞不可信又本紀皆作蒲鮮萬奴惟本華黎傳作完顏萬奴又兀良合台傳作三月金主遣御史中丞女真國可蓋為金宗室今從之

李英等來援中都敗之霸州守將史天倪降夏四月詔錦州張鯨總北京十提控兵從南征鯨謀叛伏誅鯨弟致遂據錦州自稱瀛王改元興龍下平灤瑞利義懿廣寧等州木華黎遣先鋒權帥烏耶爾等軍討之時金丞相高琪忌承暉成功中外援兵無一至中都者五月庚申金中都留守完顏承暉仰藥死抹撚盡忠棄城走先後圍中都三年乃克之時帝方避暑桓州遣使籍中都帑藏輦運北去得

元史卷二

本紀

七

遼宗室耶律楚材留侍左右金遣使求和帝報使命以河北山東未下諸城來獻去帝號為河南王金不從授史天倪右副都元帥賜金虎符南征八月天倪取平州木華黎遣史進道等攻廣寧府降之是秋取城邑凡八百六十有二冬十月金遼東宣撫司完顏萬奴為耶律留哥所敗走保東京留哥攻陷之萬奴率眾十餘萬走海島會留哥所部內亂萬奴復據遼東僭稱天王國號女真舊史本紀作大真案兀良合台傳作女真國今從傳改元天泰十一月耶律留哥來朝以子薛闡入侍

十一年丙子金主珣貞祐四年宋寧宗嘉定九年也春還盧朐河駐軍魚兒灤夏取金曹州及霍山諸隘秋遣三模合拔都將萬騎由西夏趨關中攻潼關不下乃由嵩山小

路趨汝州過山澗輒以鐵槍連鎖為梁直抵汴京金主急召花帽軍於山東來拒蒙古軍不利時金知平陽府胥鼎聞蒙古兵渡河即遣必蘭阿魯帶徒單百家帥兵萬五千由便道濟河趨關陝而自以精兵援汴京又使僕散掃吾出帥諸將兵以拒蒙古兵之自關而東者金主拜胥鼎尚書左丞行省事於平陽鼎慮蒙古兵扼河乃檄絳解隰吉孟州五經略司會師夾攻及蒙古自三門集津北渡至平陽鼎遣兵拒戰蒙古敗去金人乃乘冰渡河還陝州遂復潼關時金平章高琪以蒙古兵日逼欲以重兵駐汴自固郡縣殘破不復恤又力勸金主南伐宋以廣疆土河北兵力益分冬十月完顏萬奴降以其子帖哥入侍既而復叛僭稱東夏木華黎克錦州殺張致遠西平

元史卷二

本紀

八

十二年丁丑金主珣興定元年宋寧宗嘉定十年也始置行省於燕雲以圖中原是歲帝將自征西夏以中原事任木華黎秋八月以木華黎為太師封國王將蒙古虜漢諸軍南征詔曰大行以北朕自制之大行以南悉以責卿賜大駕所建九旂旗命諸將咸受節制如朕親臨於是木華黎專征河北拔遂城蠡州冬克大名府遂東定益都淄登萊濰密等州

十三年戊寅金主珣興定二年宋寧宗嘉定十一年也秋八月兵出紫荆口獲金將張柔授河北都元帥木華黎自西京入河東克太原平陽及忻代澤潞汾霍等州金將武仙攻滿城張柔擊敗之是年帝伐西夏圍其王城夏主李遵頊令其子居守而自奔西涼契丹六哥據高麗江東城

命哈真札刺率師平之高麗王噉遂降請貢方物

十四年己卯金主珣興定三年宋寧宗嘉定十二年也春張柔敗武仙拔祁州曲陽中山等城深冀以北鎮定以東悉望風來附夏六月乃蠻太陽汗子屈出律據西契丹國殺使者帝怒而西征時方攻西夏西夏偽請和且請出師以從帝乃舍西夏而征回紇回紇者本乃蠻部舊名及屈出律竄據西契丹仍以回紇稱之西契丹世號西遼即前遼宗室耶律大石國也遼亡率所部據有西域葱嶺東西地傳國八十餘年至是屈出律投之為所寵任得兵權乃誘契丹主出獵伏兵八千禽之尊為太上皇而篡其國竝脅葱嶺以東天山南北諸部皆為役屬帝恐其梟雄鳴張將復搖漠北和林舊都乃親率大軍由天山北路取訛荅

元史卷二本紀

九

刺城禽其酋遂進逾葱嶺以擣之諸皇子分攻天山以南于闐諸城亦為一路竝會于西契丹之西都河中府即葱嶺西尋思千城也是年秋木華黎克尙嵐吉陽等州進屠絳州金平章高琪用事凡精兵皆聚河南而置河北於不問西啟夏費南侵宋疆為擴邊之計又棄汴京外城不守更築襄城四十里盡取民家輒發蔡京宅得輒二百餘萬勞費無算復請修山寨於少室山以辟兵號大小二御寨有識者至比為景陽之井琪於異己者輒出之河北州郡險地人心解體琪尙自負修襄城功謂敵即至可無虞金主責之曰僅守一城何以為國何如拒寇不至城下之為愈琪語塞是冬以罪伏誅然其黨高汝礪白撒猶用事明年三月汝礪進尙書省右丞相陝西行省督鼎罷

十五年庚辰金主珣興定四年宋寧宗嘉定十三年也春

三月帝克蒲華城夏五月克尋思千城駐蹕耶石的石河秋攻克幹脫羅兒城木華黎徇地至真定武仙降以史天倪為河北兵馬都元帥仙副之濟南嚴實相彰德大名磁洛恩博濬滑等州戶三十萬來歸冬木華黎攻東平不克留嚴實守之分兵徇河北諸郡金邢州節度使武貴降秦定軍節度使完顏畏可死之授董俊右副都元帥駐臺城十六年辛巳金主珣興定五年宋寧宗嘉定十四年也時乃蠻酋屈出律亡為大將哲伯所斬西遼諸城復叛歸回回算端春帝攻卜哈爾等部復克尋斯千城皇子朮赤攻養吉千巴爾真等城竝下之夏四月駐蹕鐵門關金主遣烏古孫仲端奉國書遠逾葱嶺至行在請和稱帝為兄不

元史卷二本紀

十

允末漣水忠義統轄石珪以眾降金東平行省事芒古棄城遁嚴實入守之自金南遷以大河為固大河以東平為藩籬又前此所破城邑即委去之未嘗置兵戍守故旋為金據連年攻戰不息至是東平復拔木華黎懲前失命嚴實石珪中分其城安撫南北州郡於是金不能復守山東六月宋遣苟夢玉來通好約兵攻金使報之秋帝攻葱嶺西班牙勒紇等城皇子朮赤察合台窩闊台分攻葱嶺東于闐玉龍傑赤等城下之冬十月皇子拖雷克哈薩克布魯特喀什噶爾葉爾羌烏什等城木華黎由東勝渡河而西克葭綏德保安鄜坊丹等州進攻延安破金兵金將完顏合達固守不下遂移師取隰州十一月宋京東安撫使張琳以京東諸郡來降命琳行山東東路都元帥府事是

歲耶律楚材進庚午元麻

十七年壬午金主珣元光元年宋寧宗嘉定十五年也春皇子拖雷克徒思匿察兀爾等城還經木刺夷國大掠渡朔朔關河克耶里等城來與帝會合兵攻拔塔里寒寨木華黎軍克乾涇邠原等州攻鳳翔連營數百里金將完顏合達復以兵二十萬固守不下夏帝避暑塔里寒寨西域回回國主札蘭丁出奔與蔑里可汗合帝自將擊之禽蔑里可汗札蘭丁遁去秋金復遣烏古孫仲端來請和見帝於回鶻國帝謂曰我向欲汝主授我河朔地令汝主爲河南王彼此罷兵汝主不從今木華黎已盡取之乃始來請邪仲端乞哀帝曰念汝遠來河朔旣爲我有關西數城未下者其割付我令汝主不失爲河南王可也仲端乃歸木

元史卷二 本紀

十一

華黎徇青龍堡金平陽公胡天祚降取牛心寨知吉州楊貞盡室死之冬十月金河中府來附木華黎以石天應爲兵馬都提控守之諸將諫曰河中雖用武之地南有潼關西有京兆皆金精兵所屯且其民新附其心未一守恐不易天應以河中形勢四接可起漕運以餽關內之軍關內定則長河以南在掌握決計守之乃作浮橋以通陝西金將侯小叔自中條率兵來襲天應戰死遂毀浮橋復取河中旣而我兵十萬復圍河中破之明年二月浮橋成木華黎渡河還至聞喜病卒

十八年癸未金主珣元光二年宋寧宗嘉定十六年也夏帝避暑八魯灣川皇子朮赤等兵自回部踰葱嶺來會遂定西域置諸城達魯花赤治之華言掌印官也冬十二月

金主珣殂子守緒立改元正大是歲夏主李遵頊傳國於子德旺大將速不台哲伯兩軍擊欽察追至寬甸吉思海執其酋八里蠻而還宋復遣苟夢玉來聘

十九年甲申金主守緒正大元年宋寧宗嘉定十七年也夏宋總管彭義斌侵河北史天倪與戰於恩州敗之帝征西軍旣平西契丹將往征印度進至北印度之鐵門遇異獸一角能人言曰天道好生人主宜早還帝曰印度乃自古神聖所降之地今遇此其天乎遂班師是歲宋主擴廋廟號寧宗子貴誠立是爲理宗

二十年乙酉金主守緒正大二年宋理宗寶慶元年也春正月還行宮自出師至此凡七年二月武仙以眞定叛殺史天倪三月史天澤擊仙走之復眞定夏六月彭義斌以

元史卷二 本紀

十二

兵應武仙天澤禽斬之冬十月武仙襲據眞定天澤奔橐城董俊判官李全亦以中山叛此非據益都之李全也

二十一年丙戌金主守緒正大三年宋理宗寶慶二年也帝旣定西域遂回軍討西夏初夏主僞乞盟請納質子且言願助兵討回紇見十四年及師行徵其兵其大將敢布對使者曰俟大國兵敗時我國再出兵且至是不遣質子又收納叛亡遂征之春二月取黑水城夏帝避暑於渾垂山取甘州肅州秋克西涼府朔羅河羅諸縣遂踰沙陀至黃河九渡取應里等縣史天澤夜赴眞定合兵攻武仙仙走西山抱犢砦九月宋京東路總管李全執張琳郡王帶孫進兵圍全於益都冬十一月庚申帝攻靈州夏遣嵬名令公來援丙寅帝渡河擊夏師敗之丁丑五星聚見於西南帝

自西域遇角端已思止殺至是感五旱之祥又得耶律楚材及真人丘處機之勸乃下詔止殺除臨陳攻城外不許虜掠並詔諸軍皆嚴節制秋毫無犯駐蹕鹽州川十二月李全以青州降授全山東河南行省以招降山東郡縣是歲皇子窩闊台及察罕之師圍金汴京遣唐慶賁幣幣於金夏主德旺以憂卒子覲立金平章政事英國公胥鼎卒二十二年丁亥金主守緒正大四年宋理宗寶慶三年也春帝留兵攻夏王城自率師渡河下積石州二月破臨洮府三月破洮河西寧二州遣國王幹陳那顏拔信都府夏四月帝次龍德拔德順等州五月遣唐慶等使金閏月避暑六盤山六月金遣完顏合周奧屯阿虎來請和帝謂羣臣曰朕自去冬五星聚時已嘗許不殺掠遽忘下詔邪今

元史卷二 本紀

三

可布告中外令彼行人亦知朕意金主聞蒙古有止殺之言遂以為從此息兵命有司罷防城兵役及軍需租調不急者是月夏主李覲降西夏亡帝次清水縣西江秋七月壬午不豫已丑崩於六盤山之薩里川行宮臨崩謂左右曰金精兵在潼關南據連山北限大河難以遽破若假道於宋宋金世仇必能許我則下兵唐鄧直擣大梁金急必徵兵潼關然以數萬之眾千里赴援人馬疲弊雖至弗能戰破之必矣後卒如帝言壽六十有六諸皇子奉梓宮歸漠北葬起輦谷明年戊子皇子拖雷監國上尊號曰索多博克成吉思汗世祖至元三年冬十月追諡聖武皇帝武宗至大二年冬十一月庚辰加諡法天啟運聖武皇帝廟號太祖在位二十二年帝深沈有大略用兵如神故能滅

國四十遂平夏克金有中原三分之二使舍其攻西域之力以從事汴京則不俟太宗而大業定矣然兵行西海北海萬里之外昆侖月竊重譯不至之區皆馬足之所躡如出入戶闈焉天地解而雷雨作鷗鵬運而溟海立固鴻荒未闢之乾坤矣惜舊史荒昧祕史亦惟詳伐夏以前今參攷旁摭條舉大綱正其僣復其詳則別具於削平各國傳

元史卷二 本紀

四

元史卷二終

元史卷三

太宗 定宗

本紀二

太宗英文皇帝諱窩闊台一作韓哥台太祖第三子母曰光獻皇后弘吉刺氏太祖伐金定西域帝攻城略地功居多初太祖議立儲嗣兄弟互推於帝語詳太祖諸子傳太祖末年命帝將兵征西域踰葱嶺以西霍博之地聞太祖之喪旋師來會踰年始至其未至以前皇弟拖雷攝國事者一載

元年己丑金主守緒正大六年宋理宗紹定二年也夏駕至忽魯班不只之地皇弟拖雷來見八月己未諸王百官大會於怯絲連河以太祖遺詔即皇帝位始立朝儀皇族尊屬皆拜頌大札薩漢言大法令也先是太祖初崩金

元史卷三 本紀

遣使弔喪至是復遣使歸太祖之贈帝曰汝主久不降致先帝老於兵閒吾豈能忘也爾何為哉卻之詔曰我成吉思皇帝艱難創立國家其未行德政宜及時建立其定算賦中原人以戶計西域人以丁計蒙古以馬牛羊計各出賦調編中原人為軍二十丁出一卒年二十以上者充之蒙古人有馬牛羊者每百分輸一入官又輸一以膳其部眾凡中原賦調耶律楚材主之西域以回鶻人馬合墨的主之蒙古以色目親臣主之始置倉廩立驛傳凡諸王駙馬聚會及差使來往不得科斂百姓可令千戶歲出備差車馬到驛交替其沙磧無水草者相視可井處立營其在官金帛器械倉庫宜置官簿籍典守毋得擅取蓋博爾朮及耶律楚材之議也詔下頒行中外稱便以史天澤統真

元史新編 卷三

定河間大名東平濟南五路漢軍劉凝統平陽宣德等路漢軍俱為萬戶是歲印度木羅夷二國來會西域伊思巴刺城部長來降冬十二月大將赤老溫帥師圍慶陽金遣使阿古台來聘再歸太祖之贈復卻之

二年庚寅金主守緒正大七年宋理宗紹定三年也春正月詔自今以前事勿問定諸路課稅酒課驗實息十取一雜稅三十取一是春帝與拖雷獵於斡爾寒河遂益兵圍慶陽金副樞伊刺蒲阿等率兵來援戰於大昌原其先鋒完顏彝以忠孝軍四百騎敗蒙古軍八千蒙古軍遂解圍走自南北構兵二十年金始有此捷奏功第一於是陳和尚之名震中國授定遠大將軍世襲謀克忠孝軍皆回紇乃滿羌渾及中原亡命受募者為很難制惟彝御之有方

元史卷三 本紀

坐作進退皆中程式所過州縣秋毫無犯每戰則先登疾若風雨諸將倚以為重完顏彝即陳和尚也大昌原之戰年本金史忠義傳也或係於六年本金史哀宗紀也然元史此兩年拖雷監國太宗未即位金史本紀亦不書惟正大七年哀宗紀正月蒲阿等解慶陽之圍即此一事實傳誤分慶陽大昌原為二事又或以去冬圍城時為今春解圍夏避暑於塔密爾河速不台及金將完顏彝戰於倒回谷復敗績士馬填塞谷幾滿完顏彝欲追擊之金諸將謂不如釋之以為德遂不追時蒙古軍攻京兆鳳翔者皆潰退數日後知金無追兵復聚而圍鳳翔金元帥蒲阿既連解慶陽鳳翔之圍志氣驕溢遇使臣幹骨樂往蒲阿遣歸告以整兵待戰帝震怒遂決計南伐蒲阿之馭軍也無法好趨小利嘗一日夜馳三百里剽掠今日得生口三百明日得牛羊一二千士卒喘死者則不問完顏彝嘗因宴

三三二

會面斥其失蒲阿不能改彝曰國家兵力必壞於此人之
手吾權位不敵惟以死報國而已秋七月帝自將征金詔
曰朕蒙席成業無功勞於國家惟茲金國尙阻聲教未究
皇考之緒朕宜親征以終前烈其令朕叔父幹赤斤大王
留守和林老營其皇考所征西域未下者有巴赫塔部及
康里欽察十一部今宜濟師繼往諸王在內者以巴圖爲
長在外者以古余克爲長凡進征之諸王駙馬萬戶千戶
百戶均以長子出行庶人馬多氣勢盛敵人畏懼爾諸王
駙馬將士其各勸哉皇弟拖雷皇弟子蒙哥率師從拔天
成等堡遂渡河攻鳳翔八月金降將武仙復歸金金復以
爲恆山公置府衛州蒙古兵圍之金完顏合達來援完顏
彝先登蒙古軍皆北史天澤以千人繞出金兵後來攻之

元史卷三 本紀 三

仙敗走天澤遂取衛州冬十一月立燕京宣德西京太原
平陽真定東平北京平州濟南十路稅課所設使副二員
詔諸路州縣長吏專理民事萬戶府專總軍政課稅使專
掌錢穀各不統攝是月師攻潼關藍關不克十二月拔天
勝寨及韓城蒲城

三年辛卯金主守緒正大八年宋理宗紹定四年也春正
月師圍鳳翔金主遣完顏合達及蒲阿救之逗畱不進二
月遂克鳳翔舊史此下有攻洛陽河中諸城下之語案
河今何得此時未濟河安得下洛陽邪又十月方克
先下邪今不取夏四月金將完顏彝復以忠孝軍敗速不
台於倒回谷帝召責速不台旋復使從皇弟拖雷南伐夏
五月避暑於九十九泉帝議分南北軍夾攻金約會於汴
先命拖雷出師南路拖雷遣朔不罕使宋假道淮東以搆

河南從太祖遺命也宋統制張宣誘殺之復遣李國昌使
宋需糧秋八月幸雲中始立中書省改侍從官名以耶律
楚材爲中書令粘合重山爲左丞相鎮海爲右丞相是月
以高麗殺使者命薩禮塔率師討之取四十餘城高麗王
噉遣其弟懷安公請降薩禮塔承制設官分鎮其地乃還
拖雷聞宋殺使臣怒曰彼昔遺苟夢玉來今何遽背約耶
卽移師伐宋破興元入大散關直趨饒風關宋軍民散走
死於沙窩者數十萬冬十月帝出師北路圍河中府拔之
十二月拖雷兵三萬渡漢金諸將欲邀擊於半濟蒲阿不
從拖雷遂引兵全濟畱輜重以輕騎先進戰於禹山明日
潛兵光化林中金人偵之四日不聞音響合達蒲阿遂引
兵就糧鄧州蒙古兵襲其後隊金兵幾不成列夜二鼓始

元史卷三 本紀 四

入鄧州城金帥隱其敗反以大捷聞汴京解嚴不設備
四年壬辰金主守緒天興元年宋理宗紹定五年也春正
月戊子帝自河中用西夏人恤克計由河清縣白坡濟河
攻洛陽下之遣人馳報拖雷軍拖雷亦已渡漢江遣使來
報卽詔諸軍進赴新鄭金元帥合達蒲阿等以步騎十五
萬援汴拖雷以鐵騎三千更番擾之金兵且戰且行晝夜
不得飲食休息距鈞州三十五里蒙古北路軍前鋒亦會
乘大雪合擊夾攻於三峯山俟其困憊開鈞州路縱之走
金軍潰聲如雷獲其大將蒲阿翼日帝大軍至會攻鈞州
獲其元帥合達於城中其裨將完顏彝死之金盡徹潼關
藍關守兵入援其守將李平以潼關降師遂長驅入盡下
商虢嵩汝陝洛許鄭陳亳穎壽睢等州三月遣使諭金主

曰汝所恃惟黃河與完顏合達爲長城今我已渡河殺台達更何所恃邪金主遣其兄子曹王訛可入質帝及拖雷北還雷速不台守河南圍汴金臣議以汴京外城不可棄仍舍裏城守外城外城周世宗時取虎牢土所築礮不能入惟周圍百二十里備多力分糧少夏四月金降將國安用叛歸金封爲堯王帝出居庸避暑官山時金有大礮名震天雷以鐵罐盛藥以火發之其聲聞數十里所蒸圍半畝以上其所著鐵甲皆透蒙古兵冒牛皮至城下掘孔城上以鐵繩懸雷礮緹下火發人與牛皮皆破迸無迹又有飛火槍注藥以火發之輒前燒十餘步蒙古惟畏此二物攻城十六晝夜內外死者百萬計速不台乃爲好語曰兩國已講和更相攻邪金主就應之遣官出城以酒炙犒

元史卷三

本紀

五

軍且賂以金帛珍異速不台乃許退兵避暑汝州高麗叛殺所置官吏徙居江華島復遣薩禮塔征之秋七月帝不豫拖雷禱於山川請以身代遣唐慶使金諭降金殺之和議遂絕八月金主雷軍守汴自將出都如河北速不台敗金恆山公武仙援軍於汴城外使宣撫王楫至宋約其伐金宋遣鄒伸之報謝約成功後以河南歸宋九月帝瘳北還拖雷薨於中途帝還龍庭冬十一月獵於納蘭赤刺溫之野十二月詣太祖帳殿五年癸巳金主守緒天興二年宋理宗紹定六年也春正月金主濟河攻衛州兵敗復走河南入歸德金西面元帥崔立殺雷守等官以汴京降二月幸鐵列都之地皇子貴由及國王塔思諸王按赤台等討平完顏萬奴於遼東萬

奴金宗室據遼東十九年至是始滅語詳收復東北諸部傳夏四月速不台軍進至青城即金受宋崔立以金太后王氏后徒單氏及梁王從恪荆王守純等五百餘人至軍中速不台殺金二王及其族屬送金后妃等於和林遂入汴京速不台奏請屠之耶律楚材入朝力爭乃詔除完顏氏一族外餘皆原免初大將撒吉思不華及帖木爾台帥兵取金睢州遂圍金主於歸德府或獻決河灌城之策河既決從西北下至城南入故睢水城反以四面環水爲險固不能進攻索獻策者已不知所往乃退屯亳州至是金將富察官奴密陳斫營之策伴遣使詣軍前納款以求其母爲名誓劫金主以降乘船會議中流往返數次官奴探知王家寺帥帳所在夜率忠孝軍五百攜火攻具登舟殺

元史卷三

本紀

六

守堤邏卒分軍出柵外腹背夾攻火槍雷震蒙古軍大潰焚溺死者三千餘遂解圍拔營回亳時金主繫舟北門以待慮不勝則走徐州及天明大捷始回城官奴自破蒙古軍後恃功跋扈無上居金主照碧堂諸臣無一人敢奏對者金主決策欲遷蔡州官奴復言不可金主與左右謀伏兵斬之遂奔蔡州塔察爾率師圍蔡括中州戶得七十三萬餘冬十一月宋遣荆鄂都統孟珙以兵二萬糧三十萬石來會伐金冬十二月諸軍與宋兵合攻蔡取唐州敗武仙於息州金人以海沂萊濰等州降是冬徐州軍降國安用自殺敕建國子學於燕京頒宣聖玉躡修渾天儀六年甲午金主守緒天興三年宋理宗端平元年也春正月師及宋師攻蔡州州恃潭爲固外即汝河潭高於河五

六丈至是決而注之實以薪葦遂濟師徑攻北門宋將孟琪攻南門頃刻萬眾蟻附而登城遂破金主先一日自盡於幽蘭室翼日城中諸將縱火自焚死金亡與宋約和以陳蔡東南地屬宋各引兵退立北平汴梁等處鎮守官而還金主嘗言蒙古所常取勝者恃北方之馬力資中原之技巧朕實無如何若如宋人朕得甲士三千橫行江海矣是春帝會諸王宴射於幹爾寒河夏五月駐蹕達蘭達巴之地復大會諸王百僚頒條令曰凡當會不赴而私宴者斬諸出入宮禁各有從者男子以十人為朋出入毋得相雜軍中凡十人置甲長聽其指揮專擅者論罪其甲長以事來宮中即置權攝一人甲外一人二人不得擅自往來違者罪之諸公事非常言而言者察其耳再犯笞三犯杖

元史卷三 本紀 七

四犯論死諸千戶越萬戶前行者射以木鏃百戶甲長以下有犯其罪同凡來會諸軍甲內不足數於近翼抽補其來會者用善馬五十匹為一羈守者五人飼羸馬三人守乞烈思三人乞烈思繫馬所也盜馬一二匹者論死諸人馬不應絆於乞烈思內者沒與畜虎豹人諸婦女製只孫燕服不如法者及妒者乘以驪牛徇部中論罪即助貲更娶秋七月宋人背盟初來會破蔡州時約分蔡州以南為宋蔡州以北為蒙古各解兵反國時汴洛空虛宋將趙葵等議乘諸軍北歸襲取中原扼關守河為恢復計宋丞相鄭清之惑其謀言於宋主遂遣趙葵全子才等率兵六萬攻汴行省李伯淵殺崔立降於宋宋將徐敏子西攻洛陽蒙古戍兵先期空城去宋兵糧盡引還諸軍追擊大敗之速不台

還師來赴決黃河寸金淀水灌宋軍多溺死趙葵全子才等棄汴遁於是上決計南征令以胡土虎為中州斷事官遣達海緝布征蜀是秋遣國王塔思伐宋冬十二月再遣使王楫詣宋責敗盟宋復遣鄒伸之報謝自是江淮閒無寧日

七年乙未宋理宗端平二年也春城和林作萬安宮為會同之所建城周五里設宮闈立驛傳以便貢輸命皇子貴由皇兒子拔都按拔都即赤赤太子之子也太宗時但有斯始亦拔都皇弟子蒙哥征西域皇子闊端征秦鞏皇子曲出及胡土虎伐宋命唐古征高麗秋七月命諸王叩溫不花攻江淮張柔略漢口冬十月皇子曲出拔宋棗陽軍遂徇襄鄧入郢虜人民牛馬數萬而還十一月皇子闊端

元史卷三 本紀 八

攻石門金都總帥汪世顯降遂入沔州時金既亡惟秦鞏二十餘州尚未下從耶律楚材言詔闊端招諭許以不殺諸州皆降惟會州都總管郭斌文州知州劉銳固守及城陷闔門死之命中書省臣契勘大明麻八年丙申宋理宗端平三年也春正月萬安宮落成諸王各治具來會宴初行交鈔以萬錠為額二月命應州郭勝鈞州李朮魯九住從曲出充先鋒伐宋以鄧唐均三州偏襄陽敵境且歲荒徙其民於洛陽之西夏六月復括中州戶口得續戶百有十餘萬初太祖銳意圖中原所得城邑悉分將士至是始以民戶隸州縣秋七月以真定民戶奉太后湯沐此湯沐邑後歸晉宗子中原諸州民戶分賜諸王貴戚后妃帳殿之名謂帳殿各后妃也皇兒子拔都

諸王大臣所俘男女為民

十三年辛丑宋理宗嘉熙五年也春二月獵於揭揭察哈之澤帝不豫醫言脈已絕皇后召耶律楚材問之對曰帝王修德可回天命今任使非人實官鬻獄囚繫非辜者多古人一善言熒惑退舍請赦天下囚徒但非上命不可俄帝少蘇聞所奏頷行之是夜醫候脈復生適宣讀詔書時也翼日而瘳帝晚年嘗言朕自即大位較阜考時多四善事一平定金國二設立驛傳三無水草處皆井立營四各城設官鎮守亦有四過失一沈湎於酒二聽婦人言取諸王部下子女三害諫臣多俗勒忽四牆圍野獸致所部怨言楚材屢規帝節飲不止乃持酒槽鐵口進曰麴孽能腐鐵况五臟乎帝悟敕每飲毋過二鍾然不能常節冬十一

元史卷三 本紀

十一

月四日帝將出獵楚材以太乙數推之亟言其不可左右皆言不騎射無以為樂獵歸帳殿歡飲極夜乃罷果病五日而崩在位十三年壽五十有六葬起輦谷追諡英文皇帝廟號太宗帝有寬宏之量消樸之質乘開國之運師武臣力繼志述事席捲西域奄有中原惟知諸子不材又知憲宗之克荷而儲位不早定致身後政擅宮闈大業幾淪有餘憾焉是歲以劉敏行尚書省於燕京高麗王王暉以族子縛入質汪世顯復入蜀圍成都守將田顯開北門納師斬宋制置使陳隆之

論曰太宗功業莫大於滅金定中原以終太祖之志雖然使金無可亡之道元豈能亡之哉金自章宗改大定之政以涼薄猜劔宗藩援立庸蔥啟強敵覬覦之心國勢已

不可久宣哀二帝以己強弩之末當敵燎原之初自非命世之材豈易望中興之烈哉然以人事言之有未可盡委諸天意者宣宗於胡沙虎梟獍弑逆之賊不亟正典刑申大義反感其拔立之私委用無貳逮高琪以畏禍討殺胡沙虎則又委任高琪舍中都而南遷首激亂軍之變又不以中都專任承暉使輔儲宮固守而以抹撚盡忠掣之及至兩奸竝萃於汴京專議南侵宋以廣地而置河北於不問又築汴京重城營少室山為御寨避兵而置關陝於不問及至末年始悟二人之罪而戮之而勢已岌岌矣哀宗之立勢更難於貞祐然行省大臣則有胥鼎力全河中之保障名將有陳和尚統忠孝軍屢奏大昌原倒回谷及衛州之捷且關中諸郡完顏合達守之木華黎亦屢攻而不

元史卷三 本紀

十一

能入速不台力竭而思還又蒙古兵皆畏暑故太宗拖雷均已北去明汴城鞏固非人力所能攻破也從來艱難再造之主未有不躬親行陣以據形勢而一將士之心者誠使黜白撒蒲阿二人不用而自出關陝帥陳和尚為中軍完顏合達為左軍武仙為右軍而專任胥鼎以河南河中轉輸之事據上游以臨中夏則鳳翔可不失陷而關中可保速不台不敢久留而秦豫克三行省可完矣乃明知陳和尚之才而使隸蒲阿為偏裨知白撒為人心所憤反陰敕禁軍防守及至諸軍盡覆汴城危迫累卵始議自將出師則已晚矣乃臨難訴哀自憾無罪亡國謂未嘗奢侈未嘗用小人豈知亡社稷於小人之手已非一朝一夕乎嗟乎自古無不亡之國而亡國亦從無不可挽之機若金人

書豈盡元人亡之也哉

定宗簡平皇帝諱貴由太宗次子也長子合失台早世故舊史以次為長馬母曰六皇后乃馬真氏以丙寅年生帝太宗嘗命從諸王伐金西征阿速及殲東夏完顏萬奴皆有功太宗嘗言諸子皆不足屬大事獨愛皇弟子蒙哥末年又屬意於皇孫昔烈門謂可為嗣太宗崩皇后臨朝三載無君內忌憲宗剛明而昔烈門又幼冲至是乃會百官於苔蘭苔八思之地議久不決諸王將謀亂會雷雨大作帳外水深數尺遂各散去后以貴由己所生且年長遂議立帝方帝之未立也后先稱制壬寅春六皇后稱制之元年當宋理宗淳祐二年耶律楚材為相閱三年甲辰當宋淳祐四年楚材薨又明年乙巳始集諸王大將議立君此

元史卷三 本紀

三

四年中漠北中原事皆無攷其見於史者惟元年壬寅耶律末哥攻蜀取瀘張柔渡淮攻宋滁和揚等州屠通州次年癸卯張柔屯田襄城成杞縣三年甲辰宗王按只台遣濟南軍元帥孟德攻宋濠泗蕪黃等州四年乙巳都元帥察罕等率步騎三萬會張柔攻壽泗盱眙揚州趙葵請和乃還及遣阿母罕征高麗克威州平鹵城而已已上見定宗本紀是時政在宮闈奸人奧魯刺合蠻以貨得政柄廷中悉側目楚材數面折之癸卯五月熒惑犯房星楚材奏當有驚擾居無何行都譎言兵起倉卒后遂令授甲選腹心至欲西遷以避之楚材言根本一搖四方立亂臣觀天道必無大患後數日乃定后嘗以御寶空紙付奧都刺合蠻使自書填行之楚材曰天下者先帝之天下朝廷自有憲章柰

何付之小人遂止又命刺合蠻所建白令史不為書者斷其手楚材言國之典故先帝悉委老臣何與令史如不可行死且不避況截手乎且老臣事太祖太宗三十餘年無負於國皇后亦豈能無罪殺臣邪后雖銜之終以先朝勳舊深敬憚焉故主昏於上而清政於下綱紀不至大壞以上見耶律楚材傳

定宗元年丙午當宋理宗淳祐六年秋七月帝即位於和林朝政猶出母后冬獵黃羊於野馬川以權萬戶史權等耀兵淮南拔虎頭關寨進圍黃州二年丁未當宋理宗淳祐七年春張柔攻泗州夏避暑於曲律淮黑哈速之地秋西巡八月命野里知吉台率朔思蠻部兵西征是月詔蒙古戶每百以一名充拔都魯九月取太宗宿衛之半以耶

元史卷三 本紀

四

曲門答爾領之冬十月括人戶三年戊申當宋理宗淳祐八年春三月帝崩於橫相乙爾之地在位三年壽四十有三葬起輦谷追諡簡平皇帝廟號定宗帝崩後議所立未決或云定宗后擁皇姪昔烈門垂簾聽政者六月舊史后或云皇太后乃馬真氏復治國事陳經續通鑑自後己酉當宋淳祐九年庚戌當宋淳祐十年連歲大旱河水盡涸野草自焚牛馬十死八九人不聊生諸王及各部又遣使於燕京池南諸郡徵求貨財或於西域回鶻索取珠璣或於海東搜取鷹鵠驛騎不絕內外離心故無可紀然自太祖崩後拖雷監國者一年太宗崩後六皇后稱制者四年定宗之後皇后臨朝者又幾四年前後凡九載無君而國不亂卒能創業垂統上竝漢唐者則皆宗王宿將維持拱衛根

榦蟠據之力惟其事蹟則文獻綿邈無得而徵焉故附於太宗本紀之後示不足紀也曰吾知元未一統以前三宗而已

元史卷三 本紀

五

元史卷三終

元史卷四

本紀三

憲宗

憲宗桓肅皇帝諱蒙哥睿宗拖雷之長子也母莊聖太后怯烈氏歲戊辰十二月三日生帝時有黃忽答部知天象者言帝後必大貴故以蒙哥為名漢言長生也太宗在潛邸愛之養以為子屬昂輝皇后撫育之嘗攜之出獵遇大風太宗避入帳殿抱帝置膝上撫之曰是可以君天下一日使特牛按豹皇孫昔烈門曰以特按豹則犢將安養帝歎賞之曰是亦可以君天下故又屬意於昔烈門及睿宗薨乃命帝歸藩邸從征伐屢立奇功嘗攻慈嶺西北欽察別部曰康里者其酋巴赤蠻逃於海島帝追至其地適大風刮海水去其淺可渡帝喜曰此天開道與我也遂進禽

元史卷四 本紀

十

之乃班師而水已至後軍有浮渡者復與諸王拔都征幹羅思部至耶烈贊城躬自搏戰破之定宗崩朝廷久未立君中外咸屬意於帝而宵小忌其英明洵洵議久未決諸王拔都穆哥阿里不哥大將兀良合台速不台等咸會於漠北拔都首建議推戴時定宗后遣使巴刺在坐曰昔太宗有命皇孫昔烈門可君天下諸王百官皆與聞之今議欲他屬將置昔烈門何地穆哥曰穆哥即睿宗子末哥大王也太宗既有是命前議立定宗時何以不言是則違太宗之命者汝等也且蒙哥可君天下亦太宗之言今何獨不可遵邪巴刺語塞兀良合台曰蒙哥聰明材武年長且賢人望所屬眾悉唯之議遂定

元年辛亥宋理宗淳祐十一年也夏六月西方諸王別爾

哥及脫哈等東方諸王別里古台按只台及塔察爾等西
方諸大將班里赤等錢大昕曰班里赤疑即高昌王亦都護也名巴爾朮音相近東方
諸大將耶速不花等復會於幹難河行在其推帝即皇帝
位追尊皇考拖雷曰英武皇帝廟號睿宗命皇弟忽必烈
總治蒙古漢地民戶事開府金蓮川趙璧等撫慰軍民以
芒哥撒爾為總斷事官以孛魯合為大必闕赤掌宣發號
令內外傳奏事以晃兀爾雷守和林宮闕帑藏阿藍答副
之以牙刺瓦赤等充燕京等處行尚書省事賽典赤尼札
馬丁佐之以塔納海麻速忽等充別什巴里等處行省事
阿合馬耶的沙等佐之以阿爾渾充慈嶺西阿木河等處
行省事阿木河一作阿母河即大唐西域記之縛弱河水入鹹海法合魯丁尼只馬丁
佐之以察罕葉爾干統兩淮等處蒙漢軍以帶答爾統四

元史卷四

本紀

二

川等處蒙漢軍以和里台統吐蕃等處蒙漢軍皆仍前征
進誅諸臣持兩端誘昔烈門為亂者數人遂頒便宜事於
國中盡收諸王濫發牌印詔旨宣令諸王馳驛不得過三
四馬不得擅招民戶諸王官屬不得借朝覲私斂民財罷
築和林城役千五百人盡革近年窳政號令一新中外大
說

二年壬子宋理宗淳祐十二年也春正月皇太后怙烈氏
崩夏帝駐和林以太宗諸子孫不得立多後言乃分遷諸
王於各所太宗第六子合丹於別什巴里地即今烏魯木齊太宗
第七子蔑里於葉爾的石河即太祖紀耶爾的石一作耶里失太宗諸
孫海都於海押立地海都太宗長子合失之子別爾哥於
曲爾只地未詳脫脫於葉密立地太宗第五子哈剌察爾之子葉密立即今伊犁一作

阿力蒙哥都即太宗第三子及太宗第六皇后乃馬真氏於
開端所居地之西舊史作皇后乞里吉忽帖尼今從陳摯在甘肅永昌仍以太宗諸后妃家貲分賜親王定宗后及
昔烈門母以厭禳事覺並賜死謫昔烈門於墨脫赤之地
禁錮其黨於軍營秋七月詔以中州地封同姓命皇弟忽
必烈征大理宗王圖華薩巨征西域印度國宗王徹的不
華征西域沒里奚國宗王旭烈征西域素丹諸國旭烈一兀即一人也列傳誤作二人宗王耶古征高麗國詔諭宋荆襄樊均諸
守將使來附八月祭天於和林北之日月山王禕曰日月山一在漠北和林國語名阿刺溫山一在漠南西京路昌州寶山縣北兒金史地理志用冕旒及登歌
樂帝獵於月帖古忽蘭之地墮馬傷臂不視朝百餘日十
二月合祭昊天皇后土始大合樂作神牌以太祖睿宗配

元史卷四

本紀

三

作八月十二日通鑑紀事本末作十二月按前書八月八日祭天甫四日又合祭天地無此數實之理志文十二日蓋十二日大赦天下選諸色目人掌帑藏掌行帳掌祭卜巫
醫掌驛傳掌必闕赤繕發宣詔等官徙諸匠五百戶修行
宮以西域僧那摩為國師掌天下釋教以道士李真常掌
道教李真常即上處機之弟子是歲籍漢地民戶印度遣使入貢
三年癸丑宋理宗寶祐元年也春正月帝獵於徹蹇察罕
之地會諸王於幹難河北大頒賜子諸王耶苦即耶古以怨
襲諸王塔刺爾之營遂罷耶苦征高麗兵以札刺台代行
遣必闕別爾哥括幹羅思戶口三月敗宋兵於海州獲其
都統夏六月命郭侃等從宗王旭烈征西域哈里發巴哈
塔等國又命塔爾台圖魯華等征印度及怯失彌爾國西
方王拔都遣使乞買珠銀萬錠以千錠授之詔曰太祖太

宗之財豈能給諸王如此耗用此銀就充後歲賜數秋幸
 軍海子凡海子舊史皆作臘兒蓋塞外呼海子為凍爾也九月皇弟忽必烈征大
 理次特刺地分兵三道進執其王段智興以歸大理平雷
 兀良合台攻諸蠻未服者而自還軍四川忽必烈命四川
 總帥汪德臣城利州屯田以備蜀命宗王耶虎與洪福源
 征高麗拔禾山東州春州三角山楊根天龍等城
 四年甲寅宋理宗寶祐二年也春帝獵於徽蹇察罕夏幸
 月爾蔑怯之地秋七月詔官吏之赴朝會計錢糧者許自
 首不公仍禁以後浮費冬大獵於耶滅干哈里察海之地
 忽必烈還自大理遂自四川入覲於行在是歲會諸王於
 顯顯海子之西仍祭天於和林北之日月山初籍新軍命
 大臣舉將才擢史樞征行萬戶駐軍唐鄧張柔移鎮亳州

元史卷四 本紀 四

權萬戶史權屯鄧州忽必烈置經略司於汴分兵屯田西
 起唐鄧東連清口桃源列障守之宋統制甘閏城紫金山
 汪德臣襲據其地張柔奏築甬路自亳抵汴堤百二十里
 以通兩淮軍餉宋均州總管孫嗣以蠟書降且乞援史權
 以精甲據險要援之自是宋驍將各帥所部先後來降
 五年乙卯宋理宗寶祐三年也夏帝幸月爾蔑怯之地秋
 九月兀良合台自吐蕃進攻烏蠻白蠻鬼蠻盡降之得五
 城八府四郡蠻部三十有七張柔會大帥於符離復築臨
 淮甬道自亳南六十里以通陳蔡穎息舟餉札刺台與洪
 福源征高麗拔其光州安城中州玄鳳珍原甲向玉果等
 城

六年丙辰宋理宗寶祐四年也帝會諸王百官於裕爾陌

哥都之地設宴六十餘日賜金帛有差仍定擬諸王歲賜
 錢穀續發漢軍從忽必烈南征夏四月駐蹕塔密爾河五
 月幸昔刺帳殿六月太白晝見秋七月遣使問諸王駙馬
 軍過山東掠民羊豕之罪由是諸軍所過無犯是歲高麗
 國王雲南酋長及素丹諸國來覲兀良合台既討平諸蠻
 遂自馬湖江通道於嘉定重慶遣使以雲南平獻捷於朝
 命依漢故事分西南夷為郡縣授劉時中為宣撫司與段
 氏共安輯之進圖交趾賜雲南軍士采帛萬二千匹始建
 城市宮室於桓州東灤水北之龍岡是為上都即開平是
 冬以西域阿木河回回降民分賜諸王百官
 七年丁巳宋理宗寶祐五年也春詔諸王出師征宋夏六
 月謁太祖行宮祭旗鼓復會於客魯連河秋駐蹕於軍海

元史卷四 本紀 五

子灑馬乳祭天九月帝以宋人背盟自將南征以駙馬刺
 真之子乞解鎮守阿羅思回鶻獻水晶瓶珍珠繖等物直
 銀三萬餘錠帝卻之且禁後毋復獻宗王塔察爾率諸軍
 南征圍樊城霖雨連月乃還元帥布鄰吉台軍自鄧州略
 地遂渡漢江是歲兀良合台自大理入覲遂經六盤山至
 臨洮府與大營合月餘復命西征自四川赴雲南秋九月
 兀良合台率段智興伐交趾十一月入其國安南王陳日
 昷竄海島遂班師遣阿藍荅及囊加台等行省事於陝西
 等處置鈎攷局會計錢穀既而罷之冬帝渡漠南皇弟忽
 必烈及諸王公主等來迎大宴於玉龍棧遣歸
 八年戊午宋理宗寶祐六年也春正月受朝賀於耶里本
 多哈之地二月陳日昷傳國於長子光昷遣使來貢方物

詔兀良合台引交廣兵北還會攻鄂皇弟旭烈率大將郭侃討平回鶻乞石彌爾及報達哈里發諸國禽其王來獻捷又渡海收富浪國轉戰萬里詔以旭烈留鎮西域帝自將伐宋至東勝適河冰合覆以土遂濟四月駐蹕六盤山議由蜀攻其上游先命張柔從忽必烈攻鄂州命塔察爾攻荆山以分宋兵力是時御營軍四萬號十萬分三道進帝由隴州入散關諸王莫哥由洋州擣巴州之米倉關在小巴山絕頂今移於大巴山之麓李里察萬戶由漁關入沔州以明安答為太傅守關中留兵守六盤山行宮五月皇子阿速台獵傷民稼帝讓之撻其近侍數人諭士卒拔民一草者斬以徇所至秋毫無犯秋七月以輜重留六盤山率兵由寶雞進棧道九月駐蹕漢中冬十月帝次利州渡嘉陵江至白

元史卷四 本紀

六

水江造浮梁以濟初宋余玠帥蜀相度形勢徙利州治於金堂縣之雲頂山築苦竹隘於小劔山以備外水又徙合州城於釣魚山徙閬州治於蒼溪縣之大獲山徙順慶府治於青居山徙蓬州治於雲山徙渠州治於禮義山徙巴州治於平梁山又於昭化縣之長寧山劔州之鵝項嶺皆築堡戍守以備內水棋布星羅積粟繕兵守禦甚固我師所至購土人鄉道招降抵劔門攻小劔山之苦竹隘久不克會宋裨將趙仲引師入陷焉苦竹隘在小劔山絕頂四面斷崖前臨巨壑孤門控據一夫都元帥紐璘攻圍雲頂山降其守將雲頂在成都府金堂縣南五十里本名石城於是外水失險時大軍志在由東川內水直出大江故不趨成都乃以紐璘守成都留精兵五百守小劔遣使招諭龍州十一月帝自劔門南進遣兵圍昭

化縣之長寧山堡山在縣西南九十里下險帝督軍先攻劔州之鵝項堡今劔州南二十里有鵝項嶺項舊誤作頂力戰竟日破其城宋守將王佐徐昕等皆戰死進攻閬州之大獲山降其城有石城周十里余玠築此城是月龍州降十二月都元帥紐璘攻簡州帝次於運山遣人招降其守將師至順慶府之青居山下其城在順慶府南充縣南三十五里山高又招降州石泉大良山皆下進攻雅州破之詔諸軍毋得掠諸王軍分路略地至江而還竝會於行在而四川都元帥紐璘亦留兵守成都自將數萬人舟數百艘渡馬湖江攻重慶溯流與大軍會惟合州守將王堅固守釣魚山不下屢招拒命是歲李璫攻宋海州漣水軍拔四城殺宋軍幾盡是冬詔兀良合台雲南軍以明

元史卷四 本紀

七

年會長沙與皇弟忽必烈南北夾攻宋九年己未宋理宗開慶元年也春正月駐蹕重貴山北置酒大會諸王大將問曰今在宋境軍日南行夏暑且至北軍其可久留乎大將脫歡請大軍暫北還巴里赤願留攻帝遂留屯於蜀諸王莫哥復攻渠州禮義山山在渠縣東六十里西距渠山十里上有城趾宋寶祐中嘗徙渠州治其上以拒蒙古耶律圖魯雄攻巴州平梁山山在巴州西二十五里山頂石城兀良合台師還自交趾由內地象州入靜江府連破湖南辰沅遂圍潭州會皇弟忽必烈軍於鄂二月帝悉諸軍渡嘉陵江會戰合州城下城據釣魚山涪江嘉陵江環其東南西三面峭壁上有天池周五百步粟支數年守禦甚固三月蒙古兵仰攻各門不克夏四月丙子大雷雨凡二十日五月屢攻輒卻六

月汪德臣復選精兵夜登外城馬軍寨遲明遇雨梯折後軍不克進而止凡五閱月不克帝觸暑雨不豫秋七月甯精兵三千守合州餘悉遣攻重慶是月帝崩於合州壽五十有二在位九年諸王大臣奉梓宮北還葬起輦谷追諡桓肅皇帝廟號憲宗帝早親軍旅剛明沈斷威著中外即位以後不樂燕飲不好侈靡雖后妃不許過制初太宗崩後曠紀無君黃裳御統政出多門阿柄幾於旁落至是凡有詔旨帝必親起草更易數四然後行之御臣下甚嚴嘗謂臣下獎諭太過即志氣驕溢過咎隨之是害之也承開國師武臣力之後西平印度南并大理東取巴蜀所向無敵惟遵其國俗喜田獵信巫覡卜筮是其小蔽使太宗卽世早承大業則伐宋之役不俟末年而南北混一矣天未

元史卷四 本紀 八

既宋暑雨老師景命不延故大勳重集於世祖皇帝宋將孟琪自會攻蔡州後即經營襄陽浚城池積軍儲厲士馬嚴守備當大軍攻襄陽時孟琪方守江陵宋復詔琪收荆襄琪謂必得郢然後可通餽餉得荆門州然後可出奇兵指授方略所至克捷琪又奏襄陽爲東西根本今百戰而得之當加經理非甲兵十萬不足以分守又分兵入蔡州火其積聚又於鄧州順陽燒其船材擾其屯糧與四川余玠一守上游一守中路故蒙古諸軍久不得志帝因暑雨病殞西蜀而退不然東南事久不可問矣論曰世之亡國未有如宋之自取者也金於元無敗毀之罪而元於金有必取之心和亦亡不和亦亡宋則僻處南服炎徼水鄉本非蒙古所覬覦其始假道滅金爲宋復仇

畫蔡爲界盟誓未寒不旋踵而有端平入洛之師自構兵端及合州固守憲宗告終皇弟遠在鄂城內顧家難倉皇北去和亦歸不和亦歸元人已無心於江左矣信使東來前好可繼而卽有拘使抗命之行猶遲之又久而後渡江宋負元元不負宋其罪浮於金人數倍矣烏乎北宋不能取垂亡之遼以復燕而欲挑釁於方張之金以擴土南宋不能蹙垂亡之金以取蔡而欲抗并吞之蒙古以恢汴自古謀國之舛未有如宋人之甚者天方將啟元運混一區宇有莫之爲而爲者乎攷金求和於元者六次一宣宗貞祐二年請太祖解燕京之圍議昏公主而後班師二宣宗貞祐三年遷汴復遣求和而太祖命盡獻河北去帝號爲河南王金不從三宣宗興定五年遣烏古孫仲端逾葱嶺

元史卷四 本紀 九

求和稱太祖爲兄不允四宣宗元光元年復遣仲端詣回紇國行在求和命盡割關西地爲河南王不果五哀宗正大六年遣使弔太祖之喪並歸贈太宗卻不受六哀宗天興元年圍汴京遣其兄子曹王譙可入質而速不台仍不肯退師此金之於元萬無可解免者也又攷宋殺元使五次一太宗時遣朔不罕由漢中假道被殺二月里麻思由淮東假道被拘三廉希賢至獨松關而張濡殺之四遣張羽等復書至平江而亦被殺並郝經被執而五其宋人遣使與元通和者二一靈宗嘉定十四年遣苟夢玉通好於太祖約其攻金二理宗紹定五年太宗遣王楫至宋約其伐金宋遣鄒伸之報謝約成功後以河南歸宋烏乎當建炎南渡之始舍宗李岳韓劉吳名相名將不用而惟稱臣

稱姪於不其戴天之女真及理度垂盡之朝力拒講解通和而日生釁挑兵於毫無夙隙之蒙古國既亡矣而又子元以奉天討罪之名果何爲哉果何爲哉

元史卷四

本紀

十

元史卷四終

元史卷五

世祖上

本紀四上

世祖皇帝諱忽必烈太祖之孫皇子拖雷第四子憲宗同母弟也以乙亥八月乙卯生及長仁明英睿思大有爲於天下歲辛亥憲宗即位諸弟惟帝取長且賢故盡屬以軍國庶事南駐瓜忽都之地卽金蓮川也於是徵姚樞於蘇門待以賓禮初太宗立軍儲所於新衛收山東河北丁糧後惟計直取銀帛帝請於憲宗築五倉於河上始令民入粟宋兵時侵南境帝請置經略司於汴以史天澤楊惟中趙璧爲使俾屯田唐鄧繕城以備宋兵壬子夏奉命征雲南癸丑受京兆分地遣將成興元諸州又奏割河東解州鹽池以供軍立從宐府於京兆屯田鳳翔募民受鹽入粟

元史卷五

本紀

轉漕嘉陵更立京兆宣撫司以廉希憲楊惟中爲使徵許衡爲京兆提學設交鈔提舉司印鈔以佐經用秋出師臨洮次忒刺分三道以進帝由中道至滿陀城過大渡河經行山谷二千餘里抵金沙江乘革囊以濟摩些蠻主迎降在大理北四百餘里冬師至白蠻打郭寨攻拔之不戮一人進次三甸白蠻送款軍薄大理城時大理主段智興微弱國事皆決於高祥祥率眾遁去帝命大將野古追斬之分兵取附都鄯闡烏爨等部進入吐蕃渠長峻火脫懼出降遂班師甲寅冬至自大理入覲憲宗受命駐桓撫間建城龍岡初憲宗分漢地封宗屬而雅愛帝欲重之權命於汴京關中自擇其一帝已得關中至是憲宗曰關中戶寡河南懷孟地狹民夥可取以自益於是盡有關中河南之地會有讒

帝深得中土心者憲宗疑之命阿藍荅行省事於京兆劉太平佐之鉤致河南陝西諸路財賦置局關中大開告訐帝用姚樞計盡遣妃主歸朝自見憲宗於六盤山相持各泣下竟不令有所白而止遂罷鉤致局而帝所置諸司亦廢憲宗將分道伐宋命帝征鄂州戊午冬自龍岡啟行己未秋次汝南戒諸將毋妄殺命楊惟中郝經宣撫江淮八月入大勝關宋戍兵皆遁進次黃陂九月駐師江北宋相賈似道統兵來援適親王莫哥遣使以憲宗凶問告且請北歸繫人望帝曰吾奉命南征豈可無功遽還自登香鑪山俯瞰大江江北曰武湖湖東為陽邏堡其南岸即澣黃洲宋以大舟扼江渡軍容頗盛帝遣兵夜具舟遲明至江岸風雨晦冥諸將皆謂未可渡帝不從令揚旗伐鼓進天

元史卷五 本紀

二

為開霽與宋師接戰者三殺獲萬餘人逕達南岸屯兵圍鄂州似道懼密遣宋京如師願割江北地納幣請和帝不許攻益急俄聞先朝諸臣阿藍荅渾都海等謀立帝弟阿里不哥輒乘傳調兵去龍岡僅百餘里會似道再遣京至約歲奉銀絹各二十萬帝從郝經廉希憲議許之十一月軍北還輟耕錄云世皇軍次黃河苦乏舟夜夢老叟引至行河許開忽有人進曰此開水淺可渡帝曰汝能先涉否其人乃行大軍自後從之皆濟帝欲旌其功對曰富貴非所願但得自在足矣遂與十二月帝駐燕京近郊縱新僉五品印撥三百戶食之

民兵人心大悅

中統元年庚申宋理宗景定元年也春三月戊辰朔日會車駕至龍岡新城親王合丹莫哥塔察爾等率東西二道宗王來會與諸大臣皆勸進辛卯帝即位促鑄寶篆一治

而成眾皆慶賀夏四月戊戌朔初定官制以王文統為中書省平章政事張文謙為左丞辛丑以即位詔天下曰朕惟祖宗肇造區宇奄有四方武功迭興文治多缺五十年於茲矣蓋時有先後事有緩急天下大業非一聖一朝所能兼備也先皇即位之初風飛雷厲將大有為憂國愛民之心雖切於己尊賢使能之道未得其人方董夔門之師遽遭鼎湖之泣豈期遺恨竟弗克終肆予冲人渡江之後蓋將深入焉乃聞國中重以僉軍之擾黎庶驚駭若不能一朝居者予為此懼驛騎馳歸目前之急雖紆境外之兵未戢乃會羣議以集良圖不意宗盟輒先推戴左右萬里名王巨臣不召而至者有之不謀而同者皆是咸謂國家大統不可久曠神人重寄不可暫虛求之今日太祖嫡孫

元史卷五 本紀

三

之中先皇母弟之列以賢以長止予一人雖在征伐之間每存仁愛之念博施濟眾實可為天下主天道助順人謀與賢祖訓傳國大典於是乎在孰敢不從朕峻辭固讓至於再三祈懇益堅誓以死請於是俯徇輿情勉登大寶自惟寡昧屬時多艱若涉淵冰罔知攸濟爰當臨御之始宏新宏遠之規祖述變通正在今日務施實德不尚虛文於戲麻數攸歸欽應上天之命勳親斯託敢忘烈祖之徽誕告多方與民更始丁未以郝經為國信使何源劉人傑副之使宋議和且徵前約丙辰置急遞鋪僉鋪兵一晝夜行四百里以速軍機乙丑徵諸道兵六千五百人入宿衛此在內設立禁軍之始立互市於潁州漣水軍禁私商不得越境犯者死阿里不哥僭號於和林五月戊辰朔建元中

統甲午以阿里不哥反赦天下詔頒新政一求直言一理
冤滯一均賦役一撫軍士一止貢獻乙未熒惑入南斗雷
五十餘日分漢地爲十路置宣撫司賽典赤李德輝燕京
路宋子貞益都濟南路史天澤河南路楊果北京路張德
輝平陽太原路劉肅眞定路姚樞東平路張文謙大名彰
德路粘合南合西京路廉希憲京兆路皆宣撫使定戶籍
科差例分全科及減半科納絲輸鈔有差凡儒人及軍站
僧道等戶皆不與僉平陽京兆兩路兵七千人於延安守
隘此在外設立鎮戍軍之始徵諸路兵三萬衛京師六月
戊戌以李壇爲江淮大都督阿里不哥使劉太平霍魯懷
入京兆謀爲變廉希憲至捕誅之并誅乞帶不花於東川
明里火者於西川六盤守將渾都海起兵應阿里不哥反

元史卷五

本紀

四

秋七月癸酉以趙璧平章政事張啟元參知政事王鶚翰
林學士承旨史天澤兼江淮諸翼軍馬經略使丁丑設祖
宗神位於中書省遣官致祭用登歌樂初祭享之禮割牲
奠馬湏以蒙古巫祝致辭至是乃一變帝自將討阿里不
哥八月己酉立秦蜀行中書省以廉希憲爲右丞行省事
敕軍士所過毋擅撻辱官吏九月壬午初置拱衛儀仗及
祭器法服陝西行省丞相阿藍荅自和林起兵至西涼與
渾都海軍合丙戌命諸王合丹哈必赤率師敗之於姑臧
禽斬之西土平冬十月癸丑初行中統寶鈔自十文至二
貫文凡十等不限年月諸路通行賦稅並聽收受十一月
戊子熒惑與填星順行太陰犯房發粟振益都濟南濱棣
饑自是凡遇各路府州縣及諸王投下水旱荒饑輒發穀

鈔振耀十二月丙申帝至自和林乙巳以西僧八思巴爲
帝師授玉印統釋教是歲立太常寺玉宸院儀鳳司符寶
局御酒庫升龍岡新城爲開平府以吏戶禮爲左三部兵
刑工爲右三部各設尙書二員

二年辛酉宋理宗景定二年也春正月辛未夜東北赤氣
照人大如席庚寅李壇擅發兵修益都城塹二月丁酉太
陰掩昴丙午車駕幸開平詔減民間差發及軍站重科租
稅罷守隘軍三月壬戌朔日倉夏四月丙午聽儒士被俘
者贖爲民乙卯命十路宣撫官勸農桑抑游惰禮高年問
民疾苦舉茂才異等可從政者列名上聞其職官污濫及
民不孝弟者量輕重議罰是月躬祀天於桓州之西北灑
馬湏爲禮皇族之外無得與五月乙丑遣崔明道李全義

元史卷五

本紀

五

爲詳問官詣宋問國信使所在庚辰諭使臣經過官給餼
廩軍士毋輒入民家丁亥弛諸路山澤禁私殺馬牛越
境私販馬者罪死命史天澤爲中書右丞相河南軍民並
聽節制置惠民藥局以姚樞爲太子太師寶獸爲太子太
傅許衡爲太子太保皆辭不拜六月癸巳諭各路宣聖廟
有司歲時致祭諸儒月朔釋奠諸官員使臣軍馬毋得宿
廟及聚飲理訟其中書院亦如例違者加罪丙申罷諸路
拘收字蘭奚括漏籍老幼等戶協濟編戶賦戊戌太陰犯
角庚子定鹽酒稅法乙卯罷安邑貢蒲萄酒免衛輝懷孟
賦稅償其所借芻粟庚申宋安撫劉整籍瀘州十五郡來
降以整爲夔路安撫使升眞定鼓城縣爲晉州罷金銀銅
鐵丹粉錫綠坑冶所役民夫及河南舞陽竄戶藤花戶還

州縣出工局繡女懷孟提舉王允中引沁水鑿渠成溉田四百六十餘所賜名廣濟渠命耶律鑄為左丞相秋七月辛酉朔立軍儲都轉運司癸亥立翰林國史院敕修遼金二史以史天澤耶律鑄為監修官采訪遺事命宋降將王青製神臂弓柱子弓教武衛軍習射諭河南管軍官於近城地量存牧場餘聽民耕乙丑遣官持香帛祀嶽瀆海鎮及后土凡十有九處分五道每歲代祀自此始辛巳詔許衡即其家教懷孟生徒己丑命鍊師王道歸於真定築道觀賜名玉華自後每忌日享睿宗帝后御容於玉華宮即此發諸道兵伐宋詔曰朕即位之後深以戢兵為念遣使於宋以通和好宋人不務遠圖伺我小隙反啟邊釁東剽西掠曾無寧日朕今春還宮諸大臣皆以舉兵南伐為請

元史卷五 本紀 六

朕重以兩國生靈之故猶待信使還歸庶有悛心共成和議畱而不至者今又半載矣往來之禮遠絕侵擾之暴不已曲直之分灼然可見卿等當整爾士卒礪爾戈矛矯爾弓矢秋高馬肥水陸分道而進大興問罪之師尚賴宗廟社稷之靈其克有勳毋替朕命八月壬辰賜故金補闕李太節諡真肅修撰魏璠諡靖肅戊戌以賽典赤平章政事許衡為國子祭酒姚樞為大司農竇默仍翰林侍講學士庚子立勸農司以陳邃崔斌等為使壬寅頒斗斛權衡丙午太白犯歲星宋私商七十五人入宿州有司議寘法帝宥之聽樞賈易九月庚申朔奉遷祖宗神主於聖安寺藏之瑞像殿戊辰徵儒人楊庸為教授教孔顏孟三氏子孫王庸為太常少卿教習大樂辛未置和糶所於開平丙

子諭諸王駙馬凡民間詞訟無得私自斷決田租輸沿河近倉官為轉漕毋勞民癸未改開元路隸北京免真定官民所貸官錢立諸路提舉學校官以王萬慶敬鉉等三十人充之冬十月庚寅朔帝自將討阿里不哥諸王合丹塔察爾從命平章趙璧尚書怯烈門各率蒙古漢軍駐燕京近郊大行一帶東至平灤西控關陝修立堡寨壬寅命亳州張柔歸德邸浹睢州王文翰水軍解誠張榮實東平嚴忠嗣濟南張宏七萬戶及指揮使鄭江董文炳各率所部兵詣行在十一月壬戌與阿里不哥遇於昔木土海子諸王合丹塔察爾分兵奮擊大破之逐北五十里帝親率師躡其後阿里不哥北遁庚午太陰犯昴癸酉命怯烈門趙璧率諸軍從塔察爾北上分蒙古軍一出居庸關駐宣德

元史卷五 本紀 七

德興府一出古北口駐興州帝親將諸萬戶漢軍及武衛軍由檀順州駐潮河川以防之罷十路宣撫司止畱開元路十二月辛卯癸惑犯房壬辰犯鈞鈐甲午帝還師詔徹所在戍兵放民間新僉軍壬寅立異樣局達魯花赤掌御用織造立宮殿府專職營繕及御衣宮闈尚食尚藥諸局設控鶴軍五百四人以軍使領之是歲天下戶百有四十一萬八千四百九十三年壬戌宋理宗景定三年也春正月辛未禁諸道戍兵及勢家縱畜牧犯桑棗禾稼癸酉以軍興人民勞苦停公私逋負毋徵丙戌命備宮懸鐘磬樂舞箏翟用樂工三百六十二人二月丁亥朔定中外官俸己亥李璫反以漣海三城獻於宋遂入益都丙申郭守敬造寶山漏成徙至燕

京甲辰詔發兵討李璫一會東平一會濱棣以諸王哈必赤總軍事己酉王文統坐與李璫通謀伏誅詔諭天下壬子李璫據濟南三月己未括木速蠻畏吾兒耶里可溫達失蠻等戶丁爲兵徙弘州錦工繡女於京師壬申命戶部尙書劉肅專理鈔法免北京西京絲銀稅夏四月丙戌朔大軍圍濟南辛卯修河中禹廟賜名建極宮甲辰太白晝見敕諸路管民官勸民開墾種植不得擅興不急之役妨奪農時乙卯詔軍民爲李璫裔從者宥其罪命右丞相史天澤專征五月庚申築環城圍濟南禁軍行所在剽掠獨濱棣今歲田租之半東平十之三戊辰命大司農姚樞與尙書劉肅共商議中書省事六月乙酉朔割遼河以東隸開元路徙婆娑府屯田軍於鴨綠江西以防海壬寅陝西

元史卷五 本紀

八

行省言西京宣德大原匠軍困乏乞僉民往代帝曰軍籍已定豈宜更張可令貧富相資果甚貧者聽休息一歲秋七月戊午復蒙古軍站戶差賦農民包銀徵其半俸戶止令輸絲民當供賦之月無徵私債甲戌李璫就禽磔於市甲申夜有白氣亙天八月己丑郭守敬請開玉泉水以通漕運王允中請開邢洛二州漳滏澧河達泉以溉民田並從之甲午以宣德州德興府銀冶付匠戶歲取銀及石綠丹粉輸官丙午立諸路醫學教授九月戊午以董文炳兼山東路經略使收集益都舊軍充武衛軍戍南邊壬戌改邢州爲順德府癸酉命阿朮爲征南都元帥治兵於汴閏月甲申朔免諸路軍戶他徭發粟三十萬振濟南冬十月丙寅分東西兩川都元帥府爲二賜高麗國王麻自是每

歲皆賜庚午敕總帥汪惟正將戍青居軍還屯田利州乙亥分立中書左右部以回紇人阿合馬領之仍兼諸路都轉運使專理財賦丁丑禁畿內田獵諭質子軍入侍十一月乙酉太白犯鉤鈴辛丑日有背氣重暈三珥作佛頂金輪會於聖安寺金錄周天醮於長春宮自是每歲間作遷河西民居應州官給牛種仍賜布人各二匹乙巳史天澤入見帝曰朕自知性不容物或乘怒欲有誅殺卿宜遲留俟覆奏方行戊申升撫州爲隆興府建行宮十二月甲寅封皇子眞金爲燕王守中書令丙辰立河南山東兩路統軍司自亳州至鈞州諸萬戶隸河南宿州至寧海州諸萬戶隸山東丁巳立十路宣慰司以總軍民立諸路轉運司掌權稅癸亥詔各路總管兼萬戶者止理民事勿預軍政

元史卷五 本紀

九

其州縣官兼千百戶者仍其舊諸路管民總管子弟有分管州府司縣及鷹房人匠諸務者悉罷之戊寅升大原臨泉縣爲臨州是月卽中書省奉祀祖宗神位備三獻官大禮使司徒攝祀事禮畢神主復藏瑞像殿四年癸亥宋理宗景定四年也春正月丙戌改諸路監權課稅所及清滄深鹽提領所爲轉運司甲午立十路奧魯總管府癸卯從阿合馬請興河南鐵冶設巡禁私鹽軍以廉希憲爲中書平章政事姚樞爲左丞商挺參知政事乙巳諭諸路漢軍奧魯毋隸各萬戶管領其科徵差稅山東河南隸統軍司東西兩川隸征東元帥府陝西隸行戶部辛亥放濟南所俘民文面爲奴者歸元籍二月壬子朔詔諸路官員子弟入質車駕幸開平發各衛軍千五百人扈

從諸衛漢軍萬五千人駐山後蒙古軍三千人駐官山防守歲如制甲子以王德素充國信使致書於宋詰其稽留郝經之故括民間兵器匿者死三月己亥定諸路包銀準輸鈔其絲料入本色非產絲之地亦聽折鈔癸卯初作太廟於燕京夏四月以太祖所行事蹟付史館五月乙酉初立樞密院以皇子燕王兼判院事戊子升開平為上都辛卯立平準庫以均物價通鈔法庚子升開平望雲縣為雲州松山縣為松州從阿合馬請以歲入鐵鑄農具令民易粟輸官六月癸酉建帝堯廟於平陽給洒掃戶田五十頃命線真為右丞相塔察爾為左丞相秋七月癸未禁諸投下毋擅勾攝燕京路州縣官吏諸路探馬赤毋擾民蒙古軍不得以民田為牧地戊戌弛沿邊軍器禁置椎場於樊

元史卷五

本紀

十

城與宋通互市八月戊申朔置元帥府於大理升宣德州為府隸上都以淄萊登三州為總管府治淄川命昔撒昔總制鬼國大理兩路兵部郎中劉芳使大理至吐蕃遇害詔恤其家戊午以阿脫商挺行樞密院於成都順慶潼川元帥府並聽節制甲子以西涼經兵振之鈔仍免租賦三年諭諸臣傳旨有疑者許覆奏壬申車駕至自上都九月乙酉立漕運河渠司禁民間所市布帛疏薄狹短者冬十二月丁未朔令益都元帥欽察統鳳翔青居平陽軍成虎嘴寨甲戌徵耶里可溫達失蠻僧道等戶田租商稅是歲天下戶百有五十七萬九千一百定民間絕戶財產並拘入官毋寡子幼其母不得私鬻田宅放賤為良富家子弟父兄在者不得私借錢債典售家產人口違者斷送入官

至元元年宋理宗景定五年也春正月丁丑朔高麗國王王植遣使來賀自是每正旦皆至敕諸路宣慰使非奉詔無輒入覲諸王位下工匠已籍為民者並徵差賦癸卯築冷水河城分兵戍之二月辛亥選儒士編修國史譯經書起館舍給俸贍之壬子修瓊華島疏雙塔漕渠丁卯太陰犯南斗癸酉車駕幸上都以西北諸王款附召諸路總管赴上都大朝會夏四月戊申以彰德洛磁路引漳滏洹水灌田致御河淺澀鹽運不通命塞分渠以復水勢辛亥太陰犯軒轅御女戊午太白晝見五月乙亥遣郭守敬行視西夏河渠庚辰敕劍州守將分軍守劍門關立寨人頭山釋宋私商五十七人給糧遣歸丙戌太陰犯房己亥犯昴以粘合南合平章政事秋七月甲戌彗星出鬼柳昏見西

元史卷五

本紀

十一

北光燭天長數十丈貫上台掃紫微文昌北斗旦見東北凡四十餘日癸未改新鳳州為徽州以西番十八族部立安西州丁酉龍門禹廟成庚子阿里不哥與親王玉龍蒼失阿速帶昔里吉等及其謀臣不魯花阿里察脫忽思自歸上都帝曰諸王皆太祖之裔釋不問惟誅不魯花等三人八月壬寅朔乙巳立諸路行中書省以省官出領其事軍國重務無不統攝詔頒新立條格定官吏員數分品從等秩給俸祿授公田計日月以攷殿取禁擅用官物勿以官物進獻勿借易官錢勿擅科差役凡軍馬不得停泊郵坊詞訟不得隔越陳訴恤孤寡勸農桑驗旱澇平市價具盜賊囚徒起數月申省部其諸王使臣驛傳稅賦差發不得擅招民戶不得以銀與非投下人為幹脫禁口傳敕旨

及追呼省臣官屬庚戌定諸站戶限田四頃免稅以供驛馬及祇應癸丑以劉秉忠拜太保參領中書省事始定都於燕改燕京為中都分立省部其大興府仍舊丁巳改元大赦詔曰應天者惟以至誠拯民者惟以實惠朕以菲德獲承慶基內難未戡外兵未戢夫豈一日於今五年賴天地之昇矜暨祖宗之垂裕凡我同氣會於上都雖此日之小康敢朕心之少肆比者星芒示儆雨澤愆常皆闕政之所由顧斯民其何罪宣布維新之令溥施在宥之仁可大赦天下改中統五年為至元元年戊午彗星伏甲子復見於參車駕至上都自是二月臨幸八月始還元世諸帝率循無異皆不書冬十月庚戌有事於太廟奉安祖宗神主戊辰改武衛軍為侍衛親軍分左右翼宋主昀殂太子

元史卷五

本紀

三

禩嗣改元咸淳十一月辛巳吉里迷國內附言東有骨鬼亦里于兩部歲來侵疆詔發兵征骨鬼壬辰罷領中書左右部并入中書省仍以阿合馬平章政事兼諸路都轉運使知大府監事十二月乙巳定中外官儀從甲子太陰犯房詔宋人新附及北人陷沒來歸者皆月給衣糧庚午罷各路輿魯官並各投下達魯花赤始立州郡長吏遷轉法五品以上宣授六品以下敕授是歲招集析居放良還俗僧道編集人戶名姓憐口習諸色匠藝設總管府領之二年乙丑宋度宗咸淳元年也春正月辛未朔日食癸酉徙鎮海百里八謙謙州諸色匠戶於中都給銀萬五千兩為行費又徙奴懷忒木帶爾斫手人匠赴中都造船運糧乙酉籍河南北荒田分給蒙古軍耕種庚寅城西番匣答

路癸巳八東乞爾部牙西來朝貢銀鼠皮二月辛丑朔并六部為四以麥朮丁為吏禮部尚書馬亨戶部尚書嚴忠範兵刑部尚書別魯丁工部尚書禁山東諸路私煎硝礬甲子定蒙古人充各路達魯花赤漢人充總管回鶻人充同知承如制凡文案一同判行印信聽達魯花赤封識長官收掌廉希憲商挺罷以寶合丁王晉代之論僧人通五大部經者為中選以有德業者為州郡僧錄判正副都綱等官仍於各路設三學講三禪會三月乙未罷南北互市括民間南貨官給其直骨鬼襲擊吉里迷部兵帝命出粟及弓甲給之免榷上都商稅酒醋諸課夏閏五月癸卯升樅縣為景州罷淘金總管府聽民采辦丁卯定四親王南京分地鄭州隸合丹鈞州隸明里睢州隸李羅赤蔡州隸

元史卷五

本紀

三

海都其他屬邑皆還朝廷命趙璧行省南京廉希憲行省東平姚樞行省西京詔各路州府戶不滿千者量加并省凡投下者各附所隸州城其散府州郡戶少者不更設錄事司及司候司附郭縣止聽州府官兼領自是裁并州縣凡二百二十餘所六月戊辰朔新得州土官向良內附令移成通江徙山東統軍司於沂州丙子太陰犯心大星秋八月己卯諸省臣皆罷命安童為右丞相伯顏為左丞相阿朮帥師攻廬州安慶諸路宋將范勝張林高興孟興戰死九月戊戌將有事於太廟命滌養犧牲取大樂工於東平預習儀禮庚子皇孫鐵穆耳生冬十月己卯享太廟尊皇祖為太祖追諡聖武皇帝皇祖妣為光獻皇后癸未敕統軍萬戶麾下所俘人口官贖為民其私越禁界被獲者

許親屬完聚詔貧難軍或兩戶三戶合出正軍一名其丁
單有力者許募人應役十二月庚午改北京西夏二行省
為宣慰司己丑瀆山大玉海成置廣寒殿改諡皇考睿宗
為景襄皇帝上皇妣尊諡為莊聖皇后升祔睿宗廟置宗
王府札魯忽赤十員掌諸王駙馬投下蒙古色目人應犯
一切公事及漢人姦盜等罪

三年丙寅宋度宗咸淳二年也春正月壬子立制國用司
以阿合馬為使張惠副之張易同知司事二月丙寅以廉
希憲宋子貞平章政事張文謙為左丞阿里為右丞史天
澤為樞密副使甲申製太常禮樂工冠服復立東京廣寧
懿州開元恤品合懶婆娑等路宣撫司參知政事王晉侍
中和哲斯轉運使王明坐隱匿鹽課伏誅夏四月丁卯五

元史卷五 本紀

五

山珍御榻成置瓊華島廣寒殿庚午定歲祀嶽鎮海濱之
制五月丙午浚西夏中興漢延唐來等渠丙辰罷益都行
省及息州安撫司六月丁卯封皇子南木合為北平王戊
寅申嚴陝西河南竹禁秋七月丙申以張德輝參議中書
省事己未發西夏避亂民還本籍成都新民為豪家所庇
者勒歸州縣十一月辛卯詔給京府州司縣官吏俸及職
田命忽都答爾為中書左丞相丙辰諭四川行院江漢庸
蜀等效順其官吏對階改授有功者遷有才者用民無生
業者振衣糧願遷內地者給田廬毋令失所十二月辛酉
改四川行院為中書省立諸路洞冶所聽制國用司節制
丁亥建大安閣於上都鑿金口導盧溝水轉漕西山木石
命張柔段天祐同行工部事築宮城立提點宮城所

四年丁卯宋度宗咸淳三年也春正月癸卯修曲阜宣聖
廟乙巳百濟遣使來朝禁僧官侵理民訟辛亥以趙璧為
樞密副使許衡謝病還懷孟癸丑封昔木土山為武定山
其神曰武定公泉為靈淵其神曰靈淵侯以駕討阿里不
哥駐此之故僉蒙古軍戶二三丁者一人四五丁者二人
六七丁者三人為軍戊午析上都隆興府自為一路三月
己丑耶律鑄復為左丞相是年置丞辛卯自潼關至蘄縣
立河渡官八員譏察姦偽乙未建習樂堂於中都使樂工
肄業壬寅從安童言止設丞相二員蒙古漢人參用外用
老成一員同議省事丁巳耶律鑄置宮縣樂成賜名大
成樂夏四月甲子新築宮城於中都東北方六十里為門
十二初金人滅宋移汴京長嶽石於燕京壘成萬壽山元
築宮城山適在大內西北太液池之陽名曰瓊華島

元史卷五 本紀

五

五月丁亥朔日倉新建孔子廟於上都丙申威州山後大
番弄麻等十一族來附壬子增諸路包銀一兩充官俸六
月乙丑史天澤復為左丞相忽都答爾耶律鑄並降平章
政事伯顏降右丞廉希憲降左丞阿里張文謙並降參知
政事詔亦即納新附貧民從人借貸者官為代償秋八月
庚申填星犯天罇丙寅以宣徽院掌供玉食宴享及孳畜
芻菽等事用人得自選不由中書壬午太白犯軒轅大星
九月壬辰作玉殿於廣寒殿中乙未敕汪良臣立寨於母
章德山控扼江南以當鈞魚山之衝戊申復召許衡為祭
酒庚戌封皇子忽哥赤為雲南王往鎮大理帝曰朕固樂
其風土曩非麻數在躬當於彼分器焉乃析其國三十六
部為三路冬十月壬戌魚通瀾州番部入附以渠長阿奴

版的哥爲喝吾等處總管改給鐵旗城後番官璽書符命
甲子歲星犯軒轅大星庚辰定官員廕敘格十一月乙酉
享太廟宮縣登歌樂文武二舞咸備戊戌立新蔡蓋津二
縣甲辰立夔府路總帥府成開州乙巳填星犯天罇距星
十二月己卯省平陽路岳陽和川二縣入冀氏安西路櫟
陽縣入臨潼立諸位幹脫總管府

五年戊辰宋度宗咸淳四年也春正月甲午太陰犯井閏
月戊午令益都漏籍戶四千淘金棲霞縣每戶歲輸金四
錢二月戊子太陰犯天關己丑犯井三月丙寅免諸路四
品以下官子孫入質壬申改母章德山爲定遠城武羣山
爲武勝軍丁丑罷諸路女真契丹漢人爲達魯花赤者夏
五月辛亥朔以太醫院拱衛司教坊司及尙倉尙果尙醞

元史卷五

本紀

六

三局隸宣徽院秋七月癸丑初立御史臺命右丞相塔察
爾爲御史大夫帖只爲御史中丞帝曰臺官職在直言朕
或有未當其極言無隱毋憚他人朕當爾主戊辰罷諸路
打捕鷹房工匠洞冶總管府並聽轉運司兼領遺忙古帶
率兵征建都蠻九月癸丑罷中都路和雇所立京師瀕河
十倉丁巳阿朮統兵圍樊城冬十月戊寅朔日食己卯敕
中書省樞密院凡事與御史臺同奏初設起居注以翰林
官兼充十二月戊寅敕二分二至及聖誕節祭星於司天
臺復置乾州奉天縣以好時永壽二縣省入是歲帝擊叛
王海都於北庭追至阿力麻里之地去上都萬餘里海都
遠遁帝令勿追
六年己巳宋度宗咸淳五年也春正月癸丑立四道提刑

按察使司設副使僉事巡行各道曰山東東西道河東陝
西道山北東西道河北河南道任滿聽御史臺攷核戊午
命史天澤董師襄陽二月己丑頒蒙古新字詔曰國家肇
基朔方制用文字皆取漢楷及畏吾字以達本朝之言攷
諸遺金及遐方諸國例各有字今文字寢興字書方缺特
命國師八思巴勅蒙古新字頒行諸路譯寫一切文書期
於順言達意而止凡璽書頒降俱用新字仍各以其國字
副之丁酉敕宮燭毋彩繪鞍鞞箭鏃不得以黃金爲飾夏
四月辛巳製玉璽大小十紐放單丁貧乏爲民禁成卒毋
踐屯田禾稼以眞定等路蝗免代輸築城夫戶賦癸卯命
董文炳率兵南征秋七月辛酉製太常寺祭服己巳立諸
路蒙古字學設教授命職官子弟每路二人府州各一人

元史卷五

本紀

七

民間子弟上路三十人下路二十五人充生徒凡省院臺
部並用識蒙古字人員作必闕赤譯寫文移立西蜀四川
監榷茶場司八月己卯立金州招討司丙申命中書省采
輯農桑事定列條目令按察使與州縣官相風土所宜頒
行九月詔諭淮蜀官民曰朕纂承丕基同仁一視罔間南
北兩淮四川大江以南皆吾赤子即位之始未遑他務首
遣國信使副講信修睦以通和好惟期投戈卷甲使兩地
百姓息肩咸遂安生樂業之願豈意宋人妄生邊釁是驅
若國生靈置之鋒鏑而不恤也恐有無辜枉被殘擾今詔
諭彼界官吏軍民人等及我國人或國小過逋亡或勢不
獲己因而陷沒者當明知朕不欲用兵之本意爾等卽轉
禍爲福其審圖之戊午定民間貸錢雖踰限止償一本息

冬十月己卯定朝儀服色壬午升高唐冠氏竝為州庚子太陰犯辰星遣官慮囚赦諸路鰥寡廢疾官給廬舍薪米後皆不書十二月戊子築東安渾河堤己丑時享畢命國師作佛事於太廟七晝夜造木質金表牌位十六設大榻金椅奉安祏室前此太廟薦佛事之始析彰德懷孟衛輝為三路升林慮縣為林州改順州為韓城縣并省馮翊等州縣十所始置義倉

七年庚午宋度宗咸淳六年也春正月丙午耶律鑄廉希憲罷立尙書省罷制國用使司以忽都答爾為中書左丞相許衡為左丞阿合馬平章尙書省事張易副之張惠李堯咨麥朮丁竝參知尙書省事己酉太陰犯畢救諸投下官隸中書省初制以中書省統山東西北地大都燕京皆隸焉謂之都省至是以諸王駙馬投下官

元史卷五 本紀

六

并錄二月辛未朔以伯顏為樞密副使甲戌築昭應宮於高梁河丙子帝御行宮觀劉秉忠許衡及太常卿徐世隆所起朝儀大悅舉酒賜之丁丑以歲饑罷築宮城壬辰立司農司以張文謙為卿設四道巡行勸農官三月庚子朔日會改諸路行中書省為行尙書省丙辰浚武清縣御河夏四月壬午檀州隕黑霜二夕五月甲辰威州汝鳳川番族渠長來朝以合荅平章政事丙辰免上都商稅惟市易莊宅奴婢孳畜例收契費六月庚辰敕戍軍還沿途立安樂堂饑者食之病者醫之死者槩葬官給其直丙申立籍田於中都東南郊秋七月辛丑設上林署乙丑以遼東開元總管府兼本路轉運司事八月戊辰朔阿朮築環城以逼襄陽戊寅以塔察爾同知樞密院事帖只為御史大夫

辛巳置應昌府設官屬九月庚子汰僧道耶里可溫有家室者為民丁巳太陰犯井丙寅括河西戶口定田稅冬十月庚午太白犯右執法癸酉定宗廟祝文書以蒙古字牲牢用野豕時果勿市取之內園降興中府為州十一月壬寅熒惑犯太微西垣上將立侍儀司掌朝會諸儀史天澤築萬山為一字城自是襄樊道絕閏月丁卯朔禁緇段織日月龍虎及以龍犀飾馬鞍者壬辰立諸站都統領司總驛傳仍設脫脫禾孫盤詰往來奸偽十二月丙申朔改立大司農司增巡行勸農使副各四員命御史中丞孛羅兼大司農卿以都水監隸之定歲祀制每春秋二仲月上戊日祭大社大稷於西南郊立春後丑日祭風師於東北郊立夏後申日祭雨師雷師於西南郊壬寅降河南韶州為

元史卷五 本紀

九

澠池縣丁未金齒驃國三部長內附獻馴象二辛酉建大護國仁王寺於高良河更定僧尼服色是歲東京路旱南京河南等路蝗免絲銀十之三振山東淄萊路饑者再八年辛未宋度宗咸淳七年也春正月丙寅太陰犯畢己卯諭南陽屯田人戶皆內地中產之民遠徙失業各仍還本籍南京諸郡民賦悉改輸米粟貯近地給襄陽軍遣兀都蠻帥師鎮西方旦當發近畿民二萬八千人築宮城二月乙未朔定官民婚聘禮數己亥罷諸路轉運司入總管府移陝蜀行省於興元癸卯以趙璧為中書右丞乙巳大理宣慰寶合丁王傅闕闕帶毒般雲南王忽哥赤事覺伏誅戊申以治事日程諭中外官吏己未敕軍官佩金銀符其民官工匠所佩者竝拘入勿復給辛酉分歸德為散府

升申州爲南陽府濟州爲濟寧府三月乙丑增置河東山西道提刑按察司改河東陝西道爲陝西四川道山北東西道爲山北遼東道辛巳復立夏邑縣以碭山并入省穀熟縣入睢陽乙酉許衡以老病乞解機務除集賢大學士兼祭酒如故設蒙古國子學選蒙古漢人官員子孫及俊秀者充生徒好學者兼習算法丁亥熒惑犯太微西垣上將己丑敕有司毋滯獄以致越訴封皇子燕王乳母趙氏幽國夫人夫鞏德祿追封德育公夏四月戊午阿朮與宋將范文虎戰於濰灘敗之五月乙丑以東道兵方圍襄陽分命秦蜀諸將各進兵鄭鼎出嘉定汪良臣出重慶札刺不花出瀘州曲立吉思出汝州以牽制宋師所至順流縱棧獲宋戰艦甚眾丙寅牢魚國來貢己卯命史天澤平章

元史卷五 本紀

三

軍國重事六月甲午諭樞密院凡軍情徑奏不由尙書省有事關錢糧者仍與共議管民官所領錢穀並俟年終攷較乙卯招集河西幹端昂吉阿等處居民秋七月壬戌朔設回回司天臺官屬丁卯命國王頭輦哥行省北京有訴運山侍郎張大悅與宋交通者帝諭之曰宋人善用間計朕不輕信毋懷疑懼辛未置左右中三衛親軍都指揮使司掌宿衛扈從兼屯田事八月壬辰朔日倉己未聖誕節始立內外仗及雲和署樂位東川統軍司攻拔銅鈹寨宋總管李慶隆以慶知梁山軍九月丙寅罷陝西五路西蜀四川行省以耶速荅爾行四川省事於興元京兆等路直隸尙書省戊辰升成都德陽縣爲德州降虢州爲虢略縣丙子太陰犯畢敕今歲享太廟毋用犧牛癸未弛四川茶

監禁帝曰四川民力困敝自今有言茶鹽之利者以違制論冬十一月辛酉朔建國號大元詔曰誕膺景命奄有四海必有美名以紹紀統唐之爲言蕩也虞之爲言樂也馴至禹興而湯造互名夏大以殷中世降以還事殊非古爲秦爲漢者止從初起之地名曰隋曰唐者僅乃始封之爵邑是皆徇百姓見聞之狃習嬰一時經制之權宜我太祖起朔土膺帝圖方輿之廣歷古所無旣成大業宜定鴻名取易乾元之義可建國號曰大元十二月辛卯朔宣徽院請以闕遺漏籍等戶淘金帝曰姑止毋重苦吾民也乙巳立新字學士於國史院掌翻譯文字省太常寺入翰林院宮殿府入少府監

元史卷五 本紀

三

九年壬申宋度宗咸淳八年也春正月甲子罷尙書省入中書省以阿合馬張易並平章政事張惠爲左丞李堯咨麥朮丁並參知政事罷給事中中書舍人檢正等官仍設左右司丁丑命西平王奧魯赤領忙古帶十八族欲速公弄等吐蕃軍同征建都蠻降新安州爲縣隸順天改諸路行尙書省仍爲行中書省分立京兆行省壬午改山東東路統軍司爲行樞密院移鳳州屯田於鹽白二州二月辛卯詔札魯忽赤乃太祖開國所制位列百司上其賜銀印立左右司自後多稱耶改中書爲大都戊申始祭先農於東郊如祭社儀三月甲戌焚比間四教經免醫戶差徭阿朮破樊城外郭夏五月戊午朔立和林轉運司兼提舉交鈔癸亥遣拔都軍於怯鹿難之地開渠耕田罷西番圖魯干諸處金銀礦戶爲民乙酉太白犯畢距星建宮城東西

華左右掖門六月壬辰減乞里吉思屯田租宋師救襄陽
阿朮敗之龍尾洲宋統制張順張貴死之京師大雨壞牆
屋壓死者眾禁私鬻回麻秋八月丙戌朔日食戊子立
羣牧所掌天閑及尙方鞍勒九月丙寅括諸路正軍貼戶
及同籍親戚奴僕丁年既長依權要避役者竝還爲軍戊
寅太陰犯御女冬十月丙戌朔封皇子芒兀刺爲安西王
賜京兆分地駐兵六盤山遣使持詔諭扮卜忻都國戊戌
以趙璧平章政事張易爲樞密副使熒惑犯填星己亥定
每歲自七月至十一月終聽捕獵餘月有禁癸卯立會同
館以居降人及番洞官之來朝貢者百官志稱至元十三
年始置今據紀文載
此十一月壬戌諸王只必帖木爾築新城成賜名永昌府
丁卯太陰犯畢己卯并中書省左右司爲一回回獻巨石

元史卷五 本紀 三

礮命送襄陽軍前十二月乙酉朔宋將管萬壽攻成都僉
省嚴忠範戰失利逮至京
十年癸酉宋度宗咸淳九年也春正月戊午立京師醫學
名廣惠司癸亥阿里海牙取樊城宋將張漢英范天順牛
富死之丁卯立祕書監掌歷代圖籍并陰陽禁書選世家
名臣子弟爲監丞己卯置軍器永盈二庫分典弓矢甲冑
遣使持金十萬兩市藥師子國二月丙申雲南羅羽渠長
阿旭叛敕有司安集其民丁未宋安撫呂文煥以襄陽降
召赴闕其熟券軍畱襄陽屯田生券軍分隸各萬戶翼三
月丙寅帝御廣寒殿授皇后弘吉刺氏玉冊玉寶授皇太
子眞金玉冊金寶詔告天下壬申分金齒國爲兩路癸酉
客星青白如粉絮起畢度五車北復自文昌貫斗杓歷梗

河至左攝提凡二十一日命耶律鑄平章軍國重事張憲
爲右丞夏四月癸未朔呂文煥入朝授侍衛親軍都指揮
使襄漢大都督罷中興河南兩路行省命史天澤阿朮阿
里海牙行荆湖樞密院事鎮襄陽合荅劉整塔出董文炳
行淮西樞密院事守正陽爲滅宋計丁酉敕南儒被人略
賣者官贖爲民辛丑罷四川行省入西川行院別置東川
行院於重慶五月壬子朔詔天下獄囚除殺人者待報其
餘槩行疏放限八月內如期自至大都六月丁亥免大都
南京兩路賦役以紓民力汰陝西貧難軍甲午改資用庫
爲利用監閏月己巳罷東西兩川統軍司秋七月辛巳許
衡乞罷丙戌敕襄陽生券軍無妻子者赴京老疾者遣還
家庚寅省西涼府入永昌路是月霖雨享祭山川嶽鎮海

元史卷五 本紀 三

瀆社稷宗廟八月庚戌朔高麗遣使賀聖誕節後每歲皆
至不書赦諸路罪囚自至大都就獄者二十二入九月辛
巳以合伯平章政事甲申生券軍至大都詔釋其械俾從
征日本人各賜鈔娶妻丙戌以王恂主國學增置生員設
東宮宮師府詹事以次官屬己丑敕自今秋獵鹿豕先薦
太廟冬十月庚申命合荅帶爲御史大夫出御史臺贓罰
鈔振貧民升襄陽府爲路初建正殿寢殿香閣周廡兩翼
室皇子奧魯赤改建都禽其長下濟等四人建都降立靈
遠都護府大司農言畿內秋禾始收請禁民覆耕恐妨芻
牧帝以農事有益不許十二月己酉朔省陝州號略朱陽
二縣入靈寶罷西夏世官是歲諸路蟲蝻災霖雨害稼振
米凡五十四萬五千五百九十石免民代輸僉軍絲銀及

伐木夫戶稅負前朝官錢毋徵

十一年甲戌宋度宗咸淳十年也春正月己卯朔宮闕告成帝始御正殿受朝賀庚寅初立軍官以功升散官格自龍虎上將軍以下至進義副尉凡三十四階丙午免于闕采玉工差役阿里海牙阿朮入覲力言江南可下宋室可平帝命史天澤伯顏專征僉軍十萬人益之二月戊申朔立儀鸞局掌宮門管鑰供帳鐙燭甲寅太陰犯井壬申起廉希憲爲北京行省右丞三月庚寅移四川礪門兵戍哈荅城辛卯改荆湖淮西二行院爲行省伯顏史天澤竝爲左丞相阿朮平章政事阿里海牙爲右丞呂文煥參知政事行省荆湖合荅爲左丞相劉整爲左丞塔出董文炳參知政事行省淮西癸巳改金州招討司爲萬戶府遣使招

元史卷五

本紀

五

諭八魯國夏四月辛亥分陝西隴右諸州置提刑按察司治鞏昌癸丑初建東宮辛未詔安諭幹端鴉兒看合失合兒等城諭丞相合荅先守沿江堡隘爲使傳往來之衛仍分兵掠荆南鴉山以綴宋之西兵六月庚申聲罪伐宋詔統軍官曰爰自太祖以來彼宋與我使介交通殆非一日彼此曲直之情亦所共知不必歷舉迨我憲宗御世朕以藩服奉命南伐師次鄂渚彼賈似道再遣宋京詣軍前請罷兵息民願奉歲幣朕以國之大事宗親在上必須入計用報而還卽位之始追憶是言乃命郝經等持書往聘蓋爲生靈計也古者兵交使在其間惟和與戰宐嗣報音其何與於使哉而乃執之卒不復命羈此一介行李於彼何益於此何損以致師出連年邊境之間死傷相藉繫累相

屬皆宋自禍其民耳襄陽被圍五年旅拒王師義當不貸朕先有成命果能出降許以不死是以既降之後朕不食言悉全其命冀宋悔過或啟令圖而乃執迷罔有悛心此問罪之師有不能已者夫以天下爲念爰及干戈自古有之無辜之民初無與焉若彼界官民有能去逆效順與眾來降或別立功績者驗等第官資遷賞所附軍民爾等宜嚴敕將士毋得妄行殺掠仍加振給令得存濟其或負固弗從及抗拒迎敵者俘戮何疑甲子分遣忙古帶帥武衛軍南征秋七月乙未伯顏陛辭帝曰古之善取江南者惟曹彬一人汝能不殺是吾曹彬也宋主禛崩太子焜嗣改元德祐八月丁未從史天澤言以荆湖淮西各置行省事權難一復改淮西行省爲行樞密院天澤至中途有疾而

元史卷五

本紀

五

還詔太原新僉軍遠成兩川遣使分括廩粟給其家九月癸巳軍次鹽山距鄧州二十里宋兵當郢夾漢城萬勝堡南岸戰艦千艘鐵絙橫江過我舟師不得下惟黃家灣有溪經鷓子山入唐港可達江宋又築壩置堡其處駐兵固守伯顏督諸軍攻拔其堡壘壩挽舟入溪出唐港整列而進冬十月壬戌歲星犯壘壁陣乙丑伯顏督諸將破沙洋堡進次新城宋統制黃順縋城降都統邊居諡自焚死趙文義戰死十一月乙酉師次復州宋安撫翟貴降癸巳東川元帥楊文安拔宋雲安羅拱高陽城堡壬寅起閣南直大殿及東西殿增選樂工八百隸教坊十二月丙午軍次漢宋軍守陽邏堡以扼中流伯顏用千戶馬福計自漢口開壩引船會淪河趨沙蕪徑入大江乙卯阿里海牙進軍

青山磯破武磯堡己未伯顏次鄂州宋權守張晏然都統程鵬飛知漢陽軍王儀知德安府來興國竝以城降伯顏留阿里海牙鎮鄂州規取荆湖而自與阿朮將諸軍水陸東下癸亥增置歸德永城縣省長武縣入涇川夏原縣入靈臺是歲諸路好蚘等蟲災振米粟凡十二萬餘石天下戶一百九十六萬七千八百九十

十二年乙亥宋主熈德祐元年也春正月甲戌師次黃州宋制置陳奕及其子知安東州巖皆以州降乙亥東川副元帥張德潤拔禮義城宋安撫張資死之癸未師次蘄州宋安撫管景模獻城丙戌次江州宋知江州錢真孫呂師夔知南康軍葉闔六安軍曹明竝迎降己丑選蒙古漢人有才者赴軍前為新附州郡民官乙未遣尙書廉希賢侍

元史卷五 本紀

五

郎嚴忠範祕書監柴紫芝至宋己亥置雲南郡縣長及規措所二月癸卯師次安慶宋知府事范文虎出降甲辰命博魯歡為淮南都元帥會各部兵於邳州丙午伯顏師次池州宋統制張林以城降權州事趙昂發死之丁未禁無籍自效軍俘掠新附軍民戊申詔諭江黃鄂岳漢陽安慶諸處歸附士民軍匠僧道人等令農者就耒商者就途士庶緇黃各安己業如鎮守官吏妄有騷擾許詣行省陳告庚申召降臣張晏然赴闕帝曰朕省卿奏云宋之權臣不踐舊約拘留使者實非宋主之罪儻蒙聖慈止罪擅命之臣庶令趙氏有祀卿言良是卿既不忘舊主必能輔弼我朝比令伯顏按兵不動仍遣廉希賢等持書往使果能悔過來附既往之愆朕復何究即權臣賈似道尚不欲加罪

況肯令趙氏之祀乎若其執迷罔悛未然之事朕將何言天其鑒之辛酉師次丁家洲宋相賈似道親督步帥孫虎臣淮西制置夏貴操戰艦橫互江中伯顏分步騎夾岸而進舉巨礮擊之宋兵大潰似道走揚州甲子師次蕪湖宋知無為軍劉權知大平州孟之縉降博魯歡軍下邳宋西海州安撫丁順降乙丑阿里海牙取江陵下岳州宋統制孟之紹舉城降戊辰師次采石宋知和州王善宋史作善降博魯歡次漣水宋知安東州孫嗣武降庚午師次建康宋都統徐王榮翁福茅世雄曹旺俱以城降賈似道至揚州始送郝經劉人傑歸國命北平王南木合出鎮阿力麻里之地丞相安童行省院事往輔之以防海都三月壬申朔宋鎮江統制石祖忠江陰軍僉判李世修相繼納款乙亥分

元史卷五 本紀

五

兵徇饒州宋知州唐震故相江萬里死之敕安西王芒兀刺分軍從西平王奧魯赤征吐蕃丙子廉希賢等至建康傳旨令諸將各守營壘無妄侵掠己卯升平陰縣新鎮寨為肥城縣庚辰宋知靈國府顏紹卿知滁州王文虎以城降江東平得府二州五軍二縣四十三甲申置懷遠靈武二縣於中興路分處新民丙戌師至常州宋鈐轄戴之泰通判王虎臣以城降廉希賢等至獨松關為宋人所殺丙申四川側布番官稅昔確州番官莊寮等率四十三族詣行院款附庚子分置翰林院專掌蒙古文字其翰林兼國史院職修國史典制誥備顧問辛丑命阿朮分兵取揚州有二星闕於中天一星隕夏四月壬寅朔改西夏中興道按察司為隴右河西道丙午阿里海牙軍至江陵宋荆湖

宣撫朱禕孫制置使高達知荆門軍劉懋湖北提刑青陽
夢炎李湜俱出降遂入江陵分道招諭未下州郡峽歸澧
等州常德府新舊城各守臣以次歸順辛酉宋郢復二州
安撫趙孟翟貴五郡鎮撫呂文福竝以城降癸亥阿朮駐
師瓜洲宋兵盡焚廬舍遷其民以去丙寅立尙牧監免京
畿西京陝西今歲絲銀丁卯命李羅爲御史大夫罷隨路
巡行勸農官以按察司兼勸農事增副使僉事二員庚午
師克沙市屠其城宋都統孟玘監鎮司馬夢求死之五月
辛未朔阿里海牙還鄂州以廉希憲行省江陵庚辰遣高
達安撫湖南帝曰昔我國家出征所獲城邑卽委而去之
未嘗留兵戍守以故連年征伐不息夫爭國家者取其土
地人民而已得地無民其誰與居今務保守城邑使百姓

元史卷五

本紀

天

安居力農湖南州郡皆汝舊部曲未歸者作何招懷新附
者作何安集汝必熟知其事聽汝爲之辛巳宋辰隨均沅
靖房六州守臣皆降荆南湖北平得府三州十一軍四縣
五十七丁亥召伯顏赴闕壬辰宋統制劉師勇殿帥張彥
王安節據常州推姚訔爲守六月庚子朔日食旣晝晦如
夜星見雞鷲皆歸宋嘉定安撫魯萬壽以城降賜名順命
僉四川行院事戊午招諭宋四川制置使趙定應曰比者
青陽夢炎赴闕面陳蜀省事宜奏請緩師令自納款姑從
所請今遣招討使畢再興宣布大信若能順時達變可保
富貴無爲塗炭生靈自貽後悔辛酉宋潼川安撫梅應春
來降戊辰罷山東經略司秋七月庚午朔阿朮集行省諸
翼萬戶兵船於瓜洲阿塔海董文炳集行院諸翼萬戶於

西津渡宋沿江制置使趙潛樞密都承旨張世傑知泰州
孫虎臣陳舟師於焦山南北阿朮分遣水軍萬戶劉琛循
江南岸東趨夾灘繞出敵後文炳直抵焦山南麓以倚其
右招討使劉國傑趨其左萬戶忽刺出擣其中堅張弘範
自上流趨焦山北大戰乘風縱火焚其舟宋師大敗世傑
虎臣走追至圖山獲黃鵠白鶴船數百艘宋自此不能軍
癸酉太白犯井癸未分命伯顏趨臨安阿里海牙取湖南
阿朮攻淮南萬戶宋都帶李恆尙書呂師夔等取江西罷
淮西行院以阿塔海董文炳同署省事辛卯太陰犯畢甲
午進伯顏右丞相阿朮左丞相詔僉雲南落落蒲納烘等
皆軍萬人取察罕章未附種落增置燕南河北道提刑按
察司八月癸卯伯顏陛辭帝曰若宋君臣相率來附則趙

元史卷五

本紀

天

氏族屬可保無虞宗廟悉許如故可持詔往諭己未升任
城縣爲濟州九月己巳太白犯少民庚午從阿合馬請以
軍興國用不足復立都轉運司九諸路轉運司十一濫增
課程己卯太白犯太微西垣上將乙酉罷襄陽統軍司丙
申命玉昔爲御史大夫括江南諸郡書版及臨安祕書省
乾坤寶典諸書冬十月戊戌朔享太廟牲仍用牛癸丑太
陰犯畢十一月丁卯阿里海牙圍潭州乙亥伯顏分兵三
道趨臨安阿刺罕率步騎自建康四安廣德出獨松關董
文炳率舟師循海由澈浦至浙江伯顏與阿塔海居中節
度諸軍期竝會臨安己卯宋都帶次龍興宋轉運判官劉
槃降都統密佑不屈死江西諸郡相繼歸附得府州六軍
四縣五十六壬午伯顏屠常州宋守臣姚訔陳炤王安節

皆死之劉師勇奔平江改順天為保定府乙酉阿剌罕克廣德知軍令狐槩降丙戌太陰犯軒轅大星庚寅伯顏遣降人游介寶奉璽書副本至宋十二月戊戌填星犯亢辛丑董文炳次許浦宋都統祁安以本軍降甲辰伯顏次平江宋都統王邦傑知府潛說友通判王矩之迎降丁未改諸站提領司為通政院整飾諸譯戊申太陰犯畢宋主遣右史陸秀夫奉書尊帝為伯父世守子姪禮請和伯顏不許丙寅阿剌罕次安吉宋安撫趙與可以州降置四川馬湖路省重慶路隆化縣入南川瀘州海山縣入昌黎復置華州鄭縣薊州平谷縣是月祀天始用香酒脯饗行一獻禮用呂文煥言始椎江西茶是歲天下戶四百七十六萬四千七十七

元史卷五 本紀

三

十三年丙子春正月丁卯朔阿里海牙克潭州宋安撫李芾知衡州尹穀闔室自焚死轉運使鍾蜚英都統陳義自殺參議楊霆赴水死湖南平得府一州六軍二縣四十伯顏次嘉興宋安撫劉漢傑出降董文炳至乍浦宋統制劉英以本軍降辛未文炳至海鹽守臣王與賢胡全沈世隆皆降壬申立回易庫於諸路掌市易幣帛諸物辛巳伯顏次崇德宋相陳宐中遣侍郎劉廷瑞等來返且約面議降事甲申伯顏至皋亭山董文炳阿剌罕以兵來會宐中違約不至宋主遣使齎傳國璽及降表詣軍前其辭曰大宋國主羸謹奉表於大元仁明神武皇帝陛下羸眇焉幼冲遭家多難權奸賈似道背盟誤國至勤興師問罪羸非不欲遷避以求苟全自知天命有歸避將焉往惟是世傳鎮

寶不敢愛惜謹奉太皇太后命戒痛自貶損削去帝號以兩浙福建江東西湖南二廣四川見存州郡悉上聖朝為宗社生靈祈哀請命伏望聖慈矜全不忍羸三百年宗社遽至殞絕令趙氏子孫世世有賴不敢弭忘伯顏以其表不稱臣仍書宋號不受乙酉師次臨安北十五里宋陳宐中張世傑劉師勇等挾益廣二王出嘉會門渡浙江遁去輟耕錄云伯顏駐軍皋亭山遣千戶囊加台等入城慰諭令居民門首各貼好投拜三字及聞蓋王廣王如婺州即命分兵屯守諸門時范文虎安營江幹太皇太后望祝曰海若有靈當使波濤大作一洗而空之無何潮汐三日不至軍馬丙戌宋主易稱臣降表至己丑遣千戶囊加帶齋壘北上二月丁酉日中有黑子相盪如鵝卵庚子宋主羸率文武官詣祥曦殿望闕上表乞為藩臣遣賈餘慶謝堂家鉉翁劉岳等充祈請使詣闕待命且命文天祥同行伯

元史卷五 本紀

三

顏承制以臨安為大都督府命忙古帶范文虎入視事兩浙平得府八州六軍一縣八十一辛丑師克臨江軍宋知軍陳元死之丁未慰諭臨安官吏軍民詔曰聞者丞相伯顏上奏宋母后幼主暨諸大臣百官已於正月十八日齋醴綬奉表降附朕惟自古降王必有入覲之禮已遣使特往迎致爾等各守職業勿復妄生疑畏凡歸附以前犯罪悉從原免公私逋欠不得徵理一應抗拒王師及逃亡嘯聚者竝赦其罪百官有司諸王邸第三學寺監祕省史館及禁衛諸司各宜安居州郡官吏勿得依殘宋故事擅自科斂所有山林河泊薪木花果魚蝦菱芡諸物聽民采取權免徵稅太常寺祭器樂具法服樂工鹵簿儀衛宗正譜牒天文地理圖書及典故文字戶口版籍盡數收取前代

聖賢之後及高尚儒醫僧道下筮通曉麻數竝山林隱逸名士窮居不能自達者所在官司具以名聞名山大川寺廟或歷代名人遺蹟不許侵毀鰥寡孤獨不能自存者量加贍給且命伯顏入宋宮收衮冕圭璧符璽及宮中寶玩車輅輦乘麾仗等物戊午宋制置使夏貴以淮西降得府二州六軍四縣三十四三月戊辰禁江南及西番僧持軍器甲戌宋宗長福王與芮來軍中文天祥自鎮江入真州乙亥伯顏發臨安北還留忙兀台鎮浙西峻都鎮浙東董文炳阿剌罕經略浙閩丁丑阿剌罕等入宋宮宣詔趨宋主人覲宣讀至免繫頸牽羊之語宋太后全氏泣謂宋主曰荷天子聖慈活汝當望闕拜謝拜畢子母肩輿出宮唯太皇太后謝氏以疾暫留戊寅立淮西廬州總管萬戶

元史卷五 本紀

三

府乙酉吉袁贛南安四郡來歸閏月丙申置宣慰司於濟寧路主印造交鈔供江南軍儲立尙珍署收掌濟寧諸處子粒供酒材汪惟正略地涪州克山寨谿洞二十三所甲子以郝禎參知政事夏四月乙丑朔省東川行樞密院及成都經略司入西川行院己卯以侍衛親軍征成久放令還家期以六月各赴軍五月乙未朔宋主熈至上都降封瀛國公命宰相出通州迎黃羅張輓先燕三宮於會同館然後十次開筵月支糧萬石日支食肉六十斤以平宋遣官告天地祖宗於上都之近郊宋益王昞稱帝於福州癸卯復沂莒膠密寧海五州所括防城軍爲民免其租徭二年己巳阿朮遣兵攻拔秦州之新城丁未宋揚州都統姜才攻灣頭堡親軍千戶董士元戰死戊申改博州爲東昌路升閬州爲保寧府六月甲子朔以孔子五十

三世孫曲阜縣尹孔治兼權主祀事己巳置行戶部於大名造交鈔通江南貿易宋江西制置黃萬石以其軍來降辛未命阿里海牙征廣西罷兩浙大都督府建行尙書省於鄂州臨安王申設諸路宣慰司以行省官爲之竝帶相銜其已立行省者不更設宣慰司甲戌命贊善王恂都水少監郭守敬更造新麻復召許衡赴京商訂戊寅詔作平金平宋錄及諸國臣服傳記壬辰宋淮東制置使李庭芝留安撫朱煥守揚州與姜才率步騎東走秦州阿朮分道追及圍之秋七月乙巳朱煥以揚州降乙卯宋秦州守將孫良臣獻城李庭芝姜才被執不屈斬之師入真州宋守將苗再成死之通滁高郵諸州相繼來附淮東平得州十六縣三十三八月己巳救漢軍都元帥李庭將侍衛軍征

元史卷五 本紀

三

河西庚辰以銅爵一豆二獻於太廟敕常饌外益以野豕鹿羊蒲萄酒宋太皇太后謝氏至燕降封壽春郡夫人九月壬辰朔改作太廟金主太祖主題曰成吉思皇帝睿宗主題曰太上皇耶可那顏皇后皆題名氏癸卯以平宋大赦天下丙午敕常德府歲貢包茅丁未墮沿淮及襄漢荆湖諸城甲寅太白入南斗乙卯升吐蕃哈答城爲寧遠府辛酉阿朮入覲奏得江淮及浙東西湖南北府三十七州一百二十八關一監一縣七百三十三冬十月戊子諸軍分道取閩廣命阿剌罕董文炳忙兀台梭都以州師出明州塔出呂師夔李恆以騎兵出江西十一月戊申阿剌罕克處州宋秀王與樾觀察使李世達監軍趙由瑒察訪使林溫被執皆不屈死旋破建寧府邵武軍壬子賜龍苔溫

軍有功者鈔帛宋主是航海趨潮州癸丑阿刺罕軍至福州宋招捕使王積翁為內應府尹王剛中迎降乙卯太陰犯填星敕管民官及理財官由中書省銓調軍官由樞密院定擬十二月辛酉朔熒惑掩鈞鈴丁卯改雲南蘿蔔甸為元江府路漢志作蘿戊辰宋提舉市舶使蒲壽庚以泉州降遂徇興化軍宋知軍陳文龍被械死宋主是次惠州甲子門遣倪宙奉表詣軍前請降壬申有告運使姜毅所言多不軌指毅妻子為證帝曰妻子豈為證者邪置弗問庚寅詔諭新附府州軍縣官吏軍民曰昔以萬戶千戶漁奪其民致令逃散今悉以人民歸元籍州縣凡管軍將校及宋官吏向有以勢奪民田廬者俾各還本主無主則以給附近民之無產者其田租商稅茶鹽酒醋金銀鐵冶竹貨

元史卷五 本紀

五

湖泊課程從實辦納故宋繁冗科差如聖節上供經總制錢等百有餘條悉與除裕改瑞安府為溫州隴州為散府薊州復置豐潤縣升滌陰縣為薊州臨洮渭源堡為縣分立東西二川行樞密院以合丹闊里吉思領東院攻合州不花李德輝領西院攻重慶阿里海牙破靜江宋守帥馬暨黃文政張虎提刑鄧德遇俱死之廣西州郡皆下是歲東平濟南泰安德州安東海州清河平灤西京等州皆水旱缺食振軍民站戶米二十二萬五千五百六十石粟四萬七千七百一十二石鈔四千二百八十二錠有奇天下戶一千五百七十八萬八千九百四十一十四年丁丑春正月癸巳進軍廣東宋循梅二州守臣劉興錢榮之迎降新會合會逢龍東莞義民熊飛戰死丙申

以江南平百姓疲於軍供免今歲絲銀召天師三十六代孫張宗演至京賜號演道靈應沖和真人還江南領諸路道教置江淮都轉運鹽司及權茶轉運司丙辰阿刺罕破汀關宋汀守黃去疾監軍吳浚竝降二月癸亥彗星出東北長四尺餘宋瑞州安撫姚文龍張文顯來降其家屬為宋所害各賜鈔優之壬午墮江西諸城惟隆興濱江仍舊丁亥宋知南恩州陳堯道僉判林叔虎涪州陽立各以城降命李羅為樞密副使兼宣徽使領侍儀司事遣吳浚至漳州說文天祥天祥斬之三月辛卯以廣西二十四郡歸附復建行省於潭州置廣南西路宣撫司於靜江癸巳敕行都水監兼領漕運乙未宋建寧漳泉等郡守臣邱德傅李珪郭贊李公度皆以城降壬寅克廣東肇慶府新封等

元史卷五 本紀

五

州乙巳命中外官所佩金銀符用色組繫於肩腋以免褻瀆著為令庚戌四川南平軍都掌蠻羅計蠻及鳳皇中壠羅卓高厓四峒與播州土官楊邦憲思州土官田景賢相繼送款癸丑命汪惟正自東川移鎮犛昌廣南西路慶遠鬱林昭賀藤梧融賓柳象豔廉容貴潯悉平得府一州十四復設襄陽南漳二縣升崇明沙為州夏四月甲子宋特磨道將軍農士貴安平州李惟屏來安州岑從毅以所屬溪洞百四十七來附癸酉省各路轉運司入總管府設鹽轉運司四置榷場於碣門黎州與吐蕃貿易丙戌禁江南行用銅錢五月癸巳京畿不雨嚴酒禁犯者籍其家癸卯立廣西欽橫二州安撫司敕江淮新附官三品以上各遣質子一人入侍西番長阿立丁寧占等三十一族來附辛

亥河南山東饑弛河泊禁乙卯選蒙古漢軍相參宿衛秋
七月戊子朔罷大名濟寧印鈔局丁酉敕自今非佩符使
臣及軍情急速不聽乘傳癸卯諸王昔里吉劫北平王南
木合囚丞相安童脅諸王以叛使通好海都海都不納遂
率西道兵至和林城北帝命伯顏往擊大破之諸王忽魯
帶率其屬來歸與伯顏軍合乙巳宋張世傑復入邵武軍
丙午初立行御史臺於揚州統淮東淮西湖北浙東浙西
江東江西湖南八道每道各增置提刑按察司仍總居內
臺令彈劾行省宣慰管軍管屯諸色官吏非違命相威爲
御史大夫設行臺監察御史立行中書省於江西以塔出
爲右丞呂文煥爲左丞張榮實李恆耶的迷失程鵬飛蒲
壽庚竝參知政事帥師定閩廣壬子樞大都商稅八月戊

元史卷五 本紀 美

午朔新建太廟於大都李恆自將攻文天祥於興國天祥
走至空坑得脫神將鞏信力戰死招討使趙時賞被禽九
月丙申廣南東路廣連韶德慶惠潮南雄英德等郡皆平
戊申耶的迷失復破邵武軍入福州宋主昱次廣州之淺
灣韶塔出與李恆呂師夔以步卒出大庾嶺忙兀帶校都
蒲壽庚及元帥劉深等以舟師下海合追宋二王冬十月
丙辰朔日食甲申塔海略地至夔府毀其城校都破興化
軍獲守帥陳瓚車裂之屠其民十一月戊子文天祥與其
徒趙孟潛復起兵行省發兵攻之孟潛被殺天祥僅以身
免執其妻子赴京師乙未定僞造寶鈔同情者竝死改稱
宋曰亡宋行在曰杭州劉深攻宋主昱於淺灣張世傑退
保秀山十二月丁卯以大都物價翔踊發官廩萬石振糶

貧民庚午梁山軍袁世安以其城及金石城軍民來降乙
亥導任河復民田三千餘頃以耿仁參知政事是歲振東
平濟南等郡饑民米三萬一千餘石粟二萬八千石鈔萬
有百錠

十五年戊寅春正月辛卯遣阿老瓦丁將兵戍幹端城已
亥禁軍民略賣良家子女賜湖州長興縣金沙泉名瑞應
泉唐時用此水造紫筍茶進貢有司具在幣祭之始得水
致祭一夕水溢可溉丙午萬戶圖滿答爾克瀘州宋安撫
王世昌死之戊申降封宋福王趙與芮平原郡公庚戌東
川副都元帥張德潤大敗涪州兵州將王明及其子忠訓
總管韓文廣張遇春皆死之二月西川行院不花圍重慶
宋守將張珣屢敗所部開門納降珣潛遁至涪元帥張德

元史卷五 本紀 美

潤邀禽之明年珣行至安西自經死此事據宋史書之元
且珣珣出降與元史汪良臣及紐璘傳亦不合且舊本紀
於上年禽珣之後七月始書張德潤破涪八月始書詔不
花行院西川亦前戊午祀先農令蒙古胄子代耕籍田癸
亥升華亭縣爲松江府復立河中府萬泉縣辛未以蜀地
多嵐瘴弛酒禁丁丑熒惑犯天街壬午校都攻潮州屠其
民知州馬發死之置太史院掌天文麻法以祭酒許衡兼
領三月乙酉命忙兀帶校都蒲壽庚行省福州鎮撫瀕海
諸郡合刺帶爲沿海經略使帥舟師南征丁亥太陰犯太
白戊子犯熒惑甲午西川行院招降重慶等處得府三州
六軍一監一縣二十柵四十蠻夷司一竝招宥勝土恢等
城及石柵寨相繼來降壬寅詔諸路歲比不登免今年田
租絲銀乙巳楊文安克咸淳紹慶二州斬郡守鮮龍廣南

宣慰使招降雷化高三州宋主昞奔化州之礪洲尋及廣
王昞嗣立夏四月乙卯敕修會川縣盤古氏祠以時雨霑
足弛酒禁民衰疾者官為醞釀量給之戊午以江南土寇
竊發遣官分道撫治檢覈錢穀察郡縣災傷吏廉能者舉
以聞其貪殘不勝任者劾罷丁丑雲南行省招降臨安白
衣和泥分地城寨百有九所威楚金齒落落分地城寨軍
民三萬二千二百戶秃老蠻高州筠連州等城寨十九所
壬午立行中書省於建康敕自今罷免之官宰執為宣慰
宣慰為路官路官為州官以淮浙鹽課直隸行省宣慰官
勿預改北京行省為宣慰司五月癸未朔定武官承襲制
凡主兵官有功升秩者其原職不得令子孫復任惟陣亡
者始得襲本職病故者授官降一等總把百戶老死者不

元史卷五 本紀 天

襲具為令甲午敕諸職官犯罪受宣者聞奏受敕者從行
臺處治受省劄者按察使處治其宣慰司案牘聽本道按
察使磨刷一應罪犯有司勘明俟按察使審覆依例彙奏
自行省以下公務小事七日中午十五日大事三十日為
限乙未改烏蒙路隸雲南六月乙卯升西番李唐城為州
濟南府為路降西涼府為州宋主昞徙居新會之匡山丁
卯置甘州和羅提舉司以備軍餉振貧民甲戌汰江南冗
官淮西宣慰使昂吉爾入覲言阿合馬所立江西樵茶運
司及諸路轉運提舉等官多至五百餘人帝顧謂左右曰
江南官吏太冗省臣姚樞輩知而不言昂吉爾乃為朕言
之近侍因奏阿里海牙屬吏張鼎其人亦參政矣帝即命
罷斥傳旨省院臺及翰林院今為行省宣慰及各路達魯

花赤佩金虎符者多謬濫可大加裁汰於是以前興省并
入福建仍削各官所帶相銜罷樵茶營田司歸本道宣慰
司漕運司歸行省各路總管府計戶數多寡分上中下三
等設官改江南總管府為散府者七為州者一散府為州
者二乙亥敕諸司奏事必登起居注戊寅全州西延溪洞
猺蠻二十所內附己卯命張弘範為蒙古漢軍都元帥李
恆副之由海道討宋餘眾秋七月壬午朔宋湖南制置張
烈良提刑劉應龍起兵應匡山阿里海牙追襲之二人皆
戰死甲申增行臺監察御史四員江南湖北道嶺南廣西
道福建廣東道並設提刑按察司改京兆府為安西府大
倉為御廩資成庫為尚用監并皮貨局入總管府丙申復
建行省於贛州轄福建江西廣東諸道八月壬子朔追毀

元史卷五 本紀 天

宋故官所受告身壬戌漳州安撫使沈世隆守建寧降人
郭贊持張世傑偽檄至世隆執斬之行省謂世隆擅殺籍
其家帝曰世隆何罪命還其貲仍授本路管民總管甲戌
以川蜀山寨洞既平其渠州禮義等城仍畱兵鎮守餘
悉徹毀己卯立提刑按察司於畏吾兒分地辛巳升洛磁
為廣平府諭行省梭都蒲壽庚曰東南島嶼諸國尚有慕
義之心可因番舶諸人宣布德意誠能來朝朕將寵禮之
其往來互市俾各從所願九月壬午朔省東西川二行院
其成都潼川重慶利州設四宣慰司戊子分揀諸路所括
軍為民冬十月己巳張弘範統舟師由海道襲漳潮惠三
州李恆時將步騎由梅嶺襲廣州廣南諸郡相繼復為宋
陷庚午徙河南北道按察司治南京十一月丁亥以辰沅

靖鎮遠等郡蠻獠接壤民不安業命塔海程鵬飛並為別
湖北道宣慰使置司常德路壬辰阿里海牙略地至夔州
宋安撫使趙與珞冉安國黃之傑皆死之己亥定己除官
不之任者並削籍辛丑建寧人黃華集鹽夫及畬民為亂
丁未移浙江行省治杭州立淮東宣慰司於揚州閏月庚
戌朔羅施鬼國王阿榨內附立羅甸軍民安撫司辛亥太
白熒惑填星聚於房甲寅置光祿寺領尚飲尚醞等局癸
亥李恆入廣州張弘範攻漳州得山寨百五十戶百萬十
二月己丑授西南番阿永都掌蠻得蘭紐並安撫使丙申
從播州安撫楊邦憲請以鼎山縣仍隸播州尋改播川縣
壬寅張弘範屯潮陽文天祥走五坡嶺遣前鋒張弘正追
執之送大都丙午禁玉泉山樵采漁弋戊申追封伯夷昭

元史卷五

本紀

罕

義清惠公叔齊崇讓仁惠公加封程顯豫國公程頤洛國
公置屯田總管府於開成路復臨淄臨朐清河為縣導肥
河入於鄆淤陂盡為良田會諸王於大都分賜宋寶玉器
幣

元史卷五終

元史卷六

本紀四下

世祖下

至元十六年己卯春正月甲寅移贛州省治還龍興辛酉
宋合州安撫王立降詔殺立既而赦之召入覲仍其故官
自是東川州縣皆下壬戌分川蜀為四道以成都等路為
川西道廣元等路為川北道重慶等路為川南道順慶等
路為川東道並立宣慰司甲戌張弘範李恆兵至厓山張
世傑走宋主昺及其官屬俱蹈海死宋亡前後得戶一千
一百八十四萬八百有六二月戊寅朔升溧州為路遣使
訪通皇極數都陽祝泌子孫獲其書以獻癸未增置前後
二衛都指揮司共為五衛建司天臺於大都製銅儀象圭
表又於上都洛陽等五處分置儀表各設監候官癸卯敕

元史卷六

本紀

一

大都河間山東鹽運司並兼酒醋商稅甲辰發嘉定新軍
屯田脫里北之地命嘉定新附州郡及田楊二家諸貴官
子俱充質子入侍乙巳立西蜀四川道提刑按察司志作十九
增詔河南西京北京各路課程聽宣慰司兼領圖太祖太
宗睿宗御容於翰林院命院官春秋致祭三月戊申朔詔
大兵渡江以來農民不無騷動今已安集務宜敦本力田
各正官以時勸課如無成效者糾察遣郭守敬由上都大
都歷河南府抵南海測驗晷景丙寅敕中書省凡掾史文
移稽緩一二日者杖三日者死甲戌授八番龍文求為臥
龍番龍延三為大龍番龍方零為小龍番俱安撫使得洞
寨一千六百二十六命太常寺定州郡祭祀儀式及壇壝
祭器圖寫成書名至元州縣社稷通禮夏四月癸巳命給

事中兼起居注掌隨朝諸奏事復立江西樵茶運司及諸路轉運鹽司宣課提舉司以兩淮鹽引五萬道召商中糴癸卯填星犯鍵閉乙巳選南軍二萬人增宿衛五月丙辰置漣水海州等處總管府募民屯田丙寅敕僧司文移毋輒入遞丁卯升雲南寶山瀘萊二縣為州癸酉行省言賦北京西京車牛皆至可運軍糧帝曰民之艱苦汝等不問但知役民使今年盡取則來歲田禾何由得種其止之六月丁丑朔發新附軍成礪門魚通黎雅甲申宋張世傑溺死海陵部將百五十八人詣瓊雷二州降癸巳雲南都元帥愛魯將兵分定亦奚不薛抵金齒蒲驃曲臘緬國界招降忙木巨木禿等三百寨師還獻馴象十二亦奚不薛者羅施鬼國別部也亦曰亦乞不薛令京朝諸官履役開浚通州河癸卯以阿合馬子忽辛為潭州

元史卷六 本紀

二

行省左丞從子別都魯丁為河南宣慰使秋七月戊申置東宮侍衛軍定江南上中路置達魯花赤二員下路一員應昌府如例設官己未改朵哥麻思地之算木多城為鎮西府丙寅填星犯鍵閉癸酉遣中丞崔或訪求江南藝術之人八月庚辰太陰犯房距星戊子海賊賀文達降括所掠婦女還之民庚寅敕沅州總管乞蒼合征取桐木籠狝狉伯洞諸蠻海賊金通精死獲其從子溫有司論如法帝曰通精已死溫何預焉特赦其罪詔每歲聖誕元辰禮儀費用名為己俸無非科斂民財應一切停止丁酉以江南所獲碧玉爵及玷凡四十九事納於太廟庚子歲星犯軒轅大星甲辰定漢軍出征逃者死且沒其家女真水達達軍不出征者隸民籍輸賦九月庚戌以忽辛兼領杭州諸

色人匠歲造繒段十萬匹置大護國仁王寺總管府建聖壽萬安寺於京城己巳統軍唐兀帶麻陽達魯花赤武伯不花劫掠辰沅新附民千餘口詔即軍中斬之冬十月乙酉帝御香閣命大樂署令完顏椿等肄文武樂丙申太陰犯太微西垣上將十一月丙午詔皇太子燕王參決朝政凡事先啟後聞戊申敕諸路所捕盜初犯賊多者死再犯賊少者從輕論罪有盜以舊鈔易官庫新鈔百四十錠者有司謂罪不應死帝以其父執役巨家即論如法癸丑太陰犯熒惑己巳并教坊入拱衛司十二月甲申祀太陽丁酉八里灰貢海青回回等所過供食羊非自殺者不食百姓苦之帝曰彼吾奴也飲食敢不隨我朝乎禁勿與降歸州路為州升沔陽安陸各為府濟寧安西慶遠建寧漳惠

元史卷六 本紀

三

梧柳象豈賓橫容潯諸府州並為路十七年庚辰春正月丙辰定遷轉官員法凡無過者授見闕物故及過犯者選人補之滿代者令還家以俟又定諸路差稅新增者即上報隱漏者加罪不必履畝清丈動搖百姓戊辰放荆南江廣所俘男婦三萬二千餘人為民置福建行省於福州尋移泉州改德慶路為總管府二月乙亥命和禮霍孫將兵與高和尚同赴北邊時有言高和尚善秘術能役鬼有是役三月乙卯立都功德使司掌帝師所統僧徒并吐蕃軍民事賜國師掌教所印辛未立畏吾境內交鈔提舉司柳林營田提舉司給月脫古思八部屯田牛具陝西轉運使郭琮等殺安西王相趙炳詔逮琮等誅之夏四月壬申朔升宣德龍門鎮為宣德縣隆興楊門站為懷安縣丁

亥立杭州金玉總管府庚子歲星犯軒轅大星山東諸郡
霜真定路蟲皆損桑五月甲辰作行宮於察罕海子之北
丙午升沙州爲路并括戶丁以富戶餘田分戍軍耕種六
月辛未朔新麻成詔曰自古有國牧民之君必以欽天授
時爲立治之本黃帝堯舜以至三代莫不皆然爲斯官者
皆世守其業隨時攷驗以與天合故麻法無數更之敝及
秦滅先聖之術每置閔於歲終古法蕪廢矣由兩漢而
下立積年日法爲推步之準因仍沿襲以迄於今天運
流行不息而欲以一定之法拘之未久而不差之理差
而必改其勢有不得不然者前命太史院作靈臺制儀象
日測月驗以攷其度數之真積年日法皆所不取庶幾膺
合天運而永終無敝比日新麻告成賜名授時麻頒行天

元史卷六

本紀

四

下布告遐邇咸使聞知壬申安西王薨罷王相府壬辰頒
鈔法於江淮廢宋舊錢并括銅器戊戌阿合馬矯殺江淮
平章阿里伯右丞燕帖木爾崔斌等秋七月戊申太陰掩
房距星己酉太陰犯南斗徙泉州行省治龍興戊午阿合
馬薦郝禎耿仁竝爲中書左丞用姚演言開膠東河屯田
漣海乙丑罷江南財賦總管府并大都鹽運司入河間割
建康民二萬戶種秫歲輸釀米三萬石己巳遣中使歷江
南名山訪求高士且命持香帛詣信州龍虎山臨江閣阜
山建康三茅山設醮八月庚午朔改蒙古侍衛總管爲蒙
古侍衛親軍都指揮使丙子太陰犯心東星丁丑梭都請
招三佛齊等國不允是月許衡致仕姚樞卒九月甲子太
陰犯右執法并犯歲星丁卯羅施鬼國主阿察阿里降召

入觀冬十月丁丑遣湖南兵萬人伐亦奚不薛降其民亦
奚不薛稱疾遣從子入朝帝曰彼不稟命輒以職授從子
無人臣禮宜令亦奚不薛出始罷兵壬午立陝西四川行
中書省己丑以都實爲招討使往西域窮河源丙申定在
官者任事一月始給俸初置象輦以備巡幸十一月己亥
朔置泉府司掌御用及太后太子諸王出納事戊申敕疏
通鈔法凡賞賚多給幣課稅多收鈔是月廉希憲卒十二
月戊寅加奉使木剌由國速刺蠻爲招討使壬辰福建陳
桂龍及其兄子陳弔眼據漳州反元帥完者都擊之走入
甌洞甲午重建太廟成奉遷神主於祐室迎太祖睿宗二
金主入新廟行大亨禮置領北庭都護府掌畏吾兒之居
漢地者阿朮卒於軍改雷廉封化高五州爲路徙峽州路

元史卷六

本紀

五

於江北舊治復置鄆縣隸鞏昌是歲置樵茶都轉運司於
江州總江淮荆湖福廣之稅
十八年辛巳春正月丁未敕江南州郡官蒙古回回人兼
用丙辰改符寶局爲典瑞監收天下諸司印二月乙亥發
刑徒減死者爲軍征海外立上都留守司升敘州爲路隸
安西省移潭州省治鄂州湖南宣慰司治潭州丙戌發肅
州軍民穿渠溉田乙未皇后弘吉剌氏崩皇太子眞金自
獵所奔至三月己亥立登聞鼓院有冤者許搥鼓以聞是
月許衡卒夏五月癸卯禁西北邊回回人越境爲商丙辰
歲星犯右執法庚申分烏蒙路隸雲南順慶路隸川東詔
括契丹戶嚴鬻人禁安西軍站凡和雇和買與民均役秋
七月甲午朔置和中所於甘州以儲兵糧癸卯太陰犯房

距星庚戌松州知州僕散禿哥前後射虎萬計賜號萬虎將軍八月甲子朔招討使方言擇守令崇祀典戢奸吏弭盜賊整軍旅獎忠義六事下廷臣議行丙寅焚惑犯諸侯西第三星壬辰海南諸國貢犀象閏月癸巳朔焚惑犯司怪南第二星庚戌太陰犯昴丁巳命播州每歲親貢方物壬戌兩淮轉運使阿刺瓦丁坐盜官鈔伏誅詔給怯薛台糧拘其所占田為屯田九月癸酉定市舶商貨已經泉州抽分者他處止令輸稅甲申太陰犯軒轅大星冬十月乙未以皇后耐享太廟乙巳命安西王府協濟戶及南山隘口軍於延安鳳翔六盤等處屯田丁未置河西織毛段匠提舉司己酉命張易等參校道藏諸書惟留道德經餘悉焚毀庚戌詔諭干不昔國來附壬子置各省蒙古提舉

元史卷六

本紀

六

學校官擢管軍千戶程文海為集賢直學士兼祕書少監和禮霍孫守司徒改諸路屯田寺蘭奚總管府為農政院十一月癸亥朔詔諭探馬禮令歸附甲子賊首陳弔眼伏誅桂龍降流之邊地甲戌太陰犯五車次南星丁丑犯鬼丁亥太陰掩心東星十二月甲午命魯吉刺帶為右丞相阿合馬為左丞相丙午太陰犯軒轅大星癸丑免益都淄萊寧海開河夫今年租賦仍給其備直免福州路十八年以前逋賦是歲揚州火通泰二州饑發粟二萬石振之十九年壬午春正月壬戌朔諸王撒里蠻誘執叛王昔里吉遣使馳報丁卯增兩浙鹽價每引鈔四貫命江南稅糧依宋舊制折輸絲絹雜物二月辛卯朔饒州總管姚文龍言江南財賦歲可辦鈔五十萬錠詔以文龍為江西道宣

慰使兼措置茶法甲午給甘州逃軍五千人自願挈家還戎者鈔萬有六百二十錠每口布一匹驢一頭乙巳立廣東提刑按察司及鐵冶總管府改羅羅斯宣慰司隸雲南浙東宣慰司治溫州分軍戍江南自歸州及江陰至海口凡二十八所癸丑大良平元帥蒲元圭遣子入朝三月戊寅益都千戶王著擊殺阿合馬於闕門壬午捕著及其黨高和尚并樞密副使張易皆醢於市夏四月丁酉魯吉刺帶罷命和禮霍孫為右丞相戊戌立回易庫倒換金銀昏鈔帝以諸王公主分地所設達魯花赤例不遷調百姓苦之敕滿任依常調選代壬寅敕於灤河造官車以給歲用毋派取民甲辰帝悟阿合馬之姦逮其子忽辛赴揚州鞫問始鉤攷諸處平準庫汰倉庫官覈所占民田還其主

元史卷六

本紀

七

戊申敕凡文書俟奏可始用御寶刊行蒙古畏吾字所譯通鑑庚戌設懷孟路河渠使副官壬子制民間貸錢息以三分為率定內外官三年攷滿敘升未滿者不得超越命雲南諸路各建學祀宣聖五月己未朔戮阿合馬尸窮治其黨黜省部濫設官七百十四人罷南京西京宣慰司盡拘諸位下所給印己巳遣浙西宣慰同知劉宣等理算各省鹽茶及財賦府出納之數籍阿合馬妻子親屬奴婢財產并逮其黨耿仁別都魯丁至大都誅之癸未以麥朮丁為中書右丞張雄飛參知政事乙酉合逃軍黥其面仍使從軍六月己丑朔日會癸丑罷司徒府及農政院丁巳亦奚不薛千戶宋添富順元總管阿里降秋七月戊午朔日會詔於揚州岳州各立行樞密院辛酉剖阿合馬黨郝頑

棺戮其尸壬戌禁諸位下差軍護送私營錢貨蒙古軍守
江南者令更番還家壬申立馬湖路總管府戊寅議建阿
失荅不速皇城用木十二萬道遠難致詔如察罕海子地
築土為牆乙酉閣婆國貢金佛塔九月丁巳朔定歲貢額
上路總管府三年兩貢儒吏各一人下路總管府二年一
貢儒吏遞進儒必通吏事吏必知經史中書省掾史有闕
於院臺令史內選取院臺令史於六部令史內選取六部
令史以歲貢儒吏補充戊午誅阿合馬第三子阿散四子
忻都刺其皮以徇并誅其從子宰奴丁庚申罷漣水海州
屯田以游顯行省揚州領浙江漕運辛酉海外南番俱藍
國主遣使奉表進寶貨及黑猿一那旺國主忙昂以其國
無識字者遣使四人不奉表蘇木都刺國主土漢八的亦

元史卷六

本紀

八

遣使二人蘇木達國相臣那里八合刺攤赤以事在俱藍
聞詔代其主打古爾奉表進指環印花綺段及錦袞二十
合寓俱藍耶里可溫主兀咱爾撒里馬亦奉表進七寶項
牌藥物又管領木速蠻馬合麻亦遣使奉表同日赴闕
唯俱藍取遠招討使楊廷璧三往招之乃入貢壬戌敕官吏受賄及侵盜倉庫輕
者杖決重者死言官緘默與受賊人一體論罪乙丑括雲
南所產金置打金洞達魯花赤其稅賦用金為則壬午釐
正選法置黑簿籍阿合馬黨人之名冬十月丁亥朔復以
耶律鑄為左丞相札散平章政事丙申立詹事院置左右
詹事各一員設京畿江淮兩都漕運司歲僉江淮運糧至
中灤京畿接運至大都癸卯分禁中出納為三庫御用寶
玉遠方珍異隸內藏金銀質孫衣段隸右藏常課衣段綺

羅縑布隸左藏以宦者掌其鑰乙巳遣使招降法里耶阿
魯乾伯等國庚戌以四川民少止留成都廣元順慶重慶
夔府五路餘悉裁去詔兩廣福建雲南地遠五品以下官
從行省銓注奏用乙卯誅阿合馬長子忽辛次子抹速忽
於揚州十二月戊午置利用庫於上都甲子召宋衍聖公
孔洙為國子祭酒兼提舉浙東學校壬申設沿河巡軍有
勢家為商賈阻遏民船者沒其家甲戌釋天下重囚除大
逆外令充征海軍丙子四川大盤洞主向臭友等來朝十
二月庚寅以張文謙為樞密副使乙未給瀛國公趙鼎衣
糧發遣上都殺宋丞相文天祥於燕京癸卯詔御史臺得
自選其屬仍參用蒙古人員罷湖廣金銀鐵冶提舉司隸
各路總管府徵處士劉因為右贊善尋辭歸是歲始命上

元史卷六

本紀

九

海總管羅璧暨千戶朱清張瑄造海船六十艘由海道運
糧四萬六千石至大都
二十年癸未春正月己未立弘吉刺氏為皇后是為南乙必皇后
丑定匿名書告事重者死輕者流遠方諭管民官凡遇災
傷過時不報及按察使不即行視者加罪丁卯伐船材於
烈塌都山乾山起運民夫八千人己巳太陰犯軒轅御女
庚午徙平灤造船廠於陽河就近運木庚辰太陰入南斗
壬午改鞏昌按察司為河西隴北道廣東按察司為海北
廣東道廣西按察司為廣西海北道福建按察司為福建
閩海道二月戊子定川廣成軍三年一更仍廩其家屬立
武成王廟於樞密院西以孫武子以下十人從祀庚寅太
陰掩昴庚子省四川東西北三道宣慰司及潼川萬戶府

新軍總管府威灌茂等州安撫司是夜太白犯昴辛丑定軍官選格萬戶千戶鎮撫自奏準日始三年為滿通行遷轉百戶以下不拘此例官吏贓罪自五十貫以上皆決杖除名不敘百貫以上者死乙巳太陰犯心甲寅降太醫院為尚醫監立江南四省官醫提舉司三月丁巳罷河西行御史臺立鞏昌等處行工部罷福建市舶總管府并泉州行省入福建行省免福建歸附後未徵苗稅己未放五臺山及南城造寺夫四萬人是夜歲星犯鍵閉庚申太陰犯井壬戌犯鬼乙丑罷淮安淘金官惟計戶取金立雲南提刑按察司給西川福建兩廣之任官驛己巳歲星犯房癸酉掩房廣州民林桂方反偽號羅平國改元延康官軍禽斬之壬午省福建道宣慰司復立行省於漳州夏四月丙

元史卷六 本紀

十

戌立別失八里和州等處宣慰司己亥太陰犯房壬寅犯南斗庚戌四川右丞耶速帶爾招撫筠連州定州諸蠻獨山都掌蠻不降進討之禽其長得蘭紐遂班師辛亥麥朮丁等檢覈萬億庫以罪繫者多請付蒙古人治帝曰蒙古人為利所汨亦異往日矣其擇可任者使之五月戊午縱平灤造船軍歸耕撥大都軍代之丙寅太陰掩心東星丙子諭雲南重囚先令便宜處決者自今恐濫及無辜仍令待報戊寅從御史中丞崔彥言罷采民間室女頒行宋文思院小口斛立海西遼東提刑按察司按治女真水達達部己卯詔江南漕運於濟州新開山河及海道兩路兼運時上年海運方至直沽六月丙戌嚴私易金銀禁己丑增內外官吏俸詔曰設官分職本以為民邇年諸物增價俸祿不足

養廉以致侵漁百端公私交困自今內外官吏俸給以十分為差添支五分以示體恤臣下至意辛亥四川行省討平九溪十八洞蠻析其地為州縣隸順元路以向世雄為父巴洞安撫大使秋七月癸丑朔免征骨鬼軍賦丙辰太白犯井癸亥太陰犯南斗乙丑太白犯井丙寅開雲南驛路分亦奚不薛地為三立宣慰司及總管府丁卯熒惑犯司怪丙子省江南十道宣慰司官四十七員定上都商稅六十分取一立總教院及務農司八月癸未以明理察平章軍國重事立懷來淘金所丙午太白犯軒轅丁未歲星犯鉤鈐濟州新開河成立都漕運司九月壬子太白犯軒轅少女戊午太陰犯斗象山賊尤宗祖聚眾掠海上阿刺帶往招之降其徒萬人海道以寧丙寅徙舊城市肆局院

元史卷六 本紀

十一

稅務入大都止四十分徵一己巳太白犯右執法辛未以歲登開諸路酒禁壬申太陰掩井癸酉熒惑犯鬼甲戌太陰犯熒惑犯積尸氣太白犯左執法冬十月甲午以札散為樞密副使詔五衛軍十人為率以七人三人分為二番每月放七人者還家正月復役正月放三人者還家四月復役更替休息丙申太陰犯昴庚子建寧降賊黃華復叛聚眾十萬號頭陀軍犯崇安浦城諸縣壬寅耶律鑄罷戊申立和林平準庫罷中興管課及北京鹽鐵提舉司十一月癸丑命各省印造授時曆初各省曆日皆取給京湖等四省所用者龍興印之雲南四川等省所用者京兆印之設大都城門尉戊寅太白歲星相犯十二月壬辰以中書參議溫迪罕圖魯花廉貧不附權勢賜鈔百錠辛丑徙新附官仕內地甲辰太陰掩

熒惑丙午罷雲南金箔規措所定質子令凡大官子弟選赴京師是歲以新開河運船多損壞仍事海運改領北庭都護府爲大理寺給布萬匹振女眞饑民

二十一年甲申春正月乙卯帝御大明殿羣臣上尊號曰憲天述道仁文義武大光孝皇帝朝賀如正旦儀大赦天下甲子罷諸路理算官江浙平章忙忽帶進眞珠百斤丙寅立安豐府陝兩屯戶於淮南發軍士二千人耕之丁卯建都金齒西南夷十二部皆降先建都爲緬所制今緬破故降立江淮荆湖江西四川行樞密院治建康鄂州撫州成都丙子建寧賊首黃華自殺丁丑諸路按察使陞辭帝曰卿等到官當宣明朕意勿求貨財名成則利隨之徇利必失其名而身命且不可保尙其慎之二月諭各路堤堰令總管府并州

元史卷六

本紀

主

縣長官常行驗視遇有損壞即便修築毋致湮沒民田聽各道按察使不時糾察貧民情願復業者給付原產仍免一切逋課私債二年後方許取索壬辰邕州民黃大成爲亂梧韶衡諸州民起應之甲午罷新開河役移其軍及水手各萬人事海運丁未徙江南樂工八百家於京師戊申移江淮行省治杭州浙西宣慰司治平江省黃州宣慰司入淮西道立法輪竿於大內萬壽山高百尺遷宋宗室及其大臣之家屬於內地三月丁巳皇子北平王南木合至自北邊丞相安童亦至丁卯太廟殿成奉安神主夏四月從御史李昂言有父兄居憲臺而子姪爲按察使或父兄爲按察使而子姪在別道爲官者並令迴避軍官毋受民詞押運毋帶私貨管民官自三月停訟十月始行和買諸

物止從出產處所隨時給值不得強其所無重累百姓乙酉省泉府司入戶部立大都留守司及總管府置西川延安鳳翔興元宣謀司己亥涿州巨馬河決籍江南鹽徒軍戊申命開元路造船百艘付狗國戍軍五月己酉立二千戶總欽察康里子弟願爲國宣勞者己未調江南田賦十之二其十八年以前逋欠盡免徵縱江南匠戶之無藝業者十九萬爲民庚午括天下私藏天文圖識太乙雷公式七曜麻推背圖顯明麻苗太監麻有私習及收匿者加罪閏月己卯改西南番安撫司爲總管府給西川蒙古軍鈔使耕沿江曠土四頃以下免輸稅丙戌遷揚州行臺於杭州罷羣牧皮貨局所六月壬子遣使分道尋訪測驗晷景日月交食麻法甲子遣軍六千人淘金雙城移和林屯田

元史卷六

本紀

主

軍於五條河秋七月丁丑朔立衍福司革軍官所帶相銜八月丁未雲南華帖白水江鹽井三處土老蠻叛殺諸王及行省使者定軍官格例以河西回回畏吾兒等依各官品充萬戶府達魯花赤同蒙古人女眞契丹同漢人若女眞契丹生西北不通漢語者同蒙古人女眞生長漢地者同漢人已酉遣無籍軍舊從征者還家勿許持弓矢放福建畚軍並收其軍器散其部長於近處爲管民官甲戌以建都女子沙智立站有功令管萬戶事詔議貢舉九月甲申京師地震立福建鹽課市舶都轉運司并江淮福建爲一省癸巳太白犯南斗甲辰海南貢白虎師子孔雀丙午發鈔常平倉與民和糴己酉敕管軍萬戶爲行省宣慰使者毋兼管軍事仍爲萬戶者毋兼蒞民政辛酉敕宋有手

號軍死則以兄弟及子繼之免文其手十一月庚子太陰犯心辛丑和禮霍孫麥朮丁張雄飛温迪罕皆罷復命安童為右丞相盧世榮為右丞史樞為左丞撒的迷失廉希恕參知政事敕中書省整治鈔法定金銀價禁私自回易癸卯海外南巫里別里刺理倫大力等四國各奉表來貢命司農司自襄陽至東海募民間荒免其租六年并一切雜役十二月甲辰朔立常平鹽局癸亥從盧世榮言禁民間釀酒官自酤賣丙寅荆湖行省招降龍昌寧龍延萬等奉羊馬白氈來貢癸酉御史中丞崔彧言盧世榮不可居相職帝怒削彧官命翰林集賢院召諸路醫學教授增修本草是歲西僧楊璉真伽發宋帝后諸陵及大臣冢墓凡百有一所宋太皇太后謝氏卒於燕征東招討使聶古帶

元史卷六 本紀

古

言海道艱阻罷征骨鬼兵

二十二年乙酉春正月戊寅弛民間買賣金銀及江淮魚利禁罷懷孟諸路竹監聽民賈易官止收稅庚辰毀宋郊天臺建佛寺戊子增遣軍士二千人屯田芍陂歲收米四萬餘石真定民劉驢兒有三乳自以為異謀不軌伏誅移五條河屯軍於兀失蠻札失蠻之地癸巳盧世榮奏罷江南行御史臺以所屬按察司為提刑轉運司俾兼錢穀隸內臺辛丑命禮部領會同館壬寅造大樽於殿以木為質銀內金外鏤雲龍高一丈七寸二月詔攷課官吏從前責以五事因無激勸之方徒示虛文致鮮實效自今每歲終攷課以五事備具著有成效者加其父母妻子封蔭乙巳增濟州漕船三千艘役夫萬二千人初江淮歲漕米百萬石於京師海運十萬

石膠萊六十萬石濟州三十萬石以水淺舟大多不改江能運至是更以百石之舟每舟用四人故夫數增多改江濱江西元帥招討司為上中下三萬戶府宿州蘄縣真定濟寧益都高郵沿海七翼為上萬戶棗陽十字路邳州鄧州杭州懷州孟州真州八翼為中萬戶常州鎮江潁州廬州亳州安慶江陰水軍益都新軍湖州淮安壽春揚州泰州弩手保甲處州上都新軍黃州安豐松江鎮江水軍建康二十二翼為下萬戶蒙古漢人新附諸軍相參為三十七翼翼設達魯花赤萬戶副萬戶各一員隸所在行院丙午割荆湖所隸八番羅甸歸西川析嵐管為二州辛亥廣東宣慰使月的迷失討平潮惠二州盜郭逢貴等四十五寨降民萬餘戶丙辰罷膠萊所鑿新河壬戌太陰犯心升御帶庫為章佩監戊辰復立行御史臺於江州居江浙湖

元史卷六 本紀

五

南江西之中諸路按察司職掌仍舊從盧世榮請立規措所回買江南民田拘收天下銅器增置真定濟南太原甘肅江西江淮湖廣諸道宣慰司兼都轉運司嚴治課程復命資吉刺帶為左丞相忽都魯平章政事罷融州總管府為州三月禁民間不得織造銷金段匹倡優市井諸婦不得妄用金飾釵釧等物違者沒入官丙子遣太史監候往占城測日晷癸未改甘州行省為宣慰司隸寧夏行省庚子詔依舊制每鹽一引四百斤價銀十兩折鈔為二十貫夏四月庚戌監察御史陳天祥劾盧世榮罪惡詔同赴上都面質世榮悉款服癸亥以麥朮丁不附世榮命與安童同治省事五月甲戌以郭佑參知政事戊寅詔甘州每地一頃輸稅三石壬午發軍千人修阿失鹽場倉以忻都為

賜里玉招討使戒毋興兵遠略甲申立汴梁宣慰司依安
西王故事汴梁以南命親王出鎮戊子改昇江烏定朵里
滅該等府爲路雲南省臣脫帖木爾陳調通賦徵侵隱成
要隘明黜陟罷轉運給親王賦豪戶除重稅決盜賊增驛
馬取質子定俸祿教農桑優學校卹死事捕逃亡十六事
下中書省議行庚寅復徙行臺於杭州行院於建康六月
庚午詔減商稅罷身行較耕錄云身行本謂之互郎謂主互市者唐人書互作互故因爲耳
省市船司入轉運司帝諭安童曰國家大事汝蒙古人未
知朕左右無復漢人可否皆自朕決汝當盡心善治百姓
無使重困致亂以貽朕羞秋七月壬申造溫石浴室及更
衣殿甲戌敕祕書監修地理志戊寅分甘州新附軍屯田
亦集乃路甲申析闕里吉思所平大小十谿洞爲郡縣丁

元史卷六 本紀

七

亥廣東宣慰使月的迷失入覲言山寨降者五百餘所帝
問戰而後降邪招之卽降邪對曰是皆招降者也因言兵
荒後未嘗存恤其民州縣官復無之任者以故盜賊各據
一方互相攻殺人民漸耗宜令良吏急往撫之帝可其奏
八月庚子給鈔萬二千四百錠爲本取息贍甘肅屯軍辛
丑命有司祭斗三日己未復立泉府司九月立竹課提舉
司於衛州凡係官竹園以時采賣設府州司縣弓手祇候
公使人等免其差稅令眾戶計額均輸戊辰罷榷酤聽民
自造民間仍用銅器乙亥以江北諸課程聽杭鄂二省節
制道途迂遠改直隸中書省丙戌速木都刺馬荅二國遣
使入貢西崖門渠長阿者等百餘戶來降冬十月己亥發
鈔五千錠和羅於應昌復分河間山東鹽課轉運司爲二

丙辰遣兵戍合刺章卽烏其部長之子令入質京師千百
戶子留質雲南王所復置四川嘉定路及敘州宣撫司烏
蒙土官阿蒙叛討禽之并其妻子伏誅十一月己巳朔給
宋鹽軍千餘人衣糧使屯田自贍乙未盧世榮伏誅丙申
赦囚徒黥其面及宋時私販軍竝從征海外十二月丁未
皇太子眞金薨諡曰明孝太子己未丹太廟楹辛酉分立
集賢院掌提調學校徵求隱逸召集賢良凡國子監道教
陰陽祭祀占卜等事皆隸之甲子敕工匠官毋遷轉是歲
命哈刺合孫爲太宗正復改大理寺爲大都護府始行振
糶法於京城設三鋪發倉粟減其直糶之歲以爲常以大
都供應繁苦悉免軍民地稅

元史卷六 本紀

七

金銀銅錢越海互市壬午太陰犯軒轅太民癸未罷鞏昌
二十四城拘權所歸有司癸巳升龍興武寧縣爲寧州福
州長溪縣爲福寧州降鎮巢府爲巢州敘州爲縣丙申設
諸路推官審理刑獄上路二員中路一員二月己亥禁用
私斛斗稱尺乙巳罷山北遼東道宣慰司立東京等處行
中書省治咸平丙午太陰犯井丁未定按察司副使以下
每歲二月巡行分治十月還司癸丑復置隰州大寧縣戊
午并江南行樞密院四處入行省罷鬻江南學田癸亥太
史院上郭守敬所撰授時曆經及李謙所議命宣付翰林
國史院丙寅召曲阜教授陳儼京兆蕭剌蜀人虞應龍修
地里志儼剌不至三月己巳遣直學士程文海偕行臺官
博采江南人才備臺察用太陰犯婁甲戌省雲和署入教

坊司立欽察衛親軍都指揮司乙亥命麥朮丁仍中書右丞與郭佑並領錢穀楊居寬典銓選丙子定行臺以八月巡行郡縣至次年四月還癸巳歲星犯壘壁陣夏四月庚子置燕南河東山東各道宣慰司濟南太原為諸王分地令各委官一人同治救江南諸路財賦並隸中書省甲辰徙杭州行臺治建康統淮東西湖南北浙東西江東西八道按察司庚戌始制諡法己未以從官南方者秩滿多不歸遣使盡徙北還初有旨凡為盜者殺無釋省臣疑太過帝曰朕以漢人徇私用金泰和律斷事致盜賊滋眾故有是言人命至重今後非詳讞者勿輒殺五月己巳熒惑犯太微西垣上將徙江東按察司治宣州庚辰歲星犯壘壁陣乙酉熒惑犯太微右執法六月丙申朔太白犯御女乙

元史卷六 本紀

六

已復立大司農司詔以所定農桑輯要書頒諸路戊申括馬凡色目人有馬者三取其二民馬悉入官辛酉封楊邦憲妻田氏永安郡夫人領播州安撫司事秋七月己巳立營田總管府覈江南官田之為強豪所據者復尙醞監隸光祿寺置中尙監庚午徙江淮行省於揚州立洪澤南北三屯於淮南路之白水塘黃家疇壬午總制院使桑葛具省臣姓名上奏丞相貧吉刺帶平章阿必失合忽都魯一時皆罷癸巳定省院臺部官屬中書省除中書令外左右丞相二員平章政事二員左右丞各一員參知政事二員行中書省除罷置丞相外平章政事二員左右丞各一員參知政事僉行省事並二員樞密院除樞密使外同知院事一員樞密院副使僉樞密院事並一員院判一員御史

察御史大夫一員中丞侍御史治書侍御史並二員行臺同內臺六部尙書侍郎郎中員外郎各二員其餘並聽省臣酌汰詔諭中外曰惟我祖宗肇造區夏雖中書已嘗建立而官制未暇舉行迨朕圖大以宅中思欲繼志而述事集儒臣之公議法前代之鴻章爰立省部院臺以正朝廷綱紀自疆土極照臨之遠致省臺有內外之分日益月增官冗人濫常敕有司澄汰意必舊制遵承比聞近侍之言謂益發時之敝彼不勝重任有壅上聞苟尙蹈匪彝時惟予咎其清冗職用復前規八月己亥罷淮東宣慰司以黃斲壽昌隸湖廣行省安慶六安光州隸淮西宣慰司乙卯太白犯軒轅右角罷德平定昌二路置德昌軍民總管府九月乙丑朔海外諸番曰馬八兒曰須門那曰僧急里曰

元史卷六 本紀

七

南無力曰馬蘭丹曰那旺曰丁呵兒曰來來曰急蘭亦解曰蘇木都刺凡十國各遣子弟來朝甲申太陰犯天門冬十月甲午朔太白犯右執法徙浙西按察司治杭州戊戌太陰犯建星壬寅太白犯左執法辛亥太陰犯東井河決開封祥符十五處調民夫二十餘萬分築隄防甲寅太白犯進賢壬戌徙甘州戍軍屯田亦里黑之地馬法國進鞞勒氈甲十一月乙丑以張瑄朱清並為海道運糧萬戶免徵覆舟糧戊辰太白犯亢己卯太陰犯井辛巳歲星犯壘壁陣禁禽獸孕時畋獵十二月戊戌太白犯東咸丙午罷大有署丁未太陰犯井丁巳犯氏戊午詔諸路分置六道勸農司宣慰司在內地者設官四員江南者六員是歲大司農上諸路學校凡二萬一百六十六所植桑棗雜樹二

千三百九萬四千六百餘株蘇湖饑振米二十萬石

二十四年丁亥春正月乙丑俱藍國遣使來朝甲戌太陰犯東井乙酉犯房丁亥復改江浙省爲江淮行省辛卯立上林署二月庚子太陰犯天關辛丑犯東井以麥朮丁平章政事范文虎爲中書右丞商議樞密院事戊午敕諸王闡里鐵木爾節制諸軍乃顏遣使徵東道兵諭闡里鐵木爾毋輒發閏月癸亥太陰犯辰星定春秋二仲上丙日記平陽堯帝祠乙丑復分立尙書省以總制院使桑葛及鐵木爾並平章政事阿魯渾薩理爲右丞葉李爲左丞馬紹忻都並參知政事惟行省事與中書共議餘聽尙書省從便奏請辛未定國子監祭酒一員司業二員擇素有德望者居之建國子學設博士二員助教四員生員百二十人

元史卷六 本紀

三

蒙古漢人各半仍建集賢院設各省儒學提舉二員統諸路府州縣學甲申太陰犯牽牛乙酉改淄萊路爲般陽路罷江南竹木柴薪魚牙諸稅復改各省爲行尙書省六部爲尙書六部庚寅法司以諸路罪囚過多請遣官分道行刑帝曰囚非羣羊豈可遽殺邪安悉配隸淘金三月甲午更造至元寶鈔詔曰鈔法之行二十餘載官吏奉法不虔以至物重鈔輕公私俱誦比者廷臣奏請謂法敝必更其造至元寶鈔頒天下中統鈔通行如故以至元寶鈔一貫文當中統交鈔五貫文字母相權官民通用務在新者無冗舊者無廢凡歲賜周乏餉軍皆以中統鈔爲準丙申太陰犯東井乙卯遼東饑弛太子河漁禁丙辰降重慶路定遠州爲縣命都水監開汶泗水達京師汴河溢役夫修故

堤夏四月癸酉太陰犯氏甲戌犯房諸王乃顏反五月己亥移濟南宣慰司治益都燕南按察司治大名南京按察司治南陽太原按察司治西京壬寅戶工兩部各增尙書二員帝自將征乃顏發上都括江南僧道馬以軍行免北京今歲絲銀經過郡邑各振鈔六月庚申朔百官獻馬給衛士壬戌帝至撒兒都魯之地乃顏黨金家奴塔不台率所部逼行在而陣遣前軍敗之壬申帝駐蹕于大利斡魯脫之地獲乃顏輜重千餘秋七月癸巳乃顏敗走追執之其黨悉平丁酉弘州匠官以犬兔毛製如西錦者以獻授匠官知弘州戊戌太陰犯南斗辛丑犯牽牛壬寅熒惑犯輿鬼庚戌雲南金齒渠長打奔等兄弟內附壬子太陰犯司怪癸丑日暈連環白虹貫之罷乃顏分地益都平濼所

元史卷六 本紀

三

署官移北京道按察司治豪州以河西瓜沙等州立闡鄜屯田八月癸亥太白犯亢乙丑車駕還上都置江南四省交鈔提舉司已巳滿從叛諸王軍前自効浚亦集乃路河渠丙子填星犯壘壁陣已卯太陰犯天關辛巳犯東井甲申太白犯房丁亥立豐贍昌國濟民三署女人國貢海人九月丁酉熒惑犯長垣庚子太白犯天江乙巳太陰犯畢戊申咸平懿州北京以乃顏叛民廢耕作告饑振糧五萬石辛亥熒惑犯太微西垣上將壬子太白犯南斗冬十月戊午朔日食壬戌太陰犯牽牛大星丙子桑葛撿殿中書錢穀矯殺參知政事郭佑楊居寬乙酉羅北甸土官火者阿禾及維摩合刺孫之子並內附是夜熒惑犯左執法十一月壬辰太白犯壘壁陣月暈金土二星命桑葛爲尙書

右丞相兼總制院使領功德使司事阿魯渾薩理平章政事葉李轉右丞馬紹為左丞丙申熒惑犯太微東垣上相戊戌調新附軍屯田合迷玉速曲之地庚子太白晝見辛丑改衛尉院為太僕寺隸宣徽院丙辰熒惑犯進賢十二月定告病官限期三年以下者敘用五年以下者降一等七年以下者降二等七年以上者不敘癸亥立尙乘寺金竹寨主搔盧等以所部百二十五寨內附丙寅太白晝見太陰犯畢丁卯減揚州歲額米十五萬石以鹽引五十萬易民糧免浙西魚課發河西甘肅富民往闡鄜與漢軍雜居屯植癸酉諸王薛徹都所駐之地雨土七晝夜羊屬盡死以鈔幣綿布雜給之是歲始立行泉府司專掌海運增萬戶府為四遂罷東平河運

元史卷六

本紀

三

二十五年戊子春正月庚寅祭日於司天臺辛卯毀中統鈔板戊戌弛遼陽漁獵禁勿捕天鵝殺鹿羔癸卯海都犯邊命諸王朮伯統兵北征乙巳太陰犯角戊申犯房辛亥省器盒局入諸路金玉人匠總管府癸丑設江南行大司農司及淮東西兩道勸農營田使舉察勤惰歲具有司勸課實蹟為殿取二月壬戌省遼東海西道按察司入北京江南湖北道按察司入荆南改南京為汴梁路北京為武平路西京為大同路東京為遼陽路中興為寧夏府路以江西茶運司兼榷酒醋稅徵葛洪山隱士劉彥深赴京已卯以江南站戶貧富不均命有司料簡合戶稅至七十石置備驛馬一匹並免雜徭獨戶稅逾七十石願入站者聽合戶稅不得過十石獨戶稅無上百石其使臣供應官為

支給毋累站戶辛巳以杭州西湖為放生池命皇孫雲南王耶先鐵木爾帥兵鎮大理三月丁亥熒惑犯太微東垣上相戊子太陰犯畢庚寅改闡遺所為監己亥太陰掩角壬寅命會同館倣古職貢制繪為圖俟番使至詢其風俗土產去國里程籍錄以進夏四月戊午太陰犯井庚申用桑葛言鈎攷應昌和糴所其扈從諸臣種地多者依軍站例除四頃外計畝征租癸亥渾河決發軍築堤戊辰浚怯烈河以溉口溫淖爾黃土山民田廣東賊董賢舉等七人皆稱大老聚眾剽掠吉贛南韶雄汀諸郡甲戌萬安寺成佛像窗壁皆用金為飾增建直沽海運倉甲申命皇孫鐵穆耳行邊討乃顏餘黨削平遼左諸部置東路萬戶府五月戊子諸王察合子闊闊帶叛樞密副使土圖哈執之以

元史卷六

本紀

三

來丙申兀馬爾來獻璞玉己亥遣官分道鈎攷中統鈔本升雲南北勝施州為北勝府戊申太白犯畢孟州烏河川雨雹大如拳癸丑遷四川省治重慶宣慰司治成都河決汴梁太康通許皆被害六月辛酉定各御史任滿驗所言事大小多寡為升降甲戌太白犯井改西南番總管府為永寧路丁丑太陰犯歲星發兵千五百人詣漠北浚井秋七月甲申朔復葺興靈二州倉轉米備振壬辰改會同館為四寶庫儲待所為提舉司己亥熒惑犯氏庚子太白犯鬼乙巳太陰掩畢保定路野蠶蠶絲可為帛八月丙辰熒惑犯房己未太白犯軒轅大星癸酉以河間鹽運司兼管順德廣平碁陽三鐵冶庚辰分萬億庫為寶源賦源綺源廣源四庫九月癸未朔熒惑犯天江乙未罷檀州淘金戶

諸王篤哇犯邊庚子太陰犯畢鬼國建都皆遣使來貢營
五庫於禁中以貯幣帛癸卯熒惑犯南斗南臺御史中丞
劉宣自殺庚戌集賢院新編本草成冬十月庚申從桑葛
請置徵理司遣省院臺官十二人理算江淮江西福建四
川甘肅安西六省錢穀給兵以衛其行甲子置虎賁司尋
改武衛司丙寅置湖廣溪洞蠻獠四總管府統州縣洞百
六十所用漢人爲達魯花赤雜土人治之丙子敕造鐵羅
圈甲及長甲給北征軍遺瀛國公趙鼎學佛於吐蕃己卯
免儒戶雜徭學田所入羨餘收貯集賢院以給多才藝者
十一月丁亥以何榮祖參知政事禁有分地之家私役富
民爲柴米戶及賦外雜徭己亥立桑葛輔政碑甲辰改總
制院爲宣政院掌釋教遇吐蕃有事則分院往鎮十二月

元史卷六 本紀

五

丁巳海都兵犯邊拔都耶孫脫迎擊死之辛酉太陰犯畢
甲子犯井甲戌犯亢熒惑犯壘壁陣丙子耶速不花以昔
烈門叛甘肅行省約諸王八八拜荅罕駙馬昌吉合兵討
之皆自縛請罪獨昔烈門西走追執之歸於京師是歲置
醴源倉罷安和署以光祿寺直隸都省升滄州軍營城爲
滄源縣大司農上墾地三千五百七十頃積義糧三十一
萬五千餘石
二十六年己丑春正月丙戌京師地震發兵塞沙陀間鐵
烈兒河辛卯行泉府使沙不丁上市舶司歲輸珠四百斤
金三千四百兩帝命貯之以待貧者辛丑立武衛親軍都
指揮使司掌修治城隍及京師內外工役分侍衛軍萬人
隸之是夜太陰犯氏癸卯罷膠萊海道運糧萬戶府循州

賊鍾明亮寇贛南掠寧都據秀嶺與廣東董賢舉台州楊
鎮龍柳世英相應戊申徙廣州按察司治韶州以荆南按
察司所統遠割三路入淮西二路入江西從壽張尹韓
仲暉言開河以通運道起須城縣安山西南由壽張西北
至東昌又西北至臨清引汶水達御河二月辛亥朔置延
禧崇福二司徙江淮行省治杭州改浙西道宣慰司爲淮
東道治揚州自泉州至杭州立海站十五專運番夷貢物
及商販奇貨丁卯命右丞相伯顏知樞密院事鎮和林統
有漠北諸路置知院自此始諸王哈丹寇開元己巳立左
右翼屯田萬戶府統軍二千於霸州河間耕田甲戌命鞏
昌總帥汪惟和將部軍萬人北征三月庚辰朔日食詔亡
宋係官田土歸附以來被權豪影占及指熟作荒詭名避

元史卷六 本紀

五

役者許自首官從前應收子粒概行免徵仍令佃種立雲
南屯田以供軍儲甲午太陰犯亢乙未新鑄渾天儀成以
黃金爲飾癸卯金齒人塞完以其民二十餘萬戶來歸夏
四月戊午禁民挾弓矢犯者籍爲兵省江淮屯田打捕提
舉司七惟存徐邳海州揚州兩淮淮安高郵昭信安豐鎮
巢新黃魚網石湫十二所庚午沙河決發民築堤障之甲
戌置浙東江東江西湖廣福建木棉提舉司責民歲輸木
棉十萬匹福建參政魏天祐執宋江東制置使謝枋得至
燕不屈死大方通鑑載枋得致天祐書云大元制世民物
十三歲之母在耳先妣既已考終某自今無意人間事矣
大元仁慈如天不妄殺一忠臣義士其所以爲民不爲
官者忠臣不事二君此天地間常道也今蒙大元五次以
禮招徠上之有竟舜下之有巢由上有湯武下有隨光其所以
效虞人之死而不往學夷齊之死而不仕者正欲使天下
後世知大元之量能使謝某不失臣節視死如歸也今蒙

參政初管道院日勞吏卒監守其憂慮亦大勞矣且問參政容一謝某聽其為大元何益特恐前誤大宋後誤大元諸其為大宋忠臣於大地何益特恐前誤大宋後誤大元諸公自無面目立於天地耳某母喪未葬只當衰經入君門倘大元有命惟有瀝寫江南官吏貪酷生靈愁苦之狀作萬言書獻之日封疆之臣當死封疆安仁之敗何不死於得天祐讓之日封疆之臣當死封疆安仁之敗何不死於得日程嬰公孫杵臼二人皆忠於趙一存孤一死節一死於十五年之前一死於十五年之後皆不失為忠臣蓋棺定論參政豈足以知此枋得北行在途惟茹蔬果積數月困甚至燕甫四月庚辰發武衛親軍溶河西務漕渠及口溫淖爾河壬辰太白犯鬼發大同宣德民築倉於昂兀刺之地丙申以季陽蓋都淄萊三萬戶軍久戍廣東疫死者眾令二年一更賊首鍾明亮率眾降令赴關江淮省臣逗畱不遣丁酉復徙行御史臺於揚州浙西按察司於蘇州以忻都為尚書省左丞張天祐為中書省參知政事己亥設回回國子學罷永盈庫以上供幣帛入太府監辛丑御

元史卷六 本紀 五

河溢入會通渠漂東昌民廬改莊浪路隸安西省省流江縣入渠州青山苗蠻三十三寨內附六月戊申朔詔雲南地遠六品以下官許本省選辟復置雲南按察司西番進黑豹庚申諸王乃蠻帶敗哈丹兵於托吾爾河丙寅海都犯邊和林宣慰使怯伯起兵應之乃顏餘黨金家奴並入寇甲戌西南夷中下爛土洞四百一十寨四川山齊蠻民四寨相繼來降立江淮財賦總管府掌所籍宋太后贖產隸中宮秋七月戊寅朔帝親征海都辛巳安山渠成長百五十里建牖三十賜名會通河戊子太白經天辛卯太白犯牛發和林所屯乞爾乞思等軍北征賦百官家製戰襖乙未太陰犯歲星癸卯沙河溢鐵燈杆堤決八月辛未歲星晝見癸酉升四川金竹寨為府徙浙東道按察司治婺

州河東山西道按察司治太原宣慰司治大同九月戊寅歲星犯井丙戌罷濟州泗汶漕運司乙未太陰犯畢丙申熒惑犯太微西垣上將冬十月癸丑太陰犯牛宿距星甲寅熒惑犯右執法乙卯改八番羅甸隸湖廣丙辰禁內外官受人饋酒會違者籍其家貲之半閏月戊寅車駕還大都庚辰救商販有中統料鈔者聽易至元鈔行用丙戌西南夷生番心抄等八族內附鍾明亮復反韶雄諸賊響應江淮省合兵討之獲賊首董賢舉巨應祥歸京師丁亥辰星犯房己丑太陰犯畢熒惑犯進賢丙申婺州賊葉萬五寇武義縣庚子取石泗濱作磬以補宮縣之樂辛丑羅斛女人二國遣使來貢十一月丙午朔漳州賊陳機察巨大老張順等以其黨降命赴闕丁巳改播州為播南路升平

元史卷六 本紀 五

恩鎮為巨縣戊辰太陰犯亢十二月辛巳括天下馬一二品官許乘馬五三品三四五品二六品以下皆一餘悉拘入官乙酉太白犯南斗命司天臺祭熒惑丁亥封皇子闊闢出為寧遠王甲午以汪惟能為征西元帥將所部軍入漠北其先成漠兵毋令還翼詔天下梵寺所貯藏經集僧看誦仍給所費歲為例駕幸大聖壽萬安寺置旃檀佛像是歲紹興安西甘州大水兩淮雨雹大都路霖雨害稼東平蝗各調租減糶如例伯顏遣使告邊民饑詔賜網罟取魚自給二十七年庚寅春正月庚戌太白犯牛癸丑太陰犯井敕從臣子弟入國子學乙卯造祀天幄殿丙寅改儲待司為軍儲所復立興文署掌經籍版及江南學田丁卯熒惑犯

房已改西南番總管府為永寧路降臨淮府為盱眙縣
二月乙亥朔立全羅道萬戶府戊寅太陰犯畢辛巳括河
間昔寶赤戶口輟耕錄云昔寶赤應房之執役者每歲以
所養海青獲頭鵝者賞黃金一錠頭鵝天
鵝也以首得之又重過三癸未泉州地震丙戌改奉先縣
十斤且以進御膳故曰頭鵝
為房山己丑賊首鍾明亮復降詔械致闕下庚寅太陰犯
亢辛卯發虎賁更休士赴上都修城乙未改雲南蒙憐蒙
萊二甸俱為路羅羅斯貢雨甍三月壬子熒惑犯鈞鈴己
未放福建獵戶沙魚皮戶為民發雲州民夫鑿銀洞庚申
罷行司農司及各道勸農營田司增按察司僉事二員總
勸農事徙四川省仍治成都立江南營田提舉司掌僧寺
貲產置金竹府大隘等四十二砦蠻夷長官甲子楊震龍
餘眾掠浙東討賊者多俘良民敕行臺揀放夏四月癸酉

元史卷六 本紀

五

此回回法也不允戊午貴州苗蠻作亂劫順元路免大都
歲賦絲及酒醋課辛酉熒惑犯天江丙寅雲南闔力白衣
甸渠長內附八月辛未朔日食并廣東道真陽浚光二縣
為英德州丁亥復徙川南道宣慰司於重慶癸巳地大震
武平地陷黑沙水涌出壓溺死者七千二百餘人壞民居
無算遣平章鐵木爾往視九月癸卯歲星犯鬼乙巳禁諸
王遣僧建寺擾民諸王闐里鐵木爾與合丹戰於瓦法大
破之丁未御河決高唐沒民田命有司塞之戊申鐵木爾
至武平以便宣調租賦罷商稅弛酒禁斬為盜者轉海運
米萬石振之金竹知府搔盧招降竹古弄古魯花等三十
餘寨詔立縣設長官總把參用土人丁卯命江淮行省鈞
攷行教坊司所總江南樂工租賦和羅西京糧其價每
十兩以上增一兩冬

元史卷六 本紀

五

朔發六衛漢軍萬人伐木修城丙子太陰犯井壬辰熒惑
守氏十餘日遣使詣馬八兒國訪求方伎士五月戊申鍾
明亮復叛寇贛州戊午罷江西行院移省治吉州罷奉宸
庫復立安和署乙丑太陰犯填星乙巳立雲南行御史臺
及銀場官庚午括天下陰陽戶口仍立各路教官有精於
藝者歲貢各一人六月壬申朔升閩鹽州為柏興府降普
樂州為閩鹽縣金州為金縣河湓太康沒民田三十二萬
餘畝免其租甲戌桑州總管黃布蓬那州長羅光寨安郡
州長閉光過率蠻民萬餘戶內附丙子繕寫金字藏經成
凡糜金三千二百餘兩己丑熒惑犯房丁酉定宗寶錄成
秋七月丙午禁平地忙安倉釀酒犯者死癸丑江淮平章
沙不丁言倉庫官侵盜公帑請依宋法黥而斷其腕帝曰

堤障之丁卯降南雄州為保昌縣韶州為曲江縣十二月
戊寅免大都平灤保定河間歷年逋租十三萬五百餘石
辛卯太陰犯亢乙未摘蒙古軍萬人戍雙城及婆婆府以
防合丹兵己亥降溧陽路為縣湖廣省上宣課珠九萬五
百一十五兩青田賊劉甲乙集眾萬人寇溫州是歲河北
十七郡蝗江西霖雨瀕河水溢各謁振如例發粟六萬二
千石振通州河西務流民

二十八年辛卯春正月壬寅太白熒惑填星聚於奎癸卯
傭民運米十萬石致上都糶振丁巳遣貴由赤四百人北
征辛酉罷江淮漕運司專事海運升安慶府為路降無為
和州二路及六安軍為州巢州及懷遠軍為縣免江淮積
逋糧三百一十萬六千餘石鈔千一百五十錠絲縣六千

元史卷六 本紀

三

八百餘斤壬戌桑葛以罪罷二月辛未徙萬億庫金銀入
禁中富寧庫癸酉改福建行省為宣慰司隸江西詔行臺
勿聽行省節度丙子罷徵理司丁丑命完澤為尚書右丞
相不忽木平章政事己卯立雲南金齒曲靖二宣慰司管
軍萬戶府辛巳以桑葛沮抑臺綱數箠御史命省臺官
論定其罪帝曰桑葛為惡始終四年臺臣豈不知之知而
不言當得何罪侍御史杜思敬曰奪官追俸惟上所裁遂
罷臺臣之久任者癸未太陰犯左執法甲申太白犯昴乙
酉立江淮湖廣江西四川行樞密院江淮治建康湖廣治
鄂州江西治贛州四川治成都丙戌敕改提刑按察司為
肅政廉訪司每道仍設官八員副使以下各分臨所部不
得苛細生事暗於大體違者罰同不職以何榮祖為尚書

右丞賀勝參知政事丁亥建周廬於宮城南分居宿衛土
癸巳踏桑葛輔政碑籍其家三月己亥朔加嶽瀆四海封
號丁未太陰犯御女己酉犯右執法庚戌犯太微東垣上
相乙卯太白犯五車辛酉建紫壇殿壬戌南丹州莫國麟
入覲授安撫使禁江淮富家賄充府縣卒史隱庇差賦累
及貧民夏四月甲戌以地震故免武平今歲徭役乙未歲
星犯輿鬼上都饑斗米銀四兩禁宰牝羊弛杭州西湖禽
魚禁五月戊戌以廉希恕為湖廣右丞陳仲達不顏于思
王信竝同知海北海南道事將兵征黎蠻立左右兩江宣
慰司都元帥府壬寅太陰犯少民辛亥罷大都燒鈔庫及
江南歲輸木棉下桑葛於獄誅其妻黨湖廣平章要東木
燕南宣慰司八吉由癸丑罷尚書省政事悉由中書甲寅

元史卷六 本紀

三

太陰犯牛丁巳建白塔二各高丈二尺以居呪師朵四的
性吉等七人右丞何榮祖進所撰至元新格帝命鈔版頒
行己未以門荅占復為御史大夫行御史臺事六月丁卯
朔立黃平元帥府改隸播州乙酉洗國王洞主市備什王
弟同來朝辛卯太陰犯畢拘汴梁逃人男女配偶成家給
農具耕種禁蒙古人往回回地為商秋七月丙申朔置建
都金冶令旁近民鍊金輸官己亥太白犯井戊申罷江南
諸省買銀提舉司招集亡宋涅手軍得八萬三千人立萬
戶千百戶領之丁巳桑葛伏誅其弟鞏昌宣慰使荅麻刺
荅思懼罪自殺募民耕江南曠土戶不過五頃官授之券
為永業己未降江陰路為州宜興府為縣分華亭之上海
為縣壬戌弛畿內秋耕禁八月乙丑朔平陽地震壞民舍

萬有八百二十六區丙寅太白犯輿鬼己巳罷江西行泉
府司大都甲匠總管府廣州人匠提舉司丙子太陰犯牽
牛癸未歲星犯軒轅大星戊子太白犯軒轅大星及歲星
遣使詣雲南捕黑虎咀喃番邦進金書寶塔及黑師子癸
巳太陰掩熒惑命工部造飛車九月辛丑立行宣政院治
杭州庚戌太白犯右執法丙辰熒惑犯左執法戊午太白
犯熒惑辛酉歲星犯少民命尙衣局織無縫衣詔路府州
縣除達魯花赤外長官並選用漢人佐貳官色目漢人參
用冬十月乙丑朔羅斛國王上金表貢黃金象齒丹頂鶴
五色鸚鵡翠毛犀角篤縹龍腦等物癸未罷各省行樞密
院入行省丙戌太陰犯軒轅大星并御女丁亥改洞蠻爛
土立定雲府升陳蒙洞及合江俱爲州中書省臣言蠻洞

元史卷六

本紀

三

請歲進馬五十及雨氈佩刀丹沙雌雄黃諸物率二歲一
上帝曰從其所爲勿加過督己丑太陰犯太微東垣上相
癸巳免衛輝種仙茅戶徭役十一月甲辰太白犯房丙午
熒惑犯亢丁未太陰犯畢甲寅犯歲星乙卯新添葛蠻洞
官阿汾青貴來貢立葛蠻軍民安撫司戊午金齒國遣阿
腮入覲庚申熒惑犯氏辛酉徵太子贊善劉因不起增置
望雲銀冶十二月乙丑籍探馬赤六萬戶成丁者爲兵宋
全太后瀛國公母子已爲僧尼有地三百六十頃詔免其
租壬申立河南江北行省治汴梁甲戌罷諸路鈎攷錢穀
取歷年逋負文牘置一室非上命而竊視者加罪庚辰太
陰犯御女改江淮行省爲江浙行省治杭州癸未太陰犯
太微東垣上相八番洞官吳金叔等以部民二萬有奇內

附己丑熒惑犯房庚寅犯鈎鈴改營田提舉司爲規運提
點所辛卯詔釋天下囚非殺人者戶部上天下戶數內郡
一百九十九萬九千四百四十四江淮四川一千一百四
十三萬八百七十八游食者四十二萬九千一百一十八
宣政院上天下寺宇四萬二千三百一十八區僧尼二十
一萬三千一百四十八人詔頒農桑雜令

二十九年壬辰春正月甲午朔日食左右有珥上有抱氣
免朝賀己亥復置都水監以郭守敬兼領監事遣官分視
黃河堤堰庚子改八番羅甸爲普定府隸雲南罷福建銀
鐵提舉司禁商賈私以金銀航海甲辰詔江南學田歲入
聽其自掌春秋釋奠外以廩師生及士之無告者貢士莊
田仍令核數入官丙午罷河南宣慰司以汴梁襄陽河南

元史卷六

本紀

三

南陽歸德隸河南省復割湖廣之德安漢陽信陽隸荆湖
北道蘄黃隸淮西道并准東道三宣慰司咸隸河南省其
荆湖北道舊領辰沅澧靖歸常德者直隸湖廣省戊申太
陰犯歲星及軒轅左角己酉罷四寶庫仍置會同館立織
造段匹提舉司改陳蒙爛土軍民安撫司隸八番都元帥
以土人爲使二月甲子朔金竹蠻長貢馬氈各二十七詔
減所部貢馬賜新附黑蠻衣襖遣回命進所產丹沙雄黃
之精者己巳除問刑官鞭背法太陰犯畢庚午桑州生苗
羅甸國古州等洞蠻籍所部民十一萬九千三百餘戶來
獻乙亥立總管高麗女真漢軍萬戶府己丑歲星犯軒轅
大星遣諸王之從逆者於各邊俾從軍自効三月丁未治
桑葛黨納速刺丁滅里忻都王巨濟皆伏誅己酉以鐵哥

平章政事阿里爲右丞梁德珪參知政事併亦奚不薛及八番羅甸二宣慰司都元帥府爲一仍令亦奚不薛隸湖廣羅甸還隸雲南夏四月丙子太陰犯氏己卯弛甘肅太原酒禁仍椎酤辛卯設雲南諸路學校其教官以蜀士充之五月丁未詔雪楊居寬郭佑冤給還家產改思州安撫司爲軍民宣撫司隸湖廣罷東平路河道提舉司入都水監六月戊辰詔聽僧會鹽不輸課壬申鐵旗城後察昔折乙烈率部曲三千餘戶來附甲戌置司籍庫以儲物之籍入者壬午以瓊州新附洞寨置會同定安二縣己丑太白犯歲星閏月辛卯朔罷福建歲造象齒帶戊申熒惑犯狗國辛亥廣西上思州土官黃勝許陷忠州遣程鵬飛將兵擊之勝許敗走入交趾甲寅右江岑從毅降以其子斗

元史卷六 本紀

三

榮襲鎮安路總管廣南副使賽甫丁以風聞三十餘事訐告省官帝惡其傷政體捕惡黨下吏如法秋七月庚申朔遣使檢覈竄名鷹房受糧者辛未太陰犯牛庚辰定雲南福建兩廣州縣官聽省臺銓選具姓名上聞給授宣敕八月丁酉辰星犯右執法己亥太白犯房乙巳歲星犯右執法丙午用郭守敬言浚通州至大都漕河役軍匠二萬人又鑿六渠灌昌平諸水戊午福建參政魏天祐私發民夫鍊銀坐贓逮治敕廉訪司在燕南者還治眞定河南者還治汴梁九月丁卯茹難十國安化光蘭州洞蠻內附卽光蘭州地立定遠府設官如例癸酉廢新得州置通江縣復漢州綿竹縣徙瓜沙二州民於甘肅畫地使耕置夏半藝紅花詔令盡種穀麥辛巳太白犯南斗罷雲南行臺徙置

西川設雲南廉訪司丁亥置烏思藏納里速古魯孫等三路宣慰司冬十月戊子朔召福建廉訪知事張師道赴闕授翰林直學士庚寅浚浙西河道導水入海癸巳詔歲終各行省詣闕奏事令行臺同赴面奏一歲舉刺之數丙申四川洞蠻向思聰等來朝信合納帖音國遣使入覲廣東進暹國所上金冊乙巳太陰犯井丁未犯鬼癸丑罷懷孟竹課乙卯太陰犯氏諸王明里附海都叛詔伯顏討之率眾來降十一月詔父子嗣續人倫大本同宗繼紹氣脈感通非我族類神不歆享凡有撫養諸弟從孫爲子及螟蛉他姓者並行禁治老人年八十以上者準免一子徭役俾得侍養壬戌太陰犯壘壁陣己卯犯太微東垣上相癸未命關津譏察姦宄丙戌提省溪錦州銅人諸洞渠長楊秀

元史卷六 本紀

畫

朝木忽魯甸土官阿魯等入覲十二月庚寅改封皇孫梁王甘麻刺爲晉王鎮北邊立金齒木來府癸巳罷福建及寧國路銀治庚子太陰犯井甲寅犯太微西垣上將敕都水監修治保定沙唐河堤堰是歲眞定河間益都各屬州縣蟲食桑盡無蠶兩浙饑免民租一百二十五萬七千餘三十年癸巳春正月壬戌遣使招諭漆頭金齒蠻丙寅太陰犯畢詔汰冗員省內外官府二百五十五所計六百六十九員丁卯罷雲南延慶司遙授洛波卜兒二蠻酋爲知州捏怯烈女眞數百人以漁自給帝曰與其勤於水曷若力於田其給牛具令屯耕以食庚午驗洞蠻酋楊總國等來朝甲戌升蔡州爲散府分和林漢軍屯田杭海罷諸路魚鹽局丙子西番一甸蠻酋三人來覲各授蠻夷軍民官

丁丑太陰犯氏庚辰歲星犯左執法丞相安童卒新置社稷壇成高五丈方廣如之社東稷西社用白石爲主飾以五方色土稷不用主四周皆黃土壇南各植松一株北墉瘞坎墘垣悉做古制別爲齋廡門廡三十三楹二月己丑減江浙海運米四十萬石免大都公賦壬辰太陰犯畢丙申卻江淮福建所進鷹鷂仍禁軍官無從禽擾民丁酉回回獻蒼納珠邀價數萬帝曰珠何爲哉當留是錢以贖貧者發海運米十萬石給遼陽戍兵乙巳熒惑犯天街丁未以新附洞蠻吳動鼉爲潭溪軍民官庚戌太陰犯牛辛亥發總帥汪惟和所部軍征吐蕃陝西四川兵征西番復立雲南行御史臺赦江南豪右庇匿盜賊爲首者誅餘徙之內地癸丑太白犯壘壁陣三月庚申以札散知樞密院事

元史卷六

本紀

美

甲子海都入寇括天下馬十萬匹己巳立行大司農司辛未太陰犯氏夏四月己亥定上海澈浦慶元廣東泉州市舶司物貨皆三十取一并温州舶司入慶元杭州舶司入稅務癸丑太白犯垣星甲寅授光州光龍等十二人邦崖王文顯等二十八人金竹府馬麟等十六人大龍番禿盧忽等五十四人永順路彭世彊等九十人安化州吳再榮等十三人師壁散毛洞句荅什王等四人各爲蠻夷官賜璽書遣歸毀江南諸道觀聖祖天尊祠五月丙辰朔定雲洞蠻來附丙寅浙西大水令富民募人疏決水道辛未定僧寺邸舍並收商稅丁丑散上都工匠三千戶俾就食大都六月丙戌選河西質子軍赴皇孫阿難荅所出征己丑歲星犯左執法庚寅以雲南且當仍屬西番宣慰司改准

西斡黃等路隸河南江北行省丙申太陰犯斗乙巳以皇太子寶授皇孫鐵穆耳總兵北邊召丞相伯顏還己酉濬太湖秋七月己未免福建歲輸皮貨及泉州織作紵絲甲子太陰犯建星壬申命月赤察爾知樞密院事丁丑新開通州漕河成賜名通惠河以只爾合忽所汰乞爾吉思戶屯田合思合之地辛巳太陰犯鬼八月丙戌括所在荒田令放良漏籍等戶屯種甲午辰星犯太微西垣上將甲辰太陰犯畢丁未立鎮守黎蠻海北海南屯田萬戶府戊申太陰犯鬼九月癸丑朔立海北海南博易提舉司稅如市舶例丁卯太陰犯畢出御史臺贓罰鈔五萬錠給衛士之貧者冬十月癸未朔皇太子耐於太廟戊子修汴梁堤己丑遣兵部侍郎忽魯圖花等使閣藍可兒納荅信合納帖

元史卷六

本紀

美

音三國仍賜信合納帖音渠長三珠虎符庚寅彗星入紫微垣抵斗魁光芒尺許凡一月乃滅丙申熒惑犯亢己亥太陰犯天關辛丑犯井甲辰詔赦天下庚戌造象躡掌甲辛亥禁江南州郡乞養良家子轉相販鬻及強將平民略賣者十一月壬子朔立海北海南道肅政廉訪司治雷州庚申以金齒木朵甸戶口增立下路總管府給其長雙珠虎符乙丑太陰犯畢丁卯犯井庚午犯鬼丙子熒惑犯鉤鈐戊寅歲星犯亢免江南都作院軍匠出征己卯召河南行省平章巴顏入中書省平章政事十二月壬辰以張九思爲左丞乙未太陰犯井是歲天下路一百六十九府四十三州三百九十八縣千一百六十五宣撫司十五安撫司一管軍民官七十三長官司五十一眞定深州靜安大

水登州大興蝗易州大雨雹如雞卵各調振有差

三十一年甲午春正月壬子朔帝不豫免朝賀知樞密院伯顏至自軍中庚午帝大漸癸酉崩於紫壇殿在位三十五年壽八十乙亥葬起輦谷夏五月戊午上尊諡曰聖德神功文武皇帝廟號世祖蒙古語曰薛禪皇帝

論曰元之初入中國震蕩飄突惟以殺伐攻虜為事不知法度紀綱為何物其去突厥回紇者無幾及世祖興始延攬姚樞寶默劉秉忠許衡之徒以漢法治中夏變夷為華立綱陳紀遂乃并吞東南中外一統加以享國長久垂統創業軼遼金而媲漢唐赫矣哉且其天性寬宏包併無外阿里不哥及海都篤哇諸王皆親犯乘輿對壘血戰力屈勢窮一朝歸命則皆以太祖子孫大朝會於上都恩禮宴

元史卷六

本紀

三

賚如初當南北鋒焰血戰之餘或離間以待郎張天悅通宋而不信敕南儒被掠賣為奴者官贖為民所獲宋商宋謀私入境者皆縱遣之而不誅置椎場於樊城通宋互市弛沿邊軍器之禁其長駕遠馭如是宋幼主母子至通州命大宴十日小宴十日然後赴上都除弘吉刺皇后厚待之事別詳皇后傳外其母子在江南莊田聽為世業其後文宗時市故全太后田為大承天寺永業市故瀛國公田為大翔龍寺永業直至順帝末始奪和尙趙完普之田歸官直與元相終始宋之宗室如福王與芮等隨宋主來歸授平原郡公其家貲在江南者取至京賜之此外宗室多類此卽奸民冒稱趙氏作亂者從不以累及宋後其優禮亡國也如是思創業艱難移漠北和林青草叢植殿隅俾

後世無忘草地又畱所御裘帶於大安閣以示子孫武宗至大中嘗詣閣中發故篋閱之則皆大練之服西域賈胡屨獻牙忽大珠價值數萬而不受宮闈肅穆無豔寵奇聞至元八年平濼路昌黎縣民生男夜中有光或奏請除之帝曰何幸天生一好人奈何反生妬忌命有司加恩養伯顏伐宋諄諄命以曹彬取江南不戮一人為法其儉慈也又如是非命世天縱而何惟功利之習不能自勝於中故日本瓜哇之師遠覆於海島王阿桑盧陪克之臣相仍於覆轍蓋質有餘而學不足歟

元史卷六

本紀

三

元史卷六終

成宗皇帝諱鐵穆耳世祖之孫裕宗真金第三子也母曰
 徽仁裕聖皇后弘吉刺氏至元二年九月庚子生三十年
 受皇太子寶撫軍於北邊明年春正月世祖崩親王諸大
 臣遣使告哀軍中夏四月壬午帝至上都左右部諸王畢
 會先是御史中丞崔或得玉璽於故臣之家其文曰受命
 於天既壽永昌上之徽仁裕聖皇后至是手授於帝甲午
 即皇帝位受諸王宗親文武百官朝於大安閣詔曰朕惟
 太祖聖武皇帝受天明命肇造區夏列聖相承光熙前緒
 迨我先皇帝體元居正以來文物典章大備臨御三十五
 年溥海內外罔不臣屬宏規遠略厚澤深仁有以衍皇元

元史卷七 本紀

萬世無疆之祚我昭考早正儲位德盛功隆天不假年四
 海缺望願惟眇質仰荷先皇殊眷往歲之夏親授皇太子
 寶付以撫軍之任今春宮車遠馭奄棄臣民乃有宗藩昆
 弟之賢戚畹官僚之舊謂祖訓不可以違神器不可以曠
 體承先帝夙昔付託之意合辭推戴情切意堅朕勉徇所
 請於四月日即皇帝位可大赦天下尚念先朝庶政悉有
 成規惟慎奉行罔敢失墜更賴宗親勳戚左右忠良各盡
 乃誠以輔台德追尊皇考曰皇帝尊母元妃曰皇太后庚
 子遣攝太尉兀都帶為大行皇帝請諡於南郊志作甲此
 告天請諡之始定諸王駙馬賜與依往年大會例賜金一
 者加四為五銀一者加二為三戊申太白晝見己酉雲南
 行省以所定路府州縣來上上路二下路十一下州四十

九中縣一下縣五十授金齒土官阿魯為孟定路總管五
 月庚戌朔太白犯輿鬼壬子祭太陽太歲火土等星於司
 天臺紫微星於雲僊臺戊午上大行皇帝尊諡曰聖德神
 功文武皇帝廟號世祖并上世祖后尊諡曰昭睿順聖皇
 后又上皇考尊諡曰文惠明孝皇帝廟號裕宗四川散毛
 洞主覃順來貢升其洞為府己巳改皇太后所居舊太子
 府為隆福宮詹事院為徽政院乙亥命札散知樞密院事
 加御史大夫月爾魯太師知樞密院伯顏太傅樞密副使
 月赤察爾太保戊寅立捕鹽人賞格六月庚辰朔日食庚
 寅減雲南歲貢馬復以鐵木爾平章政事甘肅饑禁釀酒
 乙未以加上尊諡詔天下免所在本年包銀俸鈔及內郡
 地稅江淮以南夏稅之半己亥封乳母楊氏為趙國安翼

元史卷七 本紀

夫人何氏為翼國夫人辛丑禮宋使家鉉翁遣還家鉉翁
 請使至燕安置河間至是甲辰詔修世祖實錄丙午太陰
 犯井秋七月己未立保定路之博野泰安州之新泰平陽
 路之武鄉芮城陵川蒲縣改侍衛都指揮使為隆福宮左
 右都威衛使壬戌詔中外崇奉孔子論于至元十八年有
 云帝信桑門之惑盡焚中國道藏關備道二教為外學道
 孔子為中賢尊桑門為正道及攷元史止于五年又詔
 書至於孔子則至元四年即詔修曲阜孔子廟五年又詔
 中外崇奉孔子各建學校祀先聖大德六年又詔建文宣
 王廟於京師崇奉備至何得為此言此殆宋之遺民所誣
 謗也至大德十一年加上孔子尊號制詞宏雅古今傳頌
 自古尊崇先聖未
 有過於元代者 戊辰罷肇州宣慰司入遼東道減八番
 等處所設官二百一十六員八番新附時稱九十萬戶設
 實止十六萬五千 癸酉以不忽木段真並平章政事詔諭
 餘戶故減其半 暹國王敢朮丁來朝或有故則令其子弟及陪臣入質命

太師月爾魯將兵守北邊八月庚辰太白晝見戊子初祀社稷用堂上樂歲以為常己丑遣范文虎監浚通惠河立新河運糧千戶所戊申太陰犯畢太白犯軒轅九月丁巳太白經天丙寅太陰掩填星辛未犯軒轅乙亥犯平道遣圖古等使閣藍冬十月辛巳詔凡調免田租令佃戶應輸田主者亦如所調之數毋得私收壬午太白犯左執法癸巳太陰掩填星乙未犯井金齒孟愛甸渠長遣子來朝即其地立軍民總管府辛丑詔京畿糧儲充足歲海運米百萬石者今減十之七帝諭省臣曰中書職務卿等皆懷怠心又不約束吏曹使選人淹滯桑葛雖姦邪然僚屬憚其威政事無不立決卿等其約束曹屬有不事事者笞之乙巳遣南巫里速木荅刺繼沒刺牙毳陽使者各還國瓜哇

元史卷七

本紀

三

時嘗招瀕海南巫里等國遣人來附以禁商泛海爾京師至是弛海禁始遣還十一月丁未朔帝朝皇太后於隆福宮上玉冊玉寶己酉太陰犯亢壬子罷江淮湖廣江西行樞密院并入行省庚申太陰犯畢令河西僧人依舊助役毀宣政院所刻河西藏經板甲子以何瑋參知政事罷北海南市舶提舉司立覆實司癸酉太白犯房詔改明年為元貞元年十二月癸未歲星犯房丁亥犯鉤鈴壬辰太陰犯鬼庚子犯房又犯歲星用帝師奏釋京師大辟三十人杖以下者百人賜諸鰥寡貧民鈔二百錠曲靖激江普安等路夷官各以方物來貢是月太傅伯顏卒

元貞元年乙未春正月癸丑命只爾合朗為御史大夫乙卯太陰犯填星及畢壬戌以國忌即大聖壽萬安寺飯僧

七萬詔道家復行金錄科範乙丑以行院既罷仍賜行省長官虎符領其軍庚午以楊炎龍為中書左丞阿老瓦丁呂天麟並參知政事壬申立北庭及曲先塔林二都元帥府癸酉歲星犯東咸罷瓜沙二州屯田二月丁丑翰林學士承旨雷夢炎請老厚賜遣之壬午罷江南茶稅增鈔三千錠入江西歲額時有司勸茶戶種茶以時采摘仍禁放牧損壞癸未熒惑犯太陰戊子思州田曷刺不花雲南夷卜木四川洞主查問王金齒帶梅混冬等來覲壬辰太陰犯平道癸卯犯歲星敕廉訪司官令省臺同選三月乙巳朔發鈔五萬錠市馬給貧乏軍庚戌太陰犯填星壬子禁來朝官斂所屬俸錢戊午罷福建徽州銀場提舉司以東作方殷停諸不急營造壬戌地震太陰犯房丙寅增置蒙古學正以各道廉訪使

元史卷七

本紀

四

領之夏四月敕上都大都揚州從前撥賜大乾元寺大興教寺大護國仁王寺酒店湖泊出辦錢物仍聽官收分給毋許僧道私設人員庚寅太陰犯東咸癸巳遣烏撒同知牙那木假兵部尚書使馬荅兒的陰庚子立衛候掌謁掌儀掌膳諸司及宮正內宰隸隆福宮癸卯設各路陰陽教授試選陰陽教授占算星命周易六壬數學仍禁陰陽人不得游諸王駙馬之門閏月癸丑歲星犯房甲寅太陰犯平道乙卯犯亢丁巳掩房己未罷打捕鷹房總管府及司籍周用薄斂等庫為皇太后建佛寺於五台山立校釐招討司蘭州河清三日上下三百餘里五月庚辰詔各省存儒學提舉司一其餘悉罷升江南諸縣為州以戶為差戶止四五萬者為下州五萬以上者為中州下州官五員中

州官六員凡爲中州者二十八下州者十五又以連州戶不及額降路爲州辛巳罷行大司農司加麥尤丁平章軍國重事何榮祖爲昭文館大學士議中書省事甲申免自今五月以前逋欠錢糧丁亥太陰犯南斗六月壬子世祖實錄成甲寅并左右兩江宣慰宣撫二司爲廣西兩江道宣慰司都元帥府治靜江仍分司邕州癸亥立蒙古軍都元帥府於西川徑隸樞密院庚午立西域衛親軍都指揮使司敕凡上封事者命中書省發視然後上聞秋七月乙亥準江南地稅輸鈔丁丑太陰犯亢己卯詔舉中外儒吏兼通者每道歲貢二人省臺立法攷試中程者用之所貢不公罪舉者甲申歲星犯房八月己酉太陰犯牛壬子犯壘壁陳己巳以駙馬那懷知樞密院事九月乙亥用帝師

元史卷七 本紀

五

奏釋大辟三人杖以下四十七人已卯運米十萬石於樵場故廩以備北塞省寧夏行省入甘肅甲午太陰犯軒轅戊戌犯平道冬十月癸卯有事於太廟帝曰親享之禮祖宗未嘗舉行朕將躬祀之命獻官迎導入廟奉世祖裕宗冊寶納諸各室甲寅敕自今監察御史廉訪使有所按覈州縣官與本路同鞠路官與宣慰司同鞠宣慰司官與行省同鞠辛酉辰星犯房壬戌犯鍵閉戊辰太白晝見太陰犯房十一月甲戌太白經天立江浙金銀洞治轉運司乙酉太陰犯井丁亥犯鬼戊戌升江西寧都會昌二縣爲州十二月丙辰太陰犯軒轅甲子犯天江丁卯禁諸王駙馬輒召有司官吏減海運工費鈔一貫每石計六貫五百文著爲令是月立皇后伯岳吾氏一作伯要真氏初命郡縣通祀三

皇如釋奠宣聖禮通攷云元貞間建三皇廟內有三皇并歷代名醫像東有神機堂內置銅人錢灸圖二十有四凡五臟旁注爲溪谷所會各爲竅以導其源委又刻鍼灸經于石其神之題篆則宋仁宗御書至元開自亦是歲帝以京師米貴益廣糶法設肆三十所發米七萬石糶之後增至四十萬石每爲豪強巧取乃命有司籍貧民戶數驗口給之減時值三之一

二年丙申春正月己卯上思州叛賊黃勝許攻剽水口思光寨湖廣行省調兵擊破之勝許復入交趾壬午太陰犯輿鬼丙戌太白晝見安西王傳請立王相府帝曰去歲阿難荅已嘗面陳朕諭以世祖定制今復奏請豈欲以四川京兆悉爲彼有邪賦稅軍站皆朝廷所司今姑從汝請置王相府惟行王傳事丁亥太陰犯平道庚寅犯鉤鈐命圖赤爲御史大夫乙未回紇不刺罕獻師豹藥物二月己亥

元史卷七 本紀

六

朔自六盤山至黃河立屯田置軍萬人辛丑立中御府丙午禁軍將擅易侍衛軍蒙古軍以家奴代役者罷職仍令其奴別入兵籍畀以本主資產之半軍卒擅更代及逃歸者死丁未太陰犯井括蒙古戶漸丁充行伍三月壬申以不忽木爲昭文館大學士平章軍國事還太原平陽路蒲萄園爲民業罷四川馬湖路所進獨本慈癸酉有言晉王甘麻刺及太師月爾魯有異圖者樞密院鞠之無驗帝命言晉王者死言太師者謫從軍乙酉太陰犯鉤鈐夏五月戊辰朔免兩都徭役甲戌詔民間馬牛百取其一羊不滿百者亦取之惟色目人及數方取丁丑太陰犯平道庚辰吐蕃叛掠階州遣兵討之庚寅禁諸王駙馬招戶令有分地功臣戶與民均納供需詔諸徒役者限一年放歸毋杖

六月乙巳太白犯天關以調兵妨農免廣西今年田租丁巳太白犯填星癸亥太陰犯井秋七月癸酉敕茶鹽轉運司印鈔提舉司運糧漕運司官以三年為代雲南福建官吏滿任者準給驛歸壬午填星犯井太白犯輿鬼己丑命行臺御史鉤校隨省理問所案牘諸提調錢穀官所部有逋欠者勿遷敘八月丁酉朔禁船商毋齎金銀過海諸使海外者不得為商立肇州屯田萬戶府庚子太陰犯亢太白犯軒轅癸卯太陰犯天江乙巳立捕盜賞格凡告捕強盜一名者賞鈔五十貫竊盜半之應捕者又半之皆徵諸罪人無可徵者官給乙卯太陰犯天街太白犯上將隆興路隕霜殺禾九月戊辰太白犯左執法壬申太陰掩南斗甲戌罷民間鹽鐵鑪命沿海巡禁私鹽定浙東福建湖

元史卷七 本紀 七

廣兩稅法秋稅止輸糧夏稅則雜以木棉布絹絲絲土物丁丑太陰犯壘壁陳甲申雲南乞藍部長答刺率諸蠻來降以其地為雲遠路己丑太陰犯軒轅河決杞封巨祥符寧陵襄邑五縣贛州賊劉六十聚眾萬餘建偽號江西左丞董士選討平之冬十一月丁卯蠻洞答馬刺一本王遣其子進象十六丁丑太陰犯月星及天街庚辰犯井丁亥犯上相增明年海運糧為六十萬石調芍陂屯田軍萬人修大都城戊子太陰犯平道壬辰犯天江省雲南柏興府入德昌路十二月戊戌立徹里軍民總管府本古產里竇宇記作車里復置蒙樣剛等甸軍民官癸卯定諸王朝會賜與太祖位金各千兩銀七萬五千兩世祖位金各五百兩銀二萬五千兩餘各有差丁未太陰犯井乙卯犯進賢復司天臺觀

星戶增置侍御史二員釋在京繫囚百人

大德元年丁酉春正月辛卯以王慶端為中書右丞張斯

立參知政事建五福太乙神壇時通政云建南郊二月丙申蒙陽

甸長遣弟阿不刺來獻方物即其地立通西軍民府升全

州為全寧府濟寧寧陽鎮為縣改隸州巡檢司為河曲縣

戊午暹國羅斛羅羅斯各遣使來朝己未改福建省為福

建平海等處行省徙治泉州減福建歲織段三千匹其車

渠帶工別立提舉司掌之庚申以改元赦天下詔曰朕荷

天地之洪禧承祖宗之不祚仰遵成憲庶格和平比者藥

木忽爾兀魯思不花朵爾朵懷等去逆效順率眾內附畢

會宗親釋其罪戾適星芒之乖象豈天意之微予宜推一

視之仁誕布更新之政可改元貞三年為大德元年三月

元史卷七 本紀 八

戊辰癸惑犯井庚午以耶先鐵木爾平章政事梁德珪

暗都為右丞八都馬辛為左丞癸酉太陰掩軒轅大星甲

戌詔并各省鎮守軍福建并為五十三所江浙并為二百

二十七所江西并為六十四所丁丑封諸王鐵木爾不花

為鎮西武靖王丁亥禁正月至七月捕獵庚寅五臺山佛

寺成皇太后親往祈祝御史李元禮諫止之不聽夏四月

癸巳朔日食丙申敕御史臺不立選惟監察御史首領官

聽御史臺自擇各道廉訪使必選用蒙古人或色目世臣

子孫其次參以色目漢人各省文案行臺差官檢覈近侍

傳奉特旨合臺憲擢用者必俟奏明而後任之行臺御史

秩滿有劾績者或入內臺或聽中書省遷調廉訪使亦如

之其不稱職者省臺擇人往代未歷有司者先授以牧民

官經省臺同選者聽御史臺自調中書省或用臺察之人亦會與御史臺同議各官府憲司官毋得輒入體察一應擬除悉依舊制五月丙寅河決汴梁發民夫三萬塞之戊辰追收諸位下爲商者制書驛券定強盜姦傷事主者首從悉誅不則止誅首盜餘各刺配再犯者並誅癸酉太白犯鬼積尸氣乙亥太陰犯房丁丑禁民間捕鬻鷹鶴貴州葛蠻及平伐九寨平珠六洞內附各立長官司上思州賊黃勝許遣其子志寶來降帝曰勝許反側不足信如其悔罪自至則當復官其子命賜衣遣之甲午賜湖廣參政崔良知鹽課鈔千錠旌其廉貧乙未太白晝見丙辰詔僧道犯姦盜重情者聽有司專決免亦奚不辭歲貢馬及雨旸秋七月定在外慶賀行禮以守土官爲班首武職雖品大

元史卷七 本紀

九

者不得撓越庚午太陰犯房辛未罷蒙古軍萬戶府入曲先塔林都元帥府定奉使外邦者假以會同館使副職銜不給制命丁亥免上都酒課三年河決杞縣蒲口命河北廉訪使尙文相視八月丁巳祇星出奎諭諸王自今出獵悉白供億給衛士牧馬外郡者糧毋仰食於民九月辛酉朔祇星復犯奎丙寅罷括兩淮民田己丑省南丹州安撫司改立慶遠南丹溪洞軍民安撫司詔邊遠官已優升品級而託故不赴者奪其官冬十月辛丑減上都商稅歲額爲三千錠戊午太白經天增吏部尙書一員十一月壬戌禁權豪僧道及各位下擅據鐵炭山場并私奪民田其獻田者加罪罷保定紫荆關鐵冶提舉司還其戶八百爲民戊辰增太廟牲用馬戊子太白經天溫州妖人陳空崖坐

禪設法僞稱羅平國正治元年平陽州官捕禽之十二月戊戌禁外郡戍卒封棹錢軍官不以時給反出已錢貸之徵其倍息者福建平章高興言漳浦縣大梁山產水晶乞割民百戶采之帝曰不勞民可勞民則勿取壬寅朝洞蠻內附立長官司二甲辰太白經天丙午太陰犯軒轅欽察都指揮使牀兀爾攻破巴鄰之地還擊海都軍敗走之甲寅太陰犯心閏月壬戌太陰犯壘壁陳詔軍戶賣田者由所隸官給文券丙子太白犯建星淮東饑池湖泊禁仍聽正月捕獵是歲順德等路旱樂壽交河疫死者六千五百餘人和州歷陽縣江漲漂沒民居萬八千五百家衡州鄱縣山崩水溢並調租振糧三萬餘石

元史卷七 本紀

十

已出糧十萬石振北邊新附貧民罷吐蕃碣門安撫司運司改立碣門魚通黎雅長河西寧遠軍民宣撫司以翰林王輝閣復王構趙與熙王之綱楊文郁王德淵集賢王顯宋渤盧摯耶律有尙李泰郝采楊麟皆耆德舊臣清貧守職特賜鈔二千一百餘錠是月特祭太廟用馬一牛一羊鹿野豕天鵝各七餘如舊是爲特祭之始二月辛酉歲星熒惑太白聚於危乙丑立浙西都水營田司專主水利以張九思梁德珪何榮祖並平章政事楊炎龍爲右丞以歲入不敷罷中外土木之役后妃諸王所需非有旨勿給罷建康金銀洞冶轉運司歲辦金悉責有司辛未太陰犯左執法丙子犯心癸未禁諸王駙馬毋擅祀嶽瀆其從者毋假控鶴佩帶擾民三月丁亥朔加封東鎮沂山爲元德東

安王南鎮會稽山為昭德順應王西鎮吳山為成德永靖
王北鎮醫巫閭山為貞德廣寧王歲與嶽瀆同祀夏五月
辛卯罷海南黎兵萬戶府以黎蠻屯田府事入瓊州安撫
司壬辰命中書省遣官監雲南四川海北海南廣西兩江
廣東福建等處六品以下選戊戌太陰犯心己酉立致用
院六月庚申罷江南門攤稅禁諸王擅發令旨其越例開
讀者并所遣使拘執以聞壬戌太陰犯角置奉宸庫秋七
月癸巳太陰犯心汴梁河決遣尚書那懷御史劉廣塞之
自蒲口首事凡築九十六所八月壬戌太陰犯箕九月辛
丑太陰犯五車南星癸卯太陰犯五諸侯己酉犯左執法
庚戌立吉贛汀三州屯田命廣海左右江成軍依舊制二
年更代冬十月壬戌太白犯牽牛置蒙古都萬戶府於鳳

元史卷七 本紀

十一

翔戊寅太陰犯角距星令御史臺稽察樞密院案牘十一
月丙申罷雲南行御史臺為陝西行臺移治京兆置雲南
肅政廉訪司己亥太陰犯輿鬼辛丑辰星犯牽牛壬寅太
陰犯右執法十二月戊午太白經天括諸路馬除牝孕攜
駒者己未填星犯輿鬼乙丑太白犯歲星太陰犯熒惑庚
午填星入輿鬼太陰犯上將詔逃軍復業者免役三年給
陳亡軍妻子衣糧甲戌彗出于孫星下己卯太陰犯南斗
辛巳定諸稅錢三十取一歲額之上勿增是歲甘肅沙州
鼠傷稼江浙水大都檀州雨雹山東河南淮揚燕南山北
蝗各調租如例振糧十五萬餘石釋在京囚繫二百一十
九人

三年己亥春正月癸未朔下存恤軍民詔曰朕自即位以

來重念屯戍征進軍士久服勞苦管軍官與魯官務加休
息不得妄有科配前詔已嘗及之今樞密院奏江南平定
之後軍馬別無調度所司不知撫養致使軍前告退者多
起補之閒官吏因而作敵應嚴行禁治如有違犯酌輕重
降黜至於張官置吏本以為民小吏祿食不敷以致培取
為害令中書省各添給俸米蠲算孤獨除照常給振外自
後每名添中統鈔一兩遇天壽節加支二兩著為令丙戌
太陰犯太白己丑中書省臣以星變各引咎避位帝曰此
漢人故事豈可一一倣之邪卿等但擇賢者任之自可挽
回天意庚寅遣使問民疾苦除本年內郡包銀俸鈔免江
南夏稅十之三增各路惠民藥局癸巳封藥木忽爾為定
遠王命哈刺合孫為左丞相丁酉太陰犯太微西垣上將

元史卷七 本紀

十二

戊戌犯右執法乙巳太白經天二月癸丑朔罷四川福建
行省陝西行臺江東荆南淮西三道宣慰司置四川福建
宣慰司都元帥府及陝西漢中道廉訪司己巳熒惑犯五
諸侯壬申封吳大夫伍員為忠孝威惠顯聖王三月甲午
命何榮祖定律令帝曰古今異宜不必相沿但取宜於今
者戊戌熒惑犯輿鬼詔軍官受賊重者落職輕者降散官
或決罰就職停俸期年許令自効夏四月己未太陰犯上
將丙寅填星犯輿鬼太陰犯心庚午嚴捕淮浙私鹽驗所
獲遷賞自通州至兩淮設巡防捕盜司十有九所五月壬
午罷江南諸路釋教總統所放諸寺佃戶五十餘萬為民
丙申太陰犯南斗海南速古臺速龍探奔奚里諸番以虎
象及杪羅木舟來貢己亥太白犯畢禁海商以人馬兵仗

往諸番賈易六月癸丑罷大名路所獻黃河故道田輪租
戊午以福建州縣官內多色目南人命以漢人參用禁福
建民冒稱權豪佃戶規免門役庚申太陰掩房丁卯熒惑
犯右執法壬申歲星晝見秋七月己卯朔太白犯井丁未
太陰犯與鬼淮揚屬縣蝗為鷲啄食飛者以翅擊死詔禁
捕鷲八月己酉朔太史奏日食不應丁巳太陰犯箕戊辰
太白犯軒轅大星己巳太陰犯五車九月壬辰夜有流星
色赤尾長丈餘光燭地起自河鼓沒於牽牛之西有聲如
雷癸巳罷括宋手號軍乙未太陰犯昴距星丁酉太白犯
左執法置河東山西鐵冶提舉司冬十月壬子授皇后冊
寶甲寅復立海北海南道廉訪司丙子太陰犯房十一月
庚辰置浙西平江河渠插堰凡七十八所乙酉太白犯房

元史卷七 本紀

圭

丁酉浚浙西太湖及澱山湖十二月己酉徙鎮巢萬戶成
沅靖毗陽萬戶成辰州均州萬戶成常德癸酉諭中書省
貨財出納自今無券記者勿與以阿魯渾薩理平章政事
是歲命皇兄子海山宗武代寧遠王闊闢出鎮漠北賜馬
二萬二千九百匹

四年庚子春正月丙申嚴京師惡徒之禁犯者黥刺拘役
癸卯復淮東漕渠二月丁未朔日食丙辰皇太后崩明日
耐葬先陵戊午太陰犯軒轅乙亥立烏撒烏蒙等郡置維
摩州夏五月癸未諭平章阿魯渾薩理曰集賢翰林乃養
老之地自今諸老滿秩者升之勿令輒去甲午太陰犯壘
壁陳辛丑太白犯與鬼太陰犯昴復置延慶司六月丙辰
加月赤察爾太師完澤太傅丁巳太白犯填星甲子赦各

省非奉命毋擅役軍弔吉爾瓜哇蘇八等國來朝秋七月
甲戌朔上皇太后尊諡曰裕聖皇后升耐裕宗廟辛卯熒
惑犯井封乳母韓氏為燕冀國順育夫人石抹氏為冀國
夫人八月癸卯朔更定蔭敘格正一品子為正五從五品
子為從九中閒正從以是為差蒙古色目人特優一秩癸
丑太陰犯井甲子辰星犯靈臺上星閏月庚辰熒惑犯與
鬼以賀仁傑平章政事九月戊午太白犯斗壬戌太陰犯
與鬼升英德州為路置廣東鹽課提舉司甲子太白犯斗
改中御府為中政院掌中宮財賦營造事冬十一月壬寅
朔免上都大都隆興明年絲銀附近牧地免稅糧十之三
徒罪各減一半杖以下釋之并遼陽省所轄狗站牛站為
一輟耕錄云高麗以北名別失八里譯言連五城也罪人
之流奴兒干者必經此其地極寒海亦冰自八月即合

元史卷七 本紀

吉

至明年四五五月方解人行其上如平地征東行省每歲委
官至奴兒干給散囚糧須用站軍每車以四狗挽之狗悉
諸人性站有狗分例若剋減十二年癸酉定江北墾荒者
之必蓄其主者至死乃已初起三年起科恐貧民
四年起科初起三年起科恐貧民庚寅熒惑犯軒轅癸巳
太陰犯房是歲建康平江湖北浙東饑寧國太平旱振粟
三十四萬九千三百石

五年辛丑春正月己酉太陰犯五車壬子犯與鬼積尸氣
奉安皇妣裕聖皇后御容於護國仁王寺赦官吏犯賊及
盜官錢事覺雖遇赦免亦加降黜小吏犯賊者並罷不敘
辛酉太陰犯心罷檀景兩州采金鐵冶及福建織繡提舉
司二月己卯太陰犯與鬼丁亥詔廉訪司官非親喪遷葬
及以病在告者不得離職軍民官或以地遠職卑已除不
赴任者奪職勿敘己亥永寧路總管雄控曲請路宣慰使

忽林失來朝三月戊申太陰犯御女戊午馬來忽等海島遣使來貢丁卯熒惑犯填星己巳熒惑填星相合夏四月壬申太陰犯東井癸巳禁和林釀酒其諸王駙馬許自釀飲民間無釀具而儲酒者勿問五月癸丑太陰犯南斗乙卯熒惑犯右執法商州隕霜殺麥丙辰河南妖賊醜斯等伏誅雲南土官宋隆濟反攻貴州知州張懷德死之丁卯太白犯井六月甲申歲星犯司怪癸巳太白犯輿鬼歲星犯井秋七月戊戌朔晝晦暴風起東北大雨雹丙午歲星犯井丁未命監察御史審覆宗正府罪囚檢刷宣政院案牘辛亥太陰犯壘壁陳癸丑浙西積雨傷民田命役夫二千人疏導河道庚申辰星犯太白叛王合丹之孫脫歡自北來歸以暗伯阿忽台竝知樞密院事八月諭行中書省

元史卷七 本紀 五

宣慰廉訪二司列置諸路之上本以弭盜賊修政事糾不法撫良民也近年於此略而不問自今各修乃職凡在所屬常加檢察期於政成民安諸路鎮靜而止有不稱任者省臺錄其實跡奏示黜罰其嶽鎮海濱名山大川風師雨師雷神各正官齋戒致祀有不敬者聽廉訪使糾彈庚辰遣官分道慮囚累年不決者具疑狀申省臺詳讞有星孛於東井歷紫微天市垣至九月乙丑凡四十六日而滅壬辰太陰犯軒轅御女乙未填星犯太微西垣上將冬十月丙寅朔畿內饑增明年海運糧爲百二十萬石戊寅武定路土官羣則獻方物癸未太陰犯東井改鄂州爲武昌路丁亥定軍官既受命而不時赴及差竣不即還者準民官例違限六月選人代之被代者期年始敘辛卯夜有流星

大如杯光燭地自北起近東分爲二星沒於危宿十一月己亥歲星犯東井降容象橫賓路爲州升昭州爲平樂府省泌縣入唐州丁未設肆三十六所減直糶米振京師貧民戊申太陰犯昂孛人藍賴率丹陽三十六洞來降立長信寺領大幹爾朵怯憐口諸事湛然居士集云每新君立名幹爾朵後君立復自作之法憐口謂習百工技藝者十二月甲戌歲星犯司怪辛卯太陰犯南斗定凡盜人孳畜者取一償九然後杖之是歲海都與篤哇大舉入寇皇兄子海山躬督五軍破之射篤哇中膝號哭遁去海都走死江湖溢東起通泰崇明西盡真州民被災死者不可勝計振米八萬七千餘石六年壬寅春正月癸卯詔千百戶等自軍中先事而逃者罪死敗而後逃者杖罷之沒入其子女乙巳晉王甘麻刺

元史卷七 本紀 六

薨庚戌江南僧石祖進告朱清張瑄不法十事下御史臺按問帝曰朕聞江南富戶侵占民田以致貧者流離轉徙卿等嘗聞之邪臺臣言富民多乞護持璽書倚倚以欺貧民官府不能詰治宜悉追收爲便帝命速行毋越三日并諭自今僧官僧人犯罪御史臺與內外宣政院同鞫凡寺觀續置田土及民以施入爲名者竝輸租充役乙卯築渾河堤長八十里禁豪家毋侵舊河定軍官除邊遠征戍外凡遇祖父母父母喪俱準終制蒙古色目人各從本俗有願守制者聽壬戌填星犯太微西垣上將二月庚午太陰犯昴西南夷叛遣耶速帶爾劉國傑次第討平之癸巳帝有疾釋京師重囚發通州倉粟振貧民三月丁酉以旱溢爲災詔赦天下大都平灤被災尤甚免差稅三年其餘災

傷之地已經振恤者免一年今年內郡包銀俸鈔江淮以南
南夏稅及諸路散辦門攤課程盡賜調免壬寅太陰犯與
鬼癸卯歲星犯井甲寅太陰犯鉤鈐合祭昊天上帝皇地
祇五方帝於南郊遣左丞相哈刺合孫攝事此攝祀天地
之始夏四月乙丑朔太白犯東井丁卯曲赦雲南諸部蠻
夷戊寅太陰犯心戊子修盧溝上流石徑山河堤庚寅太
白犯與鬼五月乙巳給貧乏漢軍地及五丁者一頃四丁
者二頃三丁者三頃其孤寡者存恤六年逃散者招諭復
業戊申太廟寢殿災六月癸亥朔日食太史院失推策下
中書議罪填星犯太微西垣上將甲子建文宣王廟於京
師時京師未有孔廟國學館於他乙亥太陰犯斗秋七月
癸巳朔癸感填星辰星聚于井庚子太陰犯心戊午犯癸

元史卷七 本紀 七

惑辛酉以忽都不丁爲中書右丞八月乙丑癸感犯歲星
己巳犯與鬼辛巳太陰犯昴壬午太白犯軒轅九月丙午
癸感犯軒轅隆興民謠言括童男女至有殺其子者命誅
爲首三人癸丑太陰犯與鬼丁巳太白犯右執法冬十月
甲子從浙東宣慰司治慶元鎮過海道置大同路黃花嶺
屯田罷軍儲所立屯儲軍民萬戶府壬午癸感犯太微西
垣上將十一月辛卯填星犯左執法乙未辰星犯房癸卯
太陰犯昴己酉犯軒轅辛亥命合答知樞密院事十二月
庚申朔癸感犯填星辛酉雲南地震戊辰又震禁使臣枉
道馳驛己巳歲星犯與鬼乙亥太陰犯與鬼庚辰癸感犯
太微東垣上相癸未太陰犯房是歲振浙江饒州糧二十
九萬一千石給京師貧民鈔十一萬七千錠有奇初太宗

正所定刑獄俱任蒙古必閣赤掌橐其中枉誤甚多至是
始令譯史立漢文卷委蒙古漢御史各一員閱視審覆然
後待報革諸衙門濫設貼書

七年癸卯春正月戊戌太陰犯昴甲辰犯軒轅己酉弛饑
荒所在山澤河泊禁乙卯誅朱清張瑄盡拘其海船軍器
丁巳令樞密院選軍士習農業者教軍前屯種二月辛未
以木八刺沙阿老瓦丁竝中書平章政事尙文爲左丞朵
台董士珍參知政事壬申詔樞密院宗正府自今政事與
中書共議然後奏聞遷調官員諸司不得擅奏雖經特旨
用者於例未允亦聽覆奏戊寅太陰犯心帝語省臣曰比
有以歲課增羨希求爵賞者此非措克於民何從而出自
今除元額外勿以羨增作正數罷江南都水庸田司詔和

元史卷七 本紀 七

林軍六年更戌仍給鈔以周其乏三月己丑朔定凡子孫
或因貧困或信師巫說誘擅發祖父墳墓移棄尸骸貨賣
塋地者與惡逆同罪庚寅遣使宣撫循行天下以郝天挺
等十三人充七道使並給銀印江浙平章託託遣發朱清
張瑄家屬出金珠重賂之託託以聞帝曰朕以江南任卿
果能爾真男子事也其益恪勤乃事賜黃金五十兩壬辰
以大都比歲不登罷修建僧寺工役乙未中書平章巴顏
梁德珪段貞阿魯渾薩里右丞八都馬辛左丞月古不花
參政迷而火者張斯立等皆以受朱清張瑄賂罷甲辰增
給京朝官祿米外任官無職田者亦驗俸量給戊申大一
統志成夏四月癸亥太陰犯東井徵陳天祥張孔孫爲集
賢大學士郭筠昭文館大學士皆同議中書省事丙寅太

陰犯軒轅乙亥歲星犯輿鬼太陰犯南斗劉國傑敗宋隆濟於墨特川禽斬之甲申熒惑犯太微垣右執法丁亥歲星犯輿鬼五月己丑開上都大都酒禁壬辰辰星犯東井濬上都灤河甲寅禁諸王駙馬毋輒杖州縣官吏縱獵擾民山東隕霜殺麥閏月戊午朔日食壬戌禁犯曲阜林廟戊辰太陰犯心丞相完澤卒六月己丑發蒙古軍萬人分鎮瓜沙二州隘口仍立屯田以供軍癸卯詔凡軍官子弟年及二十者與民官子孫同儔直一年方許襲職萬戶於樞密院千戶於行省百戶於本萬戶乙巳罷四川宣慰司復立行省修甘肅阿合潭曲尤濠俾通漕運秋七月壬戌禁僧人以修建寺宇為名齋諸王令旨乘傳擾驛丙寅命哈刺合孫為右丞相阿忽台為左丞相戊寅歲星犯軒轅

元史卷七 本紀

九

己卯太陰犯井詔朝臣三品以下年七十者各升散官一等致仕乙酉熒惑犯房八月辛卯夜地震平陽太原尤甚邨堡移徙地裂成渠人民壓死者眾摧圮宮觀千四百餘區遣使分道振濟癸巳太白犯氏甲午熒惑犯東咸太陰犯牽牛乙巳歲星犯軒轅辛亥熒惑犯天江九月丙寅太白晝見以太原平陽地震禁諸王所部擾民仍減歲餉馬之半辛未熒惑犯南斗罷僧官有妻者甲戌太陰犯東井乙亥太白犯南斗都城火命樞密院增巡防兵壬午辰星犯氏冬十月丁亥太白經天戊子以江浙年穀不登減海運四十萬石癸巳以行省官久任多與所隸編氓聯姻害政詔互遷之命只爾合忽知樞密院事給大都文宣王廟洒掃戶五乙未發雲南叛寇餘黨來京師庚子改平灤為

永平路升普定府為路以故知府容苴妻適姑為總管云容苴効順賊未平而沒其妻能宣力戎行故有是命辛丑太陰犯東井庚戌翰林國史院進太祖太宗定宗睿宗憲宗五朝實錄辛亥增蒙古國子生百員十一月甲寅朔改順元路隸湖廣升全寧府為路己未太白經天辛酉雨木冰丙寅填星犯進賢戊辰太陰犯井己卯犯東咸十二月甲申朔加封真武為元聖仁威玄天上帝乙酉許貧民釀酒丙戌太白經天熒惑犯壘壁陳詔蒙古軍居山東河南者免遠戍甘肅丙申太陰犯東井辛丑犯明堂丁未犯天江庚戌彗星見約盈尺在室十一度入紫微垣奉使宣撫奏罷七道賊污官吏一萬八千四百七十三人審冤獄五千一百七十六事賊罰鈔四萬五千八百六十五錠

元史卷七 本紀

十

八年甲辰春正月己未以災異故詔天下曰去歲地震平陽太原為甚一切差發稅糧自大德八年為始與免三年隆興延安上都大同懷孟衛輝彰德真定河南安西等路被災人戶與免二年大都保定河間等路免一年江南佃戶承種田土者私租大重以致小民困窮今普減十分之二著為例至國家財物自有常制比者諸人妄獻田土戶計山場窰冶增添課程無非微名貪利生事害民嗣後悉皆禁治其軍站民匠各戶往往託名僧道影蔽差徭自今有願出家者必本戶丁多差役不關及有昆仲侍養父母許赴原籍官司陳告勘實方準雍度違者斷罪歸俗乙丑復置遂平新蔡真陽大和沈丘潁上柘城城父郟舞陽十縣丙寅以塔思不花為中書右丞趙仁榮參知政事辛巳

禁諸王駙馬往遼東捕海東鵲者毋給驛癸未增築河防
自榮澤至睢州凡十有八所是月平陽地再震已修民居
復壞二月丙戌增廣國子生二百員選宿衛大臣子孫充
之降莊浪路爲州省隴干縣入德順州甲午詔父子兄弟
有才者許並居風憲丙申分軍屯田於薛出合出谷甲辰
國史院進世祖寶錄金書節文一冊三月乙丑彗星始滅
凡見七十四日戊辰詔諸王駙馬分地所置達魯花赤惟
用蒙古人三年依例遷代軍官擅離所部者悉遣還翼軍
人不告所部私歸者杖之軍民逃奴有獲者即付其主誘
匿者論罪仍追逃奴鈔充獲者賞夏四月丙戌詔諸路畏
吾兒合迷里自相訟者歸都護府與民交訟者聽有司專
決丁未分教國子生於上都五月癸未應作朔日食辛酉

元史卷七 本紀

主

濬吳江松江海口役租戶萬五千人免其租人十五石設
行都水監董其程復良田百餘里汝寧妖人李曹廬妄言
得天書惑眾伏誅秋九月庚申復巴顏梁德珪八都馬辛
迷而火者等官御史杜肯構中丞何瑋上章諫不報以阿
里爲中書平章政事張祐脫歡並參知政事癸酉諸王察
巴爾篤哇遣使來附賜幣六百匹潮州颶風起海溢民溺
死者眾改封皇兄子海山爲懷寧王冬十一月壬子詔內
郡江南人凡爲盜黥三次者謫戍遼陽諸色及高麗人三
次免黥謫戍湖廣盜禁鑿馬者初犯謫戍再犯者死丁卯
復免天下僧道租戊辰以鐵古迭爾鐵一作帖爲御史大夫壬
申增海漕爲百七十萬石十二月庚子復立益都淘金總
管府辛丑封諸王出伯爲威武西寧王

九年乙巳春正月丁巳太陰犯天關甲子犯明堂己巳犯
東咸定攷試教官法初充學錄教諭試詞賦二韻小賦並
二韻經義論孟義明經解題各一道學正升教授試詞
賦全賦一道經義各從所業大義一道明經解題二道一
月丁酉封諸王完澤爲衛安王藥木忽爾爲威定王庚子
議行郊祀禮辛丑令御史臺翰林集賢院六部於五品以
上各舉廉能識治體者三人行省行臺宣慰廉訪司各舉
五人免大都上都隆興差稅內郡包銀俸鈔一年建大天
壽萬寧寺詔致仕官止一子應承蔭者並免俸直家貧者
給半俸終身三月丁未朔論仲春已後農民力作其敕有
司慎毋生事煩擾或有小罪即與疏決勿禁繫以妨農時
甲寅熒惑犯氏戊午歲星犯左執法以高興平章政事仍

元史卷七 本紀

主

樞密副使夏四月庚辰太陰犯井乙酉大同路地震壞官
民廬舍五千餘間壓死二千餘人懷仁縣地裂二所涌水
盡黑漂出松柏朽木遣使振之己丑東川路蠻官阿葵來
獻方物壬辰太白犯井五月丁未大都旱遣使持香禱雨
戊申徵原任陝西儒學提舉蕭軒赴闕命有司給以安車
戊午立衍慶司癸亥歲星掩左執法以地震改平陽爲晉
寧太原爲冀寧並調今年商稅省鬱林縣入貴州六月丙
子朔立皇子德壽爲皇太子詔赦天下賜高年帛親年七
十別無以次侍丁者許就近遷除外任官五品以下並減
一資致仕官衰加一秩諸罪囚淹繫疑不能決者釋之流
竄遠方之人量移內地甲午潼川江溫漂民居溺死者眾
秋七月乙巳朔升太府監爲太府院丙午熒惑犯氏辛亥

築郊壇於麗正文明門之南丙位設郊祀署令丞太祝奉
禮協律等官癸丑以黑水新城為靖安路甲寅太白經天
壬戌命故皇兄晉王妃弘吉刺氏及兒子愛育黎拔力八
達即七出居懷州封為懷王丁卯熒惑犯房復以段貞八
都馬辛並平章政事合刺蠻子為右丞迷而火者為左丞
耶先伯參知政事沔陽玉沙江陳州西華河皆溢八月辛
巳太陰犯東咸汰李可孫穴員掌治蜀增曲阜陵廟洒掃
戶以尙珍署田五十頃供歲祀乙未熒惑犯天江九月丁
巳熒惑犯斗冬十月丙戌太白經天復芍陂洪澤屯田及
兩淮官地為豪右占據者悉令輸租己丑命兩廣以南軍
與土人同成是月帝不豫中宮秉政十一月丁未發鈔萬
錠於雲南令與貝通放參用其貝非出本土者同偽鈔論

元史卷七

本紀

七

通放云按雲南賦以一為莊四
莊為手四手為苗四苗為粟庚戌歲星太白填星聚於
亢癸丑歲星犯亢丙寅歲星晝見庚午祀昊天上帝於南
郊以哈刺合孫阿忽台鐵古迭爾為三獻官省祖宗配位
壬申太白經天十二月丙子太白犯西咸地震庚寅熒惑
犯壘壁陳皇太子德壽薨己亥辰星犯建星是歲河間益
都般陽諸屬隕霜殺桑二百四十餘萬本

十年丙午春正月壬寅朔高麗王王暉遣使來朝自世祖
未年高麗朝正使不時至
至是適一會焉甲辰訪莊聖順聖裕聖三皇后儀範以
備紀錄庚戌濬真揚等州漕河令鹽商每引輸鈔二貫為
備工費丁巳太白犯建星戊午罷江南白雲宗都僧錄司
汰其民歸州縣僧歸各寺田悉輸租時有白雲宗總攝所
統江南為僧之有髮
壬戌發河南民十萬築河防禁近侍毋輒驛召外郡官

丁卯營國子學於文宣王廟西閏月癸酉太白犯牽牛己
丑犯壘壁陳甲午以鐵哥閣里阿散並平章政事張閻杜
思敬月古不花並為中書左丞劉源參知政事二月丙辰
封李羅為鎮寧王戊午太陰犯氏三月戊寅歲星犯亢崆
古王遣使來貢夏四月庚子朔詔凡匿鷹犬者沒家資之
半來獻者給以賞辛酉填星犯亢壬戌曲靖羅雄州渠長
阿邦龍少結諸蠻為寇平章耶速帶爾捕斬之甲子倭商
有慶等抵慶元賈易以金鎧甲為獻五月詔江南平定之
後悉為吾民比聞營利之徒以人為市因而強略良人及
借乞養過房名色公然販鬻奸偽非一朕甚憫之自後南
北往來販人客旅並行禁止經過關津盤詰得實強略者
以強盜例科斷和誘者次之至軍中所得子女出征軍官

元史卷七

本紀

七

同管民官從實分揀如係良民速令完聚果係賊屬聽本
營萬戶千戶出具印照如敢擅略平民律同強盜其有欲
將驅口轉行貨賣者須赴所在官司給到公據違者俱各
斷罪癸未定西番僧往還者給以舟車毋令馳驛乙酉以
塔魯忽台塔刺海並知樞密院事六月癸未太陰犯羅堰
上星己未歲星犯亢壬戌復立淮西道廉訪司秋七月庚
辰太陰犯牽牛辛巳釋諸路罪囚常赦所不原者不與八
月壬寅歲星犯氏熒惑犯太微西垣上將開成路地大震
壞王宮及官民廬舍壓死故秦王妃耶里完等五千餘人
丁巳文宣王廟成行釋奠禮用太牢登歌樂製法服三襲
命翰林院定樂名樂章九月己巳熒惑犯太微垣右執法
壬午犯左執法冬十月甲辰太白犯斗青山叛蠻紅花獠

等來附辛亥太陰犯畢甲寅犯井十一月辛未歲星犯房
壬申太陰犯虛甲戌熒惑犯亢戊子犯氏辛卯太陰犯熒
惑十二月壬寅太白晝見乙巳歲星犯東咸帝有疾禁天
下屠宰四十二日丙辰遣宣政院使沙的禱於太廟戊午
太陰犯氏是歲晉寧冀寧地震不止大同暴風雨沙道州
江湓山裂平江海嘯壤民居出鈔萬三千六百錠糧八萬
七千餘石振之

十一年丁未春正月丙辰應作寅朔帝大漸免朝賀癸酉崩
於玉德殿年四十二乙亥葬起輦谷是年九月乙丑加上
尊諡曰欽明廣孝皇帝廟號成宗蒙古語曰完澤篤皇帝

元史卷七 本紀

五

元史卷七終

元史卷八

本紀六

武宗

武宗皇帝諱海山世祖皇太子真金第二子答剌麻八刺
之長子成宗兄子也母弘吉刺氏答剌麻八刺子二長即
帝次愛育黎拔力八達即仁宗帝以至元十八年七月十
九日生成宗大德三年以寧遠王闊闊出總兵北邊怠於
備禦命帝即軍中代之四年八月與叛王海都戰敗之於
闊別列之地五年八月又與戰於迭怯里古及合刺合塔
之野師失利帝親出督戰大破之援諸王駙馬眾軍以出
明日復戰陳少卻海都乘之帝揮軍力戰突出敵陳後海
都不得志旋走死八年四月封帝懷寧王賜金印置王傅
官割瑞州六萬五千戶為食邑歲給五戶絲直鈔二千六

元史卷八 本紀

一

百錠幣帛各千匹十年七月自脫忽思圖之地踰按台山
追叛王幹羅思獲其妻孥輜重執叛王耶孫圖阿及駙馬
伯顏等八月軍於耶里的失之地受諸王圖滿明里阿魯
灰等降海都子察巴爾逃於篤哇部盡俘獲其家屬營帳
冬駐按台山降王圖曲滅復叛與戰敗之北邊悉平成宗
晚年立子德壽為皇太子皇后伯岳吾氏忌帝兄弟乃出
帝母弟愛育黎拔力八達與帝母元妃弘吉刺氏居懷州
無何德壽卒成宗寢疾無子后恐帝立修前怨召安西王
阿難荅及諸王明里入朝陰屬意安西十一年正月成宗
崩丞相阿忽台平章巴顏八都馬辛與明里謀奉后垂簾
聽政援立安西王潛遣師斷帝歸路毋令入時帝居北邊
適遣康里托托入京計事丞相哈刺合孫急令還報且恐

帝遠內難將作先遣使迎愛育黎拔力八達於懷州暫監國至則定計誅阿忽台八都馬辛巴顏等并執阿難答明里二王歸上都遣使迎帝三月帝自按台山至和林諸王勦威畢會皆曰今阿難答等煽惑中宮陰蓄異志恐變生不測乃合辭勸進帝謝曰吾母吾弟在大都俟宗親畢會再議會帝母元妃惑於日者言欲帝讓位於其弟帝聞之謂康里托托曰我捍禦邊陲勤勞者十年且倫序居長術數之言茫然難信設我所爲上合天心下副民望則雖一日之短亦足垂名萬年何可以陰陽家言而遽乖祖宗之法哉此殆用事之臣擅權專殺懼罪故爲是奸謀動搖大本耳汝疾往察事機歸報我於是親帥大軍由西道諸王按灰由中道牀兀爾由東道各以勁旅萬人從托托馳至

元史卷八 本紀

二

大都入道帝言帝母愕然曰修短之說出自術家今宗王大臣議已定太子不速來何爲復遣托托往促帝行至旺兀察都之地帝輿中望見之趣使同載托托具白母妃言且道安西謀變太弟監國始末帝大感悟五月乙丑至上都愛育黎拔力八達侍母元妃來會左右部諸王畢至乃廢成后出居東安州尋與阿難答及明里竝賜死甲申帝卽位於上都詔曰昔我太祖以武功定天下世祖以文德治海內列聖相承丕衍無疆之祚朕自先朝肅將天威撫軍朔方殆將十載親御甲冑力戰卻敵者屢矣方諸藩內附邊事以寧遽聞宮車晏駕迺有宗室諸王貴戚元勳相與定策於和林咸以朕爲世祖曾孫之嫡裕宗正派之傳以功以賢宜膺大寶朕謙讓未遑至於再三聞者姦臣乘

隙謀爲不軌賴祖宗之靈母弟愛育黎拔力八達稟命太后恭行天罰內難旣平神器不可久虛宗祧不可乏祀合辭勸進誠意益堅朕勉徇輿情於五月日卽皇帝位任大守重若涉淵冰屬嗣服之云初其與民以更始可大赦天下免上都大都隆興差稅三年江南諸路民糧十分免三雲南八番諸甸差發全免各軍站工匠鹽場鐵冶等戶合納稅糧概免三分被災山場湖泊課程權且停罷鐵冶許諸人煽辦調積逋恤蠲免儒戶差役命中書省續議舉貢法追尊皇考曰皇帝尊母元妃爲皇太后壬辰加知樞密院事朵爾朵海太傅右丞相哈刺合孫太保竝錄軍國重事命塔刺海爲左丞相阿沙不花明里不花竝平章政事劉正爲左丞遙授欽察及耶先鐵木爾竝參知政事以

元史卷八 本紀

三

塔思不花爲御史大夫牀兀爾知樞密院事特授乞台普濟平章政事抄爾赤塔海竝右丞阿里左丞康里托托御史大夫六月癸巳朔詔立母弟愛育黎拔力八達爲皇太子授以玉冊金寶甲午建行宮於旺兀察都立宮闕爲中都丁酉詔諸王朝會賜與悉如大德所增之數己亥以都指揮使馬謀沙角觥屢勝遙授平章政事癸卯復置詹事院及皇太子家令府正延慶三司典寶典膳二署甲辰以慈刺合爾鐵木爾不花竝知樞密院事丙午太陰犯南斗杓星戊申特授孛蘭奚牀兀爾竝平章政事怯里木丁爲中書右丞丙辰敕銓調軍官聽樞密院公議餘人不得冒請軍官父子兄弟許其相襲革外任官所帶相銜己未改封寧遠王闊闕出爲寧王秋七月癸亥朔封諸王圖刺爲

越王甲子遣大臣以卽位告謝南郊及太廟社稷丙寅以阿保功授明里大司徒封其妻梅伯順國夫人遣使詣西域取佛鉢舍利令天下僧誦藏經爲三宮祈福己巳太陰犯亢置宮師府設太子師傅保賓客諭德贊善庶子洗馬率更令丞司經令丞中允文學校書正字等官癸酉罷和林宣慰司仍置行省左遷哈刺合孫爲和林左丞相命月赤察爾爲和林右丞相進爵淇陽王丁丑封諸王八不沙爲齊王多列納爲濟王迭里哥爾不花爲北寧王加平章政事脫虎脫大尉命塔刺海爲右丞相塔思不花爲左丞相教化法忽魯丁別不花並平章中書省事庚辰以只爾合郎爲御史大夫辛巳加封孔子尊號制曰先孔子而聖者非孔子無以明後孔子而聖者非孔子無以法所謂儀

元史卷八 本紀

四

範百王師表萬世者也朕纂承丕緒敬仰休風循往古之良規舉追封之盛典加號大成至聖文宣王遣使闕里祀以太牢於戲父子之親君臣之義永惟聖教之尊天地之大日月之明奚罄名言之妙敕中書省庶政非公議者勿奏壬午癸惑犯南斗給和林省鈔二千錠歲收息以充公用仍以網罟賜貧民以郝天挺李羅荅失並爲中書左丞敕樞密院御史臺宣政院許得自選官他司悉從中書銓注近臣不得輒奏富家願出粟振貸者授以官庚寅置延福司八月甲午停內降旨授官乙未以烏伯都刺參知政事甲辰出納蘭不刺所儲糧萬石振旁近民己酉增置詹事院參議斷事官辛亥中書右丞李羅鐵木爾以蒙古字譯孝經進帝曰此孔子之微言自王公達庶民皆當由是

而行其命中書省刻板摹印諸王以下皆賜翼靈路地震九月甲子帝至大都名臣奏議云武宗初卽位上都卽巡曰先帝新棄天下陛下巡狩不以時無以慰臣民之望早還京師且臣聞人君猶北辰然居其所而眾星共之不在勤遠略也帝壬申上皇考尊諡曰昭聖衍孝皇帝廟號順宗上大行皇帝尊諡曰欽文廣孝皇帝廟號成宗又上成宗后弘吉烈氏尊諡附成宗室定耐廟之次哈刺合孫言順宗爲成宗同母兄其神主宜先弟後帝從其議癸酉太白犯右執法甲戌改太常寺爲太常禮儀院尙乘寺爲衛尉院置皇子位典牧監典幄署典樂司丙子奪諸王公主駙馬及諸人賜田還官并停一切賜予丁丑定省臣官數依舊制爲十二員右丞相塔刺海左丞相塔思不花平章牀兀爾乞台普濟如故以阿沙不花塔失海身平章

元史卷八 本紀

五

政事李羅荅失劉正爲右丞郝天挺耶先鐵木爾爲左丞于章烏伯都刺參知政事其班朝諸司冗員並從察汰乙卯太白犯左執法甲申議立尙書省分理財用命脫虎脫教化法忽魯丁任省事俾自舉官屬臺臣言至元中阿合馬桑葛相繼立尙書省事敗并入中書頃爲綜理財用又復立之勢必增置有司濫設官吏無益帝曰卿言良是但此三臣者願任其事姑聽其行冬十月乙未升典寶署爲監典瑞利用二監爲院乙巳太白犯亢甲寅太陰犯明堂丙辰以買閭知樞密院事敕行省平章總督軍馬得佩虎符其左丞等所佩者悉追納十一月癸亥封諸王身忽都爲楚王丙寅帝朝皇太后於隆福宮上玉冊玉寶丁卯太白犯房乙亥禁軍站鷹房控鶴等戶毋冒占民田苟免徭

役丙子太陰犯東斗乙酉犯亢庚寅賜太師月赤察爾江
 南田南田有賜田悉奪還官第以赤察爾詔皇太后軍民人
 匠等戶賦役並隸徽政院辛卯辰星犯歲星十二月壬辰
 朔敕金虎符及金銀符非由中書省勿給舊制金銀虎符
 皆省給之事畢則仍歸典瑞院後出入多不由中書下至
 使人結託近侍奏請給以致有出無歸自後除官及奉
 必由中書命留守司以來歲正月十五日起鑿山於大明
 殿後延春閣前丁巳以歲歉命宣政院省佛事罷工役庚
 申以改元赦天下詔曰仰惟祖宗應天撫運肇啟疆宇華
 夏一統罔不率從逮朕嗣服丕圖繼膺景命遵承彝訓恪
 守洪規永思勗業之艱未知攸濟重念萬幾之統在予一
 人故自即位以來溥從寬厚量能授官俾勤乃職夙夜以
 永康兆民為急務閒者歲比不登流民未復官吏竝緣侵

元史卷八 本紀 六

漁上下有乖和氣是以責任股肱耳目大臣思所以盡瘁
 贊勤嘉猷朝夕入告朕命惟允庶事克諧樂與率土之民
 共享治安之效邇寧遠肅願不遑與可改大德十二年為
 至大元年誕布維新之令式孚永固之休是歲江浙饑禁
 荆襄淮右無遏糶以民艱漕粟令湖廣江西各輸五十萬
 石並由海道達京師杭州一郡歲釀酒糜米麥二十八萬
 石至是有禁
 至大元年戊申春正月辛酉朔曲赦御史臺見繫犯賊官
 吏止徵賦罷職癸亥發六衛軍萬八千五百人供旺忽察
 都建宮工役甲子授阿沙不花右丞相行御史大夫事丙
 寅罷行都水監辛未帝欲以中衛親軍隸皇太子辭曰世
 祖立五衛以應五方去一不可乃摘各翼漢軍萬人別立

一衛為東宮衛兵立衛率府甲戌禁進海東青鴉首託青
 驛騎不敷擅括民馬戊子改徽政院人匠總管府為膳珍
 司升中尚監為院尚舍監為寺己丑幽王出伯進玉六百
 餘斤賜金銀鈔厚荅之罷河西采玉夫遣使巡行諸道共
 議弭盜方略或匿盜不聞或期會不至或踰期不獲者官
 吏連坐二月癸巳改鷹房為仁虞院以右丞相托托等為
 院使丙申立尚服院設尚冠尚衣尚鞞尚沐尚輦尚飾六
 奉御隸之更立甄用監隸徽政院驥用資武二庫隸府正
 司壬寅改詹事院使為詹事副詹事為少詹事院判為詹
 事丞三月乙丑太陰犯井以和林北來貧民八十六萬八
 千戶仰給於官非久計分振鈔二百萬錠罷其廩給就令
 屯田丁卯為皇太后建興聖宮復立白雲宗攝所戊寅以

元史卷八 本紀 七

脫脫木爾平章政事己卯命翰林國史院纂修順宗成宗
 實錄封阿沙不花康國公三寶努渤國公教化魏國公曲
 出應國公加帖古迭爾耶爾吉尼竝右丞相遣米楫等使
 蘇魯國夏五月丙寅降英德路為州丙子禁白蓮社毀其
 祠還其人隸民籍甲申立大同廣武康里三侍衛親軍都
 指揮司六月己丑加三寶努錄軍國重事曲出太子太保
 托托太尉大慈都平章軍國重事丁酉隴西寧遠縣地震
 烏撒烏蒙三日之中地大震者六封藥木忽爾為定王乃
 蠻帶為壽王加宦者李邦寧大司徒遙授左丞相仍領太
 醫院事秋七月庚申有流星起自句陳南行圓若車輪微
 有銳經貫索而滅敕以金銀歲入數少自今毋問何人以
 金銀奏請及託人轉奏者皆抵罪壬戌禁鷹房於大同隆

興諸地縱獵擾民築呼鷹臺於鄴州澤中鴻雪錄云南河子本元之飛放

泊元制大都八百里以內東至灤州南至河間西至中山北至宣德府捕兔有禁以天鵝鴝鵒仙鶴鴉鴉私賣者即以家婦子給捕獲之人有於禁地圍獵為奴婢出首者斷奴婢為良民收住鷹鴝向就近官司送納限以新羊肉無則易以鷄自正月一日至七月

月二十日禁不打捕著為令旺忽察都行宮成立中都

留守虎賁二司辛未立御香局建香殿壬申太白犯左執法癸未樞密院言世祖時設院官六員成宗時增至十三

員今署事多至三十二員非制敕罷塔思帶等十一人乙

酉以豸虎人徹爾怯思為監察御史八月以命相詔天下

曰中書政本也軍國之務小大由之朕自即位以來厲精

求治爰立輔相以總中書期年於茲大效未著豈選用之

未當與何萬幾之猶繁而羣生之寡遂也今特命左丞相

塔思不花為中書右丞相太保乞台普濟為中書左丞相

統百官平庶政便者舉行敝者革去一新條理大小機務

竝聽中書省區處諸王貴戚不得阻撓近侍官屬及內外

諸司事不由中書議者毋隔越聞奏外任官非奉朝命毋

擅離職赴都營求私事各省水旱饑荒已嘗遣使分振其

至大元年差發夏稅竝行蠲免大江以北百姓供億繁勞

包銀俸鈔輸納實為偏重大德十一年為始悉予除豁

諸站赤消乏逃亡者應速發補管站頭自有司自典買站

戶親屬男女者勒令完聚價不追償戊申立中都萬億庫

置寧夏河渠司九月丙辰中書省言夏秋之閒鞏昌地震

歸德暴風泰安濟寧真定大水江浙饑疫癘大作臣等不

才願退位以避賢路帝曰舊害事有由來非爾所致爾等

但當慎其所行壬戌泉州大賈進沈檀異木可構宮室者

元史卷八 本紀 八

敕江浙省驛致之庚辰諸王圖滿進所藏太宗玉璽進封

陽翟王癸未太陰犯熒惑遣使諭薛迷思千部冬十月癸

巳蒲縣陵縣地震甲午以阿沙不花知樞密院事罷大都

權酷辛丑太白犯南斗癸卯發湖廣米十萬石貯揚州江

西海漕米五萬石貯朱汪利津二倉濟山東饑甲辰加鐵

木爾不花錄軍國重事圖忽魯耶速脫孛花竝知樞密院

事以西僧教瓦班為翰林承旨改護國仁王寺昭應規運

總管府為會福院十一月庚申太白晝見增官吏俸以至

元鈔給之停其祿米歲省米四十萬石吏員以九十月出

身如舊制詔免被災田租凡佃戶止輪田主十分之四丁

卯中書省言銓選錢穀他司乞毋干預帝曰已降制書令

諸人勿干中書之政他日或有乘朕遺忘持內降文記及

傳旨至中書者其執之以來朕將加罪己已命托托為左

丞相耶爾吉尼為御史大夫大慈都為太子詹事以國用

不給汰宣徽太府利用等院遣使覈天下屯田凡一百二

十餘所令同行省宣慰官親履其地具籍以聞癸未皇太

后造寺五臺山摘軍六千五百人供役閏月丙申罷江南

進沙糖遼陽進雕豹止富民輸粟授官例乙巳詔虎符國

之信器驛券使臣所需凡西域賈人名求珍異請給者概

行追收丁未罷順德廣平鐵冶提舉司立汴梁之項城中

都之開寧縣敕河西僧戶準先朝定制從軍輸稅一與民

同甲寅故丞相哈刺合孫卒典章云敕民間厚葬有用金銀寶玉器玩者以不孝治罪十二月庚申封和郎撒為隴王降隆興為源州升蔚州為蔚昌府省河東宣慰司以大同路隸中都雷守司冀寧晉

元史卷八 本紀 九

寧二路直隸中書省甲戌賜御史臺及監察御史宴服命有司贖饑民所鬻子女召吳澄為國子監丞是歲月赤察爾進攻叛王子察巴爾諸部相率來降漠北平江浙饑振米五十三萬五千石鈔十五萬四千錠麪四萬斤又流民百三十三萬九百五十戶振米五十三萬六千石鈔十九萬七千錠鹽折直為引五千令行省行臺遣官臨視益都水民饑采草根以食免今歲差徭仍以本路稅課及發朱汪利津兩倉粟振之

二年己酉春正月辛卯皇太子諸王百官上帝尊號曰統天繼聖欽文英武大章孝皇帝越王圖刺有罪賜死己亥封牀兀爾為句容郡王乙巳追奪自大德六年至至大元年中降璽書不由中書直下翰林院頒給有干田土戶口

元史卷八 本紀

十

銓選獄訟害民妨政者凡六千三百餘道二月大赦癸亥罷行泉府院以市舶歸行省己巳太陰犯亢辛未犯氏壬申定各衛董屯田官三年一易三月己丑封諸王耶不干為襄寧王辛卯罷杭州白雲宗攝所立湖廣頭陀禪錄司以和林屯糧去秋收至十萬石賞其官吏軍士有差戊戌太陰犯氏己亥熒惑犯歲星夏四月辛酉立興聖宮江淮財賦總管府癸亥摘漢軍五千給田十萬頃於直沽沿海屯種立鎮守海口屯儲親軍都指揮司壬午創中都皇城角樓五月丁酉以陰陽家言權停各寺及亭苑鷹房工役甲辰敕自今乘輿北幸以丞相一人畱守京師著為令六月癸亥遣官督捕蝗或取騰雪煮馬骨放水冷浴諸種子亦不食禁諸賜田者馳驛徵租庚午選大都隸儒籍者四

十戶充文廟樂工甲戌以宿衛士多漢人南人投充避役濫請衣糧敕遵舊制止存蒙古色目之有閱閱者餘並革去乙亥宣政院奏免僧道耶里可溫答失蠻租稅帝曰田有租商有稅乃祖宗成法一體奏免非制依舊徵之秋七月癸未河決歸德封壬辰松潘疊宕威茂等處安撫司管內西番圖魯卜降胡漢民四種雜處遣官往蛇谷隴迷招降其八部得萬七千戶改設宣撫司治茂州徙松州軍鎮其地乙未復置龍南安遠二縣隸贛州己亥樂實請更鈔法圖新鈔式以進且與保八謀立尚書省帝命與乞台普濟塔思不花脫虎脫集議保八言政事得失皆前中書省臣所為今欲舉正彼懼有累孰願行者若立尚書省必使舊事從中書新政從尚書力薦乞台普濟脫虎脫等任

元史卷八 本紀

十一

其事塔思不花言此大事遽爾更張乞與老臣更議帝不從八月癸酉復立尚書省以乞台普濟為右丞相脫虎脫為左丞相三寶努樂實平章政事保八為右丞相忙哥鐵木爾為左丞王熊郝彬參知政事立皇太子右衛率府志作本紀開事今依詔修甘肅城城中多積金粟以給諸王軍馬復立瓜沙州屯田己卯三寶努言中書省尚有逋欠錢糧應追理者宜存斷事官十人餘皆并入尚書省其尚書省所用官六十四員中有品秩未相當或從未歷仕者乞弗拘例帝皆從之且敕天下敢有阻撓尚書省事者罪勿追九月庚辰朔頒尚書省條畫於天下曰三載攷績三攷黜陟幽明此古者責成悠久之道今路州司縣親民正官定以九年為滿歲攷治功以示黜陟有撫字盡心百姓安阜

鈔法流通政事卓越者不次旌擢其不盡職而有私犯者懲以重罪至風教所行有關人心世道令所司表率敦勸以復淳古如有子證父奴計主及妻妾弟姪干犯名義者一切究治其學校之設所以明人倫養賢才爲政之要莫先於此諸正官當躬親勉勵各得其才以備選舉凡在學儒生課講不輟者與免雜泛差役官府大小公事已立有限程民間詞訟尤當用心平允比來往往背公徇私變亂是非遲留不決以致民怨莫伸今後各務依理處斷毋得淹延歲月官僚執見不同者許各出所見申聞上司詳勘違者監察御史廉訪使糾治改各行中書省爲行尙書省頒行至大銀鈔詔曰昔我世祖既登大寶始造中統交鈔以便民用歲久法墮亦既更張印造至元寶鈔逮今又復

元史卷八

本紀

十一

二十三年物重鈔輕不能無改迺循舊典改造至大銀鈔頒行天下至大銀鈔一兩準至元鈔五貫白銀一兩黃金一錢隨路立平準行用庫買賣金銀倒換昏鈔或民間絲絲布帛赴庫回易驗時估給價諸路府州縣設立常平倉以權物價豐年廣收粟麥米穀值青黃不接之時減價出糶以遏沸涌金銀私相買賣及海舶興販金銀銅錢絲絲布帛下海者並禁之中統交鈔詔書到日限一百日內盡數赴庫倒換茶鹽酒醋商稅諸色課程如收至大銀鈔以一當五頒行至大銀鈔自二兩至一釐定爲一十三等以便民用壬午江南行臺劾平章教化詭言家貧冒受賜物折鈔二萬錠且其人素無一善可稱命奪魏國公爵癸未從尙書省言省部諸務皆聽便宜處置大事或須上請得

旨卽行累朝格例前後不一吏得輕重任情自太祖以來所頒政令九千餘條刪去繁冗編爲定制癸巳以大都城南建佛寺立行工部令丞相脫虎脫兼領以冀寧大同保定眞定當五台山建寺所須直取於民免今年田租己亥罷中統鈔以至大銀鈔爲母至元鈔爲子仍撥至元鈔本百萬錠以給國用初行錢法立資國院於大都泉貨監於諸省以領之設提舉司十九於產銅之地鑄錢命以歷代銅錢與至大錢相參通用從尙書省言三宮內降之旨仍舊準行尙於大事有害則令復奏中書政務盡歸尙書省聽其任人惟宣敕散官仍委中書海外占八國來貢白面象伽藍木遣使分往不憐八孫八昔占八諸國甲辰立度支院掌芻粟奪江南賜田千二百三十頃得租五十萬石

元史卷八

本紀

十二

充官用禁貴戚家養豹冬十月庚戌朔大赦詔曰朕自臨御以來下詔萬方其所以撫安元元者亦已至矣而前歲江浙饑疫今年蝗旱相仍民或盡死幸生者流離道路雖嘗遣使分道振濟恐未能徧夫既罹是天刑輕觸憲網者必眾有司概以重法繩之朕實憫焉其自十月日昧爽以前中外罪囚大辟以下已未發覺並從釋免流民轉徙無常有司加意存恤遺骸暴露者官爲收瘞親民官不得取借部下錢債違者計贓論罪命皇太子兼尙書令丙辰從樂實言質江南富民子爲軍有歲收糧五萬石以上者每石輸二升於官半備凶年半養衛士辛酉弛酒禁立酒課提舉司癸亥以布里身敦爲御史大夫乙丑皇太后有疾釋天下重囚壬申太陰犯左執法加知樞密院事圖忽魯

左丞相丁丑命阿散為尚書左丞相伯都平章政事忽都
不丁為右丞鐵里脫歡賈鈞竝中書參知政事戊寅御史
臺言常平倉本以益民然歲比不登立之必反害民至大
銀鈔初行品目繁碎民猶未曉又兼行銅錢慮有相妨民
閒拘銅器甚急弗便又歲凶乏食不宐遽弛酒禁不報發
御史臺贓鈔萬錠振山東饑改昔寶赤八刺合孫總管府
為奉時院十一月庚辰朔以散朮帶為平章政事商議樞
密院事己亥太陰犯右執法庚子犯上相發至大鈔二千
錠於江浙河南江西湖廣和羅得糧百萬石丙午諸王孛
蘭奚以私怨殺人當死帝曰國族也杖之流北鄙從軍丁
未擇衛上子弟充國子學生十二月乙卯帝親饗太廟加
上太祖聖武皇帝尊諡曰法天啟運光獻皇后曰冀聖

元史卷八 本紀 五

睿宗景襄皇帝曰仁聖莊聖皇后曰顯懿執事
者人升散階一等賜太廟禮樂戶鈔帛有差武昌婦劉氏
訴三寶努奪其所進亡宋玉璽夜光珠下省臺雜問得喬
瑜誣捏狀命斬喬瑜杖劉氏庚申太陰犯參壬戌陽曲縣
地震定內外官三品以上者許請諡若勳戚大臣特旨賜
諡者不在此例

三年庚戌春正月癸未汰中書省官吏自客省使而下一
百八十一員聽尚書省遷敘通攷作三百員乙酉徵李孟入見謂
宰臣曰此皇祖妣命為朕賓師者特授平章政事同知樞
密院事丁亥白虹貫日己丑以紐鄰參議尚書省事辛卯
立皇后弘吉刺氏遣脫虎脫攝太尉持節授玉冊玉寶癸
巳立中瑞司掌皇后寶司禮監管巫覡甲午太陰犯右執

法乙未制諸色課程自大德十一年較定舊額新增總為
正額折至元鈔作數以至大三年為始恢辦餘止以十分
為率增及三分以上為下酬五分以上為中酬七分以上
為上酬九分者為取不及三分者為殿稅課官萬錠之上
設正同副提舉各一員千錠之上設提領大使副使各二
員五百錠以上半之百錠以上不設提領丙申復立廣平
順德路鐵冶都提舉司湖廣乖西帶蠻阿馬等入寇乙巳
省樞密院官存知樞密院七員同知院事二員副使二員
僉事二員同僉院事一員增御史大夫中丞侍御史治書
侍御史各二員省通政院官六員止存十二員二月辛亥
癸惑犯月星己未浚會通河增大都警巡院分治四隅壬
戌太陰犯左執法丁卯從尚書省言以至元鈔輸萬億庫

元史卷八 本紀 五

銷毀其板止以至大鈔與錢相權通行壬申以樂實為尚
書左丞相駙馬都尉封齊國公乙亥太白犯月星三月己
卯朔定收支數目各以零就整至元鈔以釐為止至大銀
鈔以毫為止斛以合為止權以分為止度以寸為止其絲
忽微塵秒撮圭粒等數竝行削去以省繁文庚寅太陰犯
氏壬辰立興聖宮章慶司以江浙財賦府及瑞州營民司
竝隸焉丙申太陰犯南斗丁未太白犯井夏四月己丑四
川容米洞官田墨糾眾為亂遣永順安撫使梓材往招之
戊辰太白晝見改大承華普慶寺總管府為崇祥監丙子
增國子生為三百員封諸王完者為衛王六月丁未朔以
幹赤為中書左丞忽都不丁為右丞己酉立上都中都及
雲州銀冶提舉司庚戌立規運都總管領大崇恩福元寺

錢糧乙卯太陰犯氏丁巳諭脫虎脫三寶努總治百司庶務竝從尙書省奏行壬申遣使諸道慮囚秋七月戊寅太白犯右執法己卯犯上相封皇伯晉王長女寶荅失憐爲韓國長公主庚寅給親民長吏攷功印歷令監治官歲終驗其政績書而上之廉訪司御史臺尙書禮部攷校以定黜陟己亥禁權要商販挾聖旨懿旨令旨阻礙官河民船八月丁未以忽刺出釐日竝爲御史大夫甲寅白虹貫日九月己卯平伐蠻酋不老丁遣使來降卽其地立安撫司辛巳太陰犯建星辛卯犯天廩壬辰司徒劉夔乘驛至江南省親二年不歸詔削籍庚子帝諭尙書省曰去歲中書省奏請司官遵大德十年定制濫者汰之今員冗如故有不以聞而徑之任者有不奏而擅令之任者竝逮捕之朕

元史卷八 本紀

夫

不輕釋冬十月甲辰朔太白經天丙午太白犯左執法定今歲冬至祀圜丘尊太祖配來歲夏至祀方丘尊世祖配朝日夕月於春秋二仲舉行其太廟祠祭故用瓦尊者以銀代之戊申帝朝興聖宮上皇太后尊號曰儀天興聖慈仁昭懿壽元皇太后癸丑熒惑犯亢甲寅諭中外民戶託名諸王妃主規避徭役者俾充驛卒及築城夫郡縣官失察者罷職丁巳詔減宮人膳尙書省言宣徽院廩給日增儲待不給帝曰比見後宮飲饌與朕無異有是理邪其令宣徽使覈實減之辛酉以皇太后受尊號赦天下大都上都中都較他郡供給煩擾與免至大三年秋稅其餘至大二年以前民欠錢糧悉從蠲免內外不急之役截日停罷民間雜差先儘游食之徒次從工賈末技其力田之家勿

奪農時官民田土各有所屬諸人勿得陳獻民官公罪許罰贖杖徒以下竝原宥從三寶努言省部官自今晨集暮退怠者不俟奏聞便宥加罪其到任一二月卽辭病者杖罷不敘發鈔二百錠規運取息以供尙書省膳丁卯封諸王水八刺子買住韓爲克王雲南省丞相鐵木迭爾擅離職赴都有旨詰問以皇太后故貸免令復職以丞相帖古迭爾爲陝西行臺御史大夫十一月甲戌朔太白犯亢辛巳封三寶努楚國公加脫虎脫太師錄軍國重事封義國公壬午改大崇恩福元寺規運總管府爲隆禧院丁亥太陰犯畢戊子以益都寧海諸處連歲饑罷鷹房圍獵容米洞田墨來降授黃沙寨千戶城中都丙申有事於南郊以太祖皇帝配享昊天上帝五方帝日月星辰從祀己亥尙

元史卷八 本紀

七

書省以武衛都指揮使鄭阿爾思蘭段叔仁等圖不軌竝棄市十二月甲辰朔立崇輝署隸宣政院戊申冀寧路地震是歲襄陽陝州大水山崩壞官廨民居二萬一千八百閒死者三千四百餘人計口振糧兩月死者給以楮四年辛亥春正月癸酉朔帝不豫大赦庚辰崩於玉德殿壽三十一壬午葬起輦谷夏五月上尊諡曰仁惠宣孝皇帝廟號武宗蒙古語曰曲律皇帝閏七月丙午祔於太廟論曰武宗始以懷寧王總兵漠北和林與叛王海都勁敵對壘屢摧其鋒中間幾瀕險危披堅陷陣威振遐荒可謂天潢之傑出天授之雄武矣入紹大統謂有宏圖而始終誤聽宵人以立尙書省爲營利之府何哉夫世祖立制以天下大政歸於中書省任相任賢責無旁貸故小人欲變

法忌中書不便於己則必別立尙書省以奪其權阿合馬
桑葛之徒相繼亂政毒流海內是以世祖深戒前轍不復
再蹈乃當席豐履厚之餘慨然欲變更至元大德之舊封
爵太盛而遙授之官多錫賚太侈而濫賞之厄漏母后市
恩左右撓其恭儉於是言利之臣迎合攘袂以爭利權雖
柄操自上不至如阿合馬桑葛之甚而仁心仁聞漸蔽於
功利幾同宋之熙豐故仁宗紹統翻然誅殛盡復舊章蓋
變法不得其人則不如勿藥之尙得中醫也又攷陶九儀
元氏掖庭記則瓊島水嬉之華月殿霓裳之豔亦自帝大
濫其觴而本紀諱之不載一字亦英雄酒色之通病歟惟
於授受之際堅守金匱傳弟之盟雖有內侍李邦寧慫恿
離開帝言朕志已定汝自往東宮言之斯則磊落光明勝

元史卷八

本紀

太

宋太宗萬萬綜計始末固不失爲一代之英主焉

元史卷八終

元史卷九

本紀七

仁宗

仁宗皇帝諱愛育黎拔力八達武宗母弟也至元二十二
年三月丙子生於儒州是夜太史奏文昌明文運將興大德九年冬十月
成宗有疾中宮秉政命帝同母元妃出居懷州所過供帳
華侈悉令撤去飭扈從毋擾民民大感悅十一年春正月
成宗崩時武宗爲懷寧王總兵北邊左丞相阿忽台等潛
謀推成后伯岳吾氏稱制且欲立安西王阿難荅議未決
右丞相哈剌合孫知其謀恐內難作急遣使迎帝帝從李
孟言卽日奉母元妃發懷州至衛輝抵漳河值大風雪田
叟有以孟粥進者近侍卻不受帝曰昔漢光武爲寇兵所
逼嘗食豆粥麥飯大丈夫不歷辛苦庸知稼穡艱難卽取

元史卷九

本紀

一

食之賜叟帛行次邯鄲諭守令曰吾慮衛士不法胥吏科
斂爲民困命王傅沿途巡察二月辛亥至大都與母元妃
入哭盡哀仍出居舊邸朝夕入奠時哈剌合孫稱疾守宮
門夜遣人啟曰懷寧王遠不能猝至恐變生不測當先事
而發三月丙寅帝率衛士入內陽召阿難荅計事至則執
之且責阿忽台等變亂祖宗家法鞫問辭伏及其黨八都
馬辛巴顏等皆伏誅諸王闊闊出身忽都進曰今罪人斯
得太子寶世祖之孫宜早正天位帝曰王何出此言彼惡
人潛結宮壺構亂邦家故誅之以彰國法豈欲觀望神器
邪懷寧王吾兄也正位爲宜乃遣使迎武宗於北邊五月
乙丑帝與母元妃會武宗於上都甲申武宗卽位尊元妃
爲皇太后六月癸巳朔立帝爲皇太子以安西平江吉州

三路爲分地約以次傳己子先是帝在懷州深見吏做欲痛剷除之及建爲太子雅重儒學遣使旁搜經籍裝演成帙識以玉刻印章時有進大學衍義者命詹事王約等節而譯之帝曰治天下此一書足矣命與圖象孝經列女傳並刊行以賜臣下至大二年立尙書省詔太子兼尙書令詹事院啟金州獻瑟瑟洞請遣使采之帝曰所寶惟賢瑟瑟何用焉若此者後勿復聞通攷作皇元年事有近待言賈人售美珠者帝曰吾服御不喜飾珠璣以生民膏血不可輕耗也汝等當以恭儉愛人相規詎可以奢靡蠹財相導言者慚而退淮東宣慰使撒都獻玉觀音七寶帽頂及寶帶卻之戒諭如初四年春正月庚辰武宗崩帝入臨壬午卽罷尙書省以丞相脫虎脫樂實平章三寶努右丞保八參政

元史卷九

本紀

二

王罷等變亂舊章流毒百姓命右丞相塔思不花知樞密院事鐵木爾不花等參鞠並棄市其黨孛羅鐵木爾闊里吉思烏馬爾忙哥帖木爾等杖流海南戊子罷城中都以司徒蕭珍督城工害民奪其符印還中都所占民田召世祖朝諸老臣平章程鵬飛董士選少傅李謙少保張閻通攷今從右丞陳天祥尙文劉正左丞郝天挺中丞董士珍太子賓客蕭剌參政劉敏中王思廉韓從益侍御趙君信廉訪使程鉅夫乘傳詣闕同議庶政乙未禁百官役軍人造作及守護私第丁酉召鐵木迭爾爲右丞相完澤李孟並平章政事敕中書凡傳旨非親奉者勿行戊戌以塔思不花爲御史大夫諭曰凡大臣不法卿等劾奏毋避己亥改行尙書省爲行中書省庚子停各處營繕罷廣武康里

衛萬戶等官辛丑以塔失鐵木爾知樞密院事壬寅禁房馳逐擾民帝以穀不熟民困曰朕不飛放二月定諸職子孫承蔭試一經一史能通大義者免當保直不通者發還習學蒙古色目人願試者聽仍於應得品級量進一階致仕官有子承蔭者準不次銓注俾得祿養其親乙巳改延慶司爲都功德司罷運江南所印佛經禁宣政院違制度僧戊申命和林江浙行省依前設左丞相餘省惟置平章二員盡罷遙授職事辛亥禁諸王駙馬權豪擅據山場聽民樵采左遷康里托托爲江浙左丞相甲子太陰犯填星命李孟領國子監學諭曰學校人材所自出卿宜數詣國學課試諸生勉其德業以白雲宗總攝所統江南爲僧之有髮者不養父母避役損民勒還原籍罷各處僧官凡

元史卷九

本紀

三

僧人訴訟悉歸有司省福建繡匠河南漁課兩提舉司及江南行通政行宣政二院丁卯敕西僧非奉璽書驛券及無西番宣慰司文牒者勿輒至京師戒黃河津吏驗問禁止復改仁虞院爲鷹房總管府庚午定廣西靜江融州軍民官三載無過者民官減一資軍官升一階著爲令三月庚辰召前樞密副使吳元珪左丞烏伯都刺至京師同諸老臣議事丙戌太陰犯太微東垣上相罷五臺行工部庚寅帝卽位於大明殿詔曰惟昔先帝事皇太后撫朕眇躬孝友天至由朕得託順考遺體重以母弟之嫡加有削平內難之功踐阼曾未踰月授以皇太子寶領中書令樞密院事百揆幾務聽朕裁決於今五年先帝奄棄天下勳戚元老咸謂大寶之承既有成命非與前聖賓天而始徵集

宗親議所宜立者比當稽周漢晉唐故事即正宸極朕以國恤方新誠有未忍是用經時今則上奉皇太后勉進之命下徇諸王勸戴之勤於三月日即皇帝位凡尚書省誤國之臣先已伏誅同惡之徒亦皆放殛百司庶政悉歸中書從新拯治可大赦天下凡路府州縣名山大川聖帝明王忠臣烈士載在祀典者有司開具事蹟次第加封開國以來効節功臣所封食邑有司立祠致祭諸衙門及近侍人員毋隔越中書奏事諸上書陳言者量加旌擢風聞不許入告內外百司有清慎公勤政績昭著五事備具者聽監御史廉訪使察舉其廢公營私貪污敗檢諸人陳告得實依律斷罪枉法贓滿者應投宣救概行追奪吏人犯贓終身不敘誣告者抵罪禁獻地土山場窰冶及中寶之

元史卷九 本紀

四

人以絕僥倖商稅課程有定制尚書并增為額又立增酬殿年之令苟非朕剝吾民彼將焉取今後恢辦一遵舊制於戲凡我有官君子皆古所謂治天職食天祿者宜一心力欽乃攸司毋替朕命辛卯禁民間製銷金織金及成造金箔丁酉命月赤察爾依前太師加鐵哥太傅曲出太保敕至大中百司改升品級悉復至元舊制己亥寧夏地震帝諭省臣曰卿等哀集中統至元以來條章擇曉法律老臣斟酌重輕折衷歸一頒行天下俾有司有所遵守則抵罪者庶無冤抑又諭大府監曰財用足則可以養萬民給軍旅自今一緇之微不言於朕毋輒與人以烏伯都刺為右承李士英為左承察罕參知政事牀兀爾脫火赤鐵木爾不花耶速耶先鐵木爾月魯鐵木爾並知樞密院事

封鐵木爾不花為宣靈王賜大都高年帛遣宦者李邦寧釋奠於孔子初就位大風起殿上燭盡滅燭臺底鐵鑄拔地尺許夏四月壬寅定四宿衛士歲賜鈔二十四萬二百五錠汰漢人高麗南人冒入者各還元籍丁未以張問為江浙平章戒之曰以汝先朝舊人故命汝往民為邦本無民何以為國汝其上體朕心下愛斯民癸丑定路府州縣官俱三年為滿甲寅太陰犯亢熒惑犯壘壁陳丁巳罷中政院辛酉敕國子監師儒之職果才而賢勿限資格雖布衣亦用癸亥罷中都留守司復置隆興路總管府丁卯罷至大錢鈔詔曰我世祖皇帝參酌古今立中統至元鈔法天下流行公私蒙利五十年於茲矣比者尚書省不究利病輒意變更既期至大銀鈔又鑄大元至大銅錢鈔以倍

元史卷九 本紀

五

數太多輕重失宜錢以鼓鑄弗給新舊恣用曾未再期其敝滋甚爰咨廷議允協輿言皆願變通以復舊制其罷資國院及各處泉貨監提舉司成造銅器聽民自便尚書省已發鈔本及至大銅錢截日封貯民間行使者準赴行用庫倒換命中書省振濟甘肅過川軍廢僧道耶里可溫答失蠻頭陀諸司罷通政院以所掌站赤歸兵部帝御便殿李孟進曰陛下御極物價頓減方知聖人神化之速帝蹙然曰卿能盡力贊襄使兆民苟安庶幾天心克享至於秋成尚未敢必今朕踐祚曾未踰月寧有物價頓減之理朕託卿甚重茲言非所賴也孟愧謝五月壬申以宦者鐵昔里為利用監卿封乳母夫楊德榮雲國公丙子敕修武宗寶錄及累朝皇后功臣傳俾百司悉上事蹟庚辰故長信

院爲寺置祥和署掌伶人癸未太陰犯氏戊子羅鬼蠻來獻方物六月癸卯敕宣政院凡西番軍務必移文樞密院同議乙巳命侍臣咨訪內外才堪佐國者悉以名聞丙午授內侍楊光祖譚振宗關居仁竝宏文館學士定翰林國史院官承旨五員學士侍讀侍講直學士各二員丁未太陰犯太微東垣上相庚戌犯氏大同路民家產犢類麒麟車載以獻左右皆以爲瑞帝曰五穀豐熟百姓安業乃爲瑞也卻之敕諸司白事令殿中侍御史侍側丙寅拘收泉府司元給諸商符命己巳衛王阿木哥入見帝諭省臣曰朕與阿木哥同父而異母朕不撫育彼將誰賴其賜鈔二萬錠他勿援例帝覽貞觀政要諭侍臣曰此書有益於國家其翻譯刊行俾蒙古人誦習之秋七月辛未朔甘州地震癸巳太陰掩畢丁酉犯鬼距星己亥置經正監掌蒙古軍牧地帝諭省臣曰朕前戒近侍毋輒以文記傳旨中書今敢有犯者不待奏聞直執付法曹究治詔御史臺選老成更事者爲監察御史閏月辛丑命祭酒劉廣詣曲阜以太牢祀孔子甲辰立隆鎮衛於居庸關己酉吐蕃寇禮店文州己未增國子生額爲三百人并增陪堂生二十人通一經者以次補伴讀定軍官年七十致仕子弟年二十以上聽承襲有託疾引年令幼弱子弟襲職者除名不敘丙寅太陰犯軒轅黑水白水等蠻十二萬戶來降復立通政院於上都領蒙古諸驛禁醫人非選試者毋輒行醫藥九月己亥朔禁民彈射飛鳥殺馬牛羊當乳者庚戌命樞密院大閱各省軍馬壬子改元詔曰朕賴天地祖宗之靈纂

元史卷九 本紀

六

承聖緒永惟治古之隆羣生咸遂國以乂寧朕夙興夜寐不敢怠遑任賢使能興滯補闕庶其臻茲斂時五福用敷錫厥庶民朕之志也踰年改元厥有常典其以至大五年爲皇慶元年故茲詔示癸丑月食乙卯太陰犯畢遣都水監往杭州取所造龍船省臣諫止之冬十月戊辰朔繪武宗御容奉安大崇恩福元寺月四上祭辛卯罷諸王斷事官置羣牧監掌興聖宮畜牧尙牧所掌太官羊立汴梁平民田賦提舉司掌大承華普慶寺貲產丙申太白犯壘壁陳十一月戊戌成立乖西府隸播州以土官阿馬知府事辛亥以諸王結黨誣入不沙爲不軌詔竄卜里牙敦於河南因忽乃於揚州納里於湖廣太那於江西班出兀那於雲南甲寅太陰犯輿鬼己未以合散綱目作阿散平章政事張珪

元史卷九 本紀

七

爲樞密副使十二月癸酉封宣政會福院使暗普爲秦國公庚辰太白經天甲申太陰犯太微西垣上將詔今歲不登春蒐勿令民供億遣官監視焚至大鈔乙未中書省言祖宗立選法憑黜陟以示激勸今官未及攷或無故更代或躡等進階僭授國公丞相等職諸司已裁而權置者有之今春以來內降旨除官者千餘人其中欺僞豈能悉知壞亂選法莫此爲甚帝曰自今凡內降旨一切勿行是歲增京師米四十所日平糶糧八百石浙西水免漕糧四之一令江西湖廣補運京師

皇慶元年壬子春正月庚戌封駙馬丑漢爲安遠王出總北軍癸丑太陰犯太微東垣上相改封濟王多列納爲吳壬子戌進翰林國史院秩從一品帝曰翰林集賢儒臣朕

白選用省臣毋得擬奏人言御史臺任重朕謂國史院尤重御史臺是一時公論國史院實萬世公論當選中外方正博洽之士居之二月丁卯朔徙大都路學周宣王石鼓於國子監辛未改安西為奉元路吉州為吉安路和林為和寧路隆興為興和路以和林行省為嶺北行省壬午太陰犯亢三月丁酉朔熒惑犯東井罷諸王大臣私第營繕己亥制以生日為天壽節壬寅太陰犯東井丁未起塔失海牙為御史大夫置內正司及五臺寺濟民局庚申汰控鶴軍還本籍甲子封諸王塔思不花為恩平王夏四月丙子太白晝見壬午熒惑犯輿鬼癸未犯積尸氣封知樞密院木剌忽為廣平王敕僧人田除世祖所賜者餘悉輸租庚寅太白經天大崇恩福元寺成置隆禧院五月丙申朔

元史卷九 本紀

八

以合散為左丞相張閭察罕並平章政事壬寅禁諸王農時出獵丁未建涼殿於縉山縣行宮六月乙丑朔日食丁卯天雨毛己巳太陰犯天關丁亥詔罷封贈之典時禮部贈等第以非世祖所行故罷之秋七月丙午升大司農司秩從一品帝曰農桑衣食之本汝等舉諳知農事者用之戊午太陰犯東井九月丁卯以阿卜許師敬同參知政事戊辰太白犯軒轅辛未太陰犯填星壬午辰星犯右執法置少府監隸大都留守司乙酉太白犯右執法敕左右勿僥倖乞加官九月丁巳太陰犯亢冬十月雲南右丞算只爾威有罪國師請釋之帝曰僧人宜誦佛書官事豈當與邪斥弗聽敕回回合的仍舊祈福其訴訟歸有司丁亥太陰犯平道戊子犯亢順宗成宗武宗實錄成十一月己亥太陰犯壘壁陳

丙辰封駙馬脫脫木爾為岐王雲南不農蠻渠長岑福來朝十二月癸亥平章李孟致仕以張珪代之甲子熒惑填星辰星聚於斗甲申鷹房總管請往河南湖廣括取珍禽帝以擾民不許戊子太陰犯熒惑遣官祈雪己丑宗王女班丹乘傳取江南田租命拘還驛券是月諸王春丹叛二年癸丑春正月甲午命圖忽魯魯為右丞相伯忽魯為御史大夫封乞台普濟為安吉王戊申太陰犯三公己未置遼陽甘肅四川雲南儒學提舉司二月壬戌改典內院為中政院丁丑日赤如赭免徵益都饑民所貸官糧二十萬石以各寺修佛事日用羊萬頭敕遵制易以蔬食辛巳詔錢糧造作訴訟等事悉歸所司以清中書之務丁亥回回以寶玉鬻於官帝曰朕思此物何足為寶惟善人為寶善人

元史卷九 本紀

九

用則百姓安誠國家所宜寶也三月庚子熒惑犯壘壁陳丙午立皇后弘吉刺氏丁未有星孛於東井自去秋至今不雨大都隕霜雨沙丞相圖忽魯以災變引咎帝曰事豈關汝其勿復言丙辰帝以亢旱遣官分祀諸神仍於宮中焚香默禱甘雨大注夏四月壬午置中瑞司甲申詔選賢士修國史乙酉御史臺言富人貧緣特旨濫授官爵徵政宣徵用人多罪廢之流內侍託為貧乏互奏恩賞西僧作佛事累釋重囚外任官身犯刑章輒營內旨免罪諸王駙馬寺觀土田每歲徵租民間擾害尤甚帝命悉革其敝五月辛丑以烏伯都剌平章政事八剌脫因為右丞阿卜為左丞圖魯花鐵木爾參知政事六月己未朔京師地震丙寅復震命許思敬綱領國子學以監察御史檢察監學官

攷其殿取已卯定邊方遷調官優加一等復起李孟爲翰林學士承旨甲申建崇文閣於國子監以宋儒周敦頤程顥程頤張載邵雍司馬光朱熹張栻呂祖謙及許衡從祀孔子廟庭河決陳亳等州秋七月己丑朔歲星犯東井辛卯太白晝見癸巳以作佛事釋囚徒二十九人甲午置權茶批驗所并茶由局官乙未太白晝見庚子立長秋寺掌武宗皇后宮政壬寅京師地震丙辰太白晝見丁巳太白經天改淮西三路隸河南省八月戊午朔太白晝見崇明州海溢壬戌歲星犯東井庚午以薛居敬參知政事壬午太陰犯輿鬼九月癸巳以完澤知樞密院事封御史大夫脫歡爲安定王戊申建銀山寺於鎮江勿徒寺旁塋冢京師大旱疫帝問弭災之道翰林學士程鉅夫舉湯禱桑林

元史卷九

本紀

十

事以對帝曰此實朕之責也赤子何罪冬十月己卯封布塔蔑里爲安德王癸未復置蒙陰縣隸莒州十一月甲辰始行科舉詔以皇慶三年八月天下郡縣興其賢者能者充貢有司次年二月會試京師中選者將親策於廷十二月辛酉西域人可里馬丁上所編萬年麻海都篤哇屬戶內附敕所在給衣糧是歲保定眞定河間民流亡不止命有司給糧兩月仍免今歲田租

延祐元年甲寅春正月丁亥以劉正平章政事商議中書省事高昉參知政事庚子敕各省平章專意訪求遺逸苟得其人先以名聞而後致之丁未改元延祐赦天下二月戊辰免上都大都差稅二年癸酉熒惑犯東井甲戌以趙世延參知政事綱領國子學壬午圖忽魯罷合散進右丞

相監修國史高昉改集賢學士三月壬辰太陰掩熒惑己亥白暈互天連環貫日暹國遣使入貢癸卯改南劍路曰延平劍浦縣曰南平丙午封阿魯圖爲趙王禁奸民宮其子爲闈宦謀避徭役癸丑晉寧民侯氏昆弟五人竝坐法當死帝嘆曰彼一家不幸而有是事其擇情輕者一人杖之俾養父母毋絕其祀閏月辛酉太陰犯輿鬼罷呪僧月給俸遣人視大都至上都駐蹕之地有侵民田者計畝給直丙寅太陰犯太微東垣上相省滇陽含光二縣入英德州夏四月甲申朔大寧地震太常官請立北郊帝謙讓未遑遂輟丁酉命鐵木迭爾錄軍國重事監修國史復立回回國子監帝以資治通鑑載前代興亡治亂命集賢院擇其切要者譯寫以進五月戊午辰星犯輿鬼丁卯禁諸

元史卷九

本紀

十一

王支屬擅取分地租賦敕嶺北行省瘞陳歿遺骸六月戊子敕宦者勿得昇文階封卜憐吉台爲河南王發軍增墾河南芍陂屯田乙未熒惑犯右執法秋九月己巳命鐵木迭爾爲右丞相合散仍左丞相罷陝西諸道行御史臺冬十月乙未定吏人轉官以從七品爲止在選者降等注授坐贓者黥其面弛下番市舶禁令江浙省給牒以往歸則征稅如制丙申括淮民所佃閑田置沙瓜二州屯儲萬戶府庚戌辰星犯東咸敕軍官應襲者試以武事而後任十一月乙卯置保安軍於麻陽縣以禦猺蠻戊辰以蕭拜住爲中書右丞圖忽魯答失蠻竝知樞密院事命樞密院教練士卒官吏服闋者先補遣平章張閻經理江浙江西河南民田限四十日以所有田自實於官徹民舍發冢墓虛

張頌欽樞密副使吳元珪入見極言其敝帝命仍遵舊制十二月壬午禁諸王權勢之人增價鬻鹽壬辰定官民車服等第惟蒙古及怯薛諸色人不禁亦不許服龍鳳文甲午太陰犯輿鬼庚子浚揚州淮安運河復起李孟平章政事以齊履謙為國子司業癸卯太陰犯房甲辰犯天江是歲地震冀寧汴梁及武安涉縣壞官民廬舍死者三百四十人發廩糶振如例

二年乙卯春正月乙卯歲星犯輿鬼己未太白晝見癸亥太陰犯軒轅丁卯犯進賢霖雨壞渾河堤沒民田發卒補之禁民鍊鐵乙亥遣使巡行天下分十二道問民疾苦黜陟官吏二月己卯朔會試進士以中選舉人分二榜揭於省門之左右戊子太白晝見癸巳太白經天庚子洞蠻吳

元史卷九 本紀

十一

于道寇辰沅丙午太白經天三月乙卯廷試進士蒙古色目人為右榜漢人南人為左榜賜護都沓爾張起巖等五十六人及第出身有差自是每三歲一試用趙孟頫元明善議貢試之法凡蒙古山科舉出身者授從六品色目漢人遊降一級歲貢八人上四人充部令史下四人為各路教授丙辰太陰色赤如赭庚午加上皇太后尊號曰全德泰寧福慶皇太后夏四月戊寅朔日食辛巳賜進士恩榮宴於翰林院庚子太陰犯壘壁陳辛丑賜下第舉人年七十以上者從七品流官致仕六十以上者為府州教授餘並山長學正後勿為例定諸王功臣分地以流官為達魯花赤各位所辟為副達魯花赤乙巳立規運提點所及廣貯庫並隸壽福院五月戊申朔復立陝西行御史臺辛酉太陰犯天江乙丑秦州成紀縣北山南移至夕河川明日再移平地

突出土阜高者二三丈陷沒民居遣官驗視振恤庚子太白晝見加宦者續元暉昭文館大學士乙亥日赤如赭六月甲申太白晝見太陰犯平道河決鄭州辛丑以濟寧益都旱減宿衛士芻粟癸卯太白犯東井丙午辰星犯輿鬼秋七月甲寅升陳州商水鎮為南頓縣改只哈赤八刺哈孫總管府為尚供府乙卯給阿速戶貧乏者農具於連怯烈地屯田八月丙戌贛州蔡五九作亂陷江州寧化縣以趙世延為御史中丞命省臣自平章以下送之入臺庚子升遼陽之秦州為秦寧路增國子生百員歲貢伴讀四員立積分法月試上等者為一分中等準半分積至八分者充高等歲終試貢壬寅詔江浙行省印農桑輯要萬部頒降有司九月丁未張閻以括田逼死民人下吏部鞫問詔

元史卷九 本紀

十二

免江浙江南河南白實田租二年減汴梁路虛增糧二十二萬石己酉太陰犯房辛酉太白犯左執法蔡五九眾潰伏誅冬十月丙子朔客星見太微垣丁丑封脫火赤為威寧郡王以郭貫參知政事鐵木爾脫知樞密院事乙未授白雲宗主沈明仁榮祿大夫佩司空印加鐵木迭爾太師十一月丙午客星變為彗犯紫微垣歷軫至壁十五宿明年二月庚寅乃滅辛未以星變赦天下甲戌封武宗子世球為周王即明宗出鎮雲南丞相合散等以星變乞罷帝曰此朕之愆豈卿等所致其復乃職苟政有過差勿憚於改凡可以安百姓者當悉言之庶上下交修天變可弭也是歲江南湖廣道奉使溫迪罕言廉訪司公田多取民租詔復舊制時公田為民害而荆湖尤甚部內實無田隨民所輸租取之戶無大小皆出公田租雖遇水旱

不克故
以為言

三年丙辰春三月辛亥加將作院使呂天麟大司徒改直
沽為海津鎮甲寅命蕭拜住護送和世球之雲南置周王
常侍府官屬壬申禁各省春時畋獵夏四月癸酉朔立殊
祥院升印經提舉司為廣福監救衛輝昌平守臣修殷比
干唐狄仁傑祠庚子以買閭慈刺合爾並知樞密院事趙
孟頫為翰林學士承旨五月庚申以伯鐵木爾蕭拜住同
平章政事阿卜轉右丞郭貫為左丞不花乞塔並參知政
事庚午置遼陽金銀鐵冶提舉司六月乙亥封孟軻父為
郝國公母為郝國宣獻夫人丙子融賓柳州猺蠻叛丁丑
敕大辟臨刑敢有橫加割割者以重罪論凡鞫囚非強盜
毋加酷刑河決汴梁秋七月乙卯封玉龍鐵木爾保恩王

元史卷九 本紀

五

丙寅以燕鐵木爾知樞密院事郭貫為集賢大學士王毅
為中書左丞置織佛像工匠提調所九月庚戌升縉山縣
為龍慶州以帝生是縣故改癸丑太白晝見己未冀寧晉寧路地
震丙寅太白經天冬十月辛未復以高昉參知政事壬申
調四川雲南軍五千人於烏蒙屯田壬午河南路地震甲
申太白犯斗庚寅敕五臺靈鷲寺置鐵冶提舉司丁酉禁
民有父在者不得私貸人錢十一月壬寅遣御史監治嶺
北省鈎校錢糧半年更代乙卯改澧州路為安定軍民府
周王和世球行至延安其臣脫忽魯及武宗舊臣教化等
謀結陝西丞相阿思罕發關中兵將分道入犯平章塔察
爾襲殺阿思罕教化等事敗和世球逃居漠北十二月丁
亥立皇子碩德八剌為皇太子兼中書令樞密院使以牀

兀爾知樞密院事是歲集禧院使塔失不花集前代嘉言
善行名承華事略并繪幽風圖以進帝命置東宮俾皇太
子觀省

四年丁巳春正月詔大赦天下庚子帝謂省臣曰中書比
奏百姓乏食宜加振恤朕思民饑若此豈政有過差以致
然與婦詔百司務遵世祖成憲爾等宜勉力奉行輔朕不
逮務期省刑薄賦庶使百姓可遂其生乙卯諸王脫脫駐
雲南擾害軍民以按灰代之壬戌冀寧路地震閏月丙戌
以立皇太子詔天下辛卯封別鐵木爾為汾陽王諸土宇
羅為冀王加太常禮儀院使拜住大司徒特授近侍完者
不花翰林侍讀學士同修國史三月丁卯朔升淨州為路
乙酉太陰犯箕夏四月不雨時帝在御久猶居東宮嘗夜

元史卷九 本紀

五

坐謂侍臣曰雨暘不時奈何蕭拜住曰宰相之過也帝曰
卿不在中書邪拜住惶謝頃之帝露香默禱於天夜分大
雨左右以雨衣進帝曰朕為民祈雨何避為戊申荅合孫
寇邊吳王多列納敗之於和懷乙丑翰林學士劉廣進所
譯大學衍義帝曰是書議論甚嘉合頒賜朝臣帝通達儒
術兼悟釋典嘗曰明心見性佛教為深修身治國儒道為
切又曰儒者可尚以能維持三綱五常之道也五月戊寅
改太子衛率府為中翊府壬午黃州真州建寧等處流民
羣聚剽掠傷人及盜者如律餘並給糧遣歸己丑以赤
因阿卜並平章政事乞塔為右丞高昉為左丞換住王桂
並參知政事六月乙巳太陰犯心內外監察御史其劾右
丞相鐵木迭爾姦貪不法詔免官以合散為右丞相己酉

以烏伯都刺王毅復平章政事丙寅定諸王駙馬功臣分地仍舊得自辟達魯花赤秋七月乙亥中書平章李孟罷己丑成紀縣山崩土石潰徙壞田廬辛卯冀寧地震帝諭省臣曰比聞蒙古諸部因乏往往鬻子女於人為婢僕其命有司贖之還各部立宗仁衛總之帝出見衛士有傲衣者駐馬問之對曰戍守邊陲十五年以故貧耳帝曰此輩久勞於外畱守官未嘗以聞非朕親見何由而知自今有類此者必言於朕命賜之錢帛八月丙申熒惑犯輿鬼壬子太陰犯昴庚申合散奏事畢帝問曰卿等日所行者何事對曰第奉行詔旨而已帝曰卿等何嘗奉行朕旨雖祖宗遺訓朝廷法令皆不遵守夫法者所以辨上下定民志自古未有法不立而天下治者使人君制法宰相能守法

元史卷九 本紀

七

則民知所畏避紀綱可正風俗可厚其或法弛民慢怨言竝興欲求治安豈可得哉合散遂言故事丞相必用蒙古勳族臣本西域人不厭人望敢辭帝命宣徽使伯答沙為右丞相合散仍左丞相九月庚午太陰犯斗嶺北地震三日大都南城產嘉禾一莖十二穗冬十月甲午朔遣王桂致祭陝西嶽瀆振秦州被災民戊午海外婆羅公民船漂至溫州敕江浙省資遣還國十一月己卯省汧源縣入隴州壬辰諭諸宿衛入直各居班次非有旨不得上殿闌入禁中者坐罪載耕錄云有雲都赤乃宿衛之至親近者分輔奏事無雲都赤不入直帶刀立屏下以防姦回雖幸亦在不敢進大臣許從二人他官一人門者譏其出入十二月丁酉復置廣州采珠都提舉司耕錄云廣東采珠之人懸於蛟龍之腹者不少有司名曰烏蛋戶仁宗登極特旨放免至是復

行乙巳遣官即興和路及淨州發廩振北方流民壬子以圖滿迭爾知樞密院事是歲復置詹事院及家令府延慶司典寶監改怯憐口總管府為繕用司衛王阿木哥以罪貶高麗

五年戊午春正月甲戌懿州地震乙酉敕諸王位下民在大都者與平民均役丁亥以買住為大司農魯魯國公二月癸巳朔日食和寧路地震封諸王圖滿鐵木爾為武平王丁未建鹿頂殿於文德殿後甲寅置寧昌府敕上都諸寺商貨竝輸稅三月戊辰改靜安路為德寧路縣為德寧縣敕書金字藏經共糜金三千九百兩夏四月庚戌免懷孟河南南陽民所輸陝西鹽課時解州鹽池為水壞命懷孟等處食陝西紅鹽後以地遠改食滄鹽而重輸課陝西至是始免轉海漕糧十萬石於遼陽以振貧民

元史卷九 本紀

七

甲寅以千慮史作奴今從志史弼並平章政事故儼參知政事五月辛酉朔以亦列赤為中書右丞遣王毅榮星於司天臺三晝夜壬申御史言比年名爵冒濫太尉司徒國公接迹於朝禮部鑄三公印二十有六此輩無功家國乞賜裁罷詔以門閥勳業素著者存留一二餘並革去己卯德慶路地震六月辛卯從御史臺言罷張閻等經理民田虛增糧數止如舊輸稅癸巳加典瑞院使幹赤集賢大學士大司徒秋七月己未朔諸王不里身敦之叛諸王耶舍失列吉及衛士朵帶伯都坐持兩端詔流耶舍江西失列吉湖廣朵帶衡州伯都潭州戊子省翁源縣入曲江加封楚三閩大夫屈原忠節清烈公九月癸亥大司農買住進司農丞苗好謙所撰栽桑圖說帝曰農桑衣食之本此圖甚善命

刊刻散之民間松雪齋集云上御嘉禧殿覽所進農桑圖
圖者何人對日諸色人匠提舉楊叔謙上嘉賞久之人賜文綺二段丁卯以亦列赤平章政

事高昉為右丞換住為左丞燕只干參知政事壬午敕軍
官犯罪聽樞密院議擬行省毋擅決遣丁亥復立行宣政

院於杭州置大永福寺都總管府改中翊府為羽林親軍
都指揮司統軍萬人隸東宮冬十一月壬戌增置大都南

北兩兵馬指揮使色目漢人各二員丁卯追奪建康富民
王訓等白身濫受宣敕丙子詔唐陸渚著春秋纂例辨疑

微旨三書有益後學令江西行省錢梓以廣其傳癸未定
江西茶課以二十五萬錠為額建殿於大永福寺奉安順

宗御容十二月壬辰特授集賢大學士脫列大司徒辛亥
置重慶路江津巴縣屯田省成都歲漕米萬二千石是歲

元史卷九 本紀 大

秦州秦安縣鞏昌隴西寧遠二縣皆山崩

六年己未春正月丁卯定邊遠軍官致仕還家者許給驛

如民官例戊寅太陰犯心己卯廣東南恩州搖賊龍郎庚

等為寇帝御嘉禧殿謂太宗正買閩曰人命所繫至重其

詳閱獄辭事無大小必謀諸同僚疑不能決者與省臺官

集議然後以聞又願謂侍臣曰卿等以朕居位為安朕

惟太祖勗業艱難世祖混一疆宇兢業守成恆懼不能當
天心繩祖武使萬方樂得其所朕念慮在茲卿等固不知
也二月丁亥朔日食改釋奠於中丁祀社稷於中戊釋奠
成樂令各路府選習古樂師教肄生徒不得仍用俳優歌曲丁酉雲南閩里愛俄永昌
蒲蠻阿八刺等竝為寇戊戌改陝西轉運鹽司為河東陝
西都轉運司直隸省部己亥太陰犯靈臺三月辛酉命圖

士合為御史大夫帝曰此任至重以卿勳舊之裔故特授
汝當思乃祖乃父忠勤王室仍以古名臣為法否則將墜

汝家聲矣己巳太陰犯明堂敕諸王駙馬宗姻諸事依舊
制領於內八府官勿徑移文中書機耕錄云內八府宰相
宣命特中書照會之任而已寄位於翰林之掃都掃都宮
門外院官會集處也所職視草制若詔教之文則非其掌
院之公事亦不得與例癸酉太陰犯日星甲戌犯心改懷

孟路為懷慶封諸王月魯鐵木爾為恩王夏四月壬辰定
土官病故子姪兄弟皆準承襲無則從本俗許以妻承夫

職丙申令京官各運糧輸上都振蒙古饑民庚子復起鐵
木迭爾為太子太師御史中丞趙世延論其不法數十事

帝以太后故不聽左遷世延為四川行省平章五月辛酉
太陰犯靈臺丁卯犯房丙子犯壘壁陳六月戊子改繕珍

元史卷九 本紀 九

司為徽儀司升莊浪巡檢司為縣己亥歲星犯東咸辛丑

置河南田賦總管府隸內史府戊申置勇敢署以角觝者

隸之秋七月壬戌太陰犯心來安土官岑世興叛據唐興

州降詔招諭之甲戌皇姊太長公主祥哥剌吉作佛事釋

全寧府重囚二十七人帝怒命按問全寧守臣阿從不法

仍追所釋囚還獄給朔方蒙古民駝馬牛羊俾牧養蕃息

以自贖丙子太白犯太微垣右執法八月甲申以欽察張
思明竝參知政事乙酉熒惑犯輿鬼閏月丙辰辰星犯太
微垣右執法癸亥熒惑犯軒轅甲子太陰犯壘壁陳乙亥
太白犯東咸九月戊戌省永興縣入奉聖州置雲南縣隸
雲內州以故昌州寶山縣置寶昌州隸興和路敕諸司有
受命不之官及避繁劇託故去職者奪其宣敕癸卯浚鎮

江練湖冬十月乙卯白雲宗總攝沈明仁強奪民田二萬頃誑誘愚俗十萬人帝稔知其奸下所司嚴鞠辛酉以鐵木爾不花為御史大夫癸亥熒惑犯太微垣左執法乙丑太陰犯昴戊辰犯東井庚午太白晝見辛未太陰犯軒轅十一月辛卯熒惑犯進賢庚子禁民匿蒙古軍亡奴帝諭臺臣曰有國者以民為本比聞百姓疾苦銜冤者眾其令監察御史廉訪使審察以聞十二月壬戌命皇太子參決國政追封宋儒周惇頤為道國公封蕙瑗為內黃侯從祀孔子丙寅太陰犯軒轅壬申犯心以虞集為翰林待制帝謂左右曰凡在儒臣悉皆優用特虞伯生未顯擢耳癸酉夜風雪甚寒帝謂侍臣曰朕與卿等居暖室宗戚昆弟遠戍邊陲曷勝其苦歲賜財帛可不徧及耶敕上都大都冬夏設食於路

元史卷九 本紀

二十

以食饑者是歲伏羌縣山崩揚州火燬官民廨舍二萬三千三百餘區

七年庚申春正月辛巳朔日食帝齋居損膳輟朝賀辛卯白雲宗沈明仁擅度僧四千八百餘人獲鈔四萬餘錠既辭伏復遣其徒沈崇勝潛赴京師行賄事覺詔逮赴江浙竝治其罪乙未太陰犯明堂上星己亥帝不豫辛丑崩於光天宮壽三十六癸卯葬起輦谷五月乙未加上尊諡曰聖文欽孝皇帝廟號仁宗蒙古語曰普顏篤皇帝八月丙辰祔於太廟

論曰武仁受授之際無可議者仁宗初政首革尚書省倣政在位九年仁心仁聞恭儉慈厚有漢文帝之風惟武宗初約由帝傳位己子和世球而後及於英宗及武宗崩仁

宗立乃出封和世球於雲南而立子碩德八剌為太子雖迫於皇太后之命而已不守初約矣和世球不之雲南而舉兵赴漠北又不予以總兵和林之任於是英宗被弑而泰定以晉王入紹大統武宗舊臣燕鐵木爾不服遂於泰定殂後迎立周王於漠北迎立懷王於江陵懷王先立周王後至豈肯讓於兄於是弑之中途而國亂者數世使當初即立周王何至於此至鐵木迭爾奸貪不法已經言官列款彈劾而猶礙於皇太后不敢質問遂貽英宗以奸黨謀逆之禍不得謂非仁宗貽謀不臧有以致之也

元史卷九 本紀

本紀

三十

元史卷九終

英宗皇帝諱碩德八剌，名也母莊懿慈聖皇后弘吉刺氏以大德七年二月甲子生武宗即位立仁宗為皇太子約以次傳己子和世疎武宗崩仁宗立延祐初議立太子丞相鐵木迭爾請立帝帝入謁太后固辭曰臣幼無能且有兄和世疎在宜立太后不許遂立為皇太子百司庶務令先啟後聞帝謂省臣曰至尊委我以天下事日夜寅畏惟恐不堪卿等當洗心滌慮恪勤乃職勿有墮壞以貽君父憂七年春正月戊戌仁宗不豫帝憂形於色夜則焚香泣曰至尊以仁慈御天下庶績順成四海清晏今天降大厲不如罰殛我身使至尊永為民主辛丑仁宗崩帝

元史卷十 本紀

哀毀過禮素服寢地上日飲一粥癸卯太陰犯井甲辰鐵木迭爾以太后命拜右丞相二月壬子罷造永福寺召江浙左丞相黑盧平章中書省事戊午祭社稷每歲二仲月仍以上戊舉祭辛酉太陰犯軒轅御女王戌犯靈臺甲子從鐵木迭爾言逮四川平章趙世延赴京中書參議乞失監坐驚官罪當杖太后欲笞之帝曰法者天下之公徇私而輕重之不可以示天下卒正其罪丙寅以趙世榮為中書平章政事木八刺為右丞張思明為左丞丁卯太陰犯日星白雲宗總攝沈明仁以不法正罪籍江南冒白雲僧者為民定京城環衛更番法準五衛漢軍歲例庚午太陰犯斗癸酉括崇祥院地冒以官地獻者追其直民地獻者歸其主丁丑鐵木迭爾奪前平章李孟所受秦國公制命

仆其先墓碑又矯太后旨殺前御史中丞楊朵爾只平章蕭拜住竝籍其家戊寅徵政院使失烈門傳太后命請更朝官帝曰此豈除官時邪且先帝舊臣不宐輕改俟子即位後議於宗親元老賢者任之邪者黜之可也司農卿完者不花請奪先帝所賜諸臣土田帝問賜者為誰對曰左丞相合散所得為多帝曰子嘗諭卿等當以公心輔弼卿在先朝嘗請海舶之稅以合散奏而止今所言乃復私憾非公議也豈輔弼之道邪遂出之為湖南宣慰使癸未奪西僧所授司徒國公制竝銷其印三月戊子太陰犯酒旗上星熒惑犯進賢徵諸王駙馬流竄者各還分邑庚寅帝即位詔曰洪惟太祖皇帝膺期撫運肇開帝業世祖皇帝神機睿略統一四海以聖繼聖迨我先皇至仁厚德涵濡

元史卷十 本紀

羣生君臨萬國十年於茲以社稷之遠圖定天下之大本協謀宗親授子冊寶方春宮之與政遽昭考之賢天諸王貴戚元勳傾輔咸謂朕宐體先帝付託之重膺皇太后擁護之慈既深繫於人心詎可虛於神器合辭勸進誠意交孚乃於三月日即皇帝位於大明殿詔免被災州郡縣銀五分江淮夏稅三分差發稅糧逋欠在民者普與蠲免各處站赤毋得濫給驛陳亡官軍常例存恤外再展一年兩廣雲南嘯聚徒眾許赴官自首概從寬宥其科舉貢試法竝如舊制尊太后為太皇太后是夜太陰犯明堂壬辰敕羣臣超授散官者朝會毋越班次乙未日有暈若連環幹羅思內附賜鈔萬貫戊戌罷醫卜工匠任子定吏員秩止從七品如前制辛丑詔樞密院兼領左右衛率府左遷

李孟為集賢侍講學士夏四月命造至元鈔五千萬貫中
統鈔二百五十萬貫詔曰朕惟食貨生民之本權以泉幣
貴在適時昔我世祖皇帝所立中統鈔廢罷雖久民間物
價每以為準有司依舊印造與至元鈔子母並行凡官司
出納百姓交易並計中統鈔數前尚書省所發新舊銅錢
與民間宿藏者所在充溢雖畸零使用亦便於民然壅害
鈔法深妨國計其至大銅錢詔書到日立赴各行用鈔庫
依例倒換無致虧損歷代舊錢有司所發者與百姓宿藏
既不可辨令截日住罷至權禁金銀本以權衡鈔法條令
雖設其價益增民實弗便自今權宜開禁聽從買賣若商
船私帶下番者依例科斷庚戌罷行通政院及少府監回
回國子學省崇祥院入民匠總管府隸將作院甲寅太白

元史卷十 本紀 三

犯填星己未祭遁甲神於香山遣平章王毅右丞高昉徵
理在京錢粟虧耗者七十八萬石及諸路歲貢幣稍紕繆
者俱責償所司庚申降百官越階者並依所授之職以拜
住平章政事壬戌太陰犯房乙丑仁宗喪卒哭作佛事七
日封王煦為雞林郡公戊辰議仁宗附廟以太廟七室皆
有神主增室不及權結綵為幄殿於太室東南安奉神主
己巳罷市舶司禁賈人下番貿易增兩淮荆湖江南東西
道田賦斗加二升回回散居郡縣者歲輸包銀二兩戊寅
有獻七寶帶者因近臣以進帝曰朕初登大位不聞汝等
進賢而為人進帶是以利誘也其還之五月己卯復置稱
海五條河屯田權廣東番貨庚辰上都留守賀勝伯名賀
坐便服迎詔棄市己丑敕中書省有內降旨除拜濫賜名

爵者聽覆奏乃行左遷左丞相合散為嶺北平章命拜住
為左丞相塔失海身平章政事只爾哈郎參知政事庚寅
太陰犯心壬辰和林民閭海瘞殍死者三千餘人詔旌其
門癸巳太陰犯天狗乙未加上大行皇帝尊諡曰聖文欽
孝皇帝廟號仁宗丙申太白犯畢有告前丞相合散平章
黑盧御史大夫脫忒哈徹政使失烈門等與故要束木妻
亦烈失八其謀廢立者拜住請鞠狀帝曰彼若借太皇太
后為辭柰何竟不問悉誅之籍其家辛丑以鐵木爾脫平
章政事壬寅罷僧道工伶濫爵及建寺豢獸費六月甲寅
省徽政院及宮正章慶延福三司停廣東采珠丁巳以康
里脫脫為御史大夫欽察鐵木爾不花並知樞密院事庚
申太陰犯斗賜角觥者百二十人鈔各千貫女巫伯身台

元史卷十 本紀 四

鈔萬貫壬戌敕諸使至京者大事五日小事三日速遣還
是夜月食既癸亥太陰犯壘壁陳乙丑新作太祖幄殿修
寧夏欽察魯佛事給鈔二百一十二萬貫丁卯太白犯井
辛未太陰犯昴丁丑改紅城中都威衛為忠翊侍衛親軍
都指揮司復徽儀司為繕珍司秋七月壬午立普定路屯
田運和寧糧於札昆倉以便邊軍甲申車駕將幸上都調
左右翼軍赴北邊浚井丁亥太陰犯斗丙申初製袞冕戊
戌熒惑犯房敕中外希賞自請者勿予己亥太陰犯昴庚
子以廉恂平章政事癸卯賜伶人鈔二萬五千貫酒人鈔
十五萬貫回回大醫進藥曰打里身給鈔萬貫八月丁未
朔嶺北省臣忻都以官錢犒軍坐免詔復其職丙辰附仁
宗皇帝莊懿慈聖皇后於太廟仁宗皇后本傳作至治二
年前附廟又有英宗即位

尊為皇太后之文而本紀載此未知孰是太白犯靈臺乙丑熒惑犯天江丁卯

許帝幸涼亭謂近侍曰朕素聞世延忠良故每奏不納左右咸稱萬歲宮人官奴坐妄用日者請太皇太后祭星杖之壬申太陰犯軒轅御女九月甲申建壽安山佛寺給鈔十萬貫命拜住董其役禁五臺山采樵乙酉太陰犯壘壁陳丙戌熒惑犯斗壬辰吐蕃利族阿俄等五種寇成谷溪蠻秦元吉寇循州癸巳太陰犯昴戊戌犯鬼己亥太白犯亢以廩藏不充停諸王所部歲給甲辰雲南木邦路土官給邦西陽土官冉世昌各遣子入貢遣使占城真臘龍牙門索馴象冬十月庚戌太陰犯熒惑于斗辛亥犯井西陽聳儂洞蠻田謀遠為寇戊午帝諭太常禮儀院曰朕將以

元史卷十本紀

五

四時躬祀太室宜與羣臣集議典禮此追遠報本之道毋以朕勞於對越而有所損其悉遵古禮以行癸亥太陰犯井丁卯為皇后作鹿頂殿於上都癸酉流諸王阿刺鐵木爾於雲南十一月丙子朔帝御齋宮丁丑恭謝太廟至仁宗室歔歔流涕左右感動庚辰省永平之灤邑縣入石城禁京城諸寺邸舍匿商稅辛巳以親享太廟禮成受朝賀甲申敕修仁宗實錄及后妃功臣傳戊戌交趾蠻儂志德寇脫零那乞等六洞癸卯熒惑犯壘壁陳甲辰計京官俸鈔給米三分遣使閱實各省成兵十二月乙巳朔以改元赦天下詔曰朕祇通貽謀獲承不緒念付託之惟重顧繼述之敢忘爰以延祐七年十一月二日被服袞冕恭謝於太廟既大禮之告成宜普天之均慶屬茲踰歲用易紀元

於以導天地之至和法春秋之謹始可以明年為至治元年減天下租賦二分包銀五分大都上都興和三路差稅全免三年優復養鹽煉鐵運糧等戶二年開燕南山東河泊禁聽民采取命官家屬流落邊遠者有司資給遣歸其子女典鬻於人者聽還其家監察御史廉訪使歲舉可任守令者二人七品以上官有偉畫長策可濟世安民者實封來上士有隱居行義不求聞達者有司具名以聞丁未播州蠻蠻的羊籠等來降癸丑以天壽節預修醮於龍虎山乙卯加上儀天興聖慈仁昭懿壽元全德泰寧福慶太皇太后尊號曰徽文崇祐太皇太后是夜太陰掩昴翰林學士譯進大學衍義帝曰修身治國無踰此書命刊本頒賜羣臣河南饑帝問其故羣臣皆莫對帝曰良由朕治道

元史卷十本紀

六

未洽卿等又不盡職委任非人致陰陽失和災害薦至宜各務勤恪以應天心戊午太陰犯井庚申犯鬼乙丑祭星於回回司天監四十晝夜丙寅以閣徹伯知樞密院事丁卯敕上書言事者得直達御前勿令省臣開視如細民訴訟仍加禁止己巳敕罷明年二月八日迎佛初世祖用帝於御座上置白徹蓋一頂用泥金書梵字其上歲以二月啟建白徹蓋好事周遊皇城內外云與眾生被除不祥累朝相沿為定制至是偶罷以只爾哈郎為中書右丞薛處敬參知政事辛未拜住進鹵簿圖帝以唐制用萬二千三百人太多乃定大駕三千二百人法駕二千五百人丹墀獨對云至大簿圖并書武宗賜官大樂署丞延祐中又進中道外仗圖英宗親祀太室命丞相拜住取秘書所藏異初圖書而圖簿大興太室改稱太廟凡川蜀江南大木悉致馬旗幟之繕繪者於閩浙人馬鎧甲被彩飾者於江西又詔置守造五幣癸酉帝聞賀勝母老憫之以所籍京兆田磴還其家

是歲河決汴梁原武滹沱決文安大成等縣渾河溢壞民田廬成紀縣暴雨山崩朽壤墳起覆沒畜產益津縣雨黑霜害稼各調振有差帝以科舉之外恐有遺賢詔曰比歲設立科舉以取人材尚慮高尚之士晦迹巨園無從可致其有才德超邁深明治道者所在官司具姓名俟廉訪使覆察奏聞以備錄用

至治元年辛酉春正月丙戌定四孟月時享太廟帝服袞冕親祭以左丞相拜住亞獻知樞密院事閣徹伯終獻禮成坐次謂羣臣曰一歲惟四祀若使人代不能致如在之誠實所未安歲必親祀以終朕身通攷云禮社稷亦如之羣臣以祀事畢請赦帝曰恩可常施赦不可屢下使殺人獲免則死者何辜命中書省陳便宜事行之丁亥帝欲以元夕張燈

元史卷十本紀

七

禁中參議省事張養浩上書諫遽命罷之曰有臣若此朕復何憂自今朕凡有過豈獨臺臣當言人皆得言賜養浩金帛乙未太陰掩房甲辰星犯外屏木金火土四星聚奎二月己酉作仁宗神御殿於普慶寺遣近臣即趙孟頫家俾書孝經壬子夜金火土三星復聚奎丁巳監察御史觀音保鎖咬爾哈的迷失成珪李謙亨諫造壽安山佛寺帝怒殺觀音保鎖咬爾杖珪謙亨竄之奴兒干地辛酉太白犯熒惑癸亥太陰犯心甲子置承徽寺割宐興民四萬戶隸之丁卯禁越省臺訴事三月丁丑太陰掩昴辛巳賜西番撒思加地僧金銀數千兩袈裟二萬襲遣呪師朵爾只往牙濟班卜二國取佛經癸未製御服珠袈裟寶集寺金書西番波若經成置大內香殿己丑大同路麒麟生辛

丑以鐵失為御史大夫鐵木迭爾領忠翊侍衛親軍都指揮使夏四月戊午太陰犯心庚申犯斗造象駕金脊殿戊辰命宦者李羅台為太常署令太常官言刑人難與大祭遂止五月戊寅太白犯鬼積尸氣太陰犯軒轅庚辰犯明堂毀上都回回寺壬午從鐵木迭爾言遷武宗子圖帖睦爾於瓊州即文宗禁日者毋交通諸王駙馬掌陰陽五科者毋泄占候辛卯作行殿於緡山流杯池乙未命世家子弟成童者入國學辛丑太常禮儀院進太廟制圖六月癸卯朔日食作金浮屠於上都藏佛舍利己未太陰犯虛梁辛酉太白經天趙宏祚等以言事勒歸禁妄言時政乙丑遣使往銓江浙江西湖廣四川雲南五省邊郡官選己巳以只爾哈郎平章政事秋七月辛巳蓋屋僧圓明邵陽道士

元史卷十本紀

八

劉志先以妖術作亂遣樞密判官章台督兵捕誅之禁僧道度牒符籙癸巳太陰犯昴己亥奉仁宗及帝御容於大聖壽萬安寺八月丁未太陰犯心己酉犯斗壬子熒惑犯軒轅壬戌車駕自上都還駐蹕興和左右以寒甚請早還帝曰兵以牛馬為先民以稼穡為本朕遲留不行者蓋欲馬得芻牧民得刈穫一舉兩得何計乎寒敕翰林集賢官年七十者毋致仕九月乙亥熒惑犯靈臺壬午犯太微西垣上將丁酉犯右執法冬十月丙午太白經天戊申熒惑犯太微垣左執法癸丑以內郡水罷不急工役敕蒙古子女鬻為回回漢人奴者官為收養禁中書掾曹毋泄機事己巳遣燕鐵木爾巡邊十一月辛未熒惑犯進賢乙亥幸大護國仁王寺丙子太陰犯虛梁戊寅羣臣上尊號曰繼

天體道敬文仁武大昭孝皇帝是夜辰星犯房辛巳命鐵
失領左右阿速衛軍丙戌太陰犯井己丑犯酒旗又犯軒
轅辛卯犯明堂癸巳以營田司徵酒稅擾民命有司兼權
己亥太白犯西咸十二月辛丑立皇后亦乞列氏遣右丞
相鐵木迭爾持節授玉冊玉寶甲辰熒惑犯亢戌申帝以
受尊號躬謝太廟行一獻禮賜與祭者帛普減內外官吏
一資庚戌太陰犯昴己未幸西僧灌頂寺封峻南藏卜爲
白蘭王辛酉熒惑入氏甲子命帝師詣西番受具足戒賜
金千兩銀四千兩幣鈔各鉅萬乙丑冶銅五十萬斤作壽
安山寺佛像置中瑞司領之是歲河南安豐江州水振粟
九萬八千石鈔二萬五千貫霸州渾河溢被災民二萬三
千三百戶雷州海溢壞民田四千餘頃各免其租稅

元史卷十 本紀

九

二年壬戌春正月甲戌禁漢人持兵器出獵及習武藝丁
丑帝親享太廟始陳鹵簿賜導駕耆老帛是夜太陰犯昴
戊寅敕有司存卹孔氏子孫庚辰太白犯建星辛巳敕臺
憲用人勿拘資格癸未建行殿於柳林封塔察爾爲蘭國
公辛卯太陰犯心甲子熒惑犯房丁酉太白犯牛二月己
亥朔熒惑犯鍵閉星通放云庚子罷上都歇山殿工辛丑
以欽察買盧竝爲中書平章政事壬居仁參知政事丙午
熒惑犯罰星戊申太陰犯井庚戌熒惑犯東咸辛亥太陰
犯酒旗及軒轅壬子太白犯壘壁陳癸丑太陰犯明堂新
作流杯池行殿敕嘉湖二路攷究太湖入海故道疏濬之
乙亥西僧亦思刺蠻展音有疾釋罪囚己未太陰犯天江
壬戌太白犯壘壁陳廣海郡邑曠官敕願仕者升秩二等

三月己巳令廉恂張養浩字允魯神理國學外郡學校命
御史臺翰林院國子監同議與舉敕四宿衛興聖宮及諸
王部勿用南人辛未禁捕鴛鴦違者籍其家放京師營繕
役卒四萬餘人丁亥復置市舶司於泉州慶元廣東三路
禁子女金銀絲帛下番己丑有暈貫日如連環給宗仁衛
蒙古子女衣糧丁酉駙馬許納之子速怯訴父謀叛母私
從人帝曰人子事親有隱無犯今有過不諫乃復告訐命
速誅之夏五月己巳修滹沱河堤丙子熒惑退犯東咸庚
辰置營於永平收養蒙古子女四方藏匿者加罪甲申以
只爾哈郎爲御史大夫置宗仁蒙古侍衛親軍都指揮司
以馬刺爲使戊子禁民間集眾祈神并白蓮佛事閏月戊
戌封諸葛忠武侯爲威烈忠武顯靈仁濟王戊申以鐵木

元史卷十 本紀

十

迭爾子班丹知樞密院事壬子作紫檀殿王逢文集云至
兒吾能也蒙上愛幸上使酒無敢諫者一日御紫檀殿飲
驛兒歌殿前歡曲有酒神仙之句上怒叱左右殿之後悔
曰驛兒酒六月丁卯朔駕幸五臺山戒衛士毋踐民禾壬
申熒惑犯心癸酉禁日者妄譚天象修渾河堤秋七月己
亥熒惑犯天江壬子遣親王閣閣圖總兵北邊封武靈王
戊午太陰犯井宿越星車駕次應州曲赦金城縣囚徒左
丞張思明坐罪杖免籍其家錄諸役軍匠病者千餘人各
賜鈔遣還八月甲戌次奉聖州詔畫蠶麥圖於鹿頂殿壁
帝曰以時觀之可知民事他日御鹿頂殿謂拜住曰朕以
幼冲嗣承大業玉食錦衣何求不得惟念祖宗櫛風沐雨
戡定萬方會有此樂邪卿元勳之裔當體朕懷毋忝爾祖
拜住謝曰勗業惟艱守成不易陛下思及此億兆之福也

庚寅鐵木迭爾死九月通攷云辛亥幸壽安山寺賜監役

官鈔人五千貫丙辰太皇太后崩己未太陰犯明堂庚申

停今年冬祀南郊癸亥地震減膳徹樂近臣有進傷者帝

曰朕方修德不暇汝反為是詔邪斥出之因戒近臣曰汝

等居官食祿當勉力圖報苟或貧乏朕不惜賜與若所為

非法則必刑無赦冬十月戊辰享太廟以國哀迎香去樂

修廟工役未畢妨陳宮懸止用登歌丙子押濟思國遣使

來貢南臺御史大夫托托請告未得旨輒去杖謫雲南庚

辰太陰犯井建太祖神御殿於興教寺己丑熒惑犯壘壁

陳命拜住為右丞相罷左相弗置獨任以政十一月甲午

朔日食以立右丞相詔天下詔流民復業者免差稅三年

站戶貧乏鬻賣妻子者官為贖還凡差役造作先科商賈

元史卷十本紀 土

末技富實之家以優農力御史李端言近者京師地震日

月薄蝕皆臣下失職所致帝曰是朕思慮不及致然自當

修飾以謹天戒癸卯地震甲辰太白犯壘壁陳罷徽政院

乙巳熒惑犯壘壁陳戊申太陰掩井從御史李端言命臣

下所奏事目及上之言動悉書起居注付史館己未太陰

犯東咸庚申犯天江辛酉熒惑犯歲星宣德府地震震改

八番軍民長官司二十有八為州縣十二月乙丑太白歲

星熒惑聚於室太白犯壘壁陳丁卯復以張珪平章政事

加司徒甲戌來安路總管岑世興葛蠻安撫使龍仁貴柔

遠州洞蠻把者作亂命各行省分兵討之乙亥太陰掩井

戊寅太白犯歲星庚辰以只爾哈郎知樞密院事速速為

中書左丞馬刺參知政事癸未以宗仁衛蒙古子女多至

萬人權停收養池河南陝西酒禁禁近侍奏取沒入官錢

丙戌省雲南西沙縣入寧州己丑熒惑犯外屏太陰犯建

星辛卯西僧灌頂疾請釋囚帝曰釋囚祈福豈為私惜朕

思惡人屢赦反害善良何福之有宣徽院請增尙食羊帝

不許曰天下之民皆朕所有如有不足朕當濟之若額外

多取百姓必致重困食亦何益其遵世祖舊制司徒劉夔

同僉宣政院事囊加台坐妄獻地土冒取官錢伏誅鐵木

迭爾子宣政使八刺吉思受夔冒獻田地御史大夫鐵失

同受賂事聞帝曰法者祖宗所制非朕得私彼雖事朕久

今既有罪當論如法即令誅之惟鐵失獲免是歲六月敕

修大元聖政典章成分類六十卷又得鄱陽馬端臨所著

文獻通攷三百四十八卷皆鏤板以行

元史卷十本紀 土

三年癸亥春正月癸巳朔暹國及八番洞長各來貢己亥

敕行省平章政事仍賜金符兼總軍政軍官有罪重者以

聞輕者就決壬寅罷上都雲州興和宣德蔚州奉聖州及

雞鳴山房山黃蘆三义諸金銀冶聽民采鍊輸稅起吳元

珪王約韓從益並商議中書省事徵趙居信為翰林學士

承旨吳澄為翰林直學士是夜太陰犯鉞星癸卯犯井甲

辰遣諸王忽刺出鎮雲南壬子靜江邕柳諸郡獠為寇泉

州民雷應總作亂命各行省遣兵捕之征東末吉地兀者

戶以貂鼠水獺海狗皮來獻詔存恤三歲丁巳定封贈官

等秩初武宗至大二年制以封贈非世祖辛酉定內外官

不次銓用者升職勿升階出趙世延於獄凡官民訟原

告逃匿則釋待對者著為令二月癸亥朔定軍官襲職嫡

長子孫幼者許令諸兄弟姪代攝是夜熒惑太白填星聚於胃丙寅仁宗寶錄成遣使往西番徵畜牧治郵傳戊辰天壽節寶丹瓜哇二國來貢癸酉太白犯昴帝謂拜住曰近者地道失靈風雨不時豈朕行事有闕與對曰地震自古有之陛下自責固宜良由臣等失職不能變理帝曰朕在位三載於兆姓萬物豈無乖戾之事卿宜與百官議有便民利物者朕即行之辛巳太陰犯東咸纂修大元通制成頒行天下一日斷例二日條格三日詔赦四日令類凡二千五百三十九條丙戌雨土新造五輅成戊子封鷹師不花爲趙國公辛卯以太子賓客伯都廉貧賜鈔十萬貫三月壬辰朔車駕幸上都西番參卜郎諸族叛敕鎮西武靖王搠思班發兵討之戊申附太皇太后於順宗廟室丙

元史卷十 本紀

七

辰定醫卜匠官居喪不得去職年七十不聽致仕子孫無蔭敘能紹其業者量材錄用徵逸士瞻思至見於龍虎臺帝厚遇之以養親辭歸夏四月壬戌朔令天下諸司飯僧誦經十萬部甲戌命張珪王士熙勉勵國子監學都功德使闊爾魯至京師釋罪囚大辟者三十一人杖者六十九人放籠禽十萬令有司償其直己卯詔行助役法遺使致高下出田若干畝使應役之人更掌之收其歲入以助役費官不得預五月辛卯降開成路爲州增置安慶瀾山縣雲南寧遠州慶元嶧山縣設大理路白鹽城及中慶路權稅官戊戌太白經天庚子大風雨雹拔柳林行宮木二千七百株辛丑命鐵失獨署御史大夫事癸卯太陰犯房戊申監察御史蓋繼元宋翼極言鐵木迭爾奸惡帝命毀所立碑仍追奪官爵沒其家貲帝御

大安閣見太祖世祖遺衣皆綠素木棉重加補綴嗟嘆良久謂侍臣曰祖宗勦業艱難服用節儉如此朕焉敢頃刻忘之是夜太白犯畢戊午奉元行宮正殿災上都利用監庫火帝曰世皇始建宮室垂數十年至朕而燬皆朕不德所致也有欽察衛戍卒累功當賞以官帝曰名爵豈賞人之具邪其賜鈔三千貫六月戊辰贈乳母忽秃台定襄郡夫人其夫阿來追封定襄王諡忠愍癸酉太廟新建前殿成以東西二間爲夾室壁以紅泥南向爲門命太常纂修累朝儀禮癸未填星犯畢乙酉諸王怯伯數寇邊至是遣使來降帝曰非欲彼土地人民但使吾民不罹邊患軍士免於勞役幸矣今既來降當厚其賜以安之江浙行省言鎮江運河全籍練湖之水爲上源漕運商販舟楫無不由

元史卷十 本紀

七

此前朝常濬此湖蓄潦水若運河水淺開放練湖一寸可添河水一尺乞加修治以通遞運制可秋七月辛卯朔減海道歲運糧二十萬石以江甯民力困極而京倉充滿故也并免江淮增科糧己酉封諸王忽都鐵木爾爲威遠王御史臺請降旨開言路帝曰言路何嘗不開但卿等選人未當耳且中書選人署事未旬日御史臺即改除之臺除者中書亦然今山林遺逸良多卿等不能盡心求訪惟以親戚故舊更相汲引邪八月癸亥車駕自上都還駐蹕南坡御史大夫鐵失知樞密院事耶先鐵木爾大司農失禿爾前中書平章赤斤前雲南平章完者及鐵木迭爾子鎖南典瑞院使脫火赤樞密副使阿散僉書樞密事章台衛士圖滿及諸王按梯不花孛羅月魯不花曲律不花兀魯思不花等謀逆

以阿速衛兵為外應弒帝於行幄殺右丞相拜住帝年二十一從葬諸帝陵泰定元年二月加上尊諡曰睿聖文孝皇帝廟號英宗蒙古語曰格堅皇帝五月祔於太廟

論曰舊史謂英宗果于誅戮奸黨畏懼遂構大變烏乎是何言與以鐵木迭爾之奸不明正其誅但疏遠俾得善終於位已為漏網而復任用其子曲貸其子釀成梟鏡此失之果乎失之不果乎拜住於鐵木迭爾引其黨參政張思明自助時或告拜住為備拜住反以大臣不和彼仇我報非國家之利及鐵木迭爾死又往哭之痛此皆失之果乎失之不果乎且除奸莫要於奪兵權乃以宿衛新兵掌於鐵失之手司徒劉夔冒賣浙田之案真人蔡道泰殺人賂道之案皆奸賊巨萬拜住既平反其獄而獨赦鐵失不問

元史卷十 本紀 五

中書參議諫以除奸不可猶豫猶豫恐生他變拜住是其言而不能用大抵安童拜住皆木華黎之孫木華黎用兵所過動輒屠戮安童從許衡受學故其子孫皆出於寬容以水懦救火猛德量有餘機警不足所謂君子之過過於厚也乃胡粹中因舊史之言謂英宗在位數載除誅戮外無一善政可紀甚至皇太后以嬖孽失勢之故鬱鬱而終胡氏并指為英宗不孝祖母之罪烏乎其性與人殊乃至此乎

元史卷十終

元史新編卷十一

本紀九

泰定帝

泰定皇帝諱耶孫鐵木爾世祖嫡曾孫晉王甘麻刺長子英宗叔也初太子真金生三子長曰甘麻刺次曰荅刺麻巴刺三即成宗荅刺麻巴刺先薨世祖封甘麻刺為晉王出鎮北邊至元十三年十月二十九日生帝于晉邸世祖崩甘麻刺奔赴上都諸王大臣皆以晉王為冢孫義當立甘麻刺乃遜位于弟而自願歸藩成宗之得立由晉王之讓也大德六年晉王薨帝裝封仍鎮北邊武仁二帝之立咸與翊戴有盟書賜南康路六萬五千戶為食邑英宗即位告饑振鈔百萬貫後遣使以地七千頃歸朝廷請有司徵租歲給糧鈔執藩臣禮甚謹先是王府內史倒刺沙得

元史卷十一 本紀 一

幸于帝仁宗朝以其子哈散事丞相拜住得入宿衛偵伺中朝事久之脫歸知御史大夫鐵失與拜住意相忤欲傾之亂且作以其故告帝至治三年宣徽使探忒來王邸與倒刺沙言主上將不利於晉王八月二日帝獵於圖刺之地鐵失密遣幹羅思來告曰我與阿散耶先鐵木爾失秃爾章台謀已定事成當推王為帝又以告倒刺沙且言惟汝與馬速忽知之勿令旭邁傑得聞也于是帝大驚命囚幹羅思遣使赴上都以逆謀告未至而難作諸王按梯不花淇陽王耶先鐵木爾奉皇帝璽綬來迎九月癸巳帝即位於龍居河頌蒙古詔赦天下以耶先鐵木爾為右丞相倒刺沙平章政事乃馬台為右丞善僧為左丞鐵失撒的迷失完澤馬某沙並知樞密院事馬速忽章台同知樞密

院事圖滿同僉樞密院事李羅爲宣徽院使旭邁傑爲宣政院使阿散爲御史中丞失禿爾爲大司農蓋雜用新舊以安反側己亥諭銓選一歸中書惟樞密院御史臺宣政宣徽二院得自擬奏辛丑召諸王官屬流竄邊遠者還本部冬十月甲子遣鐵失赤斤等詣大都以卽位告天地宗廟社稷續耕錄云晉邸入繼大統告祭太廟之諸王買奴進曰不誅元凶則陛下善名不著天下後世何從而知非與聞其故乎帝然其言誅逆賊耶先鐵木爾完者圖滿及鐵失弟鎖南等于行在所命旭邁傑爲右丞相召陝西左丞相圖魯通政院使紐澤竝爲御史大夫遣旭邁傑至大都收鐵失及其黨失禿爾赤斤脫火赤章台等悉誅之竝戮其子孫己巳太白犯亢丙子犯氐加內史按答出太師

元史卷十一 本紀

二

知樞密院事以速速爲御史中丞帝發北邊十一月己丑朔熒惑犯亢車駕次中都修佛事于昆剛殿庚寅太白犯鉤鈴己未犯東咸辛丑帝至大都壬寅熒惑犯氐丁未御大明殿受朝賀癸丑遣官詣曲阜以太牢祀孔子丁巳祭遁甲五福神赦凡有罪自首者槩與原宥十二月己未詔雪楊朵爾只蕭拜住賀勝觀音保鎖咬兒哈的迷失李謙亨成珪王高昉張志弼普顏篤卜顏忽里等冤存者召用死者冬昭官壬戌役夫萬三千五百人浚鎮江漕河及練湖戊辰追尊皇考晉王甘麻刺曰光聖仁孝皇帝廟號顯宗皇妣晉王妃曰宣懿淑聖皇后己巳辰星犯壘壁陣庚午盜入太廟竊仁宗及莊懿慈聖皇后黃金主乙亥太常禮儀院言世祖以來太廟歲惟一享先帝始復古制一

歲四祭帝曰祭祀國之大事朕何敢簡其禮命仍舉四祭從御史趙成慶言鐵木迭爾子鎖南及月魯圖圖哈速敦皆坐與逆謀伏誅辛巳熒惑犯東咸癸未流逆黨諸王月魯不花于雲南按梯不花于海南曲呂不花于奴兒干李羅兀魯思不花于海島以諸王買奴自拔逆黨逃赴上都特封泰寧王命前太師拜忽商議軍國重事倒刺沙爲左丞相敕嶺北省臣修佛事以卻寇兵西僧祈禳大內以厭雷塑馬哈吃刺佛像于延春閣之徽清亭丁亥改元詔曰朕荷天鴻禧嗣大祿服側躬圖治夙夜祇畏惟祖訓是遵開歲甲子景運伊始思與天下更新稽諸典禮踰年改元可以明年爲泰定元年免大都興和差稅三年八番思播兩廣洞寨差稅一年江淮册科包銀三年四川雲南甘肅

元史卷十一 本紀

三

秋糧三分河南陝西遼陽絲鈔三分除虛增田稅免幹脫逋錢振恤雲南廣海八番等處戍軍求直言賜高年帛禁獻山場湖泊之利改吏員出身者秩許至四品是歲廣州新會民犯長弟作亂雲南開南州大阿哀阿三木台龍買六千餘人寇哀卜白鹽井車里于孟寇雲南西番寇鞏昌府各降詔招諭泰定元年甲子春正月乙未重作仁宗及慈聖皇后金主成奉安太廟以乃馬台平章政事甲辰敕譯列聖制詔及大元通制刊本賜百官戊申八番生蠻章光正等及楊黃五種以二萬七千戶來降置長官司撫之己酉召親王圖帖睦爾于瓊州阿木哥于大同丙辰封解州鹽池神曰靈富公定怯薛台歲給鈔人八十錠二月丁巳朔作顯宗影

室甲子作佛事用僧八百人及倡優百戲導帝師游皇城
 庚午選守令推官舊制臺憲歲舉守令推官二人有罪連坐至是言其不便復命中書于常選擇
 人用甲戌初開經筵命張珪王結吳澄鄧文原充講官以
 帝範資治通鑑大學衍義貞觀政要等書進講是月上大
 行皇帝尊諡曰睿聖文孝皇帝廟號英宗三月丁亥朔立
 詹事院以太傅宋台為太子詹事楊廷玉為中書參知政
 事耶爾吉尼知樞密院事給蒙古流民糧鈔遣還所部有
 擅徙者斬丙午立八不罕弘吉刺氏為皇后以皇子阿速
 吉八為皇太子八的麻亦爾開卜嗣封晉王夏四月庚申
 作昭聖皇后御容殿於普慶寺按昭聖皇后文宗母也此時未應追尊作殿史必有誤
 辛酉親王圖帖睦爾至自潭州甲子車駕幸上都留諸
 王寬徹不花失刺平章烏伯都刺右丞善僧等居守發兵

元史卷十一 本紀 四

民築渾河堤辛未月食既癸酉以圖滿迭爾平章政事庚
 辰帝以風烈月食地震手詔至大都戒飭百官曰比者災
 異屢見朕以憂天下為心躬自責謹守祖宗成訓修德
 慎行爾等宜各勤乃職以答天意并令廷臣集議時政得
 失五月丁亥御史董鵬南等言平章乃馬台宣徽使帖木
 爾不花詹事圖滿答爾皆黨附逆徒有虧臣節乞正其罪
 以消天變不報帝諭省臣曰朕即位以來無一人能執成
 法為朕言者知而不言則不忠且陷人於罪自今凡有所
 見宜悉以聞使朕明知法度不敢妄自縱欲非獨朕身天
 下一切政務能守法以行則眾皆又安反是則天下罹于
 憂苦又曰凡事防之於小則易救之於大則難爾其以朕
 言明告有眾俾知所慎壬辰省臣以災異皆抗疏乞罷帝

曰卿等皆辭去國家大事朕孰與圖優詔慰留之戊戌遷
 列聖神主於太廟新殿丙午太白犯鬼侍御史高奎上書
 請求直言辨邪正明賞罰帝嘉其言賜銀幣丁未太白犯
 鬼積尸氣六月乙卯朔蒙化州土官高蘭神場寨主羅九
 寇威楚路庚申張珪至上都奏在廷集議言逆黨未討奸
 惡未除忠憤未雪冤枉未理政令不信賞罰不公賦役不
 均財用不節請裁擇以回天變不報癸亥作禮拜寺于上
 都及大同路給鈔四萬錠丙寅廣西兩江土官黃勝許岑
 世興遣其子弟入貢各授沿邊溪洞軍民安撫使丁卯大
 幄殿成作鎮雷坐靜佛寺帝受佛戒于帝師庚午置海刺
 圖屯田總管府已卯詔疏決繫囚免天下和買雜役三年
 百官四品以下普覃散官一等三品遞進一階遠仕瘴地

元史卷十一 本紀 五

身故不得歸葬者有司資給還鄉秋七月丙戌思州平茶
 楊大車西陽冉世昌寇小石鄂凱江等寨庚子命諸王伯
 顏帖木爾出鎮闊連東部撒忒迷失率衛士佐太師按塔
 出行邊癸卯放廣闊采珠蟹戶為民仍免差稅一年丁未
 置長慶寺掌成宗幹耳朵諸事罷中瑞司汰東宮衛士先止三千人近增至萬七千廣西慶遠徭潘父絹等率眾來
 人命詹事院汰去仍舊制降八月乙卯敕刑獄復隸宗正府刑部勿與辛酉遣翰林
 學士承旨幹赤祀太祖太宗睿宗御容于普慶寺庚午作
 柁木殿椽殿及中宮金脊殿丁丑罷浚玉泉山河役九月
 乙酉封耶速不堅為荆王辛卯罷哈思的結魯思伴卜總
 統所更置臨洮總管府乙巳順宗皇后忌日修佛事飯僧
 萬人改邕州為南寧路冬十月戊午立壽福總管府典累

朝神御殿祭祀庚申命左右丞相日直禁中有事則赴中書丙寅太白犯斗己巳入斗太陰犯填星庚午太白犯斗眞州珠金沙河松江府吳江州諸河淤備民丁浚之命有司兼知渠堰事丁丑封親王圖帖睦爾爲懷王以魯國大長公主女爲王妃壬午熒惑犯壘壁陣遣官分銓閩海兩廣四川雲南選十一月己亥以朮溫台知樞密院事辛丑造金寶蓋飾以珍寶貯佛舍利甲辰作歇山鹿頂樓于上都十二月癸丑朔雲南徭阿吾爲寇庚申同州地震癸亥鹽官州海溢有司請壘石爲塘帝曰築塘是重勞吾民也其增石固杆禦之丙寅敕修英宗顯宗實錄定内外官行禮雨雪免朝服庚午熒惑犯外屏乙亥太白經天曲赦重囚三十八人爲三宮祈福是歲兩浙及江東諸郡水旱壞

元史卷十一本紀

六

田六萬四千三百餘頃大同渾源河眞定滹沱河陝西渭水黑水任縣沙澧洛水定州屯河渠州江水皆溢漂民居成紀縣山崩水溢壅土至來谷河成丘阜各調振有差二年乙丑春正月丙戌辰星犯天雞戊戌西番參卜郎來降賜其長班朮爾鈔帛辛丑命懷王圖帖睦爾出居建康壬寅太白犯建星戊申以乞刺失思八班藏卜爲吐蕃路宣慰使都元帥往鎮參卜郎之地庚戌帝諭宰臣曰曷者卓爾罕察苦魯及山後皆地震內郡大小民饑朕惟太祖開創之艱世祖混一之盛期與人民共享安樂常懷祗懼災沴之至莫測其由豈朕思慮有所不及而事或僭差天故以此示儆歟其與諸司集便民之事定議以聞閏月壬子朔大赦天下除江淮朔科包銀免被災地方差稅一年

罷不急工役置惠遠倉永需庫于海刺圖總管府罷永興銀場聽民開采輸稅己卯山東廉訪使許師敬請頒族葬制禁用陰陽相地邪說修滹沱河堤及野狐色澤桑乾三嶺道二月丙戌頒道經于名山宮觀命道士祭五福太乙神丁亥平伐苗部長的孃率戶十萬來降庚寅熒惑辰星填星聚于畢廣西徭蠻潘寶陷柳城己亥封阿里迷失爲和國公張珪爲蔡國公以善僧平章政事庚子以黃河屢決立行都水監于汴梁命瀕河有司兼知河防事丙午造玉御牀及象輦咸平府清河寇河合流失故道壞堤堰役蒙古軍及民丁數萬修築夏四月癸巳敕宿衛馬駝歸官廩毋散牧民間丁未封后父火里兀察爾爲威靖王戊申以許師敬爲中書左丞馮亨參知政事五月壬子車里陶

元史卷十一本紀

七

刺孟及大阿哀蠻兵乘象寇陷朵刺等十四寨木邦路蠻八廟率契夷寇陷倒八漢寨督邊將嚴設備癸丑龍牙門蠻遣使來貢辛未罷京師官鬻鹽改河間鹽運司爲大都河間等路都轉運鹽司癸酉融州否泉洞吉龍洞洞邨山黑江諸徭爲寇丙子以國用不足敕減廩馬汰衛士罷營繕節諸王歲賜停書金字藏經置諫議書院于昌平祀唐進士劉蕡河決大梁六月己卯朔皇子生命巫祓除內宮丙戌填星犯井鉞星滹州平南縣徭作亂達魯花赤都堅都監姚泰亨死之丙申中書參政左塔不台言大臣兼領軍務前古所無職失以御史大夫耶先帖木爾以知樞密院事皆領衛兵如虎而翼故成逆謀今軍衛之職勿令大臣兼領庶勸舊之家得以保全帝嘉其直賜幣鈔丙午填

星犯井丁未救營造毋役五衛軍雲南阿只弄哀培蠻兵寇開南州白夷寇雲龍州秋七月戊申朔大小車里蠻獻馴象甲寅鎮康路土官佺囊謀粘路上官賽巨羅來降左丞許師敬編類帝訓成更名皇圖大訓命于經筵進講以師敬充經筵官己未置車里軍民總管府以土人寒賽為總管癸亥遣湖廣左丞乞住等將兵討廣西叛猺特命諸王幹耳朵罕監其軍海北猺長盤吉祥寇陽春庚午思州洞蠻楊銀千等來獻方物封駙馬字羅帖木爾知樞密院事火沙竝為郡王壬申加朵台太傅圖忽魯太保日至禁中集議國事救山東州縣收養流民遺嬰八月戊子修上都香殿癸巳歲星犯天罇辛丑救諸王私入京者勿供億諸部曲宿衛私入京者加罪命度支監汰阿塔赤所掌駝

元史卷十一 本紀

八

馬九月戊申朔分天下為十八道遣使宣撫詔曰朕祇承洪業夙夜惟寅凡所以圖治者悉遵祖宗成憲曩者屢詔中外百司宣布德澤調賦詳刑振恤貧民思與黎元共享有生之樂尙慮有司未體朕意庶政或闕惠澤未周承宣者失於撫綏司憲者怠於糾察俾吾民重困朕甚憫焉今遣奉使宣撫分行諸道按問官吏不法詢民疾苦審理冤滯凡可以興利除害者從宜舉行四品以上有罪停職申請五品以下就便斷決其有政績尤異暨晦跡巨園才堪輔治者具以名聞命馬合某李處恭之兩浙江東道朵列圖齊履謙之江西福建道舉林伯蒙弼之江南湖廣道李家奴朱贊之河南江北道阿吉利曹立之燕南山東道別帖木爾韓讓之河東陝西道納哈出董訥之山北遼東道

眾家奴韓廷茂之雲南省寒食劉文之甘肅省圖思廉惇之四川省帖木爾不花吳秉道之京畿道己酉敕有司治義倉募富民入粟拜官以備振諸王幹即遣使貢金浮屠甲寅禁饑民結扁擔社傷人者滿杖丁丑浚河開陳玉帶河冬十月戊寅朔廣西岑世興復叛結八番蠻寇上林等州壬辰熒惑犯氏癸巳填星退犯井丁酉廣西猺蠻何童降請防邊自効十一月戊申周王和世琜遣使獻豹改長寧軍為州丁巳幸大承華普慶寺祀順宗昭獻元聖皇后于影堂戊午填星退犯井及鉞星庚申廣西宣慰使獲猺賊潘寶下之獄其弟潘見復寇柳州壬戌定軍民官廕襲者由本貫圖宗支申請銓授加倒刺沙錄軍國重事丁卯罷蒙山銀冶提舉司壬申諸王幹耳朵罕以追捕廣西猺

元史卷十一 本紀

九

寇上聞帝曰朕自即位累詔天下憫恤黎元惟廣猺屢叛殺掠良民故命爾等往討今聞迎降者眾宜更以恩撫之若果不悛嚴兵追捕勿縱十二月戊寅命塔失帖木爾為右丞相錄軍國重事封薊國公乙酉熒惑犯天江辰星犯建星甲午太白犯壘壁陣詔山東陝西湖廣地接戎夷選宗室重臣往鎮京師多盜增置邏防官兵立捕盜賞格壬寅右丞趙簡請行區田法于內地以宋董煇所編救荒活民書頒州縣是歲保定路饑振鈔四萬錠糧萬五千石雄州水溢被災萬一千六百戶死者給鈔以葬內郡饑振鈔十萬錠米五萬石三年丙寅春正月丙午朔高麗國王王章遣使賀正自元二十一年正月高麗使者不播州蠻長黎平慶等會至是復至然其後亦不數見云

來降壬子徵前翰林學士吳澄不起置都水庸田司于松江掌江南河渠水利己未以山東湖廣官田賜民耕人各三頃仍給牛具辛酉太白犯外屏二月壬午廣西全茗州土官許文傑作亂知州李德卿死之以乃馬台知樞密院事丁亥罷征徭兵召幹耳朵罕還本鎮戍兵如故丙申建顯宗神御殿于盧師寺賜額大天源延聖寺戊戌建殊祥寺于五臺山賜田三百頃庚子以察乃平章政事甲辰立典醫署隸詹事院三月乙巳朔帝以不雨自責命審釋重囚遣使分祀嶽瀆及京城寺觀丙午填星犯井及鉞星癸丑八番巖霞洞蠻來降歲輸布二千五百匹丁巳遣諸王失刺鎮北邊甲子命功德司簡歲修佛事一百三十七戊辰熒惑犯壘壁陣填星犯井庚午填星太白歲星聚于井

元史卷十一 本紀 十

辛未泉州民阮鳳子作亂寇陷城邑軍民官失討坐罪夏四月丙戌鎮安路土官岑修廣為弟修仁所攻來告命湖廣行省撫治之戊戌太白犯鬼壬寅熒惑犯壘壁陣夔州路米洞蠻田先什用等結十二洞蠻為寇湖廣行省遣九姓長官招降之修夏津武河堤役夫萬七千五百人五月甲辰修鎮雷佛事三十一所乙巳罷福建歲供蔗錫廣西岑世興及鎮安路岑修文合山獠角蠻入寇命湖廣雲南兩省招諭之遣指揮使兀都蠻鑄西番呪語于居庸關崖石庚午湖廣永明縣五洞河西加木籠四部來降各立其土官領之六月癸酉朔播州蠻黎平愛謝烏窮為寇宣撫使楊燕里不花招平愛出降烏窮不附命湖廣行省討之己亥納皇姊壽寧公主女撒荅八刺于中宮秋七月甲辰

造象豹氈車三十乘丁未西陽寨土官冉世昌寧遠州洞蠻刁用竝入寇壬子修黑身蠻荅哥佛事于水晶殿皇后受戒殿中鑄五方佛銅像戊午敕入粟拜官者準致仕銓格戊辰太白經天河決陽武漂民居萬六千五百餘家詔瘞京城外棄骸八月戊寅以星變罷獵下詔恤民通政云買寶貨命省臣依累朝呈獻例給價毋得勒減稽遲以病商人甲午罷行宣政院及功德司丁酉太白犯軒轅御女辛丑作天妃宮于海津鎮自世祀天妃累朝無虛歲鹽官州海溢壞堤三十餘里遣使祭灑淨佛事于大明興聖隆福三宮癸亥太白犯太微垣右執法戊辰湖廣雲南各寨土官奉方物來獻即其地置木朵路木來州孟隆路哀培各甸竝給印冬十月辛未朔發

元史卷十一 本紀 十一

卒四千人治通州道辛巳太白犯進賢癸未河水溢汴梁壞樂利堤役丁天六萬四千人築之賜大天源延聖寺吉安臨江二路田千頃省臣言養給軍民必藉地利世祖建大宣文宏教等寺賜永業當時已號虛費成宗復構天壽萬寧寺較前用增倍半若武宗之崇恩福元仁宗之承華晉慶租權所入益又甚焉英宗鑿山開寺損兵傷農而卒無益夫土地祖宗所有子孫當共恤之臣恐茲後藉為口實妄興工作徼福利以逞私欲帝嘉其言終不能用十一月庚子命翰林集世祖嘉言善行為聖訓以時省覽兼備經筵進講癸卯敕西僧每當元辰疏釋重囚仍聽宗正府審奪辛亥追復前平章政事李孟官乙卯太白犯鍵閉辛酉廣西透江團徭及扶靈青溪樸頭等原蠻竝為寇播州

蠻宋王保來降徙上都清寧殿于伯葉兒行宮十二月壬午御史賈屋請耐武宗皇后于太廟不報皇后列傳稱素耐不待俟放帝欲于來年元夕構燈山于內廷御史趙師魯諫遂罷其事丙戌聽陰陽家言發鈔三千錠施僧道及乞人繫囚以禳天變丁亥寧夏地震震者四庚寅召江浙右丞趙簡為集賢大學士領經筵事己亥亳州河溢大寧路水漂民居各八百餘家扶靈洞蠻劉季等來降是歲海運米至京師者三百二十五萬一千餘石振饑民米計一百二十餘萬石給鈔半之終元之世為最多

元史卷十一 本紀

三

榮荅里皇子允丹藏卜帝弟三子先後鎮北邊丁卯浚會通河築鄴州護倉堤役夫三萬人二月辛卯白虹貫日三月辛丑遣使江南求奇花異果癸卯和寧路地震丙午潮州路判官錢珍挑推官梁楫妻劉氏不從誣楫下獄殺之事覺珍自殺詔戮尸傳首辛酉命前太師伯忽預議大事食其俸終身召翰林學士承旨張珪集賢大學士廉恂太子賓客王毅悉復舊職敬儼為集賢大學士竝商議中書省事給累朝售寶價鈔十萬二千錠渾河決發軍民萬人塞之丁卯癸惑犯井以阿散火者知樞密院事夏四月辛未盜竊武宗金主及祭器以典守不嚴罷太常院官癸未鹽官州海溢命都水少監張仲仁發工匠二萬餘人塞之不止癸巳高州猺寇電白縣千戶張恆戰死賜祠曰旌義甲午

奉安武宗新主以阿昔爾為御史大夫五月乙巳命天師張嗣成修醮鹽官州祀海發義倉粟振其民丁卯罷諸王分地州縣長官世襲俾如常調官以三載為攷元江路土官普山一作雙坐贓免遂結蠻兵作亂救復其舊職德慶路猺來降歸所掠男女悉給其親六月辛未命翰林譯資治通鑑以進丁丑以災異罷兩都土木減諸郡繫囚乙未紹慶路四洞蠻阿者降命為蠻夷長官秋七月丁酉元江晉山復叛己亥內郡江南旱蝗薦至丞相以下竝乞解職有旨無多辭朕當自做卿等亦宜各歛厥職建橫渠書院于郿縣祀宋儒張載甲辰播州謝烏窮來獻方物丁未敕經筵講讀官非有代不得去職甲寅市旄牛于西域丙寅塞保安鎮渠役民六千人八月戊辰罷奉元路采捕珍禽異

元史卷十一 本紀

三

獸渚沱河溢發丁浚治河以殺其勢湖廣苗蠻祭伯秧寇李陀寨乙酉作欽明殿成癸巳諡武宗皇后曰宣慈惠聖后傳是年十一月崩而本紀作是月升廟互異俟攷英宗皇后曰莊靜懿聖升附太廟發衛軍八千人修白浮盆山河堤鳳翔興元成都峽州江陵同日地震九月丙申朔日食敕國子監仍舊制歲貢生員業成者六人禁僧道買民田壬子太白犯房甲子定職官贓污者流之廣海閏月己巳太白經天壬申以災變赦天下仍祀天地享太廟致祭嶽瀆諸神冬十月己酉復以趙世延為中書右丞壬子熙參知政事傅巖起為吏部尚書御史韓鏞言尚書三品秩巖起由吏累官四品於法不得升遂止戊午辰星犯東咸壬戌命太常纂修累朝禮儀開南土官阿只弄復率蠻兵為寇十一月庚午授思州

土官田仁爲宣慰使播州謝烏窮爲蠻夷長官雲南蒲蠻來附卽其地置順寧府癸酉太白犯壘壁陣乙亥熒惑犯天江辛卯陽曲縣地震十二月庚子定捕盜格限內不獲者償其贓己未歲星退犯太微西垣上將是歲發米二十四萬九千石振大都饑三十萬石散京師流民

致和元年戊辰春正月乙亥諭百司凡不赴任及擅離職者奪其官避差遣者笞之丁丑命繪蠶麥圖頒農桑舊制十四條于天下己卯帝將敗柳林御史王獻等以歲饑諫帝曰其禁衛士毋擾民家命御史二人沿途巡察戊子罷河南鐵冶提舉司免陝西撈鹽罷益都諸縣食鹽二月庚申詔改元致和免河南自實田糧被災州郡差稅一年流民復業者差稅三年疑獄繫三歲不決者省釋壬戌太白

元史卷十一 本紀 古

晝見三月庚午雲南安隆寨土官岑世忠與兄世興相攻籍其民三萬二千戶來降升其寨爲州以世興知州事攻云宋皇祐開餘姚人岑仲淑從狄青平儂智高雷鎮邕州子自亭襲爲沿邊安撫使來安路都總管後遷入喬利跨有牂牁廣西雲南皆分疆土故岑氏之族爲最大壬申立萬戶府二領征西紅胖襖軍甲戌雅濟國遣使來貢己卯帝御興聖殿受無量壽佛戒甲申遣戶部尚書李家奴往鹽官祀海神命帝師造浮屠二百一十六以鎮海己丑雲南土官撒加布降以其地隸羅羅宣慰司徙懷王圖帖睦爾于江陵夏四月丙申欽州搖黃焱等爲寇己亥禁蒙古色目人倣漢法守制違者除名甲寅封唐柳州刺史柳宗元曰文惠昭靈公五月甲子遣官分護流民還鄉仍禁聚至千人者杖一百丙寅廣西普寧縣僧陳慶安作亂建國改元己巳大理怒江甸

土官阿哀你寇樂辰諸寨庚辰有流星大如缶其光燭地戊子以塔失帖木爾平章政事秋七月辛酉朔寧夏地震庚午帝崩于上都壽三十六葬起輦谷終元之世不爲帝立廟上諡止稱泰定帝王禕曰武宗約繼世子孫兄弟相使武宗二子出居于外及英宗遇弒而明宗在北文宗在南南晉王于世祖爲嫡孫于次爲長則求所當立者舍晉王將誰屬邪舊傳英宗之弒晉邸與聞攷之實錄皆不得其實傳聞之謬豈可信哉

論曰一代統緒之傳有正統卽有公論豈一時私意所能傾倒磔裂者哉世祖明孝太子早卒皇孫成宗立追諡裕宗成宗本裕宗第三子其同母二兄一爲晉王甘麻刺一爲懷王荅刺麻巴刺本無嫡庶而晉邸居長成宗崩後無嗣晉王之子泰定帝卽可嗣立乃因仁宗自懷慶入先靖內難迎立其兄懷寧王於漠北是爲武宗所謂先入關者

元史卷十一 本紀 五

王之非晉王子不當立而必立懷王子也及再傳至英宗遇弒晉王復自漠北入靖內難討賊嗣位是爲泰定與武仁之事相埒非武仁有功宗社而泰定無功也泰定踐阼卽以和林兵柄授周王使代己任屢通朝貢又召懷王自海南入朝京師錫封藩國移近江陵屢賜金幣是泰定於文宗兄弟有德而無怨也泰定太子冊立已五載父終子繼名正言順懷王周王安得入干大統乎若謂武仁當日原有傳位周王嗣及英宗之約則仁宗實背約在前可以責仁宗不可以責泰定也乃文宗篡立之詔謂泰定以旁支入繼正統遂偏甚至誣其與賊臣鐵失潛通陰謀冒干寶位追毀晉王顯宗廟室嗚乎以討賊之主而誣以通賊之罪是何言哉若謂武宗二子爲人心所歸泰定當舍子

而傳姪則何以天麻頒詔至關中至四川至遼東皆焚書
斬使起兵拒命則人心歸泰定之子而不歸武宗之子明
如星日是則燕木帖爾之為逆臣懷王之為逆立亦明如
星日固不待魯桓弑隱奪國已無所逃于春秋之責況欲
寬其罪於中途弑逆之後哉斯非難定之案而數百年尚
無定論請斷之以折曲沃桓叔之徒假託正說者

元史卷十一 本紀 夫

元史卷十一終

元史卷十二 本紀十

明宗

明宗皇帝諱和世疎武宗長子也母妃亦乞列氏武宗生
二子長即帝次圖帖睦爾即文宗成宗大德三年命武宗撫
軍北邊以四年十一月壬子生帝成宗無子武宗入承大
統立弟仁宗為皇太子約以次傳位于帝仁宗得立延祐
按仁宗紀延祐二年十一月封和世疎為周王三年三
中月送周王之雲南而此及文宗紀皆云延祐三年封周
王年數互異故並議建東宮時丞相帖木迭爾欲固位取
改延祐中以概之寵乃議立英宗為皇太子又與太后幸臣識烈門日譖帝
于兩宮于是封帝為周王出鎮雲南置常侍府官屬以圖
忽魯尙家奴孛羅教化等為常侍遣就鎮帝至延安時武
宗舊臣釐日沙不丁哈巴爾圖等來會潛與教化謀曰天

元史卷十二 本紀 一

下者我武皇之天下王之出鎮本非上意由讒構致然請
以其故白行省俾聞之朝廷庶可杜塞離間遂與數騎馳
去先是阿思罕為太師帖木迭爾奪其位出為陝西行省
丞相及教化等至即與平章塔察爾行臺御史大夫脫里
伯中丞脫歡悉發關中兵分道自潼關河中府入已而塔
察爾脫歡中變襲殺阿思罕教化於河中帝乃西行至北
邊金山西北諸王察阿台等咸率眾來附帝至其部與定
約每歲冬居札顏夏居斡羅斡察山春則命從者耕于野
泥十餘年間邊境謐仁宗崩英宗嗣立以帝遠居西北
不足忌而鐵失等復構帝弟圖帖睦爾徙之瓊州英宗遇
弑晉王以大宗入繼泰定元年改封圖帖睦爾為懷王命
居建康致和元年三月徙居江陵泰定帝崩于上都時僉

樞密院事燕帖木爾者武宗舊臣也方畱守京師乃召百官集興聖宮倡言曰武皇有聖子二人大統所在當迎立不從者斬之乃縛平章烏伯都刺等十人下之獄迎帝弟懷王于江陵遣其弟撒敦守居庸關子唐其勢守古北口以拒上都兵懷王入京師羣臣請正大統九月壬申懷王即位于大都改元天祿時泰定帝子阿速吉八年甫九歲在上都丞相倒刺沙立之為帝改元天順遣兵分道攻大都燕帖木爾帥師與戰上都兵屢北十月齊王月魯帖木爾舉兵應懷王襲入上都執倒刺沙等兩都道路始通當是時懷王已即位稱帝號令天下非若仁宗之于武宗虛位以待其來者願以帝居長恐不厭人望于是遣撒迪等相繼來迎帝遂發北邊舊臣尙家奴孛羅哈巴爾圖從至

元史卷十二 本紀

二

金山嶺北武寧王徹徹圖僉樞密事帖木爾不花相繼至乃命孛羅如京師兩都民聞帝使者至驩呼載道曰吾天子果自北來矣諸王舊臣爭先迎謁所至成聚天祿二年正月乙酉撒迪等至入見帝于行幄陳懷王固讓意丙戌帝即位于和寧之北扈行諸王大臣咸入賀乃遣撒迪還京師命之曰朕弟曩好書史邇者得無廢乎聽政之暇宜親賢士大夫講論史籍可知古今治亂得失汝往當以朕意諭之二月壬辰宣靖王買奴自京師來覲辛丑追尊皇妣亦乞列氏曰仁獻章聖皇后三月戊午朔懷王遣燕帖木爾奉皇帝寶來上御史中丞八即刺知樞密院事圖爾哈等各率其屬以從四月癸巳燕帖木爾見帝于行在率百官上皇帝寶帝嘉其勳拜太師右丞相如故復諭曰凡

京師百官朕弟所用者竝仍舊職燕帖木爾奏國家大事所繫者中書省樞密院御史臺宜擇人居之帝然其言乃以武宗舊臣哈巴圖爾平章政事伯帖木爾知樞密院事孛羅為御史大夫甲午立行樞密院命知樞密院火沙領行院事賽帖木爾買奴竝同知行院事是日帝宴諸王大臣于行殿諭臺臣曰太祖有訓美色名馬人皆悅之然方寸一有繫累即能敗名喪德卿等職居風紀亦嘗念及此乎天下國家譬猶一人之身中書其右手也樞密其左手也左右手有病治之以良醫省院闕失不以御史臺治之可乎凡諸王百司違法越禮一聽舉劾風紀重則貪墨懼猶斧斤重則入木深其勢然也朕有關失卿等亦當直言毋諱又命孛羅等宣諭羣臣曰世祖皇帝立省院臺及百

元史卷十二 本紀

三

司庶府其治天下大小職掌已有定制復命廷臣集律令章程以為萬世法列聖相承罔不恪遵成憲朕今居世祖所居之位凡省院臺百司庶政詢謀僉同翻譯所奏以告于朕軍機重務樞密院當即奏聞毋以夙夜為閒故為稽畱其他有所言必先中書院臺其下百司替御之臣毋得隔越陳請違者罰毋赦丁酉以鐵木爾脫為上都畱守懷王立都督府及奎章閣學士院于京師以除目來上帝從之癸卯遣使如京師十日命左丞相鐵木爾補化攝告即位于郊廟社稷立圖帖睦爾為皇太子仍設詹事院以徹里鐵木爾平章政事闊爾吉思為中書右丞甲辰加官吏送寶者秩一等從者賚以幣帛乙巳監察御史劾嶺北平章塔即吉素非勳舊年已七十眊昏殊甚左丞馬謀本晉

邸部民郎中羅里圖魯忽皆晉邸衛卒不諳政務帝如其言罷黜之仍諭自今所當言者毋有所憚五月丁巳朔封帖木爾為保德郡王庚申賜扈蹕宿衛士鈔帛癸亥命有司新武宗幄殿車輿庚午命燕帖木爾升用嶺北行省官吏選用潛邸舊臣御史大夫孛羅中政使尙家奴加特進典四宿衛士壬申封亦憐真八為柳城郡王以八即刺為西臺御史大夫眾家奴為中丞乙亥求皇太子故寶不知所在乃命更鑄丁丑皇太子發京師諸王駙馬及扈衛百官悉從行載乘輿服御送行在六月丁亥朔左丞相鐵木爾補化等以帝即位攝告于宗廟社稷辛亥詔諭中書省凡國家錢穀銓選諸大政先啟皇太子然後奏聞癸丑丞相鐵木爾補化以久旱乞免帝曰修德應天乃君臣當為

元史卷十二 本紀 四

之事朕未嘗斯須忘也皇太子來會當與其國澤民利物者行之七月丙辰朔日食丙子授皇太子金璽壬午遣使詣京師敕平章哈巴圖爾同翰林國史院官致祭太祖太宗睿宗三朝御容發諸衛軍完京城八月乙酉朔次旺忽察都之地丙戌皇太子入見是日宴皇太子及諸王大臣于行殿庚寅帝暴崩年三十從葬諸帝陵是月己亥皇太子復即位十二月乙巳上帝尊諡曰翼獻景孝皇帝廟號明宗文宗紀作十月丙申事蒙古語曰護都篤皇帝至順元年三月壬申祔于太廟後至元六年十月加上尊號為順天立道睿文智武大聖孝皇帝

元史卷十二終

元史卷十三

文宗 憲宗

本紀十一

文宗皇帝諱圖帖睦爾武宗次子明宗弟也母妃唐兀氏大德三年武宗出鎮北邊帝以八年甲辰正月癸亥生武宗崩傳位于弟仁宗延祐中仁宗立子英宗為皇太子乃封武宗長子明宗為周王命鎮雲南而帝尙留京師至治元年中正使咬住誣告脫歡察爾等交通親王將構異圖辭連潛邸于是出帝于瓊州未幾英宗遇弒晉王入立泰定元年正月召帝于海南行至潭州復止之居數月乃還大都改封懷王食邑端州六萬五千戶二年正月仍命出居建康輟耕錄云文宗潛邸金陵適太平興國寺鑄大鐘日若天命在躬此當不壞即投液中鐘成珠宛然在上光采煥發不以灼毀及登大寶方與近侍言向時祝天之讖

元史卷十三 本紀 一

以殊祥院使耶先捏掌其衛事時倒刺沙為相災異數見而帝兄弟播越南北武宗舊臣恆思之致和元年春秦定帝出敗柳林以疾還宮諸王滿圖阿馬刺台太常禮儀使哈海宗正闊闊出等與僉樞密事燕帖木爾謀曰今主上疾日作將往上都脫不諱吾黨扈從者執上都諸王大臣殺之居守者即縛大都省臺官宣言武皇子當正位傳檄諸關守帥則大事濟矣三月秦定帝如上都滿圖闊闊出等從以西安王阿剌忒納失里居守燕帖木爾亦留大都時耶先捏私至上都與倒刺沙圖弗利于帝乃復遷帝居江陵七月秦定帝崩于上都倒刺沙立皇太子阿速吉八改元天順遣使詣大都命平章烏伯都刺收百司印時梁王王禪遼王脫脫手握上都重兵而燕帖木爾實掌大都

樞密符鑰謀于西安王陰圖舉兵八月甲午黎明集百官興聖宮燕帖木爾率阿剌帖木爾孛倫赤等十七人兵皆露刃以欲立武宗二子意號於眾乃手縛平章烏伯都刺伯顏察爾分命勇士執中書左丞朵朶參知政事王士熙參議省事脫脫吳秉道侍御史鐵木哥兀世傑治書侍御史脫歡詹事丞王桓等下之獄推前湖廣左丞相別不花爲中書左丞相詹事塔失海牙平章政事湖廣右丞速速爲中書左丞遣前河南參政明里董阿前宣政使荅里麻失里馳驛迎帝于江陵密以意告河南平章柏顏令簡兵備扈從己亥明里董阿至汴梁悉執行省官收諸司印甲辰帝發江陵召鎮南王鐵木爾不花威順王寬徹普化湖廣平章高昌王鐵木爾補化來會執湖廣左丞馬合某以

元史卷十三 本紀 二

別薛代之遣前西臺御史刺馬黑巴等諭陝西陝西省臺官皆附上都不從般去使戊申進柏顏爲河南行省左丞相己酉上都聞大都師起其諸王大臣滿圖阿馬刺台哈海闊闊出等謀應大都事覺倒刺沙盡殺之庚戌帝至汴梁柏顏等陳兵扈行以阿禮代爲河南平章發平濼民塹遷民鎮禦遼東軍辛亥命燕帖木爾知樞密院事亦列出爲御史中丞壬子阿速衛指揮使脫脫木爾帥其軍自上都來歸命守古北口癸丑上都兵分道入犯脫脫木爾與戰於宜興縣禽平章乃馬台送京師戮之諸王失刺敗走丙辰燕帖木爾奉法駕郊迎丁巳帝至京師入居大內戊午以速速平章政事曹立爲中書右丞張友諒參知政事柏顏爲御史大夫趙世延爲御史中丞耶速台爾同知樞

密院事上都梁王王禪右丞相塔失鐵木爾太尉不花平章買閭御史大夫紐澤等兵次榆林九月庚申朔燕帖木爾督師居庸關遣其弟撒敦擊敗上都兵于榆林隆鎮衛指揮使幹都蠻以兵襲上都執諸王滅里鐵木爾脫木赤于陀羅臺歸于京師陝西兵起入河中府殺守官劫行用庫鈔以應上都太尉不花以兵掠居庸壬戌命高昌王鐵木爾補化知樞密院事耶先捏爲宣徽使徵五衛屯田兵赴京師調淮西平陽保定兵列營黃河聽策應上都諸王耶先帖木爾平章圖滿迭爾以兵自遼東入遷民鎮諸王八刺馬野先帖木爾以所部兵入管州丁卯諸王大臣伏闕請帝早正大位帝曰大兄在朔方以長以德當有天下朕敢紊天序乎燕帖木爾固請帝曰必不得已必明著朕

元史卷十三 本紀 三

意播告中外而後可遣撒敦拒遼東兵于薊州元帥阿兀刺守居庸關上都兵攻碑樓口指揮使耶速台爾禦之不克戊辰以明里董阿闊闊台並平章政事命襄陽萬戶楊克忠鄧州萬戶孫節以兵守武關己巳鑄御寶成立行樞密院于汴梁以耶速台爾知行院事將兵行視大行諸關西擊河中潼關軍括北路民馬以摺疊弩分給守關軍士上都諸王忽刺台引兵攻崞州庚午遣軍民守歸峽諸隘辛未帝常服謁太廟分治叛黨烏伯都刺鐵木哥棄市朵朶王士熙伯顏察爾脫歡等各流遠方壬申帝卽位受朝賀改元大赦詔曰洪惟我太祖肇造區夏世祖混一海宇爰立定制以一統緒宗親各受分地勿敢妄生覬覦世祖之後成武仁英惟公天下之心以次相傳宗王貴戚咸遵

祖訓至於晉邸具有盟書願守藩服而與賊臣鐵失等潛通陰謀冒干寶位使英宗不幸罹於大故朕兄弟播越南北備歷艱險朕以叔父之故順承惟謹于今六年災異迭見權臣倒刺沙等專權自用疏遠勳舊廢棄忠良變亂祖宗法度空府庫以私其黨類大行上賓利於立幼顯握國柄用成其奸宗王大臣以神器不可久虛天下不可無主周王遠隔朔漠民庶皇皇已及三月誠懇迫切朕姑從其請謹俟大兄之至遂朕固讓之心已於致和元年九月日即皇帝位其以致和元年為天祿元年可大赦天下癸酉封燕帖木爾為太平王將兵擊遼東軍徵左右兩阿速衛老幼軍赴京師不行者斬乙亥罷會福殊祥二院立太禧院設壽福會福隆禧崇祥四總管府隸之分奉神御殿祠

元史卷十三 本紀

四

祭上都梁王王禪兵襲居庸關將士皆潰燕帖木爾軍次三河丙子王禪游兵至大口燕帖木爾還軍次榆河帝出齊化門視師戊寅詔諭中外曰近以奸臣倒刺沙烏伯都刺潛通陰謀變易祖宗成憲既已明正其罪凡回回種人不預其黨者各安業勿懼有因而煽惑者罪之敕軍中逃歸及京城游民敢攘民財者斬命雷守司完京城軍士乘城守禦燕帖木爾與王禪前軍戰于榆河北敗之追奔至紅橋阻水而陣上都樞密副使阿刺帖木爾指揮使忽都帖木爾以兵會王禪來助戰又敗之庚辰太白犯亢辛巳以別不花知樞密院事依前中書左丞相燕帖木爾與上都兵復戰于白浮之野敗之脫脫木爾與遼東軍戰于薊州之檀子山王禪等竄身山谷次日收集散亡復來戰

敦脫脫木爾前後夾擊又敗之追及昌平北王禪單騎走甲申慶雲見定各道廉訪官用蒙古二人畏吾河西回回漢人各一人各司書吏以職官教授各路司吏鄉貢進士參用御史臺經歷品秩相當者除各道廉訪使都事除副使譯史通事攷滿不得除御史靖安王闊不花將陝西兵潛由潼關南水門入分據陝州乙酉以明里董阿平章政事燕不鄰知樞密院事上都兵入古北口分掠石槽燕帖木爾先遣撒敦倍道趨石槽掩其不備擊之自率大兵繼至轉戰至牛頭山禽駙馬孛羅帖木爾等送闕下戮之脫脫木爾與遼東軍戰薊州南殺獲無算調河南蒙古軍五萬人增守京師臨清萬戶府軍萬三千五百人守益都般陽諸海港丁亥遼東軍抵京城燕帖木爾拒之募丁壯乘

元史卷十三 本紀

五

城固守令冀寧晉寧所轄代州雁門關崞州陽武關嵐州大潤口皮庫口保德州寨底天橋白羊三關石州塢堡口汾州向陽關陽州烏門關吉州馬頭秦王嶺二關靈石縣陰地關皆穿塹壘石以為固戊子上都諸王忽刺台兵入紫荆關行樞密院卜顏幹都蠻指揮使耶速台爾將兵拒之西臺御史大夫耶先帖木爾起兵從大慶關渡河殺河中府官河東官吏聞風棄城走召雲南左丞相耶爾吉尼不至冬十月己丑朔燕帖木爾引兵至通州擊敗遼東軍遣脫脫木爾將兵援紫荆關調江浙兵禦潼關河南兵守虎牢關庚寅燕帖木爾與遼東軍夾潞水而陣遼東軍宵遁辛卯以即位告郊廟社稷時享之禮改用仲月癸巳忽刺台游兵進逼南城令京城戶出壯丁一人持兵仗從軍

士守城仍於諸門列甕貯水以防火燕帖木爾及陽翟王太平國王朵羅台戰于檀子山之棗林其子唐其勢陷陣殺太平死者蔽野甲午脫脫木爾章吉與耶先捏合擊上都兵于良鄉轉戰至盧溝橋乙未燕帖木爾率軍循北山西趣良鄉時諸將與忽刺台阿刺帖木爾戰于盧溝橋聲言大軍至上都兵潰遣使頒詔至陝西省臺官毀詔械使者送上都湘寧王八刺失里引兵入冀寧救萬戶和尙將兵由故關援之殺獲甚眾會上都兵大至和尙退保故關冀寧遂破戊戌調湖廣平章乞住以兵守歸峽左丞別薛守八番以備四川軍諸將追阿刺帖木爾至紫荆關獲之送京師棄市平章圖滿迭爾引遼東軍復入古北口燕帖木爾與戰于檀州南敗之走還遼東辛丑以脫脫木爾知

元史卷十三 本紀

六

樞密院事亦列赤爲御史大夫齊王月魯帖木爾東路蒙古元帥不花帖木爾以兵徑襲上都梁王王禪遁遼王脫脫被殺遂入城執丞相倒刺沙盡收上都諸王符印壬寅以耶先捏知行樞密院事章吉爲行院副使與知院事耶速台爾等將兵西擊潼關耶先帖木爾軍至晉寧本路官皆遁甲辰罷晉邸及遼王所轄路府州縣達魯花赤選流官代之丙申敕凡有罪者既籍其家妻子並免入官丁未以欽察台平章政事珺璐不花爲御史中丞以度支經用不足權停諸王駙馬宿衛官及內侍宮人歲給芻豆陝西兵至鞏縣黑石渡遂據虎牢進薄武關庚戌帝御興聖殿齊王月魯帖木爾奉上皇帝寶下倒刺沙于獄詔罷內郡兵江浙兵往潼關者仍還鎮辛亥雲南徹里路土官刁賽

銀羅甸土官哀贊等來貢癸丑燕帖木爾辭知樞密院事命其叔蒙古元帥不花帖木爾代之覈上都倉庫錢穀甲寅罷徽政院改立儲慶司湘寧王八刺失里趙王馬札罕諸王忽刺台前承上都命各起兵南侵冀寧還次馬邑元帥耶速答爾執送京師耶先鐵木爾兵北趨懷孟至潞州鐵木哥南破武關入鄧州河南大震丁巳毀顯宗室升順宗附右穆第二室成宗附右穆第三室武宗附左昭第三室仁宗附左昭第四室英宗附右穆第四室戊午奪上都官吏符印制敕盜殺太尉不花有司論盜當抵法帝以不花不道眾所共知宥盜死十一月己未重給內外百司印命太保伯答沙總兵北邊給遼東降軍行糧遣還民間子女被掠者命追理完娶庚申汰近歲白身爲官者辛酉耶

元史卷十三 本紀

七

先捏兵至武安耶先鐵木爾以軍降河東州縣盡殺所署官吏癸亥帝宿齋宮甲子服袞冕享太廟辛未鐵木哥兵入襄陽知縣谷庭珪主簿張德死之癸酉雲南土官元江普山姚州高明威楚路脫放九十九寨必耶姑等各來貢甲戌安置泰定后及二妃于東安州杖諸王失刺流之遠方丁丑荆王耶速耶不干傳檄至襄陽鐵木哥引兵走庚辰遣使奉迎周王于漠北以敬儼平章政事徹里帖木爾爲中書左丞珺璐不花爲右丞癸未殺故丞相倒刺沙磔其尸于市王禪亦賜死馬某沙紐澤撒的迷失耶先鐵木爾等皆棄市甲申命威順王寬徹普化還鎮湖廣罷行宣政院及行都水監左丞相別不花罷十二月己丑朔以天壽節禁屠宰詔海船至福建賈易者江浙行省選廉吏征

其稅丙申幸大崇恩福元寺謁武宗神御殿竄耶先捏于南寧庚子大赦追賜諸王滿圖為果王阿馬刺台為毅王闊闊出等十七人並賜功臣號命有司刻其功于碑陝西省臺官焚毀詔書坐當流以赦故永不錄用辛丑立龍翊侍衛親軍都指揮司分掌欽察軍設內宰司隸儲慶司罷中瑞司乙巳加柏顏太尉與亦列赤並為御史大夫戊申加柏顏太保知樞密院事甲寅復遣侍御史撒迪內侍不顏圖古思奉迎周王子漠北丁巳以徹里帖木爾轉中書右丞躍里為左丞趙世安參知政事戊午免被兵郡縣雜役弛山場河濼禁私貸者俟秋成責償許蒙古色目人居喪守制是月復召雲南耶爾吉尼又不至加諡唐司徒顏真卿正烈文忠公陝西自泰定二年至是不雨大饑民相

元史卷十三 本紀

八

食杭州鎮江池州等路水沒民田萬四千餘頃河北山東有年

天祿二年己巳春正月己未朔立都督府總左右欽察及龍翊衛軍庚申遣太府太監沙刺班奉金幣赴周王行在辛酉命高昌王鐵木爾補化為左丞相王毅平章政事欽察台知樞密院事燕帖木爾為御史大夫甲子太白犯壘壁陣辛未封知樞密事火沙為昭武王多列帖木爾復為楚王甲戌復鹽制每四百斤為引引為鈔三錠丁丑減鷹房等食鷹師豹之食舊支肉價二百餘錠近增至萬二千八百錠控鶴舊止六百二十八戶今增至二千四百戶故辛巳起復中書左丞史惟良為御史中丞以阿禮平章政事壬午贈緱山處士杜瑛為翰林學士諡文獻癸未遣宣靖王買奴往周王行在丙戌周王即位于和寧

二月庚寅命燕帖木爾復為右丞相辛卯立妃弘吉刺氏為皇后帝御殿受朝賀廣西思明路總管黃克順來貢癸巳遣翰林侍講學士曹元用祀孔子于闕里辛丑追尊皇妣唐兀氏曰文獻昭聖皇后雲南蒙通蒙算甸開南銀沙羅甸等土司各入貢己酉熒惑犯井辛亥合肥縣地震壬子命有司造行在帳殿甲寅立奎章閣學士院于興聖殿西命儒臣進講經史設羣玉署藝文監隸之復設藝林庫廣成局隸藝文監輟耕錄云奎章閣為屋三間南向以藏左右列珍玩初名奎章閣後升為奎章閣學士院置羣玉內司掌玩古物藝文監檢校書籍鑒書博士監辨字書授經郎等書製身牌五十五上書奎章閣命各官懸佩出入宮門無禁○東山文集云建奎章閣命各官懸御書刻石識以前四復奏然後子之○硯北雜志云奎章閣壁有宋徽宗畫承平殿曲宴圖并書自製曲宴記命

元史卷十三 本紀

九

更鑄鈔板毀其刻者三月辛酉遣燕帖木爾奉皇帝寶詣行在復命有司齎金千五百兩銀七千五百兩幣帛四百匹金腰帶二十副以備賜予癸亥命造乘輿服御北迎大駕改潛邸所幸諸路名建康曰集慶江陵曰中興瓊州曰乾寧潭州曰天臨戊辰雲南諸王蒼失不花等數丞相耶爾吉尼專擅十罪將殺之耶爾吉尼遁入八番蒼失不花偽署參政等官己巳建大龍翔集慶寺給鈔萬錠丁丑帝母文獻昭聖皇后神御殿月祭命如列聖故事夏四月癸卯行在遣武寧王徹徹圖來錫命立帝為皇太子丙午占臘國貢羅香木及象豹白猿戒諸王分邑達魯花赤受代不得仍留官所其父兄所居官子弟不得再任辛亥振鄧州通州被兵民所俘子女命遼陽行省簿錄完聚河南陝

西諸路饑召商入米中鹽行入粟補官之令并括江淮僧道餘糧五月丁巳朔遣翰林學士承旨阿鄰帖木爾北迎大駕庚申太白犯鬼甲戌命中書省擬注中書六部官奏于行在丙子改儲慶司爲詹事院丁丑帝發京師北迎戊寅次大口庚辰次香水園六月丁亥朔鐵木爾補化以旱乞避相位諭曰皇帝遠在沙漠未能卽至是以暫攝大位今亢陽爲虐皆予闕失所致汝其勉盡職業祇修實政以上蒼天變仍命馳奏行在丁未太白晝見庚戌次于上都之六十里店辛亥賜岐陽書院額祀周公爲文憲王仍設學官春秋釋奠秋七月丙辰朔日食丁巳次上都之三十里店己未更定遷徙法驗所居遠近以千里爲率在道遇赦者得放還再犯者徙本省不毛之地本犯死妻子聽歸

元史卷十三 本紀 十

癸亥太白經天辛巳令諸王封邑達魯花赤擇本部年二十五以上識治體者補充冒濫者罪及王傅八月乙酉朔行在次于旺忽察都之地帝以皇太子入見明宗宴太子及諸王大臣于行殿庚寅暴崩帝入臨哭盡哀燕帖木爾傳皇后八不沙命奉寶璽授帝遂還編目云有謂燕帖木爾初上璽綬明宗從官不爲禮燕帖木爾怒且懼既而明宗暴崩燕帖木爾聞哭聲卽奔入帳中取寶璽扶帝上馬南馳壬辰命柏顏爲左丞相欽察台阿爾思蘭海牙趙世延竝平章政事多爾只爲右丞阿榮趙世安竝參知政事塔失鐵木爾知樞密院事鐵木爾補化鐵木爾脫竝爲御史大夫癸巳帝至上都乙未流諸王忽刺出于海南己亥復卽位大赦詔曰朕惟太祖肇造帝業列聖相承世祖既大一統卽建儲貳惜我裕皇天不假年成宗入繼纔十餘載我皇考武

宗歸膺大寶克享天心志存不私以仁廟居東宮遂嗣宸極甫及英皇降割我家晉邸違盟構逆據有神器天示譴告竟隕厥身於是宗戚舊臣協謀舉義正名討罪揆諸統緒屬在眇躬朕念大兄播遷沙漠以賢以長厯數宥歸力拒羣言至於再四乃曰艱難之際天位久虛則眾志弗固恐墮大業朕雖從所請秉志不移是以固讓之詔始頒北迎之使隨遣尋奉寶璽遠返于途先帝受寶卽位之日卽遣使授朕皇太子寶朕幸釋重負實獲素心乃率臣民前迎大駕而先帝跋涉山川蒙犯霜露道里遼遠自春徂秋懷艱阻于歷年望都邑而增慨徒御弗慎屢爽節宣信使往來相望道路彼此思見交切於懷八月一日大駕次旺忽察都朕欣瞻對有期兼程先進相見之頃悲喜交并何

元史卷十三 本紀 十一

數日之間而宮車弗駕國家多難遽至于斯念之痛心以夜繼旦諸王大臣復謂祖宗基業之隆先帝付託之重天命所在誠不可違請卽正位以安九有朕以先皇奄棄方新摧怛何忍銜哀辭對固請彌堅執諍伏闕者三日皆爲宗社大計乃以八月日卽位于上都大赦天下時帝再卽位距明宗之崩庚子命阿榮趙世安督造建康龍翔集慶寺且命臺臣監工癸卯幸世祖所御幄殿祓祭遣欽察台還京師經理政務燕帖木爾留上都監給恩資金幣己酉車駕發上都庚戌復改詹事院爲儲政院以衛候司及江淮財賦諸色民匠二總管府隸之甲寅前丞相別不花潛與日者推測聖算命安置集慶九月乙卯朔市故宋太后全氏田爲大承天護聖寺永業改太禧院爲太禧宗禮院辛酉

命凡往行在所送寶官吏越次超升者皆從黜降丁卯帝
至大都敕翰林奎章閣輯本朝典故準唐宋會要名經世
大典戊辰定使者頒詔赦率日行三百里既受命而逗留
三日及所至宴飲稽期者治罪取賂者以枉法論甲戌廣
西思明州黃宗永雲南威楚路哀放脫放木邦路渾都各
遣子來貢丙子立溫州路竹木場論耶先捏以不忠不敬
伏誅癸未建顏子廟于曲阜所居陋巷冬十月甲申朔帝
服袞冕享太廟辛卯立元江宣慰司於雲南甲午敕朝官
以三十月為一攷外任以三年為滿除風憲官役不得越
制遷調丙申命江西湖廣分漕米四十萬石以紓江浙民
力賜天妃廟額曰靈慈加上大行皇帝尊諡曰翼獻景孝
皇帝廟號明宗壬寅大寧路地震命諸王公主官府寺觀

元史卷十三 本紀 三

賜田悉輸租於官給鈔以酬其直癸卯改瓊州安撫司曰
乾寧安撫司升定安縣為南康州以土人王官知州事甲
辰徵朵朵王世熙等十二人於貶所放還鄉里追封三寶
努為郢城王諡榮敏庚戌以親祀太廟禮成詔天下罷大
承天護聖寺工役囚在獄三年疑不決者釋之免民間拖
欠官錢無可追徵者大都至上都諸驛供給繁重悉官為
應付免徵奉元路商稅并各處煎鹽竈戶雜役申私宰馬
牛禁十一月丙辰詔列聖諸宮后妃陪從之臣永給衣廩
芻粟戊午特命多耳只亦都護為河南行省丞相近制行
舊臣不拘此例癸亥以闊徹伯知樞密院事位居眾知
院上罷功德司入宣政院己巳以撒迪為中書右丞癸酉
太陰犯填星丁丑造青木棉衣萬領賜圍宿軍十二月丙

戊詔百官言朝政得失錄所上章疏善者即行庚寅定風
憲官赴任毋拘遠近均給驛辛卯詔諸僧寺田當輪租者
仍免役僧還俗者聽復為僧己亥加封大都城隍神為護
國保寧王加諡漢長沙王吳芮為長沙文惠王壬寅命江
浙印佛經二十七藏甲辰罷吐蕃巡捕都元帥府以瑀瑤
不花為御史大夫兼領隆祥府事辛亥改上都餽頭山為
天祿山壬子織武宗御容成即神御殿作佛事敕凡階開
府儀同三司者班居一品上是歲陝西饑民一百二十三
萬餘口河南餓死者二千餘人山東饑民六十七萬六千
戶振鈔百三十四萬九千六百錠糧二十五萬一千七百
餘石討平四川囊加台雲南諸王圖堅之亂滇蜀悉定
至順元年庚午春正月丁丑遣使齎黃金二千兩詣杭州

元史卷十三 本紀 三

書佛經己卯封太醫院使野里海身為秦國公辛巳改大
都田賦提舉司曰宣農荆襄提舉司曰濟農香戶平江提
舉司曰善農加封秦蜀郡太守李冰為聖德廣裕英惠王
其子二郎神為英烈昭惠靈顯仁祐王冰為蜀郡守鑿離
堆以溉民田沃野
千里而無水患號
為陸海蜀人德之二月壬午朔以趙世安為御史中丞史
惟良為中書左丞雲南麓川蒲蠻來貢丁亥命富民輸粟
補官庚寅命奎章閣譯國朝典章為漢語入經世大典趙
世延虞集等專任纂修虞集等辭職帝曰昔我祖宗睿知
聰明其於致治之道自然生知朕以統緒所傳實在眇躬
夙夜憂懼自維早歲跋涉艱阻既乏生知之哲於國家治
體豈能周知故立奎章閣置學士員日以祖宗明訓古昔
治亂得失陳說於前使朕樂於聽聞卿等其悉所學以稱

書左丞冬十月戊申朔飭衍聖公崇奉孔子廟事壬子立
宣忠扈衛親軍都萬戶營於大都戊午帝致齋大明殿庚
申出次郊宮辛酉帝服大裘袞冕祀昊天上帝於南郊以
太祖皇帝配禮成大赦天下自世祖至是凡七世有大祀
皆攝事至是始舉親祀之禮
甲戌敕累朝宮分官署凡文移無得稱皇后止稱某位下
娘子其委用官屬並由中書擬奏元制每朝自正宮外率
多稱皇后太祖憲宗各五位
世祖自順聖皇后外四幹耳共七位他做此至是始定
其稱賜伯夷叔齊廟額曰聖清歲春秋祀以少牢十一月
辛巳陝西左丞怯烈坐受人僮奴及鸚鵡御史臺請論如
律帝曰位至宰執食國厚祿猶受人生口罪固宜也至以
鸚鵡微物論賊失之苛嗣後凡饋禽鳥者勿以賊論甲申
熒惑退犯鬼丙戌太白犯壘壁陳樞密院請依舊制全給

元史卷十三

本紀

六

鷹房芻粟帝曰國用皆百姓所供當量入為出朕豈以鷹
房失所重困吾民哉不從辛卯以開闢台知樞密院事兼
大都留守辛丑徵河南民自實田糧不通舟楫者許以鈔
代十二月己酉以董仲舒從祀孔廟定國子生積分及等
者省臺集賢院奎章閣官同攷試中式者依等第授官不
中者復入學肄業辛亥立燕王阿剌忒納荅刺為皇太子
癸亥恩州諸王按灰坐擊傷巡檢官杖之謫還廣寧王所
部充軍甲戌敕各行省凡邊防有警許便發兵是歲汴
梁大名等路饑民六十七萬七千戶各給米鈔安豐廬州
饑以兩淮鹽課鈔振之

二年辛未春正月己卯加大承天護聖寺僧寶峯壇主嚴
吉祥為司徒癸未立侍正府以總近侍遣官按行北邊牧

地丁亥以晉邸部民二萬四千餘戶隸壽安山大昭孝寺
為永業戶辛卯皇太子阿剌忒納荅刺薨耐葬山陵甲辰
敕建孔子廟於後衛乙巳監察御史劾本臺中丞和尙受
人婦女御史臺又連劾福建宣慰使哈只燕南廉訪使卜
咱爾貪污及奎章閣參書雅琥阿媚權臣詔以赦前並禁
錮元籍御史萬家閭嘗薦和尙脫脫嘗舉卜咱爾並連坐
封蒙古巫者所奉神為靈感昭應護國忠順王號其廟曰
靈祐二月戊申立廣教總管府掌僧尼之政日京畿山後
道遼東山北道河南荆北道兩淮江西北道湖廣南道浙
西江東道浙東福建道江西廣東道廣西兩海道又燕南
雲南諸路凡十六所府設達魯花赤同知判官各一員宣
政院選流內官擬注總管則以僧為之四川懷德府驢谷
什用田先什用等及生蠻十二洞內附升其府為宣撫司

元史卷十三

本紀

七

諸洞各設長官己酉白虹貫日壬子太白晝見以伯撒里
平章政事朵爾只班參知政事高履亨許有壬並參議省
事乙卯太白犯昴壬申雲南景東甸蠻官阿只弄遣子獻
馴象升甸為景東府常賦外歲增輸金五十兩修上都洪
禧崇壽殿三月丙子朔熒惑犯鬼丙戌雨土霾司徒香山
陳符讖請頒告中外不允香山言陶弘景胡笳曲有負屣
生年紀號適合此實天命之符翰林諸臣謂唐開元間太
子寶客薛讓進武后鼎銘云上天降監方建隆基為玄宗
受命之符姚崇表賀宋司馬光斥其采偶合之文為符瑞
乃小臣之詭而宰相實之是侮其君也今從其言恐啟識
緯之端非所以癸巳製累朝神御殿名世祖曰元壽世祖
定民志事遂寢順聖皇后曰睿壽南必皇后曰懿壽裕宗曰明壽成宗曰
廣壽順宗曰衍壽武宗曰仁壽皇妣昭聖皇后曰昭壽仁
宗曰文壽英宗曰宣壽明宗曰景壽御史臺劾大都總管

劉原仁僥倖巧宦工部尙書蘇炳性行貪邪詔罷其職壬寅析欽察爲左右二衛癸卯以儒學教授聽選者多凡仕由內郡江淮者注江西江浙湖廣由陝西兩廣者注福建由甘肅四川雲南福建者注兩廣夏四月丙午朔全寧民王脫歡獻銀鑛詔設銀場提舉司隸中政院庚戌頒天麻初兵興功賞帝曰燕帖木爾首倡大義躬擐甲胄柏顏在河南先誅搆貳使朕道路無虞兩人功無與比其賞不可與眾同加賜七寶腰帶金帛真定武涉縣地震逾月不止戊午命興和建屋居海青上都建屋居鷹鵠甲子平章欽察台獻名園給鈔千錠酬其直御史張益劾欽察台在英宗朝陰與中政使咬住造謀誣告反覆不可信用詔奪職禁錮廣東且降旨獎益直言戊辰奎章閣以修經世大典

元史卷十三 本紀

六

請從翰林國史院取脫卜赤顏一書即今之紀累朝故事起居注學士承旨押不花言此祕禁國書非可令人傳者不與詔以泥金畏吾字書無量壽佛經千部并大乘經一藏敕在京百司日集公署自晨及暮毋廢事五月丁丑熒惑犯軒轅左角丙戌諭太禧宗禋院汰僧徒累朝所建大萬安三千一百五十人歲給衣糧今其徒很多汰去九百四十三人己丑置雲南孟定孟自蘆傳三路總管府者線蒙慶甸銀沙羅等甸竝爲軍民府孟併孟廣者樣等甸竝設長官司皆土人爲之癸巳威楚路蒲蠻猛吾來朝願入銀爲歲賦詔置散府一及土司三十三所甲午太白犯畢以平江官田五百頃立稻田提舉司隸宮相都總管府乙未以脫別台知樞密院事纂修經世大典成丙申八番西蠻官阿馬路入貢庚子太陰犯太白

辛丑太白經天甲辰改阿速萬戶府爲宣毅萬戶府六月乙巳朔徵儲政院鈔三萬錠給中宮道路費丁未太白晝見乙卯御史陳良劾江浙廉訪使脫脫赤顏私收父妾冒封詔罷職追還封制癸亥定辭訟起減由己者罪加常人一等免控鶴衛士當驛戶丁卯太陰犯畢太白犯并集賢大學士吳澄卒特徵河南儒士吳炳爲藝文監典籍秋七月甲戌朔從藝文少監歐陽玄言改給衍聖公銀印海南黎蠻作亂時建大興龍普明寺于海南工費繁多黎人不勝其擾故亂壬辰命脫別台爲御史大夫乙未立閔子書院于濟南丁酉調甘州兵守參卜郎以防吐蕃戊戌封柏顏爲浚寧王八月甲辰朔日食封脫憐忽圖魯爲靖恭王沙藍朵爾只爲懿德王內史怯烈該爲豐國公甲寅御製上都孔子廟碑乙卯太白犯

元史卷十三 本紀

九

軒轅大星己未內侍撒里不花坐巫蠱事杖流海南庚申太白犯軒轅左角九月癸酉朔築駐蹕臺于大承天護聖寺東御史臺劾四川參政馬鎔冒借俸鈔娶妾且詬詈平章汪壽昌帝曰綱常之理尊卑之分懵無所知其何以居上臨下可亟罷斥之又言江西參政李允中乃宦者李邦璽養子不堪任重選竝削籍丙子太白犯填星海南賊王周糾十九洞黎蠻作亂命湖廣左丞移刺四奴討之癸巳罷供需府覆實司改立廣設司禁諸驛毋畜竄行馬冬十月丁巳以江浙平江等路水傷稼減明年海漕米遣官赴通潮陵滄四州和糴粟豆以足國用乙丑立昭功萬戶都總府丙寅命大都路定時估每月朔望送廣設司以酬物價十一月壬申朔日食詔四川給鹽雲南啖馬亦奚不薛之地所牧

官馬歲給鹽以每月上寅日啖之則馬健無病此因亂雲南無鹽馬多死故令四川給之丙子封諸王
幹即為保寧王薩班為幽國公以耿煥參知政事癸未帝
養燕帖木爾子塔刺海為子賜居第詔每歲遣樞密院宗
正府官巡察遼陽諸郡毋令諸王所部擾民辛卯定諸鹽
課鈔以十分之一收銀銀每錠五十兩折鈔二十五錠十
二月戊申西臺御史高坦劾御史陳良逞勢蔑法有旨奪
其敕命以黃金符鐫文曰翊忠徇義迪節同勳賜都指揮
使欽察旌其天庥初紅橋戰功王子復命諸王忽刺出還
鎮雲南癸丑定諸職官父母在者三年聽給定省假無父
母者五年聽給拜墓假各計道里遠近立限期其匿而不
省觀者坐以罪丁巳雨木冰辛酉遣官詣各道錄囚是歲
徙安權貼睦爾于廣西之靜江發通州官糧振檀順昌平

元史卷十三 本紀 三

民九萬餘戶出山東鹽課鈔振益都民二萬餘戶博興州
民九千戶

三年壬申春正月己卯廣西羅韋里叛寇馬武冲等合龍
州嶺北朗龍洞韋大蟲攻陷那馬達那馬安等砦壬午加
封孔子妻鄆國夫人拜官氏為大成至聖文宣王夫人戊
戌諸王章吉獻幹羅思百七十人酬鈔五千錠庚子萬安
軍黎蠻王奴羅寇陵水縣夔路忠信寨洞主阿具什用寇
施州二月辛丑朔詔修曲阜宣聖廟命四川轉運鹽司兼
邛州鹽井邛州有二井未舊名曰金鳳茅池天庥初九月
地震鹽水涌溢州民願作什器煮鹽輸課故令
兼三月庚午朔發鈔萬錠給蒙古孤貧人已丑復立功德
司及典瑞司掌中宮歲作佛事癸巳改皇子古刺答納名
曰燕帖古思乙未帝師泛舟高梁河調衛士三百人挽舟

夏四月壬寅四川師壁散毛盤速出三洞蠻野王等大盤
洞謀者什用等來貢戊午命奎章閣譯貞觀政要鏡板印
賜百官五月己巳朔從撒迪請備錄帝固讓奏答及訓敕
辭命續為蒙古脫卜赤顏一書置之奎章閣癸酉熒惑犯
東井戊寅京師地震戊子遣使往帝師所居撒思吉牙吉
加一作之地以珠織制書宣慰其屬仍分給鈔幣庚寅置山
東益都金銀銅鐵提舉司壬辰從太常博士王瓚言禁加
封淫祠丁酉白虹竝日出長竟天追封顏子父顏無繇為
杞國公諡文裕母齊姜氏為杞國夫人諡端獻妻宋戴氏
為宛國夫人諡貞素六月己亥朔給還朵朶王世熙脫歡
等家賞並聽錄用己酉以趙世安為中書左丞乙丑從御
史陳思謙言嚴奪情起復之禁秋七月戊辰朔命僧於鐵

元史卷十三 本紀 三

幡竿修佛事施金百兩銀千兩鈔萬錠壬午江西行省造
螺鈿几榻遺燕木帖爾詔賜匠者帛八月乙巳天鼓鳴於
東北丙午遣官祭社稷每歲上戊之典秦定
朝無文至是乃一祭丁未有事於
太廟己酉隴西地震帝崩於上都壽二十九癸丑葬起輦
谷元統二年正月己酉上尊諡曰聖明元孝皇帝廟號文
宗蒙古語曰札牙篤皇帝三月己酉附于太廟順帝本紀
作四月己
卯後至元六年以帝謀不軌使明宗飲恨而終詔除其廟
主

論曰元代諸帝不習漢文凡有章奏皆由翻譯其讀漢書
而不用翻譯者前惟太子真金從王憚王恂受學後惟文
宗潛邸自通漢文而已書畫譜言文宗在潛邸時召畫師
房大年俾圖京師萬歲山大年以未至其地辭文宗遂取

筆布畫位置頃刻立就命大年按橐圖上大年得橐故藏之意匠經營雖積學專工有所未及始知文宗之多材多藝也及踐阼後開天章閣招集儒臣撰備經世大典數百卷宏綱鉅目禮樂兵農燦然開一代文明之治即其聲色儉澹亦遠勝武宗此豈庸主所希及哉使其迎立明宗之日亦如仁宗之退處東宮他日明宗復如武宗之傳仁廟則一代而勝事再見雖殷人弟兄世及何以過此易曰開國承家小人勿用文宗之得大位也以燕帖木爾其得罪萬世也亦以燕帖木爾語曰治世之能臣亂世之奸雄文宗之不隕于大平王手者亦倖矣哉

寧宗皇帝諱懿璘質班明宗次子也母皇后乃馬眞氏明宗有子二人長安權帖睦爾次即帝文宗天祿二年封帝

元史卷十三 本紀

三

爲郎王文宗崩右丞相燕帖木爾請立皇子燕帖古思皇后導揚末命申文宗固讓初志欲傳位明宗子時安權帖睦爾居靜江帝以文宗所眷愛獨留京師於是燕帖木爾請立帝遣使徵諸王會京師甲寅中書省奉中宮旨預備大朝會賞賜金帛等物九月丁丑填星犯太微垣左執法辛巳修皇太后儀仗是夜地震有聲十月庚子帝即位大赦時帝年七歲政務咸敕中宮取進止辛丑以撒敦爲御史大夫撒迪平章政事闊里吉思爲右丞圖爾哈知樞密院事復立徽政中政二院作兩宮幄殿車乘供張己酉太白犯斗敕諸王駙馬大臣及省院臺秩正二品百司秩至一品者闕門內許施繩牀以坐丙辰命江浙省範銅造宣聖廟祭器凡百三十五事十一月壬申命郊王徹徹圖鎮

遼陽戊寅尊皇后曰皇太后御興聖殿受朝賀壬辰帝殂甲午葬起輦谷後至元四年三月辛酉上諡曰沖聖嗣孝皇帝廟號寧宗四月乙酉附于太廟順帝紀作至元三年事烏乎春秋未踰年之君稱子故子般不與閔公竝立廟諡寧宗以負屨而月之殤而入廟稱宗立后媳諡無一人引大諛以匡正之斯元代禮臣博士之陋也修史者又踵其失而立本紀斯又明臣之陋也今以附諸文宗本紀之末

元史卷十三 本紀

本紀

三

元史卷十三終

元史卷十四

順帝

順帝諱妥懽帖睦爾明宗孫也初封為郡王俾領其部族明宗北狩過之納其女罕祿魯氏以延祐七年四月丙寅生帝于北方文宗至順元年明宗后八不沙遇害乃以帝乳母夫言明宗在日素謂長子非己子命翰林書其事於史館遂徙之高麗令居大青島中不與人接閱一載復召奎章閣學士虞集使書詔播告中外再移帝于廣西之靜江三年八月文宗崩燕帖木爾請立文宗子燕帖古思文后不從乃立帝弟懿璘質班在位二月殂燕帖木爾復請立燕帖古思后曰吾子尚幼當大福恐不任妥懽帖睦爾在

元史卷十四 本紀

一

廣西今年十三矣且明宗長子義當立命中書右丞闊里吉思迎帝于靜江至良鄉具鹵簿迓之燕帖木爾既見帝竝轡徐行具陳所以迎立意帝幼且畏之一無所答燕帖木爾以帝意難測尼之適太史亦言帝不可立立則天下亂以故議未決遷延者數月國事皆決于燕帖木爾啟中宮取進止俄而燕帖木爾死后乃與大臣定議立帝且與帝約曰萬歲後其傳位於燕帖古思若武仁故事癸酉夏六月己巳帝即位於上都詔赦天下辛未命柏顏為太師右丞相仍設左丞相以太傅撒敦為之命諸官不得兼領三職秋七月己亥太陰犯房八月壬申立燕帖木爾女伯牙吾氏為皇后詔官員自省院臺外不許遞升致礙選法九月甲午太陰犯填星乙未犯天江己未犯氏冬十月甲

子太陰犯斗戊辰詔改至順四年為元統元年癸酉雲南傀羅土官渾鄧馬弄來貢升其地為散府丁丑依皇太后行年之數釋罪囚二十七人庚辰奉天厯皇帝及太皇太后御容於大承天護聖寺命撒敦兼隆祥院使主奉祀戊子封撒敦為榮王唐其勢襲父封太平王十一月辛卯朔罷富州金課甲午太陰犯壘壁陣辛亥復立江西湖廣江浙河南榷茶運司志云其種有未茶有葉茶按茶之為用始於唐皆以細末製為餅臨用而碾之其後葉茶之行始盛上天厯皇帝尊諡曰聖明元孝皇帝廟號文宗文宗紀作時寢廟未建暫於英宗室次結綵殿奉安神主封柏顏為秦王是日秦州山崩地裂夜太陰犯太微東垣上相壬子犯填星癸丑犯亢罷河間大報恩寺諸色工匠總管府十二月乙丑廣西徭寇湖南道州千戶郭震戰死

元史卷十四 本紀

二

癸酉太陰犯鬼乙亥為皇太后置徽政院設官三百六十六員是夜太白犯壘壁陣太陰犯軒轅己卯犯進賢癸未犯東咸是歲廷試進士增及百人左右榜各三人同同李齊等皆賜進士及第科舉取士莫盛于斯元統二年甲戌春正月庚寅朔雨血于汴梁著衣皆赤辛卯以脫別台平章政事戊戌四川大盤洞蠻謀谷什用來貢卽其地立盤順府是夜太陰犯軒轅庚戌犯房甲寅罷廣教總管府立行宣政院于杭州二月己未朔詔內外興舉學校戊辰封耶真耶不干為昌寧王以陰陽家言停造作四年癸酉太陰犯太微東垣上相太廟木陛壞丁亥太白經天三月己丑朔詔科舉取士國子學積分膳學錢糧儒人免役悉依累朝舊制學校官選有德者補充辛卯太

陰犯填星癸巳廣西徭賊復起殺元帥掠庫物遣右丞圖魯迷失將兵討之罷廣設司復立覆寶司癸卯月食既益都真定盜起選省院官往捕之募能禽盜者倍其賞獲三人者與一官壬子廣西慶遠徭賊寇全州丁巳詔蒙古色目人犯奸盜詐偽者隸宗正府漢人南人犯者屬有司夏四月戊午朔日食壬申命唐其勢為御史大夫丁丑太白經天戊寅太白晝見己卯奉文宗神主升祔因有事于太廟躬行告祭樂用宮縣禮三獻壬午太白晝見錄許衡後以其孫從宗為異珍庫提點癸未立鹽局于京師官自賣鹽敕除累朝期年忌日外不作佛事禁私剃寺觀庵院僧道入錢五十貫給度牒方聽出家五月己丑宦者孛羅帖木爾傳皇后旨取鹽十萬引入中政院戊申封宗室蠻子

元史卷十四

本紀

三

為文濟王鎮大名雲南王阿魯鎮雲南詔王侯宗戚軍站人匠鷹房控鶴但隸京師諸縣者令一體應役贈故中書平章王泰亨諡清憲舊制三品以上官立朝有大節者得亨在中書時安南請佛書以九經賜之使高麗不受禮遺為尚書貧不能自給故特賜是諡秋七月甲午太白晝見己亥太白經天壬寅詔蒙古色目人仍行父母喪犯盜者免刺甲辰太白經天帝幸柙木亭己酉太白晝見夜有流星大如杯色赤長五尺餘光燭地起自天津沒於離宮之南庚戌太白經天壬子熒惑犯鬼八月丙辰朔太白經天凡四日戊午祭社稷自是復舉上戊之典癸亥太白經天辛未以災變赦天下京師地震雞鳴山崩陷為池方百里己卯太白犯軒轅九月庚寅太白經天壬辰太陰入南斗癸巳太白犯靈臺甲午徭賊陷賀州命廣西宣慰使章

伯顏帥八番義從軍擊之壬子太白犯太微垣冬十月乙卯朔定內外官朝會儀班次一依品從辛酉以許有壬參知政事癸亥太白犯太微東垣上相復犯進賢丁卯立湖廣黎兵屯田萬戶府統千戶十三所增置武安縣乙亥太陰犯軒轅太白犯填星己卯上皇太后尊號曰贊天開聖仁壽徽懿昭宣皇太后大赦天下免今年田租之半內外官四品以下減一資癸未定真葛皇后配饗武宗是為宣慈惠聖皇后十一月戊子發兩艘船下番為皇后營利乙未填星犯亢庚戌熒惑犯太微垣是歲河南湖北旱自三月不雨至于八月淮水灤河漆河溫江浙大饑振米六萬石鈔二千八百錠罷太廟夏秋二享

元史卷十四

本紀

四

止丁巳立縹甸散府及穆由甸范陵甸二長官司甲戌熒惑逆行入太微三月癸未朔遣五府官決天下重囚敕丞相已領軍國重事省院臺官俱不得兼領各衛貴州平伐都雲定雲蠻長寶郎天都蟲等來降即其地立宣撫司丙申以甘州路十字寺奉安世祖皇帝母別吉太后於內議定祭禮別吉應是莊太后別號丁酉月食罷采高麗媵女甲辰免山東河閒兩淮福建新增鹽課十八萬五千引以徹里帖木爾平章政事王結參知政事夏四月癸丑朔廢雷益州所轄羅山石梁交水三縣詔諸官非節制軍馬者不得佩金虎符壬戌太陰犯左執法己卯命翰林國史院纂修累朝實錄及后妃功臣列傳庚辰罷功德典瑞營繕集慶翊正羣玉繕工金玉珠翠諸提舉司五月壬午朔遣使祭曲阜

孔子廟癸卯太陰犯壘壁陣甲辰命唐其勢為左丞相時死教已六月壬戌太陰犯心庚辰唐其勢憤柏顏專政謀立諸王晁火帖木爾伏兵東郊率勇士突入宮柏顏執之及其弟塔刺海皆伏誅并執皇后伯牙吾氏幽之別所秋七月辛巳朔以馬札爾台阿察赤為御史大夫壬午柏顏弒皇后伯牙吾氏于開平民舍諸王晁火帖木爾自殺乙未太陰犯壘壁陣壬寅專命柏顏為右丞相罷左丞相不置戊申誅荅里及阿察赤等于市詔曰曩者文宗皇帝以燕帖木爾嘗有勞伐父子兄弟顯列朝廷而輒造事釁出朕遠方文皇尋悟其妄遺命傳位於朕燕帖木爾貪立幼弱復立朕弟不幸早殂丞相柏顏追奉遺詔迎朕於南既至大都燕帖木爾猶懷兩端遷延數月天隕厥躬諸臣翊戴

元史卷十四 本紀 五

乃正宸極後撒敦荅里唐其勢相襲用事交通宗王晁火帖木爾圖危社稷阿察赤亦嘗與謀今幸以次掩捕明正其罪元凶構難貽我太后震驚朕用兢惕永惟皇太后後其所生之子一以至公為心親挈大寶畀予兄弟迹其定策兩朝功德隆盛近古罕比雖嘗奉上尊號朕心猶為未盡已命大臣特議加禮柏顏立勳兩朝茲又克清大憝明飭國憲爰賜荅刺罕之號期於子孫世世永賴八月辛亥朔熒惑犯氏癸亥以淇陽王完者帖木爾知樞密院事帖木爾不花竝為御史大夫己卯議尊皇太后為太皇太后許有壬諫以為非禮不聽九月丁亥封闕里吉思為宣國公定住為宣德王是夜太陰犯斗庚寅犯壘壁陣丙午改烏撒烏蒙地仍隸四川冬十月甲寅熒惑犯南斗丙辰加

塔失海牙太尉商議中書省事塔失帖木爾為大禧院使議軍國重事丁巳安置御史大夫完者帖木爾于廣海甲子太陰犯昴丁卯犯斗戊辰太白晝見徹里帖木爾罷科舉并減太廟四祭為一御史呂思誠等十九人劾其變亂舊章不聽皆辭去惟陳允文不署名獨留十一月庚辰詔罷科舉以所在儒學貢士莊田租給宿衛衣糧甲申太白經天乙酉敕內外官悉循資銓注毋得保舉濫滯選法丙戌太白經天己丑辰星犯房丁酉以阿吉刺平章政事徐奭定住竝參議中書省事戊戌召前知樞密院事福丁失刺不花撒爾不哥還京師初二人以帝未立謀誅燕已帖木爾為所誣貶故召之亥太陰犯太微垣庚子犯左執法辛丑以災異改元詔曰仰惟世祖在位長久天人協和諸福咸至祖述之志良切

元史卷十四 本紀 六

朕懷今特改元統三年仍為至元元年十二月壬子太陰犯壘壁陣壬戌命四川雲南保舉蠻夷官以俟銓注乙卯加上皇太后尊號曰貞文慈佑儲善衍慶福元太皇太后是夜太白犯軒轅夫人星丙寅太白經天丁卯太陰犯右執法癸酉歲星晝見乙亥太白歲星皆晝見丙子安慶斬黃地震戊寅蒙古國子監成閏月乙酉詔四川鹽運司仍于鹽井造鹽餘并聽民煮造收其課十之二熒惑犯壘壁陣壬辰命宗室脫脫木爾襲封荆王掌忙來諸軍戊戌徹里帖木爾以罪罷流南安庚子太陰犯心壬寅犯箕癸卯犯南斗是歲賜天下田租之半凡有妻室之僧令還俗既而復聽為僧太廟惟舉夏秋二享二年丙子春正月壬戌太陰犯右執法甲子犯角丁卯犯

房宿松縣地震山裂置都水庸田司于平江二月辛巳太陰犯昴甲申太白經天丁酉追尊帝生母罕祿魯氏爲貞裕徽聖皇后庚子析衡陽立新城縣乙巳免甘肅兵在逃者罪聽復業三月壬戌太陰犯心甲子犯箕乙丑犯南斗甲戌復四川鹽井之禁夏四月丁丑朔禁民間私造格例戊寅封駙馬李羅帖木爾爲毓德王丙戌太陰犯角丁亥禁服麒麟鸞鳳白兔靈芝雙角五爪龍八龍九龍萬壽福壽字赭黃等服庚寅以帖木爾不華平章政事王德懋爲中書左丞撒迪爲御史大夫五月丙午朔黃河復故道庚戌太陰犯靈臺丙辰太白晝見壬申秦州山崩六月戊子太白犯井禮部侍郎忽里台請復科舉之制不聽湍河白河涇水皆溢秋七月己酉太白犯鬼庚戌以定住鎮南參

元史卷十四

本紀

七

議中書省事乙卯太白犯熒惑禁口傳敕旨濫支錢帛癸酉命駙馬月魯不花帖古思教化同鎮薛連可怯魯連之地八月甲戌朔日食己卯太陰犯心辛巳犯箕壬辰立屯衛于馬札罕之地庚子定強盜皆死盜牛馬者劓盜驢騾者黥額再犯劓盜羊豕者墨項再犯黥三犯劓劓後再犯者死盜諸物者照其數估價省院臺五府官三年一次審決辛丑并馬湖路泥溪平夷蠻夷都沐川雷坡六長官司爲三九月庚戌熒惑犯太微垣冬十月丙子熒惑犯左執法丁酉太陰犯昴己亥犯進賢詔每日右丞相柏顏太保定住平章孛羅阿吉刺聚議于內廷平章塔失海牙右丞鞏卜班參知政事納麟許有壬聚議于中書十一月己酉太陰犯壘壁陣丁巳遣河南平章瑁璐不花至西番爲

僧安置宗王不蘭奚于梧州丁卯太陰犯房辛未禁彈弓弩箭袖箭是歲以燕帖木爾居第賜灌頂國師號大覺海寺塑千佛于其內江浙旱自春至于八月不雨黃州蝗督民捕之人日五斗太廟惟舉冬享

三年丁丑春正月癸卯廣東增城縣民朱光卿反僞稱大金國改元赤符癸丑立宣鎮侍衛屯田萬戶府于寧夏丙辰月食丁巳日有交暈左右珥上有白虹貫之戊午帝畋于柳林凡三十五日監察御史丑的宋紹明進諫帝嘉之賜金幣丑的等固辭帝曰昔魏徵進諫唐太宗未嘗不賞汝其受之封晉郭璞爲靈應侯諡唐杜甫曰文貞二月壬申朔日食河南汝寧人胡閏兒號棒以燒香惑眾反于信陽州破鹿邑焚陳州屯營于杏岡丙子立船戶提舉司定

元史卷十四

本紀

八

船戶科差千料以上者歲納鈔六錠下此遞減復立采珠提舉司三月辛亥太陰犯靈臺戊午立弘吉刺氏爲皇后因雨輟賀癸亥加封晉周處爲英義武惠正應王是月天雨線雨毛如線而條民謠曰天雨夏四月癸酉禁漢人南人高麗人持軍器有馬者拘入官甲戌有星孛于王良至七月壬寅没于貫索辛卯太陰犯壘壁陣四川大足縣民韓法師反自稱南朝趙王廣東歸善縣民聶秀卿譚景山等造軍器拜戴甲爲定光佛與朱光卿相結爲亂庚子太白晝見詔省院臺部宣慰廉訪司及郡府幕官之長並用蒙古色目人禁漢人南人習蒙古色目文字五月辛丑民間謠言朝廷采童男女一時嫁娶殆盡壬寅太白犯鬼乙巳太陰犯軒轅戊申太白晝見壬子太陰犯心甲寅西番

賊起殺鎮西王子黨兀班詔立行宣政院以耶先帖木爾為院使討之戊午太白晝見己未太陰犯壘壁陣丁卯彗星見東北大如天船星色白長尺餘彗指西南凡六十三日自昴至房歷十五宿始滅六月庚午太白經天乙亥太白犯靈臺己卯犯太微垣御河黃河漳河泌河渾河水並溢壬午太白晝見太陰犯斗丁亥太白犯太微垣戊子加封尹真人為無上太初博文文始真君徐甲為垂玄感聖慈化應御真君庚桑子為洞靈感化超蹈混然真君文子通玄光賜昇元敏秀真君列子冲虛至德遁世樂游真君莊子南華至極雄文弘道真君己丑太白晝見閱三十三日方息秋七月丁未車駕幸龍岡灑馬漣以祭庚申詔除死罪重情必候五府官審錄笞杖以下聽有司依例決斷

元史卷十四 本紀 九

是月朱光卿就禽八月甲戌太陰犯心壬午京師地大震太廟梁柱裂各室牆壁壞壓損儀物及文宗神主御牀各寺神御殿壁仆損祭器自是累震者六日癸未弛高麗軍器禁仍令乘馬凡漢人鎮邊生番處並開軍器禁九月己亥熒惑犯斗甲辰太白犯斗丁未太陰犯壘壁陣己酉修文宗神主玉冊及神御物成遣官告祭辛亥太陰犯軒轅冬十月庚午太白晝見丙子太陰犯壘壁陣壬午犯昴丁亥犯鬼庚寅太白晝見十一月丁酉太白經天戊戌太白犯亢壬寅太陰犯熒惑癸卯犯壘壁陣丙午立屯田于雄州丁未填星犯鍵閉辛亥太白犯五車甲寅犯鬼丙辰太陰犯軒轅丁巳犯太微垣癸亥發鈔萬五千錠振宣德地震死傷者十二月己巳歲星退犯天罇填星犯罰星甲戌

熒惑犯壘壁陣太白犯東咸壬午集賢大學士羊歸言太上皇唐妃影堂在真定玉華宮太上皇者睿宗也唐妃無攷每年宐于正月二十日致祭從之加馬札爾台太保知樞密院鎮北邊柏顏請殺張王劉李趙五姓漢人帝不從是年太廟四祭皆闕

四年戊寅春正月丙申以地震赦天下詔內外廉能官父母年七十無侍丁者準附近銓注以便侍養癸卯太白犯建星丙午犯五車辛亥太陰犯軒轅己未填星犯東咸庚申太陰入南斗太白犯牛二月戊寅太陰犯軒轅己卯犯靈臺乙酉奉聖州地震三月戊申填星退犯東咸夏四月辛未京師雨紅沙晝晦以探馬赤只爾瓦台平章政事脫脫為御史大夫己卯河南執胡閏兒械至京誅之癸巳帝

元史卷十四 本紀 十

如上都暮至八里塘雨雹大如拳其狀有小兒環玦師象龜卵之形五月辛酉詔吐蕃宣慰司軍士許乘馬執兵器分湖廣元領新化古州潭溪龍里洪州諸洞民六萬餘戶隸靖州增吏部攷功司官以佛家閭為郎中喬林為員外郎魏宗道為主事攷較天下郡縣官功過六月庚午袁州民周子旺反偽改年號尋被禽伏誅辛巳填星退犯鍵閉壬午立重慶路墊江縣漳州民李志甫反圍漳城守將擗思監戰失利秋八月癸亥朔日食丙子京師地震日二三次至乙酉乃止丁丑白虹亙天癸未改宣德府為順寧府奉聖州為保安州雲南老告土官八那遣使齎象馬來朝立老告軍民總管府閏月己亥填星犯罰星庚戌太陰犯斗乙卯犯鬼贈湖廣平章燕赤永平王諡忠襄伯顏察爾

奉元王諡忠宣太保曲出廣陽王諡忠惠平章伯帖木爾
文安王諡忠憲閣爾吉思魯寧王諡忠襄九月丙寅太陰
犯斗戊辰太白犯東咸癸酉奔星如杯大色白起右旗下
西南行没于近濁甲申太陰犯軒轅乙酉犯靈臺庚寅太
白犯斗冬十月辛亥太陰犯酒旗十一月丁卯立紹熙府
軍民宣撫都總司本府元領六州二十縣一百五十二鎮
二十餘萬故元初以其地荒而廢之至是居民多至
立府治之己巳熒惑犯氏丁丑太陰犯鬼戌寅犯壘壁
陣十二月戊戌立邦身等處宣慰司都元帥府并總管府
初世祖既定疆地以其處雲南極邊就立其蠻
長為帥令三年一入貢至是來貢故立官府庚子熒惑
犯房壬寅以汪家奴知樞密院事別爾怯不花為御史大
夫癸卯太白經天壬子熒惑犯東咸乙卯太白犯外屏太
陰犯斗丙辰太白經天是年江浙海運糧不足撥江西河

元史卷十四 本紀 十一

南五十萬石補之信州靈山裂鞏昌府山崩太廟惟舉冬
祭五年亦如之
五年己卯春正月癸亥禁濫予僧人名爵庚午太陰犯井
乙亥熒惑犯天江二月庚寅信州雨土甲午太陰犯昴庚
子免廣海新增鹽課萬五千引壬寅太陰犯靈臺夏四月
辛卯加封孝女曹娥為慧感靈孝昭順純懿夫人罷興州
興安縣壬寅太陰犯日星五月庚午太陰犯心壬申犯斗
丙子太白犯昴六月壬寅月食甲辰熒惑退入南斗秋七
月甲子熒惑犯南斗太陰犯房甲戌太白經天詔諸王位
下官毋入常選乙酉太白經天凡七日八月甲午太陰犯
斗丁酉太白犯軒轅乙巳太陰犯昴冬十月壬辰禁倡優
盛服許男子裹青巾婦女服紫衣不許戴笠乘馬甲午命

柏顏為大丞相加元德上輔功臣號柏顏矯殺鄒王徹徹
圖又奏貶宣讓王帖木爾不花威順王寬徹普化不侯命
輒遣去己亥熒惑犯壘壁陣十一月戊辰杞縣人范孟反
詐稱詔使至河南殺平章月祿帖木爾左丞劫烈廉訪使
完者不花等已而捕誅之癸酉江西新昌州雨木冰至明
年二月始解十二月甲午太陰犯昴癸卯熒惑犯外屏是
歲工部廳梁上出芝草一本七莖汀州大水漂民廬八百
區溺死八千餘人戶振鈔半錠死者倍之濮州范縣冀寧
桓州雲需府瀋陽等處饑共振鈔二萬五千錠米七千餘
石

元史卷十四 本紀 十一

六年庚辰春正月丁卯太陰犯鬼甲戌立司禮監改奉太
祖太宗睿宗御容於石佛寺乙亥太陰犯房三月己丑太
陰犯昴丙申犯太微垣己亥黜柏顏為河南行省左丞相
詔曰朕踐位以來命柏顏為太師秦王中書大丞相而柏
顏專權自恣欺朕年幼輕視太皇太后變亂祖宗成憲虐
害天下加以極刑允合輿論朕念先朝之故尙存憫恤今
出為河南行省左丞相所有元領諸衛親軍并怯薛台人
等詔書到時即許散還鞏耕錄云帝御玉德殿命史臣草
本衛帝曰自早至暮皆一日也可改日字作時字時柏顏
以飛放為名挾皇太子燕帖古思在柳林意將犯分詔既
成遣平章只爾瓦台齎至奉皇太子歸國命馬札爾台為
各枝軍馬即時散去一字之繫利害如此命馬札爾台為
太師右丞相辭不拜以其子脫脫知樞密院事耶先帖木
爾為御史大夫壬寅詔諸王侯不得懸帶弓箭環刀輒入
內府癸卯太陰犯心乙巳罷各處船戶及廣東采珠二提
舉司丁未太陰犯羅堰戊申熒惑犯日星立延徽寺奉靈

宗祀事已酉有星孛于房星大色白狀如粉絮尾跡長五寸餘彗指東南漸向西北行閱三十二日始滅三月甲寅漳州義士陳君用襲殺反賊李志甫授君用同知漳州府事癸亥太陰犯軒轅庚午犯房壬申犯南斗戊寅太白犯月星辛巳詔安置柏顏陽春縣未至死于道夏四月庚寅立明宗神御殿碑于大天元延壽寺以汪家奴平章政事塔識為中書右丞五月己未漳州龍巖尉黃佐才與李志甫餘黨戰妻子四十餘口皆遇害擢佐才為龍巖縣尹丁卯太陰犯斗丙子置月祭各影堂香於大明殿遇行禮命省臣就殿行香祭之六月丙申詔徹文宗廟主徙太皇太后后弘吉刺氏于東安州放太子燕帖古思于高麗詔曰昔我皇祖武宗傳位仁宗之始定議易世之後舍子傳姪乃

元史卷十四 本紀

三

祖母太皇太后惑於憮隱俾皇考出封雲南英宗遇害正統寢偏我皇考以武宗之嫡逃居朔漠及泰定帝升遐之後宗王大臣同心翊戴肇啟大事姑以地近先迎懷王哲總幾務繼知天理人倫所在假讓位之名以寶璽來上我皇考推誠不疑即授以皇太子寶懷王稔惡不悛當躬返之際乃與其臣月魯不花耶里牙明里董阿等謀為不軌使我皇考飲恨上賓歸而再御宸極海內聞之靡不切齒又私圖傳子乃構邪言嫁禍于八不沙皇后謂朕非明宗子俾出居遐陬祖宗大業幾於不繼內懷媿歎則殺耶里牙以杜口及其將死哀鳴畏在天之靈怒始議立明考之嗣以道冥誅叔母弘吉刺氏復聽信權臣貪立幼稚使朕弟懿璘質班先嗣奄復不年諸王大臣以賢以長扶朕踐

位賴天之靈權奸屏黜念治必本於盡孝事莫先於正名永惟鞠育罔極之恩忍忘不共戴天之義其命太常徹去圖帖睦爾在廟之主并削去弘吉刺氏太皇太后之號徙東安州安置放燕帖古思於高麗戮賊臣明里董阿等以伸大義布告中外太皇太后尋暴崩燕帖古思亦中道遇害己亥成紀縣山崩地坼辛亥太白晝見夜犯歲星秋七月甲寅詔封微子為仁靖公箕子為仁獻公加封比干為仁顯忠烈公丁巳太白晝見戊午以星文示異地道失靈蝗旱相仍頒罪已詔於天下己未以亦憐真班為御史大夫庚申太陰犯心甲子犯羅堰戊寅命翰林奎章閣刪修大元統制名至正條格九月癸丑加封漢張飛武義忠顯英烈靈惠助順王辛酉太白犯虛梁丙寅詔有罪者毋籍其妻女丁卯太陰犯

元史卷十四 本紀

四

昂熒惑犯歲星甲戌太陰犯軒轅冬十月甲申加上皇考尊號為順天立道睿文智武大聖孝皇帝始親裸太室以太師馬札爾台為亞獻官樞密知院阿魯圖為終獻官在位七年未嘗一至太廟御史以為言乃始行親祀辛卯赦各愛馬人不許與常選受馬人謂諸王所統之軍丁酉太白入南斗己亥犯斗壬寅命脫脫為右丞相鐵木爾不花為左丞相十一月乙卯太陰犯虛梁戊午熒惑犯氏甲子月食辰星犯東咸戊寅犯天江以孔克堅襲封衍聖公十二月癸未太陰犯虛梁乙酉犯上公丁亥熒惑犯鉤鈴乙未犯東咸是月詔復科舉取士制國子監積分生員三年一次依科舉例入會試中者取一十八名罷天庥以後增設太禧宗禋等院改奎章閣為宣文閣藝文監為崇文監環谷集云帝作宣文閣於大明殿西北萬幾之暇御閣閱經史以左右備

臣為經筵官
日侍講讀

至正元年辛巳春正月己酉朔詔改至元七年為至正元
年甲寅熒惑犯天江庚申犯井辛未犯心癸酉犯斗詔天
壽節禁屠宰六日甲戌太白晝見凡四日命永明寺寫金
字經一藏二月己卯太白晝見癸巳太陰犯明堂三月庚
戌罷兩淮屯田手號打捕軍癸酉撥屯儲禦軍于芍陂洪
澤德安三處屯種己未汴梁地震罷河西務行用庫立廣
福富昌二庫隸資政院復設衛候司拱儀局司禮監夏四
月丁丑道州土賊蔣丙等反破江華明遠二縣戊寅彰德
有赤風自西北起晝晦如夜庚寅以塔識平章政事阿魯
為中書右丞許有壬為左丞丁酉兩浙水免歲辦餘鹽三
萬引庚子杭城火燬官民舍幾盡輟耕錄云至正辛巳春
江浙平章只埋瓦台入

元史卷十四

本紀

五

城之任衣紅衣民謠曰火殃來矣至四月杭州火燬官民
房屋公廟寺觀一萬五千七百五十五間燒死七十四人
明年壬午四月災尤甚數百
年浩繁之地凋敝實基於此閏五月丁丑加封滹沱河神
為昭佑靈源侯甲午賞扈從明宗諸王官屬八百七人金
銀鈔幣有差壬寅刻宣文至正二寶輟耕錄云上作二小
曰洪禧命楊瑀篆文洪
禧瑛純白而龜紐墨色六月戊午禁高麗及民間以子為
宦者避賦役庚午太陰犯井秋七月乙酉太陰犯填星庚
寅犯雲雨九月庚辰太陰犯建星壬午犯鉞星及井宿己
丑賜文臣宴于拱辰堂冬十月甲寅以海運不給令江浙
行省於中政院財賦府撥賜寺觀田糧總運二百六十萬
石乙卯歲星犯氏丁巳太陰犯月星戊午月食既十一月
丙子道州土賊何仁甫等反庚辰分吏禮兵刑四部為二
庫戶工兩部為二庫各設管甸一員己亥太陰犯東井庚

子犯天江十二月乙卯詔民年八十以上者蒙古人賜緡
帛餘各旌以高年耆德之名並免雜役丁巳太陰犯壘壁
陣己未立四川安岳縣癸亥以在庫至元中統鈔二百八
十二萬餘錠可支二年停造明年鈔本革王伯顏察爾等
所獻檀景等州產金地是歲山東燕南寇盜縱橫至三百
餘處崇明通泰等州海潮溢溺死千六百餘人振鈔萬一
千八百錠復行太廟四時祭二年三年亦如之

二年壬午春正月丙戌開京師金口河深五十尺廣一百
五十尺役夫十萬人費用不貲卒無成功降咸平府為縣
升懿州為路以太寧所轄興中義州屬之戊子太陰犯明
堂甲午熒惑犯月星三月戊子太陰犯房夏四月辛丑冀
寧路平晉縣地震裂地尺餘民居皆傾庚申太陰犯羅堰

元史卷十四

本紀

六

罷雲南蒙慶邦身二宣慰司五月甲申太白經天東平雨
雹如馬首六月戊申奪江浙撥賜僧道田還官徵糧以備
軍儲壬子濟南山崩水涌汾水大溢秋七月庚午惠州羅
浮山崩乙未太陰掩太白丁酉太白晝見以賀惟一為中
書參知政事辭不就拂郎國貢異馬長丈一尺三寸高六
尺四寸身純黑後二蹠皆白圭齋集云帝御慈仁殿拂郎
圖成上命揭
侯斯為贊
大馬救周明貌以為圖八月庚子朔日食丙午太白晝見九月己巳
湖廣平章鞏卜班討道州賊平之復溪洞堡寨二百餘處
丁丑太陰犯羅堰戊子犯井冬十月己亥朔日食癸卯太
陰犯建星甲寅犯天關壬戌遣官致祭孔子於曲阜甲子
權免兩浙額鹽十萬引福建餘鹽三萬引十一月甲申免
雲南明年差稅辛卯歲星熒惑太白聚于尾十二月己酉

京師地震辛亥阿魯圖滿等以謀害宰臣圖逆伏誅是歲大同饑人相食河間冀寧等路水杭州火振鈔三十萬錠三年癸未春二月甲辰太陰犯井填星犯斗熒惑犯羅堰乙卯太陰犯氏遼陽吾者野人及水達達皆叛為捕海東也三月戊寅詔作新風憲在內官不法者監察御史糾劾在外官不法者行臺監察御史糾劾壬午太陰犯氏敕修宋遼金三史以丞相脫脫為都總裁官綱目云或欲如晉而遼金為載記或謂遼立國先宋五十年宋南渡後當稱臣於金以為不可待制王理著三史正統論欲以遼金為遼金宋各自為史輟耕錄云朝廷開局修史詔求遺書有以書獻者予一官繼命定終場下第舉人充學正山長國學生會試不中者與終場舉人同夏四月丙申朔日食兩都桑葉皆生黃色龍文河決白茅口六月壬子命經筵官

元史卷十四 本紀

七

一月三進講安雅堂集云帝優禮講官既賜酒饌又以高年疲於步趨命皆得乘舟太液池徑西院歸秋七月戊寅立永昌等處宣慰司庚辰太白犯右執法河南自四月至是霖雨不止八月甲午朔命朵思麻宣慰司同知鎖爾哈等討四川上蓬瑣吃賊九月甲子湖廣平章鞏卜班禽搖賊唐大二蔣仁五至京誅之其黨蔣丙復號順天王攻陷連桂二州冬十月戊戌鐵木爾不花罷丁未月食己酉帝親祀上帝于南郊以太祖配右丞相脫脫為亞獻太尉阿魯圖為終獻官己未以郊祀禮成赦天下文官減一資武官升散秩一等調民間田租五分賜高年帛十二月丁未命別爾怯不花為左丞相韓元善參知政事膠州高密縣地震是歲罷民間食鹽徵清江處士杜本不至

四年甲申春正月辛巳定守令黜陟之法六事備者升一等四事備者減一資三事備者平遷六事俱不備者降一等六事者戶口增田野闢訟訟盜賊息賦役均及常平得法也按職官志止五事不及常平庚寅河決曹州募夫萬五千人築之又決汴梁閏二月乙亥月食三月丁酉復立武功縣癸丑以納麟平章政事姚庸為中書左丞夏五月甲辰右丞相脫脫辭職命阿魯圖代之封脫脫為鄭王黃河暴溢決金隄曹濮濟兗皆罹患北侵安山沿入會通運河秋七月戊子朔溫州颶風大作海水溢地震益都鹽徒郭火徐赤作亂上太行由陵川入壺關至廣平般兵馬指揮使復還益都莒州蒙陰縣地震九月丁亥朔日食冬十一月丁亥朔以各郡縣民饑禁抑配食鹽復令民入粟補官戊子禁內外官民宴會不得用珠花十

元史卷十四 本紀

七

二月己未增置四川省推官及惠民藥局壬戌太陰犯外屏漢陽東平地震是歲太廟惟舉春秋二享五年亦如之五年乙酉春正月薊州地震以陳思謙參議中書省事夏四月丁卯遣大都流民還鄉官給路糧募富戶出米五十石以上者旌以義士號五月己丑放軍士所掠子女千一百人還雲南仍給行糧丁未河間竈戶水災權停餘鹽二萬引候年豐還官秋七月丁亥河決濟陰丙午命塔識為御史大夫九月壬午朔日食辛丑以搆思監為中書左丞朵爾直班呂思誠並參知政事冬十月壬子以賀惟一為御史大夫賜名太平元制臺端非國姓不授故特賜蒙古名本傳作六年事辛酉遣使宣撫巡行天下詢民疾苦疏冤滯調煩苛察官吏賢否明加黜陟有罪者四品以上停職申請五品以下就便裁

決一切利害悉聽與革命忽都不丁何執禮之兩浙江東道散散王士宏之江西福建道拔實秦德從之江南湖廣道定僧魏景道之河南江北大道蠻子李獻之燕南山東道不花靳義之河東陝西道伯家奴王耶速迭爾之山北遼東道阿身赤王紳之甘肅永昌道定蘇天爵之京畿道左蒼納失里賈惟貞之海北海南廣東道阿乞刺杜德遠之雲南省蒼爾麻失里王守誠之四川省時諸道奉使者皆與臺憲互相掩蔽惟京畿道定蘇天爵湖廣道拔實糾舉無所避辛未宋遼金三史成帝謂羣臣曰史既成書前人善惡朕當取爲法戒然豈止激勸爲君者爲臣者亦當知之卿等其體朕心以前代善惡爲勉十一月甲午至正條格成頒示天下奉元路陳望叔僞稱燕帖古思太子伏誅十二月丁巳詔定薦舉守令法

元史卷十四 本紀

九

六年丙戌春二月庚戌朔日食辛未山東地震七日乃止三月辛巳盜掘李開務開河劫商船官軍不敢捕京畿山東盜竝起夏四月丁卯萬戶買住討吾者野人遇害詔恤其家命左右二司六部吏屬於午後講習經史五月壬午罷江西田賦提舉司丁亥盜竊太廟神主丁酉立河南山東行都水監專治決河六月己酉汀州連城縣民羅天麟陳積萬作亂陷長汀縣丁巳雲南賊死可伐作亂滇志作思可法侵奪路甸命亦圖渾爲雲南平章討之秋七月丁亥散毛洞蠻覃全在叛招降之立散毛誓匡軍民宣撫司癸巳選怯薛官爲路府縣達魯花赤丙申以呂思誠爲中書左丞朵爾直班爲右丞蒼爾麻參知政事九月乙酉克復長汀縣戊子邵武地震有聲如鼓至夜復鳴冬閏十月乙亥詔

赦天下免差稅三分水旱之地全免靖州徭賊吳天保陷黔陽有眾六萬癸未汀州賊徒羅德用殺賊首羅天麟陳積萬以首級送官餘黨悉平十二月甲申復立大護國仁王寺昭應宮財用規運總管府凡貸民錢二十六萬餘錠甲午增北邊海海刺圖二處屯田後以沙土苦寒不久遂廢復立八百宣慰司以土官韓部襲其父爵尙書李綱請躬祀郊廟近正人遠邪佞以崇陽抑陰不聽是歲阿魯圖罷太廟惟舉夏秋二享

七年丁亥春正月甲辰朔日食大寒而風朝官多仆者壬子命別爾怯不花爲右丞相塔識爲左丞相蓋苗參知政事庚申雲南老丁等蠻來降袁字記立老丁耿凍路軍民總管府丙寅汰宿衛士止存累朝定額二月甲戌朔山東

元史卷十四 本紀

十

地震壞城郭棣州有聲如雷河南山東盜蔓延濟寧滕邳徐州等處庚辰以瑣南班爲中書右丞道童參知政事宦者伯帖木爾爲司徒徭賊吳天保寇沅州陷澆浦辰溪縣以阿吉刺知樞密院事三月乙巳修光天殿庚戌試國子監會食弟子員選補路府及各衛學正戊午敕編六條政類夏五月乙丑別爾怯不花以災異乞罷詔以太保就第臨淄縣地震七日乃止免太師馬札爾台官放之西寧州其子脫脫欲與父俱行帝從其請以太平平章政事秋七月甲寅召隱士完者圖執禮哈琅爲翰林待制張樞董立爲修撰李孝光爲著作郎樞不至丙辰太陰犯壘壁陣丁巳以納麟爲御史大夫九月癸卯八鄰內哈刺那海圖魯和伯賊起斷嶺北驛道癸丑上都早霜殺禾甲寅詔舉材

能學業之人以備侍衛辛酉塔識卒命國王多爾只為左丞相丁卯吳天保陷武岡延及寶慶殺行省右丞沙班冬十月丁丑詔左右丞相平章樞密知院御史大夫得賜玉押字印餘官不與辛卯開東華射圃戊戌西番盜起凡二百餘所陷哈刺火州劫供御蒲萄酒殺使臣十一月甲辰沿江盜起兩淮鹽運使宋文瓚上言世皇開會通河千有餘里歲運米至京者五百萬石曩者騎賊不過四十人扼李開務劫船三百艘有司莫能捕至江陰通泰為江海門戶鎮江真州次之國初設萬戶府鎮其地今成將非人致使賊艦往來無常集慶花山賊僅三十六人官軍數萬不能進討反為所敗後竟假手鹽徒雖能成功豈不貽笑宜亟選智勇以圖後功不然東南五省租賦之地恐非國家

元史卷十四 本紀

三

所有不報人尤勇捷殺傷官軍無數橫茅山三月餘三省撥兵不能捕後募賊徒朱陳等率其黨一鼓禽之撥山東地十六萬二千餘頃給大承天護聖寺為永業庚戌太陰犯天廡甲寅吳天保陷靖州命威順王寬徹普化鎮南王孛羅不花將兵討之己未以韓嘉訥為中書平章政事紀稱是月以嘉訥為陝西行臺大夫而通鑑則稱以嘉訥為平章按宰相年表至正七八九年皆載嘉訥名故改正之丁卯湖北湖南搖賊竊發有司不以聞詔降散官一等馬札爾台卒於甘肅召脫脫還十二月庚午命多爾只為右丞相太平為左丞相丙子帝以連年水旱民多失業特選臺閣名臣二十六人出為守令許民間利害實封呈省丙戌以河南盜賊充斥分撥達達軍與揚州舊軍赴沿河關隘戍守是歲置中書議事平章四人太廟不舉秋享

八年戊子春正月戊戌朔以耶先帖木爾知樞密院事辛亥黃河決遷濟寧路於濟州命湖廣右丞圖赤都元帥完者帖木爾討莫磐洞諸蠻縛其洞酋楊鹿五赴京師二月乙亥復立李答乃圖忙兀三處屯田隸虎賁司庚辰太陰犯軒轅癸未犯平道壬辰以前奉使宣撫廣東道賈惟貞稱職特授永平路總管立行都水監于鄆城以賈魯為太監三月丁酉詔頒金帛旌守令之廉勤者壬寅吐蕃盜起有司請不拘資級委官討之福建盜起分立汀漳二元帥府鎮之丙辰太陰犯建星己未遣使銓閩廣蠻夷等官選辛酉遼陽鎮火奴及兀顏撥魯歡詐稱大金子孫作亂官軍討斬之夏四月乙亥帝視國子學升衍聖公秩從二品定弟子員出身及奔喪省親等制詔守令選立社長專一

元史卷十四 本紀

三

勸課農桑京官三品以上歲舉守令一人守令到任三月亦舉一人自代其玉典赤拱衛百戶不得任縣達魯花赤止授佐貳官平江松江大水雷海運糧十萬石振之五月丁酉朔大霖雨京城崩庚子廣西濼江溢四川旱饑禁酒六月丙寅朔升徐州為府以邵炳滕嶧四州隸之丙戌立司天臺于上都秋七月丙申朔日食壬子量移竄徒官於近地安置死者聽歸葬江州總管劉恆有政績超升山東宣慰司八月丙子太陰犯壘壁陣九月乙未太陰犯靈臺冬十一月辛亥吳天保掠全州以太不花忽都不花並平章政事台州黃巖民方國珍作亂聚眾海上命江浙參政朵爾只班討之是歲太廟闕冬祭九年己丑春正月庚戌太白犯建星辛亥犯平道命太不

花提調會同館三月丁酉壩河淺澀調軍民各萬人浴之
己亥太白犯壘壁陣夏四月丁丑以欽察台平章政事韓
元善為中書左丞壬午以河間水災住煎鹽三萬引五月
戊戌加脫脫太傅提調內史府庚子修黃河金隄民夫日
給鈔三貫庚戌命翰林國史院等官薦舉守令丙辰定守
令督攝之法路督攝府府督攝州州督攝縣是月白茅河
東注沛縣成巨浸蜀江溢灌漢陽城民大饑詔刻小玉印
其文曰至正珍祕凡祕書監所掌書畫皆識之秋七月庚
寅監察御史幹勒海壽劾殿中侍御史哈麻及其弟雪雪
交結脫忽思皇后宮闈脫忽思御史大夫韓嘉訥以聞不
省章三上詔奪哈麻雪雪官居之草地出海壽為陝西副
使左遷嘉訥為江浙平章壬辰命皇子愛猷識理達臘習

元史卷十四 本紀

五

學漢文以李好文為諭德歸暘為贊善張冲為文學甲午
以耶先帖木爾復為御史大夫亦憐真班知樞密院事提
調武備寺丙午太陰犯壘壁陣癸丑犯天關乙卯丞相多
爾只太平俱罷復命脫脫為右丞相搠思監為右丞玉樞
虎爾吐華參知政事戊午命岐王阿剌乞鎮西番九月甲
子敕建言中外利病者委官選其可行之事以聞丙戌熒
惑犯靈臺冬十月丁酉命皇子入端本堂肄業丞相脫脫
領端本堂事司徒雅普化知端本堂事皇子與師傅分東
西向坐授書其下僚屬以次列坐王忠文公集云至正九
長安親師就傳拜諡德贊善各一員文字學二員仍命以翰
林學士直學士待制兼其職復置正字司經各二員即與
聖宮西偏故宣文閣改中端本堂為肄學之所十一月九
日皇子始就學其堂虛中坐以俟至尊臨幸皇子坐於皇
帝位之右而左向其左設師傅之位諭德以下以次列坐
而右向此授經則別設授讀位司經正字執經導皇子及

諭德以下選為伴讀者凡十人十一月戊午朔日食戊辰太陰犯畢庚辰
太白犯壘壁陣十二月戊戌太白復犯壘壁陣丁未吳天
保陷辰州皇后脫忽思以幹勒海壽之言侵己泣訴於帝
帝怒奪海壽官并誣韓嘉訥賊罪杖流奴兒干死是歲詔
汰冗官均俸祿賜致仕官及高年帛太廟不舉秋享
十年庚寅春正月丙辰朔以搠思監平章政事玉樞虎爾
吐華為中書右丞壬戌立四川容美洞軍民總管府壬申
太陰犯熒惑甲戌隕石棣州色黑中帶金星先有聲自西
北來至州北二十里乃隕二月丙戌加封天妃父種德積
慶侯母育聖顯慶夫人辛丑太陰犯平道甲辰犯鍵閉三
月己卯熒惑犯太微垣奉化州山石裂有禽鳥草木山川
人物之形夏四月丁酉詔赦天下丙午太白犯鬼六月壬

元史卷十四 本紀

五

子有星大如月入北斗震聲若雷三日復還秋七月辛酉
太陰犯房辛未太白晝見丁丑復見九月癸丑朔太白晝
見辛酉祭京師三皇廟先是歲祀以醫官行禮江西廉訪
具祭器江浙造雅樂太常定儀式翰林撰樂章至是用之壬戌熒惑犯天江壬午以吏
部條格繁多銓選者得意為高下命編類成書冬十月癸
巳歲星犯軒轅丙申太陰犯昂大名東平濟南徐州各立
兵馬指揮司俾捕馬賊十一月壬子朔日食罷遼陽濱海
民煎野鹽戊辰太陰犯鬼己巳從尚書僕哲篤都事武祺
言更定鈔法詔以中統交鈔一貫文省權銅錢一千文準
至元寶鈔二貫仍鑄至正通寶錢與歷代銅錢並用以實
鈔法是月三星隕于耀州化為石如斧形削之有屑擊之
有聲十二月壬午朔以大司農圖魯等兼領都水監集河

防正官議黃河便益事乙未太陰犯鬼己酉方國珍寇溫州命江浙左丞李羅帖木爾討之京師麗正門樓上忽有人妄言災禍鞠之自稱薊州人己而不知所往是冬溫煥草木皆萌芽吐花大雪而雷電是歲太廟四祭皆不舉十一年辛卯春正月丙辰辰星犯牛丁卯蘭陽縣有紅星大如斗自東南墜西北其聲如雷立湖南分元帥府于寶慶路山東分元帥府于登州二月庚寅太陰犯鬼乙未犯太微丁酉犯亢三月丁卯太陰犯東咸戊辰犯天江徵建寧處士彭炳為端本堂說書不至夏四月壬午詔開黃河故道命賈魯以工部尚書充總治河防使發汴梁大名十三路民十五萬廬州等戍十八翼軍二萬供役仍命右丞王樞虎爾吐華同知樞密院事黑斯以兵鎮之冀寧孟州

元史卷十四 本紀 五

地震半月乃止乙酉加封河瀆神為靈源神祐弘濟王重建河瀆及西海神廟丁酉立鎮寧州辛丑師壁洞土官出盧什用盤順府土官墨奴什用降立長官司四五月己酉朔日食辛亥穎州妖人劉福通作亂以紅巾為號陷本州其黨韓山童就禽山童子韓林兒逃之武安軍六月劉福通據朱皋攻破羅山真陽確山土蔡遂犯舞陽葉縣守羅帖木爾討方國珍兵敗被執秋七月丁巳罷四川大奴管句洞長官司改立忠孝軍民府己未太陰犯斗壬戌犯右執法己巳太白犯左執法熒惑入鬼命大司農達識等招諭方國珍國珍偽降八月丁丑朔中興地震乙酉太陰犯天江丙戌蕭縣李二號芝羅田徐壽輝本名寇起李二陷徐州壽輝陷蘄州亦以紅巾為號九月壬子命御史大夫

耶先帖木爾知樞密院事將諸衛軍十餘萬討河南妖寇乙卯辰星犯左執法丁巳太白犯房戌辰太陰犯鬼劉福通陷汝寧府及息光二州徐壽輝陷蘄水縣及黃州路冬十月戊寅熒惑犯太微垣辛巳太陰犯斗癸未立寶泉提舉司於各省鼓鑄至正通寶錢印造交鈔令民間通用乙酉太白犯斗己丑太白晝見熒惑犯歲星辛卯太白犯斗癸巳歲星犯右執法丙午熒惑犯左執法是月饒州建寧雨黑子大如菽信衢二州及邵武路雨黍民多取食之徐壽輝據蘄水為都國號天完僭稱帝改元治平十一月癸丑有星孛于婁甲寅見于胃丁巳微見于畢太陰犯填星黃河堤成河復故道遣使告祭河伯召賈魯還超授集賢大學士命翰林承旨歐陽玄製河平碑十二月丙子朔太

元史卷十四 本紀 五

白晝見丁丑太白經天己卯立河防提舉司隸行都水監庚辰太白犯壘壁陣甲申太陰犯填星丙戌以烏古孫良楨參知政事辛卯太白經天丁酉太白晝見太陰犯熒惑庚子太白經天辰星犯天江辛丑耶先帖木爾復上蔡縣禽劉福通偽將韓咬兒等送大都誅之壬寅太白晝見是年太廟闕秋享十二年壬辰春正月戊申竹山縣賊陷襄陽總管柴肅死之是日荆門州亦陷庚戌以月魯不花平章政事壬子諭河南湖廣調兵討賊正當首春耕作之時恐農民不安田畝守令有失勸課宜委通曉農事官分道巡視督勒有司親詣鄉都省諭農民依時播種務使人盡其力地盡其利其有曾經盜賊水患供億繁重貧民不能自備牛種者所

在官爲量給仍飭領兵官嚴禁屯駐軍馬毋得踐踏以致農事廢弛丙辰徐壽輝遣將丁普郎徐明遠陷漢陽及興國府己未徐壽輝僞太師鄒普勝陷武昌辛酉徐壽輝遣將魯法興陷安陸知府丑盧死之癸亥添設刑部尙書侍郎各一員乙丑太陰犯熒惑己巳歲星犯右執法壬申中興路陷拘刷大都河南陝西遼陽漢人馬二月乙亥朔以賈魯爲中書添設左丞命諸王圖堅守揚州李蘭奚守大名寧王身安沙鎮四川乙酉徐壽輝兵陷江州總管李黼死之遂陷南康及岳州庚寅太陰犯太微垣癸巳犯氏辛丑置安東安豐分元帥府鄧州賊王權張椿陷澧州龍鎮衛指揮使掩都刺哈蠻帥師復之是月賊侵滑濬諸邑起德住爲河南右丞守東明賊不敢犯時德住致仕于家聞命即出徐壽

元史卷十四 本紀

三

輝僞將歐祥陷袁州命帖里以中書參政分省濟寧定遠人郭子興起兵自稱元帥與其黨孫德崖等破濠州三月乙巳朔徐壽輝僞將許甲攻衡州陶九陷瑞州壬子以太不花爲河南省平章史作左丞克復南陽等處癸丑重行納粟補官之令有能自備糧米供給軍儲者照依定擬地軍者驗見授品級改授常流戊午太陰犯進賢壬戌犯東咸甲子徐壽輝遣將項普略陷饒州路遂陷徽信二州丁卯出幣帛各十萬匹於迤北萬戶千戶所易馬戊辰太白晝見詔省院臺官依世祖舊制兼用南人有才學者立饒州德興銅冶場時有張理獻言贖水浸灘可成詔隨朝諸正官各舉循良材幹智勇兼全堪充守令者二人多者不限員數試用守令並兼管義兵防禦諸軍與魯勸農事任

滿稱職者許實授凡除常選官於殘破郡縣及逼近賊境者升四等稍近者升二等方國珍復劫其黨入海台州路達魯花赤泰不華與戰于澄江死之隴西地震百餘日城郭頽圯陵谷變遷定西會州靜靈莊浪尤甚會州公廨牆崩獲弩五百餘張長丈餘人莫能挽改定西爲安定州會州爲會寧州閏月壬午以荅失拔都魯爲四川添設參政與本省平章咬住同討山南湖廣賊乙酉徐壽輝僞將陳普文陷吉安路鄉民羅明遠起義兵復之壬辰遣官詣上都分給出征河南達達軍口糧立淮南江北行省治揚州兼轄高郵淮安滁和廬州安慶蘄州黃州丁酉湖南參政鐵傑復岳州四川平章咬住克取忠萬夔雲陽等州戊戌以晃火爾不花平章政事蠻子爲中書右丞秦從德

元史卷十四 本紀

天

爲左丞荅失圖趙璉並參知政事悟良哈台杜秉彝爲添設參知政事命江西左丞相亦憐眞班守江東關隘諸王亦憐眞班愛因班參政耶先帖木爾與陝西平章月魯帖木爾討南陽襄陽賊刑部尙書阿魯討海寧賊江西右丞火尼赤與參政朵解討江西賊浙東宣慰使恩靈普守蕪湖江西右丞兀忽失江浙左丞星吉不顏帖木爾蠻子海牙同討饒信賊方國珍不受撫命江浙左丞荅納失里討之知樞密事耶先帖木爾駐軍沙河軍中夜驚軍潰退屯朱仙鎮命中書右丞蠻子代總其軍召耶先帖木爾還仍爲御史大夫西臺御史范文等十二人劾其喪師辱國不聽夏四月癸卯朔日食江西臨川賊鄧忠陷建昌路中寅以搠思監渾都海牙並平章政事提調留守司丙辰江

西宐黃賊塗佑與建寧賊應必達攻陷邵武路千戶魏瀆以計禽之復其城辛酉四川參政桑哥失里復渠州荆門知州聶炳復荆門州四川平章咬住復歸州進攻峽州詔天下完城郭築堤防命亦都護月魯帖木爾領畏吾兒軍同豫王阿刺忒納失里知樞密事老章同討襄鄧賊左遷西臺御史大夫朵爾直班為湖廣平章范文等十二人為各路添設佐貳官五月癸酉朔太白犯填星己卯咬住復中興路庚辰徙瀛國公之子和尚趙完普及親屬于沙州禁勿與人通罷放兒棚等場金銀課停海漕夏運癸未建昌民戴良起鄉兵克復本路乙酉命留守帖木哥與諸王多爾只守口北龍慶州答失拔都魯至荆門募兵趨襄陽與賊戰大克之六月辛亥太白犯井丙寅紅巾賊周伯顏

元史卷十四 本紀 无

陷道州秋七月庚辰徐壽輝黨項普略由饒徽犯昱嶺關陷杭州路江浙參政樊執敬戰死濟寧路總管董搏霄率兵復之遂克徽州己丑湘鄉賊陷寶慶路庚寅丞相脫脫請親出師討徐州帝許之六部尚書合疏乞留不聽丁酉辰星犯靈臺湖南副元帥小云失海身總管兀顏思忠復寶慶路徐壽輝偽將王善等陷福安寧德等縣八月甲辰復以哈麻為中書添設右丞丁卯詔脫脫以太傅右丞相督制諸軍省院臺分官屬從行稟受節制即日發京師是夜太白犯歲星安陸賊將俞君正復陷荆門州知州聶炳死之賊將黨仲達復陷岳州九月乙亥俞君正復陷中興咬住與戰于樓臺敗績奔松滋本路判官上都死之癸未中興義士范忠偕荆門僧李智率義兵復中興路降咬住

為淮西元帥司饋餉辛卯脫脫復徐州屠其城李二遁走壬辰太陰犯軒轅庚子詔加脫脫太師趣班師還朝冬十月戊午太陰犯鬼甲子犯歲星乙丑犯亢霍山崩前三日鳴禽獸駭散十一月辛未命江浙平章慶童收捕常州賊隕石數里乙亥以星吉為江西平章擊趙普勝於湖口兵敗死之丙子遣南臺侍御史左蒼納失里江浙右丞帖里總兵討方國珍癸未脫脫請與近畿水利召南人耕種歲可得粟麥百萬石不煩海運京師足食帝曰此事有利于國其速行之庚寅太陰犯太微垣十二月辛亥詔杭常湖信廣德諸路皆新復赦誅誤者蠲其租命有司加意撫恤是歲海運不通京師闕食潁州沈丘人察罕帖木爾與羅山李思齊同起義兵破賊有功授察罕汝寧府達魯花赤思齊為知

元史卷十四 本紀 手

府李二餘黨趙均用入濠州據之僭稱王十三年癸巳春正月庚午朔用帝師請釋在京罪囚辛未立分司農司以悟良哈台為右丞烏古孫良楨為左丞兼大司農卿給分司農司印西自西山南至保定河間北抵檀順州東及遷民鎮凡係官地及元管屯田悉從分司農司召募農夫立法佃種給鈔五百萬錠供其費丙子方國珍復僞降庚辰募江淮善種水田修築圍堰者各千人為農師降空名告身十二道遣使齎往募農民百人者授九品二百人者授八品三百人者授從七品即填流官職名與之令領所募人至田所期年散歸人給鈔十錠乙酉太陰犯太微垣丙戌答失拔都魯克復襄陽樊城庚寅老章克復南陽唐州戊戌熒惑太白辰宿聚于奎二月己酉太

陰犯軒轅庚戌太白犯熒惑壬子太陰犯太微垣甲寅立
脫脫平徐勳德碑命領大司農司提調太史院司天監夏
四月辛丑太白犯井辛亥太陰犯房降徐州路爲武安州
改所轄縣屬歸德府其滕州嶧州仍屬益都路五月辛未
江西左丞相亦憐真班率師由信州元帥韓邦彥由徽州
浮梁同取饒州斬黃賊奔潰乙亥太陰犯歲星乙未秦州
白駒場亭民張士誠及其弟士德士信作亂陷秦州及興
化縣高郵知府李齊不屈死士誠自稱誠王僭號周建元
天祐六月丙申朔立皇子愛猷識理達臘爲皇太子復置
詹事院以丞相脫脫兼領俾得銓注官屬庚子命知樞密
院事失刺把都總河南軍平章荅失拔都魯總四川軍自
襄陽分道而下克復安陸府癸卯詔平章達識總領漢軍

元史卷十四

本紀

三

蒙古守禦淮南遼東吾者野人搠羊哈及乾帖困朮赤朮
等五十六人以皮貨來貢給銀牌一面令管吾者野人秋
七月丁卯泉州天雨白絲海潮日三至戊辰太白晝見命
宦官至一二品者依常例給俸壬申湖廣參政阿魯輝復
武昌及漢陽府資政院使脫火赤復江州路九月乙丑朔
日食庚寅太陰犯熒惑壬辰太白經天熒惑犯左執法冬
十月甲辰歲星犯氏丁未廣西元帥甄崇福復道州庚戌
從帖里左蒼納失里請授方國珍徽州路治中國璋廣德
路治中國瑛信州路治中國珍疑懼不受命立水軍都萬
戶府于崑山州以納麟哈刺爲正萬戶董搏霄爲副萬戶
癸亥太白犯亢是月徹世祖所立旣帳改建殿宇十一月
壬申太陰犯壘壁陣丁亥江西右丞火尼赤以兵平富州

臨江遂復瑞州立義兵千戶水軍千戶所于江西十二月
丁酉太白犯東咸庚子熒惑入氏庚戌京城無雲而雷少
頃有火見于東南懷慶路及河南府西北有聲如擊鼓者
數四已而雷聲震地丁巳太陰犯心江浙平章卜顏帖木
爾等會兵討徐壽輝于蘄水敗走之獲僞官四百餘人陝
西四川行省合兵復均房等州是歲起清寧殿前山子月
宮諸工役重建穆清閣帝行西僧祕密運氣術號演揲兒
法是冬闕享太廟

元史卷十四

本紀

三

十四年甲午春正月甲子朔汴河冰文成五色花草如繪
畫三日方解乙丑熒惑犯歲星丁卯太白犯建星癸酉熒
惑犯房立遼陽漕運庸田司屬分司農司丙戌荅失拔都
魯復峽州二月戊午太白犯壘壁陣遣吏部侍郎貢師泰
和羅于浙西得糧百萬石立鎮江水軍萬戶府河南淮南
竝立義兵萬戶府有功者權授軍職事平改民官建清河
太壽元忠國寺括江浙廢寺田歸之三月癸亥朔日食詔
北邊有馬之家十取其二每馬給鈔十錠夏四月癸巳朔
介休縣地震泉涌以武祺參議中書省事方國珍復擁船
據海道阻絕糧運遣江浙右丞阿爾溫沙參政恩寧普總
兵討之復立應昌全寧二路先有旨撥屬魯王王傅府造
過街塔于盧溝橋修白浮瓮山堤五月甲子修北巡所經
色澤嶺黑石頭河西沿山道路立南陽鄧州等處毛胡盧
義兵萬戶府募土人爲軍免其差役令討賊自效因其鄉
團結各佩毛胡盧命四川平章王樞虎爾吐華募兵萬
兵器爲號以名之人下蜀江守荆門荅失拔都魯提兵赴汝寧六月辛卯朔

張士誠寇揚州達識以兵討之敗績士誠陷盱眙泗州甲辰太陰犯斗秋七月甲子襄垣縣大風拔木偃禾乙丑太陰犯角壬午犯昴孝義縣地震郭子興自稱滁陽王九月己未朔復以呂思誠為中書左丞月閏察爾平章政事命丞相脫脫總制諸王各翼軍馬出征高郵甲子方國珍尙浙東元帥耶忒迷失知州趙宐浩以俟命冬十月戊戌詔荅失拔都魯及太不花會軍討安豐賊壬子太陰犯太微垣十一月丙寅敕省院臺凡奏事先啟皇太子丁卯脫脫統大軍至高郵與張士誠連戰皆捷分兵平六合縣賊勢大蹙丙子太陰犯鬼荅失拔都魯復苗軍所據鄭鈞許三州十二月辛卯命定住為左丞相哈麻鎮南班並平章政事監察御史袁賽因不花等劾脫脫及其弟耶先帖木爾

元史卷十四

本紀

三

前後出師略無寸效章三上帝令耶先帖木爾出國門聽旨以汪家奴代為御史大夫丁酉詔以脫脫老師費財坐視寇盜漠不為意削去官爵安置淮安路耶先帖木爾庸懦無能安置寧夏路以太不花為河南左丞相月閏察爾為太尉雪雪知樞密院事代領其軍免大都上都興和三路稅糧一年被災殘破地方並調租三年罷庸田茶運寶泉等司戊戌以桑哥失里為中書添設左丞己亥太陰掩昴己酉紹興路地震荅失拔都魯復河陰鞏縣盜賊寇衡州萬戶許脫因死之是歲詔民間私租大重以十分為率普減二分著為例帝自製龍舟於內苑又自製宮漏精巧皆絕出人意

十五年乙未春正月戊辰太陰犯五車辛未犯鬼丁丑徐

壽輝偽將倪文俊復陷沔陽府遣部將明玉珍守之玉珍遂據重慶庚辰復設仁虞雲需尙供三總管府閏月壬寅摘各衛軍屯田京畿人給鈔五錠丙午太陰犯心丙辰太白經天二月己未劉福通迎立韓林兒為帝明王又號小建都亳州僭號宋改元龍鳳戊辰命汪家奴為右丞相定住為左丞相壬申立淮東宣慰司都元帥府于天長縣統濠泗義兵萬戶府聽富民願出丁壯五千名者為萬戶五百名者為千戶百名者為百戶是月郭子興死三月庚寅太陰犯五車甲午授皇太子玉冊賜冕服九旒祇謁太廟丙申太陰犯房辛丑改竄脫脫于雲南鎮西路耶先帖木爾于四川礪門并籍其家癸丑太白經天夏四月癸酉命定住為右丞相哈麻為左丞相桑哥失里平章政事雪雪為御

元史卷十四

本紀

三

史大夫丁丑立宣化鎮南軍民府于四川升四川羊母甲洞鼻南王洞長官司為忠義軍民安撫司五月壬辰監察御史耶里忽都劾河南左丞相太不花慢功虐民詔削職命荅失拔都魯為河南行省平章代之駐軍陳畱庚戌倪文俊自沔陽陷中興路元帥朵爾只班死之六月癸亥太白經天丁丑保德州地震庚辰徵徽州隱士鄭玉為翰林待制不至是月濠州朱元璋即明太祖起兵歷陽渡江取太平路秋七月壬寅倪文俊復陷武昌漢陽進攻岳州命親王失里門四川左丞沙刺班等分守山東湖廣四川諸路及招諭各起兵者八月戊辰以達識為江浙左丞相戊寅太白經天雲南死可伐降立平緬宣撫司四川向思勝降改安定州為軍民安撫司起前左丞相太平為淮南行省左

丞相總制山東軍駐濟寧立吾者野人乞列迷等處諸軍萬戶府于哈爾分之地斬黃賊陷宣州禮部尚書致仕汪澤民死之九月癸未以紐的該平章政事幹樂爲中書左丞丁好禮參議省事己丑太白犯太微垣己亥倪文俊圍岳州改竄脫于阿輕乞之地冬十月丁巳立淮南行樞密院于揚州己未太陰犯壘壁陣帝謂右丞相定住曰敬天地尊祖宗重事也朕將親祀郊廟務盡誠敬卿等共議典禮從其簡者行之庚午以襲封衍聖公孔克堅同知太常禮儀院事其子希學襲封衍聖公癸酉太陰犯軒轅定郊祀禮以太祖皇帝配上出宮至郊所便服乘馬不設內外儀仗教坊隊子齋戒七日內散齋四日於別殿致齋三日二日在大明殿西懺殿一日在郊所丙子立海道防禦

元史卷十四 本紀

五

運糧萬戶府于平江黃河水軍萬戶府于小清口十一月甲申熒惑犯氏庚寅填星犯井壬辰親祀上帝于南郊特命皇太子爲亞獻丞相定住爲終獻通攷云帝每歲致祭社稷自至正十五年後廢甲午復起太不花爲湖廣左丞相荆襄諸軍悉聽節制給還元奪宣命己亥介休縣桃杏華太陰犯鬼庚戌賊陷懷慶饒州二路十二月壬子朔熒惑犯房丁巳命中書參政月倫失不花陳敬伯分省彰德癸亥立忠義忠勤萬戶府丁武安宿州乙亥帝以天下兵起下詔罪己大赦蒼夫拔都魯大敗劉福通於太康遂圍亳州僞宋主韓林兒遁走安豐立大兵農司于保定河間武清景蓊四處招集夫丁且耕且守又設兵農千戶所二十四百戶所四十八鎮撫司四隸之察罕帖木爾與賊戰于河南北屢有功除

中書刑部侍郎哈麻矯殺右丞相脫脫是年太廟惟舉春秋二享

十六年丙申春正月己丑太陰犯昴庚戌哈麻欲立太子爲帝奉帝爲太上皇語泄與其弟雪雪竝罷以搠思監爲御史大夫薊州兩地震倪文俊建僞都于漢陽迎徐壽輝據之二月丙申搠思監劾哈麻兄弟罪惡帝欲貸之丞相定住執奏不已詔貶哈麻惠州雪雪肇州比行皆杖死丙寅命翰林國史院太常禮儀院定擬二皇后奇氏三代功臣諡號王爵甲戌詔部院正官各舉材堪守令者一人不拘蒙古色目漢人南人聽中書省酌用己卯遣集賢直學士楊俊民致祭曲阜孔子廟張士誠據平江遂陷湖州松江常州諸路集賢待制孫撝死之時撝持詔至平江招諭遂遇害三月

元史卷十四 本紀

五

辛巳徐壽輝寇襄陽戊子命宣讓王帖木爾不花威順王寬徹普化以兵鎮懷慶路朱元璋兵取集慶路南臺御史大夫福壽死之名山藏云平章阿魯灰參政百家奴丙申倪文俊陷澧州常德路丁酉立行樞密院于杭州命達識兼知行院事省院官竝聽調遣朱元璋兵取鎮江戊申方國珍復降授海道漕運萬戶國璋衢州路總管是月有兩日相盪夏四月辛亥命搠思監爲左丞相普化爲御史大夫丁卯以知樞密事實理門分院濟寧五月壬辰太白犯鬼甲午太陰入斗丁酉犯壘壁陣六月甲寅加苗軍帥楊完者爲江浙參政以其兵禦張士誠守嘉興乙丑朱元璋兵取廣德路秋七月己卯朔朱元璋自稱吳國公改集慶路曰應天府建官屬丁酉太陰犯壘壁陣張士誠遣兵陷

杭州江浙平章左荅納失里戰死丞相達識遁入富陽苗帥楊完者及萬戶普賢奴擊敗之復其城八月丙辰奉元路判官王淵以義兵復商州升淵同知宣慰司事丁卯太陰犯昴庚午倪文俊陷衡州路元帥甄崇福戰死甲戌彗星見張宿色青白彗指西南長尺餘至十二月戊午朔始滅是月黃河決山東大水九月庚辰汝穎賊李武崔德破潼關參政述律杰戰死壬午豫王阿刺忒納失里同知樞密事定住引兵復潼關河南平章伯家奴以兵守之戊戌賊陷陝號二州命太尉納麟復為南臺御史大夫遷行臺治紹興納麟再任又以其子安判行樞密院時慶元大夫溪則有縣尹陳文昭餘姚則有同知堅在城則有錄事司達魯花赤邁里古思皆總制團結義民者安以三人為不易制乃給圖堅至拘留寶林寺夜率臺軍禽殺之從而方國珍亦執文昭沈之海獨存邁里古思一人及拜住

元史卷十四 本紀 三

哥代納麟為大夫又不察罕帖木爾復陝號二州襲敗賊兵于平陸以功授兪河南行樞密院事冬十月丁未大名路有星如火從東南流芒尾如曳彗墮地有聲炎焰蓬勃久之化為石青黑光瑩形如狗頭其斷處若新割者命藏于庫壬申太陰犯井淮安城陷淮東道廉訪使褚不華死之十一月丙戌以老的沙荅里麻失竝為詹事丁亥流星大如酒杯色青白尾跡長五尺餘光明燭地起自東北東南行沒于近濁有聲如雷壬辰太陰犯井十二月倪文俊陷岳州路殺威順王子解帖木爾湖廣參政耶先帖木爾與左江義兵萬戶鄧祖勝合兵復衡州西臺御史李尙綱上關中形勝急論十二事命大司農司屯種雄霸二州以給京師號京糧是年太廟惟舉春享自後四祭皆闕

十七年丁酉春正月丙子朔日食辛卯命山東分省團結義兵仍令各路達魯花赤提調聽宣慰使節制二月壬子李武崔德犯七盤藍田命察罕帖木爾守潼關調河南兵聽豫王阿刺忒納失里及定住同進討之癸丑太陰犯五車戊辰知樞密事脫脫復邳州調客省使撒爾荅溫等攻黃河南岸賊大破之壬申劉福通遣其黨毛貴陷膠州兪樞密院事脫歡死之甲戌倪文俊陷峽州李武崔德陷商州三輔震恐察罕帖木爾與李思齊以兵自陝號來援殺獲無算論功以察罕為陝西左丞思齊為四川左丞加荅失拔都魯太尉四川左丞相三月乙亥朔義兵萬戶賽甫丁阿迷里丁叛據泉州庚辰毛貴陷萊州宣慰副使釋嘉訥死之壬午朱元璋兵取寧國路甲申太陰犯鬼壬辰歲

元史卷十四 本紀 三

星犯壘壁陣甲午毛貴陷益都益王買奴遁自是山東郡邑皆陷丁酉毛貴陷濱州及莒州戊戌以悟良哈台幹樂平章政事夏五月戊寅平章赤老溫帖木爾復武安州等三十餘城丙申命搠思監為右丞相太平復為左丞相詔免天下今年稅糧之半六月甲辰朔以帖里老的沙竝為御史大夫罷陝西行樞密院庚申朱元璋兵取江陰州及徽州路癸酉有龍鬪于溫州路樂清江颶風大作所至火光如毬死者萬餘人是月劉福通犯汴梁其黨分三道關先生潘破頭王士誠等寇晉冀白不信大刀敖李喜喜等趨關中毛貴據山東其勢益振秋七月癸未太白犯鬼甲申太陰犯斗丁亥填星犯鬼己丑鎮守黃河義兵萬戶田豐叛陷濟寧分院實理門遁義兵萬戶孟本周攻之豐敗

走本周還守濟寧甲午以完者帖木爾為中書右丞俺普參知政事立四方獻言詳定司歸德知府林茂萬戶時公權叛以城降賊曹州亦陷是月大都晝霧自旦至午昏冥不辨人物者旬有五日八月癸卯填星犯鬼太白犯軒轅癸丑劉福通兵陷大名遂自曹濮犯衛輝荅失拔都魯遣子孛羅帖木爾分兵擊走之甲子太陰犯五車乙丑以方國珍為江浙參政海道運糧萬戶如故朱元璋兵取揚州張士誠為書詣江浙請降達識遣參政周伯琦至平江撫之詔以士誠為太尉士誠留伯琦不遣九月丙子以老的沙平章政事兼兀良海牙指揮使甲午澤州陵川陷縣尹張輔死之戊戌太不花復大名路并所屬郡縣辛丑加紐的該太尉總諸軍守東昌倪文俊謀殺其主徐壽輝不果

元史卷十四 本紀

元

自漢陽奔黃州為壽輝部將陳友諒所殺友諒并其軍自稱平章閏月癸卯有飛星如孟青色光燭地尾長尺餘起自王良沒于句陳丙午太陰犯斗庚申犯井乙丑潞州陷冬十月乙亥熒惑犯氏甲申太陰掩昴劉福通黨略興元遂圍鳳翔察罕帖木爾李思齊擊破之賊走入蜀荅失拔都魯討曹州賊軍敗知樞密院事荅里麻失里死之靜江路山崩地陷十一月辛丑汾州桃杏華戊午以荅蘭平章政事李獻為中書左丞八都麻失里為右丞卜顏帖木爾哈刺那海崔敬陳敬伯並參知政事十二月庚午熒惑犯天江戊寅太白犯歲星甲申太陰犯鬼丁亥歲星犯壘壁陣庚寅太白犯壘壁陣癸巳太陰犯心丁酉象山縣鵝鼻山崩己亥流星如金星大尾長三尺餘起自太陰近東而

沒化為青白氣荅失拔都魯卒于軍是歲趙均用彭早住同據淮安趙僭稱永義王彭僭稱魯淮王義兵千戶余寶殺知樞密院事寶童叛降于毛貴據棣州

十八年戊戌春正月辛丑填星犯鬼丙午太陰犯昴陳友諒陷安慶淮南行省右丞余闕死之庚戌朱元璋兵取婺源州及建德路乙丑大風起自西北什益都土門萬歲碑丙寅田豐陷東平路命荅失拔都魯子孛羅帖木爾為河南行省平章領其父軍分命察罕帖木爾屯陝西李思齊屯鳳翔二月己巳朔立團結西山寨大小十一處設萬夫千夫百夫長分守要害毛貴陷青滄州進據長蘆鎮分戶部寶鈔庫等官于陝西就近造鈔以給軍癸酉毛貴陷濟南山東宣慰使董搏霄死之時搏霄已拜河南右丞未之任乙亥填星犯

元史卷十四 本紀

元

鬼辛巳命太不花為中書右丞相總兵山東壬午田豐復陷濟寧紐的該棄東昌走丁亥察罕帖木爾遣兵復涇州平涼遂保鞏昌庚寅王士誠自益都犯懷慶丁酉興元陷三月己亥朔日色如血庚子毛貴陷般陽路辛丑大同路夜黑氣蔽西方聲如雷少頃東北方有雲如火交射中天已而火光遍地空中作兵甲聲癸卯王士誠陷晉寧路總管杜賽因不花死之甲辰察罕帖木爾遣兵復晉寧庚戌毛貴由河間趨直沽遂破薊州掠柳林樞密副使達國珍戰死徵四方兵入衛同知樞密事劉哈刺不花由彰德以兵拒戰于柳林貴眾潰仍走濟南丙辰冀寧路及大同諸縣陷夏四月甲戌陳友諒據江西省治壬午田豐由益都掠廣平退保東昌元帥方脫脫以兵復廣平辛卯太白犯

鬼甲午陳友諒遣王奉國陷瑞州是月察罕帖木爾李思齊會宣慰使張良弼等兵討李喜喜于鞏昌喜喜敗入蜀察罕駐清湫思齊駐斜坡良弼駐秦州郎中郭擇善駐崇信宣慰同知拜帖木爾駐通渭平章定住駐臨洮各自除官屬徵納軍需既而思齊良弼襲殺拜帖木爾分其兵五月戊戌朔察罕帖木爾遣將復冀寧自以劉尙質為冀寧路總管李思齊擅殺郭擇善庚子劉福通攻汴梁守將竹貞棄城遁福通入城自安豐迎僞主韓林兒居之以為都壬寅太白犯填星庚戌陳友諒陷吉安路壬子太陰犯斗癸丑御史七十等糾右丞相太不花緩師拒命詔削其官爵安置蓋州命知行院事悟良哈台代之節制河北軍河南平章周全節制河南軍辛酉陳友諒兵陷撫州六月戊

元史卷十四 本紀 聖

辰朔日食太不花伏誅察罕帖木爾調部將虎林赤關保同守潞州授察罕帖木爾陝西行省平章便宜行事乙酉命左丞相太平督諸軍守京城秋七月丁酉朔周全據懷慶叛降於劉福通殺守將伯帖木爾盡驅懷慶民渡河入汴梁丁未太陰犯斗戊申太白晝見己未劉福通遣周全引兵攻洛陽守將登城以大義責全全媿謝退兵劉福通殺之八月壬申太陰掩心甲申掩鼻陳友諒兵陷建昌路義兵萬戶王信以滕州叛降於毛貴庚寅以老的沙為御史大夫九月丁酉朔襄封唐劉贊為文節昌平侯劉福通分兵踰太行焚上黨破遼州大掠興和塞外諸郡乙丑陳友諒陷贛州參政全普庵撒里及總管哈海赤死之冬十月己卯太陰犯昴壬午監察御史燕赤不花劾右丞相搆

思監奸貪誤國詔收其印綬以紐的該為左丞相十一月乙未朔田豐陷順德路陳友諒陷汀州丙午太陰犯昴太白犯房辛酉太陰掩心十二月乙丑朔日食癸酉劉福通黨陷上都焚宮闕轉略遼陽遂至高麗上都為累朝巡幸之所至是不復時巡戊寅太白經天庚辰察罕帖木爾遣樞密院判瑣住進兵遼陽癸未太白經天甲申朱元璋兵取蘭溪州及婺州路達魯花赤僧住廉訪使楊惠死之戊子太陰犯房是歲大饑疫兩河山東斗米金一斤民流入京師死者二十餘萬人宦者朴不花請市地收瘞之

元史卷十四 本紀 聖

十九年己亥春正月甲午朔陳友諒遣將王奉國寇信州路江東廉訪副使伯顏不花的斤往救死之辛丑太陰犯昴乙巳以朵爾只班平章政事丙午遼陽行省陷懿州路總管呂震死之察罕帖木爾遣樞密院判陳秉直八不沙將兵二萬守冀寧癸丑流星大如酒杯有聲如雷二月辛巳叛將梁炳攻辰州參政和尙擊敗之甲申賊由飛狐靈巨犯蔚州庚寅詔孛羅帖木爾移鎮大同捍蔽京師復置大都督兵農司并分司十道專督屯糧即以孛羅領之保定河間不勝其擾三月癸巳朔陳友諒略衢州復分兵陷襄陽庚戌太陰犯房壬戌定科舉流寓人名額蒙古色目南人各十五名漢人二十名夏四月癸亥朔毛貴為趙均用所殺帝以天下多故卻天壽節朝賀禮太子率羣臣再三奏請帝曰朕關於修省致萬姓塗炭今復朝賀燕集是重朕不德也俟天下安寧行之未晚卒不聽己丑賊陷寧夏遂略靈武等處五月通攷云丁亥朔日食本丙申熒惑紀作壬辰朔不言日食

犯鬼丁酉皇太子請巡北邊綏撫軍民御史臺上疏固留
帝從之丙午太陰犯天江丁未犯斗以八月鄉試河南舉
人及避兵儒士不拘籍貫依河南省元額就陝州置貢院
應試秋七月壬辰朔黜搆思監為遼陽左丞相丁酉太白
犯上將甲辰犯右執法己酉犯左執法命國王囊加帶等
統軍征遼陽丙辰毛貴黨續繼祖自遼陽入益都執趙均
用殺之八月辛酉朔察罕帖木爾大發秦晉軍攻汴梁破
之劉福通奉偽主韓林兒復走安豐詔察罕帖木爾為河
南行省平章兼同知樞密院西臺中丞依前便宜行事九
月癸巳禁軍人私殺牛馬以察罕海子宣慰司地隸資政
院有司不得差占其地在世祖時屬忙哥台太子四千
戶今從二皇后奇氏請故改隸之丙
午夜白虹貫天甲寅太白犯天江朱元璋兵取衛處二州

元史卷十四 本紀

望

遣尙書伯顏帖木爾曹履亨以御酒龍衣賜張士誠徵海
運糧時中原既亂江南漕久不至京師銀一錠
易米八斗民大饑至是河南始通故往徵之冬十月
庚申朔詔京師諸門築甕城造弔橋以方國珍為江浙平
章壬申太白犯斗辛巳流星大如桃陳友諒兵陷杉關十
二月戊辰太白犯壘壁陣時皇太子欲撫軍憾左丞相太
平不從殺中書左丞成遵參知政事趙中以太平舉用之
人誣以賊罪下
獄之陳友諒以江州為都迎偽主徐壽輝居之自稱漢王
是歲山東河南關中飛蝗蔽天人馬不能行落溝壑盡滿
綱目大都有杜鵑耕錄云至正乙亥十二月金陵游軍
斬關突至杭城閉城三月餘城中米價一斗直二十五緡
數日米盡精糲亦與常日米價等又數日糲盡
盡乃以油車家糲餅擣屑啖之餓死者十六七
二十年庚子春正月己丑朔改鞏縣為軍州萬戶府招民
屯種己亥太陰犯井癸卯太寧路陷壬子以絆住馬平章

政事危素參知政事丙辰五色雲見二月戊午朔左丞相
太平罷尋為上都留守三月戊子朔田豐陷保定彗星見
東方乙巳冀寧陷壬子復以搆思監為右丞相夏四月丁
卯太陰犯明堂癸酉犯東咸僉行樞密院事張居敬復興
中州五月丁亥朔日食陳友諒殺其偽主徐壽輝自稱帝
國號漢改元大義已而回駐江州遣兵陷辰州壬寅太陰
犯建星張士誠海運糧十一萬石至京師六月己丑察罕
帖木爾與孛羅帖木爾爭晉冀互相讎殺帝下詔令各守
信地毋得越境侵犯癸巳太白犯井戊戌太陰犯建星秋
七月辛酉孛羅帖木爾敗王士誠於臺州乙丑太陰犯井
乙亥詔孛羅帖木爾統領達達漢軍仍便宜行事八月戊
子命孛羅帖木爾守石嶺關以北察罕帖木爾守石嶺關

元史卷十四 本紀

望

以南關在大原府東辛卯太陰犯天江壬辰填星犯太微乙未永
平路陷甲辰太陰犯井詔在外權攝官專務殘虐百姓今
後非朝命不得之任九月乙卯朔孛羅帖木爾調兵自石
嶺關直抵冀寧圍其城三日退屯交城察罕帖木爾調參
政閻奉先引兵與戰相持各不下帝遣參政耶先不花前
往和解壬戌賊陷孟州由趙州攻真定復犯上都右丞忙
哥帖木爾與戰敗績冬十月甲申朔甘露降于國子監大
成殿前柏木以張良弼為湖廣參政規取荆襄戊子熒惑
犯井詔孛羅帖木爾守冀寧遣軍倍道至守者不納己亥
察罕帖木爾遣陳秉直瑣住等以兵攻孛羅之軍于冀寧
與其部將脫列伯戰敗之時帝有旨以冀寧界孛羅察罕
不從渡河就屯澤潞拒之十一月甲寅朔黃河清三日詔

大廟影堂祭祀乃子孫報本重事近者兵興歲歉品物不能豐備累朝四祭減為春秋二祭今宜復四祭究不果行二十一年辛丑春正月癸丑朔詔赦天下遣使諭李羅帖木爾察罕帖木爾各罷兵還鎮時李羅帖木爾兵掠冀寧察罕引兵拒之故有是詔庚申太陰犯歲星丁卯李思齊進兵平伏羌等縣癸酉石州大風拔木六畜俱鳴民間槍刃生火焰抹之即無搖之則有二月癸未朔填星退犯太微垣甲申同僉樞密事迭里帖木爾復永平灤州壬寅太陰犯天江廣東廉訪使八撒刺不花殺本省廉訪使完者篤副使李思誠僉事迭麥赤以兵據廣州時八撒刺不花久任廣東專權自恣朝廷患御史八撒刺不花乃以完者篤代其任而除八撒刺不花受命遂激成變三月丙辰太陰犯井庚辰熒惑犯鬼張士誠海運糧十萬石至京師李羅帖木爾罷兵還遣脫列伯

元史卷十四 本紀 聖

等引兵據延安謀入陝詔張良弼出南山義谷駐藍田聽察罕帖木爾節制良弼陰結陝西平章定住侯丞相帖里帖木爾調遣營于鹿臺察罕銜之夏四月辛巳朔日食錄云至正辛丑四月朔日未沒忽然無光天昏黑如夜星斗燦然久之方復舊天再明星斗亦隱又少時日乃沒調張良弼為陝西參政察罕遣其子副詹事擴廓貞糧至京師皇太子親與定約急圖出師五月癸丑明玉珍陷嘉定等路壬戌太陰犯房癸酉太白犯軒轅甲戌熒惑犯太白乙亥李思齊受李武崔德等降六月乙未熒惑歲星太白聚于翼丙申察罕帖木爾總兵討山東發晉軍下井陘出邯鄲過磁相懷衛踰白馬津水陸並進戊戌太陰犯雲雨甲辰太白晝見秋七月通攷云辛酉朔日食辛亥察罕帖木爾平東昌復冠州己巳忻州西北及大同路北有赤氣蔽天如

血八月乙酉察罕帖木爾遣擴廓閻思孝等討田豐直擣東平大破之豐降令為前鋒從大軍東討棣州俞寶東平王士誠東昌楊誠濟南劉珪等皆降魯地悉定引兵圍益都陽翟王阿魯輝謀逆伏誅冬十月癸巳絳州有赤氣見北方如火命察罕帖木爾為中書平章政事兼知河南山東行院事陝西行臺中丞察罕調降將劉珪等守河南十一月庚戌太陰犯建星癸亥犯井壬申犯氏黃河自平陸三門磧下至孟津五百里皆清凡七日命祕書少監程徐祀之察罕帖木爾李思齊遣兵圍鹿臺攻張良弼詔各還信地兵乃解是歲京師屯田成收糧四十萬石賜司農丞胡秉彝上尊金幣旌其功餘各賜鈔有差

元史卷十四 本紀 聖

二十二年壬寅春正月戊申朔太白犯建星甲寅分命李思齊討四川張良弼平襄漢思齊退保鳳翔不行時思齊而良弼附李羅兩軍不和故有是命乙亥填星退犯左執法二月己卯太白犯壘壁陣之西彗星見于危光芒長丈餘色青白丁酉犯離宮四星至月終光芒長二丈餘三月戊申彗星不見星形惟有白氣形曲竟天西指掃大角壬子彗星行過太陽前惟有星形無芒在昴宿至戊午始滅甲寅明玉珍陷雲南省治陝西參政車里帖木爾擊敗之禽其弟明二己未命李羅帖木爾為中書平章政事加太尉李思齊復遣兵攻張良弼於武功良弼伏兵大破之諭良弼聽李羅節制夏四月丙子朔長星見其形如練長數十丈在虛危之間四十餘日乃滅丁亥熒惑離太陽三十九度不見當出不出五月乙巳朔閩賊賽甫丁據福州路平章燕只不花擊

敗之餘眾航海還據泉州福建參政陳有定一作復汀州路辛酉太陰犯建星辛未明玉珍據成都自稱隴蜀王張士誠海運糧十三萬石至京師六月辛巳彗星見紫微垣光芒長尺餘東南指西南行戊子彗星光芒掃上宰降賊田豐王士誠刺殺察罕帖木爾走入益都詔以其子擴廓襲父職總其軍仍諭將士力圖報復以伸大義秋七月乙卯彗星滅跡丙辰熒惑見西方須臾成白氣如長蛇光炯有文橫互中天移時乃滅河決范陽縣八月癸巳太白犯畢九月癸卯朔劉福通以兵援田豐至火星埤擴廓邀擊大破之丁未太白犯亢己酉太陰犯斗辛亥歲星犯軒轅丙寅熒惑犯鬼己巳有流星如酒杯色青白光明燭地冬十月壬申朔命江西平章朵列不花分省廣州執叛臣八

元史卷十四 本紀

聖

撒刺不花殺之甲戌孛羅帖木爾南侵擴廓分地據真定路己卯太陰犯牛丁亥辰星犯亢戊子太陰犯畢十一月乙巳擴廓拔益都田豐王士誠伏誅擴廓取其心以祭父庚戌擴廓遣關保復莒州山東悉平詔加擴廓太尉便宜行事癸亥四川賊陷青川十二月壬辰太陰犯角庚子以佛家奴為御史大夫加封唐撫州刺史南庭王危全諷為南庭忠烈靈惠王是歲黃河自河東清者千餘里帝聞之不樂曰黃河清聖人生當有代朕者羣臣曰今太子生子陛下聖孫即其應也帝笑而頷之

二十三年癸卯春正月壬寅朔明玉珍僭稱帝于成都國號夏紀元天統庚申歲星犯軒轅二月戊戌太白晝見庚子擴廓自益都領兵還河南留瑄住守之張士誠遣將呂

珍入安豐殺劉福通據其城三月辛丑朔彗星見東方經月乃滅命中書平章愛不花分省冀寧擴廓遣兵據之內辰太白犯氏壬戌大同路夜有赤氣互天中侵北斗立廣西行中書省以廉訪使耶爾吉尼為本省平章時南方郡縣皆陷惟耶爾吉尼獨保廣西者十五年夏四月辛丑熒惑犯歲星庚申歲星犯軒轅李羅帖木爾與李思齊構兵不已擴廓遣貊高等以兵擊張良弼詔李羅速進兵討襄漢五月己巳朔張士誠海運糧十三萬石至京師壬午太白晝見乙未熒惑犯右執法六月戊戌朔李羅帖木爾遣方脫脫迎匡福于彰德擴廓遣兵追之敗還匡福遂據保定己亥擴廓部將台盧等駐兵藍田七盤李思齊圍興平據盤屋李羅帖木爾既奉詔討襄漢道阻不得下戊申李羅帖木爾遣竹貞等入陝

元史卷十四 本紀

聖

西據省治擴廓遣部將貊高與李思齊合攻之竹貞出降庚戌星隕于濟南龍山入地五尺乙卯太白犯井丁巳絳州有白虹二道衝斗牛庚申平陽路有白氣三道貫北極北斗天漢壬戌太白晝見夜犯井秋七月戊辰朔以袁宏馬良參知政事乙酉太白晝見有星墜于慶元路西北聲如雷光數十丈八月丁酉朔倭寇蓬州守將劉暹擊走之壬寅太白犯軒轅乙巳太陰犯建星丁未太白犯軒轅己酉太白晝見丙辰太陰犯畢沂州有赤氣互天中有白色如蛇形徐徐西行至夜分乃滅己未太白晝見辛酉太白犯歲星乙丑犯右執法偽漢陳友諒與朱元璋大戰鄱陽湖敗死其子理自立仍據武昌為都改元德壽九月辛未太白犯左執法乙亥歲星犯右執法丁丑辰星犯填星丁

亥太白犯填星辰星犯亢張士誠自稱吳王即平江治宮
室遣侍郎博羅帖木爾再徵糧士誠不應東南海運遂絕
冬十月丙申朔山東赤氣千里癸卯太白犯氏二皇后奇
氏惡丞相太平令監察御史米只爾海身劾之本傳作御
史大夫皆
化詔安置太平于吐蕃未至逼令自殺戊午太白犯房擴
廓遣僉院事任亮復安陸府李羅帖木爾遣兵攻冀寧至
石嶺關擴廓破走之禽其將烏馬爾殷興祖李羅軍由是
不振十一月癸未太陰犯軒轅歲星犯右執法詔復故丞
相脫脫所授宣命是歲御史大夫老的沙與知樞密院事
圖堅帖木爾得罪于皇太子奔大同李羅帖木爾匿之軍
中

二十四年甲辰春正月戊寅太白犯軒轅庚辰保德州民

元史卷十四 本紀 兗

家產豬一頭兩身朱元璋改稱吳王自將伐漢僞漢主陳
理降悉有湖廣江西之地二月壬子歲星犯左執法癸丑
太陰犯西咸池三月辛卯時皇太子惡李羅帖木爾匿老
的沙圖堅帖木爾乃以帝詔削李羅官爵奪其兵李羅拒
命不受夏四月甲午朔日食既又以帝詔命擴廓討李羅
帖木爾李羅知非出帝意皆右丞相搠思監宦者朴不花
所為遂令圖堅帖木爾舉兵犯闕入居庸關知院事耶速
詹事不蘭奚迎戰敗績甲辰皇太子率侍衛兵出古北口
東趨興松乙巳圖堅帖木爾兵至清河列營都城大震使
達達國師至其軍問故以必得搠思監朴不花為辭帝不
得已執與之丁未詔復李羅帖木爾官爵總兵如故以耶
速為左丞相庚戌圖堅帖木爾陳兵自健德門入觀帝于

延春閣慟哭請罪帝宴賚之加李羅帖木爾太保仍守大
同圖堅帖木爾進中書平章政事辛亥圖堅帖木爾請還
軍皇太子至路兒嶺詔追回宮癸丑太白犯井五月戊辰
皇太子促擴廓討李羅帖木爾屯兵冀寧分三道東道以
白鎖住領兵三萬守京師中道以額高竹貞領兵四萬西
道以關保領兵五萬合擊之關保等兵逼大同李羅雷兵
拒守而自率兵與圖堅帖木爾老的沙復大舉向闕甲戌
太白犯鬼乙亥歲星犯左執法六月癸卯三星晝見白氣
橫突其中甲辰河南府有大流星向南方光如晝丁未大
星隕照夜如晝及旦黑氣晦暗如夜甲寅白鎖住以兵至
京師固請皇太子西行丁巳太白犯右執法保德州黃龍
見井中秋七月癸亥太白歲星合于翼甲子歲星犯左執

元史卷十四 本紀 辛

法丙戌李羅帖木爾前軍入居庸關皇太子率諸軍禦于
清河耶速軍于昌平軍士不戰而潰散皇太子馳還都城
白鎖住引兵扈之星夜取道雄霸河間往冀寧戊子李羅
帖木爾駐兵健德門與圖堅帖木爾老的沙入見帝于宣
文閣訴其非罪皆泣帝亦泣賜宴如初庚寅命李羅帖木
爾為左丞相老的沙平章政事圖堅帖木爾為御史大夫
耶速知樞密院事帝曰李羅擴廓俱朕股肱視同心膂自
今各釋宿忿彌成大勳八月壬辰朔日食乙未熒惑犯鬼
乙巳皇太子兵至冀寧乙卯張士誠遂達識以其弟士信
代為江浙左丞相南臺御史大夫普化帖木爾不從死之
達識亦仰藥死李羅帖木爾既當國請誅狎臣罷三宮不
急造作汰宦官減錢糧禁西番僧作好事數遣使請皇太

子還宮使至大原皇太子拘留不報九月辛酉朔宦官思龍空潛送宮女伯忽都出順承門達冀寧行帳乙丑太白晝見癸酉夜西北有紅光至東而散甲申太陰犯軒轅冬十月丙午太陰犯畢己酉犯井己未詔諭皇太子還京師命耶速老的沙分道總兵十二月乙卯太陰犯太白

二十五年乙巳春正月癸亥封李思齊為許國公丙寅太

白晝見甲戌太白犯建星二月辛丑汴梁路見日旁有一

月一星輟耕錄云至正乙巳遣翰林應奉李國鳳抵汴城望祭嵩嶽二月十三日仰視日旁一月一星如初

弦者又十日雨木冰狀如樓閣人物鳥獸并木俱備高林大樹珠葆羽幢彌望不絕凡五日始解又十日復冰自汴

至中澤丙午太陰犯填星三月庚申朔皇太子在冀寧下

皆然令軍中日字羅帖木爾襲據京師余既受命總督天下諸

軍恭行顯罰少保平章擴廓躬勒將士分道進討諸王駙

元史卷十四 本紀

至

馬及陝西平章李思齊等各統軍馬向其奮義戮力剋期恢復丙寅李羅帖木爾聞皇太子討己幽置二皇后于諸色總管府丁卯以火尼赤別帖木爾竝為御史大夫戊辰太白犯壘壁陣夏四月庚寅李羅帖木爾脅二皇后令還宮取印章偽為后書遺皇太子遣內侍完者圖持往冀寧復出幽之乙巳關保等兵入大同壬子熒惑犯靈臺五月辛酉熒惑犯太微垣甲子京師雨釐長尺許或言于帝曰龍絲也命拾而祀之六月戊子以黎安道參知政事乙巳二皇后還宮乙卯皇太子加李思齊邠國公秋七月丁丑填星歲星熒惑聚于角亢己卯太陰犯畢乙酉李羅帖木爾伏誅圖堅帖木爾老的沙北遁丙戌遣使函李羅首往冀寧即召皇太子還其黨黎安道方脫脫雷一聲皆棄市

河決小流口達于清河八月丁亥朔京城門閉者三日竹

貞貊高命軍士緣城而上碎平則門鍵大掠都市乙未太

陰犯建星己亥太白犯壘壁陣癸卯復命皇太子分調將

帥戡定未復郡邑承制用人并準正授丁未皇后弘吉刺

氏崩壬子以洪寶寶貼古思不花捏烈圖竝平章政事擴

廓扈從皇太子至大都九月丁丑太陰犯井壬午命伯撒

里為太師右丞相擴廓為太尉左丞相錄軍國重事以方

國珍為淮南左丞相分省慶元冬十月辛卯熒惑犯天江

壬寅以哈刺章知樞密院事丁未益王渾都帖木爾禽老

的沙誅之圖堅帖木爾走八爾思之地命嶺北左丞相山

僧追討之戊申以圖魯為御史大夫己酉熒惑犯斗太陰

犯右執法庚戌犯太微垣閏月庚申詔張良弼俞寶孔興

元史卷十四 本紀

至

等悉聽擴廓調遣戊辰太白辰星熒惑聚于斗太陰犯畢辛未封擴廓河南王以代皇太子親征總制關陝晉冀山東迤南一應軍馬聽便立行事壬申太白犯歲星辛巳以脫脫木爾為中書右丞達實參知政事十一月己丑太白犯熒惑太陰犯壘壁陣丙申犯畢癸卯犯太微垣十二月乙卯立二皇后奇氏為皇后改賜肅良合氏癸亥太陰犯畢庚午歲星掩房辛未太陰犯右執法圖堅帖木爾伏誅是歲遣侍郎滿尚賓等至鳳翔持詔諭李思齊開通川蜀道路思齊方兵爭不奉詔留尚賓等不還

二十六年丙午春正月己酉命沙藍苔里為左丞相李羅沙脫脫不花竝為御史大夫完者木知樞密院事壬子增燕南河南山東陝西河東舉人會試者額進士及第以下

遞升官一階二月癸丑朔立河淮水軍元帥府于孟津甲戌以內難平凡經值軍馬之地與免雜泛差徭命擴廓還河南分省部自隨統制各處軍馬收復中原調陝西張良弼兵不應是月黃河北徙自東明曹濮下及濟寧民皆被害三月丁亥白虹五道亙天其第三道貫日又有氣橫貫東南良久甲午擴廓遣關保等西攻張良弼於鹿臺李思齊脫列伯孔興等與良弼連兵拒之僞夏主明玉珍死夏六月壬子朔介休縣地震平遙縣大雨雹山陰縣臥龍山裂秋七月辛巳朔日食徐溝縣地震石州大星如斗自西南而落甲午太白經天擴廓分兵屯河中遣關保虎林赤合兵渡河約李思齊共攻張良弼思齊仍與良弼合連兵拒守丙午太白經天八月戊寅以李國鳳為中書左丞授

元史卷十四 本紀

五

陳有定為福建行省平章九月丙戌加方國珍為江浙左丞相其弟國瑛國珉姪明善竝為行省平章辛丑李星見東北方冬十月甲子擴廓遣其弟脫因帖木爾及額高完哲等駐兵濟南控制山東十二月庚午蒲城洛水和順崖崩是歲吳王朱元璋兵取淮安高郵徐邳潁泗及湖杭二州紹興嘉興諸路皆張士誠竊據者僞宋主韓林兒死二十七年丁未春正月乙未絳州天鼓鳴聲如戰鬪李思齊張良弼脫列伯會于含元殿基眾推思齊為盟主同拒擴廓二月庚申以月魯不花月魯帖木爾竝為御史大夫三月丁丑朔萊州大風海鳥至其翅如席庚子京師大風飛沙揚礫白日昏暗夏五月丙子朔白氣二道亙天大同隕霜殺麥乙酉以完者帖木爾為右丞相俺答平章政事

辛丑擴廓定擬所屬官二千六百一十員詔從其請李思齊遣張良弼部將郭謙守黃連寨虎林赤竹貞商鬻引兵攻之不克思齊遂據長安六月丙午朔日食晝晦丁巳皇太子寢殿後新發井中有龍出光焰燦人宮人驚懼仆地長慶寺有龍纏繞槐樹飛去樹皮皆剝丁卯沂州山崩秋七月丁酉絳州星隕光耀如晝李思齊遣將許國佐會張良弼脫列伯兵屯華陰又遣將鄭應祥守陝西自還鳳翔龍見於臨胸龍山大石起立八月丙午再命皇太子總制天下兵馬詔擴廓領本軍自潼關以東肅清江淮李思齊自鳳翔以西進取川蜀以少保圖魯為陝西行省左丞相總本部及張良弼孔興脫列伯等各軍進取襄樊山東行省平章王信以本軍固守沂州別聽調遣詔書雖下而皇

元史卷十四 本紀

五

太子不果行擴廓亦不奉命于是其部將額高完保皆叛殺衛輝彰德守禦官上言擴廓不遵君命無人臣禮臣等不能俛首聽命詔削擴廓官罷其兵柄就命額高討之壬子仍令皇太子立大撫軍院以右丞相完者帖木爾翰林承旨答爾麻平章政事完者帖木爾竝知撫軍院事九月甲戌朔命丞相耶速分省山東沙藍荅里分省大同丁丑以兵興迤南供億繁重真定河南陝西山東冀寧諸處與免民間今年田租之半其餘雜泛一切住罷吳王朱元璋取平江路執張士誠以歸士誠自縊死冬十月甲辰朔命耶速會額高攻擴廓于真定不克壬子詔落擴廓太傅左丞相及兼領諸職仍前河南王其帳前諸軍命白瑣住虎林赤統之河南諸軍李克彝統之山東諸軍耶速統之山

西諸軍沙藍蒼里統之河北諸軍貂高統之關保仍統本部軍如故擴廓退軍澤州甲寅以火里赤丁好禮並平章政事十一月壬午吳王朱元璋兵取沂州平章王信遁癸未取慶元路方國珍迎降分兵由海道入福州取邵武建寧延平諸路執陳有定以歸有定不屈死辛丑益都陷宣慰使普顏不花總管胡濬知樞密院張俊皆死之十二月癸卯朔日食甲子命右丞相耶速等會國公楊誠陳秉直各部軍同守山東詔李思齊爲副總統守關中脫列伯孔興出潼關渡河合勢東行其勤王事思齊等不奉命詔分潼關以西屬思齊東屬擴廓各罷兵還鎮於是關保退屯潞州商高留屯潼關

二十八年戊申春正月壬申朔命皇太子敕關保固守晉

元史卷十四 本紀

奎

寧總統諸軍如擴廓拒命當以大義相裁就便禽擊辛巳詔諭擴廓曰比者耶速上奏卿以書陳情深自悔悟及省來意良用惻然朕視卿猶子卿何惑於儉言不體朕心墮其先業卿今自能悔固朕所望其思昔日委任肅清江淮之意卽將冀寧真定諸軍就行統制渡河直擣徐沂以康靖齊魯則職任之隆當悉還汝衛輝彰德順德皆爲王城卿無以貂高爲名縱軍侵暴其晉寧諸軍已命關保總制策應戡定山東將帥各宜悉心庚寅彗星見於昴畢之間是月吳王朱元璋卽帝位建國號曰大明二月壬寅朔復削擴廓爵邑命圖魯李思齊等討之癸卯武庫災癸丑明兵取東昌路守將申榮王輔元死之丙辰擴廓自澤州退守晉寧關保守澤潞二州與貂高軍合明兵至河南李思

齊張良弼等解兵西還三月庚寅彗星見西北有星流于東北眾小星隨之其聲大震明兵取河南李思齊張良弼會兵駐潼關明兵入潼關思齊奔鳳翔夏五月庚午朔李克彝棄河南城奔陝西推李思齊爲帥駐兵岐山思齊部將虎林赤脫列伯張意等據盤屋商高據武功李克彝據岐山任從政據隴州六月庚子朔雷雨中有火自天墜焚大聖壽萬安寺壬戌臨州保德州地震五日止明兵下湖南兩廣悉定秋七月癸酉京城黑氣起百步內不見人貂高關保以兵攻晉寧閏月己亥朔擴廓禽貂高關保遣其斷事官以聞帝不得已詔貂高關保開謀構兵卽依軍法誅之辛丑明兵由衛輝彰德取廣平路丁巳詔罷大撫軍院復命

元史卷十四 本紀

奎

擴廓仍前太傅左丞相統領見部軍馬由中道直抵彰德衛輝右丞相耶速統大軍徑山東道水陸並進陝西左丞相圖魯率關陝諸軍東出潼關攻取河洛平章李思齊領本部軍南出七盤金商克復汴梁四道進兵犄角勦捕毋分彼此平章俺普瑣住等軍東西布列乘機掃殄遼陽左丞相耶先不花郡王知院厚孫等軍捍禦海口藩屏畿輔以皇太子愛猷識理達臘悉總天下兵馬裁決庶務具如前詔壬戌白虹貫日始罷內府興造甲子擴廓自晉寧退守冀寧明兵至通州知樞密院事卜顏帖木爾力戰死右丞相失列門傳旨奉太廟列室神主竝隨皇太子北行乙丑白虹貫日詔准王帖木爾不花監國慶童爲左丞相留守京城丙寅帝御清寧殿集三宮后妃及皇太子并太子

妃同議避兵失列門及知院事黑斯宦者趙伯顏不花等

諫不聽伯顏不花慟哭曰天下者世祖之天下陛下當以

死守奈何棄之臣等願率軍民及諸怯薛台出城拒戰卒

不聽至夜半開健德門北奔一鐵鴉鳴端明殿上帝命射

之終莫能中俄常遇春等統兵至柳林去京甚近帝召百

官會議端明殿及開門忽有二孤自殿上出帝嘆曰宮禁

嚴密此物何得至此殆天所以八月庚申鴻猷等錄作八

告朕朕其可謂哉遂命北狩月二日申當作

丙戌始殂壽五十一太尉完者院使觀音奴奉梓宮北歸

五月癸卯明兵襲應昌皇孫買的里八剌及后妃皆被獲

皇太子愛猷識理達臘從數十騎遁明主以帝知順天命

特加號順帝封買的里八剌為崇禮侯歷代建元攷云順

宗按高麗史云順帝太子自立改元宣光凡十一年諡曰昭

元史卷十四終

元史卷十四

本紀

七

立從和林改元宣光稱北元時洪武十年也明年豆叱仇
帖木爾立北元遣使告高麗繼又以改元天元告則繼順
帝而建元者非止宣光矣朔漢圖攷云洪武元年八月
明兵取燕都元主攜歷代傳國璽遁出塞三年殂于應昌
太子愛猷識理達臘稱帝于漠北傳位于子脫古思帖木
爾後為其下耶速迭爾所弑其臣復立坤帖木爾為可汗
建文三年殂以鬼力赤為可汗永樂改元屢遣書招諭不
服八年車駕親征至斡難河十二月再征追至土刺河二
十年三征次殺虎原會部長阿魯台弑其主木雅失里而
自立數侵塞上宣德九年為瓦剌部所敗阿魯台走死部
落盡離散瓦剌乃遣使入朝獻傳國璽而元始亡

元史卷十五

后妃

昔者先王慮賈魚姑進也於是定陰教之職掌

嚴宮闈之名分以閑內外立紀綱而風化天下然三代漢

唐以來猶世有妲褒呂趙武韋楊張之禍蓋緣粉飾具文

無裨實效如此也何況有元沿朔漠之俗泯嫡庶尊卑被

寵者皆曰皇后次日妃子皇子多稱太子王女亦曰公主

叔母亦稱太皇太后中葉後始事冊立告廟而竝匹如故

曠然無復禮坊文物之閑然當太宗定宗末六載無君黃

裳尸位國枋旁落竟無諸害篡奪之患易世以後卒得并

吞四海久而後亡何哉前代宮闈之禍必宦官外戚表裏

煬煽乃能助虐階亂元法內庭給事多用貴臣子弟又統

以大臣而宦豎無權至外戚世家則惟守藩封食租賦奉

朝請而已是以中宮閒撓國枋而皇綱不遠傾覆蓋亦治

之少得其道名不足而實尚畱焉兼以陰山間氣淑多於

愿氈帳洎俗質勝其文其名號止有后妃二等分主帳殿

食邑賦稅餘惟歲賜無他紛華以接其目豔妖以詭其情

是以一代宮闈女德風徽視前代反有過之無不及武宗

始改其舊全從漢習蕩啟王心順帝從而甚之國遂陵夷

斯亦萬世之龜鑑也婦女不出閨門而元初臣下皆名其

后延祐間禮部主事曾元用言后為天下母豈可直稱其

名安早加徽號以章懿德而未能頓改至順元年敕累朝

宮分官署凡文移毋得輒稱皇后止稱某位下娘子而往

昔所失不能更正舊史后妃諸傳舛漏事實而繁衍冊文

又別爲一表蓋冗無當用爲增損成篇皆舍名書氏惟氏失者乃不得已書名稱滅野人之譏云

太祖母宣懿太后幹勒忽訥氏諱訶額倫先爲蔑里吉部酋弟婦方出嫁烈祖軍遇於野奪得之生太祖及皇弟合薩爾大王合赤溫大王帖木格大王帖木倫長公主烈祖沒太祖甫九歲時俺巴海汗之子泰赤烏爲部長而俺巴海汗二夫人與后宴食養人供馬湏弗均二夫人怒明日移帳去遂絕近侍多叛附泰赤烏以去后疾騎持兵追還大半後卒叛往太祖少長又爲泰赤烏部虜去幾死又爲蔑里吉部來尋仇全家急遁入山幾不免后沈毅仁惠有智略從危險傾覆中撫長太祖兄弟輒參決軍旅以太祖性剛果於殺戮恆戒飭之太祖爲合罕時札木合以贊率

元史卷十五 列傳

二

十三部來攻太祖亦分部人爲十三翼迎之太后與諸王爲一翼以戰太祖卽尊位分太后與季弟帖木格其部下萬人而舊臣蒙力克父子恃寵橫恣嘗與皇弟合薩爾有隙遂假爲長生天神言諧合薩爾當有天下密勸除之太祖遂夜召執合薩爾太后聞之馳至太祖帳中盛氣詬讓出兩乳迷撫養諸子舊事太祖惶恐乃釋合薩爾猶陰奪前賜部眾二千餘語詳諸王傳二年崩世祖至元三年定廟制世次追上尊諡附烈祖爲太廟第一室

太祖光獻翼聖皇后弘吉刺氏父名特因賜號薛禪故名特薛禪帝幼時烈祖攜往舅氏家乞婚與特薛禪遇特薛禪奇帝儀表曰昨夢白海青挾日月飛集吾掌今是子雙目光炯照人殆其祥邪遂以后許帝畱止其家時年九歲

烈祖將歿使蒙力克召帝還及帝成立後從泰赤烏部脫歸薛禪乃以后歸帝未幾帝爲蔑里吉部夜襲破掠后去當兵至時有媼聞兵馬聲震動亟呼太后與帝兄弟起乘馬逸后無馬藏牛車中馳至山隘軸折爲所獲帝尋借克烈部札荅刺部兵往攻得后以歸與札荅刺部共屯歲餘其部長札木合有違言后聞之趣帝速行舊史帝征高麗軍中左右聞后有違言帝始引軍去攻本紀六年攻金并無伐高麗事惟十三年帝自征夏命哈札刺討契丹六哥於高麗江東城降之高麗王職遂降諸歲貢方物帝實未嘗自行也外國高麗傳亦同此必舊史之誤今正之先是強臣蒙力克父子諸害皇弟合薩爾賴太后救免後皇弟鐵木格復爲其所辱泣訴於帝后助發其罪始誅廢其父子語詳諸王傳后生太宗及朮赤大王察合台大王拖雷大王后父薛禪弟按陳別詳勳戚傳終元世弘吉刺

元史卷十五 列傳

三

氏女爲后者十八人男尙主者十一人尊顯莫並皆啟於后世祖至元二年追上尊諡曰光獻附太祖廟武宗至大二年加諡翼聖又有忽蘭后者兀洼思氏蔑里吉部人初弘吉刺后爲蔑里吉部所虜去帝起兵報復克之后父先降納女於帝取有寵帝征回回部數年皆從云又有耶速皇后塔塔爾部人也其後以部爲氏始帝克其部時納后妹耶速干爲夫人有寵夫人因言有姊尤美勸帝於部中求之已而后至夫人遂以位讓之尋封爲后而耶速干復爲夫人后嘗從征十四年帝將征回回部后請曰兵戰凶事帝遠涉山川諸子皆將兵他征一旦不諱誰爲嗣者願以告部眾帝大驚曰此大事諸子親臣莫有言者微汝幾忘由是遂定立太宗久之從征西夏帝道獵騎馬驚墜違

豫后與舊臣脫命力勸班師帝必欲滅夏雖不從后而心以爲忠既克夏乃厚賜脫命盡以其國人賜后是年帝崩后妹耶速干後亦封爲后又有合荅安后遜都思氏泰赤烏部人功臣赤老溫妹也初帝爲泰赤烏部所獲將加害逃至其家藏羊毛車中敵搜至其家后詭詞脫帝於難事詳赤老溫傳及帝爲合罕擊破泰赤烏部后逃山谷中軍行過其下后望見亟呼帝名帝使人問之自言我合荅安也夫爲大軍所執將殺冒死求救帝遽命釋之已死乃以舊恩納焉又公主皇后者完顏氏金廢帝衛紹王女也金宣宗貞祐二年大軍圍燕京三月金主遣使求和議婚公主竝大臣爲質乃遣使詣金選女時金諸帝公主見在者七人惟廢帝衛王少女小姐姐取秀慧使者以爲請金主

元史卷十五 列傳

四

許之使者遂拜公主於階下竝請公主北鄉其國遙拜主不敢拒於是金人送主來歸并遣從嫁護駕將十人細軍百人童男女各五百采繡衣三千御馬三千匹金寶稱是儀甚盛公主母欽聖夫人袁氏亦隨至焉班師歸國人耀之皆呼曰公主皇后太祖十七年長春真人巨處機徵詣行在過和林時奉太皇后旨過河其漢夏兩公主皇后皆遣送寒具等食漢公主爲金主女與夏國公主各分庭帳其後太宗世汴京降尙以衛紹王太子梁王承恪降表亦以其妹公主在朝故云右本南遷錄太祖后妃四十餘人自弘吉刺太皇后外取貴者曰兩公主皇后一金源氏女一西夏國王女又有高麗國王女而舊史皆改其名故不知屬何帳殿其列表者曰忽魯渾后

闊里桀担后脫忽思后帖木倫后亦憐真八刺后不顏渾圖后忽勝海妃子此七位其居大幹爾朵忽蘭后合八真后亦乞刺真后脫忽茶后耶真妃耶里忽圖妃察真妃合刺真妃此八位其居第二幹爾朵耶速后忽魯合刺后阿失倫后圖合刺后察爾后阿昔彌失后完者忽都后渾魯忽台妃忽魯輝妃刺伯妃此十位其居第三幹爾朵耶速干后忽荅罕后合荅安后幹者忽思后燕里后圖干妃完者妃金蓮妃完者台妃盧倫妃卯真妃鎖郎合妃此十二位其居第四幹爾朵元初起塞外無城郭宮室故襲遼制名大帳所屯曰幹爾朵因以后妃分隸焉歷世相傳兵衛財蓄畱朔方者領以皇子閒詔其帝后妃守之如漢唐奉園陵故事其主幹爾朵之皇后多係各大國之女或曾與

元史卷十五 列傳

五

太祖同患難諸帳勢均位敵無嫡庶高下之分惟妃稍次於后焉其中諡號世族行跡始末可略攷見者五人於右餘多闕太宗孛刺合真皇后無子諡闕又有昂灰二皇后太宗在潛邸時撫育憲宗爲子者也又有乞里吉忽帖尼三皇后及乃馬真氏六皇后乃帝所掠蔑爾乞部忽都妻生定宗及闕端大王闕出大王合刺察大王四子者也闕出伐宋薨於師其子失烈門帝嘗撫於宮中稱太孫命嗣立帝崩后召耶律楚材問之楚材曰此非外姓臣所敢知有先帝遺詔在后不從遂稱制於和林者四年后不明大體舉錯任情賴耶律楚材隨時匡救梃其已甚及子定宗卽位而朝政猶出於后時楚材已歿左右用事事見本紀定宗崩

憲宗立遷后與蒙哥都於闊端所居地西蒙哥都闊端子也至元二年后薨上尊諡曰昭慈耐太宗廟又有業里訖納妃生合丹蔑里二王

定宗欽淑皇后海彌石氏帝崩后抱太孫失烈門臨朝聽政者二年先是乃馬真太后既舍太孫立定宗至是定宗崩后思踵乃馬真后故敵乃挾太宗舊命擁太孫稱制而諸王大臣不服遂共推立憲宗事見本紀憲宗立二年后與失烈門母厭禳事覺乃遷失烈門於沒脫赤地而賜后等死至元二年追諡未附

睿宗顯懿莊聖皇后克烈氏太宗母弟拖雷妃憲宗世祖母也父札合紺字克烈部長脫里弟先降太祖從征蔑里吉有功後奔乃滿及克烈部破同乃滿蔑里吉來侵爲別

元史卷十五 列傳

六

將朮赤台所俘獻女請成太祖乃納其長女奔巴合而以妃賜拖雷憲宗即位尊皇考爲帝廟號睿宗尊妃爲皇太后二年崩睿宗又有妃乃馬真氏生撥綽大王睿宗十一子自二帝及撥綽外其母氏皆無攷世祖至元二年追上尊諡曰莊聖耐睿宗廟武宗至大二年十月加諡曰顯懿三年十月上玉冊云

憲宗貞節皇后弘吉刺氏特薛禪孫芒哥陳女也早崩至元二年追諡耐憲宗廟后初崩帝卽以其妹耶速爾繼爲后又有出卑皇后失其氏八年從征宋帝留后居六盤山而自進攻蜀明年秋七月帝崩於釣魚山九月后亦薨又有亦乞列氏皇后昌王孛孫女也父瑣爾哈尙太宗子闊出女安圖公主后爲主出又有明里忽都魯皇后泰定

二年詔守班圖營帳太宗又嘗爲帝娶火魯刺部女火里差爲妃後亦稱爲后不知所終世祖卽位元年賜先朝亦乞列皇后幹者思皇后每位銀二千五百兩羅絨等折寶鈔二十三錠有奇又賜先朝兀魯忽乃妃子等銀五千兩其後歲以爲常此元代宮闈歲賜之大略也舊史本紀作皇太后案帖古倫乃世祖后非先朝后也今正之其所賜各妃亦當屬先朝以表中世祖后妃無此名故世祖后妃十人弘吉刺太皇后居大庭帳弘吉刺次皇后弘吉刺第三后居第二庭帳塔刺海后居第三庭帳伯要兀真后居第四庭帳又有速哥答思后八巴罕妃撒不忽妃皆不知所繫而速哥答思后泰定三年嘗詔守世祖庭帳云

元史卷十五 列傳

七

諡及崩年竝缺次昭睿順聖皇后弘吉刺氏魯王按陳女也侍帝潛邸生太子眞金帝卽位中統三年立爲后至元十年三月授冊寶元世冊禮自后始尋上尊號曰貞懿昭聖順天睿文光應皇后性仁而明達當憲宗時帝以母弟奉命南征軍鄂州而憲宗崩於蜀帝母弟阿里不哥守和林遂與其黨阿藍荅謀篡立乘傳發兵去開平僅百餘里后使人問曰發兵大事太祖曾孫眞金在何故不令聞知阿藍荅不能對尋聞其黨脫里赤至燕南僉民爲兵乃密使馳報帝亟還國事始定后居中宮尤樂簡素隨事諷諫多裨國政有四怯薛官請割京師城外地爲牧場詔具圖以進后欲諫至帝前乃先陽責太保劉秉忠曰汝漢人明達者言則主聽何爲不諫初定都時以地牧馬或無不

可今軍民分業已定奈何奪之豈此外遂無牧地耶帝默然其事遂寢后嘗取太府緡帛各一帝謂此軍國所需非私家物也后自是率宮人親執女工拘諸舊弓弦練之緝為紬製衣其鞞密可比綾綺而宣徽院羊膻皮舊棄無用后令縫為地毯不使廢敗先是帽無前簷帝出射苦日景炫目后乃製蓋之帝喜命為式又製一衣前有裳無衽後長倍前無領袖綴以兩襟名曰比甲以便騎射時多倣效焉十三年宋平幼主入朝大宴眾皆歡甚后色不懌帝曰今江南既平兵戈浸息爾何獨不樂后曰自古無千歲之國毋使吾子孫及此幸矣帝以宋府庫寶物陳列殿庭召后觀之后視即去帝遣宦者問后所欲得后曰宋人貯蓄將以遺子孫其子孫不能保而歸於我我何取邪宋太后

元史卷十五 列傳 八

全氏至大都不習風土屢求還故鄉又其故宮人安定夫人陳氏安康夫人朱氏與二小姬縊死邸中帝命縣其首全太后驚怖后屢乘閒請令南歸帝曰爾婦人無遠慮彼一國之母遺民尚在若使還江南必啟浮言非所以保全之也誠愛之者時存恤之俾毋悲羈旅耳后用是益厚待焉全太后及官人等在都日支羊肉千六百斤他物稱是謝太后田在江南者歲自收租及謝太后薨始以其賞產歸中官尚有地三百六十頃俾為世業歲免征租翰林待制王思廉嘗進讀通鑑至唐太宗怒魏徵長孫皇后朝服拜賀得賢臣事帝令內官引講官至后閣前說其事后曰是誠有益聖衷後有類此者宜以時陳善十八年二月崩成宗即位追上尊諡祔世祖廟又弘吉刺第三后諱

南必納陳孫仙童女也至元二十年立為后時帝春秋高后繼守正宮頗預政柄大臣每不得見帝輒因后白事焉生皇子鐵蔑赤崩年與諡俱闕元代惟帝陵皆在漠北起輦谷其諸后妃太子陵皆在獨石口北氈帽山見迺賢金臺集

成宗母徽仁裕聖皇太后弘吉刺氏明孝皇太子妃也先是世祖出獵道渴至一帳見女子緝駝茸從求馬漣曰馬漣固有之但我父母諸兄皆不在我女子難以與汝世祖欲去又曰我獨居此汝自來自去於理不宐我父母即歸盜姑少待須臾果歸始出馬漣飲焉世祖既去歎息曰此女倉猝知禮若是豈非佳婦邪後諸臣請擇太子妃俱不當上意有老臣嘗從獵知此事且聞未字具白世祖世祖

元史卷十五 列傳 九

大喜即聘為太子妃事中宮孝謹不離左右起居服御無纖介煩猥不周至世祖每嗟其賢一日世祖幸東宮視太子疾見織金臥褥責曰我嘗賢汝何奢靡如此邪妃跪對曰常時不敢用今以太子病恐侵溼氣乃暫陳之請即撤去太子薨皇孫即位是為成宗尊皇考為帝廟號裕宗尊母妃為皇太后設太后官屬置徽政院後院官有受獻浙西田七百頃籍於位下太后曰江南率土皆國家所有何必私田且我一寡婦人安用是即命中書省盡罷易其受獻者后有弟既朝求官后曰汝非其人也勿以累我其後弟果被黜人皆服后之知人大德四年二月崩上尊諡曰裕聖祔裕宗廟葬先陵至大三年十月加諡徽仁太后生三子其三即成宗其長曰晉王甘麻刺生泰定帝其次曰

懷王荅刺麻巴刺生武宗仁宗元一代帝者皆后子孫云
成宗貞慈靜懿皇后弘吉刺氏幹羅陳女也侍帝藩邸爲
元妃妃誕日六宮妃嬪以次獻慶禮時南朝宮人有選入
後庭者亦各有獻一寒光水玉魚一青芒雙蚪如意一滙
金簡翠腕闌元妃問何物對曰魚是太真潤肺物如意是
六朝所遺闌是建業景陽宮膳脂并物妃不說元氏掖生
子德壽帝未卽位薨至大三年上尊諡祔廟及帝卽位元
貞元年繼立伯岳吾氏爲皇后駙馬脫里忽思之女也大
德三年十月授冊寶時帝多疾后居中用事然能信任相
臣哈刺合孫舉錯不撓號爲綏靜八年正月地震平陽后
召平章愛薛問曰災異如此殆下民所致邪對曰天地示
警朝廷與下民何與后然之嘗幸天壽萬寧寺見所塑祕

元史卷十五 列傳

十

密佛形象詭褻惡之以帕蒙面而過卽敕毀去會帝久病
無子皇姪武宗以懷寧王總兵朔方其弟仁宗在內中外
人望所屬后忌之乃出仁宗於懷州明年帝崩無子后恐
其兄弟立修怨召安西王阿難荅至京師謀立之丞相阿
忽台等遂欲奉后垂簾聽政遣師斷懷寧王歸路而丞相
哈刺合孫已密報仁宗于懷州先入以計誅阿忽台等清
宮禁使迎皇兄武宗于漠北安西王旣誅并搆后以交通
事遷居東安州尋賜死成宗又有乞里吉忽帖尼后失其
氏
順宗昭獻元聖皇后弘吉刺氏魯王按陳孫渾都女成宗
同母兄懷王荅刺麻巴刺大王元妃武宗仁宗母也大德
間成宗不豫成后欲專政忌仁宗屬近與妃俱遷懷州成

宗崩仁宗奉妃還京師入內哭復出居舊邸朝夕入奠陰
平內難迎武宗卽位先是妃用陰陽家言卜兩子星命所
宜立欲武宗讓位於弟遣近臣朵爾密告曰汝兄弟皆我
子豈有親疏陰陽家所言運祚修短不容不思也武宗使
康里托托還報乃更趨召事見諸王傳旣立尊皇考爲帝
廟號順宗尊母妃爲皇太后是年冬朝於隆福宮上皇太
后冊寶至大元年三月爲太后建興聖宮當武宗鎮守邊
陲太后嘗以振旅親禱於五臺山明年正月遂復幸五臺
修佛事荅靈貺武宗亦孝敬無方殫崇禮制詔高麗王璋
從侍鑿輅備宿衛四月復立興聖宮江淮財賦總管府主
輸入三年又以興聖宮鷹房等戶四千分處遼陽建萬戶
府統之是年十月率皇太子諸王羣臣朝上徽號曰儀天

元史卷十五 列傳

十一

興聖慈仁昭懿壽元皇太后越日太后敬謝太廟武宗更
緣廣恩意詔赦天下仁宗踐位加上尊號曰全德泰寧福
慶皇太后英宗初立尊爲太皇太后上尊號曰徽文崇祐
太皇太后是日御大明殿受朝賀越日以禮成復告廟元
世諸后自非臨朝雖儷宸極其光耀莫有比焉居東朝頗
仁儉宮女皆教治女工每幸上都必敕鷹房衛士先往毋
害民稼性敏給有權數歷佐三朝威福己出姦佞附導遂
日不檢內則黑盧母用事外則幸臣失烈門紐鄰及丞相
鐵木迭爾暴贖無忌至箠辱宰相素敗綱紀仁宗每恐傷
太后意容忍不窮問及英宗立羣倖誅而後稅政始革初
仁宗時議立皇太子羣小說太后以武宗長子和世疎性
剛察不如英宗幼謹飭易與乃共擁立之旣卽位太后來

賀語及羣臣臧否欲其委任所寵帝莊毅形於色太后不
擇而去曰我固不擬立此兒也既而不得自恣遂飲恨成
疾然奸黨蟠據內外卒貽英宗成濟之禍至治二年九月
崩明年上尊諡祔順宗廟順宗為皇孫時世祖嘗賜以侍
郭氏女生魏王阿木哥仁宗朝魏王再以罪貶見宗室傳
武宗宣慈惠聖皇后弘吉刺氏名真葛魯王按陳裔孫脫
憐子遊不刺之女也至大三年正月冊為后無子仁宗皇
慶二年立長秋寺掌皇后宮政秩三品泰定四年某月崩
八月上尊諡弘吉刺氏世尊貴間以功名顯后祖父脫憐
世祖時授河西王府千戶賜驛券圓符各四以兵守朔方
客魯連河二十四年從族父濟寧郡王帖木爾征叛王乃
顏有功賜號拔都卒子遊不刺嗣卒后兄買住罕嗣尚王

元史卷十五 列傳

十一

女拜荅沙公主生二女後為泰定帝妃卒弟字羅嗣亦尙
王女泰定二年以金印封毓德王益貴寵其女後為順帝
后而買住罕孫阿失復襲千戶順帝元統二年詔立武宗
廟后主丞相柏顏與羣僚議曰先朝以真葛魯皇后無子不
為祔廟今所當祔者其明宗母乎抑文宗母乎時帝為明
宗長子柏顏意有在而羣臣依違莫決太常博士逮魯曾
對曰真葛魯皇后早膺冊寶則文明二母皆妾也今以無子
之故不為立主而以妾母為正是為臣而廢先君之后為
子而追封先父之妾於禮不可昔燕王慕容垂即位追廢
其母后而尊其生母配享先王為萬世笑堯之母號慶都
帝嘗庶妃堯立為帝未聞冊以為后而配嘗豈有宗廟大
典不法堯舜而法慕容氏乎眾咸是魯曾議集賢學士陳

顯持異議而鄙悖不學引唐太宗冊巢刺王妃故事眾咸
嗤之於是升祔禮定以后配焉武宗又有速哥失里后者
宣慈惠聖皇后從祖姑也亦無子崩年與諡竝闕又仁獻
章聖皇后亦乞列氏安西王女盧兀倫公主所出初為帝
妃生明宗天祿二年追上諡號順帝至正六年擬改諡曰
莊獻嗣聖未上又文獻昭聖皇后唐兀氏生文宗天祿二
年追上尊號又有完者台皇后至大中妃洪氏取寵專房
宴七夕結彩樓於臺諸妃嬪不得登獨洪妃與宮官數人
升樓散綵令宮人俯拾之以色豔淡為勝負設鬪巧宴帝
又於仲秋月夜與眾嬪御泛太液池中流畫鷁夾以蓮舫
各設女軍左曰鳳隊右曰鶴團冠服旗旛瑰奇詭麗其蓮
舫菱舫輕捷如飛有駱妃者善歌舞起為帝謳月照臨之

元史卷十五 列傳

十二

曲酒酣下令女軍水戰為戲風旋雲轉夜分乃罷太液池
在萬歲山北舊名瓊花島云武宗后妃侍從各有定制后
侍從二百八十人冠步搖泥金帽衣翻鴻獸錦袍妃侍從
二百人冠懸梁七曜巾衣雲肩絳繒袍嬪侍從八十人冠
文毅巾衣青絲縷金袍竝謂之控鸞昭儀宮中制五雲車
車有五箱以火樹為檻軾烏棧為輪轅頂明珠左張翠羽
蓋曳玉鈴結青錦為層雲覆頂旁建青龍旗列磨鏢雕銀
戟五右張白鳩緝毳蓋曳金鈴結素錦為層雲覆頂旁建
白虎旗列□□□□五前張赤羽蓋曳□鈴結赤錦為
層雲覆頂前建朱雀旗列線鋒火金戈五後張黑兔圓毫
蓋曳竹鈴結墨錦為層雲覆頂後建玄武旗列畫干五中
張雕羽曲柄蓋曳石鈴結黃錦為層雲覆頂建句陳旗中

箱爲帝坐外四箱爲妃嬪坐每晦夜遊幸苑中御此以行不用燈燭元自世祖勅業宮闈氈酪不染華風成宗繼體多疾佚遊尚簡自武宗始效金明昌故事頗侈遊宴其後順帝日以荒娛沈溺詭麗遂至亡國

仁宗莊懿慈聖皇后弘吉刺氏亡其世系生英宗皇慶二年三月立爲后上冊寶遣官祭告郊廟改典內院爲中政院先帝崩英宗即位追上尊諡附仁宗廟仁宗又有蒼里麻失里后其氏失

英宗莊靜懿聖皇后亦乞列氏成宗昌國太長公主女也祖父忽憐尙憲宗女伯牙魯罕公主屢征合答罕父阿失從討篤哇有功父子皆封昌王見勳戚傳至治元年二月冊爲后無子泰定四年六月崩隨上尊諡英宗南坡之變

元史卷十五 列傳

十四

典禮闕如順帝至元二年始與武宗明宗后附廟英宗又有身入忽都魯后朵爾只班后皆不知所終

泰定帝母顯宗宣懿淑聖皇后弘吉刺氏成宗同母兄晉王甘麻刺元妃生泰定帝帝即位尊皇考爲帝廟號顯宗追上妃諡號文宗天厯初詔毀后室顯宗又有拜海妃忽上海妃氏竝失

泰定帝弘吉刺氏皇后名八不罕魯王按陳孫幹畱察之女泰定元年三月冊爲后二年封后父爲威靖王初后侍帝藩邸生王子阿速吉巴元年立爲皇太子帝崩丞相倒刺沙立爲帝尋敗文宗入立詔徙后東安州其地多蛙朝夕聒噪后遣人諭之曰我母子避患於此何爾復不見憐邪自後屏息無蛙聲眾以爲異

見楊瑞山居新語或以爲仁宗母后在樓州事

帝又有后七人亦憐眞八刺后亦乞列氏昌國太長公主益里海身女二年帝嘗與后受佛戒於帝師撒荅八刺后帝姊壽寧公主女也於帝爲甥女泰定三年納之宮中先卒餘爲忽刺后耶速后卜顏后什烈后鐵尼后俱失其氏有必罕后速葛荅里后皆八不罕皇后之妹弘吉刺氏千戶買住罕女舊史謬以爲克王買住罕之女不知克王乃帝諸父行也泰定妃嬪天厯初俱徙東安州燕帖木爾嘗取泰定后爲夫人未知所取者何后

明宗乃蠻眞氏皇后成宗甥壽寧公主女名八不沙侍潛邸生寧宗天厯二年明宗稱制於和林而文宗已正位大都自往迎至旺忽察都地明宗暴崩於是文宗復踐阼是年立靈徹寺掌后宮事又奉后鈔萬錠帛二千匹供費用

元史卷十五 列傳

十五

后悉出之命帝師率羣僧爲明宗修佛事於大天源延聖寺七日又命道士建醮於玉虛天寶太乙萬壽四宮及武當龍虎二山至順元年復詔有司供后宮幣二百匹四月文宗皇后知后懷南坡之痛心慚不安乃與宦者謀弑后尋崩後至元二年附明宗廟又貞裕徽聖皇后罕祿魯氏回回阿爾斯蘭郡王之裔也初明宗爲周王時北行過阿爾斯蘭之地納焉延祐七年四月丙寅生子安懼帖睦爾於北方即順帝文宗既復位內忌兄子揚言安懼帖睦爾非明宗子初徙居高麗大青島中不與人接繼復遷廣西之靜江命奎章閣學士虞集草詔告中外事見本紀及順帝即位後至元二年乃追上諡號或曰后故宋主瀛國公之姬也瀛國晚年爲僧徙甘州取回回女而周王亦遁往

漠北過其寺乃乞以歸生子後為順帝詳皇子諸王傳明宗又有后六人曰按出罕后曰月魯沙后曰不顏忽都后曰野蘇后曰脫忽思后曰阿梯里行后氏皆無攷脫忽思后嘗主明宗帳殿至順二年賜湘潭戶四萬為湯沐然文宗世但稱曰娘子不稱后云

文宗弘吉刺皇后順宗女魯國大長公主所出祖父皆封魯王見勳戚傳天祿元年立為后二年二月授冊寶生阿刺忒納荅刺太子早薨又生燕帖古思太平訥二皇子文宗既弒明宗自立及明宗八不沙后之崩后復與有力焉至順三年八月文宗崩丞相燕帖木爾請立燕帖古思后以文宗大漸時遺命傳位明宗子明宗長子時遷外次子懿璘質班留京師年方七歲后貪其幼弱立焉是為寧宗

元史卷十五 列傳

六

政事一出於后是年冬奉冊寶尊后為皇太后御興聖宮受朝賀踰月幼帝殂燕帖木爾復請立皇子燕帖古思后曰吾子尚幼明宗長子妥懽帖睦爾在廣西今十三歲矣其迎立之約後傳位燕帖古思若武仁故事明年六月即位是為順帝改元元統元年為皇太后置徽政院設官三百六十六員二年上尊號曰贊天開聖仁壽徽懿昭宣皇太后後至元二年冬復上尊號曰貞文慈佑儲善衍慶福元太皇太后仍稱制臨朝先議尊為太皇太后參政許有壬諫以為非禮不聽時南臺御史秦不花亦奏以叔母不宜加徽稱后初聞之怒徐曰風憲有臣如此可謂能守祖宗法矣賜金幣以旌其直六年六月順帝始聞明宗非考終詔以文宗篡弒義不戴天徹其廟主并削后尊號安置

東安州并流燕帖古思於高麗后尋殂寧宗七歲即位逾月棄世而亦有弘吉刺氏后至正二十八年薨祔寧宗廟無足言者

順帝皇后伯牙吾氏太平王燕帖木爾女也至順四年六月帝即位七月立為后是年冬改元元統二年授冊寶帝立非燕帖木爾意而后頗有寵后性媚黷貨時詔立鹽局官自賣鹽后亦命宦者字羅取鹽十萬引入中政院帝又命發兩艘船下西番為后營利至元二年后兄左丞相唐其勢與太師柏顏爭權坐謀逆誅后弟塔刺海逃入宮匿后坐下后以衣蔽之左右曳出斬首血濺后衣柏顏奏曰豈有兄弟為逆而后黨之者遂併執后后呼帝曰陛下救我帝曰汝兄弟為逆豈能相救時帝亦惡后驕妒故也於

元史卷十五 列傳

七

是遷出宮柏顏尋鳩后於開平民舍順帝弘吉刺皇后武宗宣慈惠聖皇后之姪毓德王字羅女也後至元二年伯牙吾氏為柏顏所害明年三月冊為后生皇子真金二歲而天后性簡重節儉動中禮法待妾媵太子皆有恩時第二皇后奇氏有寵居興聖西宮帝希幸東內左右或以為言后意無纖芥從帝巡上都次中道一夕帝欲臨幸使內官馳告后不可曰暮夜非至尊往來之候中使往復者三竟不納帝益重之至正十四年后母歿帝頗加禮賻鈔三百錠后居坤德殿終日端坐未嘗妄踰閫闕至正二十五年八月崩年四十二奇氏后見后遺衣質敝曰正宮所服何至斯邪踰月皇太子自太原歸哭極慟

順帝奇氏后者高麗人其家微故事高麗國歲獻女迄後
內自宮闈外至大家貴宦無不有高麗女子者高麗國中
亦多苦之至有生女不舉女長不敢嫁之事高麗女多慧
嫵善服事人自后入宮中主供茗飲尋見寵幸生愛猷識
理達臘皇太子時伯牙吾皇后方驕妒數箠辱之及后遇
害帝欲立焉丞相柏顏爭之以爲祖宗家法非蒙古女不
得立爲后及柏顏罷學士沙刺班希旨請立爲第二皇后
居興聖宮改徽政院后黠辯務自矯飾無事則取女孝經
史書訪問歷代皇后有賢行者爲法四方貢獻珍味非薦
太廟不敢先食京師嘗大饑命官作糜粥以振又出金銀
粟帛令宦者朴不華於都城十一門置冢瘞遺骸十餘萬
復命僧建水陸大會度之中外頗稱其賢太子既長帝建

元史卷十五 列傳

六

端本堂命儒臣教授國法帝與太子皆受佛戒帝師因啟
后曰太子向學佛法頗開悟今乃使習孔子教恐壞真性
后曰我雖居深宮不明道德嘗聞自古及今治天下者必
用孔子道佛法雖可出世不可治天下安可使太子不讀
儒書帝師慙退其後正位中宮誕日百官進箋稱賀后曰
自世祖以來正宮皇后壽誕未嘗進箋起自近歲不合典
禮卻之后善折人外輒諒謹如此帝曰荒樂晏朝不視政
后心不善之遂與太子謀內禪使朴不華喻意丞相賀太
平太平不荅復召至宮中親舉酒賜之達前說太平依違
而已帝亦知后意怒疏之兩月不見然后頗盜威柄殺罰
由已朴不華有罪被劾后諷御史大夫佛家奴爲疏辨佛
家奴謀再劾后即嗾御史轉劾佛家奴謫潮河后族奇氏

在高麗者怙勢驕橫國中高麗王屢戒不悛怒盡殺之后
與太子謀復讐乃詔廢高麗王立其弟塔思留京師者爲
王以奇族子三寶奴爲元子同知樞密院事崔帖木爾爲
丞相將萬人并倭國兵送之至鴨綠江爲伏兵所殲餘十
七騎還會御史大夫老的沙與太子有怨奔孛羅帖木爾
于大同軍中孛羅匿之詔索不遣太子乃矯詔暴其罪命
太尉擴廓討之孛羅遂再舉兵犯闕以討誅丞相朔思監
及后宮中宦者朴不華爲名太子出奔太原孛羅言后多
撓國政宜出諸宮外帝弗聽遂矯制幽於諸色總管府使
其黨姚柏顏不花守之尋逼后入宮取印章爲書以召太
子復幽后舊所后數納美女求脫又許妻以公主孛羅尙
以箴送爲遲乃令先嫁女而後補箴贈始釋還宮既而孛

元史卷十五 列傳

九

羅誅太子還后又密令擴廓以重兵擁太子入京師帝
禪位賴擴廓不從而止會弘吉刺皇后崩中書省請后正
尊位又奏改資政院爲崇政院兼主中政院帝初不許俄
授冊寶進爵奇氏三世爲王時至正二十五年十二月也
先是元統間立第二皇后時監察御史李泌言世祖有誓
子孫不得與高麗女共事宗廟陛下踐世祖之位何忍忘
世祖之言乃以高麗女竝位中宮今災異屢起河決地震
盜賊滋蔓皆陰盛陽微之漸乞仍降爲妃庶使三辰定位
災異可息元初稱西夏高麗不舉其國而舉其部曰唐兀
氏肅良合氏至是乃以后爲肅良合氏詔天下二十八年
明兵破大都從帝北奔順帝多內嬖佩貴妃印者不下數
十取寵者七人曰龍淑妃尤侈順帝賜緡綺珍異動鉅萬

計妃令宦者貨於左掖門內京師巨室富商售者輻輳名其地曰繡市帝日娛樂無厭後呢番僧穢德彰聞益甚奇后深疾之故欲內禪其子冀拯帝失以匡國計而坤道無成天運舛錯反以召亂順帝末年日在宮中乘龍船泛月池池上起浮橋三處每處分三洞洞上結綵為飛樓樓上置女樂橋以木為質飾以錦繡九洞不相直達每遇上已日令諸嬪妃放於內苑漾碧池池用紋石為質以寶石鑲成上覆紫雲九龍華蓋四面施錦幃跨池三石橋上結錦為三亭又設一橫橋接三亭之上以通往來禊畢則宴飲於中池旁有香泉潭是日積香水注池中為嬪妃浴澡之所帝在位久怠於政事荒於遊宴以宮女十六人按舞名為天魔舞首垂髮數辨戴象牙冠身披紫纓珞大紅綃金

元史卷十五 列傳 十

長裙襖各執加巴刺般之器羣女奏龍笛鳳笙以和之每宮中讚佛則按舞奏樂雜以男女妖冶百出內外益大亂帝又於內院造龍船首尾長百有二十尺廣二十尺上有五殿龍身并殿宇俱五采金裝船行則龍首尾眼爪皆動若相遊戲又自製宮漏約高六七尺為木櫃藏壺其中運水上下櫃上設西方三聖殿櫃腰設玉女捧時刻籌時至輒浮水而上左右列二金甲神人一懸鐘一懸鉦夜則神人自能按更而擊天生亡國之孽無事不能而獨不能為君焉何哉

元史卷十五終

元史卷十六 列傳二

皇子諸王

元太祖吞并漠南北及回鶻遼東以後封其諸弟於東北封其諸子於西北取後蕩平慈嶺以西於是又封其諸駙馬於西域太宗因之亦以北方封皇子樹維城之固平時通貢聘頒歲賜有事徵其兵馬聽調遣遇國有大喪則必諸藩畢至推戴以定新君之位故史稱憲宗元年西方諸王某等東方諸王某等西方諸大將某等東方諸大將某等大合於闊帖兀阿蘭之地其推帝即位於斡難河世祖中統元年車駕至開平親王合丹阿只吉率西道諸王塔察爾耶先哥忽刺忽爾爪都率東道諸王皆來會勸進致東方諸王為太祖諸弟次弟合薩爾大王封地在遼西薊

元史卷十六 列傳 一

北三弟合赤溫大王封地在黑龍江以北今索倫地哈丹即其裔也四弟別里古台封地在斡難河老帳至元中立城名曰肇州而南及廣寧乃顏即其裔也五弟斡赤斤大王封地在怯呂連河即今克魯倫河是為東方諸王其西方北方諸王則太祖太宗諸子太祖五子自太宗睿宗外長子朮赤封阿羅思兼欽察地是為極西北地次子察合台封別失巴里之地太宗七子長合失生海都次定宗次闊端次闊出生皇孫失烈門次合刺察次合丹次蔑里蔑里與海都皆叛於嶺北睿宗拖雷十一子自憲宗世祖外次二忽覲都六旭烈即平定西域者七阿里不哥其子乃刺忽不花其孫則藥木忽爾與憲宗之第四子河平王昔里吉亦與篤哇同叛於嶺北是為西北方諸王而西域駙馬異姓

諸王不與焉其始藩封皆無國名惟稱某某大王及世祖以下皇子新建藩國或中原或南北邊徼始追封國初諸王以齊魯晉楚趙魏吳秦各大國其新封亦錫兩字嘉號而名實不符初憲廟大封宗室捷河以南關中洛陽爲一國盡封介弟世祖亦封皇子於長安營於素澹之西義殿中峙衛士環列車間容車帳間容帳包原絡野周四十里中爲牙門譏其出入故老望之眙目怵心以爲威儀之盛古名王雄藩所未有益元初中原藩王居帳殿不居城中自中葉以後始漸同漢俗建宮邸城郭而制度亦不頒行故經世大典於藩封一門亦虛存其目而疆里世系歲祿貢獻之數皆莫之詳焉今條其世系於左

烈祖宣懿皇太后生四子長太祖次合薩爾次合赤溫次

元史卷十六 列傳 二

斡赤斤又異母庶弟曰別里古台齊王合薩爾狼臂多力善射幼時與太祖貧居斡難河爲同族秦赤烏所忌起兵來執害太祖太祖偕母弟皆逃入山林合薩爾獨持弓矢拒敵秦赤烏軍呼曰所索止鐵木眞一人汝何爲者乃去之其後太祖漸強盛吞并諸部皆合薩爾總統士馬出爲前鋒入爲後殿太祖嘗曰合薩爾之射別里古台之勇皆我所籍以取天下也克烈部之戰合薩爾別居哈刺渾山妻子被虜獨與幼子走見月而行枕土而臥探鳥卵而食自歸太祖於班朮河伴遣使乞降於王罕而潛師從之遂滅克烈部迨太祖定漠北帝和林分資子弟合薩爾得四千人太祖有舊臣蒙力克者恃恩驕恣有七子一爲巫號帖卜騰格里毆合薩爾合薩爾訴於太祖太祖方以他事

怒謂曰爾平日自謂無敵今何被人毆合薩爾泣起去三日不朝帖卜騰格里譖於太祖曰長生天神來告初合鐵木眞管百姓再令合薩爾管百姓若不蚤圖事未可知太祖信之即夜親往合薩爾帳執之太后聞之急駕白駝車馳至太祖已去合薩爾冠帶嚴詰之太后立命復其冠帶踞坐盛怒出兩乳置膝曰汝弟何罪而自殘骨肉邪爾小時飲我左乳合赤溫斡赤斤兩兒飲不盡一乳惟合薩爾并飲二乳使我胸臆寬快故爾鐵木眞多才智合薩爾有氣力能射凡四方叛逆之人皆以弧矢威服之今高鳥盡良弓藏欲除之邪太祖跪謝罪起事乃解然猶密奪其部眾大半止與千五百人太后憂悶合薩爾左右親信多畏禍逃去金貞祐元年癸酉太祖八年也分兵三道攻金帝

元史卷十六 列傳 三

自將中軍由河間衛輝趨山東皇諸子將右軍取太行以南河北諸郡合薩爾及斡陳那顏等將左軍沿海取關外大寧及女眞地命曰彼若降附即沿彼中邊郡由烏刺江納活江沂討活河而歸如不降即縱兵攻之合薩爾取金北京東京於是金始興根本地皆爲我有又從征西夏合薩爾破布納刺等城自後太祖令諸子征西域令諸弟斡赤斤鎮守漠北老營別里古台鎮守遼東命木華黎征金國惟合薩爾不令掌兵權故戰功末年不甚著太祖分封諸弟於東北合薩爾分地在遼西大寧而以濟南等地爲其食邑故其後人封淄川王後改曰齊王世祖之世東方北方叛藩數起皆太祖太宗親支獨淄川王後無反側論者以比長沙王國小取忠之驗然自元末其後裔支條雲

布甲於諸藩至今蒙古兩科爾沁部札賚特部杜爾伯特部郭爾羅斯部茂明安部阿拉山部青海和碩特部及四子部落凡九大部皆其後與太祖苗裔等

遼王幹赤斤一曰鐵木哥一作帖木格太祖第四弟也太祖稱帝和林時分賚諸弟而季弟與母后合得萬人自齊

王被譖後國人畏帖卜騰格里之勢黨與日眾幹赤斤帳下人亦往投之幹赤斤遣人索之不與反受笞幹赤斤自

往復被其兄弟圍窘脅令跪服而後釋之幹赤斤晨哭訴太祖於帳中太祖未語弘吉刺皇后曰豪奴妖巫前撻合

薩爾今又跪帖木格陛下在位諸弟如檜柏長成尙踐踏無忌日後兒子幼小此輩虎狼尙可制邪太祖曰任吾弟

處之於是幹赤斤出預伏力士適蒙力克率七子來御帳

元史卷十六 列傳 四

幹赤斤伴請與帖卜騰格里角武藝牽出門外三力士禽去拉脅死之蒙力克與六子攘臂塞門洶洶欲爲變太祖

驚起還宮翌日宣蒙力克父子之罪以前有免九死之詔宥之而勢燄遂熾太祖征西域命幹赤斤守和林其子孫

初封壽王後封遼王亦封西寧王其分地在怯綠連河子孫各八人曾孫十三玄孫九而曾孫耶不干從乃顏叛於

世祖之世六世孫脫脫復乘泰定卽位將赦前以仇殺宗王妃主百餘人奪其貨產其子八都復剽掠於至順之世

南臺御史言遼王子孫世爲叛逆蓋因所封地大物眾所致請畱其王號徙族遠方而析其元封地不果行今蒙古

翁牛特部幹赤斤後也

定王別里古台太祖異母弟也幼時同居幹難河適蔑里

吉部兵來尋仇全家急奔布爾罕山家惟五馬太祖兄弟

奉母各乘其一惟弘吉刺夫人及別里古台生母無馬爲

敵所獲及太祖乞師奪回弘吉刺夫人而庶母不知所在

別里古台長而偉軀多力從太祖平諸部落掌從馬國法

常以腹心掌之嘗從宴幹難河有從叔布里孛闊者爭馬

斫傷別里古台之背左右各持馬乳橦而鬪太祖大怒欲

攻之別里古台曰臣雖創甚幸未死今將舉大事奈何以

臣故而仇族人太祖攻塔爾部虜其四奧魯以歸復欲盡

誅其四種人以報祖父世仇別里古台漏言於是塔爾部

據險固守太祖怒令自後有大謀議不令別里古台入聞

然以掌從馬故無戰不從輒先陷陳嘗立爲國相又長達

魯花赤賜以蒙古人三千戶以廣寧路恩州二城戶萬有

元史卷十六 列傳 五

千六百爲分地建營帳幹難河後又加賜信州路及鉛山

州二城戶萬有八千其子孫初封廣寧王後加封定王生

子三曰耶速不華曰叩溫不華曰罕圖忽耶速不華子曰

爪都中統初以推戴功封廣寧王孫曰乃顏至元中以遼

東叛世祖親征禽誅之叩溫不華當太宗世領兵攻金河

南屢立功張德輝對世祖曰請遣族人之賢如叩溫不華

者使掌兵柄其爲物議所推如此子二曰蔑里吉台曰雍

吉刺台罕圖忽從憲宗征伐攻蜀之釣魚山還及河南招

撫流民皆有功子曰霍歷極以疾廢不能從軍世祖俾居

恩州以統其藩人至大三年卒子塔出嗣好學通經史能

撫恤其下今蒙古阿巴噶部阿巴哈納部皆別里古台後

吳王合赤溫太祖第三弟也太祖西征時命守幹難河庭

帳其子按只吉台封濟南王孫四人長哈丹從乃顏叛於世祖之世別有傳季孫朵列納皇慶中封吳王曾孫四人封隴王吳王濟南王濟陽王玄孫二封濟南王西寧王至順三年同諸王荅都等入朝此皆太祖親諸弟也此外又有訶額倫太后養子四人皆攻伐各部所得奇兒曰曲出者蔑爾乞部人曰闊出者別速部人曰失吉忽圖者塔爾部人曰博爾忽一作字羅忽主爾乞部人四人者太祖皆弟畜之及長成皆立功及帝即尊位和林失吉忽圖求封賞太祖曰爾爲我第六弟與我親第一例國事與汝共之何必急一封賞而博爾忽沈勇善戰爲四傑之一尤有功知名又太祖幼時有異母弟別克帖爾與太祖漁獵奪所彈雀及金色魚太祖怒異日遂伺隙刺殺之爲太后所怒詬比

元史卷十六 列傳

六

之如海東青孤影無伴云

太祖皇帝六子嫡長子朮赤大王次察合台太王次太宗皇帝窩闊台次拖雷大王追尊曰睿宗皆引吉刺皇后出也又有他妃所生庶長子曰兀魯赤攻金西京雲中時陳亡其妃改適金降臣劉伯林之子故皇長子無後又次闊列堅大王亦無後太祖十四年將征回回耶速皇后以道遠倘有不諱四嫡子內誰可嗣大事宜先示國人知之太祖會諸臣問長子朮赤何如次子察合台對曰嗣大位者必服人心我母爲蔑里吉部虜去時歸而生朮赤何可令承大統以疑眾心太祖默然大臣博爾朮木華黎曰皇太子是何言也當爾未生時各部擾亂父母不幸罹患難今賴天祐立大業奈何言此以傷母心察合台曰臣非敢有

爭心也三弟窩闊台敦厚可屬大事請立三弟而臣等兄弟同心禦侮以輔之太祖復問朮赤問拖雷皆對如察合台言復問窩闊台對曰父母恩之兄弟愛之何敢以不材辭臣當盡力謹慎從事但恐後嗣不肖難以承繼太祖乃曰天下疆土甚闊爾兄弟各有封國但能親睦不忘今日之言何患不濟若慮後世不肖我子孫甚多豈無一賢擇眾所戴而立之可也遂定議以皇三子窩闊台爲嗣太宗立七年平定西域以慈嶺西北地封兄朮赤建庭於阿羅思兼轄阿速欽察二部地去京師將二萬里驛傳急行二百餘日方達京師故其山川郡邑風土莫之詳焉朮赤七子長拔都次散里荅三芒哥四蒙哥五脫脫六伯忽七月祖伯兄弟迭嗣後至元末月祖伯薨始傳其子札尼伯而

元史卷十六 列傳

七

伯忽於世祖至元間爲札魯忽赤之長脫脫於至大二年以推戴功封宣肅王其子寬德亦嗣封肅王初月祖伯於至元二年遣使求分地歲賜以振給軍站京師元無所領府治三年中書請置總管府給正三品印其位下舊賜平陽晉州永州分地歲賦中統鈔二千四百錠自至元五年已卯歲始元末國漸衰弱其阿羅斯舊裔遂起兵海隅計由之地自立爲汗盡驅蒙古出境故今阿羅思非復元裔云

察合台封天山南回疆建庭於葉爾羌卽古莎車地而以回疆諸城分王其子皆以葉爾羌爲大宗察合台二子長曰耶速蒙哥無後次曰合刺旭烈生四子一曰阿魯忽封幹端城一曰巴刺封哈失哈爾卽今喀什哈爾其子買住韓封克

王一日威遠王阿只吉封阿克蘇其子忽都帖木爾襲爵其孫圖刺封越王一日帖木爾不華封烏什其子南荅失里四支中惟阿魯忽叛於幹端故世祖命諸王合班元帥芒古台率師征之遂置幹端宣慰司元帥府仁宗延祐中幹端地復有叛者遣鎮西武靖王搠思班率兵討之其威遠王阿只吉則屢統大軍以禦漠北之叛甚著忠順而其孫越王圖刺亦不以功名終初成宗之崩也左丞相阿忽台等謀擁皇后稱制擅柄仁宗歸自懷孟中外洵洵仁宗以圖刺有勇力引之入內縛誅奸相以功封越王賜金印以紹興路為其分地而圖刺居常怏怏怨望至大元年武宗幸涼亭將御舟圖刺前止之曰語有之一箭中麋母曰自能百免未得未可遽止此蓋蒙古舊俗儕輩相斬之語

元史卷十六 列傳 八

而圖刺施之御前武宗心不平既而大宴萬歲山圖刺醉起解帶擲地噴目謂帝曰爾所與我止此邪帝疑其有異志二年春命楚王身忽都丞相脫脫等鞫之辭服遂伏誅察合台子孫世長回部元亡以後尚傳國二十五世至國朝順治初有葉爾羌之阿布都勒汗上表自稱成吉思汗之孫承蘇勒坦業九子分治九城哈密土魯番皆其所轄而以葉爾羌酋為大宗蘇勒坦者回部王號也蘇勒坦速魯檀元史作算端一作算灘一作斯康熙二十一年北坦一作士丹皆汗王之稱譯音無定字五年王師敗準噶爾詔釋元裔由哈密歸葉爾羌自後汗位遂絕乾隆平定西域時黃廷桂奏吐魯番無復蒙古裔瓜州回民願歸故土納貢賦云

拖雷太祖第四子太宗母弟也當丁亥之秋太祖崩時太宗尚留雷博之地拖雷身攝國事者年餘鎮撫內外人心安堵已丑夏往迎太宗於忽魯班雪不只之地秋太宗始至和林會喪八月即位二年庚寅秋從太宗伐金破天成堡拔蒲城縣開金平章完顏合達參政伊刺蒲阿守陝西遂渡河攻鳳翔先鋒戰不利太宗援之合達乃退三年辛卯鳳翔既下拖雷用降將李國昌之計言於太宗曰金主遷汴恃黃河潼關為固若出寶雞入漢中不一月可達唐鄧金人聞之得不謂我師從天而降乎太宗大喜語諸王大臣曰拖雷之計上符皇考遺命不待再計矣遂決策太宗以中軍南下破河中府由河清縣白坡渡河向洛陽進幹陳那顏以左軍由濟南進而拖雷總右軍自鳳翔渡渭

元史卷十六 列傳 九

水過寶雞入小潼關涉宋境沿漢水而下俟金兵全力南拒拖雷而中軍左軍乃乘閒南渡黃河期以明年春會汴遣朔布罕詣宋假道且約合兵宋般使者拖雷大怒曰彼昔遣苟夢玉來通好何遽殺我使臣且食言非信背盟非義棄好非仁忘仇非勇吾師有名矣乃分兵攻宋諸城堡長驅入漢中進襲四川陷閬州過南部而還遂由金取房金人聞之盡撤守關防河之兵南守漢江拖雷破金兵十餘萬於武當山趨均州乘騎浮渡漢水謀報金大將完顏合達及伊刺蒲阿設伏二十餘萬於鄧州之西據隘以待時拖雷兵不滿四萬得報即悉留輜重輕騎以進十二月丙子及金前鋒戰於禹山佯北入林以誘之金人不動拖雷遂舉火夜進以精騎三千殿後晝夜不解鞍合達退保

鄧州攻之三日不下俄引而北合達等合步騎十五萬躡其後我軍且戰且行與之相持彼進我退彼退我進以迭擾之毋令得休息食飲四年春正月距鈞州三十餘里連日大雪深數尺南軍不耐寒皆僵凍無人色不能舉刀槩然圍我軍數重諸將欲俟太宗渡河大軍至夾攻拖雷恐敵入鈞州城則難制遂乘雪夜突圍奮擊於三峯山大破之追奔數十里資仗委積案禹山鈞州三峯之戰金元二兵為金所圍或云元兵南兵兩軍皆至夾攻或云拖雷不俟北路兵至即先破敵餘眾潰走睢州伏兵起又敗之合達僅餘數百騎走鈞州蒲阿走汴皆追獲之太宗軍至按行戰地願拖雷曰微汝不能破敵神速如此從太宗拔鈞州又拔許州遂定河南諸郡四月以天將暑雨班師北渡

元史卷十六 列傳

十

由真定過中都出北口避暑於官山五月太宗暴疾失音六月病益甚師巫卜言金國山川神以殺戮過多為祟惟親人可代之拖雷禱於天地請以身代又取巫覡禳祓之水飲焉居數日太宗疾果愈北還中途拖雷薨壽四十有口妃怯烈氏子十一人長憲宗次四則世祖也自拖雷以身代太宗之死而元世有天下者皆其子孫憲宗初追諡英武皇帝廟號睿宗二年合祭天地以太祖睿宗配享世祖至元二年以英武之諡與太祖聖武相近改諡景襄皇帝

帝

太宗皇帝七子長合失早卒

舊史誤以合失為第二皇后

昂灰所生也次定宗皇帝諱貴由次三子闊端次四子曲

出次五子合刺察皆六皇后乃馬真氏所生也次六子合

丹次七子蔑里七皇后所生也次子三子四子雖屢從征

伐帝皆謂不堪屬大事嘗子養皇弟拖雷之子蒙哥為子

謂可嗣大統及四子曲出早卒曲出之子昔烈門曲出一

昔烈門一亦帝所屬意元史諸王世表云憲宗紀稱太宗

作失烈門一亦帝所屬意元史諸王世表云憲宗紀稱太宗

經世大典帝系篇及歲賜錄並無月良一人不材何不當

於命立皇孫其後定宗嗣位果庸昏則諸子皆不當太宗

意可知已后妃傳又云定宗崩其子抱幼子昔烈門不知

定宗之子也尤為疏舛及太宗崩乃馬真皇后臨朝以私

意立其子為定宗三年崩復議所立未決又閱三年定宗

后擁皇姪昔烈門垂簾聽政者六月人心不服始立憲宗

自是太宗子孫遂無繼尊位者皇長子合失是生海都封

於北方海都子世封汝寧王定宗皇帝三子長忽察次老

忽台次和忽台封南平王其分地在阿力麻里皇三子闊

端生五子至孫封汾陽王其後改封荆王其分地在甘肅

永昌至正中荆王脫脫木爾歿後無嗣人畜時被西番劫

掠遂罷不封改置永昌等處宣慰司都元帥府皇四子曲

出斃於太宗八年子昔烈門太宗嘗命為皇太孫六皇后

曾抱以臨朝至是失嗣有怨言憲宗遷之邊地昔烈門子

曰字羅赤其孫世封靖遠王襄寧王皇五子合刺察生一

子脫脫有二孫皇六子合丹生五子長子覲爾赤即篤哇

也一作至孫封隴王亦封於北方皇七子蔑里生一子脫

忽世封陽翟王亦封於北方自憲宗世祖以旁支入嗣大

統太宗子孫分遷各地合丹於別什巴里今烏魯木齊蔑里於

葉爾的石河慈嶺海都於海押立地當在金山以北今別

爾哥於曲爾只地均未詳脫脫於葉密里地脫脫即合刺

元史卷十六 列傳

十一

密里即今蒙古都於閣端之西此閣端之子也閣端分地之伊犁昔烈門及耶速孛里等於沒脫赤之地及世祖至元初而海都蔑里篤哇三王竝叛於北方征戰五十餘年始降服而蔑里之裔陽翟王阿魯輝復叛於順帝之世見叛論曰亦赤察合台舍己而推讓太宗拖雷以弟代兄之死友于家法不減三代太宗既有知子之明其時憲宗世祖皆以皇弟子專征功著中外乃不念拖雷金縢之勳以天下讓其弟之子而必貽之皇孫昔烈門何哉山陵崩圻天下朝親謳歌者不之太宗之子而之睿宗天報忠孝不於其身於其子孫神器其可以人力為哉然猶啟海都篤哇蔑里兵爭數十年之禍則太宗與子與賢不明有以致之也

元史卷十六 列傳 主

拖雷大王十一子長憲宗皇帝蒙哥次二忽覲都次四世祖皇帝忽必烈次六旭烈一作旭烈兀次七阿里布哥次八撥綽次九末哥次十歲都哥次十一雪別台第三第五失其名忽覲都無嗣旭烈征西域拓地萬里取有功世王印度之地語詳征西域傳其裔在內地者別封靖遠王廣平王改封幽王阿里布哥之長子封威定王其孫分封魏王冀王定王鎮寧王其後裔亦封燕王撥綽之孫封楚王末哥之孫封永寧王歲都哥世封荆王雪別台封爵無攷有二孫見世表

楚王牙忽都者睿宗庶子撥綽大王之孫也睿宗妃乃馬真氏生撥綽驍勇善騎射憲宗命為大將軍北征欽察有功賜拔都號歲丁巳分土諸侯王賜益州三千三百四十

七戶為其食邑撥綽生薛必烈傑薛必烈傑生牙忽都牙忽都年十三世祖命襲其祖父統軍至元十二年從北安王北征十三年失列吉即昔叛遣人誘脅之牙忽都不從事王益忠謹八魯渾粘圖與海都通相率引去王遣牙忽都將兵追禽之未幾失列吉約木忽爾脫帖木爾等反以兵攻北安王生致牙忽都拘繫之牙忽都與王親臣那台等謀逃歸事覺復被繫困辱備至十四年兀魯台伯顏帥師討叛失列吉約木忽爾迎戰牙忽都潛結赤斤帖木爾土圖哈亂其陳因得脫走歸京師須髮盡白帝閔之賞賚甚厚至元十八年加封耒陽州五千三百四十七戶二十一年命與土圖哈同討海都牙忽都先進選得其謀備知虛實直前衝陳破其精兵海都敗走得所俘掠軍民而還

元史卷十六 列傳 主

詔賜鈔幣鎧甲弓矢其後北安王駐帖木爾河諸王乃顏及耶不堅有異圖耶不堅引兵趨怯綠連河大帳王遣闊闢出土圖哈率眾追之那懷之民擾攘不知所從牙忽都將三百騎進至阿赤怯地會王帳下遜篤思部兵逃去乃顏又誘蒙古軍二萬從己牙忽都知之夜襲其河上軍突入帳中遇忽都蔑爾堅幾獲之閒道逸去二十七年海都入寇時多爾朵哈方居守大帳詔遣牙忽都同力備禦軍未戰而潰牙忽都妻孥輜重駐布思哈刺嶺悉為藥木忽爾明里即蔑等所掠牙忽都與其子脫烈帖木爾相失獨與十三騎奔還世祖撫慰嘉歎賜爵鎮遠王塗金銀印賜以弘吉刺氏女厚資裝遣之復命納里忽徹徹不花往錫命其部屬同時被剽掠者以所籍故相桑葛家財分賜之

又命牙忽都居北安王第二帳王薨帝命掌大帳固辭成宗立命侍左右武宗撫兵漠北請以子脫烈帖木爾從大德五年海都篤哇合軍入寇脫烈將千兵擁護先後力戰功多在軍十年成宗崩安西王阿難荅與明里覲覲神器牙忽都屢持正議折其非望誓不敢動武宗即位以其父子勞効忠勤進封楚王賜金印置王傳以叛王察巴爾親屬賜之子脫烈封鎮遠王至大三年察巴爾來歸宗親皆會牙忽都進曰太祖皇帝削平西北太宗憲宗世祖三朝混一四海鞭長駕遠用建諸王以藩王室近歲間有違言致宗室諸王幾成敵國賴列祖在天之靈默誘諸王之衷西海拔都罕裔北海察巴爾王罔不內鄉來享來王中外同燕一堂之上地大物眾有可恃者焉有不可恃者焉昔

元史卷十六 列傳

四

我太祖有訓世祖誦之理亂絲者宜挈其綱櫛亂髮者宜束以繩治亂國者宜齊以法然後可以辨上下而定民志帝及諸王莫不改容悚聽牙忽都卒脫烈帖木爾嗣楚王延祐中明宗西出脫烈坐累徙西番沒入其家貲之半明宗即位制曰脫烈何罪其轉徙籍沒豈不以我故邪其復故號人民賞幣悉歸之脫烈帖木爾卒子八都孫燕帖木爾嗣其爵

憲宗皇帝五子長班圖次阿速台次玉龍荅失一作玉龍次昔里吉次辨都憲宗八年皇子辨都薨於吉河之南無嗣其班圖阿速台後人及封爵亦無攷惟玉龍荅失子封衛王孫封郊王昔里吉封河平王其孫封嘉王憲宗既舍子傳弟諸子心頗不甘世祖十四年昔里吉復執皇

子北安王應海都以叛於阿力麻里世祖遣丞相伯顏率軍破之爲宗王沙里蠻執以出降故憲宗後嗣亦不振世祖皇帝十子長多爾吉次皇太子眞金三安西王芒哥臘四北安王那木罕一作南五雲南王忽哥赤六愛耶赤七西平王奧魯赤八寧王闊闢出九鎮南王脫歡十忽都魯帖木爾多爾吉後人無攷芒哥臘爵僅再傳那木罕統兵阿力麻里與叛藩攻戰連年亦無子忽哥赤傳子封營王其裔孫封梁王世守雲南舊史宗室表雲南王僅一傳營王而絕今從明史梁王傳愛耶赤凡再傳奧魯赤統兵西北禦叛藩子封鎮西武靖王孫封雲南王曾孫阿納特納失里天麻初以推戴功進封豫王闊闢出爵一傳脫歡子孫世封鎮南王其別錫封文濟王宣德王者皆脫歡子也又有封威順王宣讓王者

元史卷十六 列傳

五

顯於順帝世別詳於後忽都魯凡再傳無封號明孝太子諱眞金世祖嫡子也母弘吉烈皇后少從姚樞寶默受孝經中統三年封燕王守中書令四年兼判樞密院事嘗從幸宜興世祖遠豫憂形於色夕不能寐聞母后暴得風疾衣不及帶而遽行至元七年秋受詔巡撫稱海至冬還京與諸王札刺忽及從臣伯顏等閒坐令諸臣各誦所聞善言十年二月冊爲皇太子仍兼中書令判樞密院事九月詔立宮師府設官屬三十八員詔以侍衛親軍萬人益隸東宮太子命選其驍勇教以兵法時閱試焉嘗有疾世祖遣侍臣馳祀岳瀆山川太子戒其毋擾郡邑所服綾袷爲藩所潰命加染治侍臣請更製之太子曰吾欲織百端不難願用物未敝豈宜棄之東宮香殿成工請鑿

石為池如曲水流觴故事太子曰古有酒池肉林爾欲吾效之邪不許每與諸王近臣習射之暇輒講論經典及資治通鑑貞觀政要王恂許衡所述遠金帝王行事要略下至武經等書片言允愜未嘗不灑然改容王恂白棟等朝夕不出東宮按察副使王惲進承華事略二十門諭德李謙陳正心睦親崇儉親賢幾諫戢兵尙文定律正名革敝凡十事太子皆嘉納聞漢成帝不絕馳道唐肅宗改絳紗袍為朱明服大喜曰使吾行之亦當若此及說邢峙止齊太子食邪蒿顧宮臣曰菜名為邪食之豈遠令人不正邪張九思以古人防微示戒對嘗從王恂學書仿本親署學生某習書謹呈其敬慎如此中庶子必伯以其子阿巴赤入見太子問讀何書以蒙古書對太子曰何不習漢人文

元史卷十六 列傳

其

字其亟入胄監至元以來天下太平人材輩出太子優禮遇之在師友之列者非朝廷明德則布衣節行之士命宋衛擇可備顧問者衛薦郭祐何璋徐珍馬紹楊居寬何榮祖楊仁風等太子盡令致之先自近者始遂召何璋於易州徐珍馬紹於東平楊仁風於潞州復以衛輝總管董文用練達政事與楊恭懿同置省中議事是時已立國子學辟劉因專領之而以宮僚李謙宋衛李棟等備咨訪嘗曰吾聞金章宗時有司論大學生廩費太多章宗謂養出一范文正所償顧豈少哉斯言可深長思矣初阿合馬擅國柄太子惡其姦未嘗少假顏色王著知阿合馬惟憚太子故假太子命夜召而殺之及和禮霍孫入相太子諭以便國利民者毋憚更張苟有撓者我當力持之中書啟以何

璋徐珍參議省事太子諭二人學孔子之道宜力行平生所學右丞盧世榮以言利進太子意深非之嘗曰財非天降安得歲取贏乎其後世榮果坐罪桑葛素袒世榮聞太子有言訖不敢救詔割江西龍興路為太子分地太子謂左右曰安得治民如邢州張耕者乎於是召宋衛大選署守長江西行省以歲課羨餘鈔四十七萬緡進太子大怒曰百姓不足君孰與足盡卻之阿里以民官兼課司請歲附輸羊三百太子以其越例罷之劉思敬以新民六十戶來獻太子問民所從來以重慶俘獲對太子蹙然曰何不隨在放遣而重失人心為烏蒙宣撫司進馬踰歲額禁之其大雅不羣本於天性中外歸心焉迨世祖春秋高臺臣言事者合疏請傳位太子太子聞之懼於是臺臣寢其奏

元史卷十六 列傳

七

不上而小人疾臺臣者乘間發之世祖怒甚太子益皇恐未幾遂薨年四十有三賜諡曰明孝太子成宗即位追諡文惠明孝皇帝廟號裕宗附太廟世祖以後諸帝皆其子孫
鎮南王脫歡世祖第九子也嘗奉命征安南無功歸世祖終身不見長子老章次子脫不華皆以次襲封鎮南王其諸子有別封威順王名寬徹普化者一作不花於泰定天麻至正中鎮湖廣武昌宿衛親兵千五百名歲支米三萬石鈔三萬錠王子宮妃飲膳衣裝供億侈靡恣部下侵漁至正十二年徐壽輝起斬黃陷武昌寬徹普化棄城走十三年大軍收復武昌十六年以大艘四十攻賊將倪文俊於沔陽且載妻子以行至漢川閻淺為賊火筏所焚室孥皆陷

寬徹普化走陝西欲之京師爲李思齊所扼俾屯田成州以玆子和尙侍從順帝左右帝出入與俱二十四年受密旨討李羅帖木爾與儒士徐士本交結勇士陰圖除賊帝期以事濟放鴿鈴爲號明年秋竟斬李羅延春閣下以功進封義土二十八年順帝命同准王監國不知所終准王者初封宣讓王名帖木不華脫歡第四子也脫歡子脫不花薨子字羅不花幼故帖木不華代嗣爵鎮南及其長而上書讓還之朝廷改封宣讓王賜金印移鎮廬州命其王府官班列有司之右至正十二年境內賊起以所部兵從諸王分道平賊十六年與弟寬徹普化以兵鎮遏懷慶復調芍陂軍以拒頴賊渡淮及廬州不守乃子身北歸京師二十七年進封准王二十八年順帝北狩詔王留守監國

元史卷十六 列傳

六

城破死之年八十有三

梁王把匝刺兀爾密世祖第五子雲南王忽哥赤之裔也封梁王仍鎮雲南順帝之世天下多故雲南僻遠王撫治有威惠至正二十三年明玉珍僭號於蜀遣兵三道來攻王走營金馬山明年以大理兵迎戰玉珍兵敗退久之順帝北去大都不守中國無元尺寸地而王守雲南自若歲遣使自塞外達順帝行在執臣節如故未幾明師平四川天下大定明祖以雲南險僻不欲用兵明年正月北平守將以所得王遣往漠北使者蘇成來獻明祖乃命待制王禕齋詔偕成往招諭王待禕以禮會元嗣君遣使脫脫來徵餉聞有明使脫脫疑王貳心因齋以危語王遂殺禕而以禮殮之踰三年明祖復遣湖廣參政吳雲偕大軍所獲

雲南使臣鐵知院等往知院以已奉使被執誘雲改制書給王雲不從被殺王聞雲死收其骨送蜀給孤寺明祖知王終不可以諭降乃命傅友德爲征南將軍藍玉沐英爲副帥師征之洪武十四年十二月下普定王遣司徒平章達里麻率兵駐曲靖沐英引軍疾趨乘霧抵白石江霧解達里麻望見大驚友德等率兵進擊達里麻兵潰被禽先是王以女妻大理酋段得功嘗倚其兵力後以疑殺之遂失大理援至是達里麻敗失精甲十餘萬王知事不可爲走普寧州之忽納砦焚其龍衣驅妻子赴滇池死遂與左丞達的右丞盧爾夜入草舍俱自經明祖遷其家屬於耽羅元代分藩徧宇內各負尾大之勢百年間反者四起其宗藩以忠節殿一代者惟雲南梁王一人

元史卷十六 列傳

七

世祖明孝太子眞金生三子長晉王甘麻刺即泰定初追諡顯宗者也次二曰懷王荅刺麻巴刺即至大初追諡順宗者也案舊史直呼荅刺麻巴刺之名從無封號惟武宗元年追尊皇考懷王爲帝則其封爲懷王明矣以天子之父而舊史直呼其名次三曰鐵穆耳即成宗皇帝始終不言何封諡野至此 三子皆妃弘吉刺氏所生晉王少育於祖母昭睿順聖皇后日侍世祖無妄言至元中以皇孫出鎮北邊叛王藥木忽等望風請降而篤哇察巴爾諸王亦遣使求和邊境以寧嘗出征駐金山會大雪擁火坐帳內顧謂左右曰吾等帳處猶有寒色況從卒腰弓荷戟周廬之外乎遂命饗人大爲肉糜親嘗而徧賜之軍中有暇即命耶蔑堅以蒙古語講通鑑二十六年世祖以其居邊久命獵於柳林率眾至朔州撫循部曲而約束甚堅民以無擾世祖聞而嘉之

明年封梁王出鎮雲南過中山又明年過懷孟從卒馬駝
千百計所至安堵二十九年改封晉王移鎮北邊統領太
祖四窩里朵一作斡及軍馬國土中書省臣奏言諸王皆
置傅今晉王守太祖肇基之地宜加置內史從之明年晉
王弟鐵穆耳為皇太子又明年世祖崩晉王聞訃奔赴上
都鐵穆耳以皇太子嗣大位而晉王乃歸藩服大德六年
正月薨年四十諡獻武王性仁厚守禮為朝廷所重惟崇
尚浮屠耗費無算子三人長耶孫鐵木爾次松山封梁王
次迭里哥不華封湘寧王英宗遇弒耶孫鐵木爾以晉王
嗣大統是為泰定皇帝追尊王曰光聖仁孝皇帝廟號顯
宗附享太室又六年文宗即位乃毀其廟室

元史卷十六 列傳

二十

晉王巴的麻次小薛又次允丹藏卜皆早殞無後

皇次孫懷王荅刺麻巴刺晉王同母弟至元之初生於燕
王邸二十二年皇太子薨皇次孫鍾愛兩宮優其出閣之
禮二十八年始詔出鎮懷州至趙州從卒有伐民聚桑者
杖懲之世祖嘉悅未至鎮以疾召還明年春薨於京師追
封懷王年二十有九子三人長阿木哥封魏王次武宗皇
帝又次仁宗皇帝方成宗之崩也德壽太子早薨無後成
宗后謀稱制諸大臣潛使迎仁宗及母后弘吉刺氏於懷
州監國而武宗尙以懷寧王總兵北邊未至太后以兩子
星命付陰陽家推之擇所宜立對曰重光大荒落有近災
旃蒙作噩長久重光武宗生年旃蒙仁宗生年也太惑
之遣近臣密諭武宗武宗默然謂康里托托曰我捍北邊

十年又序次居長即使運祚有數但令設施合於天心民
望雖一歲之短亦足垂名萬世何必以陰陽家茫昧之言
而乖祖宗之託乎托托以聞太后愕然曰兩子皆吾所生
豈有親疏吾為皇子遠慮所以深愛皇子也皇子意既如
是其即速來復命托托往報武宗行至中途遙望見托托
至急召至前竝馬而行托托具言皇弟虛位迎待之意於
是武宗始無疑至京踐位詔立弟懷王為皇太子追尊皇
考故懷王為昭聖衍孝皇帝廟號順宗附享太廟其追尊
崇祀之瀆語詳禮志宗廟篇魏王阿木哥武仁異母兄也
初仁宗篤友于之誼歲賜加厚諸王莫比皇慶初賜以慶
元路六萬五千戶延祐五年以罪貶高麗術者趙子玉言
於王府官屬以阿木哥名應圖讖潛謀備兵航海往高麗

元史卷十六 列傳

三

取阿木哥爭覺子玉等伏誅文宗時封阿木哥子為西靖
王又有襲封魏王者

論曰甚哉祀典紕繆未有如元代之甚者也憲宗初年追
尊皇考拖雷為帝廟號睿宗成宗初年追尊皇考故太子
真金為帝廟號裕宗泰定帝元年追尊皇考晉王為帝廟
號顯宗武宗元年追尊皇考懷王為帝廟號順宗皆入廟
配天而會居尊位之太宗憲宗兼有大功德者反不得預
焉夫有天下者始得立廟漢宣帝旁繼昭帝終不列戾悼
二園於昭穆光武中興繼統平帝終不尊南頓君於宗祖
以其未嘗繼體而正宸極也元之諸君各顧私親專尊其
所生於是僣尊卑溷昭穆瀆禮不經莫此為甚泰定中博
士等所獻宗廟同室異世議徒知兄弟當共為一世而不

知顯順二考不當稱宗徒知父子各自爲世而不知睿裕
二宗不當立廟況即天子之位者謂之君其未嘗即位者
皆臣也徒知父子竝坐不合禮經而不知君臣同食尤不
合禮經也又其甚者太宗憲宗皆創業之君功當百世不
遷乃自世祖以後諸帝皆非太宗憲宗子孫遂并二宗不
列廟祀則是未爲帝者可入廟稱宗而會爲開創有功德
之君反禮祀時享不及乾坤易位振古所無誠欲合禮則
太祖居中太宗居西夾室定宗居昭之第一憲宗居穆之
第一世祖居東夾室成宗居昭之第二武宗居穆之第二
仁宗居昭之第三英宗居穆之第三太宗世祖百世不遷
其餘親盡則祧各藏於其夾室而睿裕顯四神主各以
王封耐食於廟如此則情文皆稱而禮制不僭濫矣未

元史卷十六 列傳

三

哉元世之儒臣乎至順帝之弟懿璘質班年甫七歲一月
而殤不但非未踰年之君乃亦入廟稱宗且追立皇后尤
史冊未有之笑柄也

初武宗仁宗以兄禪弟而武宗長子爲周王和世球仁宗
長子爲英宗碩德巴剌原議再世亦兄弟相及先傳周王
以授英宗及仁宗中年大臣鐵木迭爾等欲固寵乃搖惑
太后陰譖周王於仁宗延祐二年錫封藩國明年三月命
周王出鎮雲南是冬十一月周王行次延安陝西行中書
省丞相阿思罕周王常侍府中衛都指揮使教化等及武
宗諸舊臣皆來會曰天下者武皇之天下出鎮本非上意
由左右搆間致然請以其故白之朝廷庶可杜離間不然
事變叵測遂盡發關中兵分道自潼關河中府入已而平

章政事塔察爾中丞脫歡襲殺阿思罕教化等於河中周
王遂西行不赴雲南而赴金山與西北諸王會朝廷亦置
不問是冬遂立己子碩德巴剌爲皇太子四年正月頒詔
曰朕仰惟太祖皇帝聖訓若曰應天順人惟以至誠保安
天下重念列聖繼承不祚我世祖皇帝混一中夏創業垂
統願予菲德懼弗克荷不遑寧處和世球年屬幼弱聽信
儉人阿思罕等謀爲不軌構亂我國家已爲行省行臺管
軍官等禽斬叛賊其同謀者不忍盡誅宜推曠蕩之恩以
開自新之路可大赦天下此詔仁宗本紀詳不書今從元
本紀亦詳不書據明宗本紀補入其周王舉兵事仁宗
章詔書和世球爲忽世刺譯音不同也三月以立皇太子
詔天下既而仁宗崩太子立是爲英宗鐵失等復構徙周
王弟圖帖睦爾於瓊州及英宗被弒泰定帝以皇叔自和

元史卷十六 列傳

三

林入討賊繼大統元年即以兄子周王和世球自金山徙
鎮和林代總北兵復召圖帖睦爾徙居建康又召至京師
封懷王賜金幣徙江陵五年泰定帝崩其太子阿里吉巴
卽位於上都年方九歲於是武宗舊臣燕帖木爾欺其沖
幼舉兵京師議迎立武宗之子時周王遠在漠北乃先迎
懷王於江陵懷王至先卽尊位是爲文宗文宗遣使迎周
王於漠北遣兵圍執泰定帝太子於上都廢之周王卽位
和林南還至上都中途爲文宗所害文宗立五年崩遺命
仍立明宗之子妥懽帖睦爾時遠居靜江展轉逾年而後
得立是爲順帝逾數年燕帖木爾及柏顏死順帝親政遂
聲文宗弒逆之罪毀其廟主誅其后流其子蓋自仁宗惑
奸佞之謀背金匱之約同宋太宗負藝祖之故轍易世而

後內禍相尋國統三絕論世者於武仁傳授之際不能無三歎焉

明宗二子長安權帖睦爾即順帝次子鄜王懿璘質班亦憐即寧宗文宗子曰燕帖古思初明宗以周王鎮漠北納回女罕祿魯氏生子安權帖睦爾及明宗入嗣大統中途遇害文宗并害其后八不沙氏而徙安權帖睦爾於高麗置大青島中不許人接且據其乳母夫言明宗在朔漠時素謂其非己子命翰林學士承旨阿璘帖木爾書其事於脫卜赤顏又命學士虞集草詔播告中外閱歲移於廣西之靜江僧寺安置及文宗大漸時謂皇后及丞相燕帖木爾曰往者旺忽察都之事是朕大錯悔之無及今惟有迎立明宗之子庶朕見明宗於地下亦有詞以對見庚申外史

元史卷十六 列傳 舌

時靜江距京師遠而明宗次子懿璘質班近在京師方七歲燕帖木爾貪其幼弱先立之逾月即殂廟號寧宗欲立文宗子燕帖古思年亦幼乃復迎安權帖睦爾於海南年十三矣燕帖木爾以曾預逆謀恐其修明宗舊怨遲久不立逾數月燕帖木爾死方立議萬歲之後傳位於燕帖古思如武宗仁宗故事後至元六年下詔毀文宗廟主誅逆黨諸臣并逮草詔之翰林學士虞集至京治罪集呈文宗手改詔草乃免遂安置文宗后不吝失里於東安州流燕帖古思於高麗以申不共戴天之憾而民間流言因緣前詔證成事實元末有大行隱士權衡者著庚申外史謂順帝本宋末帝瀛國公之子瀛國降封後奉命為僧於甘州納回回郡王女罕祿魯氏有身周王過其地見氏愛而納

之俄生子是為順帝又有謂瀛國生子後適明宗從北方色得之因乞為子者此則先帝後納尤非情實文宗初時順帝年已十三歲明宗初時順帝年已八歲計其生時明宗方二十二歲豈遠憂無嗣而乞養他人之子乎此宋道民嫉勝勝國之詞傳會文宗初詔不可為典要然文宗初詔正當其仇兄滿姪弒嫂之時果知為瀛國之子豈有不昌言其實而但言明宗自謂非己子竟不言何人之子乎且語鑿空難誣豈真肯以祖宗大統傳之異姓乎 閩人余應及浙人楊維禎紀事詩皆沿襲前說傳為疑案

論曰仁宗不立周王為太子而傳位英宗雖失信於兄然仁宗先靖內難清宮擁戴武宗之天下仁宗授之較宋太宗坐受太祖禪讓而反私其子戕其姪者固為有閒周王出鎮之役苟不願往雲南而願往漠北則自請於仁宗可也中途發兵逃往金山則誤聽宵小之言同叛據之迹仁宗置而不問本紀諱而不書則亦慚德於斯君臣兩失矣

元史卷十六 列傳 舌

周王兄弟果早懷不服何不舉兵於英宗嗣位之初何不舉兵於泰定入紹之日既相安無事十四五載受其徙和林徙江陵之德於生前而忽反戈於身後胡粹中但知責周王之叛仁宗不可以君天下而不知文宗之叛泰定尤不可以君天下乃謂文宗入立即當正以大義而廢之不當讓位於周王為不知春秋之義致受首惡之名夫仁宗可以廢周王文宗身叛泰定何以罪周王乎魯隱守菟裘之志而桓弒之衛叔武有被髮之迎而獻賊之文宗親弒其兄弘吉刺后親弒其嫂且詔告天下謂順帝非明宗子此何等心事豈能舍子傳姪者哉將死哀鳴忱於因果悔旺忽察都之事立明宗之子以自解而置前詔於不問又值燕帖木爾柏顏逆黨柄政之時故其草尊皇太后詔有

親挈大寶付予兄弟後其所生之語使柏顏等一日不死則順帝復仇討賊之志一日不得申乃胡粹中願謂弘吉刺后舍子授姪至公至誠而以順帝之信讓廢黜爲萬世罪人是則爲順帝計當懷其擁立私情而置不其戴天之仇於不問乎惟知以天下爲利而不知父子君臣之大義以此續通鑑綱目春秋之誼掃地乾坤或幾乎息矣

順帝太子愛猷識理達臘皇后奇氏所生以至正十三年冊立爲皇太子性聰明英果帝立端本堂使李好文貢師秦教太子以漢人文字近侍輒臂鷹至廊廡閒飛放馳逐欲誘出游太子令左右戒之曰師傅在前子方聽講爾輩安敢狎侮如是然諸人講解不出章句不足收納牖之益其後至正二十二年太子嘗坐清寧殿分布長席列坐西

元史卷十六 列傳 美

番高麗諸僧講佛經太子曰李先生教我儒書多年尚不省其誼今聽佛法一夕卽能曉焉是頗崇佛學時帝納西僧習祕密法出入宮闈太子深疾之陰與皇后謀內禪丞相太平不可及爲孛羅帖木爾所偏奔擴廓帖木爾徵畿輔兵至太原軍容甚盛太子欲效唐肅宗自立靈武故事擴廓不可及旋京師又自請出征總天下兵討賊帝不許其後屢置撫軍院於京師卒不果行至正二十八年明兵至通州太子隨帝北行逾二年順帝殂於應昌距上都三百餘里國人謚曰惠宗太子嗣立改元宣光號北元是年明兵襲應昌太子從數十騎遁去明將李文忠獲皇孫邁的里巴刺并其金印歸獻俘明太祖曰元有天下百年朕祖父亦享其太平安忍僂辱封爲崇禮侯畱京師五載

厚禮而歸之太子在位凡十一年殂諡曰昭宗時洪武十三年也昭宗後傳位於其子脫古思自後屢傳皆一二載卽被弑帳下不及萬騎見洪武二十年遺元幼主詔書

陽湖趙翼曰金元二代立皇太子皆不吉攷之於史金初制度未立其襲位也多兄弟叔姪互相傳襲太宗熙宗亦以安班貝勒舊名諸班嗣位安班貝勒者取尊官也然太宗以弟繼兄熙宗以從孫繼叔祖皆未嘗立爲皇太子也

熙宗始立子濟安爲皇太子未幾薨海陵立子光英爲皇太子海陵被弑光英亦遇害世宗先立允恭爲皇太子未卽位薨世宗曰朕子雖多皇后惟有太衛紹王立子從恪卽位薨子一人乃立其子璟爲皇太子

爲皇太子紹王被弑從恪亦禁錮二十餘年沐京之變崔立立爲梁王降元被殺於青城宣宗立子守忠爲皇太子

元史卷十六 列傳 老

三年薨後又立子守緒爲皇太子是爲哀宗竟亡國統計金源所立皇太子竟無一享國者元自太祖以下皆未立皇太子至世祖始立珍戩一作眞金爲皇太子未卽位薨仁宗立英宗爲皇太子卽位後被弑於南坡泰定帝立子喇實舊名阿魯晉巴舊名阿魯爲皇太子甫登極卽敗廢文宗立子喇特訥舊名阿魯達喇舊名阿魯爲皇太子未幾薨順帝立子愛裕實哩達舊名愛猷喇舊名愛猷爲皇太子未卽位國亡有元一代所立皇太子亦無一享國皆事之不可解者也惟元武宗立弟仁宗爲皇太子明宗立弟文宗爲皇太子後俱爲帝以弟傳子轉得享國尤屬異聞何哉請以質之讀史尙論者

元史卷十六終

元史卷十七

列傳三

太祖平服各國

金哀宗有言蒙古滅國四十以及於夏夏亡以及於我我
亡必及於宋然蒙古源流載太祖將征唐兀部時曰承上
帝之命駕馭天下十二強汗平定諸惡劣小汗則四十國
中除各小部落外其大部落亦不過十二今可知者白韃
塔爾部泰赤烏部蔑爾乞部一作蔑札木合部克烈部乃
滿部回鶻部西契丹部即回鶻部為契丹北印度部阿羅
思部欽察部阿速部又所收服者東遼國即耶律東夏萬
奴國凡十四大國皆在伐唐兀部之前唐兀部元史不仿
宋史立南唐吳越諸世家之例無削平各國之傳故讀史
者茫然於西北疆域而本紀所書兵事亦莫測其道里方

元史卷十七 列傳

位所在今參攷諸書創立數傳以為讀元史之先導

東北諸部

塔爾

蔑里吉

泰赤烏

東遼

東夏

初金既滅遼其部落遺民在混同江東北者謂之東北路
契丹在混同江西北嫩江東北者謂之西北路契丹元初
耶律留哥以遼遺民破東京歸於元者東北路契丹也金
大定初耶律窩斡以山前山後羣牧起兵陷韓州圍臨潢
攻泰州偪北京及明昌間契丹羣牧德壽等據信州叛建
元身聖眾四十萬丞相完顏襄討平者皆西北路契丹也
其白嫩江以西則為沙陀舊族分白黑二韃靼白韃靼在
潢河之北盧朐河之東北舊史作怯薛連謂之北阻鞏金
明昌間遣丞相完顏襄攻阻鞏於龍駒河龍駒河解大軍
之圍又遣一軍出西北路以邀阻鞏而自帥兵出臨潢進

掘山嶺即用步卒穿濠築障起臨潢左界北京路以為阻
塞而用兀部二十七族以戍之者兀部古奚種介白韃靼
蒙古也黑韃靼在盧朐河之西北幹難河之間今蒙古車
在金世未嘗為患而元太祖起其地收服旁近北阻鞏部
又聯絡二十七兀部為鄉導以攻中國於是白韃黑韃生
韃熟韃合為一部及耶律留哥以遼東來歸於是東西契
丹魚皮等族亦合為一部蓋西北部落興衰無定此部強
則各部數千里為之驅使弱則又役屬於鄰部而地蹙不
過百里數百里是以大金國志稱蒙骨部在女真之東北
亦謂之蒙兀部人不火食夜中能視以鮫魚皮為甲可捍
流矢叛於天會天眷間蓋白韃部強盛時東方漁獵部與
西北游牧部合而為一故金人紀載多以東契丹為蒙骨

元史卷十七 列傳

二

其實二部東西相望數千里其白韃蒙古本地東控臨潢
南接靜州而止初無魚皮為甲之事且一游牧一漁獵風
俗判然不同舊史混殺不明而金元所以興亡遂不著於
後世今攷其收服東部落一白黑韃二東遼三完顏萬
奴東夏但白黑韃收服在蒙古未興以前東遼東夏收服
在蒙古強盛以後事非一役地則相連故今以三部首冠
於前使知金末根本先撥外撥始啟據金史大金國
成吉思初年仇部三曰塔爾部曰蔑里吉部曰泰赤烏部
塔爾部者曾害太祖之從曾祖俺巴海汗者也初捕魚兒
海有兀兒寶溫河居河東者為白韃塔爾部蔑里吉部居
河西者為黑韃泰赤烏等部俺巴海則黑韃汗也嘗以失
約獲罪於金後渡河嫁女於塔爾部為其部人執送金國

從兄子忽圖刺嗣位往復其仇連十三戰時太祖父烈祖
雅速該在陳有功授千戶逾數歲烈祖復為塔爾部人所
害故太祖與塔爾部世仇蔑里吉部者為訶額倫太后初
嫁之國中途中為烈祖所奪其部人嘗思報復泰赤烏即俺
巴海之子欺太祖孤幼奪其部眾及長成人忌其英猛以
兵圍索於山林九日卒獲太祖以歸械諸營中赤老溫之
父憐而逸之避還漁獵於盧朐河側黎明有老嫗聞地動
聲疑泰赤烏之軍復至急呼太祖母訶額倫太后闔家急
奔布爾罕山惟弘吉刺夫人無馬被虜則白韃部蔑里吉
之軍非泰赤烏軍也賊退太祖出山曰吾子孫世世當祭
布爾罕山乃灑馬湏九頓首而去故此三部皆與太祖為
仇敵於是兄弟赴愬於克烈部王罕及族人札木合請兵

元史卷十七列傳

三

二萬往攻蔑爾乞部奪回弘吉刺夫人金承安五年金國
遣丞相完顏襄秘史作王京討塔爾部之叛塔爾部兵敗北走
太祖欲報父仇乃約克烈部脫里王罕邀擊於納刺禿什
圖之野獲大珠及金銀綳車各一獻於金完顏襄奏聞金
賜帝官號曰察兀圖魯漢語招討使也帝既攻塔爾部禽
其四奧魯復欲坑其四種人以泄憤塔爾部回軍皆據險
死拒力攻破之猶人懷一刃戰死復徵兵於所屬局爾勤
部不至反劫掠我輜重於哈禮海因回軍並滅之於是族
人勇健者皆服辛酉年泰赤烏與札木合合兵來攻帝再
敗之於斡難河遂盡有泰赤烏之眾威德日著鄰部慕義
多來降札木合降於王罕泰赤烏蔑里吉二酋皆奔乃滿
乙丑年太祖既破克烈部而蔑里吉部先降復叛遣將破

之其酋子忽都遁去命速不台以鐵車追之曰此帶勒之
馬中矢之鹿必禽之而後已憶曩日蔑里吉兵逐我繞布
爾罕山三市此怨何可忘也竟獲忽都於垂河是為太祖
初年吞并斡難河怯綠連河諸白黑韃近部之始據本紀及元秘
史其東遼諸部則太祖初年未嘗親征其後遣將取之者
半耶律雷哥率以歸附者半初東西契丹者遼之遺部散
處混同江以北世受徵調於金金世宗大定初西北路契
丹因海陵煬王伐宋盡徵其部丁壯以行東契丹恐國空
虛為鄰部所虜羣起怨叛山前山後羣牧皆應之眾至數
十萬陷韓州據咸平沿盧朐河而西將歸於西遼大石既
又圍臨潢改元僭號至大定三年始定是為一叛金章宗
明昌閒屢遣左丞相夾谷清臣右丞相完顏襄用兵東北

元史卷十七列傳

四

盡徵諸兀部北阻鞞會兵臨潢並招募上京西京北京東
京咸平臨潢漢軍詔臺省百官集議邊事問攻守之計而
皆不書敵寇之名故大金國志謂章宗枉誅鄭王允蹈其
子愛王大辯起兵遼東後修史者深諱其事不敢指實至
金衛王大安初年大辯已死其子三大王雄嗣立復聯北
部內犯京師戒嚴敕沿邊百姓不得傳說軍事金盡失和
龍以北始興王之地是為再叛其時太祖方與漠北諸部
戰尚未攻金及漠北邊平太祖稱帝北阻鞞亦附於蒙古
知金國內讐始於衛紹王三年起兵攻燕因北部為鄉道
入居庸破畿輔分兵取遼西之地時太祖稱帝已六年矣
三大王雄既失北阻鞞之援乃去帝號漸衰弱金始復經
略遼東乃下令遼民每戶以二女真戶夾居防之明年壬

申太祖七年金衛耶律雷哥起兵隆安韓州數月眾十餘
 萬營帳百餘里遼東大震金遣胡沙帥軍數十萬討之為
 雷哥及我援兵所破金史衛紹王本紀三年大元兵來征
 雷哥雷哥自立為遼王九年甲戌金
 主遣青苟招降不從復遣宣撫使完顏萬奴領軍四十餘
 萬攻之金宣宗貞祐二年南遷汴京三月論遼東宣
 事但決無四十萬之理或疑萬奴即雷哥逆戰於歸仁縣
 北河金兵大潰宣宗紀貞祐三年五月中都破十月遼東
 大異則金史所謂宣宗萬奴收散卒奔東京於是雷哥盡
 之世捷報多虛者也
 有遼東州郡遂都咸平號中京敗金左副元帥耶律都之
 兵十年乙亥金宣宗貞祐三年雷哥破東京眾勸其稱東帝不許

元史卷十七 列傳 五

與其子來朝於太祖未歸而其國為部下所據五載易四
 主雷哥始引蒙古契丹高麗及東夏國軍十萬討平之時
 混同江以南為完顏萬奴所據號東夏國雷哥止據混同
 江以北東樓西樓之地自有傳據金史大金國東夏國者
 金遼東宣撫使完顏萬奴也各紀傳作蒲鮮萬奴惟木華
 從金自明昌以後遼東均據於愛王父子連年用兵分見
 紀傳衛紹王三年耶律雷哥自立於遼東宣宗貞祐三年
 乙亥三月命遼東宣撫使萬奴選精銳屯瀋州廣靈以候
 進止時雷哥叛據自立已五年金方外闕蒙古內生變逆
 不暇規遼東至是南遷汴京始有宣撫之命五月燕都陷
 十月萬奴遣使報敗雷哥之捷或言軍實敗績走保東京
 旋僭稱天王國號大真凡長合台台女真改元天泰時金已遷汴

遼西盡為元有與遼東隔絕不能問金主嘗歎曰人不易
 知吾以遼東專委萬奴而效尤變亂如是既而雷哥進攻
 東京陷之萬奴率眾十餘萬遁入海島又明年丙子太祖
 年冬十月萬奴來降以其子帖哥入侍及雷哥所部內亂
 萬奴復襲據東京僭稱東夏其地南接高麗北界混同江
 與雷哥東西樓接壤通聘故戊寅年曾遣其元帥胡土將
 兵助雷哥攻咸舍太宗五年癸巳二月以高麗請降而萬
 奴不服命皇子貴由及諸王按赤台討之九月東夏平諸
 王班師命太弟別里古台鎮守遼東萬奴割據自乙亥至
 癸巳凡十九年其本紀列傳又有木華黎石抹耶先哲伯
 等於太祖七年壬申襲破東京之事與雷哥傳不符蓋誤
 以北京為東京辨詳石抹耶先傳據本紀及金史及

元史卷十七 列傳 六

漠北諸部 札答剌 克烈 乃滿
 黑韃部與太祖始睦後讐者二曰札答剌部曰克烈部札
 答剌部酋札木合者太祖疏族幼微時相與嬉游親若兄
 弟所謂按答者也克烈部酋王罕者名曰脫里受金封王
 爵部人呼酋曰合罕即可汗故統稱王罕初脫里少時疏
 忌宗族曾為其族叔菊爾汗攻破走合刺溫山僅百騎太
 祖之父烈祖雅速該救之奪還其部眾約為兄弟太祖之
 父執也太祖既冠有室以引吉刺氏所贊見舅姑之黑貂
 裘往獻王罕王罕為招合舊部始稍有士馬王罕又約札
 木合助帝討蔑爾乞部奪還引吉刺夫人於是帝與札木
 合合營札木合部眾數萬太祖盡交其豪人心多陰附年
 餘札木合疑忌太祖太祖徙帳宵去諸部人多棄札木合

而從之至桑沽爾河闊納活兒海子共議立帝爲成吉思合罕使人告於克烈札木合二部其後札木合之弟與帝麾下爭牧馬於薩里河被射死札木合以爲怨於是泰赤烏遂約札木合部三萬人越阿刺烏嶺來攻帝亦聚十三圍內人三萬迎戰不利退至斡難河札木合般掠而去明年辛酉泰赤烏復與合答斤部引吉刺部散只兀部多魯班部塔爾部亦乞列思部火魯刺思部按赤部察罕部共十一部亦立札木合爲合罕於額古聶河欲攻太祖及王罕指河岸誓曰凡我同盟有泄此謀者如岸之摧如林之伐誓畢共蹙岸斫林集士馬來侵帝帳下士得其謀以告帝卽與王罕合軍拒之遷輜重於他所而倚阿蘭塞爲壘大戰關奔壇之野敵軍使神巫致風雪欲乘勢進攻及

元史卷十七 列傳

七

戰雪滿溝澗天忽反風帝軍乘之札木合泰赤烏軍多墜澗中遂大潰十一部咸叛掠去王罕軍追札木合帝軍追泰赤烏皆破之既而王罕與諸弟內鬪諸弟逃乃滿乃滿東部布魯汗即泰陽汗之兄也以兵攻王罕王罕部眾復潰散多來歸克烈部勇士札合敢布亦來降王罕走西夏回鶻回同三國中道糧絕捋羊乳而飲刺橐駝血而食帝遣使自古泄爾海迎至怯綠連河資以貲財士馬招還其部落於是稍振王罕又自攻蔑里吉部大獲而還旋爲乃滿東部布魯汗所襲虜其子婦而蔑里吉部舊降者亦乘間叛去王罕復求援於帝且借其四員將帝遣木華黎博爾朮博爾忽赤老溫等赴之大敗乃滿布魯汗之眾盡奪回所掠帝弟合薩爾亦助敗乃滿兵於忽闌山積尸以爲京觀於

是王罕與帝約爲父子誓於土刺河黑林王罕子桑昆作奔刺合案桑昆者遼金時詳袞之稱乃官名非人名也一作鮮昆又作先髯性猜忍帝請與爲昏姻不許而札木合在其軍中復日夜離間於桑昆曰我與君是白翎雀寒暑常在鐵木真是鴻雁遇寒則南飛就暖耳彼常通信於乃滿其可保乎桑昆惑其言說父王罕請圖之王罕不許謂我身賴鐵木真而存今須髮已白惟覲安寢柰何聽巧言寘信之札木合乎桑昆固請不已王罕已耄曰任汝爲之母貽吾憂於是桑昆遣使許昏以其女妻帝長子且請帝往飲布渾察酒華言許親酒也帝率十騎將赴之爲部下蒙力克阻其行桑昆計不行遂議潛師來襲以軍士聽札木合調度札木合曰鐵木真部下善戰者惟芒忽兀魯二軍可令朱力斤部勇士一千人前衝

元史卷十七 列傳

八

之再以董哀部火力失烈門部繼衝之取後乃以護衛中軍爲應援會札木合夜醉漏言其部下圍人泄其謀於我圍人帝急移輜重於溫都爾山調軍守阿蘭塞眾未集而王罕軍已大至帝軍倉卒大潰翼日部眾求得帝於班居河側飲河水已誓眾曰他日敢忘此患難者有如河所謂飲渾水十九功臣也整兵再戰分兩隊初遇其前鋒再遇桑昆父子親軍桑昆親搆戰射中其額大敗之其部眾多來降札木合謀殺王罕弗克奔乃滿帝駐軍董哥澤遣使責王罕父子負德之罪並詰兵端曰君昔爲族人所逐窮迫無歸吾父助兵敗君仇族於河西收其土地士馬以與君其功於君一也君爲乃滿兵所攻西奔日沒處我遣人迎還比至又爲蔑里吉所偪我遣兄弟往拒之又歷取諸

部羊馬輜財以濟君匱其功於君二也君不告我往掠蔑里吉部大獲而還未有一毫遺我我征多魯班等五部如海東青之於鷺雁見無不獲獲則必致於君其功於君三也我與君共拒乃滿日暮對陳君夜不我告然炬於林而潛軍移去及輜重為乃滿襲虜我遣四將奪還爾士馬重立爾庭帳其功於君四也今無端反戈於我背天違誓其謂之何王罕聞言自責其子竝刺血盛皮囊遺帝為誓而桑昆則忿然曰事勢至此惟有竭力角戰爾勝則并我我勝則并爾尙何多言為使者歸述其語且言王罕父子方張撒金帳置酒高會無備時帝弟合薩爾妻子被俘在王罕所脫身來歸會於河上帝乃令合薩爾伴遣使以迎擊為名而潛師隨其後中途約弘吉刺別部亦乞烈族以行

元史卷十七 列傳

九

晝夜兼進逾額爾溫都山突襲其帳圍攻三晝夜盡降其眾惟王罕父子遁免以其部下有合答赫者能力關脫其主帝義之赦隸麾下以克烈部眾分賞親軍又收王罕撒金帳金器皿宿衛歌者賞克烈部圍人泄謀告祕之功王罕走聶坤河為乃滿部人所殺桑昆由西夏走龜茲國為其奴殺之來降帝斬其奴以徇乃大獵鐵麥該川申約束號令振旅而還此太祖初年吞并怯絲連河左右黑韃兩大部之始據本紀及元秘史乃滿部者一作乃蠻居土刺河之西一作土拉鄂爾昆河左右依沆海山為帳一作杭即唐回紇建牙之所古北匈奴所庭也自回紇徙帳火州後今土魯番地古高昌國乃滿即居之控弦十餘萬世雄漠北至泰陽汗惟知射獵鷹犬不習軍陳舊有兩汗分主東西

二部泰陽汗聞帝敗其東部布魯汗滅克烈部勢日強盛遣使約東方白韃部夾攻蒙古瓜分其地白韃酋阿刺忽思執其使來告甲子歲金章宗泰和四年太祖大會於鐵麥該川議西攻乃滿羣臣以方春馬瘦宜俟秋高皇弟別里古台曰乃滿恃強而言驕攻之宜乘其不備且敵馬成羣可奪而用之大軍猝至其眾易潰何以秋為遂以四月十六日祭纛啟行溯怯絲連河岸而上初泰陽汗聞克烈部王罕死遣人取其首至鼓樂祭之首忽笑眾謂不祥又犬吠不時有敗聲至是乃滿合蔑里吉部克烈部塔爾部土魯班部哈答斤部散只兀部各降眾屯於沆海山勢甚盛其臣下曰我諸將惟科克薛薩布知兵今已年老軍令久弛眾無紀律非蒙古敵也科克薛薩布曰聞蒙古遠來馬瘦請

元史卷十七 列傳

十

內徙部民逾金山避其銳縱燒草地誘敵深入人馬疲困而後以勁騎回擊之庶可取勝泰陽汗將從之其子屈出律曰自我先世以進戰退戮為軍令馬尾人背不使敵見今我汗婦女耳畏敵示弱何以國為泰陽汗怒遂渡塔米爾河而陳使諸軍盡聽札木合調度時帝軍抵土刺河縱火布滿山谷為疑兵乃滿哨軍以敵眾勢盛告泰陽汗懼乃與札木合晨登納胡嶺以望敵問曰彼前驅者何人曰此鐵木真四先鋒曰哲伯曰忽必雷曰赭勒蔑曰速不台皆萬人敵今日如獵犬脫索歡奔而前也泰陽汗遂磨軍稍退依山而陳又問後軍簇擁如山者何人對曰此兀魯部芒忽部其旗纛一花一黑攪戰萬眾中隊伍不亂者也泰陽汗又傳令移眾半山而立又問兩人一當前一統土

馬隨後進者何人曰前即鐵木真身先萬眾後即其弟合
薩爾披三重甲小曳弓五百步大曳弓九百步臨陳其怒
如雷者也秦陽汗益懼遂以麾下盡保山顛札木合知乃
滿非蒙古敵自率所部先遁遣人來告以敵軍無鬪志可
急乘之帝遂大戰至晡乃滿諸軍皆潰夜走絕險進軍圍
之墜崖墜死者無數翌日遂禽秦陽汗惟其子屈出律以
數千騎遁至阿勒台山即金山也帝盡收其部眾兼追禽
其兄布魯汗遂滅其國是秋蔑里吉部復叛據台合勒山
寨帝令赤老溫之兄沈伯攻之而自追其酋於金山過冬
明年春踰阿來嶺適乃滿酋屈出律與蔑里吉合軍拒戰
復大破之射殪蔑里吉之酋惟其子忽都與屈出律西走
回回帝乃旋軍而令哲伯速不台西追二酋諭以必盡賊

元史卷十七 列傳

十一

乃反用降部幹亦刺為鄉道至回鶻之耶爾的石河射殺
忽都蔑里吉部黨略平惟屈出律奔回回西契丹於是金
嶺以北突巴思部吉利吉思部一作乞爾吉思先後來降以白海
青黑貂鼠來貢其地在沆海山以北鄂爾昆河下游凡什
必爾部以南林木中部落皆收服又命博爾忽及孛羅勒
征廓里突馬部孛羅勒以三騎先進暮入深林被殺乃命
多爾伯申助博爾忽征之盡虜其眾乃滿既滅札木合亦
為人執獻帝以其在敵軍中屢泄王罕乃滿之謀不失故
舊誼赦隸宿衛札木合自知前事反覆且慮帝雄猜終不
相容曰汗善用人故成功我以失人心故敗然我不死汗
寢不安固請就死遂自殺帝命以禮厚葬之是為太祖中
年吞并漠北黑韃全部之事據本紀及元秘史

東契丹耶律留哥

耶律留哥契丹人仕金為北邊千戶太祖起兵朔方金人
疑遺遺民有他志下令遺民每戶以二女真戶夾居防之
留哥不自安太祖七年壬申壬申為衛紹王四年改元崇
慶蒙古兵已於元年入居庸
時太祖已稱帝於斡難河七年矣南遷錄言愛王卒於遁
衛紹王元年其子雄嗣位是為三大王至是已三年矣
至隆安韓州糾壯士剽掠其地州發卒追捕留哥皆擊走
之因與耶的合勢募兵數月眾至十餘萬推留哥為都元
帥耶的副之營帳百里威震遼東太祖命按陳那衍渾都
古行軍至遼遇之留哥乃率所部會按陳於金山刑白馬
白牛登高北望折矢以盟按陳曰吾還奏當以征遼之責
屬爾金人遣胡沙帥軍六十萬號百萬來攻留哥留哥亟
馳請援帝命按陳孛都歡阿魯都罕引千騎赴之留哥與

元史卷十七 列傳

十二

金兵對陳於迪吉海子以姪安奴為先鋒橫衝胡沙軍大
敗之以所俘輜重獻帝召按陳還而以柯特哥副留哥屯
其地八年癸酉癸酉為金衛紹王五年九月被赦宣宗立
改元貞祐蒙古木華黎兵侵金圍燕拔河
東河北諸州郡三月眾推留哥為王立妻姚里氏為妃以其屬耶
斯布為郡王坡沙僧家奴耶的李家奴等為丞相元帥尚
書統古與著撥行元帥府事國號遼九年甲戌金遣使青
苟招降不從留青苟不遣金主怒復遣宣撫完顏萬奴領
軍四十餘萬攻之留哥逆戰於歸仁縣北河上金兵大潰
萬奴收散卒奔東京安東同知阿憐遣使求附於是盡有
遼東州郡遂都咸平號為中京金左副元帥耶律都只兵
十萬來攻留哥拒戰敗之十年乙亥留哥破東京乙亥金
宣宗貞祐三年五月中都破蒙古
遂入燕攻金潼關不克耶斯布等勸留哥稱東帝留哥

曰鄉者吾與按陳那衍盟願附大蒙古國削平疆宇今背盟樹敵逆天不祥眾請愈力乃稱疾不出潛與其子薛閣奉金幣九十車金銀牌五百至行在入覲帝大悅曰漢人先納款者前惟劉伯林然伯林迫於重圍而來未若留哥仗義效順也其舉留哥所獻以白氈陳之於天七日而後納諸庫命賜金虎符仍封遼王又問戶籍幾何對曰六十餘萬帝曰可發三千人為質朕遣蒙古三百人往取之初留哥破東京時蒙古將柯特哥奪金元帥萬奴之妻萬奴怒走據他部相攻留哥不直柯特哥遂與有隙至是奏聞帝逮柯特哥來行在柯特哥懼遂與耶斯布等約眾言留哥已死殺所遺蒙古三百人以叛事聞帝慰留哥曰爾毋以失眾為憂草青馬肥資爾甲兵往取家孥將倍此數以

元史卷十七 列傳 三

封汝十一年丙子丙子金宣宗貞祐四年元克潼關耶斯布僭稱帝於澄州國號遼改元天威以留哥兄獨刺為平章置百官以金降將青苟為元帥方閱月青苟復叛歸於金耶斯布凡僭號七十餘日為其下所殺推其丞相乞奴監國與其行元帥鴉爾分兵民為左右翼屯開保州關金蓋州守將眾家奴引兵攻敗之是春留哥引蒙古軍數千適至得兄獨刺并妻姚里氏戶三千追敗鴉爾軍還度遼河招撫懿州廣寧徙居臨潢府乞奴走高麗為金山所殺金山又自稱國王改元天德明年丁丑統古與復殺金山而自立又明年戊寅戊寅木華黎盡取金河東州郡咸舍復殺之亦自立是冬留哥引蒙古契丹軍及東夏國元帥胡士兵十萬竝約高麗兵共攻咸舍殺之徙其民於西樓自乙亥歲留哥北覲後遼東反

覆五載僭立四主至己卯春復為留哥平定留其長子薛閣事帝而自歸國明年留哥卒年五十六子薛閣以下世有佐命功

耶律薛閣留哥之子也初留哥以遼東歸太祖受封遼王留其子事帝而自歸國會帝征西域留哥卒於遼東皇太子承制以留哥妻姚里氏佩虎符權領遼東國事者七年丙戌帝還姚里氏攜次子善哥鐵哥永安及從子塔塔爾孫收國奴覲帝於河西阿里湫城帝曰健鷹飛不到之地爾婦人乃能來邪賜酒慰勞姚里氏奏請長子薛閣歸襲父爵以次子善哥代其扈從帝曰薛閣今為蒙古人矣朕征西域時回回圍太子朮赤於合彌城薛閣引千軍救出之身中槊又戰回回於蒲華尋思千城傷流矢積功為拔

元史卷十七 列傳 古

都魯曰侍朕左右不可遣當令善哥襲其父爵姚里氏拜且泣曰薛閣者先臣前妻所出嫡子也善哥者婢子所出若立之國人將謂我私己而滅天倫恐無以服下帝歎其賢給驛騎四十從征河西賜河西所俘士馬金幣皆以九計許以薛閣襲遼王爵而留善哥及弟姪等於行在惟遣其季子永安從姚里氏東歸丁亥詔薛閣曰昔女真國亂爾父起兵遼東會朕師又能割愛以爾事朕遼東變亂爾父連戰討平盡得金國肇基根本之地使朕無東顧憂朕以兄弟視爾父則爾猶吾子爾其與吾弟字魯古台竝轄遼東軍馬為第三千戶世世東藩欽哉己丑從太宗南征金有功賜馬牛羊千二百庚寅復命與撒爾台東征收其父遺民移鎮廣寧行廣寧路都元帥府事自庚寅至丁酉

奉太宗命迎征高麗東夏國復賜戶六千有奇東夏即完顏萬奴金舊宗室爲留哥敗諸東京者也亦據遼東半地自立國號東夏天王與東遼並峙十九載至是爲元兵所滅戊戌薛閣卒年四十六子收國奴襲遼王爵行廣寧路總管軍民萬戶府事易名石刺征高麗有功辛亥憲宗元年以石刺祖孫三世爲國宣力命更造所佩金虎符賜之佐諸王耶苦及札刺台控制高麗其後子孫襲職亦世有戰功

論曰舊史此傳所述金兵攻遼皆留哥降元後鋪張夸詡之詞初言太祖起兵朔方金人疑遼民有他志下令遼民每戶以二女眞戶夾居防之留哥不自安等語攷遼東西地自金章宗世已爲愛王割據連兵十餘年久非金地具

元史卷十七 列傳

五

見金史本紀豈有衛紹王末年始疑其遺民防禦之理所云金人者蓋卽愛王始用遼民以攻宗國繼又疑遼民通蒙古而防之遂使中隙生變此其敘述不詳者一也又曰歲壬申遁至隆安韓州糾壯士剽掠其地擊走金兵因與耶的合勢募兵數月眾至十餘萬推留哥爲都元帥營帳百餘里威震遼東金遣胡沙金史完顏承帥軍六十萬號裕一名胡沙帥軍六十萬號之七年蒙古已於先年入居庸敗胡沙之兵衛紹王此時旦夕不自保尙能有六十萬兵攻遼東乎此其虛造者二也留哥亟馳請援帝命按陳孛都歡阿魯都罕引千騎會之與金兵對陳於迪吉海子留哥以姪安奴爲先鋒橫衝胡沙軍大破之云云按以六十萬敵眾而援兵止千騎有

是理乎此其情見勢窮者三也八年癸酉眾推留哥爲王以其屬耶斯布爲郡王置丞相元帥等官國號遼九年甲戌金遣使青苟招降不從留青苟不遣金主怒復遣宣撫萬奴領軍四十餘萬來攻留哥逆戰於歸仁縣北河上金兵大潰萬奴收散卒走還東京於是留哥盡有遼東州郡遂都咸平號爲中京金左副元帥耶律都以兵十萬來攻留哥拒戰敗之十年乙亥留哥破東京云云攷甲戌爲金宣宗二年五月燕都被圍數月金請和以衛紹王女歸蒙古請班師夏金徙都汴秋蒙古復圍燕木華黎攻金遼西州郡皆下之此時金國危如累卵都城不暇自顧而能有四十萬眾攻遼東乎況衛紹王本紀三年徒單鑑請置行省事於東京備不虞上謂無故遣大臣動搖人心未幾東

元史卷十七 列傳

六

京不守上乃大悔其時遼河東西均已隔絕根本盡失尙有遣宣撫四十萬副元帥十萬攻遼之事乎蓋宣宗曾遣萬奴宣撫遼東而萬奴因自立實有其事惟所稱明年乙亥留哥破東京者石抹耶先傳以東京爲木華黎襲破在乙亥之前太祖本紀以東京爲哲伯襲破在七年壬申皆與此不合又木華黎傳太祖十年乙亥木華黎用蕭耶先計襲取東京蕭耶先卽石抹耶先十一年木華黎克錦州殺張致廣耶律涅爾傳云進取遼東西咸寧懿州降拔蘇復海三州廣寧金復海益等十五城咸平宣撫完顏萬奴率眾十餘萬遁入海島蓋萬奴之屢棄東京亦蒙古兵威所震耳而本傳以東京之破廣寧懿州之招撫俱屬之留哥其不合者四也當日張虛聲異代不知核實於舊史乎何誅

高昌

高昌國王世號亦都護即葉護之轉音華言國王也亦世以的斤為名華言貴人也其氏曰畏兀爾即回鶻之音轉也回鶻舊居漠北有和林山二水出焉曰土刺河曰薛靈哥河其先世布可罕以靈異創國傳三十餘君是為玉倫的斤取雄武數與唐人攻戰唐人苦之議和親以金蓮公主妻其子葛勵的斤故高昌國王有印曰諸天敬護護國第四王之印即唐所賜回鶻印也和林有山曰騰格里南有石山曰胡圖里蒙古謂天曰騰格里福曰胡圖里蓋言天山福山也唐使與相地者至其國曰和林盛強以有此福山也壤此山則其國可弱乃告諸的斤曰既為婚姻將有求於爾其與之乎福山之石於上國無所用而唐人願

元史卷十七 列傳

七

見的斤知石山大不能動姑與之唐人焚以烈火沃以醴醋碎其石輦而去國中鳥獸悲號後七日玉倫的斤卒災異屢見民弗安居傳位者數亡又避黠戛斯之偏乃徙居北庭都護府即元之別什巴里城也會高昌國微乃併取之而遷於交河即火州吐魯番也統別什巴里之地北至阿朮河南接酒泉東至兀敦甲石哈西臨西蕃居是者三百餘載而至月僊帖木爾月僊生巴朮阿忒即亦都護也素臣事西契丹歲己巳聞太祖興朔方遂般契丹所置監國等官欲來附未行帝遣使使其國亦都護大喜即遣使入奏願率部眾為臣僕是時帝破蔑爾乞部射殺其酋脫黑脫阿其酋子忽都赤刺溫率所部涉耶爾的石河將奔亦都護先遣使至亦都護斬其使大戰禿河來報捷六年

朝於怯綠連河請為第四子帝感其言使尚公主序於諸子後從哲伯征哈密算端及回回諸國將部曲萬人以先紀律嚴明所向克捷又從帝征尼沙卜里征西夏皆有功既卒次子玉古倫赤嗣卒子馬木刺嗣將探馬赤軍萬人從憲宗伐宋合州攻釣魚山有功還火州卒子火赤哈嗣其後子孫世尚公主與元代相終始太祖所收東西各部惟東契丹高昌不煩兵力且世為國藩焉

火赤哈亦都護之曾孫也世守高昌亦世號亦都護叛王海都之亂畏兀民遭亂解散奉詔撫其民人凡在宗王近戚之境者悉遣還其部至元十二年叛王篤哇及卜思巴等率兵十二萬圍火州聲言曰阿只吉奧魯只諸王以三十萬之眾猶不能抗我而自潰爾敢以孤城當吾鋒乎亦

元史卷十七 列傳

六

都護曰吾聞忠臣不事二主吾生以此城為家死以此城為墓終不能從爾也受圍凡六月不解篤哇以書繫矢射城中曰我亦太祖皇帝諸孫何以不附我且爾祖嘗尚公主矣能以女與我乎我則休兵火赤哈曰吾豈惜一女而不以救民命乎然吾終不能與之相見以茵厚籍其女縋出之始解去後入朝世祖嘉其忠詔尚定宗女巴哈公主又賜鈔十萬錠以振其民還鎮火州屯於州南哈密之地北軍猝至以兵寡力戰死子紐林尚幼詣闕請兵復讐帝壯其志命尚太宗孫女布魯罕公主薨又尚其妹巴卜察公主有詔師出河西俟與北征諸軍齊發遂畱永昌會吐蕃寇亂詔以平章政事領本部探馬赤軍萬人鎮吐蕃威德甚著武宗詔還嗣為亦都護賜金印仁宗始稽故

實封爲高昌王別賜金印設王府官其王印行諸內郡亦都護印則行諸畏兀地復尙安西王女兀刺真郡主延祐五年紐林卒子二人長曰帖木補化次曰錢吉帖木補化大德中尙闕端大王孫女至大中從父入覲備宿衛又事皇太后於東朝領大都護事出爲鞏昌等處都總帥達魯花赤奔父喪於永昌讓爵於叔父欽察台不許至治中領甘肅諸軍仍治其部泰定中召還與威順王寬徹普化等分鎮襄陽俄拜湖廣行省平章政事文宗召至汴以左丞相留守尋入平內難天祿二年拜中書左丞相改御史大夫先官湖廣時有左丞忌嫉之後其人有罪當死爲堅請釋之人服其雅量子二長曰不荅失里嗣封拜中書平章政事次曰伯顏不花官江東廉訪副使死事甚烈見忠義

元史卷十七 列傳

九

傳至順二年以帖木補化葬父永昌詔翰林學士虞集撰高昌王世勳之碑帖木補化卒不以爵與其子而讓其弟錢吉襲爵至順三年錢吉卒○太平奴嗣至正十三年高昌王月魯帖木爾卒於南陽軍中子桑哥襲

西夏

西夏唐兀氏自唐賜姓李氏以來世爲節度使有河朔之地居夏州在黃河南至元昊始大乃北渡河城興州而都之其地初有靈夏綏銀宥靈鹽等州其後遂取武威張掖酒泉燉煌郡地南界橫山東距西河土宜三種善水草饒牧畜風氣強梗自漢唐以引水灌渠興水利積穀屯邊故境狹而富強又沿唐代節度鼓吹之遺故聲樂清厲頓挫崇尚儒行尊孔子以帝號文章詞命可觀立國二百餘年

抗宋遼金三國視強弱爲尙背其國州郡共二十有二河南之州九曰靈洪銀宥夏石鹽會南威河西之州九曰興定懷永涼甘肅瓜沙河外之州四曰樂廓西靈積石自天會間與金議和八十載無兵革至李遵頊當金主南遷汴京欲用兵宋夏以廣疆土於是構難十年不解精銳皆盡兩國俱敝遂爲元軍所乘太祖卽位四年已已征之軍至河西夏主遣其子率師來戰敗之獲元帥高令公克兀刺海城俘太傅西壁氏進至克夷門復禽其帥鬼名令公遂薄中興府西夏國都也引河灌之隄決水外潰遂解圍還遣太傅訛荅入中興招諭夏主納女請和班師自是九載專事於金及十三年戊寅帝以攻金事專任木華黎遂自將伐夏圍王城夏主遵頊留其子居守而自奔西涼會明

元史卷十七 列傳

十

年西域回部殺使者大軍西征乃允夏講和於是夏國無事者八載初帝征西域時夏主請和且言願出軍爲右翼及我師西行徵夏兵夏臣阿沙敢布曰俟大國軍敗時我再出兵太祖大怒曰候我破回回歸再滅爾國及自西域還以西夏納叛亡不遣質子乃於二十一年丙戌春自將復征之先破其將阿沙敢布於賀蘭山取黑水等城夏取甘肅等州秋取西涼府朔羅河羅等縣遂踰沙陀至黃河九渡言細水取應里等縣進攻靈州夏遣鬼名令公來援帝渡河擊敗之二十二年丁亥雷兵攻夏王城而自率師渡河攻積石州破臨洮府洮河西寧二州下信都府拔德順等州時帝避暑六盤山夏主李睭請降獻金銀器男女駝馬等皆以九爲數帝以其勢蹙始降誅之逾月而帝崩

夏滅而金亦垂亡矣至高麗則太祖十三年以契丹人金山元帥六哥等竄入其國據江東城帝遣哈只吉及札刺等征之連下十餘城高麗懼請降納質子其後叛服不一太宗憲宗朝屢用兵至世祖而後臣服世尙公主別詳高麗傳本宋史及元秘史

西契丹 北印度欽察各國

西契丹世號爲西遼其先耶律大石者遼太祖阿保機八世孫也女眞覆遼大石率所部西去沿途收集土馬歷北庭回鶻踰蔥嶺敗西域諸國兵駐軍尋思千城建西都曰河中府歲乙巳二月從臣冊立大石爲帝遼史天祚紀以辰二月今改元延慶時金太宗天會二年宋徽宗宣和七年也越二載復還師東度蔥嶺得善地於阿里馬之西建

元史卷十七 列傳

三

都城曰虎思幹耳朵長春西遊記自阿里馬西行十餘日里馬一作阿力至回紇小城即大石林牙舊都也阿麻里今伊犁地方萬里傳國三主兩后歷年八十有六西契丹盛時兼制畏吾部遣官監其國勢驕甚畏吾王亦都護久患之聞太祖興於和林遂與其臣下議殺契丹監國官吏而朝貢於蒙古於是天山北路及東路回鶻畏吾之地盡歸太祖其蔥嶺以西各回國爲蔑里吉及乃滿兩部遺孽所煽太祖既令速不台追擊並招其降而南路回回西契丹國爲秦陽汗子屈出律所據殺我使臣太祖怒而親征之十四年已卯命皇弟幹赤斤居守和林其山北之兵太祖自將之由回鶻五城葉密里地即今直走蔥嶺以西其山南之兵諸皇子朮赤察合台窩闊台等分將之由山南之于闐而至莎車爲一路歷克養吉干城巴爾

眞城玉龍傑赤城今作玉龍哈什馬魯察城葉爾羌城烏什城皇四子拖雷等由山南之龜茲溫宿故地沿河而至疏勒爲一路歷克徒思尼城察兀爾城還掠木刺夷國度朔朔闌河克耶里等城大將哲伯從諸皇子爲先鋒用西遼降將曷思麥里爲鄉道斬乃滿酋屈出律持其首徇各地若可什哈爾城即今喀什噶爾押爾牽城幹端城幹端即皆望風降遂至蔥嶺西與帝軍會凡征回國七年還至土刺河黑林舊營明年遂征唐兀部即西夏也是皆太祖征蔥嶺以東回國之事據元秘史及遼史天祚紀及太祖本紀其蔥嶺以西各國則太祖自將征之而以哲伯爲前鋒速不台繼之脫忽察爾又繼之令所過毋攻城毋虜掠徑走國都俟太祖大軍至夾攻其域有阿木大河徑中央阿木河一作阿母河一作暗木河即唐書之縛

元史卷十七 列傳

三

國黃河一西流爲阿母河一入印度爲恆河河西南爲五印度西北爲幹羅思爲欽察爲康里幹羅思在太和嶺之西南近裏海欽察在太和嶺之北近北海而康里則欽察之別部寬甸吉思海在焉阿速則在幹羅思之東攻幹羅思兵出入必由之十四年取阿荅刺城禽其酋耶律楚材說達刺城在尋思千東千餘里十五年克蒲華城地志尋思千西六七百里思千城見前脫羅爾城地志尋思千西六七百里十六年攻卜哈爾城明史花爾即今之布噶此皆西契丹國在阿木河以北之城也又踰河西南克班勒紇城長春西游記有班里城在鐵門及阿母河之南近大雪山北印度邊回回國主札闌丁出奔與蔑里吉汗合兵拒戰回國境非西契丹當是北印度國因蔑里吉遣酋西奔投其國故合兵拒太祖兵佯卻誘之而速不台哲伯等兵夾攻其後破回回兵三十餘萬走至申

元史卷十八

太宗憲宗

西域

太宗六年蕩平金國七年復命諸王拔都皇子貴由皇姪蒙哥等征西域時欽察已平而欽察別部曰康里者古康居國也其酋巴赤蠻有膽勇恃險遠聚眾自保皇子乃命速不台為先鋒屢戰破之巴赤蠻逃入寬甸吉思海島九年王師追至其地適大風刮海水去其港可涉士馬遂濟禽其酋命之跪不屈曰我為一國主豈苟求生且身非駝何以跪為乃命囚之巴赤蠻謂守者曰我之竄入海與魚何異然海水淺落以濟追師天也今水回濶將至軍宜早還蒙哥聞之即班師而水已至後軍有浮渡者於是康里

元史卷十八 列傳

部悉平十年諸王復征斡羅思部至耶烈贊城大戰七日拔之十一年冬兵至阿速蔑怯思城負固久不下明年春昔里紺卜率死士十人樹雲梯先登拔之又明年班師憲宗三年括斡羅思阿速戶口七年以駙馬刺真之子乞台為達魯花赤鎮守斡羅思阿速自是三國始入版圖設官吏以其地封太祖長子朮赤大王建庭於斡羅思別詳諸王傳此皆蔥嶺西北之國也錢大昕曰元初征西域欽察土圖哈二傳互異欽察西亦納思父子為一部巴赤蠻為一部本是在二國之西北近北海者為欽察是太祖癸未所平近寬甸吉思海者為康里國之巴赤蠻是太祖乙未丁酉命憲宗所相去十五年自舊史土圖哈傳沿虞集句容郡王世續碑之誤合兩事為一事謂欽察酋亦納思年憲宗方納款於太祖而憲宗師已叩其境不知太祖癸未未知巴赤蠻之為康里國以人名為國名是以其蔥嶺西稍疎舊史以康里為高車國亦誤今並正之

南之國則自太祖追北印度若弗義算端走死申河外至憲宗二年詔皇弟旭烈王西征明年至木乃奚國其國壑道置毒水中王遣大將郭侃破其兵五萬所屬山城三百六十皆下六年至乞都卜城城在檣寒山上懸梯上下仰視之帽為墜王師築壘圍之久弗克乃架礮攻之諸道並進兀魯算端開門迎降其父尚據西城王遣郭侃攻之七日而陷走據東城復破禽之木乃奚國在西域取凶悍多養刺客為窟室置美女供之言能刺仇國酋長者即生天享此福所害無算威驚鄰國四十餘年至是始滅誅之無遺類金寶山積帶值銀千笏者七年又西破兀里城阿刺丁城又至乞石迷部即今克什皆降其酋其僧儀狀甚古如世所繪達摩像日僅一食語皆禪定此北印度國也

元史卷十八 列傳

遂西至報達國南北二千里方八千里傳四十二世勝兵數十萬其王曰哈里發為西印度大國有東西二城夾印度河西城無壁壘東城固之以鐵郭侃先造浮梁河中以其吭破其兵七萬於西城又攻破東城哈里發登舸將逐浮梁扼之獲焉盡拔三百餘城其國富庶為西域冠殿宇皆沈檀烏木火之香聞數十里殿壁皆黑白玉有七十二弦琵琶五尺珊瑚燈檠大珠瑟瑟金剛鑽不可勝計有大鳥駝蹏高丈餘能負重行遠即漢之安息大馬爵又西行三千餘里至天方國是為回教祖國其聖祖派罕巴爾所葬也經典甚眾一戰破之算端降下其城百有八十五又西行三千里至密昔爾國降其酋距報達六千餘里西印度極邊矣國西即海海中有富浪國周伯琦近光集順帝至正三年西域

拂即國貢天馬高八尺三寸修如其數而加半色驪而駝
 白曲項昂首神駿超越駟者其國人黃須碧眼窄衣凡七
 渡海洋始達中國命工畫之婦人衣冠如世所繪菩薩狀
 而直學士揭侯斯為之贊焉男子僧服皆好善寢不去衣雖夫婦常異處八年郭侃渡
 海取之旭烈班師而東所經皆中印度地望風迎降勢如
 破竹至石羅子國降其酋奧思阿塔卑算端遂至中印度
 國軍民千二百萬戶國都懸大鐘有詠冤者擊之司鐘者
 紀其事王宮亦紀其名以防奸欺民以蒲為屋夏暑人處
 水中九年七月至兀林國阿必丁算端來降得大小城百
 有二十民百有七十萬又南至乞里灣國其王忽都馬丁
 甚賢亦來降其拔里寺大城產師子孔雀香貓鸚鵡有風
 駝急使乘之日可千里此皆中印度境封旭烈王鎮其地
 其南東二印度則兵未暇及云據本紀及郭寶玉傳劉郁西使記

元史卷十八 列傳

論曰自生民以來黷武莫如元疆域恢廓亦莫如元屬賁
 身壽安息條支等國漢唐但譯使及之從未服以兵力而
 阿速幹羅思欽察康里並譯使亦未通而元之取西域也
 則更在取中原之先其分藩也直等諸郡縣之列舊史地
 里志外國傳均不列載遂令讀史者茫然莫得其方向故
 物贖其形勢冠於各列傳之前以為全書之綱領其世祖
 時招徠俱藍馬八兒等國更在西印度之西而非兵力所
 取則等諸貢市外國其征瓜哇旋得旋失則同諸日本故
 均不及之云或謂太祖初年方南向爭中原何不先并吞
 金夏而乃分兵力於西荒不知是時乃滿遺種屈出律梟
 雄方篡西契丹據西域殺使臣若火始燄使太祖少遲延
 之必且舉兵東恢漠北舊部蒙古且失其根本故太祖西

征非征回鶻也征乃滿遺孽也而屈出律復聯合葱嶺以
 西諸國南北奔竄株連瓜蔓十餘載金得延喘其閒而元
 域遂西窮海表烏乎幸中之不幸不幸中之幸豈非天哉
 舊史不言印度所封何藩惟許有壬至正集西域使者哈
 只哈心碑云世隸旭烈王麾下而旭烈王藩封在極西絕
 域距中朝絕遠則印度固旭烈王所國平其地者食其封
 固酬庸之通典也

西域藩封

不賽因太祖之駙馬也太祖太宗蕩平西域盡以諸王駙
 馬分藩其地易前代國名以蒙古語次子察合台則泊葱
 嶺以東天山以南建庭於葉爾羌而分封其子孫於幹端
 喀什哈爾吐魯番地語詳太祖諸子傳其葱嶺以西則設

元史卷十八 列傳

阿木河行尚書省以控其中樞阿木河以南為駙馬篤來
 帖木爾封地所謂巴達哈山漢時屬賓國也阿木河以北
 則為駙馬不賽因封地建庭於尋思千城即西契丹舊都
 漢時大宛國是也由阿木河北而再北則為朮赤大王所
 封之阿羅思國由印度河而再西南則為旭烈大王所封
 之印度國自至元後世祖以嶺西遼闊鞭長莫及廢阿木
 河行省而篤來駙馬後人與旭烈宗王之後人皆式微無
 所表見文宗至順二年西域諸王禿列帖木爾遣使獻馬
 惟不賽因之孫賽馬爾罕特聞一作撒馬爾罕一作賽馬爾
 音之音之賽馬爾據尋思千城傍納林河雄勝膏沃西南蕃貨
 所走集居民稠密人物秀好有園林池沼之勝耶律漢傑曰
 西域尋思度城尋思肥也度城也謂肥城也風俗家集曰
 園園必成趣多有方池員沼城中有西戎校里檀故宮

國富兵強賽馬爾亦雄武能用其眾東有沙鹿海牙部達什干部賽藍部養夷部西有渴石部迭里迷部東西三千餘里兼古大宛大夏之地元末其孫駙馬帖木爾者又取西南三千餘里之哈烈國即報達國之哈里發王地也以封其子沙哈魯國益富強然世世仍襲其祖賽馬爾罕之號元亡明洪武初帖木爾遣使貢駝馬即以賽馬爾罕為國名永樂初遣使至其國帖木爾令人導使徧歷諸國數萬里以夸其國廣大而哈烈酋沙哈魯亦遣使入貢詔序於諸國貢使之首其後又南并五印度而徙都之威震南海帖木爾死孫哈里嗣哈烈酋之兄子也二人不相能構兵又各以國分封子弟嘉靖二年賽馬爾入貢稱王者至二十七年嘉靖十三年入貢稱王者至五十三人四分五

元史卷十八 列傳 五

裂惟其汗尙據五印度地至 國朝遂為西洋夷所有據本紀及明史及本朝西域圖志

元史不志西域亦不傳西藩無得而稽焉所幸各國傳世至明尙存不與元祚俱燬故明史尙存其梗概迄近日而賽馬爾罕所據之五印度地盡為西洋所有故馬禮遜外國史略瑪吉思地理備攷其述蒙古印度始末又詳於明史今附書於後曰賽馬爾罕古城在哈薩克國之中央本鞏韃游牧國也奉回教其都曰普加拉城一作破地勢高於裏海百二十丈海外各商雲集城東四十里即賽馬爾罕城居民萬口多古蹟其都城之東北曰哥干城即敖罕也一作古小國與我羅斯通市民務農桑引河灌田其南方巴勒之地亦有古城與甲布國接界甚暑多瘴尹土土城

在亞母河之南即阿母河山谷間甚燥熱居民少與其鄰國補荅山戰即巴達盡有其地產紅玉青金其南尙有巴黑坦地界葉爾羌中間高於裏海三十丈山阿盛夏有雪氣候甚寒哈薩克國即賽馬爾罕苗裔游牧蔥嶺裏海之間氈帳遷徙無定處冬則近城邑地產良馬其奔如電南宋時蒙古青吉汗起漠北踰蔥嶺駐軍尋思千城北服我羅斯南吞報達加治彌耳即宋史迦達彌爾及印度各國封其婿不賽因於尋思千城為王駐阿母河西北以遙制之於諸國僅羈縻而已至元末明初有賽馬爾罕嗣立人甚英武患土爾其國之強侵據白西亞地賽馬爾罕興師而南一戰禽土耳其汗恢復白西亞諸國震慄戰無不克至其子孫遂南并五印度世世以賽馬爾罕為號白西亞回

元史卷十八 列傳 六

國者古之波斯元史所謂報達國明史所謂哈烈國也白即波斯二字音轉一作百爾西亞亦呼作報達亦作包社亦作高奢北界裏海及哈薩克峩羅斯袤四千餘里廣約三千里唐以後為天方回教所據及元初攻破之未置官吏故未全入版圖至洪武初賽馬爾罕盡陷諸城先後隸蒙古者百二十六載及正德間復為土耳其國所據加治彌耳國者在烏斯藏之西南本北印度地其都曰拉合城在廣谷中四面皆山高於裏海五百八十丈所環之峯取高者千七百丈冬夏積雪不消河流縱橫乃印度五支江所派也物產蕃富甲於諸國居民八十萬與後藏通市昔大蒙古之君每夏駐此避暑為西域名勝地地富而險自古鄰敵無能攻伐奈國主酷待其民故為西刻國所有五印度者自昔佛國南宋初始為白

西亞回國侵據勒其民改回教毀佛菩薩像不從者死元
初用兵破之旋爲土爾其國侵據明建文間賽馬爾罕之
孫曰諦母爾帖木者吞并五印度各國徙都於東印度
之榜甲拉西北榜甲拉即東印度一作孟加臘創立大蒙古之號
威行五印度其都曰亞甲城其國方員廣袤七萬餘里居
民四百萬歲收賦餉銀二萬二千四百萬兩各國皆景仰
焉是時西洋之布路亞國荷蘭國佛蘭西國英吉利國皆
據南海之錫蘭山島并於東南二印度海口通市然必奉
大蒙古之令震威南海其後諸子爭立內亂竝起各部酋
長乘間自王其地遂四分五裂其所都之亞甲部在榜甲
拉西北廣袤方員四千一百八十里居民二十餘萬口當
諸河下游望西南其山漸高西方多牧場天氣與中國吳

元史卷十八 列傳

七

越無異居民壯健產麥多猛獸東連榜甲拉西南抵網買
及列酋部境北爲雪山及加治彌爾界此地爲印度之聖
域多大蒙古故蹟亞甲都城居民六萬口在恆額河閩郡
河會匯之處其河曰聖河每年自遠方至敬佛者不下十
萬爭向恆額河浴身有傍河之比勒城亦聖域也四方雲
集焚香婆羅門僧多若蜂聚街狹人稠約二十餘萬回回
居五之一與土民分黨不居城內亞甲城內多蒙古宮殿
大蹟有王后之陵甚壯麗又有德希城亦大蒙古故都也
蒙古王苗裔在此居民十五萬自乾隆間印度蒙古王與
英吉利商肇衅又聯佛蘭西荷蘭兵船合力拒英軍英軍
駛入恆額河與蒙古鏖戰大勝盡驅佛蘭西駐印度之兵
始奪榜甲拉之地調兵帥統轄東南印度與蒙古王分治

既而大蒙古日微內外怨叛於是嘉慶間英軍入其都竝
討平北印度西刻王加治彌耳之地遂總理五印度而蒙
古德希城之王窮窶無聊反賴英國俸祿周濟以此知大
國之不足恃焉計自元太祖初平西域至今隸蒙古賽馬
爾罕者五百餘載云又案黃潛海運千戶楊君墓志曰君
諱樞大德五年君年甫十九致用院僧以官本船浮海至
西洋遇親王合贊所遣使臣那懷等如京師遂載之以來
那懷等朝貢畢請仍以君護送西還丞相哈刺合孫如其
請奏授海運副千戶佩金符以行八年發京師十一年乃
至其登陸處曰忽魯模思云是役也君往來長風巨浪之
中歷五星霜凡舟楫糧糧器物一切不以煩有司又用私
錢市其土物白馬黑大琥珀蒲萄酒蕃鹽之屬以進以上

元史卷十八 列傳

八

攷舊史本紀大德八年七月諸王合贊自西域遣使來貢
卽其事也惟此地僅今印度之境洋艘往返數月可至而
彼時延至數載豈海道之習舟楫之技不如後世亦或市
易稽其時日乎地里志西北地附錄有忽里模

大理

舊史於世祖征大理事初不載其構兵之由近世顧祖禹
方輿紀要謂古今用兵地利形勢有定惟蒙古憑肌出奇
變化不測於南宋未服兵未渡江先從烏斯藏邊界遶江
源上游南取大理旋師湖南以出荆鄂之背爲天降之師
烏乎元之用兵未有拙於大理之役者也大理距蒙古萬
里無構鬻之由遶蜀逾滇黔蠶叢不毛皆宋所斧畫棄地
無可乘之利以漠北寒鄉士馬趨炎瘴不服水土死者數

十萬且元兵兩次皆由蜀返秦其三次雖至湖南亦已強弩之末無預夾攻之利元之取宋以得襄陽不以得大理也以此毒天下而爭利其不為漢之大宛後之日本者幾希不但此也憲宗攻蜀之役原欲從上游以攻宋乃頓兵合州釣魚山逾年而不能克世祖之攻襄陽原欲奪江漢之險乃力攻三載因賈似道不遣一旅之援而後降使似道親援襄陽不知何時可破元兵如果出奇者西蜀之師何不舍合州勿攻盡斂內江水師戰艦於春水盛時順流東下直抵鄂州又以一軍由漢中造船乘漢水直下過襄陽勿攻亦直抵鄂一循北岸取江陵潭州以據其上游一循北岸取建康直擣吳越則不俟師至臨安而降旗已豎矣何至經年累歲頓兵堅城之下哉再者襄陽事急時宋

元史卷十八 列傳

九

人金履祥曾進策并圖請以重兵由海道直擣天津撼燕京則襄樊之圍自解似道不用及伯顏入臨安得其圖及策遂奏於朝招海盜朱清瑄等試行海運遂開有元一代海漕之路其後歲至京師糧三百萬石使當日移日本之師由海道入南洋一入揚子江以取建康一入錢唐江直擣臨安則王師自天而降不但賢大理之勞拙萬倍即視合州襄陽之老師亦百倍況委十萬赤子於鯨鯢之窟者乎以此決之而謂蒙古用兵為善出奇吾未之信也大理既列版圖舊史不入外國傳至今讀史夢夢故撮敘於元初削平諸國之後大理本漢滇國至唐兼并六詔蒙氏據之傳十三王二百四十七年石晉時又滅於段氏傳二十王三百有十六年宋太祖平蜀視地圖以玉斧畫大

渡河曰此外非吾有也故終宋世未嘗南略憲宗即位之元年銳志圖宋以宋人堅守蜀荆襄鄂兩淮為北面藩蔽思出奇繞道西南攻其腹背且繞出江源上游使失天塹之險次年壬子七月即命皇弟忽必烈禡牙西征三年癸丑秋師出臨洮六盤山踰吐蕃經行劍外二千餘里所謂梁州外境也其國分三蠻部烏蠻在滇東白蠻在滇西鬼蠻為黔地在滇東北議分三道進大將兀良合台率兵出西道由麗江入諸王抄合耶只烈帥東道兵由四川曲靖入皇弟督中道由越巂入至滿陀城畱輜重冬十月皇弟軍過大渡河又經行山谷二千餘里至金沙江大理兵嚴守江岸乃出不意以革囊及棧濟師摩些二部酋迎降其地在大理北四百餘里十一 遣使招諭大理時大理方

元史卷十八 列傳

十

睦於宋殺我三使兀良合台分兵入察罕章白蠻先後降數城十二月皇弟兵由龍首關進薄大理城倚點蒼山西洱河為固三面皆水國王段智興一作段興智背城迎戰大敗又使招之三反弗聽下令攻之東西兩道兵皆會乃登點蒼山俯視城中城中宵潰智興奔善闡兵入其城秋毫不犯惟烏蠻善闡未服留兀良合台經略之四年甲寅復由大渡河回至六盤山未能取道湖南也兀良合台進攻烏蠻合刺章先拔其水城前次羅部府遂進至烏蠻所都押赤城即善闡也城際滇池亦三面阻水屢戰破之禽其王段智興兀良合台病委軍事於其子阿朮五年乙卯連破乾德哥城赤徒哥山寨又擊破魯斯國之塔渾城忽蘭城阿伯國之阿魯山城盡請降凡出師二年平大理五城

八府四郡泊烏白等蠻二十七部遂以便宜取道出烏蒙
趨瀘江卻宋將張都統兵三萬奪其船二百艘遂通道於
嘉定重慶濟蜀江與大軍會七年丁巳以雲南平獻捷於
朝遂經六盤山至臨洮府大營月餘復奉詔西征烏蠻仍
未能取道湖南也是冬進兵征交趾先是大理國王段氏
屢為權臣高氏所廢至是誅其相高祥一作高素祥使段智興
主國事智興父子自率熨熨兵二萬為先鋒導大軍討平
未服諸部進攻交趾於是國主陳日嬰內附還軍雲南之
押赤城時世祖方奉憲宗命伐宋詔交趾軍以明年正月
會長沙南北夾攻乃引兵入宋境所經炎瘴軍士多病乃
率四王騎兵三千熨熨萬人破橫山寨關老蒼關徇宋內
地破其兵六萬一軍由廣南至衡州一軍歷邕桂辰沅至

元史卷十八 列傳 七

潭州城下潭州出兵二十萬斷我歸路我軍邀其前後夾
擊大破之自入宋境轉鬪數千里大小十三戰未嘗敗北
壁潭城下月餘會世祖兵已渡江攻鄂遣兵二千來援遂
北渡與大軍合先是蒙古兵出靈關羅施鬼國即遣報宋
思播守臣言蒙古有事大理實欲取道西南大入中國當
豫為之備守臣以聞宋廷臣皆言蒙古生長朔方專恃馬
騎冬枯夏暑便當反北安能崎嶇岡嶺久涉炎方仰攻荆
楚事涉迂誣不之信既而南軍果至始大駭懼然元於大
理之役首尾往返七載土馬死者數十萬師始得至湖南
而世祖旋班師北歸究不遂擣宋之願董文炳率四十六
騎從征中途死盡至吐蕃僅餘兩人挾之徒行路食死馬
肉展轉萬山中日不能三十里會使者遇之還言於世祖

遣其弟文忠馳迎乃達雲南一人如是餘可例知其後遂
世遣皇子分封鎮守雲南與段氏分治分大理國為南北
中三路大德七年從雲南守臣請立碑點蒼山以昭世祖
功德以大理善闡二城皆三面際水故親王國善闡而段
氏世鎮大理一恃宗親一恃故物兩不相下中葉亦屢構
兵事見各傳初雲南王始封之印曰建昌王印建昌即雲
南之別稱也中統二年金齒蠻來貢地在大理西南數千
里外國名百夷乃羣蠻總稱也眉額塗丹墨而金其齒意
思野逸如驚鷹然語言重譯而後通命草詔宣諭大理及
合刺章俾還故土又手詔曰嘉汝等遠自雲南導從選鋒
轉戰千里以達鄂渚遠猶敘其初年開路南伐之功云本
紀及宋史及兀良
合台董文炳各傳

元史卷十八 列傳 七

太祖太宗憲宗屢朝征西域平大理其時嶺南以西置
阿木河行省又建行省雲南開郡縣視同內地并非羈縻
蠻荒比邵氏類編以西域與大理載之高麗日本安南占
城瓜哇開等之外國疏矣今既立平服西域大理各傳以
段氏世官大理略取其世系附注傳末段氏自智興後皆
效忠於元世為大理總管智興卒族弟實曰信且日者世
初朝襲為總管進大理威楚金齒等處宣慰使都元帥拜
雲南行省參政自有傳實卒弟忠襲從伐西林破會昌通
善關平休林武定緬甸有功忠卒實子慶襲先至元開
慶從父入朝宿衛東宮尚公正後歸授大理金齒等處宣
慰使都元帥慶卒忠子正襲正卒慶子隆襲隆卒慶子
相繼襲職二代世系未詳義卒隆子光襲時雲南王府諸
人多驍勇凌虐下民率眾西向光迎戰而敗諸王老幼
出鎮雲南用擊下議率眾西向光迎戰而敗諸王老幼
重兵守羅那關防猜不解順帝至正四年光弟功襲二十
四年明玉珍據蜀分兵兩道攻雲南梁王把匝剌兀爾密
走威楚徵兵救援功進兵呂關破蜀兵於關明玉珍屯
古田寺功夜遣人火之蜀兵死者八千九百復大破之於
王梁德功妻以女奏授雲南平章已而忌其威望復害之
功子寶襲蜀兵復侵善闡梁王力不支復遣使請大理求
援寶以父仇卒不出兵迄明祖定江南遣其叔段真由會
於明云

元史卷十九

列傳五

中統以後屢朝平服叛藩

東方叛王乃顏哈丹

太祖封四弟別里古台於斡難河至元中立城名曰肇州其裔孫曰

乃顏又封三弟哈赤溫於黑龍江倫今索其裔孫曰哈丹竝

據形勝雄士馬至世祖至元二十四年而乃顏叛世祖親

征平之明年哈丹又叛先後四年乃靖初乃顏之將叛也

世祖遣丞相伯顏馳往覘察乃顏將執之伯顏以計得脫

帝乃敕諸王闕里鐵木爾節制東方諸軍不許乃顏調發

又詔遼東宣慰使塔出領萬人與皇子愛耶赤同備禦女

真水達達官民又遣近侍阿沙不花安撫北方納牙大王

等以孤其外應宗室表太宗第六子合丹大王之子日那海大王疑即納牙既而乃顏

元史卷十九 列傳

叛帝議親征右丞博羅歡曰昔太祖分封東諸侯其地與

戶臣皆知之以二十為率乃顏得其九餘五諸侯得其十

一但徵五諸侯兵自足當賊何煩乘輿五諸侯者芒兀王

兀魯王札刺爾王弘吉刺王亦乞列思王也帝從之詔李

庭董士選出師將校多蒙古人或其親暱立馬相向語輒

釋仗不戰帝患之葉李請用漢兵列前步戰而聯大軍斷

其後示死鬪乃詔漢軍得以漢法戰時乃顏陰遣使誘西

方耶不干王勝納哈王同叛為金山防禦都指揮使土圖

哈所執奏聞詔勝納哈由西道入朝不令由東道以而耶其分地在東也

不干遂叛應乃顏土圖哈即日率數千騎疾馳七晝夜渡

土兀刺河即土拉河戰於孛怯嶺方暑北風大起乘風力戰大

敗之耶不干僅以身免土圖哈收其餘黨沿河而下走鐵

元史卷十八終

元史卷十八 列傳

三

元史卷十八終

哥王萬騎俘哈爾魯王獻行在又誅兀塔海王盡降其眾
鐵哥王亦自縛來歸於是乃顏無西方之援世祖親征乃
顏遣哈丹王領前鋒萬人迎拒為親軍都指揮使玉哇什
所敗追至布利古都伯塔哈之地乃顏兵十萬陳以待會
車駕先至叛王塔不台率兵掩犯時久雨軍飢且賊眾我
寡不得地利諸將欲退從臣鐵哥及博羅歡不可帝乃張
曲蓋據胡牀鐵哥從容進酒塔不台懼有伏果引去王師
乘之玉哇什及圖堅不花皆陷陳力戰梟斬其駙馬忽倫
轉戰二日至哈罕大軍來會大風晝晦三戰三捷遂禽乃
顏及塔不台凱旋時御史大夫玉速亦追乃顏黨金家奴
等敗諸札馬圖河禽諸夢哥山而塔出奉皇子愛耶赤亦
破乃顏軍於建州懿州禽其帥於遼西黑山小龍泊復破

元史卷十九 列傳

二

曲迭大王之兵追至東金山其黨盡平明年哈丹復叛於
遼東命皇孫鐵穆耳統諸軍討之轉戰老木連河又戰明
安倫城又戰忽蘭葉爾連敗其眾既而車駕親征哈丹拒
敵於兀魯輝河玉速破之聲言過冬方進而晝夜倍道兼
行過黑龍江擣其巢穴盡收其眾哈丹遁去皇孫軍亦敗
叛王火魯哈孫於兀魯輝河還至哈刺溫山夜渡貴烈河
敗哈丹軍盡得遼左諸部置東路萬戶府二十七年哈丹
入高麗復寇遼東海陽又寇開元詔東路上萬戶伯帖木
爾偕平章徹里帖木爾進討大破哈丹於瓦法明年春又
戰鴨綠江失利改命諸王乃麻台及遼陽行省平章薛徹
干征之薛徹干先敗哈丹於禪定州既而乃麻台兵至合
攻又敗之伯帖木爾將百騎逐北至一大河虜其妻子窮

追竟日哈丹尚有八騎伯帖木爾止餘三騎兩騎士皆重
傷不能進單騎追至一大山日暮哈丹僅以身免二十八
年復詔塔出領軍討哈丹於女真還攻建州逐阿海投江
死二十九年哈丹渡海南襲高麗塔出復進兵討之哈丹
走死伯帖木爾亦討其黨涅徹烈王於陳河涅徹烈僅以
二十騎遁遂定其地置肇州地產鱈魚命以所俘女真
五百餘戶充漁戶歲捕大魚置驛以進金史所謂牛魚者
也

據本紀及伯帖木爾等傳

鐵哥王速塔出伯帖木爾等傳

北方叛王 阿里不哥 海都 篤哇 蔑里等
阿里不哥者拖雷大王第七子憲宗世祖同母弟也憲宗
自將攻蜀命世祖分兵趨鄂州以阿里不哥留守和林先
是憲宗三年以關中河南地盡封世祖地大勢專多為宗

元史卷十九 列傳

三

親所忌有阿藍荅渾都海者諧諸憲宗言皇弟得中原心
財賦皆歸私府恐尾大不利朝廷憲宗入其言命阿藍荅
行省於京兆劉太平佐之鈎攷陝西河南財賦置局關中
大開告訐世祖用姚樞言盡遣妃主歸朝自馳覲憲宗於
六盤山相持泣下始罷鈎攷局竝罷世祖所置諸司時憲
宗七年也明年世祖方受命伐宋又明年師次鄂州九月
聞憲宗崩蜀諸王大臣多勸北還以繫天下之望帝欲遂
破宋而後班師議未決時先朝諸臣阿藍荅渾都海脫和
思脫里赤等曾諧帝於憲宗畏帝登位獲罪謀戴阿里不
哥以號令天下於是阿藍荅發兵於漠北諸部脫里赤括
兵於漠南諸州時燕真統世祖留部覺阿里不哥有異志
乃奉世祖皇后皇子徙帳而南至上都而阿藍荅乘傳調

兵亦距開平僅百餘里繼而脫里赤亦至燕括民爲兵人心洶洶皇后急遣使馳報軍中請帝速還於是大軍北返十二月駐蹕燕京近郊詰脫里赤等擅括民兵之罪脫里赤託先帝臨終遺命帝察其包藏禍心盡縱遣所集兵明年三月世祖即位四月阿里不哥亦發兵稱帝於和林初憲宗時攻戰常在川蜀而輜重在六盤山皆精兵所在阿里不哥命劉太平霍魯懷行省於關右謀籍以舉事世祖詔徵諸路兵三萬人衛燕京以精兵萬五千守開平命諸路市馬萬匹戰襖裘帽各萬計米十萬石輪開平府及撫州淨州沙井魚兒灤以備軍儲以總帥汪良臣統陝西漢軍守沿河隘立望雲驛非軍事毋得輒入詔陝西四川宣撫司八春節制諸軍以商挺廉希憲宣撫陝蜀捕劉太平

元史卷十九 列傳 四

霍魯懷於京兆戶諸市竝誅其黨乞帶不花於東川明里火者於西川六盤守將哈刺不花者征蜀時驍將也與渾都海善又交通隴蜀諸將至是以六盤兵應阿里不哥反七月帝自將北征阿里不哥聲其違命之罪詔諭中外商挺廉希憲令八春汪良臣發兵西禦六盤挺希憲議曰爲六盤有三策悉銳而東直撼關中彼上策也聚兵六盤觀變而動彼中策也重裝北歸以應和林彼下策也吾今遣兵西扼隴阪勿與爭鋒但張聲勢使不得東則賊趨而西必出下策已而渾都海聞關中有備果西渡河趨甘州希憲曰賊西而不東無能爲矣又招撫蜀將紐璘奧魯官之觀望者使歸順於是西川兵不與寇合六盤之兵既北而阿里不哥遣阿藍荅自和林帥師南來與哈刺不花渾都

海遇於甘州哈刺不花以議不合引軍北去阿藍荅遂與渾都海合軍而南諸將失利於甘州河右大震川蜀復洶洶響應朝議欲棄兩川守興元希憲力言不可詔諸王合丹合必赤及汪良臣率師拒之合丹將騎兵與汪良臣八春分三道進既陳俄大風揚沙晝晦良臣令軍士下馬以短兵突其左繞出陳後潰其右而出八春直擣其前合丹勒精騎邀其歸路大戰西涼城外乘風勢衝之敵大敗斬阿藍荅渾都海西土悉平十二月帝至自和林駐蹕燕京近郊明年帝復親征阿里不哥於漠北敗諸昔木土海子阿里不哥北遁詳見本紀及朮赤台各傳其渾都海軍自中統初年衄於西涼後餘眾北走復推哈刺不花爲帥有耶律楚材子鑄者前在六盤山說渾都海等入朝不從則

元史卷十九 列傳 五

棄其妻子挺身歸國其子希亮爲賊黨遮留使西行由沙州北川涉雪踰天山至北庭都護府次年至昌八里城夏踰馬納思河抵葉密里城乃定宗潛邸湯沐邑也時六皇后之妹主后位與宗王火忽皆欲東觀已而不果行冬至於火孛之地三年定宗幼子大名王閔鑄妻子遣以鞍馬幣帛乃從至忽吉爾之地會宗王阿魯忽至誅阿里不哥所用鎮守之人欲附世祖希亮乃復從二王還至葉密里城五月又爲阿里不哥兵所驅西行千五百里至孛烈撒里之地六月又西至換札孫之地又從至不刺城又西行六百里至徹徹里澤刺之山后妃輜重皆留於此希亮單騎行二百里至布爾城又百里至耶里虔城而哈刺不花之兵奄至希亮從二王興師還至不刺城與哈刺不

花戰破斬之盡殲其眾二王乃函其首遣使報捷四年至可失哈里城四月阿里不哥兵復至希亮又從征至渾八升地時希亮母從定宗后避暑於阿體八升山世祖遣使至二王所以璽書召希亮馳驛赴闕六月由苦先至哈刺火州出伊州涉大漠還紀傳敘阿里不哥敗後不言何之葉密里即今伊犁可失哈里即今喀什噶爾蓋阿里不哥敗後不能爲軍至元元年與諸王玉龍答什阿速台昔里吉等此三王皆憲宗子皆來降自歸於上都言爲奸臣所誣誤詔以諸王皆太祖之裔既知悔罪竝赦不問惟誅其謀臣不魯花忽察圖滿阿里察脫忽思等四人此中統初北藩一叛也其後海都篤哇諸王又相繼而起

初太祖滅乃蠻自斡難河徙都和林其和林以北直抵鐵

元史卷十九 列傳 六

勒北極出地五十五度際海之地皆屬畿輔不封建至太宗以嶺北遼闊乃封皇長孫海都皇七子蔑里皇次孫篤哇於嶺北至憲宗又封皇四子河平王昔里吉及皇次孫撒里蠻一作撒於嶺北海都者太宗長子合失台之子也合失台早卒海都嗣封梟雄好兵據極北廣莫之地土馬強健控弦十餘萬又自以太宗嫡孫不得立而憲宗世祖皆以皇姪承大統內不平至元初世祖定南方徙都燕京其和林地改置行中書省於是海都犯邊欲盜據漠北且徧煽西北諸王篤哇蔑里等同叛廷議征討世祖以宗室至親宜先懷以德乃遣近臣鐵連往宣諭命先詣拔都芒哥鐵木王計事而行拔都者太祖長子朮赤大王之子鎮阿羅思北方宗盟之長也元初諸王無封號是時拔都

弟月祖伯襲封即以拔都大王爲國號月祖伯一作月伯以月爲號鐵連欲先覘嶺北形勢乃徑造海都帳海都置酒大會宗親辨難遽起鐵連不荅曰今日聚會惟願飲啖奈何多言欲藉脫空口語爲指摘地邪海都愕然曰直哉使乎鐵連索海都裘海都即解以贈復詣拔都王所宣上命王曰祖宗有訓叛者人人得而誅之如講解不從我即助順討逆鐵連歸白於帝曰拔都必不從叛矣海都必反矣兵眾且銳未可與爭鋒宜諭諸將堅壘待之去則勿追斯寇無所逞至元五年海都舉兵入塞世祖逆敗之於北庭追至阿力麻里則又遠遯二千餘里上令勿追十年海都寇益蘭州執斷事官劉好禮拘之數年召至謙州謂曰皇帝疑我至有今日好禮曰若果疑王前至京師肯還之邪

元史卷十九 列傳 七

十二年詔皇子北平王統諸軍鎮阿力麻里丞相安童佐之海都兵至帝又使昔班諭海都罷兵來朝海都聽命已退軍置驛而丞相安童先克火和火王部曲盡獲其輜重海都懼遂遁謂昔班曰歸以安童之事聞非我罪也自是海都叛意遂堅巢穴險遠遁輒莫追師還復入寇既而叛王昔里吉繼之篤哇繼之漠北民避難南走者七十餘萬金山南北不奉正朔垂五十年人皆咎安童貪功激變所致舊史安童傳全諱不載今據昔班傳錄之十四年河平王昔里吉與宗王沙里蠻等劫皇子北平王於阿力麻里械繫右丞相安童脅誘西道諸王叛投海都東道諸王多不從遂帥西道諸王至和林城北詔丞相伯顏督師禦之破諸幹魯歡河而土圖哈亦屢破賊奪回所掠憲宗大帳諸王忽魯台率所部

來歸與伯顏合軍沙里蠻悔過先送還皇子北平王而執昔里吉出降此一事本紀詳於前而實於後不自知其矛盾也沙里蠻者憲宗第三子玉龍荅什之子也二十一年皇子及安童皆歸自北方凡留西北七年始歸先是安童將兵臨塞為昔里吉所執一軍皆沒至二十五年巴鄰來歸從者凡三百九十人是年海都及耶不干王復犯邊詔諸王兀伯駙馬昌吉及東道諸王皆發兵擊卻之執聶坤忽都荅爾兩叛王以歸而耶速不花復以昔烈門叛甘肅行省官約諸王拜達罕駙馬昌吉合兵討之皆自縛請罪獲昔烈門歸京師二十六年皇孫晉王征海都敵先據沅海嶺諸軍不利圍晉王山上土圍哈決圍慶戰翼晉王出險并設伏以待追騎乃退是冬命伯顏出鎮和林二十九年伯顏破海都蔑里一作

元史卷十九 列傳 八

明於阿沙忽圖嶺又夜破其伏兵於必石圖嶺斬二千餘級獲賊謀不殺遺齋書諭蔑里以禍福蔑里得書感泣後卒以眾來歸三十年詔土圖哈進取嶺北乞里吉思見地志師次謙河一作欠河即色棱格河冰行數日始至其境盡收五部之眾而還屯兵守之海都引兵來爭敗之於謙河時海都所踞塞外嶺北地深林遂谷數千里太祖時孛羅忽遇伏敗死之地敵可以來我不可以往故伯顏持重欲俟其深入一戰覆之廷臣或譖伯顏久居北邊通好海都無尺寸功詔以御史大夫玉昔代之會海都兵至伯顏遣人止玉昔曰且緩進俟我翦此寇而後至伯顏七戰七卻諸將怯之出悖言伯顏曰海都連年入寇邀之則遁兵何時已誘其深入一戰可禽諸軍必欲速戰儻失海都誰任其咎諸將

請任之即還軍擊敗海都果遁去是年成宗以皇孫撫軍北邊鎮金山適海都軍大至大將玉哇什大破之又擊敗其將巴璘大軍還海都復遣其將圖苦馬以兵三萬直趨沙一作刺思河欲據險襲我師玉哇什以善射三百人守險竟全軍還大德元年叛王藥木忽爾睿宗第七子阿兀魯速不花等昔里吉之子來歸博羅歡奏言諸王之叛皆由其父此輩幼弱無知宐宥前惡以勸來王既而叛王篤哇及蔑里等復與海都相應篤哇一作觀爾赤太高唐王闊里吉思備禦北方四年武宗以懷寧王統軍北征秋八月敗海都軍於闊別列之地五年復命晉王出統大軍適海都篤哇入寇越金山而南屯於鐵堅古山據高自保大戰於合刺合塔之地大軍分五隊鋒既交頗不利

元史卷十九 列傳 九

懷寧王親出陳力戰大敗之盡獲其輜重援諸王駙馬眾軍以出明日復戰軍少卻海都乘之懷寧王及月赤察爾身先陷陳一軍隨之突出敵陳後反擊又大敗之海都篤哇皆遁去海都旋死九年篤哇及蔑里等聚議曰太祖艱難百戰以有天下我子孫不克安享乃連年構兵自相殘殺今撫軍鎮邊者孰非太祖子孫吾誰與爭哉且連年戰皆無功太祖意可知不若遣使請命罷兵通好以全兵民之命時月赤察爾在軍恐朝命往返稽時乃言於懷寧王先報使而後奏聞由是叛人先後來歸蔑里等皆入朝詔置驛通往來金山南北至是稍靖惟海都及蔑里二部尚負固十年懷寧王復破降蔑里部眾於金山復掩取海都之子察巴爾兩部十餘萬口又詔以篤哇先眾請降旋歿

遣使安撫其子款徹盡徙降部游牧金山之陽而大軍屯田金山之北軍食日饒遂成重戍由是海都蔑里兩叛部欲投款徹者皆不見納黨孤勢絀亦相率內附北地數千里始寧武宗朝詔以和林重鎮諸部降人百餘萬非重臣不足鎮撫命丞相哈刺合孫出鎮北邊於是置驛建倉浚渠募耕計稱海屯田數千頃歲得米二十餘萬北邊大治而蔑里之裔陽翟王至順帝時而又叛陽翟王阿魯輝者太宗七世孫也性姦黠中藏叵測初順帝即位阿魯輝欺其冲幼進曰天下事宜委宰輔決之庶可責其成效若躬自聽斷萬一差誤空負惡名帝信其言由是深居宮中不治事及兵起汝穎天下震動順帝屢徵北藩兵南討阿魯輝擁眾數十萬遂脅漠北諸宗王以叛且遣使言於帝曰

元史卷十九 列傳

十

祖宗以天下付汝汝何故失其大半果不克勝任曷以國璽授我我當代為之帝聞神色自若徐曰天命有在汝欲為則自為之命知樞密院事徒堅帖木爾擊之行至稱海徵哈刺赤兵萬人為前部其人素不習戰甫陳即走官軍遂敗績二十一年更命知樞密院事老章非襲鎮南王之老章蓋宗室同名以兵十萬征之大敗其眾禽送闕下伏誅而別封阿魯輝弟忽都帖木爾襲陽翟王又封老章和寧王俾以嶺北行省丞相鎮北藩據本紀及諸武臣列傳論曰漢唐極盛時藩服至漠北而止元則漠北之地極於北海皆樹親藩中外一家輾軼曠古而釁起蕭牆世為敵國與元代相終始宗子維城之固安在哉東藩皆太祖之弟北藩皆太宗之子東北叛而西藩獨晏然西藩遠者太

祖駙馬近者亦太祖親子自阿母河行省廢而蔥嶺以西羈縻於化外其蔥嶺以東則察合台世鎮葉爾羌亦都護忠著火州雖有宗王阿魯忽即察合台之孫叛於幹端而全局不為擾攘蓋天山以南風氣馴弱遠異天山北路之剽悍自古已然哉而元史亦都護傳乃謂至元十二年都哇卜思巴等兵十二萬圍亦都護於火州聲言曰阿只吉奧魯赤諸王以三十萬眾猶不能抗我況汝孤城乎受圍六月送女講款乃解圍既而北方軍復至遂死之攷火州畏吾爾即今吐魯番為天山南路極東而都哇等部皆在金山以北風馬牛不相涉其時皇子北平王統兵阿力麻里皇孫晉王懷寧王先後統兵和林而又有別失八里之北庭元帥府據中央以扼南北之衝北方叛兵甫踰金山即為

元史卷十九 列傳

十一

大軍擊退安得再越重鎮遠圍火州至半載之久無一軍援截而本紀各傳亦無一言火州被圍之事乎都哇等不先取和林伊犁別失八里而越國鄙遠以攻火州何為乎抑圍火州者或幹端宗王而非都哇等乎幹端宗王阿魯忽之兄舊史謬鑿難以情測姑以質諸曠覽之儒

元史卷二十

列傳六

勳戚

特辭禪

特辭禪弘吉刺氏光獻翼聖皇后之父也本名特因從太祖起兵有功名辭禪故兼稱曰特辭禪與烈祖友善以女許字太祖太祖幼時依其家者數歲長始歸有室焉子曰按陳從太祖征伐凡三十二戰平西夏斷潼關道取回紇尋斯干城皆與有功所統騎軍十餘萬皆循法時國王木華黎好殺戮韃人自言隨國王者皆惡隨尙書令者皆善歲丁亥賜號國舅按陳那顏壬辰賜銀印封河西王以統其國族丁酉賜錢二十萬緡詔弘吉刺氏生女世以爲后生男世尙公主每歲四時孟月聽讀所賜旨世世不絕

元史卷二十 列傳

又賜所俘獲軍民五千二百仍授萬戶以領之故弘吉刺氏富貴與元代終始元貞元年追封按陳濟寧王諡忠武子幹陳授萬戶尙睿宗女耶速不華公主按陳卒弟納陳襲萬戶從憲宗伐宋攻釣魚山又從世祖南涉淮甸下大清河獲船百餘艘又率兵平山東濟兗單等州中統二年與諸王北伐叛王阿里不哥以其子十人自從戰莽來河逐北至孛羅克圖復戰自旦及夕斬首萬級僵尸被野卒子幹羅陳襲萬戶尙完澤公主主薨繼尙囊加眞公主卒無子弟帖木爾至元十八年襲萬戶二十四年從帝親征叛王乃顏以功封濟寧郡王賜白織蓋以寵之二十五年從諸王討叛王哈丹圖魯干由龜刺河轉戰至老木連河殲其眾賜名按察圖那顏以旌其功卒子二人長曰瑯阿

元史卷二十 列傳

不刺次曰桑哥不刺皆幼至元二十七年以其弟蠻子台襲萬戶亦尙囊加眞公主成宗卽位封皇姑魯國大長公主蠻子台封濟寧王賜金印率本部兵討叛王海都篤哇遇敵軍約戰未定單騎突陳出入數四我軍乘之遂大捷時武宗在藩邸統大軍以鎮朔方令總領蒙古軍民官守莽來河以遏北方公主薨繼尙裕宗女南哥不刺公主卒年五十有二大德十一年三月按察圖長子瑯阿不刺襲萬戶尙祥哥刺吉公主六月封太長公主加封瑯阿不刺魯王賜金印皇慶間加封皇姊太長公主天祿間加號皇姑徽文懿福眞壽太長公主至大三年瑯阿不刺卒子阿里嘉室利甫八歲襲萬戶四年襲封魯王尙多爾只班公主至順間封肅雍賢寧公主桑哥不刺者阿里嘉室利之叔也幼時世祖命幹可珍公主養之嗣布只爾駙馬後襲統其本部民四百戶成宗時尙普納公主至順間封鄆安太長公主授桑哥不刺金印封鄆安王元統元年授萬戶二年加封魯王卒年六十一此皆以駙馬襲王封者也梭爾和都者亦按陳之子以從征功在太祖朝遷授左丞相爲千戶子阿哈駙馬當憲宗朝嘗率兵破徐州有功襲父官至世祖時詔弘吉刺萬戶所受塗金銀章驛券圓符世仍其舊凡梭爾和都所受者皆收之而梭爾和都諸孫及阿哈千戶之孫與按陳之弟名冊者在太祖世皆授本藩蒙古軍站千戶冊之子曰哈爾哈孫以平金功賜拔都號哈爾哈孫之孫曰都羅至元四年授光祿大夫以銀章封懿國公有脫憐者亦按陳裔孫也世祖授本藩千戶仍賜

驛券回符各四令以兵守怯魯連河二十四年從族父按察圖征叛王乃顏有功亦賜拔都號脫憐卒子迸不刺嗣迸不刺卒子買住罕嗣買住罕尙拜苔沙公主卒弟李羅帖木爾嗣以金章封毓德王李羅卒買住罕孫阿失襲千戶有名丑漢者按陳次子必哥之裔孫尙台忽魯都公主仁宗朝封安遠王以兵守莽來河有苔爾罕者亦特許禪裔孫也以從軍功世祖亦賜拔都號其子曰布只爾征乃顏禽其黨金家奴帝賞以金帶其後有曰伯耆者卽其孫也又按陳之孫納合尙太宗校爾哈罕公主火忽之孫布只爾尙幹可貞公主又特許禪諸孫有名脫羅禾者尙不魯罕公主繼尙闊闊倫公主此皆尙公主爲駙馬者也凡其女之爲后者自光獻翼聖皇后以降憲宗貞節皇后及

元史卷二十列傳

三

后妹皆按陳從孫芒哥陳之女世祖昭睿順聖皇后忠武王按陳之女其曰帖古倫后者按陳孫脫憐之女南必后冊繼守正宮者納陳孫僊童之女成宗貞慈靜懿皇后幹羅陳之女也順宗昭憲元聖皇后生武宗仁宗者則按陳孫渾都帖木爾之女武宗宣慈惠聖皇后迸不刺之女又速哥失里后按陳從孫哈爾只之女泰定皇后按陳孫幹留察之女必罕后速哥苔里后皆脫憐孫買住罕之女文宗皇后瑪阿不刺之女此則引吉刺氏之爲后者也太祖甲戌歲分賜引吉刺氏等農土農土猶言經界也若曰是苦烈溫都爾斤以與按陳及皇弟合薩爾爲界申諭按陳曰可木溫都苔爾海子迭蔑可爾等地汝則居之諭冊曰阿刺忽馬乞迤東蒜吉納圖山木爾速拓哈海直至阿只哈溫都

哈老哥魯等地汝則居之當以胡盧忽河北爲鄰按赤台爲界又諭火忽曰哈老溫迤東塗河潢河之間火爾赤納慶州之地與亦乞烈思爲鄰汝則居之又諭按陳之子梭爾和都曰以汝父子克忠於國可木溫都迤東絡馬河至於赤山塗河迤南與國民爲鄰汝則居之至至元七年幹羅陳萬戶及其妃囊加眞公主請於朝曰臣所受駐夏地在上都東北三百里苔爾海子願建城邑以居詔可賜名應昌府後升爲路元貞元年濟寧王蠻子台尙囊加眞公主復請於帝以應昌路東七百里駐冬地建城從之賜名全州升爲全寧府後改爲路引吉刺之分邑得任其陪臣爲達魯花赤者有濟寧路及濟兗單三州鉅野鄆城金鄉虞城碭山豐縣肥城任城魚臺沛縣單父嘉祥嶧陽寧陽

元史卷二十列傳

四

曲阜泗水十六縣又汀州路長汀寧化清流武平上杭連城六縣至大元年武宗益賜永平路灤州盧龍遷安撫寧昌黎石城樂亭六縣明年又賜平江稻田千五百頃其應昌全寧等路則自達魯花赤總管以下諸官屬皆得專任其陪臣而王人不與焉此外復立王傅府自王傅六人而下其羣屬有錢糧人匠鷹房軍民軍站營田稻田煙粉千戶總管提舉等官以署計者四十餘以員計者七百餘其五戶絲金鈔之數則丙申歲所賜濟寧路之三萬戶至元十八年所賜汀州路之四萬戶絲以斤計者歲二千二百有奇鈔以錠計者歲一千六百有奇此則歲賜之制而子孫能忠孝世其富貴無霍梁驕溫撲滿之患尤近古所未有焉

李圖

李圖亦乞列思氏善騎射太祖嘗潛遣朮徹台出使至耶爾古納河往返皆止宿李圖帳李圖割羊享之復假以良馬朮徹台歸稱其誠款帝召之來見悅之許以皇妹帖木倫公主妻之李圖言有馬三十匹請以半為聘帝曰古語有云同心實難朕方欲平定部落爾其為朕心膂股肱奚以聘財為時帝初為合罕已而札木合與帝有隙合諸部兵三萬來襲李圖聞之遣使來告復率宗人擊掠其輜重降其民後李圖為火魯刺部所逼走會帝亦為克烈部酋王罕所敗相遇同飲班朮河水王罕平復以兵同攻乃滿大戰敗之長公主薨復妻以皇女果眞公主時火魯刺部已降乃命其酋之子帶弓矢為之媵其酋哈爾八台怒不

元史卷二十 列傳

五

許相拒於宛圖河拙赤河李圖連戰禽其父子殺之盡有其眾從太師國王木華黎略地遼東西以功封冠懿二州從征西夏還太祖崩不逾旬李圖亦卒太宗命還葬本土乞只爾地仍禁其地三年如國制至治元年贈推忠宣力佐命功臣太師駙馬都尉昌王諡忠武子二長帖堅干事太宗為萬戶南征攻嘉州有功師還卒於道諡忠定次瑣爾哈襲爵尙太宗皇子幹赤女安圖公主生女為憲宗后子札忽爾臣從定宗出討萬奴有功太宗命尙濟南王女卒諡忠靖子二長月列台尙皇子賽因主下女生脫別台與乃顏戰有功次忽憐尙憲宗女伯牙魯罕公主後脫黑帖木爾叛世祖命忽憐與失列及等討之大戰終日脫黑敗走帝嘉之復令尙憲宗孫女不蘭奚公主宋平封以廣

州世祖親征乃顏薛徹堅等與其將哈刺罕方大戰於程火失溫之地忽憐至即以兵二百衝陣敗之哈刺罕等走度孫河逾年夏復命往征大戰曲列河塔兀河之間敵渡河遁去餘百人逃匿山谷忽憐即率兵二百徒步追之薛徹堅力止不聽竟殪其眾後歲餘復進擊哈刺罕於兀刺河率千人夜襲殲之賜拔都號至治元年追封昌王諡忠宣子阿失事成宗大德五年從晉王懷靈王討叛王篤哇於哈刺苔山阿失射篤哇中膝號哭遁成宗加賜珠衣至大元年封昌王置王府官屬仁宗朝復賜食鹽昌縣稅入阿失初尙成宗女亦里哈雅公主生女為英宗后復尙憲宗曾孫女邁的郡主子七長巴刺失里襲爵尙禮合身公主泰定初鎮阿難答所居地子沙藍朵爾尙月魯公主忽憐從弟不花尙世祖女兀魯眞公主其弟鎖郎哈尙皇子芒哥刺女魯兀倫公主生女是為武宗仁獻章聖皇后寶生明宗英宗至治元年詔翰林官張士觀撰駙馬昌王世德之碑泰定帝順帝封邁的月魯二公主曰皇妹皇姊邁的賜銀印

元史卷二十 列傳

六

李要合汪古部人阿刺兀氏系出沙陀雁門之後遠祖卜國世為部長金源氏塹山為界以限南北其父阿刺兀思別吉忽里以一軍守其衝要時西北乃滿國太陽可汗遣使來欲使為己右臂同拒蒙古據朔方部眾多欲從之阿刺兀思知乃滿非太祖敵弗從乃執其使奉西域葡萄酒六榼來告其謀時朔方但飲湏酪無酒太祖祭而後飲三

李要合

餽而止曰是物少則發性多則亂性酬以馬羊各二千遂約同攻太陽可汗會於其地先期至既平乃滿從下中原復爲鄉道南出界垣歸鎮本部爲部下昔之異議者所害長子不顏昔班併死之其妻攜幼子孛要合與姪鎮國逃難夜遁至界垣門已閉告守者縋城以登因避地雲中太祖既定雲中購求得之賜子甚厚乃追封阿刺兀思高唐王諡忠武以其子孛要合尙幼先封其姪鎮國爲北平王太祖攜孛要合征西域及還年十七鎮國已卒繼封北平王尙太祖女齊國太長公主仍約世爲婚姻號安達忽荅而鎮國之子聶古爾亦襲爵尙睿宗女卒江淮軍中齊國太長公主明睿有智略車駕征伐四出嘗使留守駐漠南雲中之地軍國大政諮稟而後行師出無內顧之憂所謂

元史卷二十 列傳

七

監國公主者也有婦士數千事之征伐斬殺皆出其手國王木華黎專征中原辛巳年公主遣使勞之於青冢大享宴齊孛要合初未有子公主爲進姬妾以廣嗣續生三子曰君不花曰愛不花曰拙里不花公主皆視如己出孛要合卒追封高唐王諡武毅進封趙王公主寡居後復攝白韃部國事日誦佛經漠然不知富貴長子君不花尙定宗長女葉里彌什公主從憲宗攻釣魚山敵有據險張蓋而誦者弧矢莫及君不花一矢顛之遂拔其壘愛不花尙世祖季女月烈公主中統初總兵征叛王阿里不哥三年圍李壇於濟南又從征西北叛王沙里蠻皆力戰有功卒諡高唐武襄王子闊里吉思

闊里吉思有文武材力篤經術築萬卷樓於私第日與諸

儒討論經史性理陰陽術數靡不該貫尙皇太子眞金女忽荅迭迷失公主繼尙成宗女愛身失里公主至元開宗王耶不干叛闊里吉思率精騎千餘晝夜兼行旬日追及之時方暑將戰北風大起左右請待之闊里吉思曰當暑而風天贊我也策馬赴戰騎士隨之盡殲其眾耶不干僅以數騎遁此與土圖哈傳追敗叛王耶不干蓋同闊里吉思身中三矢斷其髮凱還二十九年奉詔與脫忽思等議行屯用於合敦奴孫界成宗卽位封高唐王時海都篤哇煽亂再三請往討帝乃許及行且誓曰若不平定西北吾馬首不南大德元年夏遇敵於伯牙思之地眾謂當俟大軍畢至與戰闊里吉思曰大丈夫報國而待人邪卽整眾鼓謀以進大敗之禽其將卒百數以獻詔賜世祖所服貂

元史卷二十 列傳

八

裘寶鞍及介冑戈戟弓矢等物二年秋諸王將帥共議防邊咸曰敵往歲不冬出且可休兵境上闊里吉思曰不然今秋候騎來者甚少所謂驚鳥將擊必匿其形備不可緩也獨嚴兵以待是冬敵果大至三戰三克乘勝逐北深入險地後騎不繼馬蹟被執敵誘之使降不屈又欲以女妻之闊里吉思毅然曰我帝婿也汝何人而敢婿我敵不敢逼帝遣其家臣至敵境闊里吉思一見輒問兩宮安否次問嗣子何如言未畢左右卽引去竟不屈死焉旅殯卜羅之地九年加贈太師駙馬都尉諡忠憲追封趙王兩公主竝封齊國加封趙國子朮安幼詔以弟朮忽難襲封高唐王尙阿失圖魯公主至大二年加封趙王卽以王爵讓朮安復封朮安三年朮安襲趙王尙晉王女阿刺忒納八刺

公主請於朝迎其父殯歸葬詔翰林承旨閣復碑其神道
元代尚公主者莫盛於魯昌趙鄆而鄆國公主所降駙馬
幽濮郡王昌吉岐王脫帖木爾部族無可攷勳業亦不顯
惟魯昌趙三王能世其家字要合子孫進封趙王者數世
所向諸公主率封趙國太長公主云

元史卷二十一 列傳

九

元史卷二十一終

元史卷二十一

列傳七

開國四傑

木華黎

子孛羅 孫塔思 遼澤察 魯都魯 曾孫乃燕 相威 玄孫託託 乃蠻台

木華黎札刺爾氏世居阿難水東父孔溫兀蒼以戚里從
太祖平蔑里吉及乃滿別部數立功後乃滿別部忽叛我
師突為所乘潰散太祖與六騎走中道乏食禽水際囊駝
燔之以獻追騎垂及而太祖馬斃五騎相顧駭愕乃解所
乘馬濟太祖而身當追騎以死木華黎其第三子也生時
有白光出帳中及長沈毅多智猿臂善射挽弓二石強一
日太祖從三十餘騎行谿谷間忽寇自林突出矢雨集木
華黎引弓三發殪其三先鋒命左右皆引滿待而自解馬
韉障太祖以出歷平克烈部乃滿部語詳削平諸國傳歲

元史卷二十一 列傳

一

丙寅太祖即位於斡難河首命木華黎博爾朮為左右萬
戶六年辛未從伐金薄宣德克德興府七年壬申攻拔雲
中九原諸郡進圍撫州金兵數十萬陳野狐嶺北木華黎
曰彼眾我寡弗致死力戰未易破也率帳下敢死士數百
人怒馬大呼陷陳諸軍齊奮金兵大北追至滄河僵尸百
里癸酉攻居庸關壁堅不得入遣別將哲伯統兵趨紫荆
口金左監軍高琪引兵來拒不戰而潰遂拔涿州因分兵
攻下益都濱棣諸城遂次霸州史天倪蕭勃迭率眾來降
竝奏為千戶九年甲戌從圍燕金主請和北還命統諸軍
征遼西舊作遼東今據蘇天次高州盧琮金朴以城降十
年乙亥用降將蕭耶先計襲取東京既而東京復為金宣
撫司完顏萬奴所據蕭耶先即石抹耶先也此與石抹傳同與本紀七年壬申哲伯襲取東京

不木華黎進攻北京北京大寧也木華黎奉詔往征遼西同西未攻先取東京之理石抹耶先傳及本紀所書哲伯取東京事疑皆北京之誤金守將銀青率眾二十萬拒花道逆戰敗之斬首八萬餘級城中食盡契

丹軍斬關來降進軍逼之其下殺守將銀青推寅答虎為帥石抹耶先傳云破東京降守臣寅答虎等與此不合豈寅答虎既帥北京又帥東京乎豈先以東京降又以北京降乎舊史此事遂舉城降木華黎初怒其降緩欲阮之

以蕭耶先諫而止奏寅答虎留守北京以烏耶爾權兵馬都元帥鎮之北京南破即以寅答虎守之又以烏耶爾為領之何以東京破後不置一官且以取東京有功之哲伯石抹耶先及以東京降之寅答虎亦不置一人鎮守有是乎遣使招諭與中府吏民殺金吏推土豪石天應為帥舉

城降為興中府尹錦州張鯨聚眾十餘萬殺節度使稱臨海郡王至是來降詔以鯨總北京士馬從南征未附州

郡木華黎密察鯨有反側意請以蕭耶先監其軍至平州鯨稱疾逗遛復謀遁去監軍蕭耶先執送行在誅之鯨弟致復據錦州木華黎遣芒古不華以軍數萬討之進逼紅

羅山主將杜秀降奏為錦州節度使十一年丙子致陷興中府七月進兵臨興中木華黎以致兵精憑堅城欲設奇取之乃遣烏耶爾別攻潤石山諭之曰爾但急攻山若賊必遣兵來援我斷其歸路一戰可禽也又遣芒古不華屯

承德縣東侯之致果遣騎兵八千步卒三萬來援芒古不華引兵趨之馳報木華黎夜半引兵疾馳比曙遇賊神水

縣東夾擊之分麾下兵之半下馬步戰日賊步兵無甲疾射之陣必亂因麾騎兵繼進大敗之拔開義圍錦州月餘

其監軍高益縛致出降伏誅廣靈劉珍懿州田和尚亦降

元史卷二十一 列傳 二

木華黎曰此叛寇存之無以懲後除工匠優伶外悉屠之拔蘇復海三州咸平宣撫完顏萬奴等率眾十餘萬遁入海島十二年丁丑帝將征西夏及回部欲以中原專任木

華黎八月詔封國王太師授天下兵馬大元帥都行省承制行事賜誓券黃金印分引吉刺亦乞列思兀魯芒忽等

十軍及諸漢諸軍並屬麾下諭曰太行之北朕自經略太行以南一以付卿賜大駕所建九旂太白旗以號令諭諸

將曰如朕親臨也蒙韃備錄曰成吉思儀衛建大純白旗一白旗九尾中有黑月出師則張之其國王亦止建下必元帥方有一旗一鼓他將皆無也又令第三女監國

公主駐帳雲中司中原軍馬事務木華黎乃旋征遼之師而西建行省於雲中及燕京以圖中原遂自燕南攻拔遂

城蠡州冬破大名府乘勝定蓋都漕登萊濰密等州十三

年戊寅自西京由太和嶺入河東攻太原忻代澤潞汾霍等州悉降遂徇平陽金守臣棄城遁以前鋒哲伯按察爾

統蒙古軍鎮之十四年己卯遣將一出雲朔攻降岢嵐火山軍一攻吉陽州進克絳州十五年庚辰復由燕徇趙至

滿城武仙舉真定來降用史天倪言始下令禁剽掠所獲老稚悉遣還田里兵至滏陽金邢州節度使武貴迎降遣

芒古不華分兵定河北衛懷孟三州師至濟南嚴實籍所隸相魏磁洛恩博滑濬等州詣軍門降黃河自金章宗

明昌五年分流而徙故山東失險盡為元有將由黃陵岡渡河而西金亦盛兵屯黃陵岡號二十萬遣步兵二萬襲

濟南木華黎以輕騎五百擊走之遂會大軍薄黃陵岡金兵陣河南岸示死戰木華黎令騎下馬引滿齊發已亦下

元史卷二十一 列傳 三

馬督戰大敗之溺死者眾然金兵猶據河守拒乃仍沿河收山東未下諸州郡楚丘城小而固四面皆水令諸軍以草木填塹直抵城下嚴實率所部先登拔之攻下單州進圍東平不下木華黎率兵趨洺州略河北畱嚴實權山東西路行省戒曰東平糧盡必棄城走汝即入城安輯之毋徒攻城多傷士卒十六年辛巳四月東平糧盡果潰奔汴我兵邀斬七千餘級嚴實遂入城建行省於府治遣石天應攻拔洺州還軍野狐嶺宋漣水忠義統轄石珪京東安撫使張琳皆來降鄭遵亦以棗鄉循縣降皆令權本境總管元帥府事初大軍之南侵也因唐古紂二十五部叛軍及金降臣鄉導攻燕盡知中原虛實凡攻大城先擊小邑掠其丁壯供驅使下令一騎必掠十人人數備則每人責

元史卷二十一 列傳 四

草薪土石迫期必集遲者死以填濠立平或供鵝車礮坐之用故所向無不破木華黎已定山東河北將進取關西秋八月還駐青冢監國公主自雲中遣使來勞大饗將士遂由東勝渡河西夏國主李旺懼請以兵五萬屬焉冬十月復由雲中歷大和寨入葭州金將王公佐遁以石天應權行臺守之而自將兵取綏德破馬蹏寨距延安三十里止舍金元帥完顏合達出兵三萬陳於城東芒古不華以騎三千覘之馳報曰彼見吾兵少有輕我心明日合戰當佯敗而伏兵以勝之夜半大軍銜枚齊進伏城東兩谷間明日芒古不華甫戰佯棄鼓旗走金果縱兵追入伏中萬矢齊發金兵大敗合達走保延安圍之旬日不下乃南徇洛川克鄜州遂降坊州大饗士卒聞金復取陽州乃復由

丹州渡河克隰州畱蒙古軍鎮石隰間十七年壬午秋七月合芒古不華引兵出秦隴上游相度形勢而大兵道雲中攻下孟州拔晉陽進克霍邑薄平陽青龍堡金守將開壁降八月有星彗見隱士喬靜真以為不利進兵木華黎曰我奉命收復中原今河北山東雖平而關西河南未下若因天象而不進兵何以復君命冬十月過晉至絳拔榮州所至望風歸附復有河中之地木華黎以蒲州為河東要害乃以石天應權河東關西行臺鎮守之命先造浮梁於黃河以俟歸師乃渡河拔同州下蒲城徑趨長安金元帥完顏合達引兵二十萬固守不下乃分麾下兵六千屯守之遣兵三千斷潼關自將西攻鳳翔月餘不下謂諸將曰吾奉命專征不數年取遼西遼東山東河北皆不勞餘

元史卷二十一 列傳 五

力何今年以來攻關中諸城皆不下豈吾命將盡邪乃駐兵渭水南遣芒古不華南越牛嶺關徇宋鳳州而還會石天應為中條山賊所襲殺城陷十八年癸未班師至河浮梁未成願諸將曰橋未畢工安可坐待復攻下河西十餘堡三月渡河還至聞喜縣疾篤召其弟帶孫曰我為國家擐甲垂四十年東征西討助成大業惟汴京未下是吾遺憾汝其勉之卒年五十四木華黎威權倖人主衣服儀從皆用天子禮而親將士如兄弟不許稱國王止以小名呼之不矜不伐故人皆樂為死厥後太祖親攻鳳翔謂諸將曰使木華黎在朕不親至此矣至治元年追封魯國王諡忠武傳文全本元明善東平世家子孛羅嗣一作孛羅孛羅少從父軍中美容儀不肯雜髮惟巾帽窄服軍中望

如神人聰穎寬厚通諸國語善騎射木華黎每征伐歸雲中則諸夫人連日各爲主迭置酒飲燕享羅輒起舞爲壽年二十七入朝行在所時太祖在西域夏國主李旺陰結外援蓄異圖密詔李羅東歸討之十九年甲申秋攻克銀州斬首數萬級獲生口馬駝牛羊數十萬俘其大將塔海雷軍守其要害而還二十年乙酉春復朝行在所武仙叛真定殺都元帥史天倪仙弟質軍中逃歸遣兵追斬於紫荆關二十一年丙戌夏詔封功臣戶口爲食邑曰十投下李羅居其首宋將李全陷益都李羅引兵圍之先遣李喜孫往諭全被殺二十二年丁亥春三月全突圍欲走邀擊敗之城中食盡請降諸將以全勢窮出降非心服若不誅必爲後患李羅曰誅一人易耳山東諸城未下者尙多全

元史卷二十一 列傳 六

素得人心殺之不足立威徒阻來者乃奏全爲山東淮南楚州行省郡縣聞風款附時滕州尙爲金守諸將畏炎暑欲緩進攻李羅曰主上親征西域數年未聞當暑不戰我等其敢自逸遂進兵金兵屢北開門出降俾元帥蕭乃台統蒙古軍屯濟兗關不華以兵三千屯濰沂莒以備宋千戶按禮統大軍駐河北以備金九月師還至燕聞太祖崩趨赴北庭哀毀遭疾明年卒年三十二追封如其父諡忠定

塔思一名查刺溫木華黎孫李羅子也英才大略有祖風木華黎常器之年十八襲爵遂鎮雲中庚寅秋九月叛將武仙圍潞州太宗命塔思救之仙退軍十餘里大兵未至塔思率十餘騎覘賊形勢仙恐有伏不敢犯塔思曰日暮

矣待明日擊之是夜五鼓金將耶律蒲阿來襲營我師不利退守沁南敵還攻潞州城陷冬十月帝親征塔思復取潞州仙夜遁邀擊之斬首七千餘級十一月帝攻鳳翔命塔思守潼關以備金兵河中自石天應死復爲金有辛卯帝親攻拔之金元帥完顏訛可遁塔思追斬之王辰春皇太弟拖雷與金兵相拒汝漢閒帝命塔思與親王按赤台叩溫不華先渡河爲聲援至三峰山與皇太弟兵合金兵成列將戰會大雪塔思冒矢石先挫其鋒諸軍繼進大敗之遂拔鈞州三月帝北還詔塔思與忽都虎統兵略定河南諸郡癸巳秋九月從定宗於潛邸東征禽金咸平宣撫完顏萬奴於遼東萬奴故金宗室金史稱蒲鮮萬奴他書氏則其爲金宗室明矣愛王子三太王之說所由來歟自耶律蒲阿方以遼裔叛金斷無再遣遼裔討之之理

元史卷二十一 列傳 七

乙亥歲率眾保東海至是平之甲午秋七月塔思朝太宗於行在所賀平金也時諸王大會帝以中原西夏高麗回鶻諸國皆已臣附惟南宋尙負隅敗盟欲躬行天討塔思對曰此臣子之事也願仗天威掃清淮浙以報國恩何敢以敵寇勞君父帝悅賜黃金甲命與皇子曲出總軍南征乙未冬拔棗陽曲出別循襄鄧塔思引兵攻郢復出鄧州遂至蘄黃進拔符鎮六安縣焦家寨由八柳渡河過汴京守臣劉甫置酒大慶殿塔思曰此前朝金主所居我人臣也豈可處此遂宴甫家戊戌三月朝太宗行在所帝宴羣臣於行宮塔思大醉帝語侍臣曰塔思神已逝矣其能久乎命還雲中卒年二十八子碩篤方幼太宗命其弟速渾察襲爵

速渾察字羅仲子塔思弟也少嚴重有威與兄塔思從太宗攻鳳翔有功將兵抵潼關與金人戰屢捷既滅金皇子闊出攻宋棗陽入郢速渾察皆與焉歲己亥塔思卒子幼速渾察以仲弟襲爵置營上京之西總中都行省蒙古漢軍凡他行省監鎮事必先白其可否而後上聞賞罰明信人莫敢犯帝嘗遣使至見其部曲整肅還朝以聞帝曰眞木華黎家兒也他國使有至者每見之皆倉皇失措左右或諫曰諸王百司既皆守法何必過威使人恐懼益少寬以慰之速渾察曰爲政寬猛各視其時天下初附人心未安倘守土吏弛縱反側復生悔之何及吾嚴馭之所以全之也卒封東平郡王諡忠宣子四人曰忽林池襲王爵曰乃燕曰相威曰撒蠻

元史卷二十一 列傳 八

霸圖魯亦木華黎孫字羅第三子也從世祖征伐爲先鋒元帥累立戰功世祖在潛邸從容語之曰今天下稍定吾欲勸主上駐蹕回鶻以休兵息民何如對曰帝王所居必近中原以受四方朝貢幽燕形勢西北負山東據海獨關南面以臨天下果欲宅中控制非燕京不可世祖憮然曰非卿言吾幾失之己未秋命霸圖魯率諸軍由蔡伐宋與世祖兵合而南五戰皆捷遂渡大江傅於鄂會憲宗崩獨阿里不哥搆亂和林世祖北還留霸圖魯總軍務以待命世祖至開平卽位還定都於燕嘗曰朕居此以臨天下霸圖魯之力也中統二年卒於軍追封東平郡王諡武靖子四人長安童別有傳乃燕木華黎曾孫速渾察仲子也速渾察既卒憲宗擇於

諸子以乃燕好學有賢名命襲爵乃燕辭曰臣有兄忽林池當襲帝曰汝兄柔弱恐不能勝且汝父亦以仲弟襲父爵汝何不可也忽林池亦固讓乃燕頓首涕泣固辭不得命則曰王爵必不敢受如必任臣者請代兄行軍國之事於是忽林池襲國王而乃燕佐之事無巨細必共謀議剖決精當世祖在潛藩常與論事乃燕援據典故析以大義世祖謂可大用因號之薛禪猶華言賢智人也乃燕雖親信居顯要而小心謹畏每誨羣從子弟曰先王百戰以啟藩封子孫何功德而坐享之常恐不堪福祿墮先王之業矧敢驕佚乎卒贈魯郡公子二人曰碩德曰伯顏察碩德通敏有幹才世祖卽位入宿衛典朝儀後同知通政院事帝憂遼東幹拙吉烈蔑二種人數爲寇欲遣近人招諭之

元史卷二十一 列傳 九

而難其人僉舉碩德可使乃賜御衣錫宴以行碩德至集諸萬戶陳兵衝要誅其渠魁脅從皆降其地險阻厓石錯落盛夏水漲乃可行舟冬則以犬駕杷行冰上地無禾黍以魚爲糧乃相山川形勢除道以通往來遠近便之後從征乃顏及使西域屢建殊勳卒贈魯郡公諡忠敏相威木華黎之曾孫速渾察第三子也性宏毅重厚不飲酒寡言笑喜延士大夫聽讀經史論古今治亂至元十一年世祖命相威總速渾察元統引吉刺等五投下兵從伐宋由正陽取安豐略廬克和道安慶渡江東下會丞相伯顏兵於潤州分三道並進相威率左軍參政董文炳爲副部署將校申明約束江陰華亭澈浦上海鹽官悉望風款附伯顏已下臨安相威乃移兵瓜洲與阿朮兵合臨揚州

敗宋都統姜才之兵於楊子橋十三年親王海都叛命領汪總帥兵以鎮西土十四年召拜江南諸道行臺御史大夫奏言陛下以臣爲耳目臣以監察御史按察司爲耳目倘非其人是耳目先自閉塞下情何由上達帝命御史臺清其選每除日至必集幕僚御史議其可否不協公論者卽劾去之繼陳便民十有五事略曰并行省削冗官鈐鎮戍拘官船業流民錄故官減餽道并鹽運司司農營田司入宣慰司理訟勿分南北公田召佃仍減其租革宋公吏勿容作敝帝皆納焉浙東盜起浙西宣慰使昔里伯縱兵俘掠平民乃遣御史商琥據錢塘津渡閱治之得釋者數千昔里伯遁還三奏執還揚州治其罪十六年入覲會左丞崔斌等言平章阿合馬不法事命相威及知樞密院博

元史卷二十一 列傳

十

羅白開平馳驛大都共鞠之阿合馬稱疾不出相威厲聲色令輿疾赴對首責數事既引伏有旨釋免仍諭相威曰朕知卿不徇顏面復命還南行臺十七年有旨命相威檢覈阿里海牙及忽失等所俘宋民三萬二千餘口竝放爲民十八年帝將再征日本一時無敢諫者相威遣使入奏曰倭不奉職貢可伐而不可恕可緩而不可急向者師行迫期戰船不堅前車已覆後當改轍今爲之計預修戰艦訓練士卒耀兵揚武使彼聞之深自備禦遲以歲月俟其疲怠出其不意乘風疾往一舉而下萬全之策也帝意始釋遂罷其役又陳皇太子既合中書宜領撫軍監國之任選端士爲詹事賓客諭德贊善衛翼左右以樹國本帝深然之十九年又奏阿里海牙占降民千有八百戶爲奴語

詳阿里海牙傳二十年以疾請入覲進譯資治通鑑帝卽以賜東宮經筵講讀拜江淮行省左丞相二十一年卒於壽州年四十四訃聞帝悼惜不已子阿老瓦丁南行臺御史大夫孫脫歡集賢大學士舊史相威及乃蠻台皆別傳今移并託託舊作脫脫木華黎玄孫而速渾察之孫撒蠻之子也撒蠻自襁褓時世祖撫之若子嘗挾以南征同舟濟大江慮其有失繫之御榻及長常侍左右帝嘗詔掌掖庭男女異路之制旣而近臣孛羅衛命出行失其次撒蠻拘之別室帝詢知其故命釋之撒蠻曰合自陛下出陛下自違之何邪帝由是有意大任之會以疾卒不果年僅十有七託託幼旣失怙稍長直宿衛世祖親誨導之儀觀甚偉喜與儒士語至元二十四年從征東方叛王乃顏帝駐山顛旌旗蔽

元史卷二十一 列傳

十一

野鼓未作託託遙望敵有隙可乘卽擐甲率親兵數十疾馳擊之敵眾皆披靡帝望見曰此寇易禽也亟召託託還親解佩刀及所乘馬賜之曰撒蠻可謂有子矣由是預聞機密其後復從皇孫鐵穆耳征叛王哈丹躍馬督陳馬陷於淖哈丹兵卻而復進託託弟阿老瓦丁奮戈衝擊眾乘之遂大敗敵軍侍衛禁闕出入惟謹自以受先帝命戒酒而未能剛制及宮車晏駕後卽痛屏杯罍誓不近前時成宗新卽位聞之喜曰世臣能念先帝如此真可大用出爲江浙行省平章命中書祖道都門外始至嚴飭左右咨訪掾屬時朱清張瑄以海運故致位參政多行不法恐發覺獲罪預以黃金五十兩珠三囊交驩於託託託大怒繫其使以聞自是豪猾屏息民賴以安大德十一年卒於位

年四十四子多爾只別有傳

乃蠻台木華黎五世孫曾祖曰字羅祖曰阿禮吉什追封
莒王謚忠惠父曰忽速忽爾嗣國王追封薊王乃蠻台身
長七尺射能貫札大德間奉命征叛王海都篤哇有功七
年拜嶺北行省右丞舊制募民中糧以餉邊是歲中者三
十萬石吏挾私為市殺其數止十萬民進退失措乃蠻台
合所輸者悉受儲以為下年之數民感其德英宗至治初
進甘肅行省平章甘肅歲糴蘭州糧二萬石距靈夏千餘
里至甘州又千餘里始達亦集乃路而靈夏距亦集乃路
僅千里因台輓者自靈夏徑趨亦集乃路歲省費六十萬
緡尋移陝西關中大饑詔募民入粟子爵四方應輸者露
積關下關吏拒粟使不得達乃蠻台杖吏而入其粟又慮

元史卷二十一 列傳

三

貧民無鈔羅粟命取官庫未燬昏鈔得五百萬緡識以省
印暫給民用俟官給振鈔至如數易之文宗時進封宣寧
郡王賜金印尋奉命出鎮北邊錫予尤重國初諸軍置萬
戶千戶百戶時金銀符未備惟加纓於槍首以別等威至
是乃蠻台為請於朝始得分給金銀符後至元三年詔乃
蠻台襲國王授以金印繼又以安邊睦鄰功賜珠絡半臂
竝海東名鷹西域文豹國制以此為極恩六年拜嶺北行
省左丞相至正二年遷遼陽行省年踰六十上疏辭職歸
八年卒於家木華黎子孫世襲國王與元終始若安童若
拜住若多爾只皆一時賢相而乃蠻台及多爾直班亦皆
以忠孝世其家百餘年無一墮業者蓋史冊以來所未有
焉

博爾朮

孫玉昔

玄孫阿魯圖

維的該

博爾朮一作字阿爾刺氏自祖以上世以才武雄朔方父
納忽阿蘭與烈祖鄰部相睦太祖微時有八驢馬為要爾
斤部卒盜去太祖單騎追之中途遇博爾朮意氣相得自
請往助眾寡不敵乃出奇從旁夾擊之盜舍所掠去遂驅
馬而還時博爾朮年方十三也太祖少為秦赤烏所捕與
母弟等以八騎避入布爾罕山博爾朮亦預焉及太祖為
合罕與秦赤烏戰兩軍相接下令死戰勿許退博爾朮繫
馬於腰蹠而引滿跬步不離故處太祖嘉其勇膽又嘗潰
圍於克烈部太祖失馬博爾朮擁帝累騎而馳頓止中野
會天雨雪失身帳所在夜臥草澤中與木華黎張既裘立
雪中以蔽帝通夕足蹟不移及旦雪深數尺始得免於難

元史卷二十一 列傳

三

帝與王罕蔑里期之戰亦以風雪迷陣再入敵中求太祖
不見馬斃敵矢步行奪馬歸則帝已還臥憩車中初帝聞
博爾朮不歸如失左右手及至喜曰天贊我也時諸部未
寧遇博爾朮警夜帝寢乃安枕或寓直於內謀謨政事輒
至達旦丙寅歲太祖即皇帝位君臣之分益密嘗曰我之
有博爾朮及木華黎猶車之有轅身之有臂也遂以為左
右萬戶各以其屬翊衛位在諸將上太祖征西域雷木華
黎專任攻金而博爾朮同諸皇子專征天山以南回回諸
部攻城野戰皆博爾朮運籌其事載籍不詳及太祖自葱
嶺旋師和林命皇子察合台出鎮回城詔從博爾朮受教
博爾朮教以人生經涉險阻必獲善地毋以遠涉為勞山
谷或藪奸宄所過毋輕舍止防白龍魚服之戒此傳據問

史剛白龍魚服則博爾朮語不可解 太祖聞之謂皇子曰 太祖又何故贊之今據碑文增入 朕之教汝亦不踰是未幾賜廣平路戶萬七千為分地以 老病卒大德五年追封廣平王諡忠武子孛台襲爵諡 忠定

玉昔傳述帖木兒號博爾朮孫孛台子也世祖嘗寵以不名賜 號月呂魯那演猶華言能官也弱冠襲爵統按台部眾撫 御帖帖世祖聞其賢驛召赴闕器其厯厚解御服銀貂以 賜時命領大官內膳之職侍宴內殿起行酒詔諸王妃皆 蒼禮焉至元中拜御史大夫時江南既定興利之臣欲援 金舊制并憲司入漕府而當政者又請以郡府之吏與憲 司互檢玉昔曰風憲所以糾奸柰何奪監臨之體其議乃 格遇事正色廷辯世祖每為霽容至元二十四年宗王乃

元史卷二十一 列傳

十四

顏叛遼東世祖親征至半道玉昔已退敵僵尸覆野數旬 之間三戰三捷獲乃顏以獻詔選乘輿繫駝百蹏勞之乘 輿還畱玉昔勦其餘黨復俘金家奴以獻明年乃顏黨哈 丹圖魯干復叛再命出師兩遇皆北之追及兩河其眾大 衄遁時已盛冬聲言俟春方進乃倍道兼行過黑龍江北 擣其巢穴獮蕪殆盡哈丹圖魯干逃入高麗海島莫知所 終夷其城撫其民而還詔賜內府七寶冠帶加太傅錄軍 國重事知樞密院宗王帥臣咸稟命焉特賜步輦入內三 十年成宗以皇孫撫軍北邊玉昔輔行請授皇孫以東宮 舊璽從之三十二年世祖崩皇孫南還宗室諸王會上都 議所立玉昔起謂晉王甘麻刺曰先帝既授符璽於儲闈 太王宗盟之長也奚為不言於是晉王率宗親大臣合詞

勸進玉昔復坐曰大事已定老臣死且無憾成宗即位進 秩太師賜尚方玉帶寶服還鎮北邊元貞元年冬入朝卒 追封廣平王諡貞憲命翰林學士閻復碑其勞伐

阿魯圖博爾朮五世孫也襲職為怯薛官掌環衛遂拜翰 林學士承旨遷知樞密院事後至元三年襲封廣平王至 正四年脫脫辭相位薦阿魯圖自代五月詔拜中書右丞 相而別怯不花為左丞相右司郎中陳思謙建言諸事阿 魯圖曰左右司之職所以贊助宰相有事面議立見施行 何必別陳文字邪郎中若居他官則可建言今居左右司 而建言是徒欲顯己名將置我輩何地思謙大慙服一日 與僚佐議除刑部尚書宰執有所舉或謂其人柔善不宜 掌刑名阿魯圖曰廟堂即今選劄子邪則須武健人廷尉

元史卷二十一 列傳

十五

者天下之平欲其不枉人不壞法耳先是別怯不花嘗憾 脫脫父子謀擠害之阿魯圖不從六年別怯不花乃諷監 察御史劾奏阿魯圖不宜居相位阿魯圖即避出城其姻 黨皆為不平勸令見帝自陳阿魯圖曰我博爾朮世裔豈 以丞相為難得但御史臺乃世祖所設置俾言得失若大 臣與御史辯非體也遂罷去明年別怯不花遂為右丞相 力擠脫脫父子然不久亦罷相十一年阿魯圖復起為太 傅出守和林歿無嗣舊史別傳今移并

紐的該亦博爾朮五世孫也早備宿衛累遷同知樞密院 事順帝至元五年奉使宣撫達達之地整理有司不公不 法事三十餘條由是朝廷知其才擢知嶺北行樞密院事 至正十五年召拜中書平章十七年以太尉總山東諸軍

守鎮東昌路擊退田豐兵十八年田豐復陷濟寧進逼東昌紐的該以乏糧棄城退屯柏鄉東昌遂陷還京師拜中書左丞相力請得太平共事乃令太平同居相位紐的該有識量處事平允倭人攻金復州殺紅軍據其州即奏遣人往賞賚而安撫之浙西張士誠既降紐的該處置得宜士誠大服凡授官惟才是選不用私人眾稱其有大臣體已而遽以病罷相謂所知曰太平真宰相才也我疾固不起而太平亦不能久於位奈何語不及私遂卒舊史別傳今移并

博爾忽

曾孫月赤察爾

博爾忽許兀慎氏主爾乞部人也太祖初年征其部見小兒奇其貌攜歸訶額崙太后養為己子命太祖弟畜之從征札木合泰赤烏屢立功飲班朮納河水方圍塔爾仇部

元史卷二十一 列傳

六

時彼部遣死士突圍出至訶額崙太后帳中挾太祖幼子拖雷將刃之博爾忽妻阿苔尼從帳出掉賊髮落其刃帳下壯士哲伯聞警趨至遂殺賊保全拖雷征王罕時博爾忽陷陳深入救出皇子窩闊台吮其矢創憂騎反既而與木華黎等夜斫王罕營克之又與孛羅脫渾征嶺北林木中部落孛羅脫渾遇伏死博爾忽獨全師反復借多爾伯申討之盡俘其部歲丙寅太祖即位斡難河大賚功臣賜鐵券免九死封第一千戶為四怯薛之一世襲其職以上見元史怯薛者猶言虎賁親臣也國制分宿衛士為四番番三晝夜總司上之起居飲食服御供奉且警備非常申酉戌日博爾忽領之為第一怯薛博爾忽早歿於陳子尚幼太祖命以別速部代攝之而非四傑功臣故太祖自領之號

耶可怯薛蒙古語耶可者大也以天子自領故言第一怯薛次則亥子丑日博爾兀領之寅卯辰日木華黎領之巳午未日赤老溫領之赤老溫早歿第四怯薛常以右丞相代領以上見兵志其以才任使出將入相者貴盛雖極一鈔帛億萬計國費由世祖至元二十六年詔曰先臣博爾忽事我太祖無征不從無戰不克善見元明後從征西夏歿於敵見秘故與赤老溫晚年戰功皆不著仁宗皇慶中直學士元明善奉詔撰太師淇陽忠武王月赤察爾碑即博爾忽之曾孫也於博爾忽亦無事實惟敘其子孫閱閱而已故舊史雖名立傳與無傳同舊史博爾忽傳惟事太祖孫事蓋全本元明善所撰其孫太師淇陽忠武王碑也今據秘史碑志各書補其功業而以子孫附傳於後月赤察爾博爾忽曾孫也初博爾忽戰歿子脫驪襲職從

元史卷二十一 列傳

七

憲宗四征不庭有拓地功脫驪歿子失列門嗣鎮徽外從征六詔等城亦歿於軍子月赤察爾幼事母以孝聞年十六即領第四怯薛職世祖至元十七年長第一怯薛明年詔曰月赤察爾年雖少忠實敬慎曉朝章知無不言可授宣徽使二十六年帝討叛王海都於沅海山眾甫陣月赤察爾奏言臣與丞相安童伯顏御史大夫月呂祿皆世臣今三臣已受命進戰臣不可以後之帝以其祖父皆歿於王事不忍使親行陳止之二十七年桑葛既立尚書省殺異議者籍天下口以刑爵為貨紀綱大壞會奉御徹里廷斥桑葛之罪月赤察爾助發其奸桑葛伏誅詔以沒入桑葛金幣田墅分賞旌其直湖廣行省西連洞蠻南接交趾表數千里上思得賢收伯鎮撫之月赤察爾舉哈刺合

孫凡任八年威德孚洽入爲賢相世以月赤察爾知人二十八年都水使者郭守敬請鑿渠西導白浮諸水經都城中東達潞河以通江淮舟泊於都外帝亟欲其成又重勞民力敕四怯薛人及諸府人專其役度其高深畫地分賦之刻日畢工月赤察爾率其屬著役服操畚鍤爲倡趨者雲集依限渠成賜名通惠河帝語近臣曰是渠非月赤察爾以身率眾成不速也成宗即位加太保錄軍國重事樞密宣徽使大德四年拜太師初金山南北爲叛王海都篤哇等所據垂五十年時入爲寇嘗命親王統左右部宗王諸帥屯列大軍備其衝突五年又命月赤察爾副晉王以督之是年海都篤哇入寇分五軍以禦之月赤察爾將其一軍既交綏頗不利月赤察爾怒被甲持矛身先陷陳一

元史卷二十一 列傳

七

軍隨之出敵陳背五軍合擊大敗之海都篤哇遁去厥後篤哇來請臣附月赤察爾遣使詣諸王將帥議曰篤哇請降爲我大利若待命於上往返再閱月必失事機人民復困轉輸將士復疲討伐且篤哇妻我弟妹也請先遣使報許而後上聞帝嘉其識機宜由是叛人稍稍來歸十年冬叛王明里等屯於金山武宗帥師出其不意先踰金山月赤察爾以諸軍繼至示以利害明里乃降其部人驚潰月赤察爾遣圖滿帖木爾察忽將萬人深入其部人亦降海都死子察巴爾嗣領其眾至是掩取其兩部十餘萬口至大元年月赤察爾遣使奏曰諸王圖苦蔑本懷攜貳而察巴爾游兵近境叛黨素無悛心倘合謀致死則敗垂成之功臣以爲篤哇昔先請和今雖死宜遣使安撫其子款徹

使不我異又諸部歸降牧地不足宜處諸金山之陽而吾軍屯田金山之北軍食既饒又成重成就彼有謀吾已據其腹心矣奏入帝卽命其移軍阿荅罕三撒海地既而察巴爾圖苦蔑果欲奔款徹不見納遂相率來降於是北邊始靖詔立和林等處行中書省以月赤察爾爲右丞相依前太師錄軍國重事特封淇陽王佩黃金印宗藩將領悉聽進止四年入朝帝宴之於大明殿卒諡忠武

赤老溫

曾孫芒哥撒爾

赤老溫泰赤烏部人初太祖微幼時同族泰赤烏忌其英武曰雛雛長大必搏擊人率眾圍之山林九日獲以歸械諸赤老溫之家赤老溫父子憐之每宵輒寬其械會泰赤烏大宴幹難河日暮人散太祖乘守者疏怠著械而遁仰

元史卷二十一 列傳

九

臥水中惟露其鼻追者不見適赤老溫之父瑣爾罕於月下見之給散追者使歸而口自語曰無怪人之黠汝而忌汝也速行乎遲終不免矣太祖心德之乃夜尋柝聲往叩其帳赤老溫與其兄沈伯及其妹合荅安共謀匿諸羊毛氈車中翼日泰赤烏大索各帳至其家且索及車其妹合荅安笑曰世有溽暑如斯而臥氈毛中者邪索者舍去瑣爾罕父子資以鞍馬弓矢湮醕宵遁之及太祖起兵勢日盛破泰赤烏之軍追遮其後部得赤老溫一家遂妃其妹而任其兄弟爲宿衛掌親兵南征北伐無不從與木華黎博爾朮博爾忽號撥里班曲律華言四傑也克烈部酋脫里王罕與乃滿部仇殺求援於太祖太祖遣赤老溫與木華黎等四將助之盡殲乃滿兵於按台山下太僕甲仗牛

馬還既而王罕父子謀襲太祖其下泄謀太祖復遣赤老
溫與、華黎等禦之初戰不利日暮收軍惟赤老溫歸營
其三傑皆散失詰旦始反明日復遣四將選精銳夜斫其
營乃克之旋征乃滿太陽汗大戰滅其國赤老溫父子兄
弟竝在行間乃滿既破太陽汗之兄布魯汗獻女迎降俄
復叛去而太陽汗子屈出律亦誘已降之蔑爾吉部叛據
阿勒台山太祖令赤老溫之兄沈伯與孛羅渾分攻之而
自追屈出律與蔑爾吉酋明春破之於阿來嶺適沈伯亦
已攻破阿勒台山寨并破布魯汗於泰寒寨盡屠其眾其
戰功與赤老溫相亞太宗元年冬十二月赤老溫帥師圍
慶陽金伊刺蒲阿率完顏彝以精兵來救赤老溫解圍去
四年攻汴京太宗聞拖雷與金軍相持鈞州急遣赤老溫

元史卷二十一 列傳 二十

與叩溫不華以萬騎趨之乃合攻鈞州塹其城外獲金大
將完顏合達於土室未知以何年卒以上采元秘史赤老溫二子
長朔阿次納圖爾朔阿亦精騎射太祖甚愛之號為墨爾
傑華言善射之尤者也太祖嘗與賊遇將戰有二飛鷲至
命朔阿射之朔阿請其雄雌帝曰射其雄者果一發隕其
雄賊望見驚曰善射若此飛鳥且不能遁況人乎不戰而
走從征乃滿敵率銳兵鼓而進赤老溫父子嚴兵屹不動
敵止俄復鼓進亦不動敵疑畏不敢前赤老溫父子突擊
大破其眾從太祖征蔑里吉兵潰赤老溫父子兄弟力戰
以左右帝會兀頁罕哲里馬來援敵乃引退朔阿子那海
復事太宗在軍中備歷艱險未嘗形於言太宗嘉其忠且
念其世勳既減金詔封懷州洛陽百七十五戶以上略本舊史芒哥

撒爾傳但舊史前半敘世系與後半憲宗之詔全不合今
以詔書正之詔言赤老溫及子朔阿並事太祖是朔阿年
尚少不應戰功皆屬其子而赤老溫無一事至謂祖孫三
世並事烈祖更在太祖之前尤與詔書冰炭又謂朔阿
子那海亦事太祖受封洛陽戶口則太祖時洛陽尚為金
有何得速有封戶蓋舊史誤以太宗平金後事為太祖事
又誤以其祖阿孫三世事并歸一朝試觀憲宗之詔止言
赤老溫及朔阿父子並事太祖未嘗言其速事烈祖又未
嘗言其孫那海速事太祖也舊史種種
荒謬致赤老溫無傳無子孫今正之

芒哥撒爾赤老溫之曾孫那海之子也恭謹過其父太宗
時從皇弟拖雷攻鳳翔首立奇功定宗時為斷事官剛明
能舉職憲宗在藩邸深知其人從征幹羅思阿速欽察諸
部常身先諸將及頒賞所俘寶玉則退然一無所取上益
重之使治藩邸之分民間出游獵則掌其軍士動如紀律
雖太后及諸嬪御小有過失知無不言邸中咸敬憚之乃
詔以為札魯忽赤乃國制斷事官之長位在三公上猶漢

元史卷二十一 列傳 三十

之大將軍也既拜命出帳殿外設橐坐熊席其僚列坐左
右者四十人芒哥撒爾問曰主上以我長此官當以何道
稱此職眾皆默然有夏人和幹居下坐進曰夫札魯忽赤
之道猶宰之刲羊也解肩者不使傷其脊在持平而已芒
哥撒爾聞之即起入帳內眾不測其意疑拂於和幹之言
既入則為帝稱和幹之有識帝召和幹命之步曰是可用
之才也和幹由是知名定宗崩宗王拔都大會宗親議立
憲宗畏兀巴剌欲立皇孫失烈門以先帝曾有遺命為辭
芒哥撒爾折之曰立蒙哥亦太宗遺言也有異議者斬之
憲宗既立宗王察合台之子及按赤台等謀作亂剗車轅
納兵其中以入轅折兵見克薛傑見之上變芒哥撒爾立
發兵迎之按赤台倉卒不能戰遂悉就禽伏誅自是上委

任蓋專奉法不阿多先刑後奏無不報可帝或臥未起芒哥撒爾人至帳前扣箭房奏事軋遙可其奏又賜所御大帳行扇以親寵之癸丑冬病酒而卒芒哥撒爾當國時多嚴誅戮及是咸騰謗言帝乃詔諭其子略曰汝高祖赤老溫愷赤及汝曾祖朔阿事我成吉思皇帝愷赤者官名也某赤又或以官名爲人名如食貨志中昔寶赤入刺哈赤阿塔赤必開赤貴赤厥列赤入爾赤不魯古赤之類又或連官名於人名如脫里罕罕亦都護賽典赤梁赤之類此赤老溫嘗爲愷赤之官因連舉之舊史不知此例故以赤并老溫爲無後皆著勞烈惟朕皇祖寶嘉之汝父芒哥撒爾自其幼時事我太宗朝夕左右罔有過咎從我皇考經營四方追事皇妣及朕兄弟亦罔有過咎暨朕討定幹羅思阿速穩爾別里欽察之域濟大川造方舟伐山通道攻城野戰多於諸將俘厥寶玉大賚諸軍則退然無欲得之

元史卷二十一 列傳

三

心惟朕言是用修我邦憲治我菟田輯我國家罔不咸又惟厥忠雖其私親與朕嬪御小有過咎一無比私朝之宿衛者舊無不嚴畏故皇考錄其勳勞命爲札魯忽赤治藩邸所受民布昭大公以辨獄慎民爰作朕股肱耳目眾無諱言朕聽以安自時厥後察合台阿哈之孫太宗之裔定宗闕出之子及其民人越有他志賴天之靈時則有克薛傑者以告於朕汝父肅將大旅以遏亂略按赤台等謀是用潰悉就拘執朕取有罪者使辨治之汝父體朕之公其刑其宥克比於法又使治耶速不里獄亦克比於法惟爾脫歡脫爾赤自朕用汝父用法不阿兄弟親姻咸麗於憲今爾不怨曰爾亦有死邪若有慊志人則雖死朕將寵之如生肆朕訓汝爾克明時朕言如是而有福不如是而

有禍惟天惟君能福禍人惟天惟君是敬是畏其克正直爾身貞絜爾行是汝之福能用朕言則不墜汝父之道人亦不能閒汝不用朕言則人將仇汝何汝閒汝怨汝父者必曰汝亦與我夷矣汝則殆哉汝於朕言非慎釋之汝則有咎克慎釋之人將敬汝畏汝無或閒何汝無慢汝怨汝又而母而婦有譏欺巧佞構亂之言慎勿聽之則盡善哉至順四年追封芒哥撒爾克國公子四人長脫歡次脫爾赤次耶先帖木爾次帖木不華脫歡爲萬戶無子脫爾赤子明禮帖木爾累官翰林學士承旨從征乃顏有功帖木不華子伯荅沙幼人宿衛爲寶爾赤歷事成宗武宗仁宗屢官宣徽院使遙授左丞相延祐四年拜中書右丞相英宗時鐵木迭爾執政改授集賢大學士錄軍國重事旋以

元史卷二十一 列傳

三

太宗正札魯忽赤出鎮北方亦以清靜治邊民泰定閒還朝加太保及文宗初倒刺沙構兵上都兵潰伯荅沙奉璽紱來上拜太傅仍爲札魯忽赤至順三年卒伯荅沙清慎寬厚號稱長者值國家極盛身事屢朝歿無以殮人服其廉詔贈太師上柱國追封威平王子三郎其季也期而孤母乞交契氏撫教有法度及長爲太宗正府札魯忽赤能繼其先以上舊史芒哥撒爾傳赤老溫次子納圖爾爲御帳必閣赤繼領衛兵取遠破金屢有功歿於西夏軍中納圖爾生子察刺從太祖征西域以功爲葉里城達魯花赤又事太宗於潛邸立功中原太宗即位錫金符改授隨州軍民達魯花赤察刺生子忽納襲父職移家郟縣世祖至元十三年以管軍萬戶從丞相伯顏伐宋渡江加金虎符宋平屢

任江西湖東道廉訪使追封陳留郡侯諡景桓忽納生子脫鐵木爾延祐泰定間屢以宣武明威將軍鎮明州越州所至褒節孝禮隱逸與賢士大夫琴書觴詠其子孫家邾縣世襲東平等處達魯花赤詳黃潛所撰赤遜都臺公墓志銘以上黃集蓋赤老溫子孫一畱中都一家邾縣雖支庶屯外者不如中都嫡系顯赫而亦能世其家至正間浙西廉訪使月魯不花脫鐵木爾次子也別見忠義傳

論曰博爾忽赤老溫竝列四傑勳冠開國而事不著於史然赤老溫父子保全太祖於孤危博爾忽脫睿宗太宗於患難所謂王功曰勳已當百世祀況平漠北戰金戰西夏援拖雷於河南事功磊磊軒天地乎子孫世衛禁近爲國喬木今可攷者尙七世且芒哥撒爾官札魯忽赤位在二

元史卷二十一 列傳 舌

公之上剛正爲一朝之望其憲宗一詔典雅古質幾於命誥不知何人所撰詔中明言爾高祖赤老溫愷赤及汝曾祖朔阿事我成吉思皇帝無戰不從而舊史兵志翻謂赤老溫絕後以本朝之人紀本朝之事荒謬至此烏乎旗常鐘鼓之赫鐵券丹書之炳果足恃哉

元史卷二十一 終

元史卷二十二

列傳八

開國四先鋒二部長四先鋒曰哲伯日忽必雷日格勒今采補哲伯傳其忽必雷精勒蔑二人事蹟無攷二部長兀魯部赤台芒忽部畏塔爾也

速不台

速不台一作雪不台舊史誤爲二蒙古部兀良罕氏其五世祖闍里彌獵於斡難河上遇敦必乃汗相結納闍里彌生孛忽都眾目爲折里麻漢言有謀略人也三世孫合赤溫四世孫哈班生二子長忽魯渾次速不台俱驍勇善騎射事太祖同飲班朱尼河水舊史雪不台傳太祖初建國哈班驅羣羊入貢遇盜見執二子隨至刺盜殺之眾潰遁哈班遂以羊達行在由是父子兄弟以義勇稱忽魯渾以百夫長從征乃蠻部戰長城南射卻其先鋒敗諸闕赤檀

元史卷二十二 列傳 一

山速不台以質子襲父職太祖七年攻金桓州先登下其城初帝已破蔑里吉部而其子率眾走西域其地在葱嶺以西險遠難取十一年帝會諸將於土兀刺河之黑林問計速不台請行乃選裨將阿里出領百人先行覘其虛實佯若挈家逃者蔑里吉不爲備十四年速不台軍至蟾河一戰禽其二將盡降其眾又追其部主霍都於欽察之玉峪敗之遂有其地十七年扈從征回回國其主蔑里汗委國而去速不台與哲伯追及於輝里河哲伯戰不利速不台駐軍河東命人熱三炬以張軍勢其王夜遁復命統兵萬人由不罕川必里罕城追之凡所經歷皆無水之地既度川先發游騎千繼以大軍晝夜兼行比至則蔑里汗已逃入海不月餘病死盡獲其帑藏以獻帝曰速不台枕干

血戰奏功萬里勞莫大焉選大珠銀罌賜之十八年速不台進討欽察遂引兵繞寬田吉思海展轉至大和嶺鑿石開道出其不意遇其酋長玉里吉及塔哈爾軍於布租河縱兵奮擊潰其眾獲玉里吉之子於林間餘眾悉降遂收其境又至阿里吉河敗斡羅思部略阿速部而還又奏以蔑里吉部乃滿部怯烈部及杭斤欽察諸部千戶通立一軍十九年略耶迷里霍只部獻馬萬匹二十年從征西夏度大磧攻下撒里畏吾特勒赤閏等部及德順鎮戎蘭會洮河諸州獻馬五千匹二十二年聞太祖崩乃還太宗立使尙公主履攻潼關失利帝責之皇弟拖雷言兵家勝負不常請再令立功遂引兵從太弟營太宗三年大舉伐金渡河而南拖雷將兵渡漢水而北金將完顏合達帥步騎

元史卷二十二 列傳

二

數十萬待戰速不台從皇弟軍至牛頭關謀曰城居之人不耐勞苦數挑戰以勞之則可勝也乃以精騎數千尾金師之後更番迭戰師集鈞州三峯山金兵圍之數日將士頗懼會風雪大作金卒僵仆我師乘之斬殪殆盡河南諸州以次降金軍不能復振四年夏皇弟還軍官山雷速不台統諸道兵圍攻汴五年金主渡河北走衛州復南走歸德又走蔡州是秋汴降俘其后妃及寶器以獻冬圍蔡州六年春蔡州破金亡速不台以汴梁受兵日久歲饑縱其民北渡河就食七年太宗命諸王拔都再征欽察時欽察別推其族豪巴赤蠻爲主帝曰聞巴赤蠻有膽勇非速不台不可勝之遂命爲先鋒與巴赤蠻戰而大軍繼進虜之於寬田吉思海十三年從諸王拔都等討兀魯思部即斡

羅思也自太祖班師後其國亦別推族豪耶烈班爲主諸王拔都爲其所敗圍徒里思哥城不克速不台選精銳五十人赴拔都軍一戰獲耶烈班三日克徒里思哥城盡取兀魯思所部而還進攻馬札部五道分進咸以敵軍勢盛未可輕進速不台計誘其軍至潮密河諸王軍以上流水淺馬可涉且有橋下流水深速不台結棧下流潛渡繞出敵後未渡時諸王先涉河與戰軍士爭橋反爲所乘亡驍將銳士既而速不台軍渡馳至馬茶城諸王亦至遂拔之而還諸王來會拔都曰潮密河戰時速不台救遲速不台曰諸王惟知上流水淺且有橋遂渡而與戰不知此敵所必爭又不俟我下流結棧成而竝進此所以失計也是時北庭西域河南北關隴皆底定速不台功力居多初太祖

元史卷二十二 列傳

三

征西夏聞其久於行間救還省親速不台曰君勞臣佚情所未安帝壯而聽之又金帥台達見獲不屈將死猶問速不台安在請一識之速不台出謂曰汝須與人耳識我何爲曰人臣各爲其主卿蓋天生英豪吾得一見死瞑目矣太宗崩後逾年諸王大會拔都欲不往速不台曰大王於族屬最長安得不往甲辰遂會於耶只里河立定宗還家土刺河上卒年七十三贈上柱國追封河南王諡忠定子兀良合台征大理交趾有功別有傳

哲伯 易思麥里 布智爾

哲伯泰赤烏部人與太祖戰射中太祖頸創甚侍臣吮去壅血灌以湏乳始蘇翼日赤老溫之父以哲伯來降帝將殺之哲伯曰汗欲快射鉤之憾於匹夫邪抑將用壯士以

取天下邪吾誠得英雄主事之者高厓可以摧裂深水可
以橫行太祖釋然曰汝之射我忠汝主也吾方經營天下
肯伏壯士哉赦使從征奪回太祖幼子拖雷於塔爾伏部
之手自是日見親信攻乃滿攻西夏戰輒冠軍遂與忽必
雷速不台緒勒蔑號四先鋒而哲伯用兵尤出沒不測太
祖五年金築烏沙堡以逼我帝命哲伯襲殺其眾遂略地
而東六年大軍攻金哲伯請以金降臣耶律阿海為鄉道
金嚴兵居庸關哲伯回軍誘戰金兵來追襲哲伯伏兵山
後回擊大敗之大軍繼至盡破契丹女真之眾遂奪居庸
七年太祖留攻西京各城別遣哲伯攻東京不下佯解圍
班師行六日遣人往諭而潛師隨其後每人兼馬晝夜倍
道回襲東京克之八年復伐金攻居庸北口不克帝乃命

元史卷二十二 列傳

四

哲伯同速不台自關左閒道攻居庸南口破之出北口與
大軍會十四年太祖征西域命哲伯前驅速不台繼之脫
忽察爾又繼之令直踰葱嶺趨王城待大軍至夾攻前後
以上本元秘史哲伯渡乞則里巴海劉郁西使記過龍骨河復西
有河西注滙為海約千有餘里與別什八里南北相直
日乞則里巴海云當在伊犁攻鐵山衣幟與敵軍不相
辨乃焚蒿為號烟焰漫野敵軍動乘之斬首三萬級踰雪
嶺西北見郭寶遂以西遼降將曷思麥里為先鋒鄉道大
軍攻斬其酋屈出律即乃滿太陽汗之子奔西遼纂立者
也持其首東徇各部若可什哈爾城押爾牽城幹端城尼
沙布爾城皆望風降附既而帝親軍至尋思千城哲伯敗
回回主札刺丁於月戀戀舊語作赤心二字月戀揭赤之
揭赤即玉龍傑赤之譯音揭赤之
地追襲之又連敗諸阿刺黑城於圖馬溫山於慈顏城札

刺丁走欽察國海中盡下各城收其珍寶而還帝命疾馳
進討欽察哲伯乃遣軍分招旁近各城悉下惟塔爾只部
阿速部以兵拒戰皆破之進擊幹羅思於鐵爾山獲其國
主密吉思臘獻諸朮赤太子誅之尋征欽察別部康里國
敗其主霍脫思汗之軍進平欽察橫行數萬里疾如飄風
威震西海與速不台相等師還哲伯卒於軍時帝方征河
西親勞軍於阿刺思受所獲西域各國珍寶及七寶繳願
羣臣曰惜哲伯不及飲凱還酒也太宗八年以平金後中
原諸州民戶分賜諸勳戚哲伯子孫於東平府戶內撥賜
子孫官爵無效與哲伯同列先鋒者尙有忽必雷緒勒蔑
二人戰功亦不見於史哲伯裨將從征有功者一曰曷思
麥里西遼谷則部人短小精悍仕西遼為闊爾罕近侍主

元史卷二十二 列傳

五

谷則行帳為可散城長官會西遼為乃滿太陽汗子屈出
律所篡各部不服大將哲伯奉太祖命西征曷思麥里以
可散城迎降請為鄉道哲伯知其可用奏為先鋒曷思麥
里習西域形勢大軍無留行及平西遼康里阿速幹羅思
欽察諸國班師哲伯已卒曷思麥里見太祖於河西太祖
曰哲伯嘗稱汝軀幹小而聲聞甚大命以所進金寶隨其
力所勝悉賜之授必闡赤常侍左右領所招士卒從征河
西又從太宗征金領懷孟奧魯事授懷州達魯花赤佩金
符敗金兵於懷州降金總帥范真軍民萬餘十一年六月
帝以其從軍西域宣力有年命二子分襲其職而令曷思
麥里以札魯忽赤歸老西域大帥察罕行省帖木迭爾奏
雷之帝允其請庚子進河北河南二十八處都達魯花赤

乙卯五月卒次子密里吉復為懷孟達魯花赤中統二年

從攻淮西與宋戰死以上見舊史本傳今分其前半一曰

布智爾蒙古脫脫里台氏父紐爾傑身長八尺有力善騎

射善造弓失道逢太祖前鋒哲伯舊史作別那顏蓋哲伯

也邀與俱見太祖視其所挾弓矢甚良詢知自造適有雙

兔翔於前一射獲之并以二矢獻哲伯隨至其帳奇其子

布智爾之貌許妻以女遂父子俱事太祖嘗從征討賜號

拔都從征回回斡羅思等國布智爾輒陷陳身中數矢流

血滿體悶仆幾絕太祖命剗牛腹納布智爾浸熱血中逾

時乃甦憲宗時為太都行天下諸路耶可札魯忽赤賜蔚

州定安為食邑子四人長好禮從征宋督水軍攻襄樊渡

江入臨安以功授水軍翼萬戶府達魯花赤舊史哲伯無傳散見本紀

元史卷二十二列傳六

及列傳中或作柘柏或作闕別或作鷓博或作緒字或作
述別或作柘必那顏或作折不那演或作折那顏舊史不
知其為一人遂至無傳今刺取舊史各傳及元祕史並以
其部下裨將葛思麥里布智爾二傳附之蓋哲伯其本名
那演則其號猶之曰的斤
日海牙曰拔都之類也

兀赤台

兀赤台兀魯氏其先世刺真拔都以材武雄諸部生子曰

兀魯曰芒忽與札刺爾弘吉刺亦乞列思等五人當開册

之先戰功取著太祖命其子孫各以名為氏號五投下朔

方既定舉六十五人為千夫長兀魯之孫曰兀赤台其一

也兀赤台有膽略善騎射勇冠一時初克烈部王罕之子

射殺鮮昆遂并有克烈之地乃滿部蔑爾吉部謀合兵來

侵諸部多陰附之者不虞太祖領兵猝至諸部潰去乘勝

敗之兀赤台俘其帥札哈堅普與盟而歸之未幾復叛兀

赤台以計襲殺札哈堅普遂平其國兀赤台從太祖起兵

歷平漠北長驅西域歷班真海子閒關萬里與哲伯速不

台皆為先鋒每戰必冠軍太祖即位幹難河大封功臣謂

曰爾統勁旅破王罕父子之軍朕恃汝如高山遮護可世

統兀魯部四千戶世世無替並賜以王罕姪女之為太祖

夫人者子徹台材武過人自太宗及世祖歷事四朝以勞

封德清郡王賜金印丙申賜德州戶二萬為食邑至元十

八年增食邑二萬一千戶肇慶路連州德州泊屬邑俱隸

焉徹台卒子端真襲爵為郡王太宗時與亦刺哈台戰勝

帝即以亦刺哈妻賜之世祖之征阿里不哥也徹台子哈

畏答爾

王徹徹都討只爾火台獲之又嘗破失烈吉要木忽爾之

兵而脫歡弟慶童亦從征乃顏力戰徹台子二孫三曾孫

二玄孫一此九人皆世郡王封

元史卷二十二列傳七

畏答爾芒忽部人與兀魯部同出刺真拔都拔都有二子
一名兀魯一名芒忽爾始兀魯氏芒忽氏皆隸秦赤烏後
歸太祖二部兵皆善戰其旗纛一花一黑雖攬殺萬眾中
不亂名聞諸部太祖以畏答爾兄尙留事秦赤烏疑畏答
爾貳心畏答爾折矢自誓曰所不終事主者有如此矢太
祖察其誠更名薛禪按達薛禪言聰明按達言至交也太
祖與克烈部王罕對陳於哈刺真時敵兵強盛我兵惟兀
魯部芒忽部取銳而芒忽軍少於兀魯一倍帝命兀魯軍
四千先發其將朮赤台橫鞭馬鬣不應時畏答爾率芒忽
一軍奮然曰我猶鑿也諸君斧也鑿非斧不入我請先入
諸軍繼之萬一不還有三黃頭兒在唯上念之遂率所部
千餘先出陷陳大敗之至晡時猶追不已敕使止之乃還

元史卷二十二 列傳 八

腦中流矢創甚帝親傅以善藥留處帳中月餘卒帝深惜
之及王罕滅帝以其將只里吉實抗畏答爾乃分只里吉
實民百戶隸其子且使世世歲賜不絕仍令收完芒忽人
民之散亡者太宗思其功復以北方萬戶封其子芒哥爲
郡王金亡後太宗命忽都虎大料漢民分城邑以封功臣
授芒哥泰安州民萬戶帝訪其少忽都虎曰臣今差次惟
視舊數多寡芒哥舊封纔八百戶帝曰不然畏答爾封戶
雖少戰功則多其增封爲二萬戶與十功臣爲諸侯者同
十功臣者四怯薛四先鋒
及兀魯芒忽二部長也 兀魯部長徹台爭曰芒哥舊兵
不及臣之半今封願多於臣帝曰汝忘而先橫鞭馬鬣時
邪徹台遂不敢言芒哥卒孫六人俱襲封郡王芒哥弟蘸
木島之孫博羅歡別封泰安王平宋及征叛藩立功自有

傳畏答爾傳全本
姚樞神道碑

元史卷二十二 列傳 九

元史卷二十二終

方太祖為合罕時受克烈部

負未卜乃飲班朱尼河水以誓眾舊史或作班朱尼河或

或作黑河或作渾河元凡與飲此水者十有九人謂之飲

渾河功臣言曾共艱難也舊史散見各傳計除四傑四先

鋒外元史述四傑事惟博爾忽今可攷者十五人除博爾

忽及駙馬孛圖及速不台三人各別傳外今此十二人或

專傳或散見子孫傳中為類敘於左

札巴爾舊作札八賽夷人賽夷西域之部長也因以為氏

其官曰火者今日和卓即札巴爾長身美髯方瞳廣額雄

勇善騎射初謁太祖於軍中一見異之太祖與克烈部王

元史卷二十三 列傳

罕有隙一夕王罕父子潛師來襲我軍倉卒大潰太祖引

去從行者僅十九人札巴爾與焉至班朱尼河餼糧俱盡

荒野無所得食會一野馬北來諸王哈撒爾射殪之剗革

為釜出火於石汲河水烹而啖之太祖額手仰天誓曰使

我克定大業倘不與諸人同甘苦者有如河水將士莫不

感泣王罕既滅西域諸部次第平乃遣札巴爾使金周覽

險要歸報太祖遂興師攻金克山後州郡將攻燕都金守

居庸之塞治鐵錮關門布鐵蒺藜百餘里守以精銳我師

距關百里不能前太祖召札巴爾問計對曰從此而北黑

樹林中有閒道可通一騎臣屢嘗過之若勒兵銜枚以出

終夕可至請輕騎前導日暮入谷黎明諸軍已在平地疾

趨南口鉦鼓若自天下金人猶睡未知也比驚起已莫能

支關既破中都大震已而金人遷汴太祖覽中都山川形

勢顧謂左右近臣曰朕得至此者札巴爾力也乃令札巴

爾於城中引弓射之四面隨箭所落地悉以與之乘輿北

歸與諸將畱守中都授黃河以北鐵門以南天下都達魯

花赤賜養老百戶并四王府為居第札巴爾每戰被重甲

舞槊陷陳馳突如飛嘗乘橐駝以戰眾莫能當有巨真人

者有道之士也隱居勞山中太祖聞其名命札巴爾往聘

之巨語札巴爾曰我嘗識公札巴爾曰我亦嘗見真人他

日偶坐問札巴爾曰公欲極一身貴顯乎欲子孫蕃衍乎

札巴爾曰百歲之後富貴何在有子孫以承宗祀足矣巨

元史卷二十三 列傳

曰聞命矣後卒年百一十有八追封涼國公諡武定二子

阿里罕明里察阿里罕早從父出入行陳勇而善謀憲宗

伐蜀為天下質子兵馬都元帥生哈只終湖南宣慰使追

封涼國公諡安惠哈只生陝西行省平章政事養安大府

監丞阿思蘭太僕寺丞補孛養安生太僕寺卿阿巴實明

里察追封涼國公諡康懿生戶部尚書亦不刺金陝西行

省參知政事哈刺

鎮海者怯烈台氏初以軍伍長從太祖同飲班朱尼河水

賜珍珠旗佩金虎符為闡里必從征塔塔爾欽察西夏西

契丹女真河西諸國所俘生口萬計命屯田於阿魯歡立

鎮海城戍守之壬申從太祖略定漠南地師次隆興與金

將忽察虎戰矢中臆間裹瘡復出戰者數四軍聲為大振

既破燕太祖命於城中環射四矢凡矢所至圍池邸舍悉

以賜之尋拜中書右丞相己丑太宗即位扈從至西京攻

河中河南鈞州癸巳攻蔡州以功賜恩州千戶先是收天下童男童女及工匠置局弘州既而得西域織金綺紋工三百餘戶及汴京織毛褐工三百戶皆分隸弘州命鎮海世掌焉定宗即位以鎮海為先朝舊臣仍拜中書右丞相卒年八十四子十人勃古思從世祖征花馬大理有功累官終保定路達魯花赤

耶律阿海遼之故族也父祖皆仕金阿海善騎射通諸國語金季選使王罕見太祖姿貌異常陰歸心焉明年復出使與弟圖花俱往遂以圖花為質直宿衛阿海參預機謀出入戰陳常在左右歲壬戌王罕叛盟謀襲太祖時與飲辨屯河水既敗王罕金人訝其使久不還拘家屬於瀛阿海殊不介意攻戰愈厲帝聞之妻以貴臣之女給戶俾食

元史卷二十三 列傳

三

其賦癸亥冬進攻西夏諸國累有功丙寅帝建龍旗即大位敕左帥哲伯略地漠南以阿海為先鋒辛未破烏沙堡鏖戰宣平大捷滄河遂出居庸耀兵燕北癸酉拔宣德德興乘勝次居庸北口哲伯攻下紫荆關阿海奏曰好生聖人之大德與朔之始願止殺掠以應天心帝嘉納之遂分兵略燕南山東諸郡還駐燕之近郊金主懼請和帝諭其使令歸阿海妻子即送來歸師還出塞甲戌金人走汴阿海以功拜太師行中書省事命圖花從木華黎取中原阿海從帝攻西域俘其酋長只闌圖下蒲華等城畱監尋斯千城卒於軍年七十三至元十年追封忠武公子孫皆貴顯有戰功

懷都者蒙古怯烈氏世傳李唐外族事太祖嘗從飲班尤

尼河水戰功爵位無攷子速哥以質直謀勇受太宗知命使金覘虛實語之曰即不還子孫無憂不富貴也速哥頓首曰臣死職耳奉陛下威命以行可無慮帝悅賜所常御馬至河金人閉之舟中七日始登南岸又三旬乃達汴及見金主謂曰天子念爾土地日狹民力日疲故遣我致命爾能共修歲幣通好不絕則可轉禍為福謁者令下拜速哥曰我大國使為爾屈乎金主壯之取金卮飲之酒曰歸語汝主必欲加兵敢率精銳以相周旋歲幣非所聞也速哥飲畢即懷金卮以出默識其地理隄塞城郭人民之強弱既復命備以虛實告且以所懷金卮獻帝喜曰我得金於汝手中矣復以賜之始下令徵兵南伐兵至河北岸方舟欲渡金軍陳於河南帝令儀衛導速哥居中行親率偏

元史卷二十三 列傳

四

師乘陳西策馬涉河會睿宗軍亦由襄鄧至兩軍夾攻之及金亡詔賜金護駕士五人曰此以旌汝不辱使命也前使過崞州崞人盜殺其良馬至是兼以崞民賜之歲乙未帝將官速哥令西域中原聽自擇之速哥再拜以中原請帝曰西山之境八達嶺以北汝其主之汝於城中構大樓居其上使人皆仰望汝汝俯而諭之願不偉乎乃以為山西大達魯花赤受命方出有回回六人訟事不實將抵罪遇諸塗急止監者緩其刑復入奏曰此六人者名著西域徒以小罪盡誅之恐非所以懷遠願以賜臣臣得抑辱之使自悔悟遷善為他日用帝意釋召至雲中皆釋之後有至大官者卒年六十二追封宣寧王諡忠襄子六人前子皆從兀魯赤大王出征次四子忽蘭之母以后戚故得

襲職前賜崑州戶籍已抄入官更賜山西三百戶卒贈雲國公諡康忠子天德于思襲爵卒贈太傅諡顯毅舊史據其

子速哥傳今以飲渾河功臣為主故以子附文

雪裏堅那顏者徹兀台氏從太祖與王罕戰同飲班真河水以功授千戶領徹里台部征討諸國卒於河西子麥吉

從太宗定中原孫麥里從皇子貴由平欽察阿速斡魯思

諸國從憲宗伐宋有功世祖即位擊叛王霍忽於河西一

月八戰奪其所掠諸部民以還弟桑忽答戰死於陳詔遣

使者以銀鈔羊馬迎致麥里賜號答刺罕舊史雪裏堅那

傳今以飲渾河功臣為主故以孫附祖

塔海舊史連拔者遜都思部人驍勇善戰從太祖同飲黑河

水以功爲千戶子卜花襲職卒孫阿塔海從太帥兀良合

台征雲南師還事世祖於潛邸至元九年命馳驛督諸軍

攻襄陽築正陽東西城敗宋將夏貴舟師復渡江與丞相

伯顏軍合克池州次建康下鎮江敗宋揚州守將李庭芝

之師與宋將張世傑孫虎臣戰江中焦山下十五年召赴

闕拜行中書省左丞相移治臨安二十年遷征東行省丞

相征日本遇風舟壞喪師十七八二十四年扈從征乃顏

二十六年卒年五十六追封順昌郡王諡武敏子阿里麻

累官南臺御史大夫舊史塔海在其孫阿塔海傳今以飲渾河功臣為主故以孫附祖

忽魯渾者兀里養哈台氏其先祖折里麻生合赤溫合赤

溫生哈班哈班子二人曰忽魯渾曰速不台俱以驍勇善

射事太祖父子兄弟三人與飲班朮尼河之水速不台別

有傳哈班遇盜槍將及爲忽魯渾反鋒所刺人馬俱踏又

嘗從太祖拒乃滿追兵於長城之南忽魯渾射卻其渠帥

餘眾夜自驚潰中原既定方論功行賞不及祿而卒忽魯

渾生子哈丹爲太宗正府耶可札魯忽赤哈丹生子耶速

台至元十一年隨其從兄阿朮伐宋濟江薄揚州無戰不

在行間屢轉至淮東道宣慰使奉省檄馳報邊事入對便

殿出奏牘於懷上召近臣進讀而左右適無通漢文者耶

速台拜請自誦其文而釋以譯語音吐明暢辭旨精工上

悅令縱橫行殿上而默察之知爲偉器諭宰臣俾與共政

遂以參議中書省事明年丞相安童秉政亦奏言耶速台

兼通蒙漢語言文字可大用即日命爲中書參政二十四

年拜尚書平章政事從征乃顏給餉運籌復與諸將畱兵

討其餘黨金家奴塔不台悉勘定乃還二十七年武平地

大震姦人乘災異相煽搖藩王多爲乃顏所惑耶速台奉

命引兵五百人往撫定之禱山川調租弛稅發鈔振米斬

乘時爲盜者收三藩王鞫之始皆屈強徐諭以禍福乃皆

伏奏徙遼陽行省驛道由高州以北至上都減去五驛既

還政府列上丞相桑葛罪狀與侍從近臣會斥其姦桑葛

及同惡皆誅死益爲上所親信成宗時拜江浙行省平章

卒黃潛碑其神道

阿朮魯幹魯納台氏與太祖同飲黑河水屢從征討賜銀

印總大軍伐遼東女真諸部復帥師討西夏大戰於合刺

合察禽夏主太祖命盡賜以夏主遺物繼總軍南伐金拔

信安下宿泗等州年老子不花襲職不花卒子幼以兄子

懷都繼領其職從討李璫圍濟南從征襄陽渡漢江破宋

水軍斬千餘級從張弘範徇溫州福建屢有功舊史阿朮懷都傳又重出阿朮魯傳今并入以飲渾河功臣為主而以孫附祖

耶律圖花者契丹人世居桓州太祖時率眾來歸大軍入金境為鄉道獲所牧馬甚眾後從太祖同飲班朮河水從伐金大破忽察虎軍又從木華黎收山東河北有功封濮國公賜虎符銀印統萬戶札刺爾劉疑史天澤伐金卒於西和州子孫從征蜀征南蠻緬交趾有戰功此皆舊史所載渾河同誓功臣見於列傳者又有哈散納者怯烈氏太祖時從征王罕誓渾河後從征西域下薛迷思干不花刺等城至太宗時仍命領阿爾渾軍回回人匠三千戶駐尋麻林時授平陽大原兩路達魯花赤兼管諸色人匠子孫世襲千戶又有紹古爾者麥里吉台氏扈從太祖親征誓

元史卷二十三 列傳 七

渾河已而從破信安略地河西復從太宗伐金破河南孫忽都虎於世祖時從攻鄂從征李璫復奉詔征占城又從征交趾皆有功

論曰誓飲渾河十九功臣未必盡雲蒸龍變之材也而渾沱河麥飯蕪羹亭豆粥固勝前代烏盡功藏者萬萬今可攷者十五人尙缺四人殆四傑四先鋒之徒歟外此尙有太祖武臣無赫赫之功不在盟府之列而攀鱗附翼舊史專傳者今附其姓名於後曰鈔兀爾者召烈台氏先泄札木合之謀於太祖及戰勝賜荅刺罕號子孫世襲耶可札魯花赤曰鈔爾者別速氏從太祖收服諸國有功子孫從征金征宋征大理諸國凡四世皆歿於陳曰鈔思者又號荅祿乃滿部太陽汗之曾孫屈出律之孫也國破後幼歸

太祖長從征伐從太宗睿宗伐金先登陷陳授萬戶子別的因善騎射事世祖以政績顯其孫及曾孫遂讀書登進士科曰阿刺瓦思者回鶻人率部曲降於太祖從征瀚海輪臺高昌于闐尋斯千各部靡戰不克歿於軍其曾孫布伯原作以騎射被寵過於成宗武宗仁宗前後賜楮幣餘四十萬緡他物稱是故曰亡國之英豪不若興王之卒伍雖有良舟不如駛流信矣哉

元史卷二十三 列傳 八

元史卷二十三 終

元史卷二十四

列傳十

開國武臣

察罕益德

亦力撒合 立智理威

察罕初名益德西夏人唐兀烏密氏父曲耶怯律仕夏其妾生察罕不容於嫡母以配掌羊羣者察罕稍長其母以告且曰嫡母已有弟矣可聽汝所之察罕豪武過人幼牧羊於野植杖於地置帽杖端跪拜歌舞太祖出獵見而問之察罕對曰獨行則帽尊二人行則年長者尊今獨行故致敬於帽且聞有大官至先習禮儀耳帝異之乃挈以歸屬光獻皇后養之命給事內廷及長賜姓蒙古妻以宮人引吉刺氏嘗行困脫鞵藉草而寢鴉鳴其旁心惡之擲鞵擊之蛇墜鞵中歸以其事聞帝曰是禽人所惡者在爾則

元史卷二十四 列傳

為喜神宜戒子孫勿害其類從帝略雲中桑乾金將定辭擁重兵守野狐嶺帝遣察罕覘虛實還言彼馬足輕動不足畏也帝命鼓行而前遂破其軍圍白樓七日拔之以功為御帳前首千戶從帝征西域寧哈里城辭迷思干城回回國主札刺丁拒守鐵門關兵不得進察罕先驅開道斬其將餘眾悉降又從攻西夏破肅州師次甘州察罕父曲耶怯律居守城中察罕射書招之且求見其弟時弟年十三命登城於高處見之且遣使諭城中使早降其副阿綽等三十六人合謀殺曲耶怯律父子并殺使者併力拒守城破帝欲盡坑之察罕言百姓無辜止罪三十六人進攻靈州夏人以十萬眾赴援帝親戰敗之還次六盤夏主堅守中興帝遣察罕入城諭以禍福眾方議降會帝崩諸將

禽夏主殺之復議屠中興察罕力諫止之馳入安集遺民太宗即位從略河南北還清水蒼蘭蒼巴之地賜馬三百珠衣金帶鞍勒皇子闕出伐宋命察罕為斥候又從親王叩溫不花南伐歲乙未克棗陽及光化軍未幾召叩溫不花赴行在以全軍付察罕丁酉復與叩溫不花進克光州戊戌授馬步軍都元帥率諸翼軍攻拔天長縣及滁壽泗等州定宗即位命拓江淮地憲宗即位召見以都元帥兼領尚書省事賜汴梁歸德河南懷孟曹濮太原三千餘戶為食邑及諸處草地合萬四千五百餘頃戶二萬餘乙卯卒封河南王諡武宣子十人長木花里事憲宗直宿衛從攻釣魚山有功世祖至元四年攻宋自江陵略地回至安陽灘敗宋兵救都元帥阿朮于墜馬危急之時賜金虎符

元史卷二十四 列傳

為蒙古軍萬戶復攻襄樊卒于軍追封梁國公諡武毅亦力撒合察罕從孫也至元十年擢貴族子備宿衛召亦力撒合至闕下以為速古爾赤掌服御事甚見親幸時訪以政事稱曰秀才而不名嘗奉使河西還奏諸王只必帖木爾用官太濫擢河東按察使逐平陽路達魯花赤之貪墨者召還賜黃金百兩銀五百兩以旌其直進南臺中丞帝出內中寶刀賜之曰以鎮外臺時丞相阿合馬之子忽辛為江浙行省平章恃勢貪穢亦力撒合發其姦得贓鈔八十一萬錠奏誅之并劾江淮釋教總攝楊璉真珣諸不法事諸道竦動二十一年改北京宣慰使察諸王乃顏有異志密請備之二十三年罷宣慰司立遼陽行省以為參政已而乃顏果反帝自將征之掌運糧儲軍供無乏二十

七年命尚諸王筭吉女親為資裝遣之改四川行省左丞

成宗元貞元年卒弟立智理威

立智理威為太子真金東宮必閣赤掌文書至元十八年

蜀初定帝閱其地久受兵百姓傷殘以立智理威為嘉定

路達魯花赤以闡田均賦弭盜息訟諸事課守令會盜起

雲南號數十萬聲寇成都立智理威馳入告急言辭懇切

繼以泣涕大臣疑其不然帝曰雲南朕所經理未可忽也

乃推食賜之又語之曰南人生長亂離豈不厭兵畏禍邪

御之乖方故為亂耳歸告諸將叛則討之服則撫之母多

殺以傷生意立智理威至蜀宣布德意民果安之後遷刑

部尚書有小吏誣告漕臣劉獻盜倉粟宰相桑葛方事聚

斂鍛煉柱服立智理威曰刑部天下持平今輦轂之下漕

臣以冤死何以正四方即以實聞以是忤丞相出為江東

道宣慰使為政嚴明豪民猾吏縮手不敢犯然亦無所刑

戮而治元貞二年遷四川行省參政屢平反冤獄大德三

年以參知政事宣慰荆湖荆湖公田病民為甚部內實無

田隨民所輸租取之戶無大小皆出公田租雖水旱不免

立智理威問民所不便十數事上於朝而言公田尤切朝

議遣使理之旋詔凡官無公田者始隨奉給之民力少蘇

七年再遷四川行省參政八年進左丞雲南王入朝所在

以驛騎縱獵立智理威曰驛騎所以傳命令事非有急且

不得馳況獵乎王憚為之止獵蜀人饑親勸分以振之買

地給葬且修寬政部內以治十年改湖廣行省左丞湖廣

歲織幣上供以省臣領工作遣使買絲他郡多為奸利工

元史卷二十四 列傳 三

官又為刻剝故匠戶日貧造幣益惡立智理威不遣使令

工視賈人有藏絲者擇買之工不告病歲省費數萬貫他

郡推用之皆便至大三年卒年五十有七諡忠惠封秦國

公子二人長買訥翰林學士承旨次韓嘉訥御史大夫孫

達理麻內府宰相

郭寶玉 子德海 孫侃

太祖征西域之功以郭寶玉父子為取盛唐中書令子儀

之裔也世居華州鄭縣寶玉通天文兵法善騎射金末封

汾陽郡公兼猛安引軍屯定州歲庚午童謠曰搖搖器器

至河南拜闕氏既而太白經天寶玉嘆曰北軍南汴梁即

降天改姓矣金人以獨吉思忠僕散揆行中書省領兵築

烏沙堡會太師木華黎軍忽至敗其兵三十餘萬思忠等

走寶玉舉軍降木華黎引見太祖問取中原取西域孰先

寶玉對曰中原勢大不易取西域諸蕃士馬勇悍可先取

之藉以圖金又言建國之初宜頒新令於是命頒條畫五

章如出軍不得妄殺刑獄惟重罪處死其餘雜犯量情笞

決軍戶蒙古色目人每丁起一卒漢人有田四頃人三丁

者僉一卒年十五以上成丁六十破老站戶與軍戶同民

匠限地一頃僧道無益於國有損於民者悉禁止之類皆

寶玉所陳也帝將伐西域患其城多依山險問寶玉攻取

之策對曰使其城在天上則不可取如不在天上至即取

矣帝壯之授抄馬都鎮撫癸酉從木華黎取永清破高州

降北京龍山復帥抄馬從錦州出燕南破太原平陽諸州

縣甲戌從帝討契丹遺族歷古徐鬼國訛夷朵等城破其

元史卷二十四 列傳 四

兵三十餘萬寶玉留中流矢帝命剖牛腹置其中少頃乃蘇尋復戰收別什巴里別什蘭等城次忽章河西人列兩陳迎拒戰方酣寶玉望其眾疾呼曰西陳走矣其兵果走追殺幾盡進兵下尋思千城次暗木河敵築十餘壘陳船河中俄風濤暴起寶玉令發火箭射其船一時延燒乘勝直前破護岸兵五萬斬其大將佐里遂屠諸壘收馬里四城辛巳西域可弗義國唯算端罕者乘大軍之歸襲破西契丹故國據尋思千城聞帝將至棄城南走入鐵門屯大雪山寶玉追之遂奔印度帝駐大雪山前寶玉請封山川神後從哲伯速不台二先鋒收契丹渤海等諸國有功累遷斷事官卒於賀蘭山子德海

德海資貌奇偉亦通天文兵法金末爲謀克擊宋將彭義

元史卷二十四 列傳

五

斌於山東敗之知父寶玉北降遁入太行山大軍至乃出降爲抄馬彈壓從先鋒哲伯西征渡乞則里八海攻鐵山衣幟與敵軍不相辨乃焚蒿爲號煙焰漫野敵軍動乘之斬首三萬級踰雪嶺西北萬里進軍次荅里國悉平之乙酉還至崢山吐蕃帥尼倫回紇帥阿必丁反復破斬之戊子春皇子拖雷監國從元帥闊闢出游騎入關中金人閉關拒守德海引驍騎五百斬關入殺守者三百人直擣凌風渡寨後兵不至引還太宗元年己丑破南山八十三寨陝西平德海導大將魁玉那假道漢中歷荆襄而東與金將武僊軍十萬遇於白河德海提孤軍轉戰僊敗走斬首二萬餘級復破金伊刺粘哥軍於鄧冬十一月至鈞州辛卯春正月皇弟拖雷軍由洛陽來會於三峯山金人掘塹

圍我軍皇弟令軍中祈雪又灼羊骨卜得吉兆夜大雪深三尺敵軍僵立刀架凍不能舉我軍衝圍出塹金兵死者三十餘萬其帥完顏合達伊刺蒲阿走匿浮圖上德海命掘浮圖基出其柱而焚之完顏斜烈單騎遁還洛陽又破金將合喜兵於中牟完顏斜烈復帥軍十萬來拒戰於鄭先登破之殺其都尉左崇以功遷右監軍壬辰正月破金兵黃龍岡明年取申唐二州河南復叛德海往討之礮傷其足歸卒德海通知政事先是太宗詔大臣忽都虎等試天下僧尼道士選精通經文者千人有能工藝者則命小通事合住等領之餘皆爲民又詔天下置學廩育人材立科目選之入仕皆從德海之請也子侃

侃字仲和幼爲丞相史天澤所器重留於家而教養之弱

元史卷二十四 列傳

六

冠爲百戶鷲勇有謀壬辰金將白撒復取衛州侃拒之破其兵四萬於新衛州遂渡河襲金主至歸德敗其兵於闕伯臺卽從速不台攻汴西門金元帥崔立降以功授總把從天澤屯太康復以下德安功爲千戶壬子送兵仗至和林改抄馬那顏初太祖征葱嶺以西各國惟北方阿速阿羅思欽察入版圖其西南五印度國隔以雪山太祖惟至北印度遇角端班師未遑南也及金國平定憲宗初始命皇弟旭烈大王西征五印度而侃副之癸丑至木乃奚國敵塹道置毒水中侃破其兵五萬下一百二十八城斬其將忽都荅爾及兀朱算端有乞都卜城在檜寒山上懸梯上下守以精兵矢石莫及六年丙辰築夾城圍之莫能克侃架礮攻之守將開門降侃遣往說兀魯算端來降其父

阿力據西城侃攻破之走據東城復攻破殺之丁巳正月
至兀里城伏兵下令聞鉦聲則起敵兵果來伏發盡殺之
海牙算端降又西至阿刺汀城即唐時黑衣大食國破其
游兵三萬禡抄若算端降至北印度乞石彌部忽里算端
降又西至報達國即唐白衣大食國漢之安息國也地方
八千里父子相傳四十二世勝兵數十萬侃兵至破其兵
七萬屠西城又破其東城兩城間有大河侃預造浮梁以
防其遁城破合里法算端登舟觀河有浮梁掘之乃自縛
詣軍門降其將紆若爾遁去侃追之至暮諸軍欲頓舍侃
相地勢不聽又行十餘里乃止夜暴雨先所欲舍處水深
數尺明日獲紆若爾斬之拔三百餘城又西行三千里至
天方國即漢之條支國也其將住石致書請降諸將大喜

元史二十四列傳 七

侃曰受降如受敵倘誤中彼計險莫大焉嚴備以待住石
果設伏邀襲侃大破之巴爾算端降下其城百八十有五
又西行四千里至密昔爾國即唐之拂林國也既偏敵止
營夜忽拔隊銜枚西行十餘里而留空帳帳於故地敵昏
夜潛師來襲僅得空營殺數病卒可乃算端大驚曰東天
將軍神人也遂降戊午旭烈命侃西渡海收富浪國侃喻
以禍福兀都算端見侃驚曰吾昨所夢神人乃將軍也即
來降以上皆西印度境師還西南至石羅子國敵人來拒侃直出
掠陳一鼓敗之換斯干阿若畢算端降至賓鐵國侃以奇
兵掩擊大敗之加葉算端降己未破兀林游兵四萬阿必
丁算端大懼來降得城百有二十西南至乞里彎國忽都
馬丁算端來降以上皆中印度境西域平侃以捷告至四川御營

會憲宗崩乃還鄧開屯田立保障世祖即位侃疏請建國
號築都城立省臺興學校等二十五事及平宋之策其略
曰宋據東南以吳越為家其要地則荆襄而已今日之計
當先取襄陽既克襄陽置彼揚廬諸城勿顧直趨臨安疾
雷不及掩耳則江淮巴蜀不攻自平後皆如其策中統二
年擢江漢大都督府理問官三年二月益都李壇及徐州
總管李杲哥俱反宋夏貴復來犯邊史天澤薦侃召入見
世祖問計所出曰羣盜竊發猶柙中虎內無資糧外無救
援築城環之坐待其困計日可禽也帝然之賜尚衣弓矢
馳至徐斬杲哥夏貴焚廬舍徙軍民南遁侃追貴過宿遷
縣奪軍民萬餘而還賜金符為徐邳二州總管杲哥之弟
盧馬復與夏貴以兵三萬來寇邊侃破斬千餘級奪戰艦

元史卷二十四列傳 八

二百至元二年有言當解藩鎮兵權者天澤遂遷他官侃
亦調知滕州三年侃上言宋人羈留我使空輿師問罪淮
北可立屯田三百六十所每屯置牛三百六十具計一屯
所出足供軍旅一月之需帝以侃習於軍務擢為萬戶從
軍下襄陽由陽邏上流渡江江南平遷知寧海州居一年
卒侃行軍有紀律野糞露宿雖風雨不入民舍所至興學
課農吏民畏服焉

野里尤 昔里吉思

野里尤高昌人世居五城後徙京師父達釋有謀略為國
人所信服太祖西征高昌國主懼以錦衣白貂帽召達釋
謀之達釋知天命有歸勸其主亦都護執贄稱臣以安其
國由是號為尚書太祖班師諸王言於帝曰達釋之子野

里朮驍勇善戰所將部落又強大聞其人每思勦順而未
有機便盍致之乎太祖是其議即詔給驛馬五百迎與俱
來既見甚器重之己卯太祖西征回紇野里朮別從親王
按只台戰敵有功甚見親遇王方以絳蓋障日而坐及聞
野里朮議事稱善久之既退徹其蓋送之十里遂得兼長
四環衛之必闔赤壬辰從討金戰功稱取甲午副忽都虎
籍漢戶口籌其賦役分諸功臣以地人服其敏野里朮長
子鐵哥朮沈鷲有才漠北嘗有擁兵叛者鐵哥朮率族人
與戰於魚兒濼時軍興簿檄繁急鐵哥朮一以其國書即
兀識之無遺失者帝甚嘉焉至元中擢為棣州達魯花赤
遷德安府達魯花赤適土人禁知府者以眾叛鐵哥朮率
眾先登冒矢石身被數槍猶戰不已遂討平之主將怒將

元史卷二十四 列傳

九

屠其城鐵哥朮請曰叛者禁知府數人而已城中之人何
預焉請止誅黨與毋濫及非辜主將嘉其誠懇城遂得全
累官至婺州路達魯花赤所在有政績卒封榮國公諡簡
肅舊以鐵哥朮立
傳今改附其父

昔里吉思不知何部人幼從太祖征回河西諸國俱有
戰功太宗時從皇弟拖雷西征師次京兆府會亦來哈台
率諸部兵作亂昔里吉思挺身斫賊陳下馬搏戰賊眾莫
不披靡俄失所乘馬步走至皇弟軍中賊退皇弟嘉其勞
妻以侍女世祖時其妻為皇子乳母於是皇太后待以家
人禮得同飲白馬漣國制白馬漣非宗戚貴胄不得飲也
昔里吉思子塔出為寶爾赤迭只帳殿千戶塔出子日干
家奴曰撒里蠻千家奴從征乃顏力戰而死撒里蠻年十

六從世祖討阿里不哥戰於什門圖有功賜拔都號

元史卷二十四 列傳

十

元史卷二十四終

元史卷二十五

列傳十一

國相臣

耶律楚材

子鑄 粘合重山

耶律楚材字晉卿遼東丹王突欲八世孫王子婁國為燕京留守遂居燕金尚書右丞履之子也右丞年六十始生楚材占之曰是誠偉器用於異國因取左氏楚材晉用之語為名字生三歲而孤母楊氏教之學及長博極羣書文如宿構旁通天文地理律麻術數及釋老醫卜百家之說以西域麻五星密於中國乃作麻荅把麻蓋回回麻名也金貞祐初辟為掾後燕京留守辟為左右司員外郎太祖定燕求遼宗室得楚材身長八尺脩髯過腹聲如洪鐘帝偉之曰遼金世讎朕為汝雪之對曰臣父祖嘗委質事金既為臣子敢讎

元史卷二十五 列傳

一

君父邪帝重其言處之左右遂呼曰吾圖撒合里而不名蒙古語長髯人也歲己卯夏六月帝西討回鶻國禡旗之日雨雪三尺帝疑之楚材曰玄冥之氣見於盛夏克敵之徵也庚辰冬大雷復問之對曰回鶻國主當死中野後皆驗夏人常八斤善造弓見寵於帝每自矜曰國家方用武耶律儒者何用楚材曰治弓尚須用弓匠治天下者豈可不用天下匠邪帝聞之喜日見親用國初未有麻西域人奏五月望夜月當蝕楚材曰否卒不蝕明年十月楚材言月當蝕西域人曰不蝕至期果蝕八分帝曰人閒事汝固應知天上事亦無不知邪壬午八月長星見西方楚材曰女真將易主矣明年金宣宗果殂帝每征討必命楚材卜帝亦白灼羊胛以相符應使駐尋思千城總司軍餉甲申

帝西征至北印度駐鐵門關有獸鹿形馬尾色綠而獨角作人言謂侍衛者曰天道好生汝主宜早還帝即日班師歸至尋思千城以問楚材對曰此角端獸也能言四方語好生惡殺乃旄星之精此天降符以告陛下願止殺以承天意帝納之舊史作東印度邊地尚未至中印也安得即謂東印度乎楚材謂尋思千城在阿母河之北距鐵門尚二千餘里未至北印度境况東印度乎史但據宋子貞神道碑歸後始詢楚材也或謂角端獸不見於書傳疑祖班師歸後始詢楚材也或謂角端獸不見於書傳疑楚材詭詞納誨案角端獸見上林賦獸則麟角端注引郭璞云麟音端角在鼻上堪作弓似麒麟毛詩疏云麟黃色角端有肉張揖云角端似牛堪以為弓則亦丙戌冬從征西夏下靈武諸將爭取子女金帛楚材獨收遺書及大黃藥材既而軍中病疫得大黃輒愈全活者萬人帝自經營西土未暇定制州郡長吏生殺任情至孥人妻女取貨

元史卷二十五 列傳

二

財兼土田燕薊留後長官石抹咸得布大帥石抹明安子也尤貪暴殺人盈市楚材聞之泣下即入奏請禁州郡非奉璽書不得擅徵發囚當大辟者必待報違者罪死於是貪暴稍戢燕多劇賊未夕輒曳牛車指富家劫取財物不與則殺之時睿宗以皇子監國事聞遣中使偕楚材窮治得其姓名則皆留後親屬及勢家子也盡捕下獄戮其首惡於市燕民始安己丑秋太宗將即位擇期八月二十二日宗親咸會議猶未決太弟拖雷方監國問曰事猶未集別擇日可乎楚材曰過是無吉日矣遂定策立儀制乃告親王察合台曰王雖兄位則臣也禮當拜王拜則莫敢不拜及即位王率皇族及臣僚拜帳下國朝尊屬行拜禮自此始中原甫定民多誤觸禁網而國法向無赦令至此獨

請肆宥且條便宜十有八事頒天下其略言州郡宜置長吏牧民設萬戶總軍使勢均力敵以遏驕橫中原之地財用所出宜存恤其民州縣非奉上命敢擅行科差者罪之賈易借貸官物者罪之蒙古回鶻河西諸人種地不納稅者死監主自盜官物者死應犯死罪者具由申奏待報然後行刑敢擅殺者死貢獻禮物爲害非輕盡宜禁斷帝悉從之初太祖之征西域也未暇經理中原官吏聚斂自私而倉庫無儲待羣言漢人無補於國可悉空其人爲牧地楚材曰陛下將南伐軍餉轉輸必取於中原誠均定中原地稅商稅鹽酒鐵冶山澤之利歲可得銀五十萬兩帛八萬匹粟四十餘萬石足以供給何謂無補帝曰卿試爲朕行之乃奏立燕京等十路課稅所使副悉用士人以陳時

元史卷二十五 列傳

三

可趙昉劉中等充之辛卯秋帝至雲中十路咸進廩籍及金帛陳於廷帝顧謂楚材曰卿之力也即日拜中書令事無鉅細皆先白之楚材舉鎮海粘合重山爲左右丞相凡州郡長吏及萬戶分掌文武毋得侵職及侵稅課之權權貴不能平燕京路長官石抹咸得布以舊怨譖於宗王使來奏楚材悉用南朝舊人恐有二心且以國朝所忌誣搆百端必欲置之死帝察其誣責宗王俄有訟咸得布不法者帝命楚材鞠之楚材爲緩其獄帝嘉其長者中貴可思不花奏采金銀役夫及種田西域與栽蒲萄戶帝令於西京宣德徙萬餘戶充之楚材曰先帝遺詔山後民質朴無異國人緩急可用不宜輕動今將征河南請無殘民以給此役且寶山後之地又請令蒙古回紇西域人等與所在

居民一體應賦役皆施行之壬辰春帝南征將涉河詔流民來降者免死或曰此輩急則降緩則走徒以資敵不可宥楚材請製旗數百以給降民使歸田里全活甚眾舊制凡攻城臨敵但以矢石相加者卽爲拒命既克必屠之汴梁將下大將速不台遣使來請申前令楚材馳入奏曰將士暴露數十年所欲者土地人民耳得地無民將焉用之且奇巧之工厚藏之家文學之士皆萃於此若盡殺之將無所獲帝然之詔罪止完顏氏餘皆勿問時避兵居汴者得全活百四十七萬人其後伯顏下江南因爲例楚材又奏擇儒釋道醫卜工匠散居河北官給廩贍又請遣使入城求孔子後奏襲封衍聖公付以林廟地命收太常禮樂生及召名儒梁陟王萬慶趙著等使直釋九經進講東

元史卷二十五 列傳

四

宮又率大臣子孫執經解義置編修所於燕京經籍所於平陽以開文治時河南初破俘獲甚眾軍還逃者十七八有旨容留逃民及資給者滅其家鄉社亦連坐由是逃者莫敢舍多歿死道路楚材言河南旣平民皆朝廷赤子走復何之柰何因一俘囚連死數十百人乎帝悟命除其禁金之亡也唯秦鞏二十餘州久未下楚材奏曰往年吾民逃罪或萃於此故以死拒戰若許以不殺將不攻自下詔下諸城皆降甲午議籍中原民大臣忽都虎等議以丁爲戶楚材曰不可丁逃則賦無所出當以戶定之爭之再三卒以戶定時將相大臣多所俘獲往往寄留他郡楚材因括戶口竝出爲民容隱者死朝議欲遣回鶻人征江南漢人征西域以爲制御之計楚材極言其不可曰漢地西域

相去萬里未至敵境人馬疲乏兼水土異宜疾疫將生不若調近就征各從其便從之丙申春諸王大集帝親觴楚材曰非卿則中原無今日帝議裂州縣賜親王功臣楚材曰裂土恐致尾大分民將肆侵漁二者俱有敝不若朝廷置吏收其貢賦歲終頒之使毋擅科徵可也帝然其計遂定天下賦稅每二戶出絲一斤以給國用五戶出絲一斤以給諸王功臣湯沐之資地稅中田每畝二升又半上田三升下田二升水田每畝五升商稅三十分而一鹽價銀一兩四十斤既定常賦朝廷議爲太輕楚材曰作法於涼其敝猶奢後將日加則今已重矣時工匠制造糜費官物十私八九楚材請皆攷覈爲定制侍臣脫歡奏簡天下室女詔下楚材尼之不行帝怒楚材進日向擇美女二十有

元史卷二十五 列傳 五

八人足備使令今復選拔臣恐擾民帝良久從之又欲收民牝馬楚材曰田蠶之地非馬所產今若行之後必爲人害又從之丁酉楚材奏言制器者必用良工守成者必用儒臣儒臣之事業非積數十年殆未易成也請校試其人然後官之乃命宣課使劉中揚與隨郡攷試分經義詞賦論爲三科儒雖被俘爲奴者亦令就試其主匿弗遣者死得士凡四千三十人免爲奴者四之一先是州郡長吏多借西域賈人銀以償官息周年則倍之次年則并息又倍之謂之羊羔利往往破家不能償楚材奏前債悉以官銀代還凡七萬六千錠自後不以歲月遠近令本利相伴而止永爲定制至一衡量給符印立鈔法定均輸通驛傳庶政略備民稍蘇息焉有二道士爭訟誣其讎爲逃軍結中

貴虐殺之楚材按收中貴帝怒繫楚材既而自悔命釋之楚材不肯解縛進曰臣備位宰輔國政所屬陛下始以何故繫臣今又以何故釋臣宜明示百官豈可輕易反覆如戲小兒何以治天下帝曰朕一日萬幾寧無過舉今後有法令未便者卿其悉以告朕楚材因陳時務十策曰信賞罰正名分給俸祿官功臣攷殿取均科差選工匠務農桑定土貢制漕運皆見施行太原路轉運使呂振副使劉子振以贓抵罪帝責楚材曰卿言孔子之教可行儒者爲好人何故乃有此輩對曰聖人之名教有國家者莫不由之如天之有日月也豈得緣一夫之失使萬世常行之道獨見廢於我朝乎帝意乃解富人劉忽篤馬涉獵發丁劉廷玉等以銀百四十萬兩撲買天下課稅楚材曰此皆奸人

元史卷二十五 列傳 六

捐一償十使怨歸於上利歸於下心不可問空重懲之乃已常曰興一利不如除一害生一事不如省一事今日以吾言爲平平他日方知吾言之不妄也太宗素嗜酒日與大臣酣飲楚材屢諫不聽乃持酒槽腐鐵以進曰麴蘖能腐物鐵尙如此況五臟乎帝悟語近臣曰汝曹愛君憂國之心豈有如吾圖撒合里者邪自庚寅定課稅格至甲午平河南歲有增羨至戊戌課銀增至百有十萬兩譯史安天合者詔事鎮海首引奧都刺合蠻撲買課稅又增至二百二十萬兩楚材極力辨諫至聲色俱厲言與涕俱帝曰爾又欲爲百姓哭邪姑令試行之楚材力不能止乃歎息曰民力從此困矣初太祖嘗指楚材示太宗曰此人天賜我家自後軍國庶政當悉委之太宗時西域諸國及宋高

麗使者來朝多夸其國所產帝指楚材示之曰汝國有此
人否皆謝曰無有殆神人也帝曰朕亦度必無此人楚材
嘗與諸王宴醉臥車中太宗臨平野見之直幸其營登車
手撼之楚材熟睡未醒方怒其擾已忽開目視始知帝至
驚起謝帝曰有酒獨醉不與朕同樂邪笑而去楚材不及
冠帶馳詣行宮帝爲置酒極歡而罷楚材當國日久得祿
分其親族未嘗私以官爵歲辛丑二月三日太宗疾篤用
楚材言大赦而瘳冬復行獵楚材力諫不聽果以獵後飲
酒感疾而崩語詳太宗本紀皇后乃馬貞氏稱制姦人奧
魯刺合蠻用事庶政多紊賴楚材總持大綱不至決裂后
以先朝舊勛深敬憚焉語詳定宗本紀甲辰夏五月卒年
五十五皇后哀悼賻贈甚厚後有譖楚材在相位日久天

元史卷二十五

列傳

七

下貢賦半入其家者后命近臣麻里札覆視之唯琴玩十
餘及古今書畫金石遺文數千卷而已至順元年贈經國
議制寅亮佐運功臣太師上柱國追封廣盛王諡文正妻
蘇氏爲宋蘇軾四世孫威州刺史弼之女有賢德生子二
曰鉉曰鑄

鑄字成仲幼聰敏善屬文尤工騎射楚材卒嗣領中書省
事時鑄年二十三上言宜疏禁網遂采歷代德政合時宜
者八十一章以進戊午憲宗征蜀詔領侍衛驍果以從屢
出奇計攻下城邑乙未憲宗崩阿里不哥叛鑄棄妻子自
朔方來歸世祖嘉其忠賞賜優厚中統二年拜中書左丞
相是年冬詔將兵備禦北邊後扈從敗阿里不哥於上都
之北至元元年奏定法令三十七章吏民便之二年行省

山東未幾徵還初清廟雅樂止有登歌詔鑄製宮懸八佾
之舞及成表上之賜名大成之樂十年平章軍國重事二
十年坐事罷免沒其家貲之半徙居山後遂卒至順元年
追贈懿宣王諡文忠子十一人希亮取有名詳叛王阿里
不哥傳嘗諫征日本請雪冤獄寬盜鈔之令類次世祖嘉
謨善政以進英宗取其書置禁中所著詩文及從軍紀行
錄三十卷名懷軒集卒封漆水郡公諡忠嘉舊史希亮事
傳今并附
與楚材共相者一曰鎮海別見誓渾河功臣傳一曰粘合
重山金源貴族以質子委質於太祖列宿衛從圍涼州執
大旗指揮六軍手中流矢不動久官侍從數得侍內宴因
諫曰臣聞天子以天下爲憂者未有不治忘憂天下未有
能治者也置酒爲樂此忘憂之漸也帝深嘉納之太宗卽

元史卷二十五

列傳

八

位拜左丞相時耶律楚材爲右丞相凡建官立法多出楚
材而重山佐成之七年從伐宋取江淮諸州邑降其民三
十餘萬不戮一人復入中書視事未踰年卒追封魏國公
諡忠武詔其子江淮安撫使南合嗣行軍前中書省事時
大將察罕圍壽春七日始下欲屠其城以南合言而止嘗
以李瓊坐制一方多詐必叛言於世祖中統二年遷秦蜀
五路四川行中書省事其年李瓊果反益都明年授中書
平章政事卒諡宣昭封爵如其父

楊惟中

楊惟中字彥誠弘州人金末以孤童子事太宗知讀書有
膽略年二十奉命使四域三十餘國宣布威德俾皆籍戶
口屬吏乃歸帝以爲可大用皇子闕出伐宋命惟中於軍

前行中書省事克宋棗陽光化等軍光隨郢復等州及襄陽德安府凡得名士數十人收伊洛諸書送燕都立宋大儒周惇頤祠建濂溪書院延儒士趙復王粹等講授其間慨然欲以道濟天下拜中書令太宗崩太后稱制惟中佐耶律楚材先後負任天下定宗即位平陽道斷事官斜徹橫恣不法詔惟中宣慰按誅之金亡其將武仙潰於鄧州餘黨散入太原真定間據大明川用金開興年號眾至數萬剽掠數千里詔會諸道兵討之不克惟中仗節開諭降其渠帥餘黨悉平憲宗即位世祖以太弟鎮金蓮川得開府專封拜乃立河南道經略司於汴梁奏趙璧惟中等為使俾屯田唐鄧申裕嵩汝蔡息亳潁諸州初滅金時以萬戶劉福為河南道總管福貪虐民受禍二十餘年惟中至

元史卷二十五 列傳 九

召福聽約束福稱疾不至連召之不得已始以數千人擁衛入見惟中手握大槌擊仆死之河南大治遷陝右四川宣撫使時諸軍帥橫侈病民惟中戮其尤者郭千戶以徇關中肅然歲己未太弟總統東師奏惟中為江淮京湖南北路宣撫使俾建行臺蒙古漢軍諸帥並聽節制師還卒於蔡州年五十五諡忠肅

元史卷二十五終

元史卷二十六

列傳十二

開國文臣

岳璘 舊連帖 哈赤北魯 塔統阿

岳璘 舊連帖 哈赤北魯 塔統阿 穆爾號回鶻人由唐以來世為畏兀國相家僕輩傑河上故子孫遂為僕氏十餘傳至此理伽普華年十六襲國相荅刺罕岳璘之兄也時西契丹方強威制畏兀命太師僧少監來臨其國驕恣用權畏兀王患之謀於此理伽對曰能殺少監挈吾眾歸大蒙古國彼且震駭矣遂率眾圍少監斬之以功受封賞左右有忌其功者譖於王曰少監珥珠先王寶也此理伽匿之益急索勿失王怒索寶甚急此理伽度無以自明乃亡附太祖賜以金虎符師紐銀印金螭椅各一衣金直孫校尉四人仍食二十三郡賜銀

元史卷二十六 列傳 一

五萬兩以弟岳璘為質岳璘年十五精畏吾書從太祖征討多戰功命為皇弟幹真師傅訓導諸王子以孝弟敦睦仁厚不殺為先帝聞而嘉之從平河南徙鄴縣民萬餘戶入樂安俄授河南等處軍民都達魯花赤佩金虎符所得上方賞賚悉輦歸故郡以散親舊且盛陳漢官儀衛以激厲國人道出河西所過榛莽或時乏水為鑿井置墩居民使客相慶稱便太宗即位以中原多盜選充大斷事官從幹真出鎮順天等路布德化寬征徭盜遁茲革州郡清寧尋復監河南等處軍民卒諡莊簡子合刺普華見忠義傳哈赤北魯畏兀人也哈刺奔氏性聰敏習事國王月仙帖木爾亦都護聞其名自梭里彌國徵為斷事官月仙卒子八出阿忒亦都護年幼西遼主鞠爾可汗遣使據其國且

召哈赤北魯至則以爲諸子師八出阿忒聞太祖明聖乃殺西遼使更遣阿憐帖木爾都督等四人使西遼阿憐帖木爾都督者哈赤北魯婿也具語以其故於是與其子月多什野納馳歸太祖一見大悅即令諸皇子受學焉仍令月多什野納以質子入宿衛從帝西征至別什巴里東獨山見城空無人帝問此何城也對曰獨山城往歲大饑民皆流移之它所然此地當北來要衝宜耕種以爲備臣昔在梭里彌國時有戶六十願移居此帝曰善遣月多什野納佩金符往取之父子皆畱居焉後六年太祖西征還見田野墾闢民物繁庶大悅問哈赤北魯則已死矣迺賜月多什野納都督印章兼獨山城達魯花赤月多什野納卒子乞赤宋忽在太宗時襲爵賜號荅刺罕子四人曰塔塔

元史卷二十六 列傳

二

爾曰忽棧曰火思蠻曰月思蠻世祖命火思蠻從雪雪的斤鎮雲南月思蠻事憲宗襲父爵兼領僧人後因軍帥札忽台據別什巴里盡室徙居平涼與其子阿的彌什入覲世祖詔入宿衛爲必闐赤命從安西王芒哥刺出鎮六盤安西王薨其子阿難荅嗣成宗即位遣使入朝因奏阿的彌什父子本先帝舊臣來事先王服勤二十餘載若終老王府非所以盡其才願以歸朝廷詔授阿的彌什汝州達魯花赤積官祕書太監卒子阿鄰帖木爾善蒙古書多聞識歷事累朝由翰林待制累遷翰林學士承旨英宗時以舊學日侍左右陳說祖宗以來及古先哲王嘉言善行翻譯諸經紀錄故實總治諸王駙馬蕃國朝會之事天祚初北迎明宗入正大統一見歡甚願左右曰此朕師也天祚

三年進知經筵事子沙刺班累拜中書平章政事

塔統阿舊作塔統阿者亦畏兀人聰慧善言論深通本國文字

乃滿大陽可汗尊之爲傳掌其金印及錢穀太祖西征乃滿國亡塔統阿懷印逃去俄就禽帝詰之對曰臣職也將以死守欲求故主授之耳帝曰忠孝人也問是印何用對曰出納錢穀委任人材一切事皆以爲信驗帝善之命掌印居左右是後凡有制旨始用印章以其深知本國文字命教太子諸王以畏兀字書國語太宗即位命司內府玉璽金帛命其妻爲皇子哈刺察乳母又聞其廉介數加禮賜以疾卒至大三年追封鴈門郡公子四人長玉笏彌什次力渾彌什次速羅海次篤蘇玉笏彌什少有勇力渾都海叛於六盤時玉笏彌什守護皇孫脫脫營壘率其眾與

元史卷二十六 列傳

三

渾都海戰敗之追至只必勒與阿藍荅合兵復戰死之力渾彌什有膂力嘗獵於野與眾相失遇三盜盡搏仆之而縛以還帝召見選力士與角無敵者令備宿衛速羅海襲父職司內府玉璽金帛篤蘇事皇子哈刺察世祖即位從其母入見欲官之以無功辭命統宿衛奉使遼東卒封鴈門郡公子阿必實哈陝西行省平章舊史與哈赤北魯皆專傳今移附

劉敏 李楨

劉敏字有功宣德青魯人歲壬申太祖師次山西敏時年十二從父母避地德興禪房山兵至父母棄敏走大將偉其貌收養之一日帝宴諸將於行營敏隨入帝召問所自俾畱宿衛習蒙古語閱二歲能通諸部語帝嘉之賜名玉出于出入禁闈初爲奉御從帝征遼西及回回諸國癸未

授安撫使便宣行事兼燕京路徵收稅課漕鹽等事立兩軍戍燕置二總管府以敏從子二人佩金符為二府長命敏總其役賜玉印佩金虎符奏佐吏宋元為安撫副使高逢辰為僉事李臻為參謀初耶律楚材總裁都邑契丹人居多其徒往往中夜挾弓矢掠民財官不能禁敏戮其渠魁令諸市又歸豪強冒籍良民為奴者興學校進名士為之師己丑太宗即位改造行宮幄殿乙未城和林建萬安宮設宮闈司局立驛傳以便貢輸既成宴賜甚渥辛丑春授行尚書省詔曰卿之所行有司不得與聞俄而牙魯瓦亦自西域回至燕奏與敏同治漢民帝允其請已而不相能帝聞之罷牙魯瓦赤獨任敏復辟幕府李臻為左右司郎中丙午定宗即位詔敏與奧都刺同行省事辛亥夏六

元史卷二十六 列傳 四

月憲宗即位召赴行在所仍命與牙魯瓦赤同政甲寅請以子世亨自代又命其子世濟入宿衛帝伐宋幸陝右敏與疾請見以中原土曠民貧勞師遠伐恐非計帝弗納旋卒年五十九

李楨字幹臣其先西夏國族子也金末楨以經童中選既長入為質子以文學得近侍太宗嘉之賜名玉出干為必闕赤從皇子闕出伐金帝命軍事訪楨以行及下河南諸郡闕出遣楨往唐鄧二州數民實兵餘歲凶流散十八九楨至振恤饑寒歸者如市十年從大將察罕下淮甸奏訪天下儒士令所在優贍之十三年師圍壽春天雨不止楨言於察罕曰頓師城下暑雨疫作將有不利且城久拒命破必屠之則生靈何辜請退舍數里身往招之遂單騎入

敵壘曉以利害明日率眾來降楨表言襄陽乃吳蜀之要衝宋之喉襟得之則可為他日取宋之基本定宗嘉其言庚戌賜虎符授襄陽軍馬萬戶憲宗命率師巡哨襄樊戊午帝親征召楨同議事秋九月卒於合州年五十九舊史附今移

論曰唐書稱黠戛斯直回鶻西北三千里黠戛斯即元之北林正其文字語言與回鶻正同回鶻在唐時建牙和林唐回鶻牙北六百里得仙娥河即元和林北之辭靈哥水也一日復兼傑河今日色稜格河及其衰也南徙高昌音轉為畏吾其舊牙為乃蠻所據當元之先乃蠻太陽汗曾尊畏吾塔統阿為傳西遼鞠爾汗亦召畏吾哈赤北魯為諸子師非同文之明驗歟蓋畏吾文字之通於西域也白來遠矣成吉思初起漠北混沌榛莽初無文字

元史卷二十六 列傳 五

及滅乃蠻即進用其遺臣塔統阿教太子諸王以畏吾字復令諸皇子受學於哈赤北魯又命岳璘為皇弟幹赤斤師傅皆畏吾文宿也爾時戎馬倉皇朔土初奠首與文治以闢洪荒帝王自有真也太宗以下數世都於和林因俗為治沿用畏吾字以立官府文書關防會計凡朝廷詔誥臣下章奏莫不用焉世祖雖翊置蒙古新字頒諸學校思有以易之訖不能廢也至元延祐之世復立回回回回字與畏吾少國子學百司庶府皆設回回譯史然賜蒙古諸王色目諸臣以通鑿諸書亦必以畏吾字轉譯而後頒焉蓋以習尚既深先入為主不如是或莫曉也元代諸帝之通漢文者惟明孝太子與文宗其下諸臣之習此者亦不及畏吾文字之盛文宗將幸上都命錄御衣於簿顧左右無能書

漢字者未造如此開國可知夫一代之興制度典章必有
所因以爲損益元代之習尚畏吾文字也其所因者漸非
一朝一夕之故矣岳璘訓導諸王子以孝弟敦睦仁厚不
殺爲先是其文字雖異而其爲教也固無悖於聖經大道
者歟原彙無論今補

元史卷二十六 列傳

六

元史卷二十六終

元史卷二十七

列傳十三

平金功臣

烏乎元之削平女真用兵一世然自拖雷木華黎速不台
數大將出蒙古勳族外類皆驅金臣以攻金即用金臣以
守金而文臣如耶律姚許寶劉先未膺金一命後未貽金
一矢者尙不在列焉自古楚材晉用叢爵淵魚未有如斯
之甚者舊史四十餘傳今并爲十有一尙有趙迪杜豐邸
順邸琮田雄石抹孛迭張拔都純只海鮮卑仲吉劉亨安
高宣趙柔之屬無足表見附姓名於此

石抹耶先

子查刺 膺魯華撒吉思不華 趙瑄

石抹耶先一作石遼人其先爲述律氏號稱后族遼亡改

述律爲石抹氏其祖庫烈爾誓不食金祿率部落遠徙父

元史卷二十七 列傳

一

脫羅畢察爾亦不仕耶先其仲子也年十歲從其父問宗
國所以亡卽大憤及長善騎射多智略豪服諸部金人聞
其名徵爲奚部長卽讓其兄贍德納曰兄姑受之爲保宗
族計遂深自韜匿居北野山射狐鼠而食聞太祖起朔方
匹馬來歸首言東京爲金開基地蕩其根本中原可傳檄
而定也太祖悅命從太師國王木華黎先取北京舊史作東京案東平王世家太祖命木華黎取遼西是北京非東京也師過臨潢次高州亦距北京大盛近而距東京遠與舊傳不合
師過臨潢次高州木華黎令耶先率千騎爲先鋒耶先
曰兵貴奇勝何以多爲謀知金新易北京畱守將至耶先
獨與數騎遊般之懷其誥命至謂守門者曰我新畱守也
入據府中問吏列兵於城上何爲吏以邊備對耶先曰方
今中外晏然柰何陳兵以動搖人心卽命徹守備曰寇至

在我即夜下令易置將佐部伍三日木華黎至入北京不
 費一矢定城邑三十二得戶十萬八千兵十萬資糧器械
 山積耶律雷哥傳書乙亥雷哥破東京又太祖本紀七年
 克之皆與此不合秘史作哲伯襲降守臣寅荅虎等四十
 破東昌其所云東京者即北京也寅荅虎舉城降則此
 七人木華黎傳乙亥破北京守將寅荅虎舉城降則此
 移師圍東京久不下及城破將屠之耶先曰王師拯人水
 火彼既降而復屠則未下者人將死守天下何時定乎既
 城破並未言降何云先降復屠疑亦奏請赦之授御史大
 夫領北京達魯花赤耶先果先得東京何不使守東京而
 史無金人喪其根本始議遷河南時石天應與豪酋數十
 據興中府耶先分兵降之奏以為興中尹又命監張鯨等
 軍征燕南未下州郡至平州鯨稱疾不進耶先執送行在

元史卷二十七 列傳

二

鯨訴稱實病非敢叛帝命以其弟張致為質鯨諾而宵遁
 耶先追戮之張致已殺使者應其兄矣張致伏誅耶先籍
 其私養死士萬二千人號黑衣軍者上於朝所將軍皆猛
 故名詔以御史大夫提控諸路元帥府事舉遼水西灤水
 東悉以付之耶先果得遼東何朝廷但以遼後從木華黎
 攻蠡州先登中石死子查刺亦善射襲御史大夫領黑衣
 軍戊寅從木華黎攻平陽太原陽吉岢嵐諸郡下之遂攻
 蓋都久不下及降眾欲屠其城查刺曰殺降不祥且得空
 城將安用之由是遂免己卯詔以黑衣軍分屯真定固安
 太原平陽隰吉岢嵐諸郡及南征盡以黑衣軍為前列敗
 金將白撒官奴於河渡河再戰盡殪之長驅破汴入自仁
 和門收圖籍而還論功黑衣軍為取帝悉以諸軍俘獲賜

之癸巳從國王塔思攻金帥宣撫萬奴於遼東之南京城
 堅如立鐵查刺分兵佯攻其東北而率親兵突其西南奮
 槊先登眾軍乘之而進遂克之辛丑授真定北京兩路達
 魯花赤癸卯卒於柳城年四十有四子庫祿滿襲職中統
 三年從征李壇中流矢卒子良輔襲黑軍總管後世多貴
 顯
 膺魯華蒙古部克烈氏一曰梁直膺魯華梁直即梁赤官
 為名初以所部從太祖征乃蠻西夏有功命將萬人為木
 華黎前鋒下金桓州得其監馬幾百萬匹分屬諸軍軍勢
 大振歲辛未破遼東西諸州唯東京未下獲金使遣往諭
 之膺魯華曰東京金舊都備嚴而守固攻之未易下以計
 破之可也請易服與其使偕往說之彼將不疑俟門啟繼

元史卷二十七 列傳

三

以大軍則可克矣卒如其計徇地河北攻大名小大數十
 戰城垂陷中流矢卒武宗時贈太傅追封衛國公諡武敏
 子撒吉思不華嗣將父軍太宗元年己丑賜金虎符安輯
 河北山東諸州監史天澤軍于真定金徙汴立河平軍於
 新衛以自固恃為北門數攻之不拔壬辰正月太宗自白
 坡濟河而南睿宗由峭石灘涉漢而北撒吉思集西都水
 之舟渡自河陰取鄭金哀宗勢蹙出奔河北帝命撒吉思
 追躡之走其節度斜念阿卜遂據有新衛十二月金主自
 黃陵岡濟河謀復衛撒吉思破其將白撒于白公廟俘斬
 萬計復追金主于歸德薄北門而軍引河灌之水入舊睢
 河城四面皆水轉不能攻乃退屯亳州癸巳四月金將官
 奴偽遣人約降而夜來斫營火攻四起腹背受敵撒吉思

一軍皆沒命其弟明安答領其行營明安答善騎射從征淮安因糧於敵軍士免負擔之勞咸樂爲用憲宗時從昔烈門大孫南伐死於鈞州子膺虎從世祖北征叛王挺戈出入其陣帝壯之賜號拔都初太宗既滅金命大臣忽都虎料民分封功臣撤吉思妻楊氏自陳曰吾舅及夫皆死國事而獨見遺邪詔賜新衛民二百戶贈撤吉思不華太師諡忠武明安答太保諡武毅爵皆衛國公

趙瑄雲中蔚州人父昆仕金爲帥府評事兄珪以萬戶守飛狐城昆卒珪輦其母如蠡州留瑄於飛狐癸酉太祖南伐先鋒至飛狐率眾降木華黎駐兵桓州署爲百戶從攻蠡州金兵閉城拒守裨將石抹耶先戰死木華黎怒將屠城瑄泣曰母兄皆在城中乞以一身贖一城之命木華黎

元史卷二十七 列傳

四

義而許之從攻相州抵其門死士突出瑄直前擊之流矢中面鏃出腦後拔矢再戰七日破其城論功授冀州行軍都元帥讓其兄珪朝廷從之改授瑄易州達魯花赤太宗下河南瑄輸矢二十餘萬至行在帝大喜命權中都省事癸巳趙揚據興州叛瑄進軍平之遷中山真定二路達魯花赤卒封定國公諡襄穆子秉溫事世祖潛邸命受學於太保劉秉忠從征吐蕃雲南大理中統初詔行右三部事至元七年勅習朝儀閱試稱旨授秘書少監購求天下祕書遷昭文館大學士知太史院侍儀司事皇慶元年卒封雲國公諡文昭

蕭乃台 蕭一作肖 徒伯怯烈氏以忠勇侍太祖時木華黎

蕭乃台 蕭一作肖

烏耶爾 安札爾 耶律涅爾 闕闕不

博爾朮既立爲左右萬戶帝命蕭乃台佩金符領蒙古軍屬木華黎麾下爲先鋒金降將武僊般史天倪以眞定叛僊弟質軍中者一夕遁去蕭乃台遣其弟追斬於紫荆關俘其妻子而還乃率精甲三千與史天澤合兵進圍中山敗其將葛鐵槍援兵乘勝進擊遂克中山取無極拔趙州僊棄眞定走天澤入城撫定其民未幾僊潛結水軍爲內應夜開南門納僊復據其城蕭乃台倉卒以步兵七十踰城奔棗城遲明部曲稍集兵復振再襲破之僊棄城遁將士怒其反覆欲屠城蕭乃台曰此皆爲敵帥驅脅何罪之有若不勝一朝之忿徒堅他城不降之心遂皆釋之乃進兵下太原略太行拔長勝寨尋出太行山東敗宋將彭義斌追斬之于火炎山進定東平又與芒古不華徇河北懷

元史卷二十七 列傳

五

孟諸州從國王李魯定益都已復渡河略汴京徇睢州敗金將完顏慶山奴于陽邑圍金主於蔡州與史天澤攻城北面汝水阻其前結筏潛渡血戰連日金亡朝廷以其功多命併將史氏三萬戶軍以圖南征賜東平戶三百官爲治第分撥牧馬草地以老病卒于東平歸葬漠北子抹兀荅及兀魯台皆有戰功孫脫落合察亦從渡江伐宋官至懷遠大將軍

烏耶爾 一作吾也而一作烏 珊竹氏狀貌甚偉腰大十圍父曰圖魯華察以武勇稱太祖五年烏耶爾與大將哲伯克金東京有功九年從木華黎取北京爲先鋒授北京總管都元帥留鎮其地金將達魯以惠州漁河口爲隘有眾數萬圖復北疆烏耶爾擊斬之又討平趙守玉於興州十

一年又破張致於錦州十五年從木華黎征東平馳赴陷陣生挾二將以還征延安矢中右股力戰破之進取葭州克鳳翔兼下河西諸地二十一年從郡王帶孫圍益都越二年下三十餘城太宗元年入覲命與撒里荅征高麗下十餘城高麗王懼請和遣其子縛入質帝大悅俾充北京東京廣靈蓋州平州秦州開元府七路都元帥憲宗元年召問東夷事對曰臣雖老倘藉威靈指麾三年敵國猶可克況東夷小醜乎帝壯其言問飲酒幾何對曰唯所賜時有一駙馬都尉在側素以酒稱命與角飲帝大笑賜錦衣名馬俄謝病歸七年復來朝帝憫其老謂曰太祖時宣勞諸臣獨卿無恙賜賚甚厚以都元帥授其中子阿海八年秋夜中星隕帳前光數丈有聲明日卒年九十有六有石

元史卷二十七 列傳 六

抹孛迭爾者契丹人歸太祖於雄州隸木華黎麾下命與元帥烏耶爾分領錦州紅羅山北京東路漢軍二萬又從徇地山東大名又從定山西授霸州都元帥令兵士屯田且耕且戰數年城市復完舊史石抹孛迭爾專傳今并附安札爾一作安一拓跋氏嘗扈從太祖南征歲丙子復從定諸部有功命領蒙古軍為木華黎前鋒兵臨燕遼營青齊魯趙韓魏皆下歲己卯河中府降木華黎北還以安札爾領前鋒總帥仍統所部兵屯平陽以備金攝國王事時金將乞石烈氏擁重兵數為患然畏安札爾威名不敢輕犯其境壬午元帥石天應守河中府屯中條山金將侯小叔率昆弟兵十餘萬夜襲河中天應遣權府吳澤率兵五百出東門伏兩谷間諭令俟其半過即翼擊之俾腹背受敵會

澤醉敵至援弗繼城遂陷天應死焉遂燔其城將趨中條安札爾進兵擊之斬首數萬癸未春木華黎卒於聞喜其子孛魯襲爵令安札爾居守平陽庚寅孛魯由雲中圍絳州金將武仙退保潞東十餘里原上孛魯馳至沁南未立鼓乞石烈引兵襲其後孛魯戰失利輜重人口皆陷沒安札爾妻奴丹氏亦被獲拘於大梁金主聞安札爾威名召奴丹氏謂之曰今縱爾還能偕爾夫來乎當厚賞爾奴丹氏佯諾之遂得還太宗聞而嘉之詔預其夫前鋒事從征潞州鳳翔至鈞州三峯山破金將完顏合達兵十五萬明年壬辰春帝班師北還命偕都元帥梭伯台圍汴城中識安札爾旗幟懼曰其妻猶勇且義況其夫乎甲午金亡詔封功臣賜平陽戶六百子孫世其職

元史卷二十七 列傳 七

耶律涅爾契丹人世為遼臣遼亡祖父皆不仕金涅爾生而膂力過人沈毅有大志聞太祖舉兵率其黨百餘人詣軍門獻十策帝召見與語奇之賜名賽因使備宿衛又問爾生何地對曰霸州因號霸州元帥佐木華黎取北京下高利興松義錦錦等二十六城破五十四寨從大將烏耶爾稠幹爾討錦州張致出奇兵掩擊斬之功第一進取遼東西廣靈金復海蓋等十五城從攻東平延安圍鳳翔裏創進攻丹延木華黎止之對曰創未至死敢自逸耶木華黎壯之與以所乘白馬明日介其馬飾以朱纓簡驍衛七十人與金兵戰木華黎乘高見其馳突萬眾中曰此霸州元帥也諸軍繼進金兵敗走丹延十餘城皆降從帝征河西取甘合辛蛇等州師還復從木華黎之弟帶孫攻益都下

萊膠淄等三十二城卒追封興國公諡武毅子邁奴蚤從父習戰陣初入見太祖問曰汝年小能襲父爵乎對曰臣年雖小國法不小帝異之曰此兒甚肖乃父授高州達魯花赤兼征行萬戶命攻高麗花涼城監軍張翼劉霸都隕於敵邁奴怒曰兩將陷賊義不獨生趣出戰破之誅其渠撫安其民進攻開州州將金沙密逆戰禽之遂下龍宣雲泰等十四城從諸王按赤台征女真萬奴部有功未幾召還興州趙祚挾土豪楊買奴等以叛從親王察合台進討圍之於險樹寨三月不下邁奴令健卒即寨北小徑上大樹以繩潛引百人登寨潰之買奴投崖死餘黨悉平太宗初從再征高麗取西京而還加征東大元帥卒封興國公諡顯懿孫元臣年十六入宿衛爲怯薛必閣赤襲千戶將

元史卷二十七 列傳

八

其父軍從伯顏平宋有功至元十四年只爾瓦台叛圍應昌府元臣以所部軍馳擊破賊魚兒灤救出皇女魯國公主奏請暫留元臣鎮應昌以安反側居三歲帝以所籍入權臣家婦賜之元臣辭曰臣家世清素不敢自汚帝嘉歎不已復從征乃顏征湖廣溪洞蠻獠皆有功卒封興國公諡忠靖

闊闊不花者按攤脫里氏木華黎伐金分探馬赤爲五部各置將闊闊不花爲五部前鋒都元帥所向輒克然不嗜殺故所至無殘破略定濱棣諸州俘獲焦林諸處民四百餘但籍其姓名遣歸鄉里徇益都下之悉以財物馬畜分賜士卒從太宗渡河攻汴梁歸德分兵渡淮攻壽州不下射書城中諭之城中人感泣以綵輿奉金公主開門送款

闊闊不花下令軍士入城虜掠者死城中帖然公主哀宗之姑也太宗命五部將分鎮中原闊闊不花鎮益都濟南安札爾鎮平陽太原孛羅鎮真定蕭乃台鎮大名怯烈台鎮東平括其民匠得七十二萬戶以三千戶賜五部將闊闊不花得分戶六百立官治其賦得薦置長吏歲從官給其所得五戶絲以疾卒于官子黃頭代領探馬赤爲元帥

劉伯林 子疑 石天應

劉伯林濟南人好任俠善騎射金末爲威靈防城千戶太祖圍威靈伯林縋城降仍以原職爲都提控命選士卒爲一軍與大傅耶律圖花同征討招降山後諸州太祖嘗言漢人來歸者以伯林爲首太祖北還留伯林屯天成邊金兵前後數十戰進攻西京錄功賜金虎符以本職充西京

元史卷二十七 列傳

九

留守兼兵馬副元帥癸酉從征山東攻梁門遂城下之乙亥同木華黎攻破燕京丁丑復從大軍攻下山東山西諸州縣時論欲徙聞喜民實天成伯林以北地喪亂人艱於食力爭止之盡縱所俘虜萬計在威靈十餘年務農積穀與民休息鄰境凋瘵而威靈獨爲樂土嘗曰吾聞活千人者後必封吾之所活何啻萬餘人子孫其有興者乎辛巳卒年七十二累贈太師封秦國公諡忠順子疑

疑字孟方始生時家有白馬產黑駒故小字黑馬後遂以小字行驍勇有智略年幾弱冠隨父征伐大小數百戰嘗獨行遇金兵圍本部十三人即奮劍入圍盡拔十三人以出歲壬午襲父職爲萬戶佩虎符兼都元帥癸未從國王木華黎攻鳳翔不克又從孛羅攻西夏唐兀甲申從按陳

那衍攻破東平大名乙酉金降將武僊據真定以叛從李羅討破之歲己丑太宗卽位始立三萬戶以崑爲首重喜史天澤次之授金虎符充平陽宣德等路管軍萬戶從征回回河西諸國及破鳳翔西和沔州諸城堡庚寅皇弟拖雷入自大散關假道於宋以伐金由興元金房東下戰三峯山乘勝攻破香山寨及鈞州皆崑爲先鋒賜西錦良馬貂裘以旌其功會增立七萬戶仍以崑爲首復從破南京破蔡州乙未同都元帥荅海紺卜征西川辛丑改授都總管萬戶統西京河東陝西諸軍萬戶夾谷芒古台田雄等竝聽節制入覲帝慰勞之賜銀鼠皮三百爲質孫衣尋命循撫天下察民利病應州郭志全反脅從誣誤者五百餘人疑止誅其首惡癸丑從憲宗至六盤山命守商州禦宋

元史卷二十七 列傳

十

兵丁已入覲請立成都以圖全蜀帝從之就命管領成都新舊軍民小大諸務中統元年廉希憲商挺宣撫川陝時密力火者握重兵居成都跋扈慮其爲變以崑有膽智使乘驛矯詔竟誅之其子訴於朝世祖諭之曰朕命也勿復言三年命兼成都路經略使卒于瀘州封秦國公諡忠惠子十二人元振元禮從征蜀有功別附平蜀諸臣傳石天應字瑞之興中永德人知書善騎射爲鄉里所歸謁木華黎于軍門授興中府尹俾從南征造戰攻具機變神捷所將兵旌旗色黑人目之曰黑軍前後二百餘戰皆身先士卒累功遷右副元帥從木華黎征陝右假道西夏自東勝濟河南拔葭州因進說曰西戎雖降實未可信此州富強控扼大河當金夏之衝脫爲敵軍所梗緩急非便宜

命將守之多造舟楫以備不虞此萬全計也木華黎然之表授陝西河東路行臺兵馬都元帥以勁兵五千畱守葭蘆遂造舟楫建浮橋諸將多言水漲波惡恐勞費無功天應下令敢阻者斬橋成諸將悅服分兵四出悉定葭綏地一日謁木華黎於汾水木華黎諭以進取之策天應謂河東西皆平川廣野可以駐軍規取關陝當守河中而畱部于葭綏或諫曰河中雖用武地南有潼關西有京兆皆金軍所屯且民新附其心未一守之恐貽噬臍之悔不如由葭綏取鄜延可以萬全天應曰國家之急本在河南葭州路險地僻轉餉甚難河中北接汾晉西連同華地五千餘里戶數十萬若起漕運以通餽餉則關內可刻期定關內旣定長河以南在吾目中矣吾年垂耄恐功名爲他人所

元史卷二十七 列傳

十一

先男兒要當死戰陳以報國耳秋九月遂移軍河中旣而金軍果潛入中條來襲天應先遣驍將吳澤伏兵要路約候敵至前後夾擊澤勇而嗜酒是夕方醉臥林中金兵已由閒道偪城下時兵燼後守具未完新附者爭縋而去敵乘隙入城舉火天應左右僅四十餘騎皆曰吳澤誤我或勸西渡河天應曰吾違眾議而南遷今事急棄去是不武也何以見同列俄敵兵四合飲血力戰至午死之時天應弟天禹子佐中在軍中伺敵少懈倒抽其斧反斫之突城而出渡河趨木華黎行營求得蒙古軍數千回與敵戰敗之木華黎嘉其勇奏授金符行元帥子安琬襲職佩金符從征大理討李壇皆有功江西分靈叛安琬往討之賊背山而陳安琬引兵出陳後賊驚潰安琬揮兵直壓壘門賊

揚言曰願少容成列而戰死且不憾安琬稍引卻賊果出陳安琬突陳而入大呼曰吾止誅賊首庸卒非我敵也手刃中賊背生禽之累功至右衛親軍副都指揮使卒又有田雄者石天應之偏裨也從攻蜀歸鎮關中皆有功舊史田雄并傳今

石抹明安 王載 何賞

石抹明安桓州人童時嘗騎杖爲馬合羣兒前導行列整肅無敢譁者父老知其必貴歲壬申太祖兵破金撫州將遂南向金主命招討紇石烈九斤來援時明安在其麾下九斤謂之曰汝嘗使北方素識蒙古國主可往臨陳問舉兵之由不然即誥之明安初如所教詆責而去俄策馬來降帝命縛以俟戰畢詰之曰爾何嘗我而後降對曰臣素

元史卷二十七 列傳 三

有歸志不聽其指使則見疑何由瞻奉天顏帝善而釋之命領蒙古軍撫定雲中東西兩路帝欲休兵北還明安諫曰金有天下十七路今我所得惟雲中東西兩路而已然山前民庶久不知兵今乘其震驚之時長驅破竹傳檄可定若更休兵待彼徐繕守備并力而守則未可歲月取也機不可失請乘之帝即命明安引兵南進所至民皆牛酒犒迎盡有河北諸郡復偕三合拔都將兵由古北口徇景劄檀順諸州有抗命者諸將議欲屠之明安請生之以招未附師次通州降金右副元帥蒲察七斤明安遂軍於京南建春宮金臣李英等領兵護餉援中都明安將五百騎邀之遇於永清甫交綏佯北金兵來追迴擊大破之獲李英得糧千餘車遂招諭永清不降拔而屠之未幾金將完

顏合住阿興松哥復以步兵萬二千糧車五百兩援中都明安復將三千騎邀之涿州盡得其輜重還屯建春宮尋克萬寧宮取富昌豐宜二關拔固安縣金中都丞相完顏復興飲藥死城中官吏父老開門降明安發粟振之悉籍其府庫金帛以聞一無所取詔加太傅邵國公兼管蒙古漢軍兵馬都元帥卒子二人長咸得卜襲職爲燕京行省以貪暴稱次忽篤華太宗時爲燕京行尙書省事兼兵馬都元帥

王楸字巨川鳳翔虢縣人弱冠舉進士不第乃入終南山讀書涉獵孫吳泰和中詣闕上書論當世急務金主俾給事縉山元帥府尋用元帥高琪薦特賜進士出身授副統軍守涿鹿監太祖將兵南下楸慶戰三日兵敗見執太祖

元史卷二十七 列傳 三

詰責之神色不變對曰臣以布衣受恩誓捐軀報國今既償軍得死爲幸帝義而釋之授都統令招集山西潰兵從破紫荆關取涿易等州擢宣撫使從石抹明安南征下古北口薊雲順等州得漢軍數萬遂圍中都中都降楸請禁虜掠以慰民望令城中民與城外軍通糴易故士得金帛而民獲粒食索軍回所驅牛以給農民民復業者眾又從明安招諭保定新城信安雄霸文安清滄諸城皆望風款附乃置行司於滄州以鎮之時河閒清滄復叛從騎馬李圖討之遂復河閒得軍民萬口李圖惡其反覆欲盡誅之楸解之曰驅羣羊使東西者牧人也羊何知哉楸其渠魁足矣釋此輩遷之近縣強者從軍弱者爲農此天所以畀我也何以殺爲李圖曰能保其不復反耶楸即具文保任

之俱得全活時都城廟學燬於兵械重剗於舊樞密院地春秋率諸生行釋菜禮仍取舊岐陽石鼓列廡下從征西夏及秦州夏人盡徹橋梁為備軍阻不得前諸將束手械夜督士卒運木石比曉橋成軍得濟戊子奉監國公主命領省中都屬盜起信安轉掠近縣熾引水環城調度經費自券諸賈人而斂不及民遂討平諸盜壬辰從攻汴京癸巳奉命持國書使宋宋遣使報聘熾前後凡五往反和議未決而卒於南宋人重贈而歸其柩葬燕子六人何寶字誠卿其先北京人父道忠仕金為北京留守寶少孤依叔父居及長通諸國譯語驍勇善騎射當中原盜起錦州張鯨自立為臨海王既納款尋以叛伏誅鯨弟致初以叛謀於寶寶厲聲叱曰天之厯數在朔方汝恣為不軌

元史卷二十七 列傳 五

徒自斃耳乃籍戶口一萬募兵三千丙子春來歸大將木華黎與論兵極稱賞遂引見太祖獻軍民之數帝大悅命從木華黎充前鋒與張致軍遇於神水縣陷陣死戰獲戰馬兵械甚眾以功授帳前軍馬都彈壓詔木華黎攻齊東而寶帥師四千取燕南齊西之地首擊邢州徇趙郡取魏鄴下博關襲曹濮恩德泰安濟寧勢如破竹薄濰州與木華黎會遷兵馬都鎮撫從取大同雁門石隰等州引兵略太原平陽河中京兆諸城所向款附以功授元帥左監軍武仙復叛據邢寶帥師五千圍之立雲梯先登橫稍突之城破武仙走寶下令禁剽掠士民安堵遂戍邢州分兵攻汴陳蔡唐鄧許鈞睢鄭毫穎所至有功賜金虎符便宣行元帥府事邢因武僊之亂歲屢饑請移匠局于博博值兵

火後物貨不通寶以絲數印置會子權行一方民獲賈遷之利朝太宗於幄殿賜坐與論軍中故事欲授以征行元帥寶叩頭以右臂受創不能舉辭許之授以漢字宣命充御用局人匠達魯花赤子孫世其爵

按竺爾

按竺爾雍古氏其先居雲中塞上父顯公為金羣牧使驛所牧馬來歸太祖命仍其官按竺爾幼鞠於外祖尤要甲家譌為趙家因姓趙氏年十四從皇子察合台大獵有二虎突出再射殪之由是以善射名從太祖西征尋思千阿里麻里等國以功為千戶從征積石圍河州破臨洮攻德順鞏昌皆有功駐兵秦州太宗即位尊察合台王為皇兄以按竺爾為元帥從皇兄鎮剛丹州自燉煌置驛抵玉關

元史卷二十七 列傳 五

通西域從定關隴圍鳳翔按竺爾分兵攻西南隅城上礮石亂下選死士先登拔其城斬金將劉興哥分兵攻西和州宋將疆俊領眾數萬堅壁清野以老我師按竺爾率死士罵城下挑戰俊怒率眾出陳按竺爾佯走俊追之因以奇兵奪其城伏兵要其歸轉戰數十里斬首數千級禽俊餘眾退保仇池進擊拔之從攻平涼慶陽邠原靈皆降涇州復叛殺守將郭元恕眾議屠之按竺爾但誅首惡師還原州降民棄老幼夜亡走眾曰此必反也宜誅之以警其餘按竺爾曰此輩懼吾驅之北徙耳遣人諭之謂汝等若走以軍法治罪父母妻子併誅夷汝歸保無他明年草青具牛酒迎師於此州民皆復歸土豪陳苟集數千人潛新寨諸洞眾議以火攻之按竺爾曰招諭不出攻之未晚遂

偕數騎抵寨縱馬解弓矢召苟遙語折矢與爲誓苟黨羅拜皆降金守潼關攻之不克皇弟拖雷分兵由山南入金境按竺爾爲先鋒趣散關宋人已燒絕棧道復由兩當縣出魚關軍沔州乃假道於宋興元制置使桂如淵曰宋饑金久矣何不藉我兵鋒一洗國恥今欲假道南鄭由金洋達唐鄧會大兵以滅金豈獨爲吾之利亦宋之利也如淵度軍已壓境勢不徒還遂遣人導師武休關東抵鄧州西破小關金人大駭其守帥完顏合達伊刺蒲阿帥兵數十萬相拒於鄧我師不與戰直趣鈞州與親王按赤台合陳三峯山下會天大雪金兵成列按竺爾先率所部精兵迎擊於前諸軍乘之金師敗績癸巳金主奔蔡從圍蔡金亡初金將郭斌自鳳翔突圍出保金蘭定會四州至是命按

元史卷二十七 列傳

六

竺爾往取之圍斌於會州食盡將走敗之子城門兵入城巷戰死傷甚眾斌闔門死之按竺爾命保其遺孤遂定四州金將汪世顯守鞏州皇子闊端圍之未下遣按竺爾等往招之世顯率眾來降皇兄嘉其材勇賞賚甚厚賜名拔都拜征行大元帥丙申大軍伐蜀皇子闊端出大散關分兵令宗王穆直等出陰平郡期會於成都按竺爾領礮手兵爲先鋒破宕昌殘階州攻文州數月不下謀知城中無井乃奪其汲道率勇士梯城先登拔之因招徠吐蕃酋長十族皆賜以銀符略定龍州遂與大散軍合進克成都師還成都復叛宗王議以漢陽當隴蜀之衝宋及吐蕃利于入寇宜得良將以鎮之遂分蒙古千戶五人隸按竺爾麾下以往按竺爾命侯和尙南戍沔州之石門朮魯西戍階

州之兩水謹斥埃嚴巡邏西南諸州不敢犯從元帥塔海率諸翼兵伐蜀克隆慶攻重慶圖萬州宋人將舟師數百艘逆流迎戰按竺爾順流率勁兵乘巨筏浮草舟於其間弓弩雨射宋人不能敵敗諸夔門辛丑伐西川破二十餘城成都守將田顯開北門以納師獲宋制置使陳隆之斬之進拔漢州明年會大軍連破遂寧瀘敘資等州後又赴秦中安輯涇邠二州既而階文復叛憲宗卽位召按竺爾還舊鎮遣將直搗江油平之世祖中統元年親王阿里不哥遣其將阿藍答渾都海圖據關隴帝遣宗王冷丹哈必赤阿曷馬西討時按竺爾已委軍於其子至是曰今內難方殷浸亂關隴豈臣子安臥時邪吾雖老尙能破賊遂引兵出刪丹之耀碑谷與大軍合戰會大風晝晦戰至晡大

元史卷二十七 列傳

七

敗之斬馘無算按竺爾與總帥汪良臣獲阿藍答渾都海等捷聞帝賜璽書褒美賜弓矢錦衣四年卒封秦國公諡武宣子十人徹理國寶最知名徹理襲職爲元帥嘗從父攻瀘州降宋將劉整宋將姚德壁雲頂山大軍圍之徹理率部兵由水門先登破其壁國寶從父軍中軍務悉以委之攻重慶并掠合州以歸中統元年阿藍答渾都將火都據吐蕃之點西嶺國寶攝帥事討之曰此窮寇也宜少緩以計破之遂以精兵襲其後據險要其西走挑戰不出斂兵自固相持兩月潛兵出其不意禽殺之捷聞賜弓矢金綺及按竺爾告老兄徹理襲行元帥病不視事國寶乃遣弟國能持金帛說降吐蕃酋長入覲奏請城文州屯兵鎮守招降扶州諸羌酋長圖山川形勢以獻詔授其酋長爲萬

戶千戶賜國寶金幣至元四年卒追封梁國公諡忠定子世榮襲職世延別見中葉言臣傳徹理子步魯合達至元開平蜀取嘉定重慶及征金齒皆預有功授征行元帥雲南萬戶府達魯花赤舊史步魯合達別傳今并附

史天倪 子棹 弟王善 王義 從弟天祥 王守道 王

史天倪字和甫燕京永清人曾祖倫少任俠因築室發土得金始饒於財建家塾招徠學者所保全豪士及陷俘士族甚眾歲發粟八萬石振饑子成珪有父風當金末盜起悉散家財以俠稱於河朔孫秉直好讀書尚氣義歲癸酉木華黎統兵南伐所向殘破惟降者得免乃率鄉里數千人詣涿州軍門降木華黎欲大用秉直秉直辭乃以其子天倪為萬戶而命秉直屯霸州遠近來附十餘萬家尋

元史卷二十七 列傳 六

遷之漠北降人道饑秉直分以所賜牛羊全活甚眾從下北京詔以烏耶爾為北京路都元帥秉直行尚書六部事主餽餉卒年七十一子三長天倪次天安次天澤天澤自有傳天倪始生之夕白氣貫庭成童姿貌魁傑及長好學金大安末舉進士不第從父軍中木華黎見而奇之以萬戶統諸降卒從略地三關以南至東海所過城邑皆下因進言曰金棄燕遷汴已為失策遼水東西諸郡金之根本若得大寧以扼其喉襟則金雖有遼陽終不能保矣木華黎善之先是天倪曾祖史倫卒時河朔諸郡結清樂社四十餘每社近千人歲時祠倫守其保甲法至是天倪選社勇萬人為義兵號清樂軍以從弟天祥為先鋒所向無敵分兵略三河薊州諸砦望風款服甲戌朝太祖於燕之幄

殿所陳皆稱旨授馬步軍都統管領二十四萬戶從木華黎攻高州又從攻北京皆不戰而克乙亥授右副都元帥改賜金虎符奉詔南征真定帥武僊固守不下遂移軍圍大名眾謂城堅不可擊天倪使攻其西南角勁卒屢上屢卻天倪先登守者辟易遂破其城會木華黎兵於燕南徇山東中山趙邢威磁洺諸州郡皆下又從木華黎徇河東至絳州其團樓發石牢不可破天倪命穴其城旁地虛樓陷遂拔之庚辰還軍真定木華黎欲攻城天祥請曰攻之恐戮及無辜不如先往招諭倘再不從攻之未晚乃往見僊許以名爵僊喜遂降乃以天倪權知河北西路兵馬都元帥武僊副之天倪言今中原粗定而所過猶縱鈔掠非王者弔民伐罪意且王奉天子命為天下除暴豈可效他

元史卷二十七 列傳 七

軍所為木華黎即下令禁剽虜軍中肅然辛巳降懷潞澤三州壬午破濟南水砦癸未徇山西遂克三關不浹旬兵至河衛喜曰河衛者夷門之限也河衛既破則夷門豈能守乎時嚴實以兵來赴請自攻河衛天倪曰完顏合達及蒲瓦亦勅敵也實輕敵固請當之明日實與蒲瓦兵遇於南門合達兵自北夾攻實兵敗被執天倪曰合達以實歸汴度必在今夕過河亟伏精兵延津渡口果夜縛實過伏起截擊奪實歸未幾帝命天倪回軍真定宋大名總管彭義斌犯河朔天倪逆戰於恩州敗之乙酉師還聞武僊之黨據西山腰水鐵壁二砦叛天倪直擣其巢掩殺之僊怒謀作亂乃設宴邀天倪至刺殺之天倪之赴真定也秉直密戒之曰觀武僊辭氣終不為我用宜備之天倪曰我以

赤心待人人必不相負願無慮府僚王守道亦曰僊位居公下意每不平豈能鬱鬱久居此宐先事爲備亦不聽天倪死前一日擊鞠夜歸有大星隕馬前有聲心惡之尋果及禍年僅三十九妻程氏聞亂恐汚於賊乃自殺子楫權從秉直先歸北京得存

楫字大濟歲壬寅天澤引楫入見太宗奏曰臣兄天倪死事時二子尙幼臣受詔攝行府事今楫已成人乞解職授之帝嘉嘆曰卿此讓固可嘉然朕自有官與之卽以楫爲眞定兵馬都總管請寬包銀之徵立銀鈔相權之法罷運鹽按籍計口給食之令民皆以爲便元氏民有愬府僚於達官者質之無實將抵之死楫力爲營解達官曰是人陷汝僚死地何反抹之楫曰誅之固足懲後未若宥之以愧

元史卷二十七 列傳

二十

其心況人命至重豈宐以妄言故加極刑卒杖遣之中統元年同判宣撫司事楫謹身率先明政化信賞罰任賢良汰貪墨恤勞獨眞定所屬三十餘城咸懷其德所舉州縣佐史有文學者三十餘人後皆知名會天澤言兵民之柄不可併居一門行之請自臣家始楫卽日解綬歸弟權亦以萬戶於至元時征宋襄樊有戰功

權字子明天倪天澤之從子也父天安字全甫初史秉直降木華黎以其長子天倪爲萬戶而質其仲子天安於軍中從略地關右聞天倪被難卽從白霄率眾來會天澤併力破僊命權眞定等路萬戶卒權年二十餘甲寅歲初籍新軍天澤奏權爲征行萬戶配以眞定彰德衛州懷孟新軍戍唐鄧憲宗伐蜀從天澤朝帝於大散關命爲前鋒宋

立劍州僑治於苦竹崖前阻絕澗深數百尺恃險不備帝使權偵之權率健卒數十縋而下得其所以致師處急取之宋人懼乃降翼日大宴帝顧皇后命飲權酒諭曰卿父子世篤忠貞故寵卿殊禮中統初從討李璫於濟南城西南有大澗互歷山樞一軍獨當其險夾澗豎木柵爲城淫雨暴漲木柵盡壞權計賊夜必乘吾隙命作葦炬數百置城上逮三鼓賊果至擲飛炬照之風怒火烈弓弩齊發賊眾大潰自相蹂躪死者不可勝計未幾璫就禽至元六年高麗人金通精據珍島以叛討之歲餘不下七年進樞鳳州經略使時賊勢方張而炎暑海氣蒸鬱弓力弛弱戰不得力權分軍爲三多張旗幟以疑之而潛師擣其巢穴大破之其地悉平十二年復以萬戶從丞相伯顏伐宋宋平

元史卷二十七 列傳

三

官至山東東西道宣慰使

天祥天倪之從弟也天倪父曰秉直天祥父曰懷德隨秉直迎降於木華黎就領其黑軍隸帳下署天祥都鎮撫選降卒勇者二百人使領之招徠丁壯得眾萬餘從取霸州文安大城滄濱長山等城東下淄沂密三州所至皆先登從略地高州拔金源等十五城惟太寧固守不下天祥獲金將完顏胡速木華黎欲殺之天祥曰殺一人無損於敵適驅天下之人爲敵也且嘗許以不死而殺之無以取信不若從而用之乃以爲千戶復合眾攻其城懷德中流矢卒乃命天祥領其軍乙亥與大帥烏耶爾降金北京畱守銀荅忽等進攻傍近諸寨所得降將皆釋用之命各將舊卒付空名告身使諭二十餘寨悉降得老幼數萬勝兵八

千西乾河蒼魯五指山楊趙奴獨固守不下大小百餘戰皆破斬之得戶二萬又與烏耶爾討平興州趙守玉進克興中府從木華黎討平錦州張致會契丹漢軍禽關肅復利州殺劉祿於銀冶得錦州舊將杜節并黑軍五百人即命統之丙子春覲太祖於魚兒濼授提控元帥遷監軍兵馬元帥丁丑夏命權兵馬都元帥蒙古漢軍黑軍並聽節制從下河東平陽河中崙嵐絳石隰吉霍等八十餘城還師至真定諭降武僊木華黎乃以天倪鎮真定而使天祥引兵南屯邢西遙水山下仙兄武貴以萬人壁山上天祥攜完顏胡速及黑軍百人由烏道板援而上潰之仙驚曰公殆有羽翼邪從取綬德鄰坊等五十餘城又從攻破青龍金勝諸堡得花帽軍五千人皆金精兵也癸未春還軍

元史卷二十七 列傳

三

命總十二萬戶鎮河中徇西夏破賀蘭山被射傷額庚寅朝太宗於虛胸河以病創乞致仕不允辛卯太宗用兵河南強之從行主漕餉頰骨舊中流矢至是創再發鏃自口出又征西夏時額傷出血過多晚遂喪明而卒天祥幼有大志性不嗜酒喜稼穡好施予乙未括戶縱其奴千餘口俾爲民在軍屢諫屠城所全無算

王守道者爲真定副帥知金降將武仙有異圖勸天倪爲備不聽及變起守道從史氏昆弟攻復真定武仙執守道家人以重幣誘之不從卒復仇立功官至五路萬戶又王王者趙州寧晉人長身駢脅多力金季爲萬戶鎮趙州木華黎下中原王率眾降命領本部軍從攻邢洺磁三州濟南諸郡號長漢萬戶從攻澤潞諸州獨潞州堅壁不下王

力戰流矢中左目竟拔其城又破平陽下太原汾代等州師還署元帥府監軍以趙州四十寨隸焉從蕭乃台史天澤攻敗武仙於真定生禽宋將彭義斌駐軍寧晉東里寨王家在焉仙遣人齎命誘玉妻妻拒曰妾豈可使夫懷二心於國家邪仙圍之數日殺其子寧壽玉聞之領數騎突其圍斬獲數百人而還仙遣人追之不敢進乃盡發玉先世二十七家棄骸滿道玉從史天澤諸將擊仙於趙州仙糧絕走雙門寨圍之會大風仙獨脫走斬其將四十三人真定遂平加趙州慶源軍節度副使有民負西域賈銀倍其母不能償玉出銀五千兩代償之又出家奴二百餘口爲良民中統元年卒子忱少宿衛明孝太子東宮授山北遼東道按察司副使改河河南道按察副使鋤豪強

元史卷二十七 列傳

三

劾蠹吏禁賣奴恤戍軍平反冤獄頗多惠政王善字子善真定藁城人父增監本縣酒務以孝行稱善資儀雄偉聲若洪鐘尤精騎射金貞祐播遷羣盜蜂起眾推善爲長盜不能犯權中山府治中時武仙鎮真定陰蓄異志忌善威名密令知府李濟府判郭安圖之己卯秋濟安張宴伏兵召計事善覺即還集帳下士數十攻殺濟安率眾來歸授金符同知中山府事是年冬以兵三百攻武仙仙遣將率精銳二千拒戰善禽斬之仙走獲鹿委其佐段琛城守復戰拔之入據其城軍勢大振自中山以南降州郡四十二遷中山真定等路招討使屯藁城壬午升藁城爲匡國軍以善行帥府事仙窮迫請降詔命復舊鎮善奏仙狼子野心終必反覆請修城隍備之未幾仙果叛率

眾來攻火及西門善出戰卻之追奪其所俘老幼四千仙自是不敢復入真定其部曲多來降從征河南至鄭州州將馬伯堅素聞善名登陴大呼曰橐城王元帥在軍中否願以城降之善直前免胄與語伯堅果率眾出降善令軍中秋毫無犯民願從北渡者萬計授土田安集之進河北西路兵馬副都總管知中山府事屬縣新樂地居衝要民疲供給善均其勞逸所徵或未給輒出家貲代輸又放家僮五百人為民卒封冀國公諡武靖子慶淵為行軍千戶征淮南死次慶端字正甫初為水軍提領訓練士卒常如臨敵敗李瓊於老僧口又拒退宋兵於清口從世祖北征還進侍衛軍都指揮使建威武營以處衛兵各給田業別立神鋒軍親教以蹶張弩技作整暇堂屏利局浚渠構室

元史卷二十七 列傳

五

如治家事至元十九年改詹事丞時有司欲就威武貸粟數萬石濟饑民裕宗在東宮以問慶端慶端對曰兵民等耳何閒焉即命與之帝嘗遣近侍夜出伺察為邏卒所執近侍以實告卒曰軍中惟知將軍令不知其他帝聞賞以黑貂裘及親征乃顏命慶端以所部從時年六十餘與士卒同甘苦夜臥不解衣暇則俾士卒為軍市自相懋遷成宗即位拜中書左丞平章政事僉書樞密院事卒

王義字宜之真定寧晉人少有膽智讀書知大義河朔盜起縣人推義為長攝縣事尋號為都統木華黎兵至城下義率眾降入覲太祖授寧晉令兼趙州以南招撫使時兵亂民廢耕所在人相食縣東有藪澤周回百餘里中有小堡曰瀝城有魚藕菱芡之利乃畱偏將李直守寧晉身率

眾保瀝城全活甚眾擣金將李伯祥於趙州宵奪其城授趙冀二州招撫使從大軍南取鉅鹿洺州二城還軍至唐陽西九門遇金軍萬餘北行義伏兵桑林先以百騎挑之因稍卻誘近桑林伏起金兵大亂奔還獲其萬戶李虎拔束鹿深州遷深冀趙三州招撫使東鹿城無樓櫓兵少無糧金將武仙以兵四萬悉銳來攻謂一日可得也義隨機應拒積二十日不能下大小數十戰皆捷一夕義召將佐曰今城守雖有餘然外無援兵糧食將盡豈可坐而待斃率精銳三千銜枚夜出直擣仙營乘暗攻之殺數千人仙率餘眾遁還真定悉獲其軍資器仗庚辰拔冀州行深冀二州元帥府事武仙復遣盧秀李伯祥來襲率戰艦數百艘沿流而下義具舟楫於紀家莊截其下流所部士卒皆

元史卷二十七 列傳

五

水鄉人善水戰回旋開闔往來如風雨船接則躍登彼船奮戈疾擊敵莫能當殺千餘人進拔瀝城二將西走真定史天澤集諸道兵攻邢州盜趙大王久不能克義引兵薄其城一鼓下之獲其渠餘黨悉平義招散亡勸種藝深冀間遂為樂土

張柔

子弘略

何伯祥

張榮張宏

張柔字德剛易州定興人世力農柔善騎射以豪俠稱金貞祐間河北盜起柔聚族保西山東流寨練伍自衛盜不敢犯郡人張信假柔聲勢納流人女為妻柔鞭信而還其女信憾之謀結黨害柔未幾信有罪當誅柔救得免壯士多慕義從之金中都經略苗道潤承制授柔定興令累遷清州防禦使道潤表其才加遙領承寧軍節度使兼雄州

管內觀察使行元帥府事繼而道潤爲其副賈瑀所殺瑀遣使好辭來告曰吾得除道潤者以君不助兵故也柔叱使者曰所不滅汝復讎者有如此日撤道潤部曲誓眾復讎眾皆感泣適道潤麾下何伯祥得所佩金虎符以獻因推柔行經略使事聞加中都留守兼大興府尹本路經略使行元帥事戊寅元軍出紫荆口柔率所部逆戰狼牙嶺馬蹶被執遂以眾降太祖還其舊職得以便宣行事柔招集部曲下雄易安保諸州攻破賈瑀於孔山誅瑀剖其心祭道潤瑀郭收亦降盡有其眾徙治滿城金帥武仙會兵數萬來攻柔以兵數百出奇迎戰大破之乘勝下完州獲州佐甄全全慷慨就戮柔義而釋之且擢爲守使將部曲以從己卯仙復來攻敗走之進拔郎山祁州曲陽降

元史卷二十七 列傳

美

諸城寨既而中山叛柔引兵圍之與仙將葛鐵鎗戰於新樂又拒仙兵於滿城柔兩中流矢皆拔矢以戰仙敗走柔略地至鼓城單騎入城喻降之又敗仙於祁州進克深澤宣晉安平分遣別將攻下平棘棗城無極樂城諸縣關地千餘里由是深冀以北鎮定以東三十餘城緣山反側鹿兒野狸等寨相繼降附一月之間與仙十七戰輒勝方獻捷行在而易州軍叛逐其守慮應據西山馬頭寨柔聞之卽棄輜重還出奇計破其寨誅叛者加河北東西等路都元帥賜號拔都魯置官屬將士遷授有差燕帥孱赤台數凌柔柔不爲下乃譖柔於中都行臺曰張柔驍勇無敵向被執而降今委以兵柄戰勝攻取威震河朔失今不圖後必難制常欲殺我我不敢南也行臺召柔幽之士室孱赤

台施帳寢其上環以甲騎明日將殺之孱赤台一夕暴死柔乃得免金經略使固安王子昌善戰知名與信安張進連兵阻水爲固柔出其不意徑渡水生禽以還乙酉眞定武仙殺都元帥史天倪其弟天澤使來求援柔遣驍將喬惟忠等率千餘騎敗之遂分遣惟忠宋演略彰德洵齊魯聶福堅略青魏山東璽書授柔行軍千戶保州等處都元帥丙戌遣將以兵從國王孛羅攻李全於益都降之丁亥移鎮保州時兵火之餘荒廢十餘載盜出沒其間柔畫市井置廩廩疏溝渠通商惠工遂致殷富遷廟學於城東南增其舊制壬辰從皇弟拖雷伐金語其眾曰吾用兵殺人多矣寧無冤者自今非與敵對陳誓不殺圍汴京柔軍於城西北金兵屢出拒戰柔單騎陷陳金兵披靡又以兵合

元史卷二十七 列傳

美

擊金主於河北汴京降柔獨入史館取金寶錄并祕府圖書訪求耆德及燕趙故族十餘家釋金狀元王鶚於俘囚將戮之際衛送北歸又圍金主於睢陽於汝南金人啟南門死戰柔以步卒二十餘突其陳促聶福堅先登又遣張信據其內陞諸軍齊進金主自殺論者謂柔知復故帥之仇而力攻故主於危亡之際大諛安在焉入朝太宗歷數其戰功班諸帥上賜金虎符升軍民萬戶乙未從皇子闊出拔棗陽繼從大帥太赤攻徐邳丁酉詔屯兵曹武以逼宋道山九里關柔率所部先或言關甚險恐有伏不若與大軍俱進不聽以二十騎徑進據關方解甲食而宋兵出兩山間圍數重眾皆失色柔單騎馳突潰圍大軍繼至遂達曹武悉下緣山諸堡攻洪山寨破之遂營山下偶出略

地宋兵乘虛來襲，還遇之，鏖戰至暮，大敗宋師，斬其將校十有三人。遂會諸軍取光州，又進趣黃州，破三山寨，至大湖中，得戰艦沿江接戰，壁於黃州西北隅，有乘舟出者，柔曰：「此偵者也，夜必襲吾，不備乃分軍爲三，以待之二。」鼓宋師果至，柔遮擊破之，溺死者不可計。攻其東門，矢石雨注，柔率死士十餘奮戈大呼，所向披靡。宋師懼，請和乃還。以二百騎赴大帥察罕於滁州，時廬泗盱眙安豐間宋屯，成相望，斥埃甚嚴，柔且戰且前，凡二十餘戰，始至滁，察罕以滁久不拔，欲解去，柔請決戰，既陳，與宋驍將遇，柔佯卻而反，槌擊之，墜地，宋將忽曳柔轡入其陳，飛石中柔鼻，兩軍互鬪，始得還，裏創復戰，夜遣兵劫其營，焚城東南隅，柔銳卒五六十人先登，拔之，詔以本官節制河南諸翼兵馬。

元史卷二十七 列傳

柔

八萬戶會伐宋，柔率師自五河口濟淮，略和州諸城，師還，察罕奏分部下千人屯田於襄城，而柔總諸軍鎮杞，初河決於汴西南，入陳留，分爲三杞，居其中，渾宋兵乘舟楫之，便駐亳泗，犯汴洛，以擾河南，柔乃即故杞之東西中三山，夾河順般水勢，築連城，結浮梁，進戰退耕，敵不敢至。會諸軍攻破壽州，柔欲留兵守之，察罕不從，又敗宋師於泗州，還杞，辛亥，憲宗即位，改授金虎符，仍軍民萬戶，甲寅，移鎮亳州，環亳皆水，非舟楫不達，柔登城壁爲橋，梁屬汴堤，以通商賈，復建孔子廟，設校官弟子員，詔賜金符九銀符十，九頒將校之有功者，己未，分其裨將一從，憲宗征蜀，一從宗王塔察爾攻荆山，而自從世祖攻鄂，世祖由大勝關，柔由虎頭關，破宋兵於沙窩，進敗其守關兵，世祖自陽邏渡。

江促柔會兵攻鄂，百餘日不能下，世祖曰：「吾猶獵者不能禽，圈中豕野獵以供汝食，汝可破圈取之。」柔乃令何伯祥作鷄車，洞掘其城，別遣勇士先登，攻其西南陬，鄂城垂破，會憲宗凶問至，宋亦行成，世祖遂北還，命柔統領蒙古漢軍，以俟復命，城白鹿磯爲久駐計，世祖即位，阿里不哥反，世祖北征，詔柔班師入衛，至盧朐河，分其兵三千衛京師，遣子弘慶入質，二年以金寶錄獻諸朝，且請致仕，封安肅公，命第八子弘略襲職，至元四年進封蔡國公，卒年七十，九諡武康延祐五年加封汝南王，諡忠武子十有一人，弘略弘範取顯弘範別見平宋功臣傳。

元史卷二十七 列傳

柔

者中統三年李壇反，求救於宋，宋將夏貴自蘄乘虛北奪亳，滕徐宿邳滄濱七州，新蔡符離，利津四縣，般守將弘略率戰船遏之，渦口貴退保，斷弘略發，亳軍攻之，水陸並進，宋兵素憚亳軍，焚城宵遁，追般殆盡，獲軍資不可計，盡復所失地，李壇既誅，追問當時與壇通書者，獨弘略書皆勸以忠義，事得釋，朝廷懲壇叛逆，務裁諸侯權，因解弘略兵職，宿衛京師，賜只孫冠服，以從，享至元十三年授淮東道宣慰使，十四年宋廣王昺據閩，廣時東海縣儲粟數萬行省檄弘略將兵三千戍之，命造舟運粟入淮安，弘略顧民舟有能載粟十石者與一石人爭趨之，一月而畢，十六年遷江西宣慰使，饒州盜起，犯都昌，與南康止隔一湖，弘略恐境內有相扇起者，乃使人直擣其巢穴，生縛賊酋。

餘黨潰散下令曰不操兵者皆為平民餘無所問卒諡忠毅

何伯祥易州易縣人從張柔來歸太祖定河朔惟保定王子昌信安張進堅守不下子昌金驍將也柔命伯祥以兵逼其城禽子昌走張進遂悉平西山諸寨復攻汴梁拔洛陽圍歸德破蔡州論功居最授易州等處軍民總管丁酉從主帥察罕益德伐宋伯祥拔三十餘柵獲戰艦千餘艘連破山寨器械山積以功賜錦衣金甲壬子諸軍入宋境察罕益德自他道還諸軍倉皇失措伯祥曰退必為敵所遏不若出不意深入其地使彼不我測遂率兵直抵司空寨疏布營壘陵高伐木為攻取勢既夜命為五營營火十炬伏精銳於險要黎明鼓行而北宋兵果來追伏發驚

元史卷二十七 列傳 手

潰追擊大破之轉戰百餘里他軍不能歸者皆賴以出世祖南伐伯祥從征卒於軍追封易國公諡武昌子瑋別見中葉言臣傳

張榮字世輝濟南歷城人狀貌奇偉嘗從軍為流矢貫背拔之不出令人以足抵其額而拔之神色自若金季羣盜起榮率鄉民據濟南巒堂嶺眾稍盛遂略章丘鄒平濟陽長山辛市蒲臺新城及淄州之地而有之兵至則清野入山歲丙戌東平順天皆內屬榮遂版其民五十萬納款於按亦台那衍引見太祖問以孤軍數載抗命之故對曰山東地廣人稠因守者非人悉為陛下有臣若但有倚恃亦不款服太祖壯之拊其背曰真賽因拔都也授山東行尙書省兼兵馬都元帥知濟南府事時賈易用銀民爭發墓

劫取榮下令禁絕太宗時集諸侯議取汴榮請先六軍以清蹕道詔位諸侯上辛卯軍至河上榮率死士宵濟奪戰船五十艘麾抵北岸濟師從攻河南睢陽沛徐邳獲其大將國用安諸將有屢議屠戮所下城者又議欲殺俘虜烹其油以灌城者榮皆力爭止之復從攻宋棗陽仇城六安脫民於兵甚眾時河南民北徙至濟南榮令民間分以田宅課以樹畜曠野闢為樂土是歲中書攷績第一授濟南路萬戶世祖即位封濟南公致仕卒子七人皆貴顯孫四十年宏襲爵改真定府總管平李璫及征襄樊有功至元二年以盜用官物坐罪免元初諸侯各有分邑開府史天澤之於真定嚴實之於東平張柔之於保定皆地方二三千人勝兵各數萬競收納賢俊以繫民望及中統建元罷

元史卷二十七 列傳 手

侯置守諸材萃於朝及分布內外者所在皆是宏雖武人亦喜養士癸巳河南平如前狀元王鶚監察御史樂夔進士敬鉉皆在其門下館客則陵川郝經掌書記則王汝明也汝明本燕人長身美髯議論開爽卓然戰國傑士宏嘗遣之奏軍機於御幄指陳開示如在目中上為聳動因問曰此若語邪拔都語邪對曰意則拔都語則臣也所交多文士張起巖狀宏行事鋪張功績而元史不載今附其祖榮傳後

嚴實 子忠濟忠嗣 張晉亨 趙天錫 王玉汝 岳存

嚴實字武叔泰安長清人略知書少豪不治生產喜交接施與落魄里社閒屢以事繫獄俠少輩為出死力脫之癸酉秋太祖率兵自紫荆口入分略山東河北河東歸金東

平行臺調民爲兵以實爲百戶甲戌春以破泰安賊功權長清令宋兵襲破長清實以兵復之或譖實陰與宋結行臺以兵圍之實挈家走宋宋以爲濟南治中分兵四出所至無不下於是太行之東皆受實節制庚辰三月金河南軍攻彰德實請救於宋主將張林逗遛不行實獨以兵赴之比至而城破實知宋不足恃七月挈所部兵及大名磁洺恩博滑濬三府六州戶三十萬來歸木華黎承制拜實行尚書省事攻下曹濮單三州進取東平壬午宋將彭義斌率師克山東郡縣響應遂於乙酉四月圍東平實潛約次將李里海合兵攻之李里海兵久不至城中食且盡乃與義斌連和義斌亦欲藉實取河朔而後圖之聽實自領麾下眾數千七月義斌下真定道西山與李里海等軍

元史卷二十七 列傳

三

相望分實以帳下兵陽助而陰伺之實知其計遂赴李里海軍與義斌戰史天澤復以銳卒略其後宋兵潰禽義斌不旬月京東州縣復爲實有是冬從木華黎子弟兵取彰德明年取濮東平又明年取鄆都庚寅四月朝太宗於牛心之幄殿帝賜之坐宴享終日賜以虎符甲午朝於和林授東平路行軍萬戶偏裨賜金符者八人先是實所統五十餘城長東諸侯者十五年至是上雅知實年老不便鞍馬詔毋事征伐初木華黎之弟帶孫攻下彰德怒其反覆欲屠其城實曰此國家舊民吾兵力不能及爲所脅從果有何罪繼復欲屠濮州實言百姓未嘗拒敵豈可與執兵臨陳者同戮不若留之以供芻秣由是得免者數萬元兵由武關出襄鄧河南俘戮者多實載金緡往贖且約束諸

將毋妄殺掠又多作糜粥以哺難民全活者眾儒士遭兵亂多失業無依實辟其賢者置之幕府修學校招生徒一時名士多以實爲歸實爲合散亡業單貧舉喪助婚嫁人尤德之部曲有逃回益都者被獲皆自分必死實置不問王義深者義斌別將實族在東平向爲所害河南破實獲義深妻子厚周卹之送還鄉里人推爲長者太宗十二年卒中統二年追封魯國公諡武惠

忠濟實第二子也襲東平路行軍萬戶統千戶十有七會括新軍山東益兵二萬餘弟忠嗣忠範皆爲萬戶而仍統於忠濟已末世祖南伐詔率師由閒道會鄂忠濟選勇敢二千人爲前鋒甲仗精銳所向無前中統二年召還命忠範代之忠範後持國書使宋行至獨松關爲宋所殺方忠

元史卷二十七 列傳

三

濟治東平日舉息錢代民納逋賦歲久積多至四十三萬七千餘錠及謝事債家爭持券責償帝聞之悉命發內藏以代東平廟學故隘陋改卜高爽地於城東教養諸生後多顯者幕僚如宋子貞劉肅李昶徐世隆俱爲名臣至元三十年卒後諡莊孝

忠嗣實第三子也少從張澄商挺李楨學略知經史大義初授東平路管軍萬戶從忠濟略地揚州取邵伯埭又從忠濟渡淮分兵出挂車嶺達蘄州及渡江抵鄂分部攻城九十餘日戰甚六師還授金虎符中統三年李璫叛引宋兵攻蘄縣齊魯山寨皆陷忠嗣從大帥按脫救蘄縣復徐州誅叛將李杲哥攻鄒之嶧山滕之身山多所斬獲賜銀幣四年朝廷懲青齊之亂居大藩者子弟不得親政於是

罷官家居十年卒

張晉亨者冀州南宮人其兄顯以冀州數道之眾從嚴實來歸進顯安武軍節度使西征戰沒木華黎署晉亨襲顯爵晉亨涉獵書史小心臨事實器之以女妻焉實征澤潞偏將李信晁海相繼降於宋晉亨跋涉險阻晝伏夜行僅免於難從實子忠貞入質丁亥從國王孛羅征益都有功從實征淮楚河南為東平路行軍千戶圍安慶攻光之定城略信陽拔六安大小數十戰策功居多實卒權知東平府事憲宗即位從忠濟入覲時包銀制行朝議戶賦銀六兩晉亨曰五方土產各異隨其產為賦則民便而易足必責輸銀雖破民之產有不能辦者大臣以聞乃得調戶額三之一仍聽民輸他物遂為定制帝欲賜晉亨金虎符辭

元史卷二十七 列傳

書

曰虎符國之名器長一道者所佩臣隸忠濟麾下復佩虎符非制也帝益喜改賜璽書金符授恩州管民萬戶中統三年李璫叛晉亨從嚴忠範戰於遙牆濼勝之改本道與魯萬戶授金虎符成宿州首言汴堤南北沃壤閒曠宜屯田以資軍食乃分兵列營以時種藝選千夫長督勸之期年皆獲其利至元十一年從伐宋分道由安慶渡江戍鎮江戰焦山瓜洲皆有功十三年卒子好古好義皆能世其職又齊榮顯者聊城人亦實之女壻也以千戶從外舅來歸攻濠州及五河口屢立戰功舊史專傳今并附趙天錫者冠氏人太祖遣兵南下天錫自歸於防禦使蘇政政以為冠氏令乃挈縣人壁桃源天平諸山歲辛巳春歸行臺東平嚴實實素知天錫名擢隸帳下從征上黨以

功授元帥左都監兼冠氏令如故甲申宋將彭義斌據大名冠氏元帥李全降之人心頗搖天錫率將佐往依大將李里海軍未幾破義斌於真定授左副元帥同知大名路兵馬都總管事李全在大名結其帥蘇椿鄭偶以圖冠氏一日偶以萬人來攻天錫率死士乘城力戰三晝夜破走之卒於冠氏子賁亨襲行軍千戶從世祖渡江攻鄂後又攻襄樊皆有功至元十一年修東西正陽城敗夏貴於淮益以濟南汴梁二路新軍十二年從攻鎮江戰焦山江南平授處州路總管府達魯花赤未行適盜發潁浦行省檄為招討使率兵平之未幾處州青田縣李文龍章焱殺郡守七縣俱反賁亨率眾圍之賊棄城突走遂復處州招散亡立官府復敗賊眾二萬於惡溪南大將忽都台欲屠城

元史卷二十七 列傳

書

賁亨曰賊固可殺良民何辜將士虜掠子女玉帛杖而還之州民悅服十五年破龍泉縣賊二萬於慶元軍還賊水陸設伏賁亨擇步卒銳者居前賊不敢近改處州路管軍萬戶二十二年還冠氏卒
王玉汝字君璋鄆人金末遷民南渡玉汝奉其親從間道還行臺嚴實入據鄆署玉汝為掾史稍遷補行臺令史中書令耶律楚材過東平奇之版授東平路奏差官以事至京師遊楚材門待之若家人父子然實年老艱於從戎玉汝奏請以本府總管代之行夏津災玉汝奏請復其民一歲濟州長官欲以州直隸朝廷大名長官欲以冠氏十七城改隸大名玉汝皆辨正之朝議以嚴實東平地分封諸勳貴裂而為十各私其入與有司無相關玉汝夜哭於楚

材帳後明日召問故使詣帝前陳愬玉汝曰嚴實以三十萬戶歸朝廷崎嶇兵閒三稟其家室卒無異志豈與他降者同今裂其土地析其人民曷以勸有功邪太宗嘉其忠直由是得不分遷行臺知事仍遙領平陰令辛丑實子忠濟襲職授左右司郎中遂總行臺之政分封諸家以嚴氏總握其事頗不自便定宗即位皆聚闕下復欲剖分東平地眾心惴惴將聽命玉汝力排之事遂已憲宗即位有旨令常賦外歲出銀六兩謂之包採銀玉汝曰民力不支矣糾率諸路管民官愬之闕下得減三分之一累官泰定軍節度使兼兗州管內觀察使充行臺參議以病謝事杜門日以經史自娛忠濟使人謂曰君閒久矣可暫起爲吾分憂玉汝堅辭以參議印強委之不得已起視事僅五六日

元史卷二十七 列傳

美

裁畫署置煥然一新乙卯八月既望有星隕庭中已而玉汝卒

岳存者亦冠氏人初歸東平嚴實命同張天錫保冠氏會以死士百餘敗鄭佃兵萬餘於城西又從嚴實敗武仙於彰德西明年又率步騎五百敗金兵萬餘於開州南後任楚巨縣丞數年有惠政卒子天禎襲父職冠氏縣軍民彈壓從圍襄樊先登築正陽東西城造鎮江戰船戰焦山平奉化賊江南平從元帥張弘範觀世祖於柳林授福州路總管平尤溪及永新賊轉遷建康至大二年卒

董俊

董俊字用章真定藁城人少力田長涉書史善騎射金貞祐閒邊事方急藁城令令立的募兵射上中者拔爲將俊

一發破的遂將所募兵迎敵歲乙亥降於木華黎以勞擢知中山府事金將武僊據真定定武諸城皆應之俊率眾夜入真定逐僊收復定武諸城庚辰春金大發兵益僊來攻俊軍於曲陽復敗之黃山下僊窮遂降授俊行元帥府事駐藁城俊言武僊黠不可測終不爲我用請備之木華黎然其言未幾僊果叛都元帥史天倪據真定以叛旁郡縣皆爲僊守俊提孤軍居反側閒戰士不滿千人拒守藁城僊攻之期年無所利乃縱兵蹂禾稼俊呼語曰汝欲得民而奪之食無道賊不爲也僊慙去俊出兵掩擊敗之已復夜入真定僊走死乃納天倪弟天澤爲帥壬辰會諸軍圍汴明年金主棄汴奔歸德追圍之金兵夜出薄諸軍於水俊力戰死時年四十有八俊戰必持矛先士卒矢石交

元史卷二十七 列傳

美

下不動克汴時延儒生持其軸歸教諸子嘗曰射百日事耳詩書非積學不通當戊子歲朝行在所諸將獻戶口各增數要利俊曰民實少而欺以多他日上按數徵求何以應之貽害無窮吾不爲也行元帥府時有狂男子三百餘人期日作亂事覺止戮其渠深冀閒妖人惑眾圖爲不軌連逮者數萬人有司議當族俊力請主者但誅首惡永安節度使劉成叛降武僊於威州俊下令招之盡有其眾沃州民據天臺若爲盜既破降之他將利其子女俊曰城降而俘其家仁者不爲也眾皆義不取出行部時見民善治田者必召與歡語情則怒罰之故所部完實民惟恐其去也贈封壽國公諡忠烈改封趙國公子文炳文蔚見平宋功臣傳文用文忠及孫士選守簡見世祖文臣傳

王珣 子榮祖 李守賢

王珣字君寶本姓耶律氏金正隆末避難遼西更姓王氏遂爲義州開義人多力善騎射擊鞠年三十餘遇道士謂曰君相甚奇它日因一青馬而貴歲餘果得一青馬甚駿乘以進退周旋無不如意又嘗行凌水濱得一古刀其背銘曰舉無不克動必成功珣佩之每有警必先鳴及河朔兵動豪強各擁眾據地珣慨然曰世故如此大丈夫當自振拔否則爲人所制乃召諸鄉人諭以自保計眾推珣爲長旬月間招集遺民萬餘歲乙亥木華黎略地奚雲珣率吏民出迎命領義川軍事錦州張致僭號遣兵來掠義州珣卻之復以千騎來衝珣選十八騎突其前復令左右持角之其眾潰走獲其馬幾盡時木華黎圍興中府召珣全

元史卷二十七 列傳

珣

軍往會致乘虛夜襲殲其家珣以兵復開義進攻錦州致部將高益縛致妻子及其黨千餘人以獻珣但誅致家釋其餘授兵馬都元帥鎮遼東兼義川節度使珣貌黑人呼爲哈刺元帥子四人榮祖襲

榮祖字敬先珣長子也沈厚有勇音如洪鐘珣卒從嗣國王李羅入朝太祖聞其勇選力士三人迭與搏皆應手而倒欲畱置宿衛會金平章政事葛不哥行省於遼東咸平路宣撫使完顏萬奴僭號於開元遂命榮祖還副撒里台進討之拔蓋州宣城等十餘城葛不哥走死復攻拔石城虜生口千餘皆放爲民方城未下時榮祖遣部卒賈寶穴其城崩被壓眾謂已死弗顧也榮祖曰士忘身死國安忍棄去發石取之猶生一軍感激樂爲效死太宗初授北

京等路征行萬戶易金虎符伐高麗圍其王京高麗王奉表納貢進討萬奴禽之又從宗王按只台平趙祁於興州從唐兀台討祁黨於景莢間令軍中日抗我者誅毋及無辜由是免死者眾再從征高麗破十餘城略地三韓詔移鎮高麗平壤榮祖乃募民屯成闢地千里盡得諸島嶼城壘高麗遣其世子倬出降遂以倬入朝中統元年進沿邊招討使兼北京等路征行萬戶還鎮卒

李守賢字才叔大寧義州人也祖小字放軍嘗從金將攻宋淮南主將分命將校殺所掠俘苟有失亡者罪死放軍當殺五百人皆縱之去金大安初守賢率兄弟歸款於木華黎入朝太祖於行在所即分命其兄弟爲節度使及副都元帥守賢尋自錦州臨海軍遷河東南路兵馬都總管

元史卷二十七 列傳

賢

太宗南伐道平陽見田野不治詰問守賢以民貧乏耕具對詔給牛萬頭仍徙關中生口墾地河東時河中未下守賢言將士逗畱阻撓多所傷溺臣請自北面鑿城先登如其言城果下遂構浮橋明年自蒲津南濟潼關大破趙雄兵於芮城時方會師圍汴畱守賢屯嵩汝金兵十餘萬保少室山大平寨守賢以三千人介其中偵其帥完顏延壽無守禦正月望夕方擊球爲嬉守賢潛遣死士數十緣崖蟻附以登殺其守卒遂大縱兵入破之悉收餘眾以歸不兩旬諸寨望風俱下秦藍帥王祐聚眾數萬據虢之南山憚守賢威略以所部來附關東洛西遂定卒子毅嗣太宗時從征蜀漢攻礪門下萬州會戰瞿塘獲戰艦千餘艘授河東道行軍萬戶定宗即位之先年復進兵攻成都出廣

元出葭萌度木瓜坡由開道銜枚疾進襲破其伏兵長驅入成都戊午秋憲宗南伐明年入梁州師次江上造舟爲梁以通援兵且斷宋舟往來之路會江漲梁中絕復破宋舟師萬艘於江中至元七年卒子伯溫見忠義傳

張子良

子懋 王珍 楊傑 奧敦世英

張子良字漢臣涿州范陽人金末四方兵起所在募兵自保燕薊閒田絕耕稼子良聚州人阻水治舟筏取蒲魚自給從者日眾不能容子良乃部勒定興新城數萬口就食東平東平守納之久之守棄東平還汴檄子良南屯宿州又南屯壽州其民爲李全所劫子良走歸宿因以宿帥之眾奪全所劫老幼數萬以還復與宿帥斫其營全失其軍符走死揚州時金受重圍於汴聲援盡絕有國用安者圖

元史卷二十七 列傳

罕

以漣水之眾入援道阻游兵不能進子良與一偏將晝伏夜行得入汴達用安意金君臣以爲自天降也曲賜勞來因以徐宿授子良明年子良進米五百石於汴是時金令已不行於徐宿之閒民無耕者出城拾糶穉以食子良嚴兵護之以防鈔掠猝遇敵被重傷乃率其眾就食泗州泗守閱兵將圖之子良與麾下十數人卽軍中生縛其守民不欲北歸者多走旁郡子良資以舟楫無敢掠其財物歲戊戌率泗州西城二十五縣軍民十萬八千餘口因元帥阿朮魯來歸太宗命授京東路行尚書省兼都總帥自兵興以來子良轉徙南北依以全活者不可勝計中統二年命爲歸德泗州總管至元七年改授大名路總管兼府尹八年卒封清河郡侯諡翼敏子懋

懋字之美弱冠侍父子良官京東故懋領其眾從元帥阿朮魯軍立歸德府以其軍鎮之至元七年擢濟南諸路新軍千戶從破襄樊有功伯顏南征其行陳以鐔車弩爲先而眾軍繼之懋以勇鷲將弩前行凡所過山川道路險隘通梁筏平塹穿安營設伏出納奇計水陸並進伯顏甚倚重之師還駐瓜洲伯顏命懋往諭淮西夏貴副以兩介將騎士直趨合肥貴出迎設賓禮懋示以逆順禍福辭旨雄厲貴頓首上地圖降還報伯顏大喜復令徇鎮東安豐壽春懷遠淮安濠等州郡皆下復使徧諭列城軍民宣布德意十三年懋馳驛至上都伯顏上其功授泗州安撫司達魯花赤尋同知淮西道宣慰司事未幾又改授吉州路總管懋惡衣糲食慎刑平政新府治設義倉部使者劉宣馳

元史卷二十七 列傳

罕

之凡有所懲治朝至夕報豪強竦然郡萬戶蘇良恃勢暴民翼之者有十虎乃劾諸憲府盡誅十虎而黜良又率騎擣盜穴縛其渠遠近流亡來歸者數千家相率爲生祠以祀之十七年卒追封清河郡侯諡宣敏子孫能世其家王珍字國寶大名南樂人金末喪亂所在盜起南樂人楊鐵槍聚眾保鄉里太祖遣兵攻破河朔鐵槍以兵應之署珍軍前都彈壓鐵槍戰死眾推蘇椿代領其眾復爲宋將彭義斌所破降珍棄家閒道走還軍中復從速魯忽擊走義斌復大名授大名路安撫使俄與元帥梁仲先發兵攻椿克之授兵馬都元帥從刺不台破金將武僊於鄭州復敗金人於蕭縣從大軍攻國用安於徐邳拔之又從伐宋破光州棗陽廬壽滁州常身先諸將奪宋所築五河口新

城乘勝進破濠泗渦口歲庚子入見太宗言大名困於賊調請免逋糧五萬斛已而朝廷議分蒙古漢軍戍河南以珍戍睢州修城隍明斥埃宋兵不敢犯在鎮九年卒子文幹襲職從世祖攻鄂州先登中流矢從討平李璫論功當遷官文幹曰增秩榮止一身賜金則恩逮麾下迺賞以白金二千兩器皿百事雜綵數百縑悉頒給軍士中統三年制父兄子弟並仕同塗者罷其子弟文幹弟文禮為千戶文幹自陳願解己官而畱文禮詔從之改遷江東建康道按察使卒篋中錢僅七緡貧不能歸葬云

楊傑小字只哥或連字呼之燕京寶坻人太祖略地燕趙率族屬降附從攻遼左及從定西夏諸部有功己丑從阿朮魯攻信安阿朮魯知其材命裁決軍務信安城四面阻

元史卷二十七 列傳 聖

水其帥張進數月不降傑曰彼恃巨浸我師進不得利退不得歸不若往說之進見其來怒曰吾已斬二使汝不畏死邪傑無懼色從容言曰今齊魯燕趙地方數千里郡邑聞風納降獨君恃此一城內無軍儲外無兵援亡可立待故傑來說君欲使保富貴而免死亡為君計非為傑計也進默然曰姑待之凡三往乃降辛卯大名守蘇椿叛討獲之眾議屠城傑曰怒一人而族萬家非招來之道也眾是其言由是滑濬等州聞風納款壬辰師次徐州阻河不得濟傑探知有敵舟伏草澤中率數勁卒憑河擊之悉奪舟楫眾遂得渡獲河南諸郡降人三萬餘戶進攻徐州金將國用安拒戰傑率百餘騎突出陳後返擊大敗之禽一將而還皇大弟國王太祖弟督兵河上見之賜名拔都丁酉

從阿朮魯攻歸德磨諸將縛草筏渡濠抵城下梯城先登拔之進攻得五州十縣四堡二寨己亥敗宋兵於歸德城率舟師追擊轉戰中流溺死
奧敦世英女真人也奧敦氏其先世仕金為淄州刺史歲癸酉太祖兵下山東世英及弟保和以州迎降皆授萬戶世英遷德興府尹時金經略使苗道潤率眾欲復山西世英與戰克之將盡殺所俘其母責之曰汝華族也畏死而降此卒伍爾驅之死戰又忍殺之邪遂止世英從數騎巡部定襄卒於軍保和由萬戶屢遷元帥領真定保定順德諸道農事凡闢田二十餘萬畝改真定路勸農使致仕子希愷襲勸農使

元史卷二十七 列傳 聖

元史卷二十七終

元史卷二十八

平蜀功臣

元代用兵未有如攻蜀之難者... 變近則頓兵釣魚山二十載之久舍阿巴赤徑擣下游浮江東下之良策而血戰於孤城峭壁之間故余於攻蜀諸將自阿巴赤之外無取焉然以深入腹心之勁敵而不能破負隅之邊城亦從來守蜀者所未有故不閱襄陽數載之圍不知孟琪保障之功不閱合州重慶廿載之攻不知余玠設險之固勞臣効績功在苞桑千載若揭焉至於舊史所錄攻蜀諸將若張萬家奴若塔海帖木爾若王昔刺若劉恩若石抹苟舊作石抹狗若忽都若探馬赤若旦只爾若拜延若趙匣刺皆偏裨從事於劍涪巴瀘之間動列專傳

元史卷二十八 列傳

則舊史之蕪爾今茲雜之以應史法

汪世顯 子德臣良臣 孫惟正

汪世顯字仲明鞏昌鹽川人系出旺古族仕金官至鎮遠軍節度使鞏昌便宜總帥金亡郡縣皆降世顯獨堅守及皇子闊端駐兵城下始率眾降皇子問何不早降對曰大軍迭至莫知適從惟殿下仁武不殺竊意必能保全闔城軍民是以降也皇子大悅命從南征斷嘉陵擣大安田楊諸蠻結陣迎敵與宋將曹友聞相犄角世顯單騎突之殺數十人黎明大軍四合擊斬友聞遂入武信進逼資普軍葭萌宋將依山為柵世顯以數騎奪柵乘勝定資州略嘉定峨眉復東下次開州宋軍屯萬州南岸世顯即水北造船以疑之夜從上游鼓革舟襲破之追奔至巫峽遇宋援

列傳十四

軍斬首三千明年還攻重慶會大暑乃罷歸觀太宗錫金符易其名曰中山辛丑宋帥陳隆之貽書請戰聲言有眾百萬皇子集諸將議之世顯請行率軍薄成都隆之戰屢卻堅壁不出其部曲田顯約夜降隆之覺之世顯曰事急矣亟梯城入斬隆之復簡精銳五百擣漢州州兵三千出戰城閉盡沒三日大軍至克其城癸卯春拜便宜總帥秦鞏等二十餘州賜虎符世顯旋卒追封隴西郡公諡義武延祐七年加封隴右王子七人

德臣其次子也賜名田哥字舜輔年十四入宿衛侍游獵矢無虛發襲父爵從攻蜀將前軍出忠涪所向克獲進攻運山所乘馬中飛石死步戰拔外城宋將余玠攻漢中德臣馳赴之玠聞遁去憲宗賜印符命城沔州沔據嘉陵要

元史卷二十八 列傳

路德臣繕治室廬部署官屬數日而集進攻嘉定還至左綿雲頂進次隆慶宋軍連夜出斫營皆力戰破之又詔城綿谷復立利州諸戍皆聽節制世祖以皇弟有事西南德臣進見乞免利州賦稅及徭役漕糧屯田為長久計即命置行部於鞏立漕司於沔給餽餉奏乞以兄忠臣攝府事使已得專事利州利州為蜀喉襟蜀人憚其威名諸郡環視莫敢出關甲寅春早嘉陵漕舟水涇議者欲棄蜀去德臣曰國家以蜀事託我有死而已盡殺所乘馬饗士襲嘉川得糧二千餘石雲頂呂遠將兵五千邀戰即陣禽之復得糧五千石既而魚關金牛水陸運偕至屯田麥亦登食用遂給夏獲宋將縱令持檄諭苦竹堡守將以城降所俘城中民悉歸之東南戍卒數百有去志給券縱之皆泣謝

未幾山寨相繼輸款宋將余晦遣都統甘閏以兵數萬城
紫金山德臣選精卒銜枚夜襲破之苦竹堡復叛蜀兵二
萬來援大敗之獲糧百餘艘魚關至沔水迂回爲渡百有
八所至桴梁以濟戊午歲憲宗親征次漢中德臣朝行在
所初諸路軍成都猝爲宋人所圍德臣遣將赴之約曰先
破敵者奏領此城圍遂解詔候江南事定如約以城與之
帝幸綿谷駐北山以德臣立利州之功命立石紀之嘉陵
白水交會勢洶急德臣繫舟爲梁一夕而成如履坦途賜
白金三十斤仍命刻石紀功苦竹既逆命至是攻之巖壁
峭絕或請建天橋德臣不然之既而橋果無功乃率將士
魚貫先登帝望見歎曰何其身甚小而膽甚大也帝東下
德臣爲先鋒抵大獲山奪水門宋將楊大淵遣子乞活城

元史卷二十八 列傳

三

中人命引至帝前爲請曰日大淵率眾降已而運山青居
大良皆降攻釣魚山守臣王堅負險五月不下德臣單騎
至城下呼降語未既幾爲飛石所中遂感疾卒年三十有
六追封隴西郡公諡忠烈弟良臣弱冠卽從兄出征爲前
鋒以功擢裨帥兼便宜都府參議憲宗親征軍至六盤良
臣還鞏昌主供億水陸無壅世祖卽位阿藍荅及渾都海
逆命劫六盤府庫西垂騷動詔良臣討之軍營山丹按兵
不戰者兩月俄大舉至耀碑谷兩軍相當良臣慷慨誓眾
奮踊而前會大風揚沙晝晦殪其前鋒數十人乘勢衝之
賊大潰獲阿藍荅渾都海捷聞賜金虎符權便宜都總帥
中統二年平火里之叛轉同僉鞏昌路便宜都總帥宋將
管萬壽帥戰艘二百沂江而上欲掩青居山城良臣伏甲

數十艘邀其後而身先逆戰萬壽敗走伏發幾獲之三年
授征南都元帥良臣以釣魚山險絕不可攻奏請就近地
築城以扼其往來四年春攻重慶命元帥康士圖先驅迎
戰而良臣塞其歸路兵旣交良臣引兵橫擊之斷敵軍爲
二敵走趨城不得入盡殪之至元九年授西川行樞密院
事十一年進攻嘉定管萬壽堅守不出良臣大搜山谷果
得伏兵進壘薄城萬壽悉軍出戰大敗之伏尸蔽江萬壽
遂降良臣統兵順流而下紫雲瀘敘相繼款附還圍重慶
十三年敗宋涪州安撫王立救兵宋安撫張珩遣將乘虛
襲據瀘州良臣還軍平之十五年復與張珩戰於重慶
身中四矢明日督戰益急珩部將開門納降四川悉平捷
聞世祖召良臣入覲授四川行中書省左丞賜白貂裘良

元史卷二十八 列傳

四

臣陳治蜀十五事世祖嘉納成都瘡痍之餘良臣極意循
撫卒封梁國公子七人德臣子六人惟正最有名
惟正字公理好藏書從文士論議古今尤喜談兵時出游
獵則勒從騎爲攻守狀襲父爵守青居山初憲宗遣渾都
海以騎兵二萬守六盤又遣乞台不花守青居至是渾都
海叛乞台不花發兵爲應惟正卽命力士縛殺之世祖嘉
其功詔東川軍事悉聽處分中統三年鞏昌部長火都叛
蕃戎悍銳惟正恐賊鋒不可驟犯乃堅壘扼其前旁撓以
奇兵賊欲戰不得休則復撓之如是兩月知其糧盡勢蹙
始出戰屢捷火都佯遣三十人來約降卽遣其十人還俾
火都自來因潛兵躡其後出不意禽殺之至元七年宋人
修合州詔立武勝軍以拒之惟正臨嘉陵江作柵扼其水

道夜懸燈柵閒編竹爲籠中置火炬順地勢轉走照百步以防不虞宋人知有備不敢近九年帥兵掠忠涪破寨七禽守將六降戶千六百有奇捕虜五百會丞相伯顏克襄陽議取宋惟正奏曰蜀未下者數城耳不足攻宜順流東下直攻餘杭本根既拔此將焉往願以本兵由嘉陵下夔峽與伯顏會錢塘帝優詔答曰四川事重舍卿誰託異日蜀平功豈伯顏下邪十四年皇子安西王北伐而藩王圖魯叛於六盤王相府命別速帶領兵進討惟正副之別速帶不習兵師行無紀惟正爲正部曲肅行陳嚴斥埃凡軍政一倚重焉至六盤圖魯先據西山惟正分安西兵爲左右翼鞏兵獨居中去圖魯一里許皆下馬手弓圖魯遣百騎突陳惟正率親兵八十當之令引滿毋發將及矢下如雨傷其突騎之半盡走還惟正麾兵逐之圖魯軍遂披靡三踰山至蕭河遂進禽圖魯安西王大燕賞以金尊貂裘王妃以手製珠絡帽衣賜其母詔惟正入朝世祖推玉食食之賜白金五千兩錦衣一襲授開成路宣慰使十七年遷秦蜀行中書省左丞二十二卒年四十有四諡貞肅

元史卷二十八 列傳

五

阿巴赤一作八赤來氏寧夏人父朮速忽里歸太祖命掌膳事憲宗大舉伐宋攻釣魚山命諸將議進取朮速忽里曰川蜀之地三分我有其二所未附者巴江以下數十州耳地削勢弱兵糧皆仰給東南故死守以抗我師蜀地嚴險重慶合州又其藩屏皆新築之城依險爲固今頓兵堅城之下未見其利曷若城二城之間選銳卒五萬命宿將

阿巴赤

守之與成都舊兵相犄角以牽制其援師然後我師乘新集之銳用降人爲鄉導水陸東下破忠涪萬夔諸小郡平其城俘其民俟冬水涸瞿唐三峽不日可下出荆楚與鄂州渡江諸軍合勢如此則東南之事一舉可定其上流重慶合州孤危無援不攻自下矣諸將謂攻城則功在頃刻反以其言爲迂卒不用於是博選宿衛中材力可任用者以阿巴赤奉命往監元帥紐璘軍過宋人援兵駐重慶下流之銅羅峽夾江據厓爲壘宋都統甘順自夔州泝流西上乘舟來攻阿巴赤預積薪於二壘明火鼓譟矢石如雨順流而進宋人力戰不能支退保西岸斂兵自固黎明復至阿巴赤身率精兵緣厓而下戰艦復進宋人敗走殺傷數千人帝聞而壯之憲宗崩阿巴赤從父倍道歸燕世祖

元史卷二十八 列傳

六

卽位問以川蜀之事阿巴赤歷陳始末誦其父前所言以對世祖撫掌曰當時若從此策東南其足平乎朕在鄂渚日望上流之聲勢耳至元七年南征襄樊發河南北器械糧儲悉聚淮西之義陽慮宋人剽掠命阿巴赤督運二日而畢十八年授益都等路宣慰使都元帥發兵萬人開濟州運河成遷膠萊海道漕運使旋以淺澀不能行舟而罷二十二年授征東宣慰使都元帥皇子鎮南王征交趾授湖廣行中書省右丞召見世祖親解衣衣之二十四年改湖廣行尚書省右丞詔四省所發士馬俾阿巴赤閱視九月領中衛親軍千人翊導皇子至思明州交趾阻險拒守選精銳與戰女兒關斬馘萬計餘兵棄關走大軍深入進至交州陳日炬空城而遁遣使約降欲以賂緩我師阿

巴赤曰日烜棄巢穴而匿山海意待吾之敝而乘之耳春夏之交瘴癘作日烜弗就禽北兵何能持久今出兵分定其地招降納附勿縱士卒侵掠急捕日烜不可失也時諸將皆信日烜約降之說且修城居以待其至久之軍乏食日烜不至擁眾據竹洞安邦海口阿巴赤率兵往攻屢遇交兵晝夜迎戰交兵敗遁會將士多疫不能進而諸蠻復叛所得關隄皆失守乃議班師選諸軍步騎命先啟行且戰且行日數十合交兵據高險射毒矢將士裹瘡以戰諸軍護皇子出交趾阿巴赤中毒矢三首項股皆腫遂卒子寄僧為水達達屯田總管府達魯花赤乃顏叛戰於高麗雙城調萬安軍達魯花赤平黎蠻有功遷雷州路總管卒孫完者不花同知潮州路總管府事

元史卷二十八 列傳

七

李德輝 呂壘

李德輝字仲實通州潞縣人生五歲父疾革指德輝謂家人曰吾為吏治獄不任苛刻蒙德者眾天或報之是兒其大吾門乎既就外傳嗜學貧無以自資輒輟業年十六監酒豐州祿食足供母餘則市筆札錄書夜誦不休歎曰志士顧安此邪仕不足以匡君福民隱不足以悅親善身人壽幾何惡可無聞與草木同腐乃更求明師講習世祖在潛邸用劉秉忠薦使侍皇子講讀世祖受京兆分地擇廷臣能理財賦者俾調軍食立從宥府以德輝為副使時汪德臣屯重兵數萬於利州扼四川襟喉規進取每苦乏食德輝乃募民入粟縣谷散錢幣給鹽券為直陸輓興元水酒嘉陵未期年而軍儲充羨至元初由太原路總管入為

右三部尚書皇子安西王鎮關中奏以德輝為輔改安西王相至則視瀕涇營牧故地可得數千頃起廬舍疏溝澮假牛種田具與貧民屯田其中歲得粟麥芻藁萬計奉命以王相撫蜀時宋亡惟川蜀久不下宋制置使張珩守重慶安撫使王立守合州於是分建東西二川行樞密院令合丹闕里吉思領東院攻合州丞相不花與德輝領西院攻重慶德輝至成都各遣使請方略德輝曰宋已亡矣重慶以彈丸地不降何歸正以公輩利剽掠民不得有其子女懼而不來耳曷者中使奉璽書來赦公等不能推心置腹反示以詐使彼叛去堅其必死之心中使不喻詐計竟以不奉明詔復命非養寇而何況軍政不一行且敗矣未幾瀘州叛重慶圍亦潰詔以德輝行西院副使事復瀘州

元史卷二十八 列傳

八

再圍重慶尋拔之紹慶南平夔施思播諸山壁水柵皆下而東川樞府猶故將也惡相屬願獨軍圍合州初張珩守合州德輝以書遺珩曰天子威德遠播宋室既亡三宮皆北苟能早自歸誠必取將相與夏呂比且汝之為臣不親於宋之子孫合之為州不大於宋之天下彼之子孫尚舉天下歸朝汝猶偃然負阻窮山而曰吾忠於所事不亦惑哉珩不報既而合州遣李興張郃等偵事成都德輝獲之釋不殺至是復為書縱歸使諭其將王立如諭珩者未幾立使興等懷蠟書閒至成都言李公能自來即降德輝即從兵數百人馳赴東川先是重慶破珩走涪州自經死至是東院諸將皆曰公昔為書招珩詞亦偉矣而竟無功今立乃珩身校也習狙詐不信是特以計致公延命晷刻耳

德輝曰重慶已下合州孤立窮而來歸亦勢所必然吾豈肯讓諸君垂成之功誠懼諸君憤其抗命快心屠城吾欲爲國活此州民耳卽單舸濟江薄城下呼立出降承制授立權安撫事知合州川蜀盡平旣而東川行院恥無功言立久抗王師且嘗指斥憲宗奏請誅立械繫長安獄將殺之會行院都事呂塋以事至上都白畱守賀仁傑爲言於帝而安西王亦具立降附本末來上且言東川院臣憤德輝受降之故誣奏誅立帝召樞密臣責之仍命立爲合州安撫使以德輝爲安西行中書省左丞會西南夷羅施鬼國旣降復叛詔滇楚四川各出兵合計將壓境德輝適被命在播馳驛止三道兵勿進而遣使諭鬼國趣降其長阿察素熟德輝名曰是活合州李公邪卽身至播州泣告曰

元史卷二十八 列傳

九

吾屬微公來死且不降今願以百萬人民託公事聞詔許其降改鬼國爲順元路或譜德輝受鬼國馬千數帝曰是人朕所久知雖一羊不妄取也卒年六十三蠻夷聞訃哭之如私親王立自合州衰經率吏民拜哭護喪歸興元至今播州廟祀不絕

呂塋字伯充河內人七世祖公緒與宋丞相公著爲從昆弟祖父避亂隸兵籍轉徙北郡復至關中家焉塋從許衡學於京兆衡爲國子祭酒塋伴讀輔成教養有功至元十三年言者稱襄漢新附民情未安塋言其從父呂子開者向爲襄陽制置司參謀官今退居鄂其人悉知宋事宜徵用之遂奉使往以子開入覲陳安撫襄漢便宜詔以子開爲翰林直學士辭不就十四年授塋四川行樞密院都

事時宋制置使張珩守重慶安撫使王立守合州詔樞府分兵取之李德輝行西院事於成都獲立偵卒張邵等數人將殺之塋曰彼不卽降者以昔嘗抗命降懼誅耳今宜釋邵等俾歸諭立未幾立果遣邵等齎蠟書至成都德輝請與東院同受降後期不至德輝承制授立仍爲安撫使知合州開倉振民禁戢剽掠而瀘敘崇慶思播夔萬等郡聞之相繼送款巴黔民感塋與德輝之惠竝祠事之東院恥其無功誣德輝越境邀功械立於長安獄將誅之塋適以事至京師言於許衡衡白畱守賀仁傑遂奏釋立賜金虎符仍舊官塋亦以功授四川行省左右司郎中二十年徵爲國子司業以未終喪辭三十年改華州知州勸農興學具有成效及代民爭畱之大德中河東關隴地震月餘

元史卷二十八 列傳

十

不止塋與集賢學士蕭軒各設問答數千言以究其理且移書廟堂陳救災弭患之道仁宗卽位召拜翰林侍讀學士卒封東平郡公諡文穆

李庭玉 楊大淵 楊文安

李庭玉一名忽蘭吉隴西人父節仕金歲乙未自鞏昌石門山從汪世顯以城降庭玉隸皇子闕端爲質子從征西川辛丑以功爲管軍總領兼總帥府知事從征西番南澗有功癸丑世祖在潛邸命爲管軍千戶都總領佐汪德臣立利州乙卯正月將兵三萬取合江大獲山宋劉都統率眾謀焚利州沙市次青山庭玉以伏兵取之俘獲甚眾丙辰憲宗更賜金符仍命爲千戶都總領戊午庭玉以兵先趨劍門覘伺奪宋運糧兵於長寧俘其將校憲宗南征掌

橋道饋餉有功從攻苦竹隘山寨先登斬守將楊立獲都
統張寶招降長寧青居大獲山運山龍州等寨十一月大
獲山守臣楊大淵既降復逃去憲宗怒將屠其城庭玉亟
追之迺單騎至城下門未閉大呼入城曰皇帝使我來撫
汝軍民一卒引入甲士環立庭玉下馬執大淵手謂之曰
上方宣諭賜賞不待而來何也大淵曰誠不知國朝禮體
且久出恐城寨有他變是以亟歸非敢有異謀也遂與偕
來一軍皆喜庭玉入奏曰楊大淵果不反憲宗曰汝何以
知之對曰軍馬整肅防內亂也城門不閉無他心也一聞
臣言即撫綏軍民從臣以出何反之有大淵遂以故官侍
郎都元帥聽命而一城得生全憲宗命庭玉與怯里馬哥
領戰船二百艘掠釣魚山奪其糧船四百又作浮梁以通

元史卷二十八 列傳

七

往來已未與怯里馬哥等領蒙古漢軍略重慶六月總帥
汪德臣歿於軍命庭玉以其軍殿後宋兵水陸晝夜接戰
皆敗之部軍皆青居人賞賚獨厚遂與蒲察都元帥守青
居治城壁儲芻糧招納降附宗王穆哥承制命庭玉佩金
符為鞏昌元帥中統元年德臣子惟正襲總帥至青居五
月渾都海叛據六盤山詔庭玉從汪良臣發所統二十四
州兵追襲之力戰斬渾都海等於陣以功授鞏昌後路元
帥賜金幣鞍馬弓矢火都叛於西番點西嶺汪惟正帥師
襲之至怯里馬之地火都以五百人遁入西番庭玉與答
刺海兵三千人追襲禽之四年詔賜虎符庭玉不受曰臣
聞國制將萬軍者佩虎符若汪氏將萬軍已佩之臣何可
復佩帝是其言命於總帥汪惟正下充鞏昌路元帥所屬

官悉聽節制至元元年入覲命與同僉總帥汪良臣還蜀
守青居是時元兵猶與宋兵相持釣魚山三年宋兵陷大
良平山寨平章賽典赤令庭玉領兵千餘騎掠其境有功
四年以本職充閬蓬廣安順慶夔府等處都元帥參議六
年賜虎符授夔東路招討使以軍三千立章廣平山寨置
屯田出兵以絕大良平餉援之道十年正月成都失利帝
遣人問成都所以失所以救失庭玉附奏曰初立成都惟
建子城軍民止於外城別無城壁宋軍乘虛來攻失於不
備軍官皆年少不經事之人以此失利西川地曠人稀宜
修置城寨以備不虞今蒙古漢軍多非正身半以驅奴代
宜嚴禁之所謂修築城寨練習軍馬措畫屯田規運糧餉
冊造舟楫完繕軍器六者不可缺一尤當任賢遠讒信賞

元史卷二十八 列傳

七

必罰修內治外選用良將隨機應變為制控邊陲之本六
月將兵赴成都與察不花同權省事十一月復還守章廣
平山寨前後每戰輒勝十三年引兵略重慶復取簡州十
四年承制授延安路管軍招討使十五年圖魯叛於六盤
山庭玉以延安路軍會總帥府兵於六盤敗圖魯於武川
俘其孥還十月入覲賜金虎符授四川北道宣慰使庭玉
請以先所受鞏昌元帥之職及虎符與其弟庭望二十年
改四川南道宣慰使二十二年詔會四川行省兵分道進
討五溪洞蠻之劫掠邊民者一軍出黔中一軍出思播一
軍出澧州而庭玉一軍自夔門會合十一月諸將鑿山開
道絲互千里諸蠻伏險隘木弩竹矢伺閒竊發亡命迎敵
者皆殲之遣諭諸蠻酋長皆率眾來降二十三年入覲乞

病歸田里帝憫之得還鞏昌二十六年行省列奏其功請用范殿帥故事商議本省軍事二十七年遙授陝西等處行尚書省左丞商議軍事食左丞之祿元貞二年入覲授陝西行中書省右丞卒諡襄敏

楊大淵天水人與兄大全弟大楫皆仕宋歲戊午憲宗伐宋入蜀大淵總兵守閬州之大獲城斬元招降之使憲宗怒督諸軍力攻始降其城欲誅之以汪田哥諫而止命以其兵從招諭蓬州廣安擢行軍總管從諸王攻禮義城己未冬拜侍郎都行省世祖中統三年春命出開達與宋兵戰於平田復戰於巴渠禽其知軍范燮統制魏興等先是大淵建言謂取吳必先取蜀取蜀必先取夔取夔必先據蟠龍山四面巖阻可以進攻退守此夔達要衝必爭之

元史卷二十八 列傳

圭

地宜先城之乃使其兄子文安往築城未畢宋夔路提刑鄭子發率兵來爭文安悉力備禦大淵復遣文安之兄文仲將兵往援宋兵宵遁追敗之秋七月詔賜其麾下將士金符十銀符十九別給海青符二俾事亟則馳以聞大淵請於利州大安軍以鹽易軍糧從之冬拜東川都元帥俾與征南都元帥欽察同署事大淵還復於渠江濱築虎嘯城以逼宋大良城不踰時而就四年宋賈似道遣楊琳齋空名告身及蠟書金幣誘大淵南歸文安禽之以聞詔誅琳五月世祖詔獎諭大淵及張大悅復神山功既而大淵擅殺其部將王仲詔戒救之令免籍仲家至元元年冬十月大淵謀知宋總統祁昌由閒道運糧入得漢城乃自率軍襲之於椒坪連戰三日禽祁昌向良等俘獲輜重以數

千計明日宋都統張思廣引兵來援復大破之二年卒追封閬中郡公諡肅翼子文榮襲都元帥兄子文安

文安字泰叔父大全仕宋守敘州戰死諡愍忠官其長子文仲文安方幼依叔父大淵及大淵以閬州降文仲亦授安撫使中統元年授文安監軍屢攻禮義城戰通川戰開達皆有功授招討使軍於巴渠萬安寨主盧埴降遂築蟠龍城以據夔達要路屢敗宋兵四年進築虎嘯城以困大良至元元年復築方斗城爲蟠龍聲援令裨將高先守之敗宋兵於潼川射洪又邀其運糧軍於得漢城外連戰三日降其城獻俘闕下二年宋兵由開州運糧餉達州文安屢率奇兵閒道邀奪之三年總帥汪惟正遣其將李水波等由閒道襲開州文安遣千戶王福引兵助之福先登破

元史卷二十八 列傳

古

其城宋諸路兵來救圍城三而築壘城外四年春行省命文安往援卽率兵斷其糧道飛矢中面拔矢力戰大破之而文安以創甚還蟠龍宋兵遂復開州五年文仲卒詔文安就佩金虎符充閬州夔東路安撫使軍民元帥閬州屢遭兵變戶口凋耗文安乃教以耕桑卹其鰥寡民始復業自後連年與宋兵戰開達閒大小數十戰八年授東川路征南招討使九年秋領軍出小寧措置屯田築金湯城以積屯田之糧且以逼宋龍爪城慮宋兵必來爭遣韓福出兵通川以牽制之屢敗其輸糧開達之兵覆其糧艘十年閏六月蓬州兵攻拔龍爪城會蓬州兵已去宋都統趙章復來據之且出兵迎敵文安與戰破之十一年秋與蒙古漢軍萬戶怯必烈等攻宋夔東拔高陽夔巫等寨因跨江

為橋以斷宋兵往來之路宋兵來爭戰卻之時宋以鮮汝忠趙章易鎮開遠二州而汝忠家屬尚留開文安曰達未易攻若先拔開州俘其家屬以招汝忠則達可不煩兵而下乃遣蔡邦光等往攻開州而盛兵據蟠龍為聲援十二年正月諸軍夜銜枚薄開州城下遣死士先登斬關入及城中人知已立幟於城之絕頂矣宋軍潰散禽趙章而守將韓明父子猶率所部兵巷戰力屈亦就禽文安遷汝忠家屬於蟠龍遣元帥王師能持檄往達州招之曰降則家屬得全不降則闔城塗炭宜早為計汝忠遂率所部將士詣軍門降趙章子桂楫守師姑城遣兵招之亦降獨洋州龍爪城守將謝益固守併力攻之亦棄城走於是遣將挾鮮汝忠往招由山等處八城皆望風迎降凱還獻捷京師

元史卷二十八 列傳

五

帝悅加授文安驃騎衛上將軍兼宣撫使又招都勝茂竹廣福三城皆降之秋七月兵至樂勝城守將蒲濟川降進攻梁山宋將袁世安堅守文安焚其外城梁山軍恃忠勝軍為固力攻拔之圍梁山四十日世安隨方備禦竟不降文安乃移兵攻萬州之牛頭城殺守將進圍萬州守將上官夔戰守甚力文安乃遣軍出小江口敗其援兵而萬州固守不下乃解圍去攻石城堡攻雞冠城又招石馬鐵平小城三聖油木牟家下隘等城皆下冬進攻白帝城夔帥張起巖亦堅守不出文安以師老乃還宋都統弋德復據開州文安乃築城神仙山以逼之令元帥蔡邦光等屯守十三年朝廷遣安西王相李德輝經畫東川宋將袁世安遣使來約降秋七月進攻萬州上官夔固守圍之踰月攻

拔外城夔守張起巖來救擊破之盡殪其舟師萬州奪氣文安盡銳攻城潛遣勇士梯城宵登斬關而入夔力戰死萬州既定分兵略施州禽統制薛忠會大雪夜奪其城十四年夏進兵攻咸淳府其鎮撫使馬堃與文安同里閉諭之不降乃列柵攻城夜遣勇士躡雲梯潛入啟關納外兵巷戰比曉宋兵大敗堃就禽十五年進攻紹慶守將鮮龍迎敵二月復遣勇士夜以梯衝攻破其北門遂禽斬之蜀境已定獨夔猶堅守不下朝廷命荆湖都元帥達海由巫峽進兵取夔州而西川劉僉院挾夔守將親屬往招之文安遣元帥王師能將舟師與俱張起巖亦以城降夏入覲以所得城邑繪圖以獻帝勞之曰汝攻城略地之功若是多乎擢四川南道宣慰使解白貂裘賜之十七年遣辯士

元史卷二十八 列傳

六

王介諭降散毛諸洞蠻遙授文安參政行四川南道宣慰使十九年春入覲擢中書左丞行江西省事到官踰月卒子良之襲佩虎符管軍萬戶歷湖南宣慰副使岳州路總管

紐璘 子耶速答 郝和上

劉元振

劉元福

趙阿潘

紐璘珊竹帶人祖孛羅台為太祖宿衛從太宗平金成河南父太答爾佐憲宗征阿速欽察等國有功拜都元帥率陝西西海鞏昌諸軍攻宋入蜀卒於重慶紐璘長身有力善謀略常從父軍中丁巳歲憲宗命將兵萬人略地自利州下白水過大獲山出梁山軍直抵夔門戊午還釣魚山引軍欲會都元帥阿答胡等於成都宋制置使蒲擇之遣安撫劉整等據遂寧江箭灘渡以斷東路紐璘軍至不能

渡自旦至暮大戰斬首二千七百餘級長驅至成都既而蒲擇之命楊大淵等守劍門及靈泉山自將四川兵取成都會都元帥阿荅胡死諸王阿卜干與諸將謀曰今宋兵日逼聞元帥死必悉眾來攻我軍去行在遠待上命建大帥然後禦敵恐無及不若推紐璘以號令諸將出彼不意敵可必破眾然之遂推紐璘為長率諸將大破宋軍於靈泉山蒲擇之兵潰進圍雲頂山城扼宋軍歸路其主將倉卒失計遂以部眾降城中食盡亦殺其守將以降成都彭漢懷緜等州悉平威茂諸蕃亦來附詔即軍中真拜都元帥時紐璘軍止二萬以五千命拜延守成都自將萬五千人從馬湖趨重慶冬帝進軍至大獲山紐璘率步騎號五萬戰船二百艘發成都遣張威以五百人為前鋒水陸並

元史卷二十八 列傳

七

進謀鎖重慶江以絕吳蜀之路縛橋資州口以濟師千戶暗都刺率舟師而下紐璘將步騎而南旌旗輜重百里不絕鼓譟渡瀘放舟而東遇宋截道兵輒敗之造浮橋於涪駐軍橋南北以杜宋援兵聞大軍多瘧癘遣人進牛犬豕各萬頭明年春朝行在所還討思播二州宋將呂文煥攻涪浮橋時新立成都士馬不耐水土多病死紐璘奉密旨督戰不得已出師大敗文煥軍獲其將二人斬之遂班師卻其追兵中統元年招降黎雅礪門巖州偏林關諸蠻得漢番二萬餘戶未幾詔速哥分西川兵及陝西諸軍屬紐璘鎮秦鞏唐兀之地三年宋將劉整以瀘州降呂文煥圍之詔以兵往援敗文煥徙瀘民於成都潼川四年為劉整所譖徵至上都驗問無狀詔釋之還至昌平卒子耶速荅

勇智類其父至元中世祖以屬行樞密院火都赤使習兵事從圍嘉定以三千人至三龜九頂山相地形勢敗宋安撫魯萬壽兵斬首五百級萬壽尋以嘉定三龜九頂紫雲諸城皆降又從行樞密副使忽敦率兵徇下流諸城皆望風來附忽敦以兵二萬會東川行樞密院合荅圍重慶歲餘不下帝命行樞密副使不花代將不花將兵萬餘至城下耶速荅率二十餘騎攻其門宋都統趙安出戰耶速荅三人其軍再挾猛士以出大兵四集斬首五百餘級趙安開門降制置使張珪遁追至涪州禽之捷聞授西川蒙古軍馬六翼新附軍招討使遷四川西道宣慰使都元帥羅氏鬼國亦奚不薛叛詔以四川兵會雲南江南兵討之至會靈關亦奚不薛遣先鋒阿麻阿豆等將數萬眾迎敵耶

元史卷二十八 列傳

大

速荅馳入其軍挾出斬之亦奚不薛懼率所部五萬餘戶降以功拜西川行省右丞西南夷雄左都掌蠻得蘭右叛討降之改四川行樞密副使烏蒙蠻陰連都掌蠻以叛詔以兵會雲南行院拜荅力進討禽烏蒙蠻酋遷蒙古軍都萬戶鎮唐兀之地進同知四川行樞密院事仍居鎮成宗即位拜四川行省平章武宗時遷雲南左丞相仍平章政事南征叛蠻感瘴卒弟八刺次子拜延長子南加台相繼官四川行省左丞平章政事紐璘裨將有拜延者蒙古札刺台氏幼事太祖賜巴都魯號憲宗時佐汪德臣立利州城領兵紫金山破宋軍鹿角寨復從紐璘城成都圍降雲頂山城紐璘進兵馬湖江畱拜延鎮成都降屬縣諸城又領兵迎征大理還師敗宋兵於軍行所過之新津寨紐璘

上其功授蒙古奧魯官舊史專傳今附

劉元振字仲舉劉伯林之孫劉疑長子也隨父入蜀立成都會疑有事往商鄧以元振攝成都萬戶時年方二十號令嚴明宿將敬服憲宗伐宋駐蹕釣魚山與紐璘為先鋒世祖中統元年宋瀘州守將劉整密送降款疑遣元振往受之諸將皆疑其無故而降不可信元振謂宋權臣當國賞罰無章是以將士離心且整本非南人而居瀘南重地事勢與李全何異整此舉無可疑者遂行疑戒之曰劉整宋之名將瀘乃蜀之衝要今整遂以州降情偽不可知汝無為一身慮事成則為國家之利不成則效死乃其分也元振至瀘整開門出迎元振棄眾而先下馬與整相見明日釋戎服從數騎與整聯轡入城飲燕至醉整心服焉獻

元史卷二十八 列傳

九

金六千兩男女五百人元振以金分賜將士而歸還其男女宋軍帥俞興率兵圍瀘州晝夜急攻自正月至五月城幾陷左右勸元振遁還元振曰瀘之得失關國家利害且人已降我豈可以急而棄之食將盡殺所乘馬犒將士募善游者齎蠟書告急成都又權造金銀牌分賞有功未幾成都援兵至元振與整出城合擊興兵大敗走之疑卒元振授成都軍民經略使至元七年時議以勳舊家事權大重宜稍裁抑遂降為成都副萬戶十一年命兼潼川路副招討使十二年卒

劉元禮疑第五子也性渾厚有謀略常從父軍中至元元年遷潼川路漢軍都元帥二年九月宋制置使夏貴率軍五萬犯潼川元禮所領纔數千諸將登城望敵軍有懼色

元禮曰料敵制勝在智不在力乃出戰屢破之復大戰蓬溪自寅至未勝負未決激厲將士曰此去城百里為敵所乘則城不可得入潼川非國家有吾屬為虜矣丈夫當死中求生即持長刀大呼突入陳所向披靡將士咸奮無不一以當百大敗貴兵斬首萬餘級生禽千餘人立蓬溪寨又奏嘉定去成都三百六十里其間舊有眉州城可修以屯兵扼嘉定往來之路世祖從之四年興役七日而畢宋人駭其速元禮鎮守眉州五年召入朝乞解官養母從之九年授懷遠大將軍延安路總管卒

趙阿潘舊作趙阿哥潘土播思烏思藏人始祖附宋賜姓趙世居臨洮祖巴命富甲諸羌父阿哥昌貌甚偉有力兼人仕金

官熙河節度金亡以其眾來歸授疊州安撫使招逃亡立

元史卷二十八 列傳

三

城壘課耕桑遺民獲安輯卒於官阿潘事親以孝聞從伐蜀以破大安功取授同知臨洮府事斬朝天關乘嘉陵江至閬州獲蜀船三百艘攻利州敗宋師於潼川破宋制置使劉雄飛於青居山進逼成都略嘉定平峨眉太平寨大小五十餘戰皆先陷陳皇子嗣端賜以金甲銀器歲壬子世祖以皇弟南征大理道出臨洮見而奇之命攝元帥城復利州以圖蜀時宋兵屯兩川堡柵相望矢石交擊歷五年而城始完憲宗出蜀以阿潘為選鋒攻西安下之授臨洮府元帥帝駐釣魚山合州守將王堅夜來斫營阿潘率壯士逆戰手殺數十百人堅引去賜拔都號中統建元詔還鎮臨洮歲饑發廩給種粟二千餘石郡當孔道傳置旁午有司做於供給阿潘以私馬百匹充驛騎羊千口代民

輪帝聞而嘉之詔京兆行省酬其直卒不受以軍事赴青
居山道爲宋兵所邀遂死於敵阿潘好畜良馬常千蹏歲
擇其上驥五駟貢於朝子孫遵之不替諡曰桓勇子重喜
從世祖征哈刺章數有功中統元年渾都海反從總帥汪
良臣引兵至拔沙河納火石地逆戰以功授征行元帥四
年從討忽都達吉散竹台等克之襲父職爲元帥入覲賜
金虎符爲臨洮府達魯花赤時解軍職而轉民官者例納
所佩符有旨趙氏世世勤勞其金符仍使終佩之重喜在
郡勸農興學省刑敦教以善治聞請致仕不許擢鞏昌二
十四處宣慰使卒諡桓襄長子官卓斯結性靜退辭官閑
處二十餘年仁宗聞其名召不起子德壽雲南左丞
郝和上舊連拔都號安肅州人以小字行幼爲蒙古兵所

元史二十八 列傳

王

掠長通譯語善騎射太祖遣使宋往返數四以辨稱詔以
爲九原府主帥佩金符及太宗之世從大軍南伐略地潼
陝有功授行軍千戶又從皇子曲出南伐至襄陽宋兵四
十萬逆戰漢水上領先鋒數百人直前衝其陳宋兵大潰
復從征蜀下興元宋將王連以重兵守劍閣乃募敢死士
十二人乘夜破關入蜀諸城悉下進取夔府抵大江宋兵
三十萬軍於南岸郝和上選驍勇九人乘輕舸先登橫馳
陳中既出復入宋兵辟易歲庚子覲於行在命解衣數其
瘡痕二十一進拜宣德西京太原平陽延安五路萬戶易
佩金虎符以兵二萬屬之甲辰朝定宗於宿魯都之行宮
賜銀萬錠奏請以賜將校十餘人兼賜金銀符戊申奉詔
還治太原請悉調遠道租稅監課過重者歲餼出白金六

十錠粟千石羊數千以助國用己酉升萬戶府爲河東北
路行省得以便安從事凡四年壬子卒追贈冀國公諡忠
定子十二人天益仲威天佑天澤天麟天挺皆至大官天
挺別見中葉文臣傳

速哥

李進 石抹按只

速哥蒙古人父忽魯忽國王木華黎麾下卒也後更隸塔
海帖哥軍以善馳馬有口辨慎重不泄令佩銀符常居軍
中奏白機務往返未嘗失期太宗以爲才賜名動哥居詔
動哥居奏事朝至朝入奏夕至夕入奏嘗出金盤龍袍及
宮女賜之憲宗時以疾卒速哥亦以壯勇居軍中歲甲寅
憲宗命從都元帥帖哥火魯赤等入蜀乙卯萬戶劉七哥
等與宋兵戰巴州失利陷敵中速哥馳入其軍奪之以歸

元史卷二十八 列傳

王

後又從都元帥紐璘敗宋將劉整破雲頂山城紐璘受詔
會涪州至馬湖江速哥以革爲舟夜渡江至大獲山行在
所自陳道梗失期帝慰遣之未幾復自涪州入奏事遇宋
軍於三曹山速哥眾僅百餘奮兵疾戰敗之奪其器械旗
鼓以歸己未宋兵攻涪州浮橋部將火尼赤戰陷速哥破
圍出之又以白事諸王穆哥所復敗宋兵於三曹山還至
石羊與劉整遇復擊敗之中統二年賜銀符命隸紐璘軍
至元二年四川行省遣招收降民得三千餘人三年從行
院帖赤戰九頂山四年行省耶速台署爲本軍總管從征
瀘州五年立德州以速哥爲達魯花赤擢陝西五路四川
行省左右司員外郎從耶速台入朝賞賚加厚七年從耶
速台敗宋軍於馬湖江用平章政事賽典赤薦遷行尚書

省員外郎九年建都蠻叛詔諸王奧魯赤及耶速台討之速哥將千人爲先鋒破黎州水尾砦攻連雲關克之軍至建都戰於東山斬其酋布庫復與元帥巴爾圖迎合刺軍於不魯思河所過城邑皆下十年討礪樓諸蠻襲破連環城還敗宋軍於七盤山辟新軍萬戶十一年賜虎符真授管軍萬戶領成都高哇哥等六翼及京兆新軍教習水戰耶速台進圍嘉定速哥率舟師會平康城修築懷遠等砦守其要害十二年遣兵敗宋將魯壽於麻平旣而行樞密副使忽敦等軍至與耶速台會於紅崖遣速哥守龍垣城中大震宋將陳都統鮮于團練率舟師遁速哥追擊之溺死者不可勝計遂與中使沈荅罕徇下流諸城紫雲瀘敘皆降進圍重慶速哥以所部兵鎮白水馬湖江口十三

元史卷二十八 列傳

重

年帝遣脫朮教化的持詔諭其守臣使降不聽乃分兵爲五道水陸竝進攻之眾軍不利唯速哥獲戰艦三百艘俘其眾百三十人涪州守將遣書納降速哥率千人往察其情僞至果降遂入其城重慶守臣張萬率眾來襲速哥一日夜出兵凡與十八戰斬首三百餘級萬敗走未幾萬復以精兵三千人來攻又戰敗之十四年行院辟爲鎮守萬戶嘉定總管府達魯花赤時瀘州復叛速哥從大軍討平之重慶受圍久其守將趙安開門出降制置使張珪遁速哥追破之虜百餘人及其舟二十餘艘以功授成都水軍萬戶尋改重慶夔府等路宣撫招討兩司軍民達魯花赤十六年除四川南道宣慰使依前成都水軍萬戶鎮重慶夔施黔忠萬雲涪瀘等州十九年亦奚不薛蠻叛置順元

等路軍民宣慰司以速哥爲宣慰使經理諸蠻二十四年遷河東陝西等路萬戶府達魯花赤播州宣撫賽因不花等赴闕請留之降八番金竹等百餘砦得戶三萬四千悉以其地爲郡縣置順元路金竹府貴州以統之東連九溪十八河南至交趾西至雲南咸受節制二十九年入朝加都元帥改河東陝西等處萬戶府達魯花赤三十一年僉書四川行樞密院事詔開吐蕃道吐蕃叛以兵圍茂州速哥率師敗之元貞元年行院罷速哥家居數歲卒子壽不赤襲河東陝西等處萬戶府達魯花赤

元史卷二十八 列傳

重

德率兵逆戰進以兵十五人載一舟轉鬪十餘里奪一巨艦遂以功授百戶戊午憲宗西征丞相史天澤爲河南經略大使選諸道銳兵從命進爲總把是年秋九月道由陳倉入興元度米倉關其地荒塞不通進伐木開道七百餘里冬十一月至定遠七十關其關上下皆築連堡宋兵五百守之巴渠江水環堡東流天澤命進往關下說降不從進潛視間道歸白天澤曰彼可取也是夜二鼓天澤遣進率勇士七十人掩其不備攻之脫門樞而入者二十人守門者覺拔刀拒之懸門俄閉諸軍不得入進與二十人力戰殺傷三十人宋兵走上堡進乃毀懸門納諸軍追至上堡殺傷甚眾宋守兵不能敵棄堡走諸軍盡度關己未春二月天澤兵至行在所圍合州釣魚山寨夏五月宋由嘉

陵江以舟師來援宋戰船三百餘泊黑石峽東以輕舟五十為前鋒北軍船七十餘泊峽西相距里許帝立馬東山擁兵二萬夾江而陳天澤手旗鼓麾諸軍東進宋前鋒潰走戰艦繼亂順流縱擊死者不可勝計帝指顧謂諸將曰白旗下服紅半臂突而前者誰也天澤以進對賞錦衣名馬八月攻重慶浮圖關前後凡五戰皆受上賞世祖即位入為侍衛親軍從征李璫有功至元八年領兵赴襄陽十二年從略地湖北湖南宋平以兵馬使屯鄂州十三年領軍三千屯田河西中興府十五年移屯六盤山十九年賜虎符屯田西域別什巴里二十三年秋叛王海都及篤哇等軍至洪水山進與力戰眾寡不敵軍潰被禽從至操八里遁還及和州收潰兵三百餘人且戰且行還至京師二

元史卷二十八

五

十五年授蒙古侍衛親軍都指揮使司僉事明年改授左翼屯田萬戶元貞元年卒子昱襲

石抹按只契丹人世居太原父大甲閭率漢軍五百人歸太祖歲戊午按只代領其軍從都元帥紐璘攻成都殺宋守將韓都統又從都元帥按敦攻瀘州以戰艦七十至馬湖江敗宋水軍五百艘時宋兵沿江徹橋據守按只相地形造浮橋宋兵來攻撓者輒擊敗之遂自馬湖以達合江涪江清江凡立浮橋二十餘所師無留行及四川平浮橋功居多宋以巨艦載甲士數萬屯清河浮橋相距七十日水漲橋壞西岸軍多漂溺按只軍東岸急徹浮橋聚舟岸下士卒得不死又援出別部軍五百餘人憲宗遣使慰賜甚厚敘州守將橫截江津軍不得渡按只作牛皮渾脫及

皮船乘之與戰奪其渡口為浮橋濟師中統三年授河中府船橋水手軍總管佩金符以立浮橋功也至元四年從行省耶速台攻瀘州以水軍與宋將戰於馬湖江敗之六年耶速台領兵趨瀘州遣按只運器械糧食由水道進復敗宋兵馬湖江奪船以渡又以水軍千人運糧於眉簡二州軍中賴之九年從征建都蠻歲餘不下按只先登其城力戰遂降之軍還道病卒行省承制以其子布老代領其軍布老從攻嘉定以巨艦七十艘載勇士數千據其上流於府江紅崖灘造浮橋以渡十二年嘉定降及諸軍圍重慶布老先以戰艦三百艘列陳於觀灘絕其走路十三年乘夜襲宋軍直抵重慶城下攻千斯門宋軍驚潰獲其旗幟甲仗以獻又敗宋涪州來援之師奪其船十艘十五年

元史卷二十八

五

復攻重慶太平門先登殺守陣卒數十宋都統趙安以城降奪戰艦五十艘十六年命襲父職為船橋軍馬總管更賜金虎符兼夔路守鎮副萬戶十八年降大小盤諸洞叛蠻遂以為保寧等處萬戶

元史卷二十八終

元史卷二十九

列傳十五

平宋功臣

至元渡江之役仁義之師紹美曹斌可謂盛矣惟伯顏慶祥於沿海而阿里鯨恣於上游有遺憾焉舊史至百餘傳今刪并存九篇而宏綱偉略已無所不舉若夫弩弓礮手效指喉之能偏裨先登貪爪牙之賞依草附木起武材官凶足數哉今刪其傳而附其姓名若苦徹拔都若怯怯里若脫歡若失里伯若高諾爾一作兒若劉斌若謁只里若鄭溫若哈刺台若沙全若帖木不花若完顏石柱若石高山若鞏彥暉若賈文備若解誠若管如德若朱國寶若齊秉節若隋世昌若蔡珍若張泰亨若葉仙鼎若賀祉若孟德若鄭義若張榮實若楚鼎若奧魯赤若周全若孔元若捏

元史卷二十九 列傳

一

古刺若月舉連赤若阿思蘭若哈八圖若艾貌若鄭鼎若劉通若綦公直若張均若謝仲溫皆可不傳至若重喜塔不已祖孫直脫爾忽刺出祖孫杭忽思阿答赤父子皆一人而複傳其實皆可從刪斯又舊史重紕繆無足責者元之平金平宋皆以金宋降臣為鄉導則劉整呂文煥之功不可無傳以著其勞而雷夢炎夏貴蒲壽庚方回之賣國負君亦不可無附書以著其罪今附錄於後

伯顏 孟祺

伯顏蒙古八鄰部人曾祖述律哥圖為八鄰部左千戶祖阿刺襲父職兼斷事官平忽禪有功得食其地父曉古台從宗王旭烈開西域伯顏長於西域至元初旭烈遣入奏事世祖偉其貌辯其言曰非諸侯王臣也其雷事朕遣介

還報建謀發論恆出廷臣右諸曹白事有難決者徐以一語決之眾咸服曰真宰相器敕以中書右丞相安童女弟妻之二年七月拜中書左丞四年改中書右丞七年遷同知樞密院事一時輔相皆賢朝野晏然號為極治十一年大舉伐宋與史天澤並拜中書左丞相行省荆湖時荆湖淮西各建行省天澤言號令不一或致敗事且以病表請專任伯顏乃以伯顏領河南等路行中書省所屬並聽節制秋七月陞辭世祖諭之曰昔曹彬以不嗜殺平江南汝其體朕心為吾曹彬可也九月甲戌朔會師襄陽分軍三道並進丙戌伯顏與平章阿朮由中道循漢江趨郢州郢新舊二城夾漢南北橫鐵縵聯戰艦水樹密椿伯顏曰攻城下策也偵其下游有溝南通藤湖至漢僅數里乃糴

元史卷二十九 列傳

二

兵郢城不攻而潛襲下流黃家灣堡奪之盪舟由藤湖入漢諸將以郢城我之喉襟不取恐為後患伯顏曰大軍之出豈為此一城哉遂舍郢順流下伯顏阿朮以百騎殿破其追騎二千次沙洋暨新城皆使降臣持黃檄屢招之屢不應乃礮破沙洋而屠之諸軍蟻附遂拔新城守將邊居諒率眾三千力戰死十一月丙戌下復州論諸將不得入城違者以軍法論阿朮使右丞阿里海牙來言渡江之期伯顏不答明日又來又不答阿朮乃自來伯顏曰此大事也主上以付吾二人可使餘人知乎潛刻期而去宋淮西制置使夏貴等以戰艦萬艘分據漢口要害以精兵守陽邏堡以游擊軍扼中流兵不得進有淪河口可通沙蕪入江亦有宋兵守之乃陽言圍漢陽夏貴果移兵來援潛遣

一第 二下冊 七 參四庫全書第 20 版 夏月

奇兵奪沙蕪口遂開埧引船由淪河趨沙蕪入大江其騎兵十萬咸列江北諸將請攻沙蕪南岸取彼戰船伯顏曰一舉渡江收其全功毋貪小利遂壓陽邏堡而軍再遣人招之其將士皆曰我輩受宋厚恩死戰報國此其時也我宋天下今日猶賭博孤注輸贏決此一擲何多言伯顏麾諸將攻之三日不克伯顏密語阿朮曰彼謂我必拔此堡方能渡江若潛師從上流襲渡彼必不爲備乃分遣阿里海牙督萬戶張弘範等以步騎攻陽邏堡夏貴來援遂俾阿朮出其不意夜渡青山磯敗宋水師都統程鵬飛於中流揚兵南岸夏貴軍聞之解體阿里海牙復以舟師薄之夏貴走陽邏堡伯顏聞報揮諸將急攻破之宋軍大潰數十萬眾死傷幾盡夏貴僅以身免走至白虎山諸將請追

元史卷二十九 列傳

三

禽之伯顏曰陽邏之捷吾欲遣使前告宋人而貴走是代吾使也貴將來矣伯顏登武磯山大江南北皆元軍也大會議諸將議兵所向或欲先取蕪黃伯顏用阿朮計定議先取鄂漢爲東下後路之防遂渡江次鄂州明日鄂州漢陽德安府皆以城降畱阿里海牙等以兵四萬守之使規取荆湖而自與阿朮統大軍水陸東下明年春與國靳黃江州南康安慶池州所至望風而靡二月賈似道都督諸路軍馬十三萬陳丁家洲步軍指揮使孫虎臣爲前鋒夏貴以戰艦二千五百艘橫互江中似道將後軍伯顏命左右翼騎兵夾江而進礮聲震百里宋軍陳動貴先遁似道軍奪氣阿朮手柁衝敵船以小旗麾何瑋李庭等並舟深入伯顏命步騎左右倚之追殺百五十餘里溺死無算得船

二千餘艘及其軍資器仗圖籍符印似道東走揚州貴走廬州虎臣走泰州由是太平寧國建康無爲和州鎮巢饒州鎮江皆送管籥請城主江東諸郡皆下淮西滁州諸郡亦相繼降諸軍駐建康禁侵掠上遣國信使廉希賢嚴忠範使宋請兵自衛伯顏曰行人以言不以兵兵多徒爲累希賢固請與之至獨松嶺果爲宋人所殺伯顏以行中書省駐建康阿塔海董文炳以行樞密院駐鎮江阿朮別奉詔攻揚州江東饑疫伯顏命虞振而醫藥之居民大悅宋遣都統洪模移書徐王榮等言般使之事太皇太后及嗣君實不知皆邊將之罪當按誅之願輸幣請罷兵通好伯顏命議事官張羽等持答書至平江驛宋人又殺之四月有詔天暑不利行師俟秋再舉伯顏奏言百年通寇保據

元史卷二十九 列傳

四

江海如獸保險今已扼其吭少縱之則逸而逝矣世祖語使者曰將在軍不從中制兵法也其召丞相來朝面議五月以阿刺罕爲參政畱治省事伯顏渡江北上七月進右丞相讓功於阿朮乃并以阿朮爲左丞相八月受命出都九月會師淮安城下伯顏親臨南城堡揮諸將長驅而登拔之十月圍揚州未下畱諸將守灣頭新堡而自赴鎮江十一月分軍三道參政阿刺罕等爲右軍以步騎自建康出四安趨獨松嶺參政董文炳等爲左軍以舟師自江陰循海趨澈浦華亭伯顏以中軍出常州道水陸並進約會于臨安時常州已降復叛固拒數月不下乃親督帳前軍礮弩晝夜環攻陷之屠其城守將劉師勇遁諸將請追之伯顏令勿追曰師勇所過城守者膽落矣旣而平江湖州

嘉興果相繼下十二月次無錫宋將作監柳岳等奉其國主及太皇太后書併宋之大臣與伯顏書來見泣訴奸臣蔽主太皇太后及幼主皆不知望哀憐罷兵伯顏曰汝國執我行人十六年所以興師問罪去歲又無故殺害廉奉使今尚何言錢王納土李主出降聽可自擇且爾宋昔得天下於小兒今亦失於小兒蓋天道也軍進次平江會囊加台同宋尚書夏士林侍郎呂師孟宗正少卿陸秀夫以書來請尊世祖為伯父而世修子姪之禮且約歲幣銀二十五萬兩帛二十五萬匹伯顏遣還臨安十三年正月次嘉興宋宰臣陳宜中遣御史劉岳奉宋主稱臣表文副本及致書伯顏約會長安鎮又令都統洪模持書同囊加台來見及次長安鎮宜中等不至進軍臨平鎮次皋亭山宋

元史卷二十九 列傳 五

主遣知臨安府賈餘慶等奉傳國璽及降表詣軍前伯顏受訖進軍臨安北十五里宋臣陳宜中張世傑蘇義劉師勇等以益王廣王下浙江航海而南惟謝太后及幼主留宮中伯顏亟遣左右軍追之不及禁軍士毋入城遣呂文煥持黃榜諭臨安中外軍民仍宋衣冠不改制先是三衙衛士白晝殺人閭里小民乘亂剽掠至是民皆安堵如故乃遣降臣程鵬飛洪雙壽等入宮慰諭謝后謝后遣丞相吳堅文天祥樞密謝堂安撫賈餘慶內官鄧惟善來見伯顏慰遣之願天祥舉動不常疑有異志畱之軍中令館伴羈縻之遣使諭宋主削帝號易降表駐軍臨安城北建大將旗鼓率左右翼萬戶巡臨安城觀潮於浙江宋宗室大臣皆來見令宋主謝后以手詔諭未附州郡罷文天祥所

招募義兵二萬人伯顏登師子峰觀臨安形勢分諸將共守其城二月遣人往淮西招夏貴仍遣別將徇地浙東西於是嚴發台處諸州竝下夏貴亦以淮西降伯顏承制以臨安為兩浙大都督府芒古台一作兀范文虎入治府事籍其軍民錢穀之數閱實倉庫收百官誥命符印圖籍悉罷宋官府取宋主居之別室分遣新附官招諭南北兩廣四川未下州郡部分諸將分屯要害仍禁侵壞宋山陵是日移軍浙江之澣其地為潮退淤灘北軍不知也既而潮不至者三日宋人大驚歎為天助遣使奉宋降表赴闕伯顏拜表稱賀曰國家之業大一統海岳必明主之歸帝王之兵出萬全蠻夷敢天威之抗始干戈之爰及迄文軌之會同區宇一清普天均慶恭惟皇帝陛下道光五葉統接千

元史卷二十九 列傳 六

齡梯杭日出之邦冠帶月支之域際丹崖而述職奄瀚海以為家獨此昏愚弗遵聲教謂江湖可以保逆命舟楫可以敵王師連兵負固逾四十年背德食言難一二計當聖主飛渡江南之日遣行人乞為城下之盟逮凱奏之言旋輒詐謀之復肆拘囚我信使忘乾坤再造之恩招納我叛臣盜漣海三城之地我是以有六載襄樊之討彼居然無一介行李之來禍既出於自求怒致聞於斯赫臣等肅將禁旅恭行天誅爰從襄漢之上流復出武昌之故渡瀟屏一空於江表烽煙直接於錢塘尚無度德量力之心荐有殺使毀書之事屬廟謨之親稟謂根本之宜先乃命阿剌罕取道於獨松董文炳屯師於海渚臣與阿荅海忝司中閩直指偽都犄角之勢既成水陸之師竝進常州已下列

郡傳檄而悉平臨安爲期諸將連營而畢會彼知窮蹙迭致哀鳴始則有爲姪納幣之祈次則有奉璽稱藩之請願甘言何益於實事率銳卒直抵於近郊召來用事之大臣放散思歸之衛士嘔強心在四郊之橫草都無飛走計窮一片之降幡始豎其宋國主已於二月初五日望闕拜伏歸附訖所有倉廩府庫封籍待命外臣奉揚寬大撫戢吏民九衢之市肆不移一代之繁華如故茲惟睿算卓冠前王視萬里如目前運天下於掌上致令臣等獲對明時躬逢駿烈中外混一車書會同無任瞻天望聖激切屏營之至謹奉表稱賀以聞宋福王與芮亦來降三月伯顏入臨安俾郎中孟祺籍其禮樂祭器冊寶儀仗圖書以阿刺罕董文炳留治行省事經略閩粵芒古台以都督鎮浙西校

元史卷二十九 列傳

七

都以宣撫使鎮浙東唐兀台李庭護送宋君臣北上伯顏發臨安惟謝后以疾獨留隆國夫人黃氏暨宮人從行者百餘人福王與芮沂王乃猷謝堂楊鎮而下官屬從行者數千人三學之士數百人宋主求見伯顏曰未入朝無相見之禮五月伯顏以宋主至上都世祖御大安殿受朝賀封宋主累瀛國公宋平得府三十七州百二十八關監二縣七百三十三命伯顏告於天地宗廟大赦天下以伯顏同知樞密院賜銀鼠青鼠只孫衣二十襲裨校以下賞銀有差十四年宗王昔里吉劫皇子北平王拘安童以叛應海都命伯顏率師討之遇賊斡魯歡河夾水而陳相持久之令牧馬具食俟賊懈俄麾軍兩翼渡水掩其不備破之昔里吉走死十八年二月世祖命皇太子燕王撫軍北邊

以伯顏從仍諭之曰伯顏才兼將相忠於所事故俾汝從不可以常人遇之皇太子次舍必與論天下事尊禮有加是歲頒羣臣食邑益以藤州等處五千戶當伯顏之平宋還朝也詔百官郊勞平章阿合馬先諸官謁於道伯顏解所服玉鉤條遺之且曰宋寶玉固多吾實無所取勿薄此也阿合馬謂其輕己思中傷之乃誣以平宋時取其異寶曰玉桃蓋帝察之無驗阿合馬既死有獻此蓋者帝歎曰吾固知伯顏無欺也別吉里彌什者嘗誣伯顏以死罪未幾以他罪誅赦伯顏臨視伯顏與之酒愴然不顧而返世祖問其故對曰彼自有罪以臣臨之人將不知天誅之公也二十二年秋宗王阿只吉失律詔伯顏代總其軍遠斥埃謹堤防足兵食明賞罰不肯邀功生事將校大和敵人

元史卷二十九 列傳

八

遠避營令軍中采葦怯葉及菽藪之根貯之人四斛草粒稱是冬盛雨雪人馬賴以不饑又令有捕毳獸者積其皮至萬輦京師易絹帛以衣邊軍二十四年春遼東宗王乃顏將叛報至詔伯顏覘之多載衣裘入其境輒賜驛人既至乃顏爲設宴謀執之伯顏酒半趨出與其從者分三道逸去驛人以得衣裘故爭獻健馬遂得脫馳還白狀佐世祖親征奏敵兵多蒙古親亞戰故不力請命李庭董士選將漢軍用漢法戰乃顏黨金家奴塔不台進逼乘輿漢軍力戰果敗之卒禽乃顏二十六年進知樞密院事出鎮和林二十九年秋討叛王蔑里海都等相值於阿撒忽圖嶺大戰破之蔑里挺身走軍還遇伏兵於必石圖嶺伯顏堅壁不動黎明逐之斬首一千級縱其謀者齎書諭蔑里以

禍福寔里得書感泣後來歸惟海都不降廷臣有譖伯顏
久居北邊與海都通好者詔以御史大夫玉昔代之乃以
軍授玉昔而行語詳叛王傳三十年冬十二月驛召至自
大同世祖不豫明年正月世祖崩伯顏總百官以聽兵馬
司請日出鳴晨鐘日入鳴昏鐘以防變伯顏呵之曰汝將
為賊耶其一如平日適有盜內府銀者宰執以其幸赦而
盜欲誅之伯顏曰何時無盜今以誰命而誅之人皆服其
有識成宗即位於上都大安閣親王有違言伯顏握劍立
殿陛陳祖訓宣願命述所以立成宗之意辭色俱厲諸王
悚然趨殿下拜五月拜太傅錄軍國重事仍知樞密院事
時相有忌之者伯顏語之曰幸送我兩罌美酒與諸王飲
宮前餘非所知也江南三省累請罷行樞密院帝問於伯

元史卷二十九 列傳 九

顏時已屬疾張目對曰內而省院各置為宐外而軍民分
隸不便帝是之三院遂罷冬十二月有大星隕於東北雨
木冰伯顏卒年五十九伯顏深略善斷將二十萬眾伐宋
若將一人諸帥仰之若神明下江州時宋臣呂師夔盛飾
宗室二女以獻伯顏斥去不顧師入臨安肆不易市畢事
還朝歸裝惟衣被而已未嘗言功也大德八年特贈宣忠
佐命開濟功臣太師淮安王諡忠武皇慶中賜鈔十萬貫
命江浙省臣建廟祀諸臨安至正四年建碑都城之郊賜
額曰開國元勳佐命大臣之碑翰林學士元明善撰其文
進封淮王子邁的僉樞密院事囊加台樞密副使孫相嘉
寶禮同僉樞密院事集賢學士至治末省先坐於白只刺
山間變赴上都或勸少避之曰我與國同休戚今有難可

避乎至上都果見囚久之得釋尋拜河南江北行省平章
遷江南行臺御史大夫曾孫普達失理皆能世其家
孟祺字德卿宿州符離人父仁業儒有節行北渡寓濟州
兼臺州帥石天祿禮之辟兼詳議府事祺幼敏悟善騎射
侍父徙居東平時嚴實修學校試生徒祺登上選辟掌書
記廉希憲宋子貞皆器遇之間於朝擢國史院編修官遷
應奉翰林文字兼太常博士一時典冊多出其手至元七
年持節使高麗還稱旨授山東東西道勸農副使十一年
丞相伯顏將兵伐宋詔選宿望博學可贊計畫者與俱行
遂授祺行省諮議時軍書填塞祺酬應剖決略無凝滯師
駐建康伯顏以兵事詣闕政無大小祺與執政並裁決之
諸將利虜掠爭趨臨安伯顏問計祺對曰宋人之計急則

元史卷二十九 列傳 十

必竄閩廣若迫以兵其竄愈速一旦城中盜起臨安三百
年之積焚蕩無遺矣莫若以計安之令彼不懼正如取果
須完取之耳伯顏善其言草書遣人至臨安以安慰之宋
乃不復議遷闕先是宋降表稱姪皇帝屢拒不納祺自請
為使徵降表至則會宋相於三省夜三鼓議未決祺正色
曰國勢至此夫復何待遂定議書成宋謝太后手批用寶
攜之以出復啟謝太后於內殿取國璽十二送出伯顏將
親封之祺曰管鑰自有主者非所宜預一或不謹恐異時
姦人妄相誣污終不可明遂止江南平伯顏奏祺前後功
多且可任重授嘉興路總管佩虎符在官未久以疾歸東
平至元十八年擢浙東海右道按察使疾不赴卒年五十
一追封魯郡公諡文襄

阿朮 趙璧 昂吉爾 芒兀合

阿朮兀良氏都帥兀良合台子也沈幾有智略臨陳勇決氣蓋萬人憲宗時從其父征西南夷率精兵爲候騎所向摧陷至平大理克諸部降交趾無不在行事見其父兀良合台傳世祖卽位畱典宿衛從征李璫有功拜征南都元帥治兵於汴復立宿州至元初略地兩淮攻取戰獲軍聲大震四年八月觀兵襄陽遂入南郡取僊人鐵城等柵俘生口五萬軍還宋兵邀襄樊間阿朮乃自安陽灘濟江畱精騎五千陳牛心嶺復立虛寨設疑火夜半敵果至斬首萬餘級初阿朮過襄陽駐馬虎頭山宿漢東白河口曰若築壘於此襄陽糧道可斷也五年遂築鹿門新城等堡繼又築臺漢水中與夾江堡相應自是宋兵援襄者不能進

元史卷二十九 列傳

十一

六年七月大霖雨漢水溢宋將夏貴范文虎相繼率兵來援復分兵出入水岸林谷間阿朮謂諸將曰此張虛形不可與戰宜整舟師備新堡諸將從之明日宋兵果趨新堡至虎尾洲大破之般溺生禽五千餘人獲戰船百餘艘於是治戰船分水軍築圍城以逼襄陽文虎復率舟師來救來興國又以兵百艘侵百丈山前後邀擊於湍灘俱敗走九年三月破樊城外郭增築重圍以逼之宋裨將張順張貴裝軍衣百船自上流入襄陽阿朮攻之順死貴僅得入城俄乘輪船順流東走阿朮令諸軍艤船以待然薪照江兩岸如晝迨至樞門關禽貴餘眾盡死是年九月加同平章事先是襄樊兩城漢水出其間宋兵植木江中聯以鐵鎖中設浮梁以通援兵樊恃此爲固至是阿朮以機鋸斷

木以斧斷鎖焚其橋襄兵不能援十二月遂拔樊城襄陽守將呂文煥懼而出降十年奉命略淮東抵揚州城下宋以千騎出戰阿朮伏兵道左伴北宋兵逐之伏發敗去十一年正月入覲與參政阿里海牙奏請伐宋帝命相臣議久不決阿朮進曰臣久在行間備見宋兵弱於往昔失今不取時不再來帝可其奏詔益兵十萬與丞相伯顏參政阿里海牙等同伐宋三月進平章政事秋九月師次郢之鹽山得俘民言宋沿江九郡精銳盡聚郢江東西兩城今舟師出其間騎兵不得護岸危道也不若取黃家灣堡東有河口可由中拖船入湖轉以下江爲便從之遂舍攻郢而去行大澤中忽宋騎兵千人突至時阿朮與伯顏殿後僅從數十騎卽奮槊馳擊追斬五百餘級生禽其將趙范

元史卷二十九 列傳

十二

二統制進攻沙洋新城拔之前次復州守將翟貴迎降時夏貴鎖大艦扼江漢口兩岸備禦堅嚴阿朮用軍將馬福計回舟淪河口穿湖中從陽邏堡西沙蕪口入江十二月軍至陽邏堡攻之不克阿朮謀於伯顏分麾下四翼軍馬以舟載之循岸沂流西上四十里對青山磯而泊是夜雪大作南岸露沙洲令諸舟望洲截江橫渡宋水師都統程鵬飛來拒大戰中流禽斬無算奪船千餘艘鵬飛敗走進抵南岸阿朮率諸將攀岸疾鬪開合數四南軍阻水不得相薄遂起浮梁成列而上出馬於岸復力戰破之追擊至鄂東門而還夏貴聞阿朮飛渡大驚引麾下兵三百艘先遁餘皆潰走遂拔陽邏堡盡得其軍寶伯顏議師所向或欲先取蘄黃阿朮曰若赴下流退無所據不如上取鄂漢

雖遲旬日可以萬全伯顏從之令水陸並趨鄂漢焚宋戰艦三千艘於江火照城中漢陽鄂州大恐相繼降十二年正月黃蘄江三州降卽率舟師趨安慶范文虎迎降繼下池州宋賈似道擁重兵拒蕪湖遣宋京來請和伯顏謂阿九曰有詔令我軍駐守何如阿九曰若釋似道不擊恐已降州郡今夏難守且宋無信方遣使請和而又射我軍船執我邏騎今日惟當進兵事若不利我任其罪二月師次丁家洲遂與宋前鋒孫虎臣對陳夏貴以戰艦二千五百艘橫互江中似道將兵殿後時已遣騎兵夾岸而進兩岸樹礮擊其中堅宋軍陳動阿九挺身登舟手持柁突入敵軍諸軍繼進宋兵遂大潰世祖以宋重兵皆駐揚州臨安倚之爲重四月命阿九分兵圍守揚州庚申次眞州敗

元史卷二十九

列傳

三

宋兵於珠金沙斬首二千餘級既抵揚州乃造樓櫓戰具於瓜洲漕粟於眞州樹柵以斷其糧道宋都統姜才領步騎二萬來攻柵才軍夾河爲陳阿九麾騎士渡河擊之戰數合堅不能卻眾軍佯北才逐之遂奮而回擊萬矢雨集才軍不能支禽其副將張林斬首萬八千級七月庚午宋兩淮鎮將張世傑孫虎臣以舟師萬艘駐焦山東每十船爲一舫聯以鐵鎖示必死阿九登石公山望之舫艦連接旌旗蔽江日可燒而走也遂選強健善射者千人載以巨艦分兩翼夾射阿九居中合勢進擊繼以火矢燒其篷檣煙燄漲天宋兵旣斃舟死戰至是欲走不能前軍爭赴水死後軍散走追至圖山獲黃白鷁船七百餘艘自是宋不能軍十月詔拜中書左丞相仍諭之曰淮南重地李庭芝

狡詐須卿守之時諸軍進取臨安阿九駐兵瓜洲以絕揚州之援故伯顏軍不血刃而平宋阿九控制之力爲多十三年二月夏貴舉淮西諸城來附阿九謂諸將曰今宋已亡獨庭芝未下以外助猶多故也若絕其聲援塞彼糧道尙恐東走通泰逃命江海乃柵揚之西北丁邨以扼其高郵寶應之餽運貯粟灣頭堡以備捍禦畱屯新城以逼泰州又遣千戶伯顏察爾率甲騎三百助灣頭兵勢戒曰庭芝水路既絕必從陸出宜謹備之如丁邨烽起當首尾相應斷其歸路六月甲戌姜才知高郵米運將至果夜出步騎五千犯丁邨柵至曉伯顏察爾來援所將皆阿九身下精兵旗幟畫雙赤月眾軍望其塵連呼曰丞相來矣宋軍識其旗皆遁才脫身走追殺騎兵四百步卒免者不滿百人壬辰李庭芝以朱煥守揚州挾姜才東走阿九率兵追襲殺步卒千人庭芝僅入泰州遂築壘守之七月乙巳朱煥以揚州降乙卯泰州守將孫良臣開北門納降執李庭芝姜才奉命戮於揚州市阿九申嚴士卒禁暴掠有武衛軍校掠民二馬卽斬以徇兩淮悉平得府二州二十二軍四縣六十七九月辛酉入覲世祖於大明殿陳宋俘第功行賞實封泰興縣二千戶二十三年受命北伐叛王昔剌木等明年凱旋繼又西征至哈刺霍州以疾卒年五十有四追封河南王

元史卷二十九

列傳

古

趙璧字寶仁雲中懷仁人太宗時以薦召至行宮愛其精敏但呼秀才而不名賜三僮給薪水命后親製衣賜之視其試服不稱輒爲損益寵遇無比命馳驛聘四方名士王

鶚等又令蒙古生十人從壁受儒書教壁以蒙古語譯大學衍義從馬上聽壁陳說辭旨明貫壁年二十有三憲宗即位召問曰治天下何先對曰請先誅近侍之尤不善者憲宗不悅壁退世祖曰秀才汝渾身是膽邪吾亦爲汝握兩手汗也有斷事官身老瓦赤者持其印請於帝曰此先朝所賜今陛下登極將仍用此舊印邪抑易以新者邪壁侍旁呵之曰用汝與否尙須聖裁乃敢以印爲請奪其印置帝前帝爲默然久之曰朕亦不能爲此其人竟不復用壬子命偕史天澤爲河南經略使承兵亂後復辟前進士楊果陳紀爲佐相與鋤強暴屏盜賊造楮鐵立屯田固邊壘廉郡邑未期而境內治尋從世祖伐宋爲江淮荆湖經略使兵圍鄂州宋相賈似道遣使來願請近臣議和壁請

元史卷二十九 列傳

五

行世祖曰汝登城必謹視吾旗旗動速歸可也壁登城宋將宋京曰北兵若旋師願割江爲界且歲奉銀絹匹兩各二十萬壁曰上駐濮州未拜旗時若早有是請猶或見從大軍今已渡江是言何益賈制置今焉在邪將與面語京遣人約之未至壁適見軍中旗動迺約再議而還憲宗崩世祖即位中統元年拜燕京宣慰使時都城連年供給蜀軍府庫已竭及乘輿北征壁稽覈豪貴侵盜逋負錢數十萬計民不擾而軍用足拜中書平章政事三年從親王合必赤討李壇於濟南蒙古漢軍悉聽節制會諸軍乏食壁從濟南稅近地居民麪米羊豕以饋軍軍復大振至元元年帝欲作文檄宋進豪者數不稱旨乃召壁爲之文成帝甚喜曰惟秀才曲盡我意改樞密副使六年宋守臣呂文

德遣開使約降帝命壁詣都元帥阿朮營密議俄同行漢軍帥府事宋將夏貴率兵五萬饋糧三千艘自武昌溯流入援襄陽時漢水暴漲壁據險設伏待之貴果中夜潛上壁策馬出鹿門行二十餘里發伏兵奪其五舟大呼曰南船已敗我水軍宜速進貴懼不敢動明日阿朮至領諸將追騎兵壁率水軍萬戶解汝楫等追舟師遂合戰於虎尾洲貴大敗走士卒溺死甚眾奪戰艦五十禽將士三百餘會高麗王禘爲其臣林衍所逐帝召壁還同國王頭輦哥行東京路中書省事與師問罪師次平壤時衍已死壁密奏高麗避兵江華島餘四十載外雖臣貢終莫肯出由權臣欲倚險以擅王位今衍已憂懼死國王在江華島若朝廷許遣兵護歸使復國於平壤則於字小除姦一舉兩得上可其奏始移軍島旁島因山繚海城周五百餘里建卻敵樓櫓三之一乃宣德音申約束秋毫不犯島中官吏兵民悉還舊都舉國歸心師還遷中書右丞十年遷平章政事十三年卒贈大司徒諡忠亮

元史卷二十九 列傳

六

昂吉爾張掖人姓野蒲氏世爲西夏將家父甘卜率所部歸太祖以其軍隸蒙古軍籍仍以甘卜爲千戶主之及卒昂吉爾領其父軍從征諸國有功至元六年授千戶略地淮南所向無前時元兵初南塞馬當暑多疥癩昂吉爾以所部馬入太行療之病良已由是軍中馬病者率以屬焉歲療馬以萬數宋輸糧金剛臺意將深入昂吉爾將兵馳往斷其道因上言河南邊郡與宋對境宋兵時爲邊患唐州東南皆大山信陽在蔡州南南直九里武陽平靖五水

等關宋兵必經諸關入信陽實其咽喉守禦莫急往年金亡朝廷得壽泗襄郢而不留兵守卒使宋得之請城信陽以扼宋從之城成授信陽軍萬戶佩虎符丞相伯顏渡江爾阿朮定淮南東道其西道則屬之昂吉爾駐兵和州宋淮西制置夏貴遣兵四萬來攻潛兵出千秋澗塞其歸路因出城奮擊大敗之獲人馬千計阿速軍戍鎮巢暴橫激變昂吉爾攻拔其城遂攻廬州降夏貴昂吉爾入廬州城按堵無所犯遷淮西宣慰使宋丞相文天祥復起兵海道舒民張德興應之襲破興國德安諸郡還據司空山詔昂吉爾攻之一戰而定江左初平官制草創權臣阿合馬納賂鬻爵江南官僚充濫爲甚郡守而下佩金符者多至三四人由行省官舉薦超授宣慰使者甚眾民不堪命昂吉

元史卷二十九 列傳

七

爾入朝具爲帝言且枚舉不循資歷而驟升者數人帝驚愕謂姚樞等曰此卿輩所知而不爲朕言昂吉爾願言之邪卽命偕哈伯崔斌和魯火孫董文忠滅汰之選曹一清仍詔諭江淮軍民俾通知之時兩淮兵革之餘荆榛蔽野昂吉爾請立屯田以給軍餉旣而阿塔海言屯田所用人牛農具甚眾今方有事日本若復調發民兵將不勝動搖議遂寢未幾宣慰使燕相復以爲言帝乃遣數千人卽芍陂洪澤試之果如昂吉爾所言乃以二萬兵屯之歲得米數十萬斛改河南行省參政淮西宣慰使都元帥行尙書省右丞皆兼淮西使帥日本不庭帝命阿塔海等領卒十萬征之昂吉爾疏言曰臣聞兵以氣爲主而上下同欲者勝此者連事外夷三軍屢屛不可以作氣海內騷然一遇

調發上下愁怨不可謂同欲請罷兵息民不從旣而師果無功生平好直言雖帝怒甚其辭不少屈後坐事罷官子昂阿圖從征乃顏有功授廬州蒙古漢軍萬戶府達魯花赤暗普海北海南道廉訪使孫教化的世襲千戶

芒兀台蒙古達達爾氏祖塔思火爾赤從太宗定中原有功爲東平路達魯花赤位在嚴實上芒兀台事世祖爲博州路奧魯總管至元七年又爲監戰萬戶佩金虎符八年改邳州新軍蒙古萬戶治水軍於萬山南岸以兵攻樊拔古城繼敗宋軍於安陽灘轉戰八十里禽其將鄭高大軍攻樊分軍爲五道芒兀台當其一率五翼軍以進焚南岸舟豎雲梯於北岸登櫃子城奪西南角入城命部將據倉粟功在諸將右十一年從丞相伯顏平章阿朮南征命與

元史卷二十九 列傳

七

萬戶史格率麾下會鹽山嶺遇宋兵芒兀台突陳諸軍繼進敗之自郢州黃家原蕩舟入湖至沙洋堡立礮坐十有二豎雲梯先登焚其樓櫓拔羊角垠破沙洋堡直抵新城鏖戰大敗之宋復州守將翟貴以城降將由漢口入江聞宋兵屯漢口乃率舟師經鬪龍口至沙步入江遇宋兵三百餘艘分道來拒進擊走之次武磯堡宋將夏貴堅守不下阿朮率萬戶晏徹爾史格賈文備同芒兀台四軍雪夜泝流西上黎明至青山磯北岸史格先渡宋將程鵬飛拒敵格被三創喪士卒二百人諸將繼進大戰中流鵬飛敗走舟泊中洲宋兵阻水不得近伯顏復遣萬戶張榮實等率舟師來援夏貴率麾下數千將奔大軍乘之大敗走黃州遂拔武磯堡斬守將王達阿朮軍遂渡南岸伯顏留軍

鎮鄂漢率諸將水陸東下十二年正月遣芒兀台前行招諭斬黃德安安慶池州諸郡皆望風款附次丁家洲宋賈似道孫虎臣來拒芒兀台擊之奪虎臣所乘巨舟與宋降將范文虎以兵五百諭降和州及無爲鎮巢二軍九月攻常州拔其木城擊叛將趙潛於豐登莊復招降湖州行省第其功命行兩浙大都督府事十四年改閩廣大都督行都元帥府事時宋二王逃入海詔與右丞塔出會兵收之次漳州諭降宋守將何清十五年師還福州拜參知政事詔與梭都等行省於福鎮撫瀕海八郡十六年沙縣盜起詔復行省事討平之議令移潭州未幾中書言梭都在福建麾下擾民致南劍等路往往殺長吏叛及芒兀台至招來七十二寨建寧漳汀稍獲安集不當更移他處十八年

元史卷二十九 列傳

九

轉右丞時宣慰使王剛中以土人饒貨頗擅威福芒兀台慮有變奏移之他道二十一年拜江淮行省平章政事初宋降將五虎陳義嘗助張弘範禽文天祥助完者都討陳大舉又資阿塔海征日本戰艦三千福建省臣言其有反側意請除之芒兀台攜義入朝保其無事伯顏亦以爲言乃授義同知廣東道宣慰司事授明珠虎符其從者林雄等十人竝上百戶二十二年以言者召赴闕封其家賞遣使按驗無狀未幾拜行省左丞相還鎮江浙二十三年征日本請募島民販私鹽者爲水工從之役既罷請以戰艦付海漕又言省治在杭州其兩淮江東財賦軍實既南輸至杭復自杭北輸京城往返勞頓不便請移省治於揚州復言淮東近地宜置屯田歲入糧以給軍所餘餉京師帝

悉從之詔江淮管內竝聽芒兀台節制二十六年朝廷以中原民轉徙江南令有司遣還芒兀台言其不可遂止閩越盜起詔與不魯彌什等合兵討平之以病召還二十七年以江西平章奧魯赤不稱職特命爲丞相兼樞密院事出鎮江西在官四十日卒芒兀台之在江浙專復自用又易置戍兵變更伯顏阿朮成法帝每戒敕既死臺臣劾郎中張斯立罪狀而芒兀台迫死劉宣及其屯田無成事始聞於帝云子三人帖木不花孛蘭奚襲萬戶亦刺出中書參知政事

阿里海牙

史格

阿里海牙身一畏兀人初生胞中剖而出父以爲不祥將棄之母不忍比長聰辯有膽略家貧嘗躬耕舍耒歎曰大

元史卷二十九 列傳

十

丈夫當垂功竹帛何至稿項猷猷去求北庭書即畏兀文字讀之一月而盡用薦者言得事世祖漸見擢用由左右司郎中遷參議中書省事至元五年命僉河南行省事與阿朮劉整取襄陽始帝之遣諸將也命毋攻城但圍之以俟其自斃乃築長圍起萬山包百丈楚山盡鹿門堡俾南北不通又築峴山虎頭山爲一字城聯互諸堡爲必取計城中糧儲多呂文煥拒守五年終不下九年三月破樊城外郭其將復閉內城堅守阿里海牙以爲襄陽之有樊城猶齒之有脣也互先攻樊城樊城下襄陽可不攻而得乃入奏帝報可會西域人獻新礮法挾之來軍中立礮攻樊城破之先是宋兵作浮橋以通襄陽之援阿里海牙發水軍焚其橋襄援不至城乃拔既而移攻具向襄陽一礮中其

譙樓城中洵懼多踰城降者阿里海牙身至城下與文煥折矢爲誓文煥感而出降遂與入朝帝以阿里海牙行荆湖樞密院事鎮襄陽因奏自古荆襄用武之地今漢水上游已爲我有宜乘勝順流長驅宋必可平會阿朮入覲力贊其議詔益兵十萬拜伯顏爲行省左丞相阿朮爲平章阿里海牙進右丞同伐宋十一年九月會師襄陽遂破郢州及沙洋新城師由沙蕪口入大江宋夏貴守諸隘甚固阿里海牙麾兵攻武磯陽邏等堡貴趨援阿朮遂以兵西渡青山磯鄂州降伯顏與諸將會鄂城下議曰鄂襟山帶江爲江南要區且兵糧皆備今蜀江陵岳潭皆未下不得一大將鎮撫其地上游一動則鄂非我有矣乃分兵四萬遣阿里海牙戍鄂州而自與阿朮將大兵東下阿里海牙

元史卷二十九 列傳

三

集鄂民宣上德意禁將士毋侵掠民大悅遣人徇壽昌信陽德安諸郡皆下阿里海牙言江陵地居上游宋倚之爲重鎮若非乘此破竹之勢取之待江水泛溢鄂漢之城恐亦難守帝從其請進徇江陵與宋鄂州安撫高世傑遇於洞庭湖兵船成列而陳阿里海牙督諸翼水軍屯東岸而自帥兵左右夾擊世傑敗走追至桃花灘力屈而降誅之遂下岳州至江陵縱火焚其柵宣撫朱禕孫制置高達恐卽以城降遂入城釋繫囚放戍券軍除其徭役及法令之繁苛者傳檄歸峽鼎澧隨辰沅靖鄧復均房施荆門及諸徭洞無一梗阻以江陵地圖來上請曰荊州西距梁益南控交廣據江淮上游爲要地非朝廷重臣開大府以鎮之未足以收新附來遠人帝覽奏喜語近臣曰伯顏兵東下

阿里海牙以孤軍戍鄂朕方憂之恐荆蜀連兵順流猝至今荆南既定吾東兵可無後患矣卽命平章廉希憲出鎮江陵促阿里海牙急還鄂且以沿江諸城新附者委之比至鄂爲書招潭州守將李芾不聽阿里海牙以舟師至因決隍水部分諸將以礮攻破其木堡流矢中胸創甚督戰益急奪其城潭人復作月城拒守十三年正月芾力屈自殺軍民數萬人盡爲阿里海牙所屠廬舍樓櫓悉成灰燼惟存一帥署由是郴全道桂陽永衡武岡寶慶袁韶南雄諸州郡守臣皆望風驚悸各奉表降獨知邕州馬瑩守靜江不下阿里海牙貽書許以廣西大都督瑩焚書斬其使靜江以水爲固乃築堰斷大陽小溶二江以遏上流決東南地以涸其隍城破瑩被執阿里海牙以靜江民易叛尤

元史卷二十九 列傳

三

非潭比悉坑之斬瑩於市分遣萬戶脫溫不花徇賓融柳欽橫邕慶遠齊榮祖徇鬱林貴連象脫鄰徇潯容藤梧皆下宋特磨道主儂士貴南丹州牧莫大秀皆奉表求內附奏官其土官分兵戍諸要害自還潭州旣而宋二王稱制海中雷瓊全永與潭屬縣民文才喻周隆羅飛賀十二咸起兵應舒黃蘄相繼亦起詔命討之且略地海外阿里海牙旣誅才喻等至雷州使人招諭瓊州安撫趙與珞不聽遂自航海五百里至白沙口執與珞冉安國黃之紀宋史作傑裂殺之盡定瓊南寧萬安吉陽諸地降八番羅甸諸蠻以其長文龍兒入見置宣慰司十六年入覲獻金三千五百兩白金五萬三千兩南臺御史大夫相威檢覈阿里海牙所俘男婦得三萬二千餘口帝命盡放爲民相威復奏阿

里海牙占降民一千八百戶爲奴自置吏責其租賦阿里海牙謂征行所得帝曰如果降民宜速還司若征行所得令御史臺籍其數量賜有功者十八年奏請徙省鄂州所定荆南淮西江西南廣西之地得州凡五十八洞峯山獠不可勝計所至殺戮立威民不堪命二十一年四月親行海濱收集占城潰卒同鎮南王脫歡征交趾敗績於萬劫江僅以身免還朝加湖廣左丞相自陳其功比伯顏當賜養老戶御史滕魯瞻劾其矜功邀賞阿里海牙自辨有旨逮魯瞻赴行臺質問相威曰爲臣敢爾欺誑邪御史何罪奏釋之未幾卒追封楚國公諡武定後桑葛專政遣其黨要束木鈎攷荆湖錢穀乃籍其家賞送至京

論曰曹彬下江南兵不血刃而曹翰上游專制盡屠江州

元史卷二十九 列傳

五

伯顏下江南亦不戮一人而阿里海牙獨屠潭州屠靜江甚至江陵宣撫朱禔孫制置高達已降尙戮其妻此武夫屠伯之常不足深怪而議者反譽阿里保全潭民稱其未嘗專事殺戮此蓋碑誌僅據其家狀爲言故舛錯若是至舊史修於異代有何諱忌而亦依樣胡盧則何用斧鉞爲哉

史格字晉明天澤長子憲宗賜天澤以衛城授格節度使憲宗崩格北畱謙州五年而歸爲鄧州舊軍萬戶既又代張弘範爲亳州萬戶而以故所將鄧州舊軍授弘範從攻襄陽襄陽下眾軍渡江平章阿朮將二十五萬戶居前每五萬戶擇一人爲帥統之格居其一格軍先渡爲宋將程鵬飛所卻格被三創喪其師二百尋復大戰中流矢鵬飛

身亦被七創乃敗走其後樞密院奏格輕進請罪之帝念其功而薄其罪俾從平章阿里海牙攻潭州礮激柵木傷肩矢貫其手裏創先登拔之遂以軍民安撫留戍從攻靜江眾以賴輜自蔽鑿城格所當礮礮蔽地車不可前乃伺隙率眾攀堞蟻附而上又拔之徇廣西十三州廣東三州皆下溪洞諸夷來降者五十州授廣南西道宣慰使宋亡後其大將張世傑挾益王昞廣王昺據福州立益王傳檄嶺海欲復其地詐言夏貴已復瀕江州郡諸戍將以江路既絕不可北歸皆託計事還靜江格曰君等亦爲虛聲所懼邪待貴踰嶺審不可北歸吾與諸君取塗雲南而歸未爲不可敢輒棄戍哉行省議棄廣東之肇慶德慶封州併兵戍梧州格曰棄地撤備示敵以怯不可宜增兵戍之劇

元史卷二十九 列傳

五

賊蘇仲集潰卒據鎮龍山稱王外掠內耕聞大兵至則僞出降官軍畏暑不敢深入橫象竇貴四州皆被其害格築堡於其界守以土兵乘間火其廬蹂其稻仲窮蹙遂降益王餘眾破潯州害守將靜江北抵泉永皆城守永州被圍凡七月格分兵赴之解其圍益王死衛王立趨廣州避海中崖山遣曾淵子據雷州進兵攻走之世傑將兵數萬復圍雷州城中絕糧士以草爲食格漕欽廉高化諸州糧以餉之世傑解圍去既而宋衛王死廣東西悉平屢遷江西湖廣右丞進平章政事卒子耀福建行省平章榮鄧州舊軍萬戶

董文炳 子士元 弟文蔚 阿剌罕

董文炳字彥明俊之長子也少孤母李有賢行嚴於教子

文炳兄弟從師警敏強記自幼儼如成人以父任爲橐城令明於聽斷上下欽服縣貧重以旱蝗而徵斂日重文炳捐私穀數千石民得以寬前令因軍興稱貸於人取息歲倍以民蠶麥償之文炳以田廬若干畝計直償其貸復以閒田與貧民耕之數年流離漸還民食以足朝廷初料民令敢隱實者誅籍其家文炳使民聚口而居少爲戶數由是賦斂大減民皆富完旁縣有訟不得直者皆詣文炳求決或讒之大府欲中害之文炳卽棄官去癸丑秋世祖在潛藩受命征大理文炳率壯士四十六騎從行人馬道死殆盡至吐蕃止餘兩人徒步從行躑躅道路取死馬肉續食日行不能二三十里會使者遇之還奏其狀世祖遣其弟文忠解尙廐五馬載糗糧迎文炳既至世祖閱勞甚厚

元史卷二十九 列傳

五

有任使皆稱旨由是日親貴用事從伐宋至淮西臺山寨命文炳往取之文炳馳至寨下免胄諭以禍福遂降之師次陽邏堡其地扼長江天險宋兵傾國死守文炳言兵法先聲有奪人之心願假戈船先諸軍渡江以奪其氣率弟文用文忠載勁卒數百以從鼓櫂疾趨徑薄南岸三戰三捷命文用輕舟報捷世祖方駐香鑪峯扶鞍起立豎鞭仰指曰天也且命他師毋解甲旦日畢渡會憲宗崩班師世祖卽位命文炳宣慰燕南諸道還奏擾攘之後危疑尙多宜大赦以安反側從之中統二年授侍衛親軍都指揮使三年李璫反濟南文炳會諸軍圍之璫不得遁久之賊勢日蹙文炳乃抵城下呼璫愛將田都帥曰反者璫耳餘來卽吾人毋自取死也田縉城降璫遂亂禽璫以獻璫兵有

沂漣兩軍二萬餘皆勇而善戰主將怒其從賊配諸軍使陰殺之文炳當殺二千人言於主將曰彼爲璫所脅耳今盡戮之恐乖天子不殺降之詔主將從之然他營所殺已大半皆大悔璫伏誅山東猶未靖乃以文炳爲山東東路經略率親軍以行出金銀符五十聽給有功者文炳至益都留兵於外從數騎冠裳而入居府不設警衛召璫故將吏立之庭諭以朝廷德意赦其誅誤且陳金銀符待有功得便立除授所部大悅山東以安至元二年以文炳爲鄧州光化行軍萬戶河南等路統軍副使奏造戰艦五百習水戰預謀取宋方略帝欲大發河北民兵攻宋文炳曰河南密邇宋境人習江淮地利不如使河北耕以供軍河南戰以闢地俟宋平則河北長隸兵籍河南削籍爲民如是

元史卷二十九 列傳

五

爲便又將校素無俸給連年用兵至有身爲大校出無馬乘者請頒將校俸錢以秩爲差皆從之七年改山東路統軍副使治沂州沂與宋接壤鎮兵仰內郡餉運有詔和糴本部文炳不發詔而遣使入奏曰敵人接壤知吾虛實一不可邊民供頓甚勞重苦此役二不可困吾民以懼來者三不可帝立罷之十年遷樞密院判官行院事於淮西築正陽兩城夾淮相望以綴襄陽擣宋腹心十一年拜參知政事夏霖雨水漲宋淮西制置使夏貴帥舟師十萬來攻矢石雨下文炳登城禦之飛矢貫臂脇文炳拔矢授左右發四十餘矢箠中矢盡願左右索矢又十餘發矢不繼力亦困不能張滿遂悶絕幾殆明日水入外郭士卒卻避貴乘之壓軍而陳文炳起束劍督戰于士選以戈擊貴

部將獲之以獻貴遂去不敢復至是歲大舉兵伐宋丞相伯顏自襄陽東下十二年正月文炳自正陽會伯顏於安慶降其守將范文虎文炳言大軍既疲於陽邏堡請以所部兵當前鋒伯顏許之走宋相賈似道於蕪湖次當塗拔采石三月詔以天暑命伯顏軍駐建康文炳軍駐鎮江時揚州眞州堅守不下常州蘇州既降復叛張世傑孫虎臣約眞揚兵誓死戰眞揚兵戰每敗不敢出世傑等陳大艦萬艘碇焦山下勁卒居前文炳身犯之乘輪船建大將旗鼓居中二子士選士表戈船翼之大呼突陳諸將繼進飛矢蔽日戰酣短兵相接兩軍皆殊死鬪聲震天地自寅至午宋師大敗世傑東走入海俘其甲士萬餘人悉縱不殺獲戰船七百宋人舉國震恐十月諸軍分三道進文炳居

元史卷二十九 列傳

七

左由江陰循海趨臨安所過民不知兵凡獲生口悉縱遣之威信前布皆望旗而服海寇張瑄有眾數千倚島爲雄遣士選招降之得海舶五百十三年正月師次鹽官再招之不下將佐議屠之文炳曰縣去臨安不百里聲勢相及臨安已有成約吾輕殺一人則害大計況屠一縣邪遣人諭降之遂會伯顏於臨安城北張世傑欲以其主航海文炳繞出城南屯浙江亭世傑計不行乃挾宋主弟吉王昞廣王昺南走宋主焜遂降文炳入城罷宋官府散其諸軍封庫藏收圖籍禮器璽符交伯顏上之伯顏以宋主入覲有詔留後事一委文炳禁戢豪猾撫慰士女宋民不知易主時翰林學士李榮奉詔招宋主至臨安文炳謂之曰國可滅史不可沒宋十六主有天下三百餘年其太史所記

具在史館宜悉收以備典禮乃得宋史及諸注記五千餘冊歸之國史院宋福王與芮赴京師徧以重寶致諸貴文炳卻不受及官錄與芮家具籍受寶者惟文炳無名拜中書左丞時張世傑奉吉王昞據台州閩中亦爲宋守敕文炳進兵所過禁士馬毋踐田麥曰在倉者吾既食之在野者汝又踐之民何以續命次台州世傑遁諸將先俘州民文炳下令曰台人首效順於我我不暇有故世傑據之其民何罪敢有擅俘者以軍法論凡縱免者數萬口温州未下其守將焚城遁文炳亟命滅火追禽其將數其殃民罪斬以徇既逾嶺漳泉建寧邵武諸郡皆送款閩平十四年帝在上都適北邊有警欲親將北伐正月急召文炳於臨安比至上都請從征帝曰朕召卿意不在是豎子盜兵朕

元史卷二十九 列傳

夫

自撫定山以南國之根本盡以託卿猝有不虞便宜處置以聞省院事無大小咨卿而行文炳避謝不許至大都更日直中書平章阿合馬方恃寵用事生殺任情惟畏文炳爲之少斂嘗執筆請署省案文炳以樞密不署中書案再四不肯署或問其故文炳曰主上所付託者在根本之重非文移之細且吾少徇則濟姦不徇則致譏譏行則身危深負付託本意吾是以預其大政而略其細務也十五年夏以疾奏請解機務詔赴上都命僉書樞密院事中書左丞如故八月天壽節賜宴文炳以功臣坐宗室大臣上九月卒贈平章政事諡忠獻文炳居家孝友居母喪哀毀骨立教諸弟如嚴師雖貴顯如文用文忠不命不敢坐裘馬金帛皆共之有萬石君風子士選孫守簡別見世祖文臣

傳

士元一名不花字長卿文炳長子少從名儒受學及長善騎射中統初以供奉內班從車駕巡狩北方襲叔父文蔚職爲千夫長丞相伯顏克江南宋兵保兩淮未下士元數與戰拔淮安堡從行省阿里攻揚州駐師灣頭堡阿里素不習兵率輕騎數百出堡士元與別將哈刺圖以百騎從之揚州守將姜才乘隙來攻日暮宋兵至者萬餘士元方整陳欲戰阿里趨令左旋已乃遁去士元與哈刺圖以部兵赴敵泥淖馬不能馳乃棄馬步戰至四更敵眾始退及旦阿里來視戰地見士元臥泥中身被十七創甲裳盡赤肩昇至營而絕年四十有二哈刺圖亦戰死江淮既平伯顏入朝言於帝曰淮海之役所損者二將而已帝問其人

元史卷二十九 列傳

无

以士元與哈刺圖對帝曰不花健捷過人晝戰必能制敵夜戰而死甚可惜也追封趙郡公諡忠愍

文蔚字彥華文炳次弟也重厚寡言勤讀書兼善騎射文炳爲橐城令家務悉委之辛丑起民兵南征文炳命率十有七人私整鞍馬衣甲自爲一隊與眾軍渡淮甲寅世祖收大理還駐六盤山文炳以文蔚孝謹公勤可任解所佩金符以讓帝嘉賞之授橐城等處行軍千戶南鎮鄧州與荆襄接壤沿邊城壁未築是年冬修光化明年立昆陽又明年築棗陽文蔚悉總之親其勞苦不鞭笞而事集丁巳攻樊城樊城南據漢北阻湖師不得渡文蔚夜領兵士於湖水隘處立椿寶薪草頃之梁成至曉畢渡圍遂合復統拔都軍前行奪其外城論功居取己未憲宗伐宋入川蜀

文蔚奉詔將鄧兵西上率將士挾雲梯冒飛石崎嶇戰釣魚山帝賞賚之中統元年世祖置武衛軍文蔚以鄧兵入爲千戶留屯上都三年李璫反據濟南文蔚以麾下軍圍其南面經時力戰城破奏功還至元五年卒於上都弟文忠時爲樞密僉院乞護喪南還帝甚憫之泰定中追封隴西郡伯

阿刺罕札刺爾氏祖撥徹初事太祖爲火爾赤兼爲博爾赤一官掌服御弓矢一官主飲膳也太宗時從征隴北陝西有戰功父耶柳干從皇子闊出忽都虎南征累功授萬戶遷天下馬步禁軍都元帥又代大將察罕益德統大軍攻淮東西諸郡兩世皆死於戰阿刺罕襲父職攻上萬戶至元十二年權行中書省參知政事明年行江東道宣慰

元史卷二十九 列傳

羊

使又明年入覲遷行省左丞進右丞仍宣慰江東十八年入覲拜中書左丞相行中書省事征日本次明州卒方歲已未從世祖渡江破宋師於隆興北山中統初討叛黨阿藍荅渾都海於河西明年扈征叛王阿里不哥於幕北又明年從宗王平李璫於濟南四役皆有功至元四年觀兵襄陽明年圍之越六年克之走宋師安陽灘綴宋師百丈山十一年略地江北奪鄧州南門堡獻盪舟之策渡沙蕪取鄂州遂別略壽昌統左翼軍順流東下十二年入建康與右丞相伯顏左丞董文炳分軍三道取宋阿刺罕將右軍發建康與宋師戰屢敗之破東垣拔溧陽建平罕將右安長興闢獨松關前後斬首萬五千級十三年三軍會於杭宋亡徇浙東降趙提刑等五百餘人追襲宋軍至福安

僵尸四十里般步帥李世達倂秀王與釋監軍趙由瑒防禦使林德降安撫使王吉分軍興化禽宋參政陳文龍降宋官二百餘人淮兵三千人江南遂平子拜降襲職卒弟耶速迭爾襲以萬戶領蒙古軍鎮守河南文宗以懷王由江陵入繼大統道過汴梁召耶速迭爾以其軍扈從北上進平章政事天祿改元知樞密院事帥兵屢拒上都之軍於通州昌平居庸關復禦陝西兵於廣平磁州遷河南江北行省平章兼山東河北蒙古軍大都督詔加贈其祖父三代皆曹南王敕國史臣虞集碑其神道而許有王碑其神堂道園文錄至正集

張弘範

張弘範字仲疇柔第九子也善馬槊能詩歌年二十時兄

元史卷二十九 列傳

三

順天路總管弘略上計壽陽行都雷弘範攝府事吏民服其明決蒙古軍所過肆暴弘範杖遣之入其境無敢犯者中統三年授行軍總管從討李璫於濟南柔戒之曰圍城勿避險地地險則己無懈心兵必致死主帥慮其險苟有來犯必赴救可因以立功勉之弘範營城西璫每出軍侵突獨不向弘範弘範曰我易受攻而敵不至必以奇兵來襲我也遂築長壘濠內伏甲開東門以待之夜浚濠倍其深廣璫不知也明日果擁飛橋來攻未及岸陷濠中其得跨濠而上者突入壘門遇伏皆死璫既誅朝廷懲璫以藩鎮專兵民之權故能為亂議罷大藩子弟之在官者弘範例罷至元元年弘略既入宿衛復授弘範順天路管民總管佩金虎符二年移守大名歲大水漂沒廬舍微服出行

察民疾苦而除革之又輒免其租稅朝廷罪其專擅弘範請入見進曰臣以為朝廷儲小倉不若儲之大倉帝曰何說也對曰今歲水潦不收而必責民輸倉庫雖實而民死亡殆盡明年租將安出曷若活其民使不致逃亡則歲有恆收非陛下大倉庫乎帝善之六年括諸道兵圍宋襄陽朝廷以益都兵乃李璫所練勇悍難制故授弘範益都淄萊等路行軍萬戶命屯鹿門堡斷宋餉道以絕郅援弘範言今規取襄陽周於圍而緩於攻者計待其自斃也然夏貴乘江漲送衣糧入城而我不能禦其境南接江陵歸峽商旅士卒道出襄陽南者絡繹不絕寧有自斃之時乎宜城萬山以斷其西柵灌子灘以絕其東庶幾敵可坐困帥府奏用其言乃移弘範兵戍萬山一日與將士較射出東

元史卷二十九 列傳

三

門宋兵奄至眾寡不敵將佐請入城自守弘範曰敵至不戰何以示威即擐甲上馬遣偏將李庭當其前他將六百人攻其後親率二百騎為長陳步兵閒陳而待令曰聞吾鼓則進未鼓勿動宋軍步騎相聞突陳弘範嚴陳不動再進再卻弘範鼓之前後奮擊宋師奔潰八年築一字城進逼襄陽破樊城外郭九年攻樊城流矢中其肘裏瘡見主帥曰襄樊水陸二軍相為唇齒故不可破若截江道斷其水軍之援而全力攻樊樊必破樊破則襄陽亦下矣從之明日復率銳卒先登拔之十一年丞相伯顏伐宋弘範率左部諸軍循漢江東略郢而南拔武磯堡渡江為大軍前鋒宋相賈似道阻兵蕪湖殿帥孫虎臣據丁家洲弘範轉戰而前諸軍繼之宋師潰長驅至建康十二年五月次瓜

洲分兵立柵據其要害揚州都統姜才以勁兵二萬出揚子橋都元帥阿朮禦之夾水而陳弘範以十三騎徑度衝之陳堅不動弘範引卻有驍將回紇人鎧仗甚異躍馬揮大刀出陳直趨弘範弘範旋轡回架殪之合軍歡呼震地敵人奪氣進師薄之眾潰亂追至城門斬首萬餘級自相蹂藉溺死過半宋將張世傑孫虎臣等悉其水軍而陳於焦山南北決戰弘範以一軍從旁橫衝之宋師遂敗追至圖山之東奪戰艦八十俘馘千計上其功賜號拔都改亳州萬戶軍張柔舊所統也從中書左丞董文炳由海道會伯顏進次近郊宋主上降表以伯姪爲稱往返未決弘範將命入杭城數其大臣之罪皆屈服竟取稱臣降表來上十三年台州復叛其守將殺使焚書及城破或請屠之

元史卷二十九 列傳

三

弘範但誅其首而已十四年師還授江東道宣慰使是時宋丞相文天祥陳宐中張世傑等立益王昀於福州閩粵響應爲董文炳塔出及梭都等所敗走廣州會昀世傑等復立衛王昀於海中厓山尙有船七百艘眾十餘萬十五年命弘範爲蒙古漢軍都元帥往平之辭曰漢人無統蒙古軍者乞以蒙古信臣爲首帥帝曰一軍二帥號令不一不許賜錦衣玉帶弘範辭請賜劍甲帝出武庫劍甲聽其自擇且諭之曰不用令者以此劍處之將行薦李恆爲已貳從之至揚州選將校水陸二萬分道南征由閩入粵以弟弘正爲先鋒弘正驍勇既踰嶺所向克捷進攻三江寨寨據隘乘高不可近因連兵向之寨中持滿以待弘範令下馬治朝食持滿者疑不敢動而他寨不虞也忽麾軍

連拔數寨回擣三江盡拔之至漳州軍其東門命別將攻南門西門乃乘虛破其北門拔之鮑浦寨南瀕海弘範先斷其走水之路而後攻陸又拔之福建瀕海郡邑皆望風下獲宋丞相文天祥於五坡嶺十六年正月庚戌由潮陽港入海辛酉次厓山山南北互二百餘里宋建行宮於山麓環以千艘碇海中建樓櫓其上橫爲一陳隱然如城堞船尾皆向外爲死守計於是不可攻人而止可受人之攻弘範引舟師赴之厓山東西對峙其北水淺舟膠非潮至不可進乃繞山之東南入大洋始得逼其舟時元兵皆海艘無哨船不能趨利故世傑得以輕舟往來樵汲自如及李恆以廣州哨艇至遂斷其汲道燒其宮室宋兵每日惟潮平時有淡水取汲舟中糧可支半載弘範遣使諭降世

元史卷二十九 列傳

三

傑覆請退屯廣東一道以奉趙氏宗廟不許二月癸未將戰或請先用礮弘範曰礮攻則舟散我分追不利不如聚而殲之也明日四分其軍軍其東南北三面李恆軍北面弘範自軍南面相去里餘下令曰宋舟附山潮退必東遁南軍急邀之勿令得去西北軍聞吾樂作乃戰平旦先麾北面軍乘潮而戰不克會潮退水南瀉北面軍順流衝擊突入其陳李恆命轉柁尾溯行徑擣其柵憑高瞰敵兩軍殊死戰矢石蔽空塵至日午潮長水北流南面軍復順水勢進攻世傑腹背受敵元軍預濡氈覆艦以禦火礮而以幙障舟尾戰樓伏士負盾約聞金聲始起戰敵大集不動俄樂作敵疑宴而懈我軍已及其舟而敵矢將盡鳴金徹障弓弩火石交發頃刻連奪其七大舟血戰自已至申聲

震大海宋師大潰宋臣陸秀夫負其主昷赴水死獲其符璽印章世傑以十六艦奪港遁李恆追至高州大洋不及世傑走交趾大風壞其舟死海陵得其戰艦七八百尸浮海面十餘萬嶺海悉平磨崖勒石紀功於厓山之陽而還十月入朝賜宴內殿慰勞甚厚未幾疾病沐浴易衣冠扶掖至中庭面闕再拜退坐命酒作樂與親故言別出所賜劍甲命付嗣子珪曰汝父以是立功汝佩服勿忘也語竟端坐而卒年四十有三引範將家子而讀書知大誼伯顏會諸將於建康出庫金頒賞引範後至伯顏詰以軍法後至者誅引範笑曰臨戰不敢後受賞恥居先也眾皆歎服獲文天祥使拜不屈待以賓禮獲宋禮部侍郎鄧光薦命子珪師之簿錄宋內庫金帛時夾谷士常預焉其後多所

元史卷二十九 列傳

李恆

遺失或疑士常私匿欲攷驗之引範謂士常名士行義有素願以官爵家帑保其無他既而其誣果白延祐六年加保大功臣追封淮陽王謚獻武子珪別見中葉言臣傳

李恆

李恆字德卿其先世爲西夏國主太祖經略河西有守兀納刺城者夏主之子也城陷不屈而死子惟忠方七歲求從父死主將異之執以獻皇弟合撒爾大王留養之從經略中原有功以達魯花赤佩金符監淄川王分地遂爲淄州人惟忠生恆恆生而穎異王妃嘗子之李璫反漣海恆從其父棄家入告變璫怒繫恆闔門於獄璫誅始得出世祖嘉其忠至元七年授益都淄萊新軍萬戶從伐宋圍攻襄樊十一年從丞相伯顏濟漢渡江遂從大軍東下十二

年春宋將高世傑復窺漢河仍遣恆還鄂州諭江陵降其生口十餘萬悉縱爲民復從右丞阿里海牙至洞庭禽高世傑下岳州進拔沙市留鎮守江陵未幾徙鎮常德以扼湖南之衝俄有詔分三道出師伯顏自將擣臨安以右丞阿里海牙鎮鄂徇湖廣而以恆爲左副都元帥從都元帥遜都台出江西九月於江州開元帥府下撫瑞建昌臨江吉州遂定贛南安宋廣東經略徐直諒納其所部十四郡前江西制置黃萬石亦以邵武降計南踰嶺海北盡長江東西際閩湘其收郡縣百有五十得戶三百萬明年宋丞相陳宐中及其大將張世傑立益王昷於閩中右丞相文天祥亦自會昌以眾屯邵武沿海郡縣豪傑吳浚等爭起兵應之恆遣將破吳浚兵於南豐世傑遣都統張文虎與

元史卷二十九 列傳

李恆

浚合兵十萬期必復建昌恆復遣將敗之兜港浚走從文天祥於瑞金又破之天祥走據汀恆遣兵復汀州旋爲天祥所陷行收兵出興國連破諸邑圍贛州尤急恆乃分兵援贛自率精兵潛至興國擊走之及諸空坑降其眾數萬軍中有得天祥與建昌故吏民書諸將欲借此盡籍誅諸富戶事連數百家恆悉焚其書人心乃定或欲發吉州天祥祖墓恆曰豈有王師發人祖墓之理會詔至令與右丞阿剌罕左丞董文炳合兵追益王昷皆謂宜趨福建恆謂若諸軍俱赴福建彼必竄廣東以撼江西不如從廣東夾攻之果遇宋兵於梅嶺敗之乃遁走碭洲十四年拜參知政事行省江西十五年宋益王昷其樞密張世傑陸秀夫等復立衛王昷守廣東諸郡移屯海中厓山距廣州四百

里詔恆以蒙古漢軍副都元帥經略之時都元帥張弘範舟師未至恆分遣諸將略定梅循英德清遠走王道夫擊凌震於海上獲其船三百艘禽將吏二百餘人又破其餘軍於菱塘十六年二月弘範至自漳州其圍匡山弘範督南面軍恆督北面軍合擊大敗之嶺海平十七年拜中書左丞行省荆湖凡虜男女奴鬻者罪之獵戶之籍於官者千戶之外悉放散之十九年從皇子鎮南王征交趾奪天長府其王舉國航海恆將舟師追之敗諸海洋獲船二百始恆議城天長儲餉待戰奪於眾議不果既而盛夏軍中疾作霖潦言營議班師命恆殿後且戰且行至永平關賊伏毒弩貫恆膝負創奪關出境毒發卒於思州年五十後贈滕國公諡武愍柳貫撰其廟碑見待制集

元史卷二十九 列傳

卷二十九

博羅歡

焦德裕

博羅歡畏荅爾幼子蘸木曷之孫瑣魯火都之子也時諸侯王及十功臣各有斷事官博羅歡年十六為本部芒忽斷事官從世祖討阿里不哥數有功中統三年李璫叛命帥芒忽一軍圍濟南分兵掠益都萊州悉平之詔錄燕南獄讞決明允皇子雲南王愛哥亦為其省臣寶合丁毒死事覺中書擇可治其獄者奏上四人皆不稱旨丞相線真以博羅歡聞帝可其奏博羅歡以年少不知書辭乃以吏部尚書別帖木爾輔其行未至雲南寶合丁密以金六簾迎餽博羅歡以其握兵微外拒之恐致變陽諾曰吾橐不能容待歸取之至則竟其獄誅毒王者而歸其金於省授昭勇大將軍右衛親軍都指揮使大都則專右衛上都則

兼三衛會伐宋授金吾衛上將軍中書右丞詔分大軍為二右軍受伯顏阿朮節度左軍受博羅歡節度俄兼淮東都元帥並以山東軍隸焉遂軍於下邳召將佐謀曰清河城小而固與昭信淮安泗州為犄角猝未易拔海州東海石秋三城遠在數百里外必不嚴備吾頓大兵為疑兵以輕騎倍道襲之其守將可禽也師至三城果皆下清河亦降宋主以國內附而淮東諸城猶為之守詔博羅歡進軍拔淮安南堡戰白馬湖及寶應掠高郵入漕河援灣頭斷通泰援兵遂下揚州淮東平益封桂陽德慶二萬一千戶十四年討叛臣只里幹台於德昌平之與博羅同署樞密院事拜中書右丞行省北京未幾召還時江南新附尚多反側詔募邊民能從大軍進討者使自為一軍聽節度於

元史卷二十九 列傳

卷二十九

博羅歡

其長博羅歡奏曰今疆土浸廣勝兵百萬指揮可集何假此無藉之徒彼一踐南土則橐其貨財妾其婦女民畏且仇叛將愈眾奏上會常德入朝訴唐兀一軍殘暴其境內一如所言敕斬以徇於是所募軍皆罷十八年以中書右丞行省甘肅二十四年諸王乃顏叛帝將親征博羅歡諫曰昔太祖分封東諸侯其地與戶臣皆知之以二十為率乃顏得其九芒忽氏兀魯氏扎刺爾氏弘吉刺氏亦赤烈思氏五諸侯得其十一惟徵五諸侯兵自足當之何至上煩乘輿臣疾且愈請東征帝賜鎧甲弓矢鞍勒命督五諸侯兵與乃顏戰敗之賊黨塔不帶以兵來拒會久雨軍乏食諸將欲退博羅歡曰兩陳相對豈容先動俄塔不帶引兵退師乘之轉戰二日博羅歡身中三矢大破之適太師

月魯那演大軍來會遂平乃顏禽塔不帶既而其黨哈丹復叛詔與諸侯王乃馬台討之哈丹游騎猝至博羅歡從三騎返走抵絕澗可二丈許追騎垂及博羅歡策其馬一躍而過三從騎皆歿人謂有神助云哈丹死斬其子老的於陳往返凡四歲凱旋俘哈丹二妃以獻敕以一賜乃馬台一賜博羅歡陳其金銀器於延春閣上召諸侯王將帥分賜之博羅歡辭帝嘉其讓更賜金銀器五百兩以旌之改河南行中書省平章政事有詔括馬毋及勳臣之家博羅歡先入善馬十八爲倡汴南諸州葬爲巨浸博爾歡躬行決口督有司繕完之三十一年成宗立入朝請以泰安州所入五戶絲四千斤易內庫緞帛分給芒忽一軍帝爲救遞車送軍中竝賜以世祖所佩弓矢繫帶有頃近臣奏

元史卷二十九 列傳

完

伐宋時右軍分屬伯顏阿朮左軍分屬博羅歡今伯顏阿朮皆受分地而博羅歡未及帝曰何久不言乃益封高郵五百戶大德元年叛王藥木忽爾及兀魯速不花來歸博羅歡聞之遣使馳奏曰諸王之叛皆由其父此輩幼弱無所與知今茲來歸宜棄其前惡以勸未至帝深以爲然賜金鞍勒拜江浙等處行中書省平章政事居歲餘卒年六十三博羅歡勇有智略戰嘗以身先之所獲財物悉與將士故得其死力平居常以國事爲憂聞變卽請行至終其事乃止其忠義出於天性累贈太師上柱國加封泰安王諡武穆姚燧碑其神道長子渾都山東宣慰使遙授中書平章政事三子桢先河南江北等處行中書省左丞相季子博羅陝西等處行中書省平章政事桢先子尼摩星吉

襲郡王亦思制瓦性吉中政使其仲子伯都幼穎異不以家世自矜長嗜書史至大二年出爲江南行臺御史中丞延祐元年拜甘肅行省平章政事時米價騰踊陸輓每石費二百緡乃爲經畫省四百餘萬緡自是諸倉俱充溢甘肅州氣寒地瘠少稔歲發粟振饑春則貸種於是兵民兼足詔賜名鷹甲冑弓矢及鈔五千緡以勞焉四年移江浙行省平章政事入爲太子賓客上書陳古先聖王正心修身之道帝嘉納之遷江南行臺御史大夫皇太后謂東宮官不立使外止其行遂以疾辭去寓居高郵英宗卽位復命爲江南行臺御史大夫陸見以疾固辭命以平章祿歸養於家復賜鈔十萬緡所服藥須空青詔遣使江南訪求之伯都固辭所賜鈔及祿泰定元年還京師卒朝廷知其貧

元史卷二十九 列傳

罕

賻鈔二萬五千貫御史臺奏賻三萬五千貫仍還所辭祿妻弘吉刺氏弗受曰恐非伯都意也子篤爾吉將作院判官
焦德裕字寬父雄州人父用仕金爲千戶守雄州北門太祖兵至州人開南門降用猶力戰生獲之帝以其忠壯釋不殺復舊官徇地山東未嘗妄殺一人年六十二卒德裕通左氏春秋少拳勇善射從其舅解昌軍中金將武仙殺眞定守史天倪仙旣敗走其黨趙貴王顯齊福等保仙故壘數侵掠太行太宗擇廷臣有才辯者往招之楊惟中以德裕薦遂使眞定降齊福禽趙貴王顯亡走德裕追射殺之其地悉平詔賜井陘北障城田中統四年授閩蓬等處都元帥府參議宋臣夏貴圍宣撫使張庭瑞於虎嘯山寶

薪土塞水源人無從得飲德裕往援夜薄費營令卒各持三炬貴驚走追及鵝谿賊千人獲馬畜兵仗萬計從丞相伯顏南征授僉行中書省事遂從下安慶至鎮江焦山寺主僧誘居民叛丞相阿朮欲盡坑其徒德裕諫止之乃入城撫定其眾平章阿合馬譜丞相伯顏殺丁家洲降卒奏以德裕為中書參政欲假一言證成之德裕辭不拜改淮東宣慰使淮西賊保司空山檄淮東四郡守為應元帥帖哥邈得其檄即械郡守許定國等四人使承反狀將籍其家德裕言四人者皆新降天子既寵綏之有地有民尚何他覲奈何信反閒殺無辜邪盡復其官拜福建行省參政卒年六十九贈平章政事追封恆國公諡忠肅

塔出 校都百家奴

元史卷二十九 列傳

聖

塔出布兀刺子也幼孤長善騎射至元元年入侍世祖占對多稱旨四年給以察罕食邑賦稅之半又還其所俘通戶三十七年降金虎符授山東統軍使鎮莒密膠沂鄒郛宿卽墨等城設方略謹斥候宋人不敢北向九年改僉樞密院事數將兵攻下瀕淮堡柵略地漣海獲人畜萬計請加賞賚降人蔣德勝以勸來者十年城正陽以扼淮海諸州兵宋陳奔率安豐廬壽等州兵數撓其役塔出選精銳日十數戰奔遁去卒城正陽宋人復造戰艦於六安欲攻正陽塔出率騎兵焚其艦餽饌久不繼出兵據險潛取安豐麥以餉軍出奇兵破宋軍於橫河口十一年朝議淮上諸郡宋之北藩城堅兵精不可猝下攻之徒老我師宜先渡江搗其根本雷兵淮甸絕其救援庶長江可乘虛而渡

於是塔出為淮西行省參政帥師攻安豐廬壽等州俘生口萬餘來獻宋夏貴率舟師十萬圍正陽決淮水灌城幾陷帝遣塔出往救之遇宋兵於潁州時城中戍卒僅數百塔出即發公庫弓矢驅市人出戰急徙北關民入城伏兵以待是夜宋人果焚北關火光屬天塔出率眾從暗中射之矢下如雨宋軍退走追至沙河大破之溺死不可勝計明日長驅直走正陽時方盛暑乘大雨突圍入城遂堅壁不出旋與右丞阿塔海分帥銳師以出渡淮至中流皆殊死戰宋軍大潰追數十里斬首數千級奪戰艦五百餘遂解正陽之圍秋八月引兵渡淮屯廬揚閭十二年從丞相伯顏以舟師東下宋相賈似道奔揚州遂分兵四出克池州取太平順流至建康丹徒江陰常州皆望風迎降謀

元史卷二十九 列傳

聖

告揚州人將夜襲丹徒塔出設伏以待揚州軍果夜至塔出扼西津邀擊之殺獲溺死者甚眾授淮東左副都元帥十三年領淮西行中書省參政時沿淮諸州新附塔出禁侵掠撫瘡痍練士卒備姦宄境內帖然俄遷江西都元帥征廣東宣布恩信所至溪洞納款十四年宋益王昞廣王昺走保嶺海復授江西宣慰司行中書省事遷治贛州十五年以二王事入議帝命張弘範李恆總兵進討塔出留後以供軍費初江西甫定帝命墮其城塔出表言豫章諸郡皆瀕江為城霖潦泛溢無城必至墊溺墮之不便帝從之州郡有已降復叛者塔出謂同僚曰撫治乖方之所致也中間豈無誣誤止誅其渠魁盡釋餘黨瑞州張公明懇左丞呂師夔謀為不軌塔出廉知其誣曰狂夫欲脅求貨

耳若以矇昧言遠聞之朝廷則大獄滋興連及無辜且師
夔居相職詎肯爲狂妄之事若遲疑不決恐彼驚疑乃斬
公明而後奏聞帝是之十七年入覲卒於京師年三十七
子二人長宰身江西宣慰使次必宰身征東行省左丞
梭都扎刺爾氏少入宿衛從征花馬國有功李璫叛山東
從諸王合必赤平之還言於朝曰郡縣惡少年多從閒道
鬻馬於宋境乞免其罪籍爲兵從之得兵三千人以千人
隸梭都爲千戶命守蔡州至元五年阿朮等兵圍襄陽命
梭都出巡邏奪金剛臺諸寨六年拒宋將范文虎舟師於
灌子灘九年攻樊城先登城遂破襄陽降再與卒五千賜
弓矢襲衣金鞍白金等物入見擢郢復等處招討使十一
年從大軍渡江鄂漢降十二年建康降改建康安撫使攻

元史卷二十九 列傳

聖

平江嘉興皆下之帥舟師會伯顏於皋亭山宋平詔伯顏
以宋主入朝留參政董文炳守臨安令其自擇可副者文
炳請留梭都從之時衢婺諸州皆復起兵文炳使梭都往
守嚴州以鎮之至嚴方十日而衢婺徽連兵來攻皆戰卻
之復婺衢處州又攻建寧府松溪縣懷安縣皆下之十四
年升福建道宣慰使行征南元帥府事聽參政塔出節制
塔出令梭都取道泉州泛海會於廣州之富場時邵武方
聚兵觀豐信州告急梭都趨建寧遇宋兵於崇安軍容甚
盛令其子百家奴及楊庭璧等夾擊之竝分設二伏以待
庭璧陷陳深入宋兵敗走伏兵起邀擊之斬首千餘級宋
丞相文天祥南劍州都督張清合兵將襲建寧梭都夜設
伏敗之轉戰至南劍敗張清奪其城至福州王積翁以城

降攻興化軍矢石雨下乃造雲梯礮石攻破之巷戰終日
斬知軍陳瓚屠之而南至漳州先遣百家奴往會塔出自
畱攻漳州斬首數千級知府何清降攻潮州不下梭都恐
失富場之期乃舍之而去十五年至廣州塔出令還攻潮
時知府馬發城守甚備梭都塞塹填濠造雲梯鵝車日夜
急攻潮人潛出城焚之二十餘日不能下梭都令於眾曰
有能先登者拜爵增秩總管兀良哈耳先登諸將繼之戰
至夕宋兵潰潮州平進福州行省參政徵入見帝以江南
既定將有事於海外升泉州行省左丞招諭南夷諸國十
八年改占城行省右丞十九年率戰船千艘出廣州浮海
伐占城占城迎戰兵號二十萬梭都率敢死士擊之斬溺
死者五萬餘又敗之大浪湖斬首六萬占城降梭都造木

元史卷二十九 列傳

聖

爲城闢田以耕伐烏里越里諸小夷皆下之積穀十五萬
以給軍二十一年鎮南王脫歡征交趾詔梭都帥師會之
敗交兵於清化府奪義安關脫歡命梭都屯天長以就食
與大營相距二百餘里俄有旨班師脫歡引兵還梭都不
知也交趾使人告之弗信及至大營則空矣交兵遮之於
乾滿江梭都戰死事聞諡襄愍子百家奴亦從攻襄樊從
渡江東下屢立戰功授武略將軍賜金符爲管軍總管鎮
高郵白馬湖行省以百家奴襲父職郢復州招討使建康
宣撫使仍領本翼軍頃之徇地福建行定衢婺信等州城
邑與畬軍遇疾戰敗之鼓行而東降建寧府攻拔南劍州
閩清懷安二縣傳檄而定從下福州破興化別擊東華鄉
張世傑軍於泉州俄領諸軍乘戰船入海追逐世傑於惠

州甲子門進至同安縣荅關寨瀕海縣鎮悉招下之降其戰船三千餘艘至元十四年冬十二月宋二王遣倪宙奉表詣軍門降遂進兵至廣州諸郡縣以次降附明年春正月振旅而還廣東遂平三月引宙奉降表來朝未至賜虎符管軍萬戶七月遂朝於上都授海外諸蕃宣慰使兼福建道市舶提舉仍領本翼軍守福建是時福建多水災百家奴出私錢市米以振貧民全活甚眾十七年朝京師加宣慰使都元帥二十二年父梭都戰死交趾百家奴遂與脫歡引兵薄交趾境水陸轉戰輒有功武宗至大四年卒於家

烏古孫澤

烏古孫澤字潤甫臨潢人讀書舉大略才幹過人世祖將

元史卷二十九 列傳

巽

取江南澤以選輸鈔至淮南餉軍丞相阿朮見而奇之補淮東大都督府掾至元十四年從元帥梭都下兵閩越時宋廣王遁於海聚兵甲子門其將張世傑攻泉州興化守臣陳瓚舉郡應之文天祥置都督府於南劍州守臣張清行都督府事謀復建寧閩中郡縣往往復從宋江東大擾梭都時軍浙東建信復告急梭都謀於眾曰我軍當何先澤曰彼據閩廣而我往浙右非策之善譬之伐木務除其根當先向南會行省檄梭都與左丞塔出會兵甲子門遂度兵閩關八戰而至南劍殺其守臣張清宋師遂退冬十月收福州進攻興化拔之梭都怒其民反覆下令屠城澤屢諫不聽乃復說曰世傑不虞我軍遽至方急攻泉州謀為基本我新得泉州民志未固旦暮且失守比我定興化

整兵而南彼基本將日固矣莫若開其遺民使走泉南扇動之世傑將膽落而走是我可不戰而完泉州捷於分兵之馳救也梭都喜開南門縱民脫去世傑得逃民知興化已破乃解泉圍去梭都至泉州部署別將裝大艦趨甲子門自將下漳州屯海豐引精騎與塔出會十二月入廣州十五年春還擊潮州守將馬發備禦甚固澤曰潮人城守不下恃外多壁壘為援應也第剪其外應必內潰乃分兵攻一大壘破之餘壘盡散走二旬而潮拔既而文天祥軍潰江西廣王暨世傑死海中梭都還軍福建以梭都為福建行省參政澤行省都事授興化行總管府事民歌舞迎候於道郡新殘於兵掩骼卹孤流離復業誅惡少之竄名卒伍者貪暴始戢始陳瓚以郡應張世傑民多戰死至是吏

元史卷二十九 列傳

巽

援例將籍其產澤曰國家至仁誅止陳瓚從瓚者猶蒙宥民奈何連坐下令田廬貨產無主者竝給其族姻有司無所與當江南未定盜賊四起民自相什伍保衛鄉里及諸路平行省議籍為兵上下洵洵澤白行省曰國兵非少今籍民以示少非所以安反側也且當籍者眾民或有他心議遂格澤又興學校召長老諸生講肄經義行鄉飲酒禮至元二十一年調永州路判官湖廣平章政事要束木貪虐誅求或妄言初歸附時州縣長吏斂富戶銀將輸之官銀已具而事遂中止要束木即下令責民自實使者旁午隨地置獄株連蔓引瘐死載道所獲不貲要束木盡掩有之有使至永澤戒吏美供帳豐酒食務順適其意使者感愧無所發其毒因閒以利害曉之一郡由是獲安是歲盜

起寶慶武岡皆永旁郡也行省遣澤討平之俘獲五百餘人簡出其誣誤者止誅首惡三十一人餘得減死二十六年丞相桑葛建議攷校錢穀務求增羨天下騷動澤自上計獨守舊額要束木怒拘繫之明年桑葛敗要束木伏誅澤始得釋二十九年湖廣平章政事闊里吉思薦澤才堪將帥以行省員外郎從征海南黎軍還授廣西兩江道宣慰副使僉都元帥府事兩江荒遠瘴癘與百夷接不知禮法澤作司規三十有二章以漸爲教又省廢置二十二所以紓民力歲饑發象州賀州官粟三千五百石以振饑者先發而後上聞邕管徼外蠻數爲寇澤循行竝徼得阨塞處布畫遠邇募豪民四千六百餘戶置雷雷那扶十屯列營堡以守之陂水墾田築八塌以節豬洩得稻田若干頃

元史卷二十九 列傳

澤

歲收穀爲軍儲邊民賴之海北元帥薛赤干賊利事覺行省檄澤驗治盡發其奸賊縱所掠男女五百口牛數千頭金銀器物稱是海北之民大忭御史臺言烏古孫澤奉使知大體如汲長孺爲將計萬全如趙充國可屬大任詔擢爲海北海南廉訪使視事三月例收圭田租米五百石量食而入餘悉委學官給諸生以勸業常曰士非儉無以養廉非廉無以養德身一布袍數年妻子樸素無華宴如也雷州地近海潮汐蓄其東南陂塘鹹病農而西北廣衍平袤宜爲陂塘澤行視城陰乃教民浚故湖築大堤塌三溪瀦之爲斗門七堤塌六以制其贏耗釀爲渠二十有四皆支別設牐時其啟閉得良田數千頃瀕海廣渴竝爲膏土至大元年改福建廉訪使以母年踰八十求歸養長沙歲

餘母喪以哀毀卒妻杜以夫死飲食不入口者十有二日不死乃復食澤諡正憲子良禎仕至中書右丞別見元末言臣傳

劉整 以下宋降臣

劉整字武仲先世京兆樊川人徙鄧州穰城沈毅有智謀熟知山川險要避金亂入宋隸荆湖制置使孟珙麾下珙攻金信陽整爲前鋒夜從驍勇十二人渡整登城襲禽其守還報珙大驚曰唐李存孝率十八騎拔洛陽今整所將更寡乃書其旌曰寶存孝累遷潼川十五軍州安撫副使整以北人鎮西邊有功南方諸將皆出其下呂文德忌之會俞興與整有隙使之帥蜀以圖整興以軍事召整不行遂摺摭其罪宋史新編云會買似道託會計邊費以陷諸閩帥整遂爲興所按整遣使訴

元史卷二十九 列傳

哭

臨安不得達益懼不自保乃謀納款中統二年夏籍瀘州十五郡戶三十萬入附綱鑑大全云整命參謀官許彪孫草表不從合門仰藥死世祖嘉其來授夔府行省兼安撫使俞興攻瀘州整出寶器分士卒激使戰戰數十合興敗去復遣使請益屯兵厚儲積爲圖宋計明年入朝授行省於成都潼川兩路仍兼都元帥同列嫉其功謀陷之整懼請分帥潼川宣課茶鹽以餉軍至元四年入朝奏言宋主弱臣恃立國一隅今天啟混一之機臣願效犬馬勞先攻襄陽徹其扞蔽廷議多難之整曰自古帝王非四海一家不得爲正統聖朝有天下十七八何置一隅不問而自棄正統邪且襄陽吾故物由棄而弗戍使宋得竊築爲強藩若復襄陽浮漢入江則宋可平也世祖曰朕意決矣命陝西五路四川行省各造戰艦

五百付整俾與阿朮經略襄陽遂城鹿門堡及白河口率兵五萬抄掠沿江諸郡七年三月築實心臺於漢水中上置弩礮下爲石囤五以扼敵船且與阿朮計曰我精兵突騎所當者破惟水戰不如宋耳更造戰船日練水軍雖雨不能出亦畫地爲船習之得練卒七萬復築外圍以遏敵援宋襄陽帥呂文煥登城觀敵整躍馬前曰君既昧天命又不自奮厲徒多害生靈何爲請與君決勝負文煥不答伏弩中整以甲堅不得入九年破樊城外郭謀知文煥將遣張貴出求援遂分部戰艦縛草如牛狀臨漢水縣互參錯眾莫測所用九月貴果夜乘輪船順流下走規知之傍岸焚草牛如畫整與阿朮麾戰艦先據龍尾洲轉戰五十里禽貴於櫃門關礮其眾宋封整爲燕郡王遣永寧僧齋

元史卷二十九 列傳 完

告身及金印符送整所永寧令得之聞于朝敕張易姚樞雜問適整至自軍言宋怒臣用兵襄陽故設此爲殺臣計臣實不知帝令整復書謂宋若果以生靈爲念當重遣信使請命朝廷願爲此小數何益時襄陽拒守已五年整計襄樊唇齒也宜先攻樊城宋以柵蔽城斬木列置江中貫以鐵索整募善泅者斷木沈索督戰艦趨城下以回回礮擊之而焚其柵明年正月遂破樊城既而移攻具向襄陽整欲立碎其城執文煥以快意主帥不可乃遣宋俘唐永堅入諭文煥以城降整入朝奏曰襄陽破則臨安搖矣若遣水軍乘勝長驅大江必非宋有遂改整行淮西樞密院使守正陽夾淮而城南逼江斷其東南衝宋夏貴悉水軍來攻破之大人洲時右丞阿里海牙鎮淮西帝知其不

相能命分軍爲二各統之御史言江淮未附將帥需人今首用阿里海牙子忽失海牙劉整子核素不知兵且闕人望帝竝命罷去十二年正月詔整別將兵出淮南整銳欲渡江曰大軍自襄樊東下宋悉力西拒東方虛弱徑造臨安可一鼓而捷也首帥不可曰吾受詔特綴東兵使無西爾渡江非所聞也整帥騎兵攻無爲軍久不克初元兵南下用呂文煥與整爲鄉導至是整不得行而文煥預入鄂之功捷至失聲曰首帥東我願使我功後於人善作者不必善成果然一夕憤死於無爲城下諡武敏

呂文煥 范文虎

襄陽居吳楚上游立國東南者恆恃爲藩蔽襄陽不守則浮漢東下長江天塹皆失其險宋南渡紹興間岳飛收復

元史卷二十九 列傳 李

襄陽屹然爲西陲保障越百餘年疆事壞於趙范而襄陽歸於元嘉熙間孟珙又復之訓兵積粟以與元抗復成重鎮越二十餘年而又壞於呂文煥兄弟襄陽失而宋遂不支有金湯之險無干城之良不能守也文煥安豐人兄文德微時鬻薪於市宋淮帥趙葵見其遺履長尺有咫異之招致麾下累功授京湖安撫制置使知鄂州時劉整獻計謂宋人所恃惟文德耳然可以利誘乃遣使至鄂遺以玉帶求置榷場於樊城文德許之既而言安豐等場貨每爲盜所掠願築土牆以護居積遂築壘置堡江心起萬人臺立撤星橋以遏宋南北之援時出兵哨掠襄樊城外兵威益熾文德始悟爲整所賣每日誤國家者我也疽發背死文煥於宋咸淳三年知襄陽府兼京西安撫副使時世祖

至元四年也命阿朮等經略襄陽文煥庸懦無謀樊城之初置榷場也已隱據其堂奧而文煥泄泄處之及阿朮城白河築鹿門文煥始大懼不知所爲計恃兵食尙敷坐擁堅城遷延歲月以幸無事無致死之志旦夕喋血以爭要害也聞宋廷臣議遣高達來援文煥不擇用其客計虛奏大捷以止之賈似道亦素忌高達而庇呂氏竟不遣達六年世祖命史天澤益兵圍襄陽深溝高壘期於坐困長圍四合餉援盡斷文煥每一巡城南望痛哭而已十年正月阿里海牙等拔樊城世祖降詔諭文煥曰爾等拒守孤城於今五年宣力爾主固其宜也然勢窮援絕其於數萬生靈何若能納款悉赦勿治且加遷擢旣而阿里海牙身至城下喻之折箭與之誓文煥感泣遂納管籥出降詔入朝

元史卷二十九 列傳

至

授侍衛親軍都指揮使卽爲帝畫攻鄂策且請爲前鋒世祖以文煥爲襄漢大都督十一年二月授參知政事行省荆湖命率其麾下臨城以善遇降將意招諭未下州郡十月文煥引兵攻破沙洋城執守將王大用總管王虎臣殺之進逼新城招都統邊居誼不從伏弩中其右臂馬仆幾被獲眾挾以出文煥怒磨兵拔其城居誼赴火死元軍渡江圍鄂文煥謂權守張晏然等曰汝國所恃者長江耳今大軍飛渡如履平地不降何待於是晏然與都統程鵬飛皆以軍州降十二年正月兵至尋陽提舉江州興國宮呂師夔文德子也與知江州錢真孫以州降時宋方趣文煥兄五郡鎮撫呂文福將兵入衛文福不受命殺使者亦迎降於江州宋謝太后遣使諭文煥請息兵修好不聽十月

伯顏分兵三道取臨安以文煥爲鄉導趨常州宋遣兵部侍郎呂師孟來軍中議和師孟亦文德子也陰請文煥贊成和議亦不省十二月平江府官屬迎降於常州文煥先往受其降十三年伯顏軍次皋亭山宋主奉表稱臣伯顏遣文煥入臨安閱視城壘且齎黃榜安諭中外軍民并入慰謝太后文煥因使人上表謝而出有曰茲銜北命來抗南師視以犬馬報以仇讎非曰子弟攻其父母不得已也尙何言哉伯顏拘文天祥於軍中天祥讓伯顏失信文煥從旁解喻天祥斥其合族爲逆文煥大慚志十四年以文煥爲中書左丞仍宣慰江東十五年三月詔文煥遣官招宋生熟券軍月給衣糧汰其老弱者屯種近地江東道按察使阿八赤從文煥求金銀及宅舍子女不與遂奏文煥

元史卷二十九 列傳

至

私匿兵仗帝命行臺御史大夫相威詰之阿八赤以不直免官二十三年正月文煥以江淮行省右丞請老許之仍任其子爲宣慰使文德子師夔從徇江西平廣州官至參政初文德諂事賈似道似道暱之爲之與援并擢用其子弟呂氏部曲布列沿江諸郡襄陽旣降元軍所至率先款附反戈前驅馴至人心風靡巨解不可復振而宋遂以亡其國云原彙無傳以類編參補范文虎者呂文德壻也宋景定初世祖自鄂北還宋相賈似道虛奏援鄂解圍之功以文德爲首加檢校少傅文虎亦進黃州武定諸軍都統制及文德卒似道擢文虎爲殿前副都指揮使總禁軍寄腹心焉時宋度宗咸淳五年也是年文虎與夏貴率師援襄樊貴紐於新城虎尾洲文虎

以舟師援之至罐子灘而敗七年四月與阿朮戰於滿灘
又敗六月文虎將衛卒及兩淮舟師十萬進至鹿門阿朮
遣軍趣會舟灘文虎前軍逆戰不利輒棄旗鼓夜遁八年
宋民兵都統張貴將自襄陽突圍還郢先遣死士潛行水
中達郢乞文虎發兵駐龍尾洲為應至期張貴乘舟順流
夜犯重圍轉鬪至龍尾洲而郢兵先二日以風水驚疑退
屯三十里貴力戰不支被執不屈死論者謂張貴能以偏
師犯圍入襄陽復能破圍而出當日范文虎諸將苟協力
致死微襄陽南面之圍以通餉援則猶可守也先是宋以
李庭芝為荊湖制置大使督援師文虎不甘為之下致書
似道似道即改文虎官為福州觀察使不屬京湖制使統
轄而令文虎兵獨從中制文虎日與妓妾擊鞠飲宴庭芝

元史卷二十九 列傳

奎

屢約進兵文虎輒以取旨未至為辭既而襄樊陷給事陳
宜中言襄樊之失皆由文虎怯懦逃遁請斬之似道不許
止降一官知安慶府御史陳文龍言文虎失襄陽猶使知
安慶府是當罰而賞也請罷之似道大怒黜文龍至元十
二年正月伯顏分兵至江州文虎遣人以酒饌迎犒且速
伯顏往伯顏初以安慶城在山頂且兵糧皆足勢不可攻
又慮文虎為勦敵甚憂之及聞欲降大喜乃使阿朮以舟
師先至安慶文虎遂以城降伯顏承制遙授兩浙大都督
命持詔往諭壽州諸鎮招安豐五河等處軍民宋謝太后
諭文虎使通和議文虎不報十月董文炳將左軍由江入
海以文虎為鄉導趨澈浦華亭十三年正月伯顏分兵圍
安吉文虎致書知州趙良淳誘之降良淳斬其使而自經

元兵入臨安宋駙馬都尉楊鎮奉益廣二王潛渡錢塘江
如婺州文虎將精兵五千追之不及執鎮而還伯顏以臨
安為兩浙大都督府命文虎與忙兀台同治事宋宗室趙
孟朵謀起兵紹興事泄被執至臨安文虎詰其謀逆孟朵
諾曰賊臣負國厚恩其危社稷我帝室之冑欲一刷宗廟
之恥乃反以為逆邪文虎怒斬之七月與呂師夔並參知
政事十五年進左丞詔諭行省東南島嶼諸番國有慕義
者可因番舶宣布德意使其來朝文虎遣使偕日本僧齋
詔往諭其國并招降海寇賀文達十七年入朝命將兵十
萬同右丞相阿剌罕同征日本十八年七月軍至平壺島
遇颶風壞舟文虎被溺漂流一晝夜幸附敗版得生遂擇
堅艦乘之棄士卒十餘萬於五龍山下盡為日本所殲逃

元史卷二十九 列傳

奎

歸者僅三人二十四年帝親征乃顏命文虎將衛軍五百
鎮平灤為策應文虎以豪懿東京諸地人心未靖奏立遼
陽行省撫治之時江淮平章沙不丁議裁南官帝曰除范
文虎陳巖呂師夔數人餘從所議世祖於諸降臣眷遇始
終不衰而心實薄之嘗問曰汝曹何降之易耶以類編補附

夏貴

夏貴深陽人宋寶祐開貴城築荆山剋期集事升正任刺
史尋兼河南招撫使景定元年兀良合台由潭州還兵而
北賈似道用劉整計命貴邀殺其殿卒七百餘人於白鹿
磯時世祖自鄂班師似道遂以大捷鄂州解圍奏進貴知
淮安州兼京東安撫副使三年貴克復蘄縣改知廬州淮
西安撫副使五年擢四川安撫制置使知重慶府率師攻

虎嘯山張庭瑞堅守逾月不克焦德裕來援夜薄貴營貴驚走爲追兵所敗於鵝溪咸淳元年貴以軍五萬攻潼川與守將劉元禮戰卻至蓬溪復大戰敗績四年遷沿江制置使兼知黃州五年援襄陽失利於虎尾洲九年遷淮西制置使兼知廬州十年率舟師十萬乘夏霖雨淮水溢攻正陽水入外郭部將先登被俘遂退軍聞伯顏自襄陽東下軍次漢陽之蔡店貴以戰艦萬艘與都統制王達分據陽邏堡沙蕪口諸要害以阻元軍入江之路貴方往來應援阿朮已由青山磯乘閒渡江貴大驚遽以麾下三百艘先遁沿江縱兵大掠還廬州而陽邏堡遂破王達領所部兵八千及定海水軍統制劉成俱戰死鄂州漢陽相繼降元明年正月貴引兵會賈似道於蕪湖袖中出一編書示

元史卷二十九 列傳

堯

似道曰宋祚三百二十年似道俛首而已二月似道以精銳七萬餘人盡屬步軍指揮使孫虎臣軍於池州下流之丁家洲貴以戰艦二千五百艘橫互江中似道將後軍軍魯港貴既失利於鄂恐似道功成無所逃罪又忌虎臣新進出己上殊無關志虎臣前鋒將姜才方接戰虎臣遽過其妾所乘舟眾見之謹曰步帥遁矣貴不戰而走以扁舟掠似道船呼曰彼眾我寡勢不可支似道聞之錯愕失措遽鳴鉦收軍宋師大潰似道夜駐珠金沙召貴計事貴曰諸軍已騰落吾何以戰遂解舟去奔還廬州似道與虎臣等躬走揚州是役也似道以首輔出師朝野屬望傾府庫以黃金輜重船艦相銜百餘里抽諸路精兵十三萬益以貴淮閩之師決存亡於一戰而似道權奸流毒中外將

士解體貴復陰幸其敗以誤之軍聲一墮大江以南遂無立草是年宋猶以貴知廬州加樞密副使命與淮東制置副使知揚州朱煥互調貴不奉詔尋加兩淮宣撫大使不數月伯顏兵至臨安貴遂籍淮西二府六州四軍三十四縣戶五十一萬三千八百口百有二萬一千三百降時至元十三年二月也初伯顏命阿朮定淮東以淮西屬之萬戶昂吉爾俾駐和州進攻廬州貴以書抵伯顏曰毋費兵力攻奪邊城若行都歸附邊城焉往伯顏遣貴甥持諭與約至是舉所部納款伯顏承制以貴爲淮西安撫使有洪福者貴家僮也從貴積勞知鎮巢軍貴既降招福不聽使其從子往福斬之元兵攻城久不拔貴至城下好語給福請單騎入城福信之門發而伏兵起執福父子屠其城貴

元史卷二十九 列傳

堯

洩殺福及其二子大源大淵十五年與范文虎並爲中書左丞貴自降後閱三歲而歿有題其墓者曰享年八十三胡不七十九惜其年垂耄盡猶復偷生旦莫閒畱貳臣之名於沒世欲蓋而章不如速死之爲愈也原稟無傳以類編補論曰春秋書三叛人名以懲惡而勸善其人皆以土地歸魯魯史直書其事不少諱焉劉整呂文煥夏貴畱夢炎之徒身爲將相大臣乃亦趨降恐後無復媿恥不章其惡則賊臣接踵豈尙有所顧忌哉今補

元史卷二十九終

元史卷三十

世祖相臣

史天澤

史天澤字潤甫秉直季子也身長八尺音如洪鐘善騎射
勇力絕人從其兄天倪帥真定乙酉天倪遣護送其母歸
北京既而天倪為金降將武仙所害府僚王縉王守道追
及天澤於燕曰變起倉卒部曲散在近郊公能返轡當不
招自至天澤即傾資裝易甲仗南還晝夜兼行次滿城得
士馬甚眾天澤攝行軍事遣監軍李伯祐詣國王孛羅乞
濟師孛羅承制即命天澤紹兄職遣蕭乃台將蒙古軍三
千來援敗禽仙驍將葛鐵槍獲其兵甲輜重軍威大振遂
下中山略無極拔趙州進軍野頭會其兄天安亦自白雲

元史卷三十 列傳

提兵來赴難其擊仙敗之仙奔雙門遂復真定未幾宋大
名總管彭義斌陰與仙合欲取真定天澤同蕭乃台扼諸
贊皇山不得進義斌勢蹙焚山自守天澤自以鐵騎摧鋒
入獲義斌斬之既而仙遺謀者結城中死士為內應夜斬
關入據城天澤引步卒數十踰城東出至臺城求援於中
山知府董俊授以銳卒數百夜赴真定而蕭乃台兵亦
至捕斬叛者三百餘仙挾數騎走保西山抱犢岩蕭乃台
忿民之反覆驅萬餘人將殺之天澤力爭得釋乃繕城壁
立樓櫓招流散恤困窮擣抱犢諸岩巢穴仙乃遁入汲縣
相衛諸州皆降太宗即位議立三萬戶府分統漢兵以天
澤為真定河間大名東平濟南五路萬戶庚寅冬武仙復
屯兵衛州天澤合諸軍圍之金將完顏合達以眾十萬來

列傳十六

援戰不利諸將皆北天澤獨以千騎繞出其後與大軍夾
擊仙敗去遂復衛州壬辰春太宗由白坡渡河詔天澤以
兵由孟津會河南至則皇弟拖雷已破合達軍於三峯山
乃命略地京東招降太康柘縣瓦岡睢州金主令完顏白
撒將兵八萬自黃龍岡來襲新衛州天澤率輕騎馳赴比
至圍已合天澤單騎奮槊突至城下呼守者告以援兵且
至復貫陳出與大軍夾擊白撒等敗走蒲城追金主至歸
德復與諸軍會睢陽達魯花赤撒吉思不花欲薄城背水
而營天澤曰此豈駐兵之地乎彼若來犯則進退失據矣
不聽會天澤以事去汴北還撒吉思不花全軍皆沒金主
遷蔡大軍圍之天澤當其北面結棧潛渡汝水血戰連日
金亡後移軍伐宋從皇子曲出攻棗陽又從宗王叩溫不

元史卷三十 列傳

二

花圍光州攻壽春乘勝而南所向輒克世祖時在藩邸極
知漢地不治河南尤甚奏以天澤為經略使至則誅郡邑
長貳之尤貪橫者境內大治戊午秋從憲宗伐宋取蜀駐
合州之釣魚山軍中大疫咸議班師宋將呂文德以艤艦
千餘沂嘉陵江而上北軍迎戰不利天澤分軍為兩翼親
率舟師順流縱擊三戰三捷奪其戰艦百餘艘追至重慶
而還中統元年世祖即位首召天澤咨以政事疏言朝廷
當先立省部以正紀綱設監司以督諸路需恩澤以安反
側退貪殘以任賢能頒俸秩以養廉禁賄賂以防奸庶上
下不應內外休息帝皆嘉納命往鄂渚徹江上軍還授河
南宣撫使俄兼江淮諸翼軍馬經略使二年夏五月拜中
書右丞相既柄政事皆讓同官曰天澤本武臣何克負荷

但物議未安者老夫通譯其間爲諸君條達耳相則曷敢當眾服其謙退乃定省規十條以正庶務盡奏罷諸色占役者李璫反諛都命天澤專征聞璫入濟南笑曰豕突入豈無能爲也至則進說宗王哈必赤曰璫多譎而兵精不空力角多殺士卒當以不戰困之乃深溝高壘絕其奔軼四閱月城中食盡軍潰出降斬璫於軍門誅同惡者數十人餘悉縱歸明日引軍東行未至益都城中人已開門迎降至元三年以天澤爲樞密副使四年以右丞相讓安童改中書左丞相六年帝以宋未附議攻襄陽詔天澤與駙馬忽刺出往經畫之部署甫定以疾還燕八年進平章軍國重事十年春與平章阿朮等進拔樊城襄陽降詔與丞相伯顏總大軍水陸並進天澤至鄂州遇疾還襄陽帝遣

元史卷三十 列傳 三

侍臣賜以蒲萄酒且諭之曰卿自朕祖宗以來躬擐甲胄跋涉山川又首勦南伐之謀異日功成皆卿力也勿以小疾阻行爲憂可且北歸至真定帝遣尙醫馳賜藥餌天澤附奏臣死不足惜但願天兵渡江慎勿殺掠語不及他卒年七十四計聞帝震悼贈太尉諡忠武後封鎮陽王天澤平居恂恂若無所能及臨大事毅然任天下之重年四十始折節讀書尤熟資治通鑑每公餘輒讀雖出使戎旅亦挾以自隨每舉一事輒能推究始末老宿儒自以爲不及拜相之日門庭悄然或勸以權自張天澤曰爵祿刑賞天子之柄已何預焉其出討李璫也帝臨軒授詔責以專征俾諸將皆聽節度天澤未嘗以詔示人及還帝慰勞之悉歸功諸將先是在憲宗時天澤嘗奏臣始攝兄職今臣兄

有二子分掌兵民臣復任經略一家處三要職分所當辭乞退休帝曰卿累世忠勤有勞於國一門三職何媿何嫌竟不許及李璫之變言者謂由諸侯權太重天澤遂奏兵民之權不可併於一門行之請自臣家始於是史氏諸子即日解兵符者十七人統真定五路時政煩賦重民貸錢於西北賈人以代輸累倍其息謂之羊羔利民不能給天澤奏請官爲償一本息而止繼值歲饑民假貸充貢賦積銀至萬三千錠天澤傾家資率族屬官吏代償之又請以中戶爲軍上下戶爲民著爲定籍境內以寧其經略河南也朝廷遣阿藍答鈎較諸路財賦鍛鍊羅織無所不至天澤獨以勳舊見優容天澤曰我爲經略使今不我責而罪餘人我何安乎由是得釋者累金末名士流寓失所悉賓

元史卷三十 列傳 四

禮而薦拔之後多致顯達破歸德時遇蒙古官驅數俘出城將殺之內一俘氣貌異常問知爲近侍局官李正臣也出金贖之送歸真定署幕府參謀庶務一以委之與所遇河南流寓人王顯之同一委任由是真定治效高視他郡兩人力爲多量材善任各盡所長出入將相五十年上無疑而下不怨人以比之郭子儀曹彬云子八人格樟棣杜杞梓楷彬各任方面而格尤知名別附平宋諸臣傳

劉秉忠 張文謙

劉秉忠字仲晦初從釋氏名侃字子聰拜官後始更名其先瑞州人世仕遼爲官族曾太父澤仕金爲邢州節度副使因家焉歲庚辰木華黎取邢州立都元帥府以其父潤爲都統事定改署州錄事歷鉅鹿內丘兩縣提領皆有

惠政秉忠年十三為質子於帥府十七為邢臺節度使府令史以養其親一日不樂投筆棄去隱武安山中遇異人授以數學久之天寧僧虛照遣徒招致為僧以其能文詞使掌書記後遊雲中畱居南堂寺世祖在潛邸僧海雲被召過雲中邀與俱行既入見應對稱旨屢承顧問秉忠於書無所不讀尤邃於易及邵氏經世書至於天文地理律麻三式六壬遁甲之屬無不精通論天下事如指掌世祖悅之海雲南還秉忠遂畱藩邸後數歲奔父喪於邢州服除復被召奉旨還和林上書數千言其略曰典章禮樂法度三綱五常之教備於堯舜三王因之五霸敗之漢興以來至於五代千三百餘年由此道者漢文景光武唐太宗數君而已故治亂之道不係乎天而由乎人天生成吉思

元史卷三十 列傳

五

皇帝起一旅降諸國不數年而取天下勤勞憂苦遺大寶於子孫傳萬祀永保無疆之福然聞之曰以馬上取天下不可以馬上治昔武王兄也周公弟也周公思天下善事夜以繼日每得一事坐以待旦以保周天下八百餘年周公之力也君上兄也大王弟也思周公故事而行之正在今日然舉其要不過用人治民行政三者而已用人之事在內莫大乎相相以領百官化萬民在外莫大乎將將以統三軍安四域內外相濟國之急務莫先焉然天下之大非一人之可及萬事之細非一心之可察當擇開國功臣子孫分爲京府州郡監守督責舊官以遵王法仍差按察官守治者升否者黜天下不勞力而定也政本莫大於朝省親民莫要於縣宰誠立朝省以統百官分有司以御眾

事紀綱正於上法度行於下其餘百官不在員多惟在得人焉耳欲得人必先造士欲造士必先養士古者庠序學校未嘗廢今郡縣雖有學並非官置宜修建三學設教授開選舉以經義爲上論策詞賦次之開設學校宜擇開國功臣子孫受教選達材任用之得一世臣才子孫勝於草野十寒士以其用易速而所益大也國家廣大如天萬中取一以養天下名士宿儒之無產業者使不至困窮或有產業者應止輸差稅其餘徭役並行調免使自給養實國家養才厲人之至意也明君用人如大匠用材隨其巨細長短以施規矩繩墨孔子曰君子不可小知而可大受小人不可大受而可小知蓋君子所存者大不能盡小人之事或有一短小人所拘者狹不能同君子之量或有一長

元史卷三十 列傳

六

盡其才而用之成功之道也君子不以言舉人不以人廢言故古之賢君廣開言路天地之大日月之明而或有所蔽蔽天之明者雲霧蔽一人之明者私欲佞說也常人有之蔽一心人君有之蔽天下故常選左右諫臣使諷諭於未形忖畫於至密君子之心一於理義懷於忠良小人之心一於利欲懷於讒佞君子得位能容小人小人得勢必排君子明君在上不可不辨孔子曰遠佞人又曰惡利口之覆邦家者此之謂也今言利者眾非圖利國實欲殘民而自利也宜將國中人民必用場冶付各路課稅以定權辦其餘言利者並行罷去以明古者明王不寶遠物所寶惟賢之意則用人之道不外是矣古者治世均民產業自廢井田爲阡陌於是有餘者蓋有餘不足者蓋不足宜禁

行利之人勿恃官勢居官在位者勿侵民利商賈與民公平交易不生擅奪欺罔之害此非可望之於下在上所以主持之耳天下戶過百萬自忽都那演斷事之後差役甚大加以軍馬調發使臣煩擾官吏乞取民不能當是以逃亡日眾宜比舊減半或三分去一就見在之民以定差稅招逃者復業再行定奪天下之民未聞教化見在囚人宜從赦免明施教令使之知畏則犯者自少教令不宜繁因大朝舊例增益民間所宜設者十數條罪不至死者皆詳審然後決犯死刑者覆奏然後聽斷不致刑及無辜天子以天下為家兆民為子國不足取於民民不足取於國相須如魚水有國家者置府庫設倉廩亦為助民民營產業闕田野亦以資國用也今宜會計官民欠負若實為公差

元史卷三十 列傳

七

所借宜依前聖旨一本一利官司歸還凡倍償無名虛契所負及還過元本者並免追取納糧就遠倉有一廢十者宜從近倉以輸為便當驛路州城飲食祇待偏重宜計所費以準差發關市津梁正稅十五分取一宜從舊制禁橫取減稅法以利百姓倉庫加耗甚重宜令權量度均為一法使錙銖圭撮尺寸皆平以存信去詐珍貝金銀之所出淘沙鍊石實不易為一旦以纏絲縷飾皮革塗木石裝器仗取一時之華麗廢為塵沙甚可惜也宜從禁治除帝冑功臣大官以下章服有制外無職之人不得僭越今地廣民微賦斂繁重民無力耕耨宜差勸農官二員率天下百姓務農桑重本計開西河南地廣土沃以兵馬之所蹂躪荒蕪尚多宜設官招撫不數年民歸土闢可資軍需耶律

中丞拘權鹽鐵諸產商賈酒醋貨殖諸事以定宣課已不為輕輿魯刺合蠻奏請於舊額加倍權之往往科取民間科權竝行無所措手足宜從舊例辦權更或減輕罷繁碎止科徵無縱獻利之徒削民害國鯨寡孤獨廢疾者宜設孤老院給衣糧以為養使臣到州郡宜設館不得舍於官衙民宅如是則養民之大端不外是矣人存則政自舉意美則法自良此外觸類廣推隨時潤色在君相之措行耳官無定次清潔者無以遷汙濫者無以降可比附古例定百官爵祿儀仗使家足身貴有犯於民設條定罪威福者君之權奉命者臣之職今百官自行威福進退生殺惟意之從宜從禁治孔子為百王師立萬世法今廟堂雖廢存者尚多宜令州郡祭祀釋奠如舊儀近代禮樂器具靡散

元史卷三十 列傳

八

宜令刷會徽太常舊人教引後學使器備人存漸以修復之實太平之基王道之本今天下廣遠雖祖宗威福之致亦天地神明所陰祐宜訪名儒循舊禮尊祭上下神祇和天地之氣順時序之行使神享民依德極於幽明天下賴一人之慶見行遼麻日月交食頗差聞司天臺改成新麻未見施行宜因新君即位頒麻改元令京府州郡置更漏使民知時國滅史存古之常道宜撰修金史令一代君臣事業不墜於後世以資勵勸此皆可及時舉行以昭新政者也書奏世祖嘉納焉又言邢州萬餘戶兵興以來不滿數百凋壞日甚得良牧守如真定張耕洺水劉肅者治之猶可完復朝廷即以耕為邢州安撫使肅為副使由是流民復業升邢為順德府癸丑從世祖征大理明年征雲南

每贊以天地之好生王者之神武不殺故克城之日不妄戮一人己未從伐宋復以雲南所言力贊於上全活不可勝計中統元年世祖即位問以治天下之大經養民之良法秉忠采祖宗舊典參以古制之宜今者條列以聞於是下詔建元紀歲立中書省宣撫司朝廷舊臣山林遺逸之士咸見錄用文物燦然一新秉忠雖居左右猶不改舊服時人稱為聰書記至元元年翰林學士承旨王鶚奏言秉忠久侍藩邸參密勿定大計已同內相宜褒崇尊顯以示天下不當猶仍其野服散號即日詔拜光祿大夫位太保參預中書省事詔以翰林侍讀學士寶獸之女妻之賜第奉先坊且以少府官籍監戶給之秉忠既受命益以天下自任燕間顧問知無不言言無不聽所推薦人才後悉為

元史卷三十 列傳

九

名臣而未嘗宣泄市恩初帝命秉忠相地於桓州東灤水北建城郭於龍岡三年而畢名曰開平繼升為上都而以燕為中都四年又命秉忠築中都城始建宗廟宮室八年奏建國號曰大元而以中都為大都他如頒章服舉朝儀給俸祿定官制皆自秉忠發之為一代成憲十一年扈從至上都其地有南屏山營築精舍居之秋八月無疾端坐而卒年五十九帝聞驚悼謂羣臣曰秉忠事朕三十餘年小心慎密不避艱險言無隱情其陰陽術數之精占事知來若合符契惟朕知之他人莫得聞也出內府錢具棺斂遣禮部侍郎趙秉溫護其喪還葬大都十二年贈大傅封趙國公諡文貞成宗時改諡文正仁宗時又進封常山王秉忠自幼好學至老不衰雖位極人臣而齊居蔬食終日

澹然不異平昔自號藏春散人每以吟詠自適其詩蕭散閑淡類其為人文集十卷無子以弟秉恕子蘭璋後秉恕字長卿好讀書年弱冠受易於劉肅遂明理學秉忠事世祖以薦士自任嫌於私親獨不及秉恕左右以聞召見遂同侍潛邸世祖嘗賜秉忠白金千兩辭曰山野鄙人金無所用世祖曰卿獨無親故遺之邪乃受而散之以二百兩與秉恕秉恕曰兄勤勞有年宜蒙茲賞秉恕無功可冒恩乎終不受中統元年擢禮部侍郎邢州安撫副使賜金符歷彰德懷孟淄萊順天大原五路總管所至皆有惠政年六十卒於官

元史卷三十 列傳

十

記日見信任所匡贊皆與秉忠共之中統元年立中書省首命王文統平章政事文謙為左丞建立綱紀講明利病以安國便民為務詔令一出天下有太平之望而文統素忌克議事屢相可否文謙積不能平遽求出詔以本官宣撫大名臨發猶語文統曰民困日久況當大旱不量減稅賦何以慰來蘇之望若虞國用不敷者俟時和歲豐取之未晚於是調常賦什之四商酒稅什之一二年春來朝復畱居政府始立左右部總司財用欲專奏請不關白中書三年阿合馬領左右部總司財用欲專奏請不關白中書詔廷臣議之文謙曰分制財用宰相之職若中書弗問天子將親蒞之乎帝是之至元元年詔文謙以中書左丞行省西夏中興等路羌俗素鄙野事無統紀文謙得蜀士陷

俘虜者五六人出之使習吏事旬月間簿書有定式子弟亦知尚學俗爲一變浚唐來漢延二渠溉田十數萬頃人蒙其利三年還朝諸勢家言有戶數千當役屬爲私奴者議久不決文謙謂以乙未歲戶籍爲斷其未占籍者歸之勢家其餘良民無爲奴之理議遂定五年淄州妖人胡王惑眾事覺逮捕百餘人丞相安童奏以文謙往決其獄惟坐三人棄市餘皆省釋七年拜大司農卿奏立諸道勸農司巡行勸課請開籍田行祭先農先蠶等禮復與竇默請立國子學詔以許衡爲國子祭酒選貴胄子弟教育之時阿合馬議拘民間鐵官鑄農器高其價以配民册立行戶部於東平大名以造鈔及諸路轉運司干政害民文謙悉於帝前極論罷之及爲御史中丞阿合馬慮憲臺發其奸

元史卷三十列傳

士

乃奏罷諸道按察司文謙奏復其舊然自知爲奸臣所忌力求去會命同許衡等造新厓以昭文館大學士領太史院事十九年拜樞密副使歲餘卒文謙早從劉秉忠洞究術數晚交許衡尤粹於理學爲人剛明簡重凡所陳言莫非仁義尤以引薦人材爲己任數忤權倖而得喪不以經意身後家惟藏書數萬卷追封魏國公諡忠宣長子晏仕至御史中丞封魏國公諡文靖李謙碑其神道

廉希憲

廉希憲字善甫畏吾人布魯海涯子也甫生時父拜廉訪使之命遂以官爲子孫氏自布魯之先俱以功爲畏吾世臣凡三世皆以海涯爲號布魯少隨其主內附充宿衛從太祖西征妻以居里可汗女旋使總理燕京財幣拜燕南

諸路斷事官屢平反冤獄贖逃奴寬代軍之罪所至多惠政居家以孝友聞追封魏國公諡孝懿子十人孫五十三人多登顯仕希憲其仲子也年十九侍世祖潛邸奇其容止議論希憲一日方讀孟子聞召急懷以進世祖問懷中何書對曰孟子問其大旨遂以性善義利仁暴之旨爲對世祖嘉之由是呼曰廉孟子嘗與近臣校射世祖前近臣以其儒生授以弱弓希憲請易勁者三發連中眾驚服歲甲寅世祖以京兆分地命希憲爲宣撫使京兆控制隴蜀諸王貴藩分布左右民雜羌戎號難治希憲詢民病苦抑強扶弱首薦許衡提舉學校國制儒得免奴籍京兆諸豪廢令不行希憲至悉良之但識字者即贖著儒版初世祖受命經理河南關右居數歲議者謂王府人多專擅不法

元史卷三十列傳

士

憲宗命阿藍荅劉太平檢覈所部用酷吏分領其事大開告訐希憲曰宣撫司事由己出有罪固當獨任僚屬何預及事竟卒無獲罪者己未憲宗駐蹕合州世祖渡江取鄂州命希憲入籍府庫且指庭實命恣所取希憲引儒生百餘人伏軍門因請軍中所俘士人以官錢贖之得免五百餘人憲宗崩問至希憲啟請速還京正大位以定人心世祖命希憲先行審察事變對曰劉太平霍魯海在關右渾都海四萬騎在六盤征南諸軍散處秦蜀太平要結諸將其性險詐素附阿里不哥倚倚關中形勝潛生異謀將不可制宜遣趙良弼往覘人情事宜從之初憲宗南征畱季弟阿里不哥居守至是發河朔民爲兵將與上爭帝眞定名士李榮當奉莊聖太后命侍阿里不哥講讀爲藩臣脫

忽思所忌械之希憲訪槃於獄言於世祖而釋之又奉使於東方宗王塔察爾勸其首先翊戴王然之庚申世祖至開平宗室諸王勸進謙讓未允希憲復以天時人事進言且曰阿里不哥以母弟挾居守之權倘竊位號則四方觀望宜早定大計詔告天下則從違順逆立判機會不可緩世祖然之明日即位建元中統希憲上言高麗王子僕久留京師今聞其父死宜立爲王遣還國結以恩信又言鄂兵未還宜遣使與宋講好救諸軍北歸帝皆從之俄趙良弼還自關右奏劉太平霍魯海反狀皆如希憲言乃命希憲宣撫陝西四川道太平霍魯海聞之乘驛先入京兆希憲遲一日至宣即位詔遣使安諭六盤渾都海殺所遣使馳召其黨成都帥密里霍者青居帥乞台不華使各以兵

元史卷三十列傳

三

來援盡發蒙古奧魯新軍且約太平霍魯海同日內應希憲召僚屬謀先發乃遣萬戶劉疑京兆治中高鵬霄華州尹史廣掩捕其黨皆衷甲以待鬪而就獲復遣劉疑誅密里霍者總帥汪惟正誅乞台不華具以驛聞時關中無兵備命汪惟良將秦鞏諸軍進六盤惟良以未得上旨爲辭希憲卽解所佩虎符銀印授之曰身承密旨便宜從事已飛奏矣又出庫金帛充功賞製軍衣惟良感激遂行又發蜀卒更戍及在家餘丁四千授蒙古官八春將之謂之曰此軍未經訓練六盤兵精勿與爭鋒但張聲勢使不得東則大事濟矣兩軍既行乃潛濠儲糧爲城守計會有赦詔至希憲先尸太平等於通衢而後出迎詔人心遂安乃遣使自劾停赦行刑徵調兵將等罪帝善其行權別賜金虎

符使節制諸軍得便宜行事西川將紐璘奧魯官將舉兵應渾都海八春獲之繫其黨五十餘人於乾州獄送二人至京兆請并殺之希憲謂寮佐曰渾都海西而不東吾知其無能爲今誅其將校徒攜眾心致其死鬪不如因其懼死釋而用之使感恩効力上策也乃惟送二人於京師餘竝不問初諸校既執其軍疑懼駭亂四出及知諸校獲全紐璘奧魯官得釋大喜過望切諭其屬出兵効力八春果得精騎數千將與俱西詔以希憲爲中書右丞行秦蜀省事渾都海聞關中有備遂西渡河趨甘州阿藍荅復自和林提兵會之分結隴蜀諸將又使紐璘兄宿敦爲書招紐璘時西川人心危疑事不可測希憲遣使諭戒兩川諸將素憚希憲威名按堵從命渾都海阿藍荅合軍而東諸將

元史卷三十列傳

四

失利於甘州河右大震西土親王執畢帖木爾輜重皆空就食秦雍朝議欲棄兩川退守興元希憲力言不可會汪惟良八春等合東諸侯兵力戰西涼大敗之斬渾都海阿藍荅事聞進拜平章政事賜宅一區時希憲年甫三十奏四川降民皆散處山谷請飭諸軍毋虜掠違者罪及其帥又禁諸人無販易生口由是四川遂安降者益眾又罷解鹽戶所摘軍及京兆諸處無籍戶之戍靈州屯田者以寬民力東川帥欽察獲宋臣張炳震王政二人俱以母老乞哀希憲皆縱還因爲書與宋四川制置余玠諭以天道人事玠得書斂守疆界不敢妄動鞏昌帥府上鎮戎州叛者四百餘人希憲惟誅首惡五人餘悉原釋宋將家屬之在成都者希憲歲給其糧父兄仕宋者子弟得越界歲省其

親人皆感之李壇反山東事連王文統平章趙璧素忌希憲勳名因言文統爲張易希憲薦引遂至大用且關中形勝之地希憲得民心有商挺趙良弼爲之輔此事宜關聖慮帝曰希憲挺良弼皆正士何慮焉蜀伶人費正寅以私怨譖希憲因李壇叛亦修城治兵潛畜異志帝因惑之命

元史卷三十列傳

五

中書右丞南合代希憲行省且覆視所告事卒無實狀詔希憲還京師進拜中書平章政事振綱維綜名實汰冗濫抑僥倖興利除害當時翕然稱治典章文物一新又建言國家自開冊以來凡納土及佐命之臣咸令世守至今將六十年子孫皆奴視部下郡邑長吏皆其卑隸僮使前古所無宜更張之使攷課黜陟始議行遷轉法至元元年丁母憂未幾有詔奪情起復出則素服從事入必纓絰及喪父亦如之阿合馬領左右部專總財賦會其黨相攻擊帝命中書推覆眾畏其權莫敢問希憲窮治其事以狀聞杖阿合馬罷所領歸有司有內侍傳旨入朝堂言某事當爾希憲曰此閣宦預政之漸不可啟也遂入奏杖之言者訟丞相史天澤親黨布列中外威權日盛漸不可制詔罷天澤政事使待鞠問希憲進曰天澤事陛下久知天澤深者無如陛下始自潛藩多經任使將兵牧民悉有治效可付大事奈何以小人一旦之言不加詳察他日有訟臣者臣亦遭疑矣臣等備員政府陛下之疑信若此何敢自保天澤既罷亦當罷臣帝良久曰卿且退朕徐思之翼日事遂解又有訟四川帥欽察者帝敕中書急遣使誅之明日希憲復奏帝怒曰尙爾遲回邪對曰欽察大帥以一小人言

被誅民心必駭請收繫至此與訟者廷對然後明其罪於天下詔遣能者按問事果無實希憲每奏事帝前激切無回帝曰卿昔事朕王府多所容受今爲天子臣乃爾木強邪希憲對曰王府事輕天下事重方士請鍊大丹敕中書給所需希憲具以秦漢故事奏且曰堯舜得壽不因大丹也帝曰然遂卻之時方尊禮國師帝命希憲受戒對曰臣受孔子戒矣帝曰孔子亦有戒邪對曰爲臣戒不忠爲子戒不孝孔子之戒如是而已五年始建御史臺繼設各道提刑按察司時阿合馬專總財利乃曰庶務責成諸路錢穀付之轉運今繩治之如此事何由辦希憲曰立臺察古制也內則彈劾奸邪外則察視非常訪求民瘼裨益國政無大於此如君所言必使羣邪舞法賄賂公行事乃集邪

元史卷三十列傳

六

阿合馬不能對七年詔釋京師繫囚西域人匿贊馬丁用事先朝資累鉅萬爲怨家所告繫大都獄既釋之矣時希憲在告實不預其事是秋車駕還自上都怨家訴於帝希憲取堂判補署之曰天威莫測豈可幸其獨不署以苟免邪希憲入見以詔書爲言帝曰詔釋囚耳豈有詔釋匿贊馬丁邪對曰不釋匿贊馬丁臣等亦未聞有此詔帝怒曰汝等號稱讀書臨事乃爾卽與左丞相耶律鑄同罷一日帝問侍臣希憲居家何爲侍臣以讀書對阿合馬從旁曰希憲日與妻子宴樂爾帝變色曰希憲清貧何從宴設希憲嘗有疾帝遣醫三人診視醫言須用沙糖作飲時取難得家人求於外阿合馬遣致二斤希憲卻之曰吾終不以彼所遺愈疾也帝聞而遣賜之十一年嗣國王條輦哥行

省鎮遼陽有言其擾民不便者詔起希憲往代遼東多親王使者傳令旨指揮官吏希憲始革正之有西域人自稱駙馬營於城外繫富民誣其祖父嘗貸息錢索償甚急民訴之行省其人怒乘馬入省堂坐榻上希憲命捧下跪而問之曰法無私獄汝何人敢擅繫民令械繫之其人惶懼求哀國王亦為之請乃稍寬令待對舉營夜遁俄詔國王歸國希憲獨行省事朝廷降鈔買馬六千五百希憲遣買於東州得羨餘馬千三百謂上之則若自銜即與他郡之不及者以其直還官長公主及國婿入朝縱獵郊原擾民為甚希憲欲入奏之公主出飲希憲酒曰從者擾民吾不知也請以鈔萬五千貫還民之直幸勿上聞自是貴人過者皆莫敢縱十二年右丞阿里海牙下江陵圖地形上於

元史卷三十 列傳

七

朝請命重臣開大府鎮之帝急召希憲還使行省荆南得承制授三品以下官希憲冒暑疾驅以進至鎮時阿里海牙頗縱軍虜掠心憚希憲率其屬郊迎望拜塵中荆人大駭即日禁剽奪通商販興利除害兵民安堵首錄宋故宣撫制置二司幕僚能任事者以備采訪仍擇二十餘人隨材授職左右難之希憲曰今皆國家臣子也何用致疑時宋故官禮謁大府必廣致珍玩希憲拒之且語之曰所饋若皆己物我取之非義或係官帑事同盜竊若斂於民不為無罪皆感激謝去令凡俘獲之人敢殺者以故殺平民論為軍士所虜病而棄之者許人收養病愈故主不得復有有立契券質賣妻子者重其罪仍沒入其直先時江陵城外潞水限戎馬希憲命決之得良田數萬畝以業貧民

發沙市倉粟二十萬斛以振公安之饑大綱既舉乃興學校選教官置經籍躬詣講舍以厲諸生西南溪洞及思播田楊二氏重慶制置趙定應俱越境請降事聞帝曰先朝非用兵不可得地今希憲能令數千百里外越境納土其治化可見也關吏得江陵人私書不敢發上之樞密臣發之帝前其中有曰歸附之初民不聊生皇帝遣廉相出鎮荆南豈惟人漸德化昆蟲草木咸被澤矣帝曰希憲不嗜殺人故能爾也十五年希憲疾久不愈董文忠言江陵溼熱所致即召還江陵人號泣擁道畫像祠之還橐蕭然帝知其貧特賜白金五千兩鈔萬貫帝欲令希憲以侍中領門下省竟為阿合馬所沮十六年詔復入中書希憲稱疾篤皇太子遣侍臣問疾希憲曰臣病委之於天所甚憂者

元史卷三十 列傳

六

大奸專政羣小阿附誤國害民病之大者殿下宜開聖意急為屏除不然日就沈疴不可藥矣蓋指阿合馬也臨終戒其子曰丈夫見義勇為禍福無預於己謂泉夔稷契伊傅周召為不可及是自棄也天下事苟無牽制三代可復也十七年卒年五十大德八年追封魏國公諡文正加贈推忠佐理翊運功臣太師上柱國恆陽王子六人孚恪恂忱恆惇從弟希賢至元十二年春以禮部尚書佩金虎符與工部侍郎嚴忠範持國書使宋三月至廣德軍獨松關為宋將張濡所殺明年宋亡元軍獲張濡殺之詔遣使護希賢喪歸復籍濡家資付其家希賢死時年二十九從子惠山舊連海希憲子阿魯渾之子也至治元年登進士第拜監察御史中書省有大臣貪猥狼籍即抗章劾之既又

劾奏明里董阿不當攝祭太廟又上疏言迎佛費財蠹俗時山東鹽法大壞以選除都轉運使未期月課取至正中遷河南行省右丞有詔發民治決河徧騷屬郡亟以不便上言時不能用歷湖廣江西福建行省右丞拜翰林學士承旨知制誥兼修國史希憲父希魯從弟希賢從子惠山皆別傳今并入

安童

安童童一作童木華黎四世孫霸圖魯長子也中統初世祖追錄元勳召入長宿衛年方十三位百寮上母弘吉刺氏昭睿皇后之姊通籍禁中世祖一日見之問及安童對曰安童雖幼每退朝必與老成人語未嘗狎一年少世祖悅曰公輔器也四年執阿里不哥黨千餘將置之死安童侍側曰彼皆親藩之人各爲其主豈知順逆陛下甫定大難遽

元史卷三十

列傳

九

殺多人將何以懷未附帝驚曰何從得此老成語由是深重之至元二年秋八月拜中書右丞相以年少未更事固辭帝乃召許衡入省議事以佐之令衡有嘉謨則先告安童以達於朕衡對曰安童聰敏且有執守聞古諒卽解要領臣敢不竭誠輔導但慮中有人間之則難行外用勢力納人其中則難行四年三月安童復奏請儒臣姚樞等入省議事從之五年阿合馬密議立尙書省乃先奏以安童立位三公崇以虛名而實奪之權事下諸儒議商挺力言其不可乃止七年奏言前有旨令尙書省樞密院奏事如常制其大政令聽與臣議然後得聞今尙書臣一切徑奏帝曰阿合馬倚朕信用故爾專擅邪敕如前詔八年陝西省臣耶速迭爾建言歲饑盜熾非顯戮無以威眾安童言

強竊均死法何以立罪入死者仍宜待報從之十一年奏阿合馬擅財賦權官屬所用非人請嚴加選汰其營作宮殿資緣爲奸竝宜詰問不報阿合馬患安童之逼己也知其短於邊才乃密謀出之於外十二年王師伐宋阿合馬密言大兵南行西北空虛非親藩重臣鎮邊不可詔安童從皇子北平王出鎮西北由是十年不得入朝踰年爲叛王昔里吉劫執同北平王竝入海都軍旣而事定送還會阿合馬亦敗二十一年從王歸待罪闕下帝召見慰勞畱語寢殿四鼓乃出復拜右丞相二十二年監察御史陳天祥奏言陛下至元初相安童至今人思初政不忘也去歲丞相還自北邊天下咸望其復柄用旣而果膺復相之命老幼貴賤無不相慶時政之治不治人心之安不安係丞

元史卷三十

列傳

十

相之得人不得人陛下但任安童再佐以御史大夫玉速左相伯顏事事咨三人而後行無使纖人旁撓其間何患天下之不治又安用掎克在位之盧世榮爲哉是年右丞盧世榮敗安童條其所用人及掎克諸事詔悉罷之詔銓定省院臺官屬帝曰如平章右丞等朕當親擇其餘諸司竝從中書奏擬安童進曰比聞聖意欲倚近侍爲耳目而近臣伺隙援引非類以所署奏目付中書施行若廢格之必有短臣於上者臣謂銓選之法宜循定制帝曰卿何慮是其有妄奏者卽入言之二十四年宗王乃顏叛上親討平之宗室誣誤者命安童按問多所平反嘗退朝自左掖門出諸免罪者爭迎謝或執轡扶上馬安童毅然不顧有乘間譖安童悖慢宗藩者帝曰汝等小人豈知安童所爲

特辱之使改過耳是歲桑葛得幸於上復決意立尚書省安童切諫曰臣力不能回天乞不用桑葛別相賢者猶或不至虐民誤國不聽二十五年見天下大權盡歸尚書屢求退不許二十七年以疾固辭遂罷相以完澤代之明年春桑葛亦敗三十年春安童卒年四十九世祖震悼曰天何喪予良弼詔大臣監護喪事安童弱冠登庸在相位前後二十年汲引善類不問蒙漢如史天澤姚樞許衡商挺寶默皆志同道合立御史臺以正紀綱立太常以崇禮樂剷除苛虐開布寬平抑奢尚儉薄征厚施朝野清謐倉庫豐盈世祖倚之曰安童為相朕寢乃熟方與諸儒經畫典制以太平為己任而邊事撓之宵小格之未竟其志每與許衡語歸數日猶念之不釋公退府南開一閣延士講論

元史卷三十 列傳

三

古今得失臧否終日不倦請謁絕迹於門所居第一堂一廚或請舂兩廡粗備燕息荅曰身足於庇完餘室何用神觀儼然望而生敬每旦暮出入京師皆拱立目送曰安相公也及卒天雨木冰三日天下聞之識與不識罔不失聲驚哀論者謂至元初政不減漢文安童之賢不亞房杜使不為阿合馬桑葛掣肘其致治何遽不古若以為憾焉成宗大德中御史中丞何璋奏言丞相安童甚賢而相業前後異者蓋初年有史天澤廉希憲許衡輩為之佐復相則諸老盡去成宗深然之賜封諡曰東平忠憲王碑曰開國元勳命世大臣之碑子兀都台少襲長宿衛父歿凡贈賻之物一無所受以素車樸馬歸葬先塋事母以孝聞成宗即位拜大司徒常侍掖庭贊畫大政帝及中宮咸以家

人禮待之大德六年卒年三十一諡忠簡子拜住位宰輔自有傳

不忽木

完澤 圖忽魯

不忽木一名時用字用臣世為康里部大人康里即漢康居國也祖海藍伯嘗事克烈部王罕王罕滅太祖遣使招之荅曰昔與帝同事王罕今既已不忍改所事遂去莫知所之子十人皆為太祖所虜燕真取幼年方六歲太祖以賜莊聖皇后后憐而育之遣侍世祖於藩邸長從征伐有功世祖威名日盛憲宗將伐宋命以居守燕真曰主上素有疑志今乘輿遠涉危難之地殿下以皇弟獨處安全可乎世祖然之因請從南征憲宗喜即分兵命趨鄂州而自將攻蜀之釣魚山令阿里不哥居守憲宗崩燕真統世祖

元史卷三十 列傳

三

留部覺阿里不哥有異志奉皇后稍引而南與世祖會於上都世祖即位燕真旋卒不忽木其仲子也資稟英特進止詳雅世祖奇之命給事太子東宮師事贊善王恂恂從北征復受學於國子祭酒許衡日記數千言衡每稱為公輔器世祖嘗欲觀國子所書字不忽木年十六獨書貞觀政要數十事以進帝嘉其寓規諫意衡纂歷代帝王名諡統系歲年為書授諸生不忽木讀數過即成誦帝召試不遺一字至元十三年與同舍生堅童太荅圖魯等上疏曰古之王者建國君民教學為先蓋自唐虞三代降至兩漢罔不以學校為人才教化之本魏道武帝起自北方既定中原增置生員三千儒學以興此歷代皆有學校之證也其平定南方之君建置學校者晉武帝平吳始起國子學

隋文帝滅陳俾國子學不隸太常唐高祖滅梁詔諸州縣及鄉並令置學及至太宗數幸國學增築學舍至千二百間國學太學四門學亦增生員其書算各置博士乃至高麗百濟新羅高昌吐蕃諸國亦遣子弟入學國學之內至八千餘人高宗因之遂令國子監領六學一曰國子學二曰太學三曰四門學四曰律學五曰書學六曰算學各置生徒有差然晉之平吳得戶五十二萬而已隋之滅陳得郡縣五百而已唐之滅梁得戶六十餘萬而已其崇重學校已如此況我堂堂大朝奄有江嶺之地計以宋之戶不下千萬此陛下神功自古未有非晉隋唐之所能及然學校之政尙未全舉臣等曩被聖恩俾習儒學欽惟聖意豈不以諸色人仕宦者常多蒙古人仕宦者尙少而欲臣等

元史卷三十列傳

重

曉識世務以任陛下之使令乎然以學制未定朋從數少譬猶責嘉禾於數苗求良驥於數馬恐不易得也爲今之計如欲人才眾多通習漢法必如古昔偏立學校然後可若日未暇則且於大都宏闡國學擇蒙古人年十五以下十歲以上質美者百人百官子弟與凡民俊秀者百人俾廩給各有定制選德業充備足爲師表者充司業博士助教俾其通講經傳授以修身齊家治國平天下之道其下復立數科如小學律書算之類每科設教授各令以本業訓導或一藝通然後改授或一日之間更次爲之俾國子學官總領其事常加點勘務要俱通仍以義理爲主有餘力者聽學文字日月歲時隨其利鈍程其勤惰而賞罰之或升上舍或降下舍待其改過則復升之假日則聽令學

射自非假日無故不令出學數年以後上舍生學業有成就者乃聽學官保舉蒙古人若何品級諸色人若何仕進其未成就者且令依舊學習俟其可以從政然後歲聽學官舉其賢能使之依例入仕其終不可教者三年聽令出學凡學政因革生員增減不時奏聞則學無敝政而天下之材皆觀感興起然後續立郡縣之學求以化民成俗無不可者書奏帝覽之喜十四年授利用少監十五年出爲燕南河北道按察副使帝遣通事脫忽託護送西僧往作佛事還過真定箠驛吏幾死訴之按察使不敢問不忽木受其狀以僧下獄脫忽託直欲出僧辭氣倔強不忽木令去其冠庭下責以不職脫忽託歸以聞帝曰不忽木素剛正必爾輩犯法故也繼而燕南奏至帝曰我固知之十

元史卷三十列傳

舌

九年遷按察使有訟淨州守臣盜官物者淨州本隸河東特命不忽木往按之歸報稱旨賜白金千兩鈔五千貫二十一年召參議中書省事時樵茶轉運使盧世榮阿附宣政使桑葛言能用已則國賦可十倍於舊帝以問不忽木對曰自昔聚斂之臣如桑弘羊宇文融輩操利術以惑時君始莫不謂之忠及其罪稔惡著國與民俱困雖悔何及願無納其說帝不聽以世榮爲右丞不忽木遂辭參議不拜二十二年世榮以罪被誅帝曰朕殊愧卿擢吏部尙書時方籍阿合馬家其奴有罪當死者詭言阿合馬家資隱寄者多如盡得之可資國用遂勾攷捕繫連及無辜京師騷動帝頗疑之命丞相安童集六部長貳官詢其事不忽木曰是奴爲阿合馬心腹爪牙死有餘罪爲此言者益欲

苟延歲月微幸不死爾豈可復受其誑嫁禍善良急除此徒則怨謗自息丞相以其言入奏帝悟命不忽木鞠之具得實伏誅盡釋其捕繫者二十三年改工部尚書九月遷刑部尚書河東按察使阿合馬以資財媚權貴貸官錢約償羊馬至則抑取部民所產以輸事覺遣使按治皆不伏及不忽木往始得其不法百餘事會大同饑不忽木以便宜發倉廩振之阿合馬所善幸臣有奏不忽木擅發軍儲及鍛鍊阿合馬使自誣服者帝曰使行發粟以活吾民乃其職也何罪之有命移其獄至京師審視阿合馬竟伏誅土圖哈求欽察人奴增益其軍而多取編民中書僉省王遇改正其籍土圖哈遂奏遇有不臣語帝怒欲斬之不忽木力諫帝意乃解二十四年桑葛奏立尚書省誣殺參政

元史卷三十 列傳 五

楊居寬郭佑不忽木爭之不得桑葛深忌之謂其妻曰他日籍我家者必此人也因其退食責以不入曹治事欲加之罪遂以疾免車駕還上都其弟野禮審班侍坐輦中帝曰汝兄必以某日來迎不忽木果以是日至帝見其癯甚問其祿幾何左右對以滿病假者例不給帝念其貧命盡給之二十七年拜翰林學士承旨知制誥兼修國史二十八年春帝獵柳林徹里等劾奏桑葛罪狀帝召問不忽木具以實對帝大驚乃決意誅之罷尚書省復以六部歸於中書欲用不忽木為相因辭帝曰朕過聽桑葛致天下不安今悔之無及朕識卿幼時使從學政欲備今日之用勿多讓也不忽木曰朝廷勳舊齒爵居臣右者尚多帝曰然則孰可對曰太子詹事完澤可乃拜完澤右丞相不忽

木平章政事時上都留守木八剌沙言改按察司置廉訪司不便宜罷去乃求憲臣賊罪以動上聽不忽木歷陳其不可罷帝意乃釋王師征交趾失利復謀大舉不忽木曰島夷詭詐天威臨之寧不震懼獸窮則噬勢使之然今其子日燁襲位若遣一介使諭以禍福彼能悔過則不煩兵而下矣如或不悛加兵未晚帝從之於是交趾感懼遣使詣闕謝罪盡獻前六歲所當貢物帝嘉曰卿一言之力也即以其半賜之不忽木固辭惟受沈香假山象牙鎮紙水晶筆格而已麥朮丁請復立尚書省專領右三部不忽木以阿合馬桑葛前鑿責之事遂寢又諫征琉球之役及賦江南包銀桑葛黨忻都長於理財帝欲釋不誅不忽木力爭至日中凡七奏卒正其罪僧請以金銀幣帛祠其神不

元史卷三十 列傳 五

忽木曰佛以去貪為寶遂弗與又諫京師令蒙古人與漢人閒處以制不虞之說並圖寫國中貴人第宅已與民居犬牙相制之狀上之而止帝每顧侍臣稱塞陸旃之能不忽木從容問其故帝曰憲宗時彼常陰資朕財用卿父所知卿不知也不忽木曰是所謂為人臣懷二心者今有以內府財物私結親王陛下以為若何帝急揮手曰卿止朕失言三十年有星孛於帝座帝憂之夜召入問所以消變之道奏曰風雨自天而至人則棟宇以待之江河為地之限人則舟楫以通之天地有所不能者人則輔相參贊之此人所以與天地參也易震之象曰君子以恐懼修省是以三代聖王敬天之怒遇災而懼漢文之世同日山崩者二十有九日食地震頻歲有之善用此道天亦悔禍海內

又安此前代之龜鑑也因誦文帝曰食求言詔帝悚然曰此言深合朕意可復誦之遂詳論款陳夜至四鼓明日進膳賜以盤珍三十一年帝不豫故事非國人勸舊不得入臥內不忽木以謹厚日視醫藥未嘗去左右帝大漸與御史大夫月魯那顏太傅伯顏並受遺詔留禁中太后召三人問之月魯那顏曰臣等受顧命太后但觀臣等爲之臣若誤國卽甘伏誅宗社大事非宮中所當預知也太后然其言遂定大策其後發引升祔請謚南郊皆不忽木領之成宗卽位執政皆迎於上都之北帝見而慰勞之廷議大事多采不忽木之言太后亦以其先朝舊臣禮貌甚至河東守臣獻嘉禾省臣欲奏爲瑞不忽木語之曰汝部內所產盡然邪曰惟此數莖爾不忽木曰若如此旣無益於民

元史卷三十 列傳

三

又何足爲瑞遂罷遣之西僧爲佛事請釋罪人祈福豪民犯法者皆賄賂之以求免至欲釋奴殺主妻殺夫之罪不忽木言於帝而止之帝責丞相曰朕戒汝無使不忽木知今聞其言朕甚愧之執政內憚欲出爲陝西行省平章太后謂帝曰不忽木朝廷正人先帝所付託豈可出之於外邪帝留之竟以與同列多異議稱疾不出乃拜昭文館大學士平章軍國重事固辭制去重字大德二年行御史中丞事三年兼領侍儀司事四年卒年四十六帝聞之驚悼不忽木素貧躬自爨汲妻織紵以養母後出使還則母已卒號慟嘔血幾不起平居惟服儒素祿賜有餘卽散施親舊所薦拔如丞相哈刺合孫等多爲名臣居常簡默及上前論事則陳義慷慨知無不言世祖嘗語之曰太祖有言

人主理天下如右手持物必資左手承之然後固卿實朕之左手也每侍燕閒必陳說古今治要世祖每拊髀歎曰憾不早聞此言臨崩以白璧遺之曰他日持此見朕也武宗時追封魯國公諡文貞子回回陝西行省平章曠曠由江浙行省平章入爲翰林學士承旨自有傳完澤土別燕氏祖土辭從太祖起朔方平諸部太宗伐金命太弟拖雷由陝右進師以擊其不備土辭爲先鋒遂去武休關越漢江略方城而北破金兵於陽翟金人從攻興元闖利諸州拜都元帥取宋成都賜食邑六百戶父線真宿衛禁中掌御膳中統初從世祖北征四年拜中書右丞相與諸儒臣論定朝制完澤以大臣子選侍皇太子署詹事長入參謀議出掌環衛小心慎密太子甚器重之一日

元史卷三十 列傳

三

會燕宗室指完澤語眾曰親善遠惡君之急務善人如完澤者羣臣中有幾邪自是常典東宮衛兵太子眞金薨成宗以皇孫撫軍北方完澤兩從之至元二十八年桑葛伏誅罷尙書省歸中書世祖以擇相咨問廷臣不忽木言阿合馬籍沒時其賂遺近臣簿籍獨無完澤名又嘗預言桑葛爲相必敗國事今果如其言請以代桑葛特拜中書右丞相完澤立朝一意革桑葛敝政請調積歲逋負錢粟三十一一年世祖崩成宗卽位完澤草遺詔諭中外罷征安南之師調滌煩苛恪守成憲屢詔散財發粟不惜鉅萬以頒賜百姓大德四年加太傅錄軍國重事七年卒追封興元王諡忠獻完澤在相位十餘年位望益崇成宗倚任益重吏民守職樂業頗稱賢相然誤聽雲南左丞劉深言出師

征八百媳婦國險遠炎瘴及至未戰士卒死者十已七八
驅民轉粟餉軍谿谷不容舟車必負擔以達一夫致粟八
斗率數人佐之凡數十日乃至由是民死者亦數十萬中
外騷然御史中丞陳天祥董士選皆力陳其害而完澤說
帝稱江南盡世祖所取陛下不竣此役則無功業可見後
世成宗深入其言故用兵意甚堅卒致覆軍辱國議者皆
咎完澤希寵生事逢君之罪舊史諱之反稱其安靜不急
功利謬矣

圖忽魯字親臣康里人自幼入侍世祖命與耶先鐵木爾
及不忽木從許衡學帝問其所學圖忽魯與不忽木對曰
三代治平之法也帝喜曰康秀才朕初使汝往學不意汝
即知此除蒙古學士進兵部郎中遷僉太史院嘗宴見世

元史卷三十 列傳

无

祖屢開說古今治亂政要多所裨益至元二十年遷中書
右司郎中未幾太宗正辟徹干薦掌其府判署閱諸獄文
案遇死罪求所以生之而不得輒愀然不樂遷吏部尙書
時哈刺合孫爲湖廣平章嘗與圖忽魯同在太宗正府素
知其賢舉以自輔遂授湖廣右丞禽盜首喬大使於九江
梟諸市羣盜頓息奏罷徵夏稅以蘇民困辰州蠻叛副樞
劉國傑往討不利圖忽魯調辰澧沅民間弩士三千助之
因蠻攻蠻遂獲勝成宗時平章不忽木卒帝思之問近侍
曰羣臣孰有似不忽木者賀伯顏對曰圖忽魯其人也且
先帝所知遂驛召還遷樞密副使大德七年卒封趙國公
諡文肅又有燕柎者舊作燕公柎今從神道碑字國材建昌人爲江淮
行省參政入朝值桑葛敗世祖欲易政府大臣以問柎柎

舉伯顏不忽木陳天祥等十人以對又問誰可爲首相以
安童及完澤對世祖遂相二人而以不忽木及柎爲平章
固辭終湖廣行省右丞舊史專傳今附

全阿魯渾

子岳柱

阿魯渾舊連薩理號畏兀人其祖父兄弟皆以薩理爲號祖阿
台薩理當太祖定西域還從至燕會畏兀國王亦都護請
於朝盡歸其民詔許之遂西還精佛氏學父乞台薩理襲
先業通經律論業既成師名之曰萬全故遂以全爲氏至
元十二年入爲釋教都總統同知總制院事子三人阿魯
渾其仲也幼受業於國師八思巴既通其學且解諸國語
世祖聞其材俾習中國文字於是經史百家及陰陽麻數
圖緯方技皆究其說後事皇太子入宿衛深見器重有西

元史卷三十 列傳

手

域僧自言能知天象譯者皆莫解其義帝問誰可與論難
者侍臣以阿魯渾對果屈其僧帝悅令宿衛禁庭會有江
南人言宋宗室反者命捕之使已發阿魯渾趨入諫曰言
者必妄使不可遣也若果反郡縣何以不知言者不由郡
縣而發之闕廷必其仇也且江南初定民疑未附一旦輒
以浮言捕人恐人人自危徒中奸計帝悟立詔使還俾械
繫告者下郡治之果立伏挾嫌誣陷之故帝曰非卿言幾
誤大事自是命日侍左右每勸帝治天下必用儒術宜招
致山澤道藝之士以備任使遂遣使求賢命領集賢館事
阿魯渾曰陛下初置集賢館以待士宜擇重望大臣以新
觀聽詔以司徒薩里蠻領之仍以阿魯渾爲集賢館學士
兼太史院事士之應詔至者凡飲食供帳車服之盛皆喜

過望其弗稱旨者亦請加賚遣還有官於宣徽者欲陰敗其事故盛陳所給廩餼於內前冀帝見之帝果過而問焉對曰此一士之日給也帝怒曰汝意欲損之乎十倍此以待天下士猶恐不至況欲損之誰肯至者阿魯渾又請立國子監置博士弟子員優其廩餼於是學者日盛二十三年進集賢太學士及尙書省立桑葛用事詔阿魯渾與同視事固辭不許授平章政事桑葛日橫引用羣小爲腹心阿魯渾彌縫其閒初猶信用久漸乖忤又立徵利司責理天下逋負固圍皆滿愁怨載路會地震北京阿魯渾極言致災之由請罷徵利司以塞天變詔下之日京師相慶市酒爲空及桑葛敗一無所汚然猶坐累籍沒桑葛臨刑吏猶以阿魯渾爲問桑葛曰我惟不用其言故致於敗彼何

元史卷三十 列傳

三

與馬帝益信其無罪詔還所籍財產仍賜以金帛辭不受成宗卽位賜楮幣二十萬緡初成宗在潛邸數遣使召之託疾不往及成宗撫軍北邊帝遣阿魯渾奉皇太子寶往授乃一至其邸及卽位語阿魯渾曰朕在潛邸誰不願事朕者惟卿雖召不至眞得大臣體自是召對不名賜坐視諸侯王等常語左右曰全平章眞全材也大德三年復拜中書平章十一年卒阿魯渾雅好推轂士由薦進者數十百人多至公卿大夫未嘗有德色追封趙國公諡文定趙孟頫碑其神道見松子三人長岳柱岳柱字止所一字兼山自幼端凝有遠識方八歲觀畫師何澄畫陶母剪髮圖指陶母手中金釧詰之曰金釧可易酒何用剪髮爲也何大驚異旣長就學日記千言年十八

備宿衛出入禁中如老成人至大元年授集賢學士卽以薦賢舉能爲事皇慶元年授湖廣道宣慰使日接儒生詢民瘼至順二年除江西行省平章時有誣告富民負永鹽王官帑鈔八百餘錠者中書遣使諸路徵之使至江西岳柱曰事涉誣罔不可奉命語使者歸以其意復中書時相感悟命刑部詰治得誣罔狀罪誣告者若干人上聞嘉之賜幣帛及上尊酒桂陽州民張思進等嘯聚二千餘眾州縣不能治廣東宣慰使請發兵捕之岳柱曰有司不能撫綏邊民更欲興兵病民邪遣千戶王英往問狀英直抵賊巢諭以禍福果罪兩巡檢司而眾皆復業南方以寧三年遷河南江北行省平章旋卒岳柱天資孝友尤嗜經史有雅量人有欺之者坦不爲意有父風

元史卷三十 列傳

三

葉李

葉李字太白一字舜玉杭州人宋末從學於太學博士補京學生景定五年彗星見理宗詔求直言是時世祖圍鄂宋命賈似道領兵赴援會憲宗凶問至乃解圍班師似道自詭爲己功旋復入相益驕肆自顛擗置公田闢子其法病民甚中外無敢指議李乃與同舍生康棣而下八十三人伏闕上書力詆似道極言三光舛錯宰執之愆似道知稟出李手喉臨安尹劉良貴誣其僭用金飾齋扁鍛鍊成獄驟配漳州宋亡歸隱富春山至元十四年世祖命御史大夫相威行臺江南且求遺逸以李姓名上初李攻似道書其末有前年援鄂克全師而返適有天幸之語世祖習聞之每拊掌稱歎及是見其姓名大悅卽授浙西道儒學

提舉使者竝致丞相安童書促李上道李乃幡然拜命二十三年侍御史程文海奉命搜賢江南世祖諭之曰此行必致葉李來李既至京師館集賢院中它日召見香殿勞問曰卿曩時訟似道書朕嘗識之更詢以治道安出李歷陳古帝王得失成敗之由世祖首肯賜坐錫宴更命五日一入議事時方罷各道儒學司李因奏曰臣觀先帝詔書當勅業時軍務繁夥尙招致士類今陛下混一區宇偃武修文可不作養人材以宏治道各道儒學提舉及郡教授實風化所係不可罷請復立提舉司專提調學官課諸生講明治道而上其成才者於太學以備錄用凡儒戶徭役竝乞調免帝可其奏宗王乃顏叛詔李庭出師討之而將校多用蒙古人或與賊親暱立馬相鄉語輒釋仗不戰帝

元史卷三十一列傳

李

患之李密啟曰兵貴奇不貴眾臨敵當以計取彼既親暱誰肯盡力徒費四方轉餉請用漢軍列前步戰而聯大車斷其後以示死關彼嘗玩我必不設備我以大眾蹈之無不勝矣帝善其策諭將帥果奏捷自是帝益奇李每罷朝必召見論事二十四年拜御史中丞兼商議中書省事李固辭得許因叩首謝曰臣今雖不居是職然御史臺天子耳日常行事務可以呈省至若監察御史奏疏行臺咨稟事關軍國生民利病宜各許實封言事以廣視聽會桑葛奏立尙書省授李尙書左丞李復以資格固辭帝曰商起伊尹周舉太公豈循格邪賜大小車各一許乘小車入禁中仍給扶升殿一日從至柳林奏曰善政不可以徒行人材不可以驟進必漸摩培養然後賢良輩出膏澤下流

唐虞三代咸有胥學漢唐明主數幸辟雍匪爲美觀也乃薦周砥等十人爲祭酒等官凡廟學規制條具以聞帝皆從之時帝欲徙江南宋宗室及大姓於北方李乘間言宋已歸命其民安於田里今無故聞徙必將疑懼萬一有奸人乘釁而起非國之利帝悟事遂寢遷尙書右丞帝欲伐交趾召李入議李曰遠方遠夷得之無益軍旅一興費糜鉅萬今山路險巖深入敵境萬一蹉跌非所以威示遠人也乃止二十五年擢平章政事李又辭許之賜以玉帶視秩一品及平江田四千畝初李嘗稱桑葛之才世祖信之桑葛爲尙書省丞相頗擅國政急於財利毒及生民李與同事莫能匡正會桑葛敗遂請疾南還揚州儒學正李淦上書言葉李本一黥徒受上簡知可謂千載一遇而纔近

元史卷三十一列傳

李

天光卽以舉桑葛爲第一事禁近侍言事以非罪殺參政郭佑楊居寬迫御史中丞劉宣自裁錮治書侍御史陳天祥罷御史大夫門荅占侍御史程文海杖監察御史變鈔法拘學糧徵軍官俸減兵士糧立各提舉司增鹽酒醋稅課官民皆受其禍尤可痛者要東木禍湖廣沙不丁禍江淮蔑貴里禍福建又大鈞攷錢糧民怨而盜發天怒而地震水災洊至葉李亦無一言自劾薦舉非人之咎尙賴陛下聖明更張政化人皆知桑葛用羣小之罪而不知葉李舉桑葛之罪葉李雖罷相權刑戮未加而負清望重名爲天下所竊議宜斬葉李以謝天下書聞帝翼然曰葉李廉介剛直其舉桑葛特媿知人之明雖朕亦與有責焉有旨驛召淦詣京師置對李南還至臨清帝遣使召之未幾卒

李既卒而途至詔以途爲江陰路教授以旌直言論者謂桑葛之奸邪較賈似道尤易識葉李既力舉桑葛則其攻賈似道亦特劫於太學之公議耳李前後被賜甚多而自奉甚儉比卒悉表送官至正八年追封南陽郡公諡文簡

徹里

徹里燕只吉台氏曾祖泰赤爲馬步軍都元帥從太祖定中原以功封徐邳二州因家於徐徹里幼孤母蒲察氏教以讀書至元十八年世祖召見應對詳雅悅之俾常侍左右民間事時有所咨訪從征東北邊還因言大軍所過民不勝擾寒餓且死宜加振給詔賜邊民穀帛牛馬有差二十三年奉使江南省風俗訪遺逸時行省理財方急賣所在學田以價輸官徹里曰學田所以供祭禮育人才也安

元史卷三十列傳

美

可驚遽止之二十四年分中書爲尙書省桑葛爲相引用黨與鉤攷天下錢糧凡昔權臣阿合馬積年負逋舉以中書失徵奏誅二參政行省乘風督責尤峻主無所償則責及親戚或逮繫鄰黨械禁撈民不勝其苦自裁及死獄者每省以百數中外騷動廷臣顧忌莫敢言徹里具陳桑葛姦貪誤國害民狀辭語激烈帝怒謂其毀詆大臣失禮體命左右批其頰徹里辨愈力且曰臣與桑葛無讎所以力數其罪而不顧身者正爲國家計耳苟畏聖怒而不復言則奸人何由而除民害何由而息且使陛下有拒諫之名臣竊懼焉帝大悟卽令帥羽林三百人往籍桑葛家得珍寶如內藏之半桑葛既誅諸枉繫者始得釋復奉旨往江南籍桑葛姻黨江浙省臣烏馬爾茂列忻都王濟湖廣

省臣要束木等皆棄市天下大快之徹里往來凡四道徐皆過門不入進拜御史中丞俄遷福建行省平章汀漳劇盜歐苟久不平引兵進討號令嚴肅所過秋毫無犯惟整隊耀武過柵不攻有降者則慰勞以酒食且原其貪吏激變之由他柵聞悉款附其黨縛歐苟出降不戮一人汀漳平三十一年帝不豫徹里馳還京侍醫藥帝崩與諸王大臣共定策迎立成宗大德元年拜南臺御史大夫召都事賈鈞謂曰國家置御史臺所以肅清庶官美風俗興教化也乃者御史不存大體按巡以苛爲明徵賦以多爲功至有迫于證父弟證兄奴許主者傷風敗教莫甚爲我語諸御史毋庸效尤爲也帝聞而善之改江浙行省平章吳淞江歲久淤塞平江嘉興湖州三郡水無所泄淫潦敗

元史卷三十列傳

美

稼朝廷命行省發卒數萬疏之徹里董其役凡四閱月畢工九年召入中書平章政事卒家資不滿二百緡人服其廉追封徐國公諡忠肅至治二年進封武寧王改諡正憲子多爾只江浙行省左丞姚燧碑其神道論曰世祖卽位之初首定官制立中書省以總百司庶務一時明良際會稱得人之盛漢人史天澤始躋首輔劉秉忠亦以太保參預中書省事初無內色目外漢人南人之見誠王者公天下之量矣惟惑於言利之臣王阿桑盧相繼柄政復設尙書省盡奪中書政權一時安童廉希憲不忽木諸勳舊皆爲所阻隄逡避位去中書而不獲竟其用阿魯渾與桑葛同視事尙書省委蛇彌縫亦不能有所補救君子小人勢不兩立自古而然至元之治不獲比隆

古昔豈獨諸賢之不幸哉抑世祖嘗曰曩言王文統不可用者惟賈漢卿一人尙使更有一二人言之朕寧不之思邪阿合馬稔惡十餘載苟非斃於王著竟無劾罷之時微里不憚批鱗悟主而桑葛不逾時伏誅吾於當日諸賢不無春秋責備焉彼葉李者反稱桑葛之才階而進之其無知人之明邪抑逢迎爲容悅也李淦之言足以視其魄已

○論今補

元史卷三十 列傳

毛

元史卷三十終

元史卷三十一

列傳十七上

世祖文臣上

姚樞

姚樞字公茂柳城人後遷洛陽少力學內翰宋九嘉識其有王佐略楊惟中與之偕覲太宗歲乙未南伐詔樞從惟中即軍中求儒道釋醫卜者會破棗陽主將將盡坑之樞力辯非詔書意乃蹙數十人逃入篁竹中脫死繼拔德安得名儒趙復始見伊洛性理之書辛丑賜金符爲燕京行臺郎中時行臺牙魯瓦赤擅納賄以樞爲幕長分致之樞拒絕因棄官去攜家之輝州蘇門山作家廟別爲室奉孔子旁列宋儒周程朱張邵司馬六君子象刊諸經小學四書傳註惠學者讀書鳴琴若將終身時許衡在魏至輝就

元史卷三十一 列傳

一

錄程朱書以歸謂其徒曰曩所授受皆非也今始聞進學之序既而盡室依樞以居世祖在潛邸遣趙璧召樞至大喜詢以治道樞爲書數千言首陳帝王之道與治國平天下之大經彙爲八目曰修身力學尊賢親親畏天愛民好善遠佞次及救時之敝爲條三十曰立省部則庶政出一綱舉紀張令不行於朝而變於夕辟才行舉逸遺慎銓選汰職員則不專世爵而人才出班俸祿則賊穢塞而公道開定法律審刑獄則收生殺之權於朝諸侯不得而專臣山之罪不致苟免毫髮之過免罹極法而冤抑有伸設監司明黜陟則善良姦竇可得而舉刺罷徵斂則部族不橫於誅求簡驛傳則州郡不困於需索修學校崇經術旌節孝以爲育人才厚風俗美教化之基使士不媮於文華重

農桑寬賦稅省徭役禁游惰則民力紓不趨於浮僞且免習工技者歲加富溢勤耕織者日就飢寒肅軍政使田里不知行營往復之擾攘周匱乏恤餼寡使顛連無告者有養布屯田以實邊戍通漕運以廩京師停債負則賈胡不得以子爲母破稱貸之家廣儲畜復常平以待凶荒立平準以權物估卻利便以塞倖塗杜告訐以絕訟原各疏弛張之方於其下本末兼該細大不遺世祖奇其才動必召問且使授世子經憲宗卽位詔凡軍民在赤老溫山南者聽世祖總之諸臣皆賀樞獨默然既宴罷將出世祖問其故對曰主上以中原漢地盡屬之王則人民之殷財賦之阜王盡有之天子獨有塞外朔漠之地乎異時廷臣間之必悔而見奪不若惟持兵權供億之需取之有司則勢順

元史卷三十一 列傳

二

理安可以長久世祖曰吾慮不及此乃如其言上聞憲宗從之樞又請置屯田經略司於汴置都運司於衛轉粟於河以圖宋憲宗大封同姓敕世祖於汴京關中自擇其一樞曰汴京河徙無常土薄水淺瀉鹵生之不若關中天府陸海於是世祖願有關中憲宗并以汴京予之壬子夏從世祖征大理至曲先淖爾之地夜宴樞陳宋太祖遣曹彬取南唐不殺一人市不易肆事明日世祖據鞍呼曰汝昨夕言曹彬不殺者吾能爲之樞馬上賀曰王仁如此生民之幸有國之福也明年師及大理城飭樞裂帛爲旗書止殺之令分號街陌由是民得相完保久之或讒王府得中土心憲宗遣阿藍荅大爲鈎攷置局關中以百四十二條推案經略宣撫官吏下及征商無遺曰俟終局日入此罪

者惟劉巖史天澤以聞餘悉誅之世祖聞之不樂樞曰帝君也大王爲皇弟臣也事難與較莫若盡王邸妃主自歸朝廷爲久居計疑將自釋及世祖入見憲宗相持泣下竟不令有所白而止因罷鈎攷局世祖卽位以樞宣撫東平既至郡置勸農檢察二人爲監均賦役罷鐵官中統二年拜太子太師樞曰皇太子未立安可先有太師以所受制還中書改太司農初曲阜有太常雅樂憲宗命鞏其歌工舞郎與樂色俎豆至日月山親飭東平守臣員闕充補無輟肆習樞奏言陛下閔聖賢之後詩書不通與凡庶等既命洛士楊庸選教孔顏孟三族諸孫乞眞授庸教官以成國家育材之美王鏞練習故實宜令提舉禮樂使不致崩壞皆從之樞又奏四事曰舉老成以輔皇子重省臣以振

元史卷三十一 列傳

三

朝綱定法制以齊庶政立銓選以轉百官又言內地之民不習武事不耐勞苦第可使出財賦以資國用西京北京諸路之民習武耐勞可盡復其差賦充本路保甲屯田漢軍除守禦外可選三萬屯燕京東西置營以壯神都左右中三衛從此起詔赴中書議事及講定條格李璫叛帝問卿料賊勢何如對曰使璫乘吾北征之釁瀕海擣燕閉關居庸惶駭人心爲上策與宋連和負固持久數擾邊使吾罷於奔救爲中策出兵濟南待山東諸侯應援此成禽耳帝曰今賊將安出對曰必出下策初帝嘗論天下人才及王文統樞曰此人心術不正以游說干諸侯他日必敗至是文統果因通瓊反謀伏誅四年拜中書左丞奏罷世侯置牧守或言中書政事大壞帝怒大臣罪且不測樞上言

太祖開荆跨越前古施治未遑自後數朝官盛刑濫民困財殫陛下昔在潛邸聽聖典訪老成日講治道如邢州河南陝西皆不治之甚者爲置安撫經略宣撫三使司選人以居職頒俸以養廉去污濫以清政勸農桑以富民不及三年號稱大治陛下卽位以來用歷代遺制內立省部外設監司自中統至今五六年間外侮內叛相繼不絕然能使官離債負民安賦役府庫粗實倉廩粗完鈔法粗行國用粗足官吏遷轉政事更新皆陛下信用先王之法所致何謂中書政事之無效也今始治道正宜上答天心中下結民心睦親族以固本建儲副以重祚定大臣以當國開經筵以格心修邊備以防虞蓄糧餉以待款立學校以育才勸農桑以厚生庶可以光先烈成帝德遺子孫流遠譽

元史卷三十一 列傳 四

邇者聰聽日煩朝廷政令日改月異顧復廢中書條格行一切苟簡之政是如木始栽而就移屋既架而復毀臣民不勝戰懼惟恐大本一廢遠業難成爲陛下之後憂國家之重害帝意乃釋至元五年用兵襄陽立河南行省經理屯田以樞爲僉事十年拜昭文館大學士詳定禮儀其年襄陽下遂議取宋樞奏如求大將非右丞相安童知樞密院伯顏不可十二年樞言陛下不殺人之詔伯顏濟江兵不踰時西起蜀川東薄海隅降城三十戶踰百萬自古平南未有如此之神捷者今自夏徂秋一城不降皆由軍官不思國之大計不體陛下之深仁利財剽殺所致揚州焦山淮安人殊死戰我雖克勝所傷亦多宋人自知不能爲國而臨安未肯輕下者好生惡死人之常情懼吾招徠

止殺之信不堅耳宜申止殺之詔使賞罰必立恩信必行則聖慮不勞而軍力不費又請禁宋鞭背黥面及諸濫刑十三年拜翰林學士承旨十七年卒年七十八諡曰文獻樞恢然長者未嘗疑人欺己喜怒不形於色及臨大計決大疑雖古謀臣智士無以過之子煒仕爲平章政事從子燧官至翰林學士承旨以文章名別有傳

許衡

許衡字仲平懷州河內人七歲入學授章句問其師曰讀書何爲師曰取科第耳曰如斯而已乎師大奇之稍長嗜學如飢渴然遭世亂且貧無書嘗從日者家見尙書疏義因請寓宿手鈔歸既逃難徂徠山始得易王輔嗣說兵亂中夜思晝誦而身踐之嘗暑中過河陽渴甚道有梨眾爭

元史卷三十一 列傳 五

取啖之衡獨危坐樹下自若或告曰世亂此樹無主可取也衡曰梨無主吾心獨無主乎轉魯留魏人見其有德稍從之居三年聞亂且定乃還懷州往來河洛間從柳城姚樞得伊洛程氏及新安朱氏書益大有得尋居蘇門與樞及竇默相講習慨然以道自任凡喪祭娶嫁必以禮鄉人從學者寔盛家貧躬耕年不熟則食糠茹菜處之泰然稍有餘卽以分諸族人及諸生之貧者樞嘗被召入京師以其雪齋居衡命守者館之衡辭不受甲寅世祖出王秦中以姚樞爲勸農使教民耕植又思所以化秦人召衡爲京兆提學世祖南征乃復還懷州中統元年召至京師時王文統以言利進爲平章政事衡樞輩入侍言治亂休戚必以義爲本竇默又曰於帝前排文統學術不正文統患

之乃奏以樞爲太子太師默太子太傅衡太子太保陽尊
用之實不使數待上也默與樞拜命將入謝衡曰禮師傅
與太子位東西鄉師傅坐太子乃坐公等度能復此乎不
能則師道自我廢也樞以爲然乃相與懷制立殿下五辭
乃免改命樞太司農默翰林侍講學士衡國子祭酒未幾
衡謝病歸至元二年帝以安童爲右丞相欲衡輔之復召
至京師命議事中書省衡乃疏陳五事其一曰自古立國
有大規模規模既定然後治功可期昔子產相衰周之列
國孔明治西蜀之一隅且有定論終身由之而堂堂天下
可無一定之制哉前代北方之有中夏者必行漢法乃可
長久故後魏十六帝百七十年遼九帝二百有八年金九
帝百二十年皆歷年最多其他不行漢法如劉石姚苻慕

元史卷三十一 列傳

六

容赫連等專尙威力劫持鹵莽皆不過二三十年而傾敗
相繼夫陸行空車水行空舟反之則不能行幽燕食寒蜀
漢食熱反之則必有變以是論之國家既自朔漠入中原
居漢地主漢民其當用漢法無疑也然萬世國俗累朝勳
舊一旦驅之下從臣僕之謀改就亡國之俗其勢有甚難
者夫寒之與暑固爲不同然寒之變暑也始於微溫而熱
而暑積百有八十二日而寒始盡暑之變寒其勢亦然
亦積漸之驗也苟能漸之摩之待以歲月心堅而確事易
而常未有不可變者以北方之俗改用中國之法非三十
年不可成功在昔平金之日卽當議此願乃遷延三十載
養成尾大之勢祖宗失其機於前陛下繼其難於後雖曰
守成實同初始規模又難於曩時惟亟亟講求得失而法

戒之不雜小人不責近效不恤流言則周漢不難復遼金
不難蹀也其二曰天下之務萃於中書不勝其煩然大要
用人立法而已人之賢否未知其詳固不可遽用若或已
知其爲君子爲小人而復遲疑兩可莫決進退用君子恐
其迂闊用小人冀收其捷效是徒曰知人而實不能用人
亦何益哉人莫不飲食也獨膳夫能調五味之和莫不覩
日月也獨星官能步虧食之數今里巷之談動以古爲詬
戲不知今日口之所食身之所衣孰非古人遺法豈天下
之大國家之重而獨無必然之成法乎夫治人者法守法
者人人法相維上安下順而君相不勞今立法用人縱未
能遽如古昔然已仕者當給俸以養其廉未仕者當寬立
條格俾就敘用則失職之怨少可舒矣外設監司以察污

元史卷三十一 列傳

七

濫內專吏部以定資歷則非分之求漸可息矣再任三任
抑高舉下則人才爵位略可平矣至於貴家之世襲品官
之任子版籍之數續當議之亦不可緩也其三曰爲君當
知爲君之難蓋上天爲下民作之君師非以安佚娛之乃
以至難仕之也古帝明王莫不兢兢業業豈故爲是自苦
哉誠深知爲君之難則有一息不敢暇逸者請言其要曰
踐言難知人難用賢難去邪難得人心難合天意難何者
人君不患出言之難而患踐言之難知踐言之難則其出
言不容不慎一日二日萬幾人君以一身一心臨斷之欲
言之無失豈易得哉故有昔之所言而今日忘之者今之
所命而後日自違者可否異同紛更變易紀綱不得布法
度不得立臣下無所持循此無他至難之地不以難處而

以易處故也苟從大學之道以修身為本凡一言一行必求其所當然不牽於愛憎不激於喜怒虛心端意而審處之勉有不中者奈何為上多樂舒肆為下多事容悅夫私心盛則不畏人欲心盛則不畏天以不畏天不畏人之心所日務者皆快心之事則口欲言而言身欲動而動又安肯兢兢業業熟思而審處之乎此人君踐言之難又難於在下之人也人之情偽有易有險險者難知易者易知且又有眾寡之分焉寡則易知眾則難知故在上難於知下而在下易於知上處難知之地御難知之人欲其不見欺也難矣人君處億兆之上操予奪進退賞罰生殺之權不幸見欺則以非為是以是為非其害可勝既乎人君惟無喜怒也有喜怒則贊其喜以市恩鼓其怒以張勢人君惟

元史卷三十一 列傳 八

無愛憎也有愛憎則假其愛以濟私藉其憎以復怨甚至本無喜也誑之使喜本無怒也激之使怒本不足愛也而譽之使愛本無可憎也而短之使憎若是則進者未必君子退者未必小人予者未必有功奪者未必有罪賞罰生殺勉得其正人君不悟其受欺也而反任之以防天下之欺患尙可言邪大抵人君以知人為貴以用人為急用得其人則無事於防既不出此則所近者爭進之人耳好利之人耳無恥之人耳彼挾詐用術投間抵隙以蠱君心欲防其欺雖堯舜不能也此知人之難也能知賢則必任賢賢者以公為心以愛為心不為利回不為勢屈實之周行則庶事得其正天下被其澤其於人國重固如此也然其人必難進易退輕利重義人君雖或知之而召之命之況

如廝養賢者有不屑也雖或接之以貌待之以禮然而言不見用賢者不處也或用其言而復使小人參之責小利期近效有用賢之名無用賢之實賢者亦豈肯尸位素餐以取譏天下後世哉且賢不惟難進也而又難合人君處崇高之地大抵樂聞人過而不樂聞己過務快己心而不務快民心賢者必欲匡而正之扶而安之如堯舜而後已故其勢恆難合況奸邪佞倖醜正惡直肆為詆毀多方以陷之將見罪戾之不免又可望庶事得其正而天下被其澤邪此任賢之難也奸邪之人其心險其術巧惟險故千態萬狀而人莫能知惟巧故千蹊萬徑而人莫能禦其詭似恭其計似直其欺似可信其佞似可近勢在近習則結近習勢在宮闈則媚宮闈或以甘言誘人於過而後發之

元史卷三十一 列傳 九

以示其無黨務窺人君之喜怒而迎合之竊其勢以立己之威結其愛以濟己之欲愛隆於上威擅於下大臣不敢議近親不敢言毒被天下而上莫之知所謂城狐社鼠而求去之固已難矣然此猶人主之不知者也至若宇文士及之佞太宗灼見其情而不能斥李林甫妒賢嫉能明皇洞見其奸而不能退邪之惑人有如此者可不畏哉此去邪之難也夫上以誠愛下下以忠報上感應之理則然禹抑洪水以救民啟又能敬承繼禹之道其澤深矣然一傳而太康失道則萬姓仇怨而去者何邪漢高帝起布衣天下景從榮陽之難紀信至捐生以赴急則人心之歸可見矣及天下已定而沙中有謀反者又何邪非下民戴上之心有時忽變特由使之失望使之不平然後怨怒生焉禹

啟愛民如赤子而太康逸豫以滅德是以失望漢高以寬仁得天下及其已定乃以愛憎行誅賞是以不平古今人君凡有恩澤於民而民怨且怒者皆類此也人君有位之初既出美言而告天下矣既而實不能副故怨生焉等人臣耳無大相遠人君特以己之私而厚一人則其薄者已缺望況於薄有功而厚有罪人得不憤於心邪得人心之道不在於要結而在於修身誠使一言一動必可爲天下之法一賞一罰必求合天下之公則億兆之心將不來自得又豈有失望不平之累哉此得人心之難也三代而下稱盛治者無如漢之文景然攷之當時天象數變山崩地震未易遽數是將小則有水旱之災大則有亂區之應而文景克承天心一以養民爲務今年勸農桑明年減田租

元史卷三十一 列傳

十

懋愛如此是以民心洽而和氣應臣竊見前年秋字出西方彗出東方去年冬彗見東方復見西方議者謂當除舊布新以應天變臣以爲曷若直法文景恭儉愛民爲本原之治書曰天視自我民視天聽自我民聽以是論之則天之道恆在於下恆在於不足也君人者不求之下而求之高不求之不足而求之有餘斯其所以召天變也其變已生其象已著乖戾之幾已萌猶且因仍故習抑其下而損其不足謂之合天不亦難乎此六者皆難之目也舉其要則修德用賢愛民三者而已此謂治本本立則紀綱可布法度可行治功可必否則愛惡相攻善惡交病生民不免於水火以是爲治萬不能也其四曰農桑學校治法之大綱也古之賢君莫如堯舜賢臣莫如稷契亦不過播百穀

以厚民生敷五教以善民心此教養之道民可使富兵可使強人才可使盛國勢可使重必然之理也今國家徒知斂財之巧而不知生財之由徒知防人之欺而不欲養人之善徒患法令之難行而不患法令無可行之地誠能優重農民勿擾勿害歐游惰之人歸之南畝課之種藝悉喻而督行之十年已後倉廩之積當非今日之比矣自都邑而至州縣皆設學校使皇子以下至於庶人之子弟皆入於學以明修己治人之要道十年已後人材之盛風俗之美又非今日之比矣二綱既張萬目斯舉否則他政效皆不可期也其五曰天下所以定者民志定則士安於士農安於農工商安於爲工商而後在上之人始安如秦山今民不安於白屋必求祿仕仕不安於卑位必求尊榮四方

元史卷三十一 列傳

十一

萬里輻輳並進各懷無厭無恥之心在上之人可不爲寒心哉臣聞取天下者尙勇敢守天下者尙退讓各有其宜不可不審然欲民志之定者必先定君志君志之定莫如慎喜怒而修號令古之帝王潛心恭默不易喜怒其未發也雖至近莫能知其發也雖至親莫能移喜怒發必中節是以號令簡而無悔夫號令數變不可也數失信尤不可也周幽無道故不恤此今無此何苦使人之不信也書奏帝嘉納之衡自見帝多奏陳退皆削其草故其言多祕世罕得聞所傳者特此其反復於賢奸之際皆爲阿合馬言之也衡多病帝聽五日一至省時賜尙方名藥美酒以調養之四年乃聽其歸五年復召見奏對亦祕六年命與太常卿徐世隆定朝儀儀成帝臨觀甚悅又詔與太保劉秉

忠左丞張文謙定官制衡歷攷古今分并統屬之序去其
權攝增置冗長側置者凡省部院臺郡縣與夫后妃儲藩
百司所聯屬統制定為圖七年奏上之未幾阿合馬益柄
用為中書平章政事領尚書省六部事因擅權勢傾朝野
一時大臣多附之衡每與之議必正言不少讓已而其子
又有僉樞密院之命衡獨執議曰國家事權兵民財三者
而已今其父典民與財子又典兵不可彼雖不反此反道
也阿合馬面質衡曰君何言吾反君實反耳人所嗜好權
勢爵祿聲色君一切不好惟欲得人心非反而何衡曰王
平章不好權勢爵祿邪何以反邪阿合馬由是銜之亟薦
衡宜在中書欲中以事俄除左丞衡屢入辭免帝命左右
掖之出初王文統敗時帝責衡曰昔寶漢卿屢言文統不

元史卷三十一 列傳

主

善爾何不言豈孔子教汝若是邪至是從幸上京乃論列
阿合馬專權罔上蠹政害民若干事不報因謝病請解機
務帝惻然召其子師可入諭旨且命舉自代者衡奏曰用
人天子之大柄也臣下汎論其賢否則可若授之以位則
當斷自宸衷不可使臣下有市恩之漸帝久欲開太學會
衡請罷益力乃從其請八年以為集賢大學士兼國子祭
酒親為擇蒙古弟子使教之衡聞命喜曰此吾事也國人
子大朴未散視聽專一若置之善類中涵養數年將必為
國用乃請徵其弟子王梓劉季偉韓思永耶律有尙呂端
善姚燧高凝白棟蘇郁姚燧孫安劉安中十二人為伴讀
詔驛召之來京師分處各齋以為齋長時所選弟子皆幼
稚衡待之如成人愛之如子出入進退嚴若君臣講課少

暇即習禮或習書算少者則令習拜跪揖讓進退應對或
射或投壺負者罰讀書若干遍久之諸生人人自得尊師
敬業下至童子亦知禮節十年權臣屢毀漢法諸生廩食
或不繼衡固請退帝命諸老臣議其去留寶默亦為衡請
乃聽衡歸以贊善王恂攝學事劉秉忠等奏乞以衡弟子
耶律有尙蘇郁白棟為助教守衡規矩從之國家自得中
原用金大明麻自大定是正後六七十氣朔加時漸差
帝以海宇混一宜協時正日十三年詔王恂定新麻恂以
為麻家知麻數而不知麻理宜得衡領之乃以集賢大學
士兼國子祭酒領太史院事召至京十七年麻成奏上之
賜名曰授時麻頒之天下語詳郭守敬傳六月以疾請還
懷皇太子為請於帝以子師可為懷孟路總管以養之且

元史卷三十一 列傳

主

使東宮官來諭衡曰公毋以道不行為憂也公安則道行
有時矣其善藥自愛十八年衡病革適逢家祭扶起奠獻
如儀既徹餒而卒年七十三是日雷電大風拔木懷人無
貴賤少長皆哭於門四方學士多數千里來祭哭墓下北
方文學自衡開之元代名公卿多出其門丞相安童事以
師禮卒稱賢相惟值王文統阿合馬相繼用事未獲大行
其志論者惜之大德元年贈司徒諡文正至大三年加贈
太師追封魏國公皇慶二年詔從祀孔子廟廷延祐初又
詔立書院於京兆以祀之給田奉祠事名魯齋書院元統
二年順帝嘉許衡輔世祖以不嗜殺人一天下特錄其孫
從宗為章佩監異珍庫提點

寶默

竇默字子聲初名傑字漢卿廣平肥鄉人幼讀書有志節族祖旺爲郡功曹令習吏事不肯就會元兵伐金默爲所俘同時被俘者三十人皆見殺惟默得脫歸其鄉而元兵復至遂南走渡河依母黨吳氏從婦翁王某學醫轉客蔡州受銅人針法於李浩金主遷蔡默恐兵且至又走德安孝感令謝憲子以伊洛性理之書授之默始知古人之學適中書楊惟中奉旨招集儒道釋之士默乃北歸隱於大名與姚樞許衡朝暮講習繼還肥鄉以經術教授由是知名世祖在潛邸遣召之默變姓名以自晦使者微服詣之默不得已乃拜命既至問以治道三對皆稱旨自是敬待加禮不令暫去左右又薦姚樞於上卽召用之俄命皇子眞金從默學賜以玉帶鈎諭之曰此金內府故物朕嘗服

元史卷三十一 列傳

四

之使我子見之如見我也久之請南還命大名順德各給田宅有司歲具衣物以爲常世祖卽位召至上都問曰朕欲求如唐魏徵者有其人乎默對曰正己格心確乎不拔則許衡其人也深識遠慮有宰相才則史天澤其人也天澤時宣撫河南帝卽召拜右丞相以默爲翰林侍講學士時初建中書省平章政事王文統頗見委任默上書曰平治天下必用正人端士其脣吻小人一時功利之說必不能定立國家基本爲子孫久遠之計不過賣利獻勤乞憐取寵而已彼惟恐不得行其志是以鈎距揣摩以利害驚動人主之意欲使人主擯斥諸賢而已獨專政柄耳此蘇張之流孔子所謂利口覆邦家者也伏惟陛下察之別選公明有道之士授以重任則天下幸甚他日默與王鶚姚

樞俱在帝前復面斥文統曰此人學術不正久居相位必禍天下帝曰然則誰可相者默曰以臣觀之無如許衡帝不悅文統深忌之乃請以默爲太子太傅默辭曰東宮位號未正臣不敢先受太傅之名乃復以爲翰林侍講學士俄謝病歸未幾文統伏誅帝追憶其言謂近臣曰曩言王文統不可用者惟竇漢卿一人向使更有一二人言之朕寧不之思邪召還賜第京師命有司月給廩祿國有大政輒咨之默與王磐等請分置翰林院專掌蒙古文字以翰林學士承旨薩的彌底里主之其翰林兼國史院典制誥備顧問以翰林學士承旨和禮霍孫主之帝可其奏默又請建學立師博選貴族子弟教之以端風化之本帝嘉納焉嘗與劉秉忠姚樞劉肅商擬侍上前默言君有過舉臣

元史卷三十一 列傳

五

當直言都俞吁咈古之所尚今則不然君曰可臣亦以爲可君曰否臣亦以爲否非善政也明日復侍於幄殿獵者失一鵠帝怒侍臣或從旁大聲謂宜加罪帝惡其迎合命杖之釋獵者不問既退秉忠等賀默曰非公誠結主知安得感悟至此至元十二年默年八十公卿皆往祝帝聞之拱手曰此輩賢者安得請於上帝使回壯年爾朕左右其治天下惜今老矣悵然者久之默既老不視事帝數遣中使存問卒年八十五帝及皇太子皆厚賻命有司護送歸葬肥鄉默爲人樂易平居未嘗評品人物與人居溫然至論國家大計面折廷諍則懷不可犯帝嘗謂侍臣曰朕求賢三十年惟得竇漢卿及李俊民二人又曰如竇漢卿之心姚公茂之才合而爲一斯可謂全人矣追封魏國公諡

文正子履集賢大學士李俊民別見藝術傳

郝經

郝經字伯常澤州陵川人家世業儒祖天挺元好問嘗從之學金末父思溫辟地河南之魯山河南亂居民匿窖中亂兵以火熏灼之民多死經母許亦死經以蜜和寒菹汁挾母齒飲之即蘇時經九歲人皆異之金亡徙順天家貧晝則負薪米為養暮則讀書居五年為守帥張柔賈輔所知延為上客二家藏書皆萬卷經博覽無不通往來燕趙閒元好問以其貌類祖而才智越常深器之憲宗二年世祖以皇弟開邸金蓮川召經諮以治道條上數十事大悅遂留王府是時連兵於宋憲宗入蜀命世祖總統東師經從至濶會有得宋國奏議以獻其言謹邊防守衝要凡七

元史卷三十一 列傳

六

道遂下諸將議經曰古之一天下者以德不以力彼今未有敗亡之釁我乃空國而出諸侯窺伺於內小民凋敝於外經見其危未見其利也王不如修德簡賢懷遠飭備以應天心繫人望順時而動世祖以經儒生愕然曰汝與張拔都議邪經對曰經少館張柔家嘗聞其論議此則經臆說耳柔不知也進七道議七千餘言乃以楊惟中為江淮荆湖南北等路宣撫使經副之將歸德軍先至江上宣布恩信納降附惟中欲私還汴經曰我與公同受命南征不聞受命還汴也惟中怒弗聽經率麾下揚旌而南惟中懼謝乃與經俱行經聞憲宗在蜀師久無功進東師議其略曰經聞圖天下事於未然則易救之於已然則難已然之中復有未然者使往者不失而來者得遂是尤難也國家

以一旅之眾奮起朔漠幹斗極以圖天下馬首所向無不摧破西踰蔥嶺南并金夏旋又蹂荊襄克成都平大理躡蹠諸夷奄征四海有天下十八惟宋不下未能混一於是主上親出連兵巴蜀踰二十年何曩時掇取之易而今日圖維之難也夫取天下有可以力并有可以術圖自漢唐以來樹立攻取或五六年未有踰十年者是以其力不敵而卒能保大定功晉之取吳隋之取陳皆經營比仗十有餘年是以其術得成而卒能混一或久或近要之成功各當其可不妄為而已國家建極開統垂五十年而一之以兵遺黎殘姓游氣驚魂度剗剗盪殆欲殲盡自古用兵未有如是之久且多也其力安得不敝乎且括兵索賦朝下令而夕出師躬擐甲胄跋履山川闔國大舉以之伐宋而

元史卷三十一 列傳

七

圖混一以志則銳以力則強以土則大而其術則未盡也苟於諸國既平之後息師撫民勅法立制選賢使能平賦以足用屯農以足食內治既舉外禦亦備而後觀釁以正天伐自東海至於襄鄧聯幟接武以為正兵自漢中至於大理批吭抵胷以為奇兵敵人議守之處多其勢不能兼顧必有情見勢絀者此之不為乃於間歲遠為大舉上下震動兵連禍結頓兵於巴蜀挫銳於堅城是西師之役已然而莫可止者也今又將出東師以圖荆鄂則猶有未然之慮可不議乎國家用兵一以國俗為制而不師古不計師之眾寡地之險易敵之強弱必合圍把稍獵取之若禽獸然聚如丘山散如風雨迅如雷電捷如鷹鵠鞭弭所屬指期約日萬里不忒得兵家之詭道而長於用奇自滄河

兵臨維揚合為長圍示必取而以輕兵出瓜步金山柴墟
河口游騎上下以觀其變三道竝出東西連衡王或處一
軍為之節制使我兵力常有餘裕如是則未來之變或可
弭已然之失或可救也議者必曰三道竝進兵分勢弱不
若併力一向則莫我當也嘗不知取國之術與爭地之術
異併力一向爭地之術也諸道竝進取國之術也晉之取
吳則六道進隋之取陳則九道進宋之於南唐則二面皆
進未間以一旅之眾而能克國者惟金之克汴有之僥倖
之舉也豈有堂堂大國師徒百萬而為僥倖之舉乎況彼
渡江立國百有餘年紀綱修明風俗完厚君臣輯睦內無
禍釁東西南北輪廣萬里自渝盟以來無日不討軍實而
申警之彷彿百折當我強敵未嘗大敗不可謂弱豈可蔑

元史卷三十一 列傳 三

視謂秦無人直欲以一軍倖而取勝乎秦王問王翦以伐
荆翦曰非六十萬不可秦王命李信將二十萬往不克卒
界翦以兵六十萬而後舉楚故王者之舉必萬全其倖舉
者崛起無賴之人也嗚呼以國家全盛之力直前振迅銳
而圖功則當一舉而下金陵舉臨安矣何為西師之出屢
歲而猶未即功乎尤可憂者國家掇取諸國飄忽凌厲本
以力勝今乃無故而為大舉若又措置失宜無以挫英雄
之氣服天下之心則稔惡懷姦之流得以窺其隙而投其
閒國內空虛易為搖蕩臣愚所以諄諄於東師反覆致論
謂不在於已然而在於未然者此也世祖遂會兵渡江圍
鄂州問憲宗崩召諸將屬議經復進言曰易言知進退存
亡而不失其正者其惟聖人乎國家自平金以來惟務進

取不遵養晦老師費財卒無成功三十年矣先皇立政
當安靜以圖寧謐忽無故大舉進而不退昇王東師既聞
凶計即當遣使徧告諸帥各以次退修好於宋歸定大事
不當復進也而遽進既不宣渡淮又豈宣渡江既不宣
進又豈宣攻城若以幾不可失敵不可縱亦既渡江不能
中止便當乘虛取鄂分兵四出直造臨安疾雷不及掩耳
則宋亦可圖如其不可知難而退不失為金兀朮也師不
當進而進江不當渡而渡城不當攻而攻當速退而不退
當速進而不進役成遷延盤桓江渚舉天下兵力不能取
一城我竭彼盈又何利乎且諸軍疾疫已十四五又延引
月日冬春之交疫必大作恐欲還不能彼既上流無虞呂
文德已并兵拒守知我國疵鬪氣自倍兩淮之兵盡集白

元史卷三十一 列傳 三

鷺江西之兵盡集隆興嶺廣之兵盡集長沙閩越沿海巨
舶大艦以次而至伺隙而進如遏截我於江黃津渡邀遮
我於大城關口塞漢東之石門限鄂復之湖濶則我將安
歸且鄂與漢陽分據大別中挾巨浸號為活城肉薄骨并
而拔之彼將委破壁孤城而去泝流而上則入洞庭保荆
襄順流而下則精兵健櫓突過潯黃未易遏也斯亦徒殘
人命我安所得哉區區一城勝之不武不勝則大損威望
復何俟乎雖然以王本心不欲渡江既渡江不欲攻城既
攻城不欲并命不焚廬舍不傷人民不易其衣冠不毀其
墳墓三百里外不使侵掠或勸徑趨臨安則曰其民人稠
夥吾往雖不殺戮亦被踐蹂吾所不忍若天與我不必殺
人若天弗與殺人何益而竟不往諸將歸罪士人謂不可

用以不殺人故不得城則曰彼守城者祇一士人賈制置汝十萬眾不能勝殺人數月不能拔汝輩之罪也豈士人之罪乎蓋禁殺人是則歸然一仁上通於天久有歸志不能遂行耳然今事急不可不斷也宋人方懼大敵自救之師雖則畢集未暇謀我第吾國內空虛塔察國王與李行省肱臂相依在於背脅西域諸胡窺覘關隴隔絕旭烈大王病民諸姦各持兩端觀望所立莫不覬覦神器染指垂涎一有狡焉或啟戎心先人舉事腹背受敵大事去矣且阿里不哥已行赦令脫里赤為斷事官行向書省據燕都按圖籍號令諸道行天子事矣雖大王素有人望且握重兵獨不見金世宗海陵之事乎若彼果決稱受遺詔便正位號下詔中原行赦江上欲歸得乎昨奉命觀新月城

元史卷三十一 列傳

三

自西南隅萬人敵上可竝行大車排槎串樓締構重複必不可攻惟有斷然定計班師銷禍未然先用重兵嚴扼江面脅宋議和索割地定歲幣置輜重以輕騎歸渡淮乘駟直造燕都則從天而下彼之姦謀自寢隨遣一軍迎大行靈輿收皇帝璽遣使召諸王駙馬會喪和林召王子真金鎮燕都示以形勢則大寶有歸而社稷安矣會宋守帥賈似道亦遣間使請和迺班師明年世祖即位以經為翰林侍讀學士佩金虎符充國信使使宋告即位且定和議仍敕沿邊諸將毋鈔掠經入辭賜葡萄酒咨以時政因奏便宜十六事皆立政大要辭多不載時經有重望朝野期以輔政平章王文統忌之故擠諸異國又恐其和議成功陰屬李璫潛師侵宋違約欲假手害經經至濟南璫以書止

之經以璫書聞於朝而行宋敗璫軍於淮安經至宿州遣副使劉仁傑參議高翹請入國日期不報遣書宰相及淮帥李庭芝庭芝復書果疑經而賈似道方以卻敵為功恐經至謀泄竟拘經真州經乃表上宋主有曰願附魯連之義排難解紛豈如唐儉之徒款兵誤國又數上書宋主及宰執極陳戰和利害且請入見及歸國皆不報驛吏棘垣鑰戶晝夜守邏欲以動經經不屈經待下素嚴又久羈困下多怨者居七年從者死數人經獨與六人處別館又九年丞相伯顏奉詔南伐帝遣禮部尚書中都海牙及經弟行樞密院都事郝庸入宋問執行人之罪宋懼遣總管段祐以禮送經歸賈似道之謀既泄尋亦竄死經歸道病帝敕樞密院及尚醫近侍迎勞所過父老瞻望流涕明年夏

元史卷三十一 列傳

三

至闕錫燕大庭咨以政事賞賚有差秋七月卒年五十三官為諡還葬諡文忠明年宋平經為人尚氣節為學務有用及被留思託言垂後撰續後漢書易春秋外傳大極演原古錄通鑑書法玉衡貞觀行人志等書及文集凡數百卷其文豐蔚豪宕善議論詩多奇崛拘宋十六年從者皆通於學書佐苟宗道後官至國子祭酒經未還時汴中氏射鴈金明池得繫帛書詩云霜落風高恣所如歸期回首是春初上林天子援弓繳窮海彙臣有帛書後題曰中統十五年九月一日放鴈獲者勿殺國信大使郝經書於真州忠勇軍營新館是時南北隔絕不知中統已改至元也上得帛書惻然遂進兵南伐二弟彝庸皆有名彝字仲常隱居以壽終庸字季常終穎州守子采麟亦賢起家知

林州仕至山南江北道廉訪使又有月里麻思者於太宗十三年使宋議和執不屈死長沙別見忠義傳又伯顏渡江後遣國信使廉希賢嚴忠範至宋廣德軍獨松關為宋將張濡所殺見本紀太宗時使宋不死而還者有李邦瑞由斡黃入宋境定夾攻金之約舊史有傳今附姓名

元史卷三十一

列傳

五

元史卷三十一 終

元史卷三十二

世祖文臣中

王憚

王憚

王憚

王憚

王憚

王憚

王憚

王憚

王憚

王憚字仲謀衛州汲縣人曾祖經祖字父天鐸俱仕金憚少好學善屬文與東魯王博文渤海王旭齊名史天澤將兵攻宋過衛接以賓禮中統元年左丞姚樞宣撫東平辟為詳議官時省部初建令諸路各上儒吏之能理財者一人憚以選至京上書論時政授中書省詳定官二年春轉翰林修撰同知制誥兼國史院編修官尋兼中書省左右司都事治錢穀擢材能議典禮攷制度咸究所長至元五年拜監察御史論列凡百五十餘章時都水劉晟交結權勢任用頗專昭沒官糧四十餘萬石憚暴其姦利權貴側

元史卷三十二

列傳

一

目最竟以憂卒秩滿陳天祐雷膺交薦於朝九年授平陽路總管府判官初絳之大平縣富民陳氏殺其兄行賂緩獄蔓引逮繫者三百餘人五年不決憚鞠之一訊得實盡出所逮繫者時絳久旱一夕大雨十三年春奉命試士河南十四年除翰林待制拜河南北道按察副使尋遷燕南河北道按部諸郡賊吏多所罷黜十八年拜行御史臺治書侍御史不赴裕宗在東宮憚進承華事略其曰白廣孝立愛端本進學擇術謹習聽政達聰撫軍崇儒親賢去邪納誨幾諫從諫推恩尚儉戒逸知賢審官凡二十篇太子令諸皇孫傳觀其書十九年春改山東西道按察副使在官一年以疾還衛二十二年春以左司郎中召時右丞盧世榮以聚斂進用屢趣之不赴或問其故憚曰力小任大

剝眾利己未聞能全者遠之尙恐見浼况近之乎既而世榮果敗二十六年授福建閩海道按察使黜官吏貪污不法者凡數十人察繫囚之冤滯者決而遣之戒戍兵無得寓民家而劫營屋以居之每謂爲治之本在於得人乃進言於朝宜擇任守令及行省官僚如平章左丞尙缺宜特選清望庶足以鎮靜時行省討劇賊鍾明亮無功憚復條陳利害曰福建歸附之民戶幾百萬黃華一變十去四五今劇賊猖獗又酷於華其可以尋常草竊視之况其地有溪山之險東擊西走出沒難測招之不降攻之不克宜選精兵申明號令專命重臣節制以討討之使彼勢竭力窮庶可取也二十八年召至京師二十九年春見帝於柳林行宮遂上萬言書極陳時政授翰林學士成宗卽位獻守

元史卷三十二 列傳 二

成事鑑十五篇元貞元年知制誥同修國史奉旨纂修世祖實錄因集聖訓六卷上之卒贈翰林學士承旨追封太原郡公諡文定其著述有相鑑五十卷汲郡志十五卷承華事略中堂事記烏臺筆補玉堂嘉話并雜著詩文合爲百卷

王構字肯堂東平人弱冠以詞賦中選爲東平行臺掌書記參政賈居貞延教其子載至京師劉秉忠奏授翰林國史院編修官至元十一年遣丞相伯顏伐宋先下詔讓之命構屬草以進世祖大悅命同李榮從渡江蒐擇儒藝之士明年春至杭收其翰林祕書省天章閣圖籍及太常禮器儀仗歸於朝凡所薦拔皆名士十三年秋還入覲遷應奉翰林文字辭曰臣幼嘗受學李謙今謙猶教授東平寶

不敢先遂以其官授李明年始受之尋遷修撰時阿合馬既敗和禮合孫入相辟構爲司徒府司直更張庶務贊畫居多改太常少卿定親享太廟儀注擢淮東按察副使尋以治書侍御史召桑葛嫉之俾與平章一作忽木檢覈燕南逋負會計簿領訖無所迎合謂卜忽木曰設有罪構當以身任之不以累公也會桑葛伏誅乃免改翰林侍講學士成宗卽位勵精文治年數屢熟海內熙洽構從容二相閒以薦士安靜爲務後數年執政希合生事將檢括增羨行之東南構卒不肯附稱疾納祿歸里大德九年授濟南總管悉除爲民害者丞相荅刺罕咸從之武宗卽位以纂修國史召赴闕拜翰林學士承旨卒構歷事三朝練習臺閣典故凡祖宗諡冊冊文皆所撰定朝廷每有大議必

元史卷三十二 列傳 三

咨訪焉喜薦引寒士前後省臺翰苑所辟無慮數十人後居清要皆有名於時有文集三十卷子士熙士點皆顯達能以文學世其家袁桷狀其行事見清容集

高智耀河西人世事夏國曾祖逸大都督府尹祖良惠右丞相西夏雖僻處河右然用經義教士尊孔子以帝號分建蕃文漢字兩學校設科取士試經義詩賦智耀登本國進士第夏亡隱賀蘭山太宗訪求河西故家子孫之賢者眾以智耀對召見將用之遽辭歸皇子闊端鎮西涼置傳驛役及儒士智耀謁藩邸言河西儒戶前蒙給復今因置傳一旦與編民同役非便請除之皇子從其言欲奏官之不就憲宗卽位智耀入見帝問儒家與陰陽巫醫何如智耀言儒者所學堯舜禹湯文武周孔之道以三綱五常治

天下自古有國家者用之則治不用則否豈方技所得比故養成其材將以資其用惟國家所以教育之帝曰前此未有以是告朕者詔復海內儒士徭役無有所與世祖在潛邸已聞其賢及即位與國師八思巴同召見又力言治天下必用儒術反覆論辯累千百言帝善其對鑄印授之命凡儒戶免役皆給公文為左驗時淮蜀士遭俘虜者皆沒為奴智耀奏言以儒為俘古無有也陛下方以古道為治宜除之以風厲天下帝然其言即拜翰林學士命循行郡縣區別之得釋者數千人貴臣或言其冒濫帝詰之對曰士譬則金也金色有淺深謂之非金則不可士才藝有高下謂之非士亦不可帝悅更寵賚之智耀又言國初庶政草創紀綱未張宜倣前代置御史臺以糾肅官常達聰

元史卷三十二 列傳 四

明日至元五年立御史臺用其議也擢西夏中興等路按察使會西北藩王遣使入朝謂本朝舊俗與漢法異今朝廷畱漢地建都邑城郭儀文制度全用漢法盡舍舊俗非祖宗之舊恐蹈遼金覆轍奈何帝求報聘之使以析其問智耀入見請行帝問所答畫一敷對稱旨即日遣就道未復命卒於上京元初崇儒興學之功智耀為首學校中多祀之者追封寧國公諡文忠子睿年十六授符寶郎出入禁闈恭謹詳雅歷翰林待制禮部侍郎除嘉興路總管擢江東道按察使遷浙西江東道廉訪使皆以除劇盜鋤強豪平冤抑為事晚拜南臺御史中丞務持大體有儒者風卒封寧國公諡貞簡子納麟官至太尉江南諸道行御史臺大夫別有傳

王鶚 高鳴 李治 李昶 徐世隆

王鶚字百一曹州東明人始生有大鳥止於庭鄉先生張大淵曰鶚也是兒其有大名乎因名之幼聰悟日誦千餘言長工詞賦金正大元年中進士第一甲第一授應奉翰林文字改歸德府判官行亳州城父令蔡州汝陽令丁母憂天興二年金主遷蔡詔尚書省移書恆山公武仙進兵金主覽書問誰為之右丞完顏仲德曰前翰林應奉王鶚也曰朕即位時狀元耶召見惜擢用之晚起復授尚書省左右司郎中三年蔡州陷將被殺萬戶張柔救之輦歸館於保州甲辰世祖在藩邸訪求遺逸遣使聘鶚及至召對進講孝經書易及齊家治國之道古今事務之變每夜分乃罷歲餘乞還賜以馬仍命近侍廉希憲闊闊柴禎等從

元史卷三十二 列傳 五

之學闊闊每旦起盛其衣冠鶚讓之曰聖主好賢樂善徵天下士命若從學若等不能稱主上心惟誇衒鮮華以益驕貴之氣恐紛於外而窒於中道義之言無自而入吾所不取也闊闊深自悔悟明日純素以進鶚乃悅闊闊蔑里吉部族後官中統閒中書左丞既而世祖命鶚徙居大都賜宅一所嘗因見請曰天兵克蔡金主自縊其奉御絳山焚葬汝水之旁禮為舊君有服願往葬祭世祖義而許之至則為河水所沒設具牲酒為位而哭私諡曰義宗中統初授翰林學士承旨制誥典章皆所裁定至元元年奏自古帝王得失興廢可攷者以有史在也我國家以神武定四方天戈所臨無不臣服皆出太祖皇帝廟謨雄斷所致若不乘時紀錄竊恐久而遺亡宜置局纂就實錄附修遼

金二史又言唐太宗始定天下置弘文館學士十八人宋太宗承太祖開創之後設內外學士院史冊爛然號稱文治堂堂國朝豈無英才如唐宋者乎於是始立翰林學士院鶚遂薦李治李昶王磐徐世隆高鳴爲學士復奏立十道提舉學校官又取金世宗實錄中行事百八十條名曰大定治績進呈上覽而善之會言事者謂宰執非其人詔儒臣廷議可相者時阿合馬巧佞得幸覬相位諷大臣助之眾莫敢異議鶚奮然擲筆曰朝廷果相此人吾方欲效陽城裂裴延齡白麻況舉薦之乎振袖而起議遂止五年乞致仕詔有司歲廩終其身有大事則遣使就咨之十年卒年八十四謚文康鶚性樂易爲文章不事雕飾著論語集義一卷汝南遺事二卷詩文四十卷曰應物集無子以

元史卷三十二 列傳

六

增周鐸子之綱承其祀之綱官至翰林侍講學士高鳴字雄飛真定人少在金世以文章知名河東元好問上書薦之於金不報憲宗時皇弟旭烈將征西域聞其賢遣使者三輩召之鳴乃起爲王陳西征二十餘策王數稱善薦爲彰德路總管世祖卽位召爲翰林學士兼太常少卿至元五年授侍御史風紀條章多其裁定尋立四道按察司選任名士鳴所薦居多天下初定中書樞密事多壅滯言者請置督事官各二人鳴曰官得人自無滯政臣職在奉憲願舉察之母爲員外置人也七年議立三省鳴上封事曰方今天下大於古而事益繁取決一省猶曰有壅況三省乎且多置官者求免失政也但使賢俊同堂集思廣益自免差繆豈必別官異署而後無失政乎政貴得人

不貴多官不如一省便世祖深然之議遂罷川陝盜起省臣患之請專戮其尤者以止盜鳴諫曰制令天下上死囚必待論報所以重用刑惜民生也今從其請是開天下擅殺之路害仁政實大世祖遽止其令鳴每以敢言被上知嘗入內值大風雨帝謂御史大夫塔察爾曰高學士年老後有大政就問可也賜大官酒肉慰勞之遷吏禮部尙書卒有文集五十卷

李治字仁卿真定欒城人登金進士第調高陵簿未上辟知鈞州事歲壬辰城潰治微服北渡流落忻崞聞聚書環堵凡天文象數名物之學無不研精世祖在潛邸聞其賢遣使召之與論古今人材賢否問今日政治得失及地震災變治對以辨忠佞立紀綱省刑罰慎征討世祖嘉納之

元史卷三十二 列傳

七

晚家元氏買田封龍山下學徒益眾中統至元閒屢以學士召就職期月堅辭還山所著有敬齋文集四十卷壁書叢削十二卷泛說四十卷古今難四十卷測圓鏡海十二卷益古衍段三十卷

李昶字士都東平須城人父世弼從外家受孫復春秋得其宗旨金貞祐初三赴廷試不第推恩授彭城簿志壹鬱不樂遂復求試一夕夢在李彥榜下及第閱計偕之士無之時昶年十六已能爲程文乃更其名曰彥興定二年父子廷試昶果以春秋中第二甲第二人世弼第三甲第三人世弼遂不復仕晚乃就東平教授以卒昶穎悟過人讀書如夙習釋褐授徵仕郎歷溫縣丞改河陰簿再調漕運提舉元兵下河南奉親還鄉里行臺嚴實辟授都事改行

軍萬戶府知事實卒佐其子忠濟居數歲忠濟怠於政事貪佞抵隙而進昶諫曰比年內外裘馬相尚飲宴無度府藏空虛百姓匱乏若猶循習恐或生變惟閣下接正士遠小人去浮華敦樸素損騎從省宴游雖不能救已然之失尚可以弭未然之禍時朝廷裁抑諸侯法制寢密忠濟縱侈自若昶以親老求解職不許俄以父憂去官杜門教授一時名士若李謙馬紹吳衍輩皆出其門世祖伐宋召見問治國用兵之要昶上疏論治國則以用賢立法為要論用兵則以伐罪救民不嗜殺為要明年世祖即位召至開平訪以國事昶知無不言時徵需煩重行中書省科徵稅賦以通戶責之見戶昶移書時相極言其做始調通戶之賦中統二年春阿里不哥平昶上表賀因進諷諫曰患難

元史卷三十二 列傳 八

所以存做戒禍亂將以開聖明伏願日新其德雖休勿休戰勝不矜功成不有和輯宗親撫綏將士增修庶政選用百官儉以足用寬以養民安不忘危治不忘亂恆以北征宵旰之勤永為南面逸豫之戒世祖稱善久之嘗燕處望見昶輒斂容曰李秀才至矣會嚴忠濟罷其弟忠範代之事昶以師禮詔授翰林侍講學士行東平路總管軍民同議言昶條十二事剷除宿敝至元元年謝事家居五年起為吏禮部尚書六年阿合馬用事請老歸七年授南京路總管兼府尹不赴八年授山東西道按察使務持大體不事苛細未幾致仕賜田千畝所著有春秋左氏遺意二十卷孟子權衡遺說五卷

徐世隆字威卿陳州西華人弱冠登金正大四年進士辟

為令其父戒之曰汝年少學未至俟三十學成出仕未晚也世隆遂辭官益篤於學父歿奉母北渡河嚴實招致東平幕府俾掌書記憲宗以為拘權燕京路課稅官世隆固辭壬子世祖在潛邸召見於日月山中統元年擢燕京等路宣撫使世隆以新民善俗為務中書省檄諸路養禁衛馬萬計芻秣什器前期戒備世隆曰國馬牧於北方往年無餉於南者上新臨天下京畿根本地必不為煩擾之事馬將不來遂弗為備馬果不至清滄鹽課前政虧不及額世隆綜覈之得增羨若干三年宣撫司罷世隆還東平請增宮縣大樂文武二舞令舊工教習以備大祀制可除世隆太常卿以掌之兼提舉本路學校事四年世祖問堯舜禹湯文武為君之道世隆取詩書所載帝王事編撰以進

元史卷三十二 列傳 九

帝命翰林承旨安藏譯寫進讀至元元年遷翰林侍講學士朝廷大政咨訪而後行詔命典冊多出其手世隆奏陛下帝中國當行中國事之大者首惟祭祀祭必有廟因以圖上乞赦有司以時興建從之踰年廟成遂迎祖宗神御奉安太室行大饗禮承詔議立三省遂定內外官制上之時朝儀未立奏定百官朝會儀七年遷吏部尚書世隆以銓選無可守之法為撰選曹八議九年出為東昌路總管十四年遷山東按察使時有妖言獄所司逮捕數百人世隆剖析誣誤者十八九悉縱遣之十五年移淮東宋將許瑄家童告瑄匿官庫財有司追繫其妻孥世隆曰瑄所匿者故宋之物豈得與今盜官財者同論邪抗章辯諸行臺卒得釋十七年以翰林學士及集賢學士召皆以疾辭

二十二年安童再入相奏世隆雖老尚可用遣使召之仍以老病辭附奏便宜九事賜田十頃年八十卒世隆儀觀魁昂而慈祥樂易人忤之無愠色喜賓客樂施與明習前代典故尤精律令善決疑獄所著有瀛洲集百卷文集若干卷

王磐

魏初 雷膺 胡祇通 高源 李謙

王磐字文炳廣平永年人世業農歲得麥萬石人號萬石王家父禧金未入財佐軍補進義副尉元兵破永年將屠其城禧復罄家貲助軍眾賴以免金人遷汴乃舉家南渡河居汝之魯山磐年方冠從麻九疇學於郟城客居貧甚日作糜一器畫為朝暮食擢正大四年經義進士第自是大肆力於經史百氏文辭宏放及河南被兵磐避難轉入

元史卷三十二 列傳

十

淮襄間宋荆湖制置使素知名辟為議事官丙申襄陽兵變乃北歸至洛西會楊惟中奉命招集儒士得磐深禮遇之遂寓河內東平總管嚴實興學養士迎磐為師受業者常數百人後多為名士中統元年即拜益都等路宣撫副使頃之以疾免李瓊素重磐以禮延致及瓊謀不軌磐覺之脫身至濟南得驛馬馳去入京師因侍臣以聞世祖即日召見嘉其誠節命從大軍討濟南瓊平遂挈妻子至東平召拜翰林直學士同修國史出為真定順德等路宣慰使衡水縣達魯花赤兀台貪暴不法縣民苦之有趙清者發其罪既具伏矣適初置監司其妻懼法使賊夜殺清滅口清遁免賊乃盡害清父母妻子清訴諸官權要蔽芒兀台不為理又欲反其獄磐竟奏置諸理籍其家貲以半

給清郡有西域大賈稱貸取息有不時償者輒置獄於家拘繫榜掠且恃勢干官府直來坐廳事指揮自若磐大怒叱左右摔下痛箠治之時府治寓城上即投諸城下幾死郡人稱快未幾蝗起真定朝廷遣使者督捕役夫四萬猶以為未足欲牒鄰道助之磐曰四萬夫已多矣何更煩他郡使者怒責磐狀期三日盡捕蝗磐親率役夫走田間設法督捕三日蝗盡滅使者驚為神復入翰林為學士入謁宰相言方今害民之吏轉運司為甚至稅人白骨宜罷去之以蘇民力由是運司遂罷阿合馬諷大臣請合中書尚書兩省為一拜右丞相安童為三公陰欲奪其政柄有詔會議磐言合兩省為一而以右丞相總之實便不然則宜仍舊三公既不預政事則不宜虛設其議遂沮遷太常少

元史卷三十二 列傳

十一

卿時宮闕未建朝儀未立凡遇稱賀臣庶雜沓帳殿前執法者不能禁磐上疏曰按舊制天子宮門不應入而入者謂之闌入闌入之罪由第一門至三門輕重有差宜令宣徽院籍兩省而下百官姓名各依班序聽通事舍人傳呼贊引然後進其越次者殿中司糾察定罰不應入而入者準闌入罪庶朝儀漸可整肅於是儀制始定曲阜孔子廟歷代給民百戶供灑掃復其家至是尚書省括戶盡收為民磐言林廟戶百家歲賦鈔不過六百貫僅比一六品官俸耳聖朝疆宇萬里財賦歲億萬計豈愛一六品官俸不以待孔子哉於府庫所益幾何而損國體甚大時論譴之帝敕縱諸路自死罪以下歸家期秋八月悉來京師聽決囚如期至帝惻然盡原其罪他日命詞臣草詔喻天下以

縱囚之意皆不稱旨獨磐辭爲帝所善曰是皆朕所欲言取酒賜之再乞致仕不允國子祭酒許衡將告歸帝遣近臣問磐磐言師儒之職宜衡所樂居所以力求退者得非生員數少坐糜廩祿有所不安邪宜增益生員使之施教則庶幾人材有成詔從之磐移疾家居帝遣使存問賜以名藥磐數言前代用人二十從政七十致仕所以量其材力養其廉恥也今入仕者不限年而老病者不能退彼既不自知恥朝廷亦不以爲非遂堅乞致仕帝遣使慰諭之曰卿非任煩劇何以辭爲磐不得已復起時方伐宋又將用兵日本磐言今方伐宋當用吾全力庶可一舉取之若復分力東夷恐曠日持久功卒難成俟宋滅徐圖之未晚江南既下磐上疏言宜戢軍士擇官吏明賞罰廣恩信庶

元史卷三十二 列傳

十一

可以安新附而弭寇盜皆見施行朝議汰冗官權臣以按察司不便已欲併省之磐曰各路州郡去京師遙遠官吏侵害小民無所控告惟賴按察司申理此豈冗官而可罷去邪若曰京師有御史臺糾察四方之事是大不然夫御史臺糾察朝廷百官京畿州縣尚有弗及況能周徧外路千百城之事乎若欲併入運司運司專以營利增課爲職豈暇顧細民之冤抑哉由是按察司得不罷朝廷錄平宋功遷至宰相執政者二十餘人因議增更官制磐曰歷代制度有官品有爵號有職位官爵所以示寵榮職位所以委事權臣以爲有功者宜加遷散官或賜五等爵號如漢唐封侯之制不宜任以職位日本之師行有期磐入諫曰日本小夷海道險遠勝之不武不勝則損威臣以爲勿伐

便帝震怒謂非所宜言磐遂以年老累乞骸骨丞相和禮霍孫爲言詔允其請仍給半俸終身皇太子賜宴聖安寺公卿百官出送麗澤門外磐無子命其婿著作郎李穉賓爲東平判官以便養每大臣燕見數問磐起居狀始終眷顧不衰磐資性剛方難進易退每奏對未嘗阿旨帝嘗稱以古直阿合馬方得權致重幣求文於碑磐拒弗與所薦宋衛雷膺魏初徐瑋胡祗適孟祺李謙後皆爲名臣年至九十二卒之夕有大星隕正寢之東追封洛國公諡文忠魏初字大初弘州順聖人從祖璠金進士補尚書省令史金宣宗求直言璠首論將相非人及不當立德陵事疏奏不報後復上言國勢危逼四方未聞有勤王之舉隴右地險食足其帥完顏胡斜虎亦可委仗宜遣人往論大計大

元史卷三十二 列傳

十二

臣不悅而止閱數月胡斜虎兵來援已無及金主悔焉金將武仙軍次五塚山不進求使仙者或薦璠即授翰林修撰給四騎以從至則仙已遁去部曲亦多散亡璠撫循招集得數千人推其中材勇者爲帥長仍制符印與之以矯制自劾金主謂其處置得宜繼聞仙率餘眾保畱山璠直趣仙所宣諭之或譏於仙謂璠欲奪其軍仙怒命士拔刃若欲縱璠然且引一吏與辨璠不爲動大言曰王人雖微序於諸侯之上將軍縱不加禮奈何欲以小吏置對邪且將軍跳山谷而左右無異心者以天子大臣故也苟不知尊天子安知麾下無效尤者吾有死無辱命仙不能屈璠復激使進兵不應比還金主已遷歸德復遷蔡州金亡璠無所歸乃北還鄉里歲庚戌世祖居潛邸聞璠名徵至和

林訪以當世之務瑋條陳便宜三十餘事舉名士六十餘人以對卒諡靖肅初其從孫也瑋無子以初爲後初好讀書尤長春秋爲文簡而有法比冠有聲中統初辟中書省掾史兼掌書記未幾以祖母老辭歸隱居教授會詔許衡寶默各陳經史所載前代帝王嘉言善政選進讀之士有司以初應詔詢知爲瑋後歎獎久之卽授國史院編修官尋拜監察御史首言法者持天下之具御史臺則守法之司也方今法制未定百司無所持循宜參酌攷定頒行天下帝宴羣臣於上都有不能爾大卮者免其冠服初疏諫曰臣聞君猶天也臣猶地也尊卑之禮不可不肅方今內有太常有史官有起居注以議典禮記言動外有高麗安南使者入貢以觀中國之儀昨聞錫宴大臣威儀弗謹非

元史卷三十二 列傳

古

所以尊朝廷正上下也疏入帝諭侍臣自今毋復爲此舉時襄樊未下將括民爲兵或請自大興始初言京師天下之本要在殷盛建邦之初詎宜騷動遂免又言舊制常參官諸州刺史上任三日舉一人自代况風紀之職與常員異請自今監察御史按察司官在任一歲各舉一人自代所舉不當有罰不惟砥礪風節亦可爲國得人遂舉勸農副使劉宣自代屢遷江西按察使尋徵拜侍御史行臺移建康出爲中丞卒子必復集賢侍講學士雷膺字彥正渾源人父淵金監察御史太宗時詔郡國設科選試凡占儒籍者復其家膺年甫弱冠得與選愈自砥礪遂以文學稱丞相史天澤鎮眞定辟萬戶府掌書記世祖卽位初置十路宣撫司詔選耆舊使副子弟爲僚屬授

膺大名路宣撫司員外郎中統二年翰林承旨王鶚王磐薦膺爲翰林修撰同知制誥兼國史院編修官屢遷監察御史首以正君心爲言且斥聚斂之臣不宜作相至元十四年進山南湖北道按察副使是時江南新附諸將市功且利俘獲多強籍新民爲奴隸膺出令禁之得還爲民者以數千計二十年遷行臺侍御史分司湖廣江西奏劾按察使二人及行省官吏之不法者進江南浙西道按察使蘇湖兩漕傷稼膺請廩米二十萬石振之江淮行省以發米太多議存三之一膺竟悉給之乞致仕歸老山陽二十九年徵拜集賢學士成宗卽位朝會上都召諸故老諮詢國政膺爲稱首多所建白卒封馮翊郡公諡文穆

元史卷三十二 列傳

古

員外郎至元初轉右司員外郎尋兼左司時阿合馬當國進用羣小官冗事煩祇通建言省官莫如省吏省吏莫如省事以是忤權奸出爲大原路治中兼提舉本路鐵冶將以歲賦不辦責之及其蒞職乃以取聞改河東山西道按察副使宋平爲荆湖北道宣慰副使有佃民訴其田主謀不軌者祇通察其冤坐告者十九年爲濟寧路總管上八事於樞府言軍政曰役重曰逃戶曰貧難曰正身入役曰僞署文牒曰官吏保結曰有名無實曰合併偏頗樞府是之以其言著爲定法濟寧移治鉅野縣自元初經兵戈其廢已久民居未集風俗樸野祇通選郡子弟擇師教之親爲講論徐變其俗升山東西道按察使所至抑豪右扶寡弱以敦教化厲士風召拜翰林學士不赴乞疾歸二十九

年朝廷徵耆德者十人祇遜為之首不赴卒諡文靖

高源字仲淵晉州人幼力學事父孝補縣吏中統初擢衛輝路知事累升齊河縣尹有遺愛去官十年民猶立碑頌之遷行臺都事僉江南浙西道按察司事劾常州路達魯花赤馬恕奪民田及他不法事恕懼走賂權臣阿合馬以他事誣源既繫獄一日忽釋之莫知所由先時源所居鄰里多阿合馬姻戚素知源事母至孝至是聞源坐非辜悉詣阿合馬曰源孝子也非但我輩知之天必知之況媒孽之罪非實若妄殺源悖天不祥阿合馬感悟得不死尋除河間等路都轉運副使撫治有條竈戶逃者皆復業常賦外羨餘幾十萬緡至元二十四年為江東道勸農營田使二十八年遷都水監開通惠河由文明門東七十里與會

元史卷三十二 列傳

六

通河接置閘七橋十二人蒙其利授同知湖南道宣慰司事卒年七十有七子夢弼良弼公弼

李謙字受益鄆之東阿人少為詞賦有聲與徐世隆孟祺閻復齊名為東平府教授生徒四集累官萬戶府經歷復教授東平時教授無俸郡斂儒戶銀百兩備束脩謙固辭翰林學士王磐以謙名聞召為應奉翰林文字至元十八年遷直學士為太子左諭德侍東宮與贊善夾谷之奇條陳十事曰正心睦親崇儉幾諫戢兵親賢尚友定律正名革敝皇太子薨世祖命傅成宗於潛邸所至以謙自隨轉侍讀學士世祖深加器重嘗賜坐便殿飲羣臣酒願謙曰聞卿不飲能為朕強飲乎賜蒲萄酒一鍾曰此極醉人恐汝不勝即令三近侍扶掖而出二十六年以足疾辭歸三

十一年成宗即位驛召至上都既見勞曰知卿有疾京師多良醫卿當與謀國政餘不以勞卿也授學士元貞初引疾還家大德六年召為翰林承旨至大初仁宗在東宮徵為太子少傅皆力辭仁宗即位召十六人謙居其首乃力疾見帝行在疏言九事其略曰正心術以正百官崇孝治以先天下選賢能以居輔相之位廣視聽以通上下之情恤貧乏以重邦家之本課農桑以豐衣食之源興學校以廣人材之路頒律令使民不犯練士卒居安慮危至於振肅紀綱糾察內外臺憲之官尤當選素著清望深明治體不事苛細者為之帝嘉納焉遷集賢大學士致仕卒於家年七十九謙文章清古不尚浮巧學者稱野齋先生子侃官至大名路總管夾谷之奇女真人至元中除左贊善侍

元史卷三十二 列傳

七

明孝太子於東宮屢有陳誨顧遇甚優為文章簡嚴有法同時又有李衢者潞州長子人以耆德召見東宮侍講經幄啟沃為多至元二十年初立詹事院首命衢為太子賓客有柘山集行世舊皆專傳今併附

鐵哥

愛詳 撒吉思 納答思

鐵哥姓伽乃氏迦葉彌爾國人即古西域罽賓國在蔥嶺西唐時北印度也父幹脫赤與叔父那摩俱學浮屠氏幹脫赤兄弟相謂曰世道擾攘吾國將亡東北有天子氣益往歸之乃偕入見太宗禮遇之定宗師事那摩以幹脫赤佩金符奉使省民瘼憲宗尊那摩為國師授玉印總天下釋教幹脫赤亦貴用事領迦葉彌爾萬戶奏曰臣國在西陲尚未臣服請往諭之詔偕近侍以往其國主不從怒而

殺之帝爲發兵誅國主元貞元年追封代國公諡忠遂幹脫赤之歿鐵哥甫四歲性穎悟不爲嬉戲從那摩入見帝問誰氏子對曰兄幹脫赤子也帝方食雞輟以賜鐵哥鐵哥奉而不食帝問之對曰將以遺母帝奇之加賜一雞世祖卽位至香山永安寺見壁閒畏吾字跡問誰所書僧對曰國師兄子鐵哥所書也帝召見喜其容端語清命從丞相孛羅備宿衛先是憲宗入讒疏世祖國師導世祖益勉敬慎遂感悟友愛如初至是帝將用鐵哥曰吾以酬國師也時鐵哥年十七詔擇貴家女妻之辭曰臣母漢人每欲求漢女爲婦臣不敢傷母心乃爲娶冉氏女久之命掌膳膳湯藥日親密至元十六年鐵哥奏曰武臣佩符古制也今長民者亦佩符請省之以彰武職從之十七年進尙膳

元史卷三十二 列傳

九

監凡御膳御藥必先嘗之又宿衛士可任使者疏其才能以聞詔賜第於大明宮之左以便召使高州人言州境多野獸害稼願捕以充貢鐵哥曰以充貢爲名恐擾民不可內府食用圓米鐵哥奏杭米一石僅得圓米四斗請自今非御用止給常米帝皆善之進司農寺達魯花赤從獵百查爾之地獵人射免試中名駝駝死帝怒命誅之鐵哥曰殺人償畜刑大重帝驚曰誤邪史官必書亟釋之庾人有盜鑿杭米者罪當死鐵哥曰自鞠成人其母病盜杭欲食母耳請貸之故人有盜割駝峰者將戮之鐵哥曰生割駝峰誠忍人也然殺之恐乖陛下仁心詔皆免死二十二年參司農寺宜升爲大司農司秩二品使天下知朝廷重農之意制可二十年從征乃顏手撒爾都之地叛王塔不

台率兵奄至鐵哥奏曰李廣一將耳尙能以疑退敵況萬乘之威乎今彼眾我寡不得地利當設疑以退之於是帝張曲蓋據胡牀鐵哥從容進酒塔不台按兵覘伺懼有伏遂引去帝以金章宗玉帶賜之二十九年進中書平章帝嘗憶北征事不能悉記鐵哥條舉甚詳帝悅以金束帶賜之他日又賜以先帝瑪瑙椀大德三年諸王朝見未有知典故者帝俾鐵哥專其事凡廩餼金帛之數皆遵世祖制詰自後懷諸王之禮悉命鐵哥掌之十年遼王脫脫入朝從者執兵入大明宮鐵哥劾止之王懼謝從幸晉山饑民相望鐵哥輒發廩振之而後自劾帝稱善不已武宗卽位遙授中書右丞相有詔遠王闊闢出謀逆者命誅之鐵哥廷辨其誣得釋徙高麗二年領度支院尋賜江州稻田

元史卷三十二 列傳

九

五千畝仁宗皇慶元年錄軍國重事乃奏世祖子惟寧遠王在宜賜還從之二年奉命詣萬安寺祀世祖感疾歸是年卒贈太師追封秦國公諡忠穆加封延安王改諡忠獻子六人孫八人伯顏中書平章政事餘多居宿衛愛辭者西域拂林人通西域諸部語工星麻醫藥初事定宗直言敢諫世祖在藩邸器之命掌西域星麻醫藥二司事世祖嘗詔都城二月八日大作佛事臨通衢結五采流蘇樓觀集教坊妓樂以法駕儀仗迎導愛辭奏曰高麗新附山東屢叛淮海之孺刁斗達旦瘡痍未瘳糜此無益之費甚無謂也帝嘉納之至元五年從獵保定日且久於上前語供給之民曰得無妨爾耕乎帝卽日罷獵十三年丞相伯顏平江南還阿合馬以飛語譏之愛辭叩頭諫得解

尋奉詔使西域宗王阿魯渾所介丞相博羅以行遇亂使介相失博羅被脅留受其官爵愛辭冒險走間道兩歲始達京師上顧廷臣歎曰博羅生中土食吾祿而安於彼愛辭生彼土家彼土而忠於我相去何遠邪拜平章政事固辭遷翰林學士承旨大德元年授平章政事八年京師地震上弗豫中宮召問卿知天象此災異殆下民所致邪對曰天地示警民何與焉因陳弭災之道請免遷四郊荒冢免徙南城居民實大都請賜宿衛士廬舍禁殺天胎立廣惠司以濟疾苦無告之民語甚剴切成宗崩中使奉內旨索星麻祕文愛辭厲色拒之仁宗時封秦國公卒追封拂林忠獻王子五人皆顯貴

撒吉思者回鶻人其國阿大都督多和思之次子而岳璘

元史卷三十二 列傳

三

之從弟也初為太祖弟幹赤斤大王必闌赤領王傅皇弟薨長子只不干蚤世嫡孫塔察爾幼庶兄脫迭狂恣欲廢嫡自立撒吉思與火魯和孫馳白皇后乃授塔察爾以皇大弟寶襲爵為王撒吉思以功與火魯和孫分治黑山以南撒吉思理之其北火魯和孫理之從憲宗攻釣魚山建言乘勢定江南帝嘉納焉憲宗崩阿里不哥爭立諸王多附之者撒吉思馳見塔察爾王力請推戴世祖塔察爾從之及世祖即位聞其事授北京宣撫賜宮人弘吉刺氏及金帛章服及至鎮鋤奸抑強遼東以寧會高麗有異志帝遣使究治則委罪於其臣洪察忽械送京師道遼東撒吉思訪知洪察忽以直諫逆意即奏直其事帝命釋之從宗王哈必赤討李璫破益都哈必赤欲屠城撒吉思力爭得

止授山東行省都督遷經略統軍二使兼益都路達魯花赤辭不拜上言山東重鎮宜選貴戚臨之帝不許兵後民乏牛具請於上而官給之統軍鈔不花田游無度害稼病民元帥野速答爾據民田為牧地皆奏聞有旨杖之而還其田璫故將毛璋結黨謀執撒吉思以歸宋事覺襲璋斬之慕古人舉親舉讎之義叛帥故卒得與子姓參用山東歲屢歉為請於朝發粟振恤又奏請其田租山東人刻石頌德卒諡襄惠追封雲中郡公孫答里麻別見中葉文臣傳

納答思者畏吾人迦魯氏通天竺教及諸國語世祖時以薦召入朝命與國師講法國師西番人言語文字不通帝命納答思從國師習其義期年皆通以畏吾字譯西天

元史卷三十二 列傳

三

西番經論既成進其書銀版賜諸王大臣西南小國星哈刺的威二十餘種來朝納答思於帝前敷奏其表章諸國驚服朝議與兵討暹羅斛馬巴爾俱藍蘇木都刺諸國納答思奏此皆荒遠島夷不得於國何損益興兵徒殘民命莫若遣使諭以禍福不服而攻未晚也帝納其言命岳刺等往使果來貢者二十餘國至元二十四年丞相桑葛奏為翰林學士帝曰納答思之職非汝所當奏也既而擢翰林學士承旨遣事成宗於潛邸且令以節飲致戒成宗即位思其忠遷大司徒命乘車入殿延祐初卒又有闕里吉思者蒙古人祖父事三朝舊臣由宿衛至雲南行省左丞相又有小雲石脫忽憐者畏兀人歸於太祖事皇子拖雷為斷事官子數人皆貴顯用事又有孟速思者畏兀

人年十五盡通本國文字事太祖爲宿衛又事世祖詔與安童並拜丞相固辭此三人者舊史皆專傳無事蹟今以其皆色目人附姓名於此

瞻思丁 納速刺丁 忽辛

瞻思丁一名烏馬爾回人別庵伯爾之裔其國以別庵伯爾爲聖祖故其子孫世號賽典赤猶華言貴族也太祖西征瞻思丁率千騎以文豹白鶻迎降命入宿衛從征伐以賽典赤呼之而不名太宗卽位授豐淨雲內三州都達魯花赤改太原平陽二路達魯花赤入爲燕京斷事官憲宗伐蜀主饋餉供億世祖卽位立十路宣撫司擢燕京宣撫使中統二年拜中書平章至元元年置陝西四川行中書省出爲平章蒞官三年增戶九千軍二千鈔六千錠屯

元史卷三十二 列傳

三

田糧九萬七千石中書以聞詔賞銀五千兩陝西五路四川行院大小官屬並聽節制七年分鎮四川宋將督萬壽擁強兵守嘉定兩軍對壘一以誠意待之不爲侵掠萬壽心服未幾召還萬壽請置酒爲好左右皆難之瞻思丁竟往不疑酒至左右復言未可飲瞻思丁笑曰若等何見之小邪督將軍能毒我其能盡毒我乎萬壽歎服八年大軍圍襄陽命各道進兵牽制瞻思丁偕鄭鼎率兵水陸並進至嘉定順流縱筏斷其浮橋獲戰艦二十八艘尋命行省事與元專給糧餉十一年帝以雲南委任失宜使遠人不安命瞻思丁往撫治退朝卽訪求知雲南地理者畫其山川城郭驛舍軍屯夷險遠近爲圖以進帝大悅遂拜平章行省雲南賜鈔五十萬緡金寶無算時宗王脫忽

魯方鎮雲南惑於左右之言以瞻思丁至必奪其權具甲兵爲備瞻思丁聞之乃遣其子納速刺丁先至王所請曰天子以雲南守者非人致諸國背叛故命臣來安集之且戒以至境卽加撫循今未敢專願王遣一人來共議王聞遽罵其下曰吾幾爲汝輩所誤明日遣親臣二人至瞻思丁問以何禮見對曰吾等與納速刺丁偕來視猶兄弟也請用子禮見皆以名馬爲贄拜跪甚恭觀者大駭乃設宴陳所賜金寶飲器酒罷盡以與之二人大喜過望明日來謝語之曰二君雖爲宗王親臣未有名爵不可議國事欲各授君行省斷事官以未見王未敢擅授令一人還先稟王王大悅由是政令一聽所爲十二年奏雲南諸夷未附者尚多今擬宣慰司兼行元帥府事並聽行省節制又奏

元史卷三十二 列傳

三

哈刺章雲南壤地均也而州縣皆以萬戶千戶主之宜改置令長並從之十三年以所改雲南郡縣上聞雲南俗無禮儀男女自相配偶親死則火之不爲喪祭無杭稻桑麻子弟不知讀書乃教以拜跪之節婚姻行媒及棺槨奠祭之禮又教民播種爲陂池備水旱勸建孔子廟明倫堂購經史授學田由是教養日興雲南民以貝代錢行鈔不便請許仍其俗又患山路險遠盜賊出沒相地置鎮每鎮設土官百夫長各一人行旅被劫掠則罪之有土吏數輩怨不見用至京師誣其專僭數事帝顧侍臣曰瞻思丁憂國愛民朕洞知之此輩何敢誣告命械送雲南處治瞻思丁脫其械諭之曰若曹不知上以便宜命我故訴我專僭我今不汝罪且命汝以官能竭忠自贖平皆叩頭拜謝誓以

死報交趾叛服不常湖廣省發兵屢征不利贍思丁遣人諭以逆順禍福且約爲兄弟交趾王大喜親至雲南贍思丁郊迎待以賓禮遂乞永爲藩臣蘿槃甸叛往征之有憂色從者問故贍思丁曰吾非憂出征也憂汝曹冒鋒鏑不幸以無辜而死又憂汝曹劫虜平民使不聊生及民叛則又從而征之耳師次蘿槃城三日不降諸將請攻之贍思丁不可遣使以理論之蘿槃主奉命越三日又不降諸將奮請進兵贍思丁又不可俄而將卒有乘城進攻者贍思丁大怒遽鳴金止之召萬戶叱責之曰無主將命而擅攻於軍法云何命左右縛誅之諸將叩首請俟城下日從事蘿槃主聞之曰平章寬仁如此吾拒命不祥乃舉國出降將卒亦釋不誅由是西南諸夷翕然款附夷酋每來見例

元史卷三十二 列傳

五

有獻納悉分賜從官或以給貧民秋毫無所私酋長至勞以酒食賜衣冠襪履易其卉服草屨酋皆感悅鎮雲南六年卒百姓巷哭葬鄯闡北門交趾王遣使者十二人齎經爲文致祭其辭有生我育我慈父慈母之語使者號泣震野帝思其功詔雲南省臣盡守成規不得輒改追封咸陽王諡忠惠子五人納速刺丁其長子也累官雲南路宣慰使都元帥至元十六年遷帥大理以軍抵金齒蒲驃曲臘緬國招安夷寨三百籍戶十二萬有奇定租賦置郵傳立衛兵歸以馴象十二入貢會其父贍思丁歿雲南省臣失撫綏世祖憂之近臣以納速刺丁爲言十七年授雲南行中書省右丞建言三事其一謂雲南省規措所造金蒲費易病民宜罷其一謂雲南行省既兼軍民則元帥府當

罷其一謂雲南官員子弟入質臣謂達官子弟當遺餘宜罷奏可二十一年進平章政事奏減冗官釐屯田課程二十二年以合刺章蒙古軍千人從皇子脫歡征交趾卒封延安王子十二人多至大官而伯顏察爾中書平章追封奉元王諡忠獻

元史卷三十二 列傳

五

忽辛贍思丁仲子也至元初以世臣子備宿衛世祖善其應對十五年出爲河南等路宣慰司同知河南多盜往往羣聚山林劫殺行路官軍收捕失利忽辛遣土豪持檄諭之未幾賊二人自來歸忽辛賜之冠巾且諭之曰汝昔爲賊今既自歸卽良民矣俾侍左右出入房闈有聞悉放還令徧諭其黨數日後招集其爲首者十輩來身長各七尺餘羅拜庭下願視異常眾悉驚怖忽辛命吏籍其姓名爲民俾隨侍左右夜則令臥戶外時呼而飲食之各得其歡心羣盜聞之相繼款附大德四年再改雲南行省右丞既至條具諸不便民事言於宗王請更張之王不可忽辛馳還京師白之詔宗王協力施行由是稅政悉革蒙民規避繇役往往投充王府宿衛忽辛按朝廷元額所無者革去宿衛三之二馬龍州酋謀叛陰通外賊持所受宣敕納賊以示信事覺宗王左右護之忽辛與右丞劉正反覆研鞫盡得反狀竟斬之軍糧支給地里遠近不同吏因緣爲姦忽辛籍其姓名及倉廩處所爲更番支給吏姦始除先是贍思丁建孔子廟於雲南學校撥田五頃供祭祀教養久而田歸僧寺忽辛奪歸之乃復下諸郡邑徧立廟學選教官人文日起王府畜馬敗民禾稼而牧人又宿食民家忽

辛度地置草場構屋數十間使爲牧所始不擾民廣南酋沙奴常梗化忽辛遣使誘致待之以禮畱數月不遣酋請還忽辛置酒宴勞諷令納印入覲帝大悅大德五年緬國主負固不臣忽辛遣人諭之曰我老賽典赤平章子也惟遵先訓凡官府不便汝國事當一切爲汝更之緬國主遂與使者偕來獻白象一帝賜緬國主以世子之號烏蠻等租賦歲徵索不集忽辛以利害榜諭諸蠻不遣一卒而租賦咸足俄有爲飛語及符讖以惑宗王者忽辛引劉正密馳報朝廷遣使按誅妖徒卒封雍國公諡忠簡

宋子貞

何榮福

趙炳

劉肅

宋子貞字周臣潞州長子人也弱冠工詞賦薦試禮部與族兄知柔同補太學生有名人稱大小宋金末潞州亂子

元史卷三十二

列傳

三

貞走趙魏間東平行臺嚴實招爲詳議官兼提舉學校先是實每請事於朝託近侍奏決不經中書因與丞相耶律楚材有違言子貞至勸實奏事必先咨稟丞相自是交權無間太宗四年實戍黃陵金人悉力來攻與戰不利敵勢頗張曹濮以南皆震謗言金兵且大至于貞請斬揚言者以徇境內乃安汴梁既下饑民北徙餓殍盈道子貞多方振救全活萬計拔名士張特立劉肅李昶輩於羈旅與之同列四方士聞風而至故東平一時人材盛於他鎮七年太宗命子貞爲行臺右司郎中中原略定事多草擗行臺所統五十餘城州縣官或擢自將校或起由民伍率昧於從政多措克聚斂子貞請做前代觀察採訪之制命官分三道糾察官吏立程式黜貪情獎廉勤軍府始有紀綱民

得蘇息將校占民爲部曲戶擅其賦役幾四百所子貞力請於寶罷歸州縣實卒子忠濟襲爵尤敬子貞請於朝授參議東平路事兼提舉太常禮樂子貞新廟學延前進士康暉王磐爲教官招生徒習經藝每季親程試之齊魯儒風不變世祖南伐召至濮問以方略對曰國家威有餘而德未洽所以排命者特畏死耳若投降不殺脅從勿治則宋之郡邑可傳檄定也世祖善其言中統元年授益都路宣撫使入覲拜右三部尙書時新立省部典章制度多其裁定李璫叛據濟南詔子貞參議軍前行中書省事子貞單騎至濟南觀璫形勢言於丞相史天澤曰璫擁眾守孤城無能爲也然困獸猶鬪宜增築外城防其奔突糧盡援絕不攻自破議與天澤合遂禽璫還上書陳便宜十事大

元史卷三十二

列傳

七

略謂官爵人主之柄選法宜盡歸吏部律令國之紀綱宜早刊定監司總統一路用非其材不厭人望宜選公廉有才者爲之今州縣官相傳以世非法賦斂民窮無告宜遷轉以革其敝又請建國學教胄子敕州郡提學課試諸生三年一貢舉有旨命中書次第施行至元初授翰林學士參議中書省事奏請班俸祿定職田從之三年二月拜中書平章復陳時務十二策未幾以年老求退帝勉畱之其年十一月懇辭乃得請特敕中書有大事卽其家訪問子貞聞朝廷事有不便必封疏上奏卒年八十一子渤字齊彥有才名官至集賢學士

何榮祖字繼先其先太原人父瑛金貞祐間守鉅鹿尹金亡徙家廣平榮祖狀貌魁偉頰有赤文如雙樹背負隆起

有相者謂曰子位極人臣且壽相也何氏世業吏榮祖尤所通習遂以吏累遷中書省掾擢御史臺都事始折節讀書日記數千言阿合馬方用事置總庫於其家以收四方之利號曰和市監察御史范方等斥其非論甚力阿合馬知榮祖主其謀奏為左右司都事以隸己未幾御史臺復奏除榮祖侍御史又出為山東按察使阿合馬莫逞其志有帖木刺思者以貪墨為僉事李唐卿所劾計無所出適濟南有上告變者唐卿察其妄焚其訟牒帖木刺思乃誣告唐卿縱反者逮繫數十人獄久不決詔榮祖與左丞郝禎參政耿仁傑鞠之榮祖得其情欲抵告者罪禎仁傑議以失口亂言之罪坐之遂杖其人而株連者俱得釋唐卿之誣遂白平涼府言有南人二十餘輩叛歸江南安西行

元史卷三十二 列傳

元

省欲上聞會榮祖來為參政止之曰何必上聞朝廷此輩去者皆人奴耳今聞江南平遁往求其家移文召捕之可也己而逃者俱獲果人奴也治以本罪而付其主其於事明決多類此拜御史中丞復出為山東東西道按察使時宣慰使樂實姚演開膠州海道有制禁戢諸人沮撓糧舶遇暴風多漂沒樂實弗信督諸漕卒償之榜掠慘毒自殺者相繼按察官懼違制莫敢言榮祖即草奏詔免其徵召入為尚書參政時桑葛專政亟於理算錢穀人受其害而畿內民苦尤甚榮祖數請罷之同列曰上既為免諸路惟未及在京可少止勿言也榮祖執愈堅至忤旨不少屈竟不署其牘未踰月而民病皆上聞帝乃思榮祖言召問所宜榮祖請歲終立局攷校人以為便立為常式榮祖條中

外有官規程欲矯時敝桑葛抑不為通榮祖乃以病告桑葛敗改中書右丞奏行所定至元新格又上言國家用度不可不足天下百姓不可不安今理財者弗顧民困言治者弗圖國計且當用之人恆多而得用之人恆少要之省部實為根本必擇材而用之按察司雖監臨一道其職在於除蠹安民苟有弗至則臺省又當遣官體察之庶有實益帝深然之屢以老疾乞解機務不許尋拜昭文館大學士預中書省事又加平章政事以水旱請罷不允先是榮祖奉旨定大德律令至是乃得請於上詔元老大臣聚聽之未及頒行適喪其子遂歸廣平卒年七十九追封趙國公諡文憲榮祖身至大官而儉第以居飲器用青瓷杯中宮聞之賜以上尊及金銀鈔幣俾置器宅以旌其廉所著

元史卷三十二 列傳

元

有大畜十記又有學易記載道集觀物外篇等書趙炳字彥明惠州潯陽人父弘仕元初為征行兵馬都元帥炳幼失怙恃鞠於從兄歲饑往平州就食遇盜欲殺之炳年十二解衣就縛泣請代兄盜驚異舍去以勳閔子侍世祖於潛邸世祖次桓撫間以炳為撫州長己未世祖奉命南伐宋已而憲宗崩蜀阿里不哥黨謀擁立括兵斂財燕薊騷動世祖自鄂北還炳遠返中途具以事聞追所括兵財悉以還民至元九年帝念關中重地風俗強悍思得剛簡舊臣以臨之授炳京兆路總管兼府尹皇子安西王開府於秦詔治宮室悉聽炳裁制王府吏卒橫暴擾民者輒繩以法豪猾斂戢解州鹽賦給王府經費積逋二十餘萬緡有司追理僅獲三之一民已不堪炳密啟王曰十年

之逋責償一日其孰能堪與其夏斂病民孰若惠澤加於民乎王遽命免征會王北伐詔以京兆一年之賦充軍資炳復請曰所徵逋課足佐軍用可貸歲賦以蘇民力令下秦民大悅安西王府冬居京兆夏徙六盤山歲以為常王既北伐六盤守者再構亂炳再平之十五年王薨十六年秋入見便殿帝詢及民間利病炳悉陳之因言王薨之後運使郭琮郎中郭叔雲竊弄威柄恣為不法帝即令乘傳偕敕使往按琮等至則琮假嗣王旨入炳罪收炳及其妻孥囚之平涼北崆峒山炳子仁榮訴於上即詔近侍馳駟而西脫炳且械琮黨偕來琮等醉使者以酒而毒炳平涼獄中其夜星隕有聲如雷時十七年三月也帝聞之撫髀歎曰失我良臣俄械琮等百餘人至帝親鞫問盡伏其辜

元史卷三十二 列傳

三

命仁榮手刃琮叔雲於東城籍其家以付仁榮仁榮曰不其戴天之仇所蓄物皆取於民何忍受之帝稱善別賜鈔二萬二千五百緡為治喪具六月詔雪炳冤特贈中書左丞諡忠愍子六人仁榮仕至中書平章餘俱登顯仕劉肅字才卿威州洛水人金興定二年詞賦進士嘗為尙書省令史與刑部爭盜藏誣服之冤全活十餘人調新蔡令先時縣賦民以牛多寡為差民匿不耕肅至命樹畜繁者不加賦民遂殷富又寬准民竄入宋境之罪繼擢戶部主事金亡依東平嚴實減東平歲賦絲銀外復輸絲絹十萬匹兩之困遷邢州安撫使中統初擢真定宣撫使時中統新鈔行罷鈔銀不用真定以銀鈔交通於外者凡八千餘貫公私囂然莫知所措肅進三策一仍用舊鈔二新舊

兼用三官以新鈔如數易舊鈔中書從其第三策遂降鈔五十萬貫授左三部尙書官曹典憲多所裁定未幾兼商議中書省事致仕嘗集諸家易說曰讀易備忘卒封邢國公諡文獻子憲禮部侍郎孫大名路總管孫賡翰林學士承旨

元史卷三十二 列傳

三

元史卷三十二 終

元史卷三十三

列傳十七下

世祖文臣下

董文用

弟文忠 兄子士選

董文用字彥材功臣董俊之第三子也十歲喪父長兄文炳教之學弱冠試詞賦中選世祖在潛邸命主文書講說帳中已未從伐宋世祖臨江閱戰文炳先突陳文用力請偕行鼓棹直薄南岸諸軍爭奮大敗宋師世祖即位命持詔宣慰邊郡至元初除西夏中興等路郎中始至安集流亡開唐來漢延秦家等渠墾中興西涼甘肅瓜沙諸州之士為水田若干流民復業者戶四五萬時諸王只必鐵木爾鎮永昌其下暴橫需索無算文用輒面折以法王怒召文用使左右雜問文用曰我天子命吏非汝等所當問請

元史卷三十三 列傳

一

得與天子所遣為王傅者辨之王遣傳出文用謂曰我漢人生死不足計所惜者仁慈寬厚如王以重威鎮遠方而其下虐百姓凌官府傷王令名於國體不便因歷指其不法數十事傅驚起入白王王召文用謝曰非郎中言我殆不知由是好猾斂跡十二年丞相安童奏以文用代紇石里為工部侍郎紇石里者阿合馬私人也使鷹監奏曰自紇石里去工部不給鷹食鷹且瘦死帝怒促召治之望見文用入帝曰此豈為爾治鷹食者置不問尋出為衛輝路總管會漕司議通沁水北東合御河以便漕文用曰衛郡地取下大雨時行沁水輒溢出百十里間浸淫及衛今又引之使來豈惟無衛將無大名長蘆矣會朝廷遣使按視還言衛州城中浮圖取高者纒與沁水平勢不可開事遂

寢久之受代歸十九年召為兵部尚書江淮省臣忌廉察官指摘請以行臺隸行省上集朝臣議之文用曰御史臺譬之臥虎虎雖未噬人人猶畏其為虎今虛名僅存紀綱猶不振一旦摧而抑之則風采蕭然無可復望矣昔阿合馬用事商賈賤役多行賄入官及事敗欲盡去其人廷議恐權臣售私恩而朝廷驟斂怨也乃使按察使劾去其不可者然後吏有所憚民有所控訴則是官者國家當飭勵之何反加摧抑也眾從其議轉禮部尚書遷翰林集賢二院學士時中書右丞盧世榮以言利得幸大言曰我立法治財能視歲額倍增而民不擾詔下會議人無敢言者文用問曰此錢取於右丞家邪將取之民邪取於右丞家則不敢知若取諸民則有說矣牧羊者歲嘗兩剪其毛今牧

元史卷三十三 列傳

二

人日剪而獻之主者固悅其得毛之多然羊無以避寒暑將死且盡明歲安所得毛民財有數剝取之亦猶是耳世榮不能對竟以是敗二十二年拜江淮行省參政長官素貴傲同列莫敢仰視跪起稟白如小吏事上官文用至則坐堂上侃侃與論是非可否無所遷就雖數忤之不顧也

有以帝命建佛塔於宋故宮者有司奉行甚急會大雪入山伐木者多僵死文用請寬之長官曰參政奈何格上命文用曰上命不敢格願今日困民力而失民心者豈上意邪其人意沮朝廷將用兵海東文用入奏言疲國家可寶之民力取荒僻無用之小邦非計事遂罷二十五年拜御史中丞文用曰中丞不當理細務宜舉用賢才乃舉胡祇通王暉雷膺荆幼紀許楫孔從道十餘人為按察使徐瑛

魏初爲行臺中丞當時以爲極選時桑葛當國恩寵方盛文用獨不之附桑葛令人風其頌己功文用不答桑葛乃自語之曰百司皆具食於丞相府矣又不答會朔方軍興徵求愈迫文用謂桑葛曰民急矣外寇未除而內戕其根本丞相宜思之因持郡國所上盜賊數示之曰百姓豈不欲生養安樂哉急法暴斂使至此爾御史臺所以救時政之不及丞相當助之不當抑之也御史臺不得行則民無所赴愬而政日亂將不止臺事不行也乃具奏其奸狀詔報文用語密外人不知也桑葛曰譖於帝言其慙傲沮法欲罪之帝曰彼御史職也何罪之有尋遷大司農有欲奪民田爲屯者文用固執不可遷爲翰林學士承旨隆福太后在東宮以文用舊臣奏命授皇孫經文用語講說經義必

元史卷三十三 列傳

王

敷以朝廷故事反覆譬喻皇孫特加敬禮帝命以諸子入見文用曰臣蒙國厚恩死無以報臣之子何能爲命至再三終不以見成宗卽位從幸三不刺之地文用曰先帝新棄天下陛下巡狩不以時還無以慰萬方之望臣聞人君猶北辰然居其所而眾星拱之不在勤遠略也帝悟卽曰還是年詔修世祖實錄除知制誥兼修國史文用於祖宗功德世系近戚將相家世勳績皆記憶貫穿史鈔有所攷究質問文用應答無遺大德元年上章請老官一子鄉郡特養卒年七十四贈少保壽國公諡忠穆

文忠字彥誠文用之季弟也兄弟八人多顯名當世文忠於憲宗二年入侍世祖潛邸王鶚嘗言詩因問文忠能之乎文忠曰吾少讀書惟知入孝於親出忠於君詩非所學

也已未從世祖伐宋與兄文炳文用敗宋師於陽邏堡世祖卽位置符寶局以文忠爲郎居近密嘗呼董八而不名至元二年安童以右丞相入領中書建陳十事多忤旨文忠曰丞相素有賢聲今秉政之始人方傾耳所請不得行後何以爲政乃從旁代對詳切帝始允可八年學士徒單公履欲奏行貢舉知帝於釋氏重教而輕禪乃言儒亦有教有禪科舉類教道學類禪帝怒召姚樞許衡與宰相廷辨文忠自外入帝曰汝日誦四書亦道學者對曰陛下每言士不治經講孔孟之道而好爲詩賦何關修身治國由是海內之士稍知從事實學臣今所誦皆孔孟之言焉知所謂道學而俗儒守亡國餘習欲行其說故以是惑聖聽恐非陛下教人修身治國之意帝怒解十一年伐宋民困

元史卷三十三 列傳

四

供億文忠奏免常歲橫征從之帝嘗問宋降將以宋所由亡皆曰賈似道當國薄武人而重儒士將士怨之故大軍旣至爭解甲歸命帝顧問文忠曰此言何如文忠因詰之曰似道薄汝矣而君則貴汝以官富汝以祿未嘗薄汝也今有怨於相而移於君不肯一戰坐視國亡如臣節何然則似道薄汝者豈非預知汝曹不足恃乎帝深善之有旨徙大都獵戶於郢中文忠奏止之又請罷官鬻田器之稅聽民自爲時多盜詔犯者皆殺無赦文忠言殺人取貨與竊一錢者均死恐乖陛下好生之德敕革之或告漢人毆傷蒙古人及大府監屬盜竊官布帝怒命殺以懲眾文忠言今刑曹慮囚卽罪當死已具服詞者猶必詳讞豈可因一人言遽加重典宜付有司閱實乃遣文忠及近臣分覈

之皆得其誣狀帝因責侍臣曰當朕怒時汝曹皆不敢言非董文忠朕幾戮及無辜矣自阿合馬搆安童以北伐獨擅國柄又懼廉希憲復入爲相害其私計乃奏希憲以右丞行省江陵文忠言希憲國家名臣今宰揆虛位不可久使居外以孤人望遂復召入文忠奏言陛下始以燕王爲中書令樞密使纔一至中書自冊爲太子累使明習軍國之事然十有餘年終謙退不肯視事蓋朝廷處之未盡其道耳夫事已奏決而始啟太子是使臣子而可否君父之命故惟有唯默遜謝而已以臣所知不若令有司先啟而後聞其有未安者則以詔敕斷之庶幾理順而分不踰太子必不敢辭其責矣帝即日召大臣諭行之禮部尙書謝昌元請立門下省封駁制敕以絕中書風曉近習奏請之

元史卷三十三 列傳

五

做廷臣奏以文忠爲侍中時文忠長兄文炳爲中書左丞卒太傅伯顏表文忠可相帝使繼其官文忠辭曰臣兄有平定南方之勞可居是位臣嘗給事居中所宣何力敢冒居重職乎十八年僉樞密院事車駕行幸詔留大都凡宮苑城門直舍環衛營屯禁兵大府少府軍器尙乘諸監皆領焉是冬十月將入朝忽病仆帝遣中使持藥投救不及而卒贈司徒壽國公諡忠貞子士珍官至中書參政孫守簡歷中書左丞 史中丞皆能世其家

士選字舜卿文用文忠之從子文炳次子也幼從父居兵閒晝治武事夜讀書不輟焦山之戰丞相伯顏臨陳觀之壯其驍勇遣人問之始知爲文炳子又招降海寇張瑄奏功爲管軍總管宋平從文炳入臨安收宋文書圖籍封庫

藏秋毫無所取班師授前衛指揮使以讓其弟士秀改命僉行樞密院於湖廣宗王乃顏叛帝親征召士選與李庭同將漢軍禦之飛矢及乘輿士選等將步卒橫出擊敗其眾尋以中書左丞與平章徹里鎮浙西聽辟舉僚屬至部察病民事悉除之桑葛之黨爲奸利於江浙者事發得罪且死詐言所遺船舶商海外未至請留以待之冀緩其死士選曰海商至則捕戮之不至則無如之何不係斯人之存亡也不誅斯人無以謝天下遂竟其罪浙多湖泊廣蓄泄以備水旱率爲豪民占以種菰水無所居積故數有水旱士選與徹里力開復之成宗初拜江西行省左丞贛州盜劉六十聚眾萬餘僞立名號朝廷遣兵討之主將觀望退縮不肯戰守吏又因以擾良民賊勢轉盛士選請自往即日就道不求益兵但攜掾史李霆鎮元明善二人持文書以去眾莫測其所爲至贛境捕官吏害民者治之民相告語曰不知有官法如此進至興國縣去賊巢不百里命擇將校分兵守地待命察知激亂之人悉寘於法復誅奸民之爲囊橐者於是民爭出請自效不數日遂禽賊魁散餘眾歸農軍中獲賊所爲文書具載旁近郡縣富人姓名霆鎮明善請焚之民心益安遣使以事平報於朝中書平章不忽木召其使謂之曰董公上功簿邪使者曰某且行左丞授之言曰朝廷若以軍功爲問但言鎮撫無狀得免罪幸甚何功之可言因出其書但請黜賊吏數人而已不言破賊事廷議深歎其知體而不伐拜南臺御史中丞入僉樞密院事俄拜御史中丞時丞相完澤用劉深言征八百

元史卷三十三 列傳

六

媳婦國完澤說帝稱江南盡世祖所取陛下不與此役無功可見於後世帝入其言用兵意甚堅無敢諫者士選率同列言之奏事殿中畢同列皆起士選乃獨言今劉深出師以有用之民而取無用之地就令當取亦必遣使諭之諭之不從然後聚糧選兵視時而動豈得輕用一人妄言而致百萬生靈於死地帝色變士選猶明辨不止侍從皆爲之戰慄帝曰事已成卿勿復言士選曰以言受罪臣職所當他日以不言罪臣死何益帝麾之起左右擁之出未數月帝聞師敗績慨然曰董二哥之言驗矣朕甚愧之因賜上尊以旌直言始罷兵誅劉深久之出爲江浙行省右丞遷河南平章又遷陝西士選平生以忠義自許尤號廉介自門生部曲無敢持一毫獻者治家甚嚴而孝弟尤

元史卷三十三 列傳

七

篤時言世家有禮法者必歸之董氏其禮敬賢士尤至在江西以屬掾元明善爲賓友既又得吳澄而師之延虞汲於家塾以教諸子諸老儒及西蜀遺士皆以書院之祿起之使以所學教授遷南行臺又招汲子集與俱後又得范梈數人皆以文學大顯於時故世稱求賢薦士亦必以董氏爲首晚年好讀易澹然終其身每一之官必賣先業田廬爲行資故老而益貧子孫不異布衣之士仕者往往稱廉吏云子守忠雲南行省參政守愨侍正府判官守思知威州○原稟董俊傳末云子文忠及孫士選守簡見用文忠士選傳惟守簡僅見宰相年表

賀仁傑

賀仁傑字寬甫京兆鄠人父賁有材略數從軍有功關中

兵後積屍滿野賈買地金天門外爲大家收瘞之嘗治室於毀垣中得白金七千五百兩謂其妻曰匹夫無故獲千金必有非常之禍時世祖以皇太弟受詔征雲南駐六盤山乃持五千兩往獻請以犒軍世祖曰天以賜汝焉用獻對曰大王新封秦金出秦地此天以授大王臣不敢私願以助軍且言其子仁傑可用狀卽召入宿衛其軍帥怒責不先白己而專獻金下賈獄世祖大怒執軍帥將殺之以勳舊而止世祖卽位賜賈金符總管京兆諸軍奧魯卒追封雍國公諡貞惠仁傑從世祖南征雲南北征乃顏皆著勞績後與董文忠居中用事至元十三年宋平惟川蜀久不下四川制置使張珪守重慶合州安撫使王立守釣魚山相拒二十餘年詔建東西行樞密院督兵進伐合丹關

元史卷三十三 列傳

八

里吉思領東院攻釣魚山不花李德輝領西院攻重慶會王立約降於西院李德輝遂從五百騎至釣魚山受立降東院忌德輝越境邀功遂奏誅立樞密院從之適西院從事呂盛至都以兵事告許衡許衡告仁傑仁傑言於帝帝召樞密臣責之曰汝等以人命爲戲邪今召王立立生則已死則汝等亦從之立至賜金虎符仍以爲合州安撫使帝一日召仁傑至榻前出白金謂之曰此汝父六盤所獻者聞汝母來可持以歸養辭不許乃歸白母盡散之宗族帝欲選民間童女充後宮及有司買物多非其土產山後鹽禁久爲民害仁傑皆奏罷之民爲立祠十七年上都留守缺宰相擬廷臣以十數皆不納帝顧仁傑曰無以易卿者特授上都留守兼開平府尹明年賜三珠虎符兼虎賁

親軍都指揮使尋加中書右丞留守如故尚書省立桑葛用事奏上都留守司錢穀多失實召留守忽刺爾及仁傑廷辨仁傑曰臣漢人不能禁吏戢姦致錢穀耗傷臣之罪忽刺爾曰臣為長印在臣手事未有不關白而能行者臣之罪帝曰以爵讓入者有之未有爭引咎歸己者置勿問仁傑在官五十餘年為留守者居半車駕春秋行幸出入供億未嘗致上忤其妻劉歿帝欲為娶貴族固辭乃娶民間女已而喪明夫妻相敬如初未嘗置媵妾大德九年七十二請老拜平章政事賜白金楮幣錦袍玉帶歸第以子勝襲上都留守後成宗崩仁宗入靖內難念世祖舊臣欲有所咨訪召赴闕行至樊橋而卒追封雍國公諡忠貞勝字貞卿以小字伯顏行世祖時大臣子弟在宿衛者必

元史卷三十三 列傳 九

使通經術故勝年十六即與安童完澤從許衡學通經傳大義凝重寡言世祖甚器之出則參乘入侍帷幄大臣有密奏輒屏左右獨留勝許聽之至元二十四年遼東宗王乃顏叛帝親征勝直武帳中雖親王不得輒至勝傳旨出入指授諸將詰旦合戰矢交帳前立侍不動乃顏既敗帝還都乘輿夜行足苦寒勝解衣以身溫之帝一日獵還勝參乘伶人蒙采叢作師子舞以迎駕與象驚奔逸不可制勝投身當象前後至者斷鞣縱象乘輿乃安勝退創甚帝親撫之遣尚醫尚食視護三月乃愈是時疆宇廣闊四方有警遽聞者上欲亟賜報勝方少壯能晝夜馳千里又上所親信受命無留行復命無後期所區畫動合意旨或朝至而夕復出不以為憚也故六詔西域交廣十數萬里之

區無不至焉海內甫定帝嚴畏天象以自警司天有奏得非時以聞因拜勝集賢學士領太史院事服一品服盧世榮桑葛秉政怒勝父仁傑留守上都不下已欲陰撼之旬月數十奏帝不為動至元二十八年桑葛敗罷尚書省政歸中書帝問誰可相者勝對曰命相國之大事臣不敢知然人望公論皆屬詹事完澤遂相完澤而并以勝參知中書政事時年二十有八爾三十年僉樞密院事遷大都護大德九年勝父仁傑請老以勝代為上都留守兼開平府尹親軍都指揮使上都地寒無土著之戶自粟帛器用財賄凡宮庭供用萬端皆賴商賈賈遷吏或強取不時予直勝力矯恤之故市肆盛侔京師其權貴子弟奴隸橫縱者悉奏繩以法至大三年進左丞相行上都留守如故時丞

元史卷三十三 列傳 十

相鐵木迭爾專政倚太后為庇很盱日甚勝自以老臣不敢愛身欲為國家去蠹會鐵木迭爾受富民賕六萬緡變殺人之獄勝乃與平章政事蕭拜住御史中丞楊多爾只及監察御史等先後奏白其事逮治其左右得所賂事實以聞帝震怒欲誅之鐵木迭爾走匿太后宮中太后為言僅奪其印綬及仁宗崩英宗在諒闇中鐵木迭爾復得為相遂傳太后旨執楊多爾只及蕭拜住同日戮於市且復誣勝乘賜車迎詔不敬并殺之勝死之日百姓爭持紙錢哭屍傍甚哀泰定初詔雪其冤追封秦國公諡忠愍至正三年追封涇陽王改諡忠宣子二人惟一中書左丞相至順三年詔學士虞集碑其神道

賈居貞 張孔孫 多爾赤 千魯

賈居貞字仲明真定獲鹿人甫冠爲行臺從事時法制未立賄賂公行有餽黃金者居貞卻之太宗聞而嘉歎敕有司月給白金百兩以旌其廉世祖在潛邸知其賢召用之俾監築上都城世祖卽位中統元年授中書左右司郎中從帝北征每陳說資治通鑑雖在軍中未嘗廢書劉秉忠奏擢居貞爲參知政事辭曰他日必有由耶官援例求執政者將何以處之不拜至元元年參議中書省事詔與左丞姚樞行省河東山西罷侯置守五年再爲中書郎中時阿合馬擅權忌之改給事中同丞相史天澤等纂修國史十一年丞相伯顏伐宋居貞以宣撫使議行省事既渡江下鄂漢伯顏以大軍東下畱左丞阿里海牙與居貞分省鎮之居貞曰江陵要地乃宋制閩重兵所屯聞彼諸將不

元史卷三十三 列傳

十一

睦民徙盈城疾疫不時樵采不便不乘隙先取之恐春水漲彼乘上流而下則鄂危矣驛聞十二年春命阿里海牙領兵取江陵居貞以僉行省事畱鄂於是發倉廩振流亡不變其服而行其楮幣未下州郡商旅畱滯者給引歸之免括商稅弛湖荻禁造舟百數艘駕以水軍一方帖然婁安邦以信陽來歸遣入覲裨將陳思聰乘間屠其家居貞計召思聰誅之宋二王逃閩廣所在扇惑斬州寇起司空山屬縣響應居貞檄諭禍福漢其黨壓以官軍遂削平之初遣鄭萬戶討賊鄭言鄂大姓皆通賊請先除之居貞保其無他鄭乃領兵出而密諭其部將俟還軍時內外合發盡殺城中大姓意在子女金幣也會其人戰敗溺死其事始彰十四年拜湖北宣慰使十五年遷江西行省參政未

至民爭千里迎訴時逮捕民間受宋二王文帖者坐繫巨室三百餘居貞悉釋之兵有誣脅民財者奴妾人子女者皆痛繩以法南安李梓發作亂居貞慮將士擾民親帥千人營城北招諭之其下皆散賊首自焚死比還不戮一人杜萬一亂都昌居貞調兵禽之有告通賊巨室姓名百數命火其牒十七年朝廷再征日本造戰艦江南居貞極言民困請罷其事未報卒追封定國公子鈞中書參政張孔孫字夢符其先出遼之烏若部爲金人所并遂遷隆安父之純爲東平萬戶府參議孔孫少以文學名辟萬戶府議事官嚴忠範之兄爲陝西行省平章聘孔孫以母老不應時汴梁旣下太常樂師流寓東平舊章缺落止存登歌一章世祖居潛邸嘗召樂師至日月山觀之至是徐世

元史卷三十三 列傳

十二

隆奏宜增設宮縣及文武二舞以備大典因詔徐世隆爲大常卿而孔孫以奉禮郎爲之副以董樂師肆成獻之京師廉希憲居政府辟爲掾及安童爲相尤禮重之出爲南京總管府判官時方議下襄樊朝廷急用兵孔孫謂方今境私販坐罪者以千數宜開自新之條俾得効戰贖死朝論采之遷湖北道按察副使行部巴陵有囚三百人因怒冀乙建言興銀利發其墳墓而火其家焚死者二人有司以眞圖財殺人坐之孔孫原其情減罪至元二十二年安童復入相言於帝曰阿合馬顯政十年親故迎合者往往驟進據顯位獨劉宣張孔孫二人靜守故常終始如一乃除劉宣吏部尙書升孔孫禮部尙書擢燕南廉訪使除大名路總管兼府尹大興學校有獻故河堤三百餘里於

太后者即上章謂宜悉還細民從之召拜集賢大學士商議中書省事丞相完澤卒孔孫與陳天祥上封事薦和禮霍孫可為相會地震詔問弭災之道孔孫條對八事其略曰蠻夷遠國不可窮兵濫官放謹不可復任賞善罰惡不可數赦獻鬻寶貨不可不禁供佛無益不可虛糜上下豪侈不可不儉官冗吏繁不可不裁太廟神主不可不享帝悉嘉納賜鈔五千貫又累疏言凡七十致仕者宜加一官丁憂服闋者宜待起復宿衛之冒濫者必當革州郡之職必當遴選久任達魯花赤宜量加遷轉又宜增給官吏俸祿修建京師廟學設國子生徒給賜曲阜孔廟灑掃戶相位宜參用儒臣不可專任文吏故相安童伯顏和禮霍孫與廉希憲等各宜贈諡久之請老還家拜翰林學士承旨

元史卷三十三 列傳

圭

致仕大德十一年卒年七十有五孔孫素以文章名且善琴工畫山水竹石而騎射尤精及其立朝讜言嘉論有可觀者士論服之

多爾赤

舊作朱兒赤

字道明西夏靈州人父幹札篋世掌其國

史初守西涼率父老以城降太祖命為中興路管民官元兵西征運餉不絕無毫髮私時號曰滿朝清世祖初年卒遺奏請謹名爵節財用多爾赤年十五通古注論語孟子尚書帝以西夏子弟多俊逸欲試用之召見於香閣問曰爾儒者有何嘉言多爾赤奏曰陛下聖明仁智奄有四海惟當親君子遠小人爾自古帝王未有不以小人而亡者惟陛下察焉帝曰要言不煩汝知治道矣因問欲何仕多爾赤對曰西夏營田實占正軍倘有調用則又妨耕作土

瘠野曠十未墾一南軍屯聚以來子弟蕃息稍眾若以其成丁者別編入籍以實屯力則地利多而兵有餘請為其總管以益措畫帝可之乃授中興路新民總管至官錄其子弟之壯者墾田塞黃河九口開其三流凡三載賦額增倍就轉營田使秩滿入覲帝大悅遷潼川府尹時公府無祿田多爾赤乃以官曠地給民視秩分畝而薄其稅潼川仕者有祿自此始未幾臺臣奏為雲南廉訪副使會行省丞相鐵木迭爾貪暴擅誅殺羅織安撫使法花魯丁將置極刑多爾赤謂之曰生殺之柄繫於天子小民罹法且必審覆況朝廷之臣邪法花魯丁竟獲免尋復其官熨夷與蠻相讐殺省臣受賄助其報仇乃詐奏蠻叛起兵殺良民多爾赤劾罷之年六十二卒於官

元史卷三十三 列傳

西

千魯魯一作奴玉耳別里伯牙吾台氏曾祖哈刺察率所部歸太祖祖忽都思從皇弟拖雷攻金軍於鈞州三峰山賜號拔都魯從攻宋唐鄧穎蔡襄陽鄧復信陽光等州屢立戰功從攻漢上鐵城寨歿於軍封沈國公諡武愍父和尚從攻鄂州討李璫攻襄陽皆有功又從丞相伯顏渡江攻拔岳州取沙市至江陵宋安撫使高達城守拒戰和尚直抵城下諭以禍福達遂開門出降從下潭州潭守臣李希堅下至元十三年城破希死諸將利於虜掠阿里海擢嶺南身屠其城舊史謂從和尚之言而全一城者誣也擢嶺南廣西道按察使遷江南浙西道按察使卒於官追封沈國公諡莊肅千魯以御史大夫月魯那延薦入見大安閣世祖念其功臣子即授父官拜江南浙西道按察使時江浙行省行御史臺皆治杭千魯上言行省專控江浙在杭為

宜行臺總鎮江南不宜偏在杭且兩大府竝立勢偏則事
室情通則威藝益移行臺於要便之所後數年遂移行臺
江東二十六年遷淮西江北道按察使時桑葛擅權勢焰
熏灼人莫敢言千魯乘閒入朝見帝於柳林極陳其罪狀
未幾桑葛伏誅又上言其黨猶布中外宜早處分有諸王
牧馬草地與民田相間互相侵冒有司視強弱爲子奪連
歲爭訟不決乃命千魯治之其訟遂息大德二年奉詔使
淮東西問民疾苦察官吏能否還奏軍民便宜三十事多
切利害歷江西湖東江南湖北兩道廉訪使時中書平章
巴顏等植黨散法壞憲綱蠹吏治千魯摭奏黜之前後七
持憲節剛正不撓聞朝廷事有不便必上章極論未嘗以
內外爲嫌七年授大都路總管兼大興府尹馭吏民有法

元史卷三十三 列傳

五

以暇日正街衢表里巷興國學同僉樞密院事上疏言蒙
古軍在山東河南者往戍甘肅跋涉萬里自辦裝囊鞍馬
往往鬻田產質妻子戍者未歸代者當發前後困苦日甚
請以近甘肅之兵戍之而山東河南前戍者官爲出錢贖
其田產妻子以卹民隱詔從之未幾遷參議中書省事贊
決機務精練明敏凡干祿躁進者一切不用時論翕然拜
平章政事商議樞密院事延祐五年乞致仕退居濮上築
先聖宴居祠堂於歷山下聚書萬卷延名師教其鄉里子
弟出私田百畝贖之有司以問賜額歷山書院家居七年
卒封衛國公諡景憲

附其父和尙傳
今改以父附子

耶先不花

劉漢卿

耶先不花蒙古怯烈氏祖曰昔刺幹忽勒方太祖徵時率

部屬來歸太祖以其舊好也命爲必闡赤長朝會燕饗皆
居上列其子孛魯歡事憲宗爲右丞相遂專國政賜眞定
之束鹿爲其食邑至元初以阿里不哥黨誅有子四人長
耶先不花初世其職爲必闡赤長世祖使傅皇太子眞金
於燕邸且謂皇太子曰此吾舊臣子孫端方明信閑習典
故爾每事問之必不使爾爲不善也二十三年拜雲南諸
路行省平章討平諸種夷之變遂立登雲等路府州縣
六十餘所得戶二十餘萬官其酋長定其貢稅邊境以寧
大德二年遷湖廣行省平章爲政不怒而威不察而明大
事集議徐決一言切中事理會汴梁行省有妖獄飛語連
湖廣平章劉國傑右丞燕柎朝廷驛召二人入二人與耶
先不花皆有違言耶先不花急遣使附奏明其無他二人

元史卷三十三 列傳

六

皆得釋八年遷河南行省平章河決落黎堤勢甚危督有
司先士卒以備之汴以無患進拜湖廣行省左丞相卒追
封恆陽王諡文貞子五人長曰亦憐眞官至湖南等處行
省左丞相卒封武昌王諡忠定次日圖魯歷事四朝官至
中書右丞相御史大夫太傅錄軍國重事卒封廣陽王三
日答思仕至湖南宣慰使四日怯烈仕至中政使五日按
攤事成宗襲長宿衛有旨給七乘傳使往事其父耶先不
花於湖廣諸道憲司以按攤孝行聞拜海北海南道宣慰
使都元帥海康與安南占城諸夷接境海島生黎叛服不
常按攤服以威德生黎二十餘洞皆願輸貢稅在鎮期年
以省親辭去至大二年拜中書右丞行浙東道宣慰使司
都元帥未幾奔父喪於武昌以哀毀致疾卒追封趙國公

中書左丞相諡貞孝子阿榮由宿衛起家湖南道宣慰副使歷拜奎章閣大學士別見文苑傳

劉漢卿合魯氏父鐵邁赤善騎射初事忽魯皇后帳前為桐馬官從太祖定西夏從皇子闊出定河南又從世祖攻鄂渚將練卒千人鐵騎三千迎兀良合台於岳州轉戰屢有功子八人漢卿其仲也漢卿本名虎都鐵木祿仁宗稱其字而不名又以其母劉姓故稱之曰劉漢卿云至元十一年從丞相伯顏渡江既取宋遺視宋故宮室護帟藏諭下明越等州授荆湖占城等處行省理問官一日以軍事入奏敷陳明辨世祖太悅令侍左右平章政事程鵬飛建議征日本奏漢卿為征東省郎中既而征東省罷丞相阿里海牙奏留襄湖廣行省機密事二十二年從皇子鎮南

元史卷三十三 列傳

七

王征交趾比還鄂時權臣方擅威福遂退處於家二十八年哈刺合孫拜湖廣行省平章以漢卿知方面之務驛召至武昌使奏事京師擢給事中既而湖廣行省平章劉國傑奏伐交趾以漢卿督造戰船五百於廣東帝崩遷湖南宣慰副使招撫洞酋岑雄之叛拜禮部尚書會覈實江南民田漢卿奉詔使江西以田額舊定重擾民不便置不問止奏茶漕置局十有七所以七品印章教授局官五十一員增中統課緡五十萬轉兵部尚書延祐三年大臣以浙東倭奴商舶貿易致亂奏遣漢卿宣慰浙閩撫戢兵民海陸為之靜謐云從子塔海歷事世祖成宗至大中除汴梁總管時朝廷令民自實田土有司強民虛報以塞命及後差稅無出民多逃竄塔海言其敝於朝省民間虛糧二十

二萬改任廬州時有飛蝗北來塔海禱於天蝗乃引去亦有墮水死者天祿初充樞密院守潼關及河中府未幾西兵犯南陽督諸衛兵拒之首率勇士摧其前鋒奪其旗鼓西軍敗走賜三珠虎符進大都督舊附其父鐵邁赤傳今以漢卿立傳而其父及兄子塔海附

張德輝 馬亨

張德輝字耀卿冀寧交城人少力學數舉於鄉金貞祐開試掾御史臺金亡北渡史天澤開府真定辟為經歷官歲乙未從天澤南征籌畫調發多出德輝天澤將誅逃兵德輝救止配令穴城光州華山農民為寨自固官兵議攻之德輝請招降全活甚眾歲丁未世祖在潛邸召見問曰孔子歿已久今其性安在對曰聖人與天地終始無往不在

元史卷三十三 列傳

八

大王能行聖人之道性即在是矣又問或云遼以釋廢金以儒亡有諸對曰遼事臣未周知金季乃所親睹宰執中雖用一二儒臣餘皆武弁世爵及論軍國大事又不使儒臣預聞大抵以儒進者三十一國之存亡自有親貴任其責儒臣何咎焉世祖然之又問祖宗法度具在而未盡設施者何德輝指銀槃喻曰勦業之主如制此器精選白金良匠規而成之欲付後人傳無窮則必求謹厚者司掌之否則不惟缺壞亦恐有竊而去之者矣法猶器也行法在人世祖稱善良久又訪中國人材德輝舉魏璠元好問李冶等二十餘人又問典兵與宰民者為害孰甚對曰軍無紀律縱使殘暴害固非輕若宰民者頭會箕歛以毒天下使如蹈水火為害尤甚莫若更遣宗室之賢如叩溫不

花者使掌兵權勳舊如忽都虎者使主民政庶天下均受其賜是年夏德輝得告將還更薦白文舉鄭顯之趙元德李造之高鳴李榮李濤數人陛辭又陳先務七事敦孝友擇人材察下情貴兼聽親君子信賞罰節財用世祖字之而不名命教胥子孛羅等王子德輝北觀與廷臣請世祖爲儒教大宗師世祖悅受之因啟累朝有旨調備戶兵賦乞令有司遵行從之仍命提調真定學校世祖卽位起爲河東南北路宣撫使下車擊豪強黜賊吏均賦役耆耄不遠數千里來見曰六十年不復見此太平官府矣西川帥紐璘重取兵千餘人守吏畏其威莫敢申理隸鳳翔屯田者八百餘人屯罷兵不歸籍會僉防戍兵河中浮梁故有守卒不以充數悉條奏之帝可其請二年放績爲十路取

元史卷三十三 列傳

九

陛見帝勞之命疏所急務條四事一曰嚴保舉以取人材二曰給祿俸以養廉能三曰易世官而遷都邑四曰正刑罰而勿屢赦帝嘉納焉遷東平路宣慰使東平賦夥獄繁視河東倍徒窮治賊奸奏免遠輸豆粟二十萬斛和糶粟十萬斛寶合丁議賦蠶絲令民稅而後輸德輝曰是誣上以毒下也且後期之責孰任之遂罷其事至元三年秋參議中書省事有言沿邊將校冒代軍士虛糜廩幣者救按之奏曰在昔將校備嘗艱阻與士卒同甘苦今年少子弟襲爵或以微勞進用豈知軍旅之事乎痛繩之則人不自安第易其部署選才略者任之又時委司憲者體究之庶革其敝又命德輝議御史臺條例奏曰御史執法官今法令未明何據而行此事行之不易必欲行之乞立宗正府

以正皇族外戚得以糾彈女謁母令奏事諸局承應人皆得究治帝從之德輝請老命舉任風憲者疏烏古倫貞等二十人以聞初河東歉請於朝發常平貸之并減其秋租有差賦役不均官吏竝緣爲姦賦一征十不勝其困民率流亡德輝閱實戶編均其等第出納有法數十年做一旦革去德輝天資剛直博學有經濟器毅然不可犯與元好問李治游封龍山時人號爲龍山三老云卒年八十馬亨字大用邢州南和人世業農以資雄鄉里亨少孤事母孝金季習爲吏河北東西路稅課使王晉辟爲掾旋薦於中書令耶律楚材擢轉運司副使庚戌太保劉秉忠薦亨於世祖召見潛邸甚器之旣而籍諸路戶口以亨副八春芒哥撫諭西京太原平陽及陝西五路俾民弗擾旣還

元史卷三十三 列傳

十

圖山川形勢以獻餘使者多以賄敗惟亨等各賜衣九襲癸丑世祖征雲南留亨爲京兆樵課所長官京兆潘邸分地也亨以寬簡治之不事措克民安課裕憲宗遣阿藍荅等覈藩府錢穀阿藍荅以事怒亨使逮之王府世祖欲不遣亨固請行乃慰遣之亨至卽被拘繫窮治白晝竟無所得惟以支竹課分例錢充公用及做公解輦運價爲不應勒償其直而已世祖知其誣更加賜焉己未從世祖攻鄂州泊北還阿藍荅等叛亨與宣撫使廉希憲商挺合謀誅劉太平等悉定關輔命亨兼陝西行省左右司郎中時興元蓄糧五萬石欲轉餉太安軍計備值萬緡眾推亨往至則以兵官丁產均其役不閱月而事集中統四年遷陝西五路西蜀四川廉訪都轉運使未幾召入爲工部侍郎上

便立六事一曰東宮保傅當用正人以固國本二曰中書大政擇任儒臣以立朝綱三曰任相惟賢官不必備今宰相至十七員宜加裁汰四曰左右郎署毗贊大政今用豪貴子弟豈能贊襄五曰六曹之職分理萬幾今止設左右二部事何由辦六曰建元以來條畫略備有司往往視爲文具宜令憲司糾舉務在必行疏聞帝即召見曰卿勞於外自今不令遠出矣至元三年改戶部尚書時有賈胡特阿合馬勢欲賈交鈔本私平準之利以增歲課爲辭帝以問亨對曰交鈔可以權萬貨者法使然也法者主上之柄今使一賈私擅之將何以令天下事遂寢亨又建言立常平義倉備荒而時以財用不足止設義倉七年立尚書省仍以亨爲尚書領左部亨上言尚書省專領金穀百工之

元史卷三十三 列傳 三

事其銓選宜歸中書以示無濫遂爲平章阿合馬所忌以誣免官會元兵圍襄樊廷議河南行省調發軍餉詔以阿里爲右丞姚樞爲左丞亨爲僉省任其事水陸供餽未嘗闕乏十年還京師十四年卒

張昉 郝彬 楊混 吳鼎 梁德珪

張昉字顯卿東平汶上人父汝明金經義進士官至治書侍御史昉以任子試補吏部令史金亡還鄉里嚴實行臺東平辟爲掾鄉人有執左道惑眾謀不軌者事覺逮捕註誤甚眾諸寮佐莫敢言昉獨別白出數百人實才之進幕職時兵後吏曹雜進不習文法東平轄郡邑五十四民眾事繁簿書填委漫無統紀昉坐曹躬閱案牘左酬右答事無留滯初有將校死事以弟襲其職者至是革去昉辯明

復之持金夜餽昉昉卻之漸謝而去同里張氏以絲五萬兩寄昉家而他適俄而昉家被火家人惶駭走避資用悉焚惟力完所寄絲付張氏乙卯權知東平府事以疾辭家居養母至元元年入爲中書省左右司郎中甄別能否公其黜陟人無怨言三年遷制國用使司郎中制司專職財賦時宰領之倚任集事尤號煩重昉竭誠贊畫出納惟謹賦不加斂而國用以饒四年丁內憂哀毀踰制尋詔起復錄囚東平多所平反改中書省左右司郎中昉有識慮損益古今裁定典憲時皆宜之名爲稱職十一年拜兵刑部尚書上疏乞骸骨致仕卒封東平郡公諡莊憲

元史卷三十三 列傳 三

郝彬字景文霸州信安人世祖初彬年十六充皇太子宿衛擢揚州路治中宋末鄞縣賊顧閏聚眾海島時出攻剽宋羈縻以官內附後益橫侵揚州境彬討禽之泰輿人有被殺二年而捕賊不獲者吏誣平人獄已具彬疑其誣讞之果得真賊御史薦彬同知淮西道宣慰司事覈戶版理屯田諸廢修舉江淮財賦總管府掌東宮田賦其官屬皆從詹事院奏授不隸中書往往爲姦吏誅求無厭彬爲總管入見請受憲司糾察以革私徼罷所隸六提舉司以蘇民瘼從之遂罷其四國家經費鹽利居十之八而兩淮鹽獨當天下之半法日以壞以彬行戶部尚書經理之彬請度舟楫所通道里所均建六倉煮鹽於場運積之倉歲首聽羣商於轉運司探倉籌定其所乃買券又定河南江商市易之不如法者著爲令入爲工部尚書改戶部尚書拜中書參政俄免歸武宗末年復立尚書省拜參政辭不獲

命同列務生事要功般無罪彬積誠意開引或從或違橫不可制命兼大司徒不拜仁宗在東宮彬懇辭至力因稱疾篤時相強起之至奏請重賜以餌之彬不爲動議罪之罪無從得彬堅臥一榻至數月尚書省臣皆得罪彬不與焉家居七年足迹未嘗出門外仁宗思之以爲大司農卿未幾謝病延祐七年卒

楊湜字彥卿真定藁城人習章程學工書算始以府吏遷檢法中統元年辟爲中書掾與中山楊珍無極楊卞齊名時人目以三楊中書省初立國用不足湜論鈔法宜以權貨制國用朝廷從之俾掌其條制至元三年立制國用司總天下錢穀以湜爲員外郎佩金符改宣徽院參議湜計帑立籍具其出入之數每月終上之遂定爲令加諸路交

元史卷三十三 列傳

五

鈔都提舉上鈔法便宜事謂平準行用庫白金出入有偷濫之敝請以五十兩鑄爲錠文以元寶用之便七年改制國用司爲尚書省拜戶部侍郎仍兼交鈔提舉時用壬子舊籍定民賦役之高下湜言貧富不常歲久浸易其可以昔日之籍而定今之賦役哉廷議善之俾第其輕重人以爲平湜心計精析時論經費者咸推其能子克忠安豐路總管

吳鼎字鼎臣燕人至元十七年入東宮宿衛積官至禮部尚書宣徽院副使大德十一年山東諸郡饑詔鼎往振朝廷議發米四萬石鈔折米一萬石鼎謂同使者曰民得鈔將何從易米同使者曰議已定恐不可更鼎曰人命豈不重於米邪言於朝卒從所請以行至大元年改保定路總

管時皇太后欲幸五臺言者請開保定西五迴嶺取捷徑遣使視地形計工費鼎言荒山斗入人迹久絕非乘輿所宜往還報太后喜爲寢其役三年召授同知中政院事兩浙財賦隸中政者鉅萬計前往者率多取其贏鼎一無所私浙有兩富彙曰朱清張瑄以海盜起家司漕運多貸與民錢後兩家誅沒券之已償者亦入於官官惟驗券徵理民不能堪鼎力爲辨始獲免四年改京畿漕運使延祐三年卒追封前國公諡孝敏

梁德珪字伯溫大興良鄉人初給事昭睿順聖皇后官令習蒙古語通奏對年十一見世祖至元十六年爲中書左司員外郎六遷至參議尚書省事三十一年執政入奏事帝詢其曲折不能對德珪從旁辯析明白通暢帝大悅拜

元史卷三十三 列傳

五

參知政事在省日久凡錢穀出納之制選銓進退之宜諸藩賜予之節命有驟至不暇閱簡牘同列莫知措辭德珪數語卽定開遇疑事則曰某事當如某律某年嘗有此旨驗之皆然北京地震帝閱州郡報囚之數怪其過多德珪對曰以徵索羅織無所從納蔓延收繫故至此爾帝感悟乃悉赦中外逋負民賴以蘇成宗卽位一遵祖武廟堂以安靜爲治凡尚書省言利害斂口不敢發求進者不得逞其志朋聚與怨摠事中傷德珪會帝有疾言者盛氣致詰德珪以位居執政不受凌轢慷慨引咎遂安置湖廣帝疾愈問之急召還都既至問卿安在德珪環視嗚咽不敢對賜酒饌乞歸省其母詔復入中書以疾乞骸骨大德八年卒於家袁桷狀其行事

見清容集

論曰張昉郝彬楊湜吳鼎梁德珪五人皆世祖理財之臣也下不捨克於民上不支絀於國曷嘗必如阿合馬桑葛盧世榮之無然中國斂怨為德哉此以玉至彼以瓦裂聚斂盜臣亦何利而為是也

賜師文 尚野 王利用 王思廉 孟攀鱗 又兼附張惠等八人

賜師文字純南陽人父訥參汴幕注地理指掌圖有詩名師文弱冠謁許衡與其高弟姚燧高凝皆相友善至元五年陳時政十六策丞相安童奇其才辟為右三部令史十二年丞相伯顏攻宋選為省掾從定江南及歸舟中惟載書籍編平宋事蹟上之十四年除東川行樞密院都事盡心贊畫多所裨益十六年安西王承制改四川北道宣慰司經歷屢遷僉四川道按察司事二十三年拜監察御

元史卷三十三 列傳 孟

史糾劾不避權貴上所纂農桑輯要書改僉陝西漢中道廉訪司事黜姦舉才咸服其公三十一年徙山南道松滋枝江有水患歲發民防水往返數百里苦於供給師文以江水安流悉罷其役駙馬亦都護家人怙勢不法治其甚惡者流之大德十年轉翰林侍讀學士知制誥同修國史至大三年除太平路總管時大旱師文捐俸致禱不數日澍雨大降遂為豐年當塗人坐殺牛祈雨囚繫者六十餘人師文憫而出之秩米收積盈屋曰吾家人能盡此乎呼貧士細民恣其取去廉訪分司官前後至者必先謁師文稱為先生師文在任未久境內晏然高彥敬為山南副使移文言不可居師文上者三即日辭去論者謂士大夫風俗之美卒封魏國公諡文肅許有于碑其墓見至正集

尚野字文蔚其先保定人徙滿城至元十八年以處士徵為國史院編修官二十年兼興文署丞出為汝州判官廉介有為憲司屢薦之二十八年遷南陽縣尹初至官獄訟充斥野裁決無留滯涉旬遂無事改懷孟河渠副使會遣使問民疾苦野建言水利有成法宜隸有司不宜復置河渠官事聞於朝河渠官遂罷大德六年遷國子助教諸生入宿衛者歲從幸上都丞相哈剌合孫始命野分學於上都以教諸生仍鑄印給之上都分學自野始俄遷國子博士誨人先經學而後文藝每謂諸生曰學未有得徒事華藻若持錢買水所取有限能自鑿井及泉而汲之不可勝用矣時學舍未備野密請御史臺出帑藏所積大建學舍以廣教自仁宗在東宮野為太子文學多所裨益時從賓

元史卷三十三 列傳 孟

客姚燧論德肅勦入見帝為加禮至大元年除國子司業近臣奏分國學西序為大都路學帝已可其奏野謂國學府學混居不合禮制事遂寢四年拜翰林直學士知制誥同修國史詔野赴吏部試用蔭補官野多所優假或病其大寬野曰今初設此法冀將來者習詩書知禮義耳非必責效目前也眾乃服延祐元年改集賢侍講學士兼國子祭酒二年夏移疾歸滿城四方來學者益眾卒封上黨郡公諡文懿

王利用字國賓通州潞縣人高祖以上仕遼以下皆仕金利用幼穎悟弱冠與魏初同學齊名事世祖於潛邸中書辟為掾辭不就中統初授北京奧魯同知歷知安肅汝靈趙四州入拜監察御史薊州有禁地民不得射獵其中遷

者誣州民冒禁籍其家利用糾之邏者訴於上利用辨愈力得以所沒入悉還之民屢遷直學士與耶律鑄同修實錄出爲四川按察使誅蜀豪之持官府長短者釋巫山縣民數百口之爲帥府所奴者大德二年改安西興元兩路總管其在興元減職出租額站戶之役於他郡者悉除之有婦毒殺其夫問藥所從來吏教婦指爲富商所貨獄上利用曰家富而貨毒藥豈人情哉訊之果誣也致仕居漢中成宗朝起爲太子賓客首疏時政十七事曰畏天戒法祖宗隆孝養敬至尊察民隱敦本抑末清心聽政寡欲養身節飲節財賞功罰罪杜讒言求直諫官職量材而授工役相時而動俾近侍時赴經筵講讀經史帝及太子嘉納之皇后聞之命錄別本以進廉希憲當時名相簡重慎許

元史卷三十三 列傳

三

可嘗語人曰方今文章政事兼備者王國寶其人也卒追封潞國公諡文貞

王思廉字仲常真定獲鹿人幼師太原元好問既冠張德耀宣撫河東辟掌書記復謝歸至元十年董文忠薦之世祖召見授符寶局掌書十三年姚樞舉爲昭文館待制改翰林待制嘗進讀通鑑每侍讀帝命御史大夫王速太師月赤察爾御史中丞薩里蠻等咸聽受焉十九年帝幸白海時千戶王著矯殺奸臣阿合馬於大都辭連樞密副使張易帝召思廉至行殿屏左右問曰張易反若知之乎思廉徐奏曰僭號改元謂之反亡入他國謂之叛羣聚山林賊害民物謂之亂張易之事臣實不能詳也思廉以儒素進帝眷注優渥疾賜御藥扈蹕失馬給內廐馬五匹玉帶

被盜更以御帶賜之侍太子真金於東宮進言府中宜建學官俾左右近侍皆親正學以裨輔明德太子嘗欲買甲第賜思廉固辭藩王乃顛叛帝親征思廉乘閒言曰藩王反側地大故也漢賈誼言眾建諸侯而少其力實爲良策帝是之成宗大德元年遷翰林學士仍樞密院判官以病歸

孟攀鱗字駕之雲內人曾祖彥甫以明法爲西北路招討司知事有疑獄當死者百餘人彥甫執不從後三日得實皆釋之祖鶴父澤民皆金進士攀鱗幼日誦萬言能綴文時號奇童金正大七年擢進士第仕至招討使汴京陷歸附爲陝西帥府詳議官遂家長安世祖中統三年授翰林待制同修國史至元初召見條陳七十事勸上以郊天地

元史卷三十三 列傳

三

祠太廟制禮樂建學校行科舉擇守令以字民儲米粟以贍軍省無名之賦罷不急之役百司庶府統於六部紀綱制度悉由中書是爲長久之計詔會太常議定禮樂攀鱗夜畫郊祀及宗廟圖以進復以病請西歸令就議陝西四川行中書省事卒封平原郡公諡文定又有張惠者成都新繁人幼被俘至杭海居數年盡通諸國語入侍世祖藩邸中統至元閒歷官河南宣慰副使遷參政行省山東拜尙書省參政中書左右丞終平章行省揚州嘗贖山東俘囚三百餘家平李璫時括軍中所掠平民盡縱之及平宋奏遣江南民之被籍爲工匠而實無藝業者十九萬餘戶悉還爲民所至有能聲以累請復阿合馬諸子官爲時議所貶又劉容者雲中人幼喜讀書中統初以國師薦入侍

皇太子於東宮掌庫藏每退直即從祭酒許衡問學奉使江西還惟載書數車獻之皇太子東宮左右以其無餽饈之俄為太子司議改祕書監卒又李之紹者平陰人以馬紹李謙薦為翰林國史院編修官姚燧欲試其才積十餘事授之立就至治中遷翰林侍講學士知制誥卒又趙宏偉者潁川人從伯顏渡江略地臨江吉州有戰功大德至大中屢為浙東廉訪使延許謙為師以正士趨又張炤者濟南人由吏起家而好學從丞相阿塔海阿朮攻宋多所贊畫授揚州路總管府達魯花赤謝病歸購書八萬卷以萬卷送濟南府學又張礎者真定人廉希憲薦於世祖從伐宋凡徵發軍旅文檄悉出其手屢遷江南浙西道及嶺南廣西道按察副使所至招反側治豪強有政聲又楊果

元史卷三十三 列傳 无

者蒲陰人史天澤經略河南時為參議中統初設十道宣撫使以果宣撫北京旋拜參政為文章長於樂府諷諭有西菴集行世又焦養直堂邑人以薦召見稱旨入侍帷幄陳說諸史帝王行事成宗大德初進講資治通鑑傅東宮至大中官集賢大學士舊史皆專傳然無卓卓表見今竝不錄其色目文臣無事蹟者已附鐵哥傳末

元史卷三十三終

元史卷三十四

列傳十八

世祖言臣

崔斌 弟或

崔斌字仲文朔州馬邑人善騎射兼達政術從伐宋有戰功世祖嘗命安童舉漢人識治體者一人安童以斌對入見陳時政得失危言讜論直指面斥無所諱帝幸上都馬上問為治大體今當何先斌曰致治之道在於任相帝問誰可者斌以安童史天澤對帝默然良久斌曰陛下豈以臣猥鄙所舉未允公議邪今近臣咸在乞采輿論帝俞其請斌立馬颺言曰有旨問安童可為相否眾驩呼萬歲帝悅遂以二人竝為相除斌左右司郎中每論事帝前羣言終日不決者斌以數言決之進見必與近臣偕其所獻替

元史卷三十四 列傳 一

雖密近之臣有不得與聞者會阿合馬立制國用使司專以培克為事斌曰與其有聚斂之臣寧有盜臣於帝前屢斥其姦惡阿合馬忌之出守東平至元五年大兵南征卒有徹民席投其嬰兒於地以死者斌馳請主將曰未至敵境而先殺吾民國有常刑汝亦當坐於是下其卒於獄自是莫敢犯有旨籍兵二萬益襄樊斌即馳奏曰河南戶少而調度繁多實不堪命帝聞之減其半伯顏既渡江分阿里海牙定湖南以斌行省參政圍潭州阿里海牙中流矢不能軍斌以軍夜集柵下約諸將焚其角樓斷其援道塹城為三周迺誓師銜枚潛登鐵壩人齎芻糗梯其樓火之黎明布雲梯鼓譟而上斌挾盾先登語諸將曰潭人膽破矣若斂兵不進許其來降則土地人民皆我有自重湖以

南連城數十可傳檄而定若縱兵疾攻彼無噍類得一空城何益阿里海牙怒其抗拒持久遂屠城以捷聞斌遷行省左丞召入觀時阿合馬擅權日甚廷臣莫敢誰何斌從帝至上都帝問江南治否斌對以治安之道在得人先以江南官冗委任非人命阿里等前往察汰今蔽不以聞是罔上也杭州地大委寄非輕阿合馬溺私愛以不肖子抹速忽充達魯花赤豈量材授任之道且阿合馬先自陳乞免任其子弟今身為平章而子若姪或為行省參政或為禮部尚書或領將作監會同館一門悉處津要無以示天下公又阿老瓦丁臺臣劾其侵蝕官錢事猶未竟今復授江淮參政恐不厭人望帝竝黜之并令御史大夫相威樞密副使李羅按問汰其冗員黜其親黨檢覈其不法罷天

元史卷三十四 列傳 二

下轉運司海內無不稱快適尚書雷夢炎謝元昌言江淮行省事至重而省臣無一人通文墨者乃遷斌江淮行省左丞既至凡前日蠹國漁民不法之政悉釐正之阿合馬慮其害己乃奏理算江淮錢穀遮留使不獲上見誣構以罪竟為所害天下冤之至大初追封鄭國公諡忠毅崔彧字文卿斌之弟也亦以剛直敢言為世祖所器至元中奉詔至江南訪求藝術士還言忽都台根索亡宋財貨煩擾百姓身為使臣乃挈妻子以往所在取索鞍馬芻粟帝雖聽其言然竟不究治尋命或鈎攷樞密文牘遂拜御史中丞或言臺臣於國家政事得失民生休戚百官邪正雖王公將相亦宜糾察近惟御史得有所言臣以為臺官皆當建言庶於國家有補選用臺察官若由中書必有偏

徇之敵御史宜從本臺選擇初用漢人十六員今宜增設蒙古人員相參巡歷皆從其請二十年復言時政十八事一日開廣言路多選正人番直上前以司喉舌庶免黨附壅塞之患二曰當阿合馬擅權臺臣莫敢糾其非迫其事敗然後接踵隨聲誠欺罔之大者宜別加選用其舊人皆當問罪三曰樞密院定奪軍官賞罰不當多聽阿合馬風旨宜擇有聲望者為長貳四曰翰苑亦頌阿合馬功德宜博訪南北耆儒碩望以重此選五曰郝禎耿仁等雖正典刑若是者尚多罪同罰異公論未伸合次第屏除六曰貴游子弟用即顯官幼不講學何以從政得如左丞許衡教國子學庶人才輩出七曰今起居注所書不過奏事檢目宜擇近臣之有聲望者分番上直言動必書以垂法戒八

元史卷三十四 列傳 三

曰憲曹無法可守致奸人無所顧忌宜定律令為一代法九曰近議裁冗官徒省一員併一職非經久之計宜參眾議而立成規十曰官寮無以養廉責其貪則苛乞將諸路大小官有俸者量增無俸者特給十一曰內地百姓流移江南避賦役者已十五萬戶去家就旅夫豈人情賦重政繁驅之致此乞特降詔招徠復業免其積欠給還田產吏以戶口增耗為黜陟十二曰凡丞相安童所進善良悉為阿合馬所擯黜或居散地或在遠方竝當擢用十三曰簿錄奸黨財物本國家之物不可視為橫得遂致濫用宜以之實帑藏供歲計十四曰大都非如上都止備巡幸不應立畱守司今宜易置總管府十五曰中書省右丞二而左丞缺宜改所增右丞置諸左十六曰在外行省不必置丞

相平章止設左右丞以下庶幾內重不致勢均毋信姦臣鎮壓之論十七日阿里海牙掌兵民之權子姪姻黨分列權要威權大盛宜罷職理算其黨當遷轉他所勿使久據荆湖十八日銓選類奏賢否莫知自今三品以上必引見而後授官疏奏即日命中書與御史大夫議行又言江南盜賊相挺而起凡二百餘所皆由拘刷水手與造海船民不聊生激而成變宜姑止日本之役江西四省軍需宜量民力勿強以土產所無凡給物價與民者必以實召募水手當從所欲伺民氣稍蘇我力粗備後東征未晚世祖不憚曰爾之所言如射然挽弓雖可觀發矢則非是矣或又言昨差官度量大都地畝本以革權勢兼并之敝本非擾民而近者浮言胥動恐失農時乞降旨與民曉諭各路每

元史卷三十四 列傳 四

歲選取室女急宜停罷宋文思院小口斛出入官糧無所容隱所宜頒行皆從之二十一年以劾盧世榮不可居相職忤旨罷及世榮敗起為集賢大學士累拜中書右丞奏言近者桑葛當國四年諸官鮮不賄進親舊皆授要官唯以欺蔽九重賸削百姓為事宜令兩省嚴加攷覈凡入其黨者皆行汰逐其桑葛所設衙門冗濫徒費祿食宜令百司集議汰罷仍如舊制至大都高資戶多為桑葛等所容庇凡百徭役止令貧民充當宜令諸路所司核實均輸又軍站諸戶每歲非名取索賦稅倍蓰民多流移請自今非奉詔敢私斂民及役軍匠者論如法多見施行久之復遷御史中丞又言昔行御史臺監察御史周祚劾尚書省官芒兀台教化的納速刺丁蔑里姦賊納速刺丁蔑里反誣

祚以罪遣人詣尚書省告桑葛桑葛曖昧以聞流祚於愍答孫妻子家財竝沒入官祚至和林遇亂走還京師桑葛又遣詣雲南理算錢穀以贖其罪宜復其妻子又奏納速刺丁蔑里忻都王巨濟黨比桑葛恣為不法楮幣銓選稅課無不更張理算江南積逋期限嚴急追逮騷民至嫁妻賣女殃及親鄰維揚錢塘受害取慘無故而隕其生者五百餘人近者閩里按問悉皆首伏士民乃知聖天子本仁愛斯民而使至此極者實桑葛凶黨所為莫不願食其肉請將此數人從公論罪以謝天下帝命悉誅之又言行臺官言使臣至上所者或不持璽書口傳聖旨縱釋有罪擅籍人家真偽莫辨請自今凡使臣出必降詔省臺院諸司必給印文以杜姦欺又言諸官吏受賕在朝則詣御

元史卷三十四 列傳 五

史臺首告在外則詣按察司首告向有成憲自桑葛持國受賕者不赴憲臺而詣諸司以故反覆牽延事久不竟今宜遵前旨惟於本臺行臺及諸道廉訪司首告諸司無得輒受中書省臣奏請以或為右丞帝曰崔或不愛於言惟可使任言責寶泉提舉張簡及子乃蠻台告或不法十餘事詔就辯中書或書簡等所告與已宜對者為贖袖之視而後對所告皆無驗竝繫獄簡瘐死成宗即位或以久任憲臺乞遷他職不許曰卿若辭避其誰抗言哉或居御史臺久守正不阿自知為人所疾遂以病辭成宗諭之曰卿勉為朕少留大德二年加平章政事卒追封鄭國公諡忠肅

陳天祐 弟天祥

陳天祐一名祐字慶甫趙州靈晉人世業農祖忠博究經史鄉黨師之既歿門人諡曰茂行先生天祐少好學博通經史歲癸丑穆王府辟爲其府尚書王既分土陝洛表天祐爲河南府總管下車日首禮金季名士李國維楊杲李微薛玄咨訪治道奏免征西軍數百家及椒竹諸稅糧料等錢又上便民二十餘事朝廷皆從之時州縣官以未給俸多貪暴天祐獨以清慎見稱在官八年如始至日至元二年改南京路治中適東方大蝗徐邳尤甚責捕至急天祐部民丁數萬至其地謂左右曰捕蝗慮其傷稼也今蝗雖盛而穀已熟曷早刈之俾力省而功倍卽諭令早穫散捕丁數萬兩州民皆賴焉三年賜虎符授衛輝路總管衛當四方衝號難治天祐申明法令勅立孔子廟修比干墓

元史卷三十四 列傳

六

著於祀典及去官民爲立碑頌德嘗上書世祖言樹太平之本有三一曰太子國本建立宜早二曰中書政本責成宜專三曰人材治本選舉宜審事雖未能盡行時論偉之六年改山東道按察使時中書尚書二省竝立世祖厭其煩欲合爲一集大臣雜議之天祐還朝特命預議阿合馬爲尚書平章政事欲專權乃奏升右丞相安童爲太師因罷中書省懼天祐有異議許進爲尚書參政以啗之及入議天祐極言中書政本祖宗所立不可罷三公古官今徒存其虛位未須設事遂罷阿合馬怒其忤己除天祐僉中興路行尚書省事西涼隸永昌王府其達魯花赤及總管爲人誣搆家各百餘口王欲悉致之法天祐力辯其冤王怒甚天祐執議彌固王亦尋悟二人皆獲免朝廷大舉伐

宋僉軍山東民多逃匿聞天祐來皆曰陳按察來必無私遂皆出應期而辦十二年授南京總管兼開封府尹吏望風震懾天祐謂曰何必若是昔跖今顏吾以顏待之昔顏今跖吾以跖待之由是吏知修飭不敢弄法許蔡閒有巨盜聚眾劫掠天祐捕之急逃入宋境宋亡隨制置夏貴過汴天祐斥下馬擣殺於市民間帖然十四年遷浙東道宣慰使時江南初附軍士俘虜溫台民男女數千口天祐悉奪還之行省惟民商酒稅天祐以兵火之餘請從寬恤不報遣天祐檢覈慶元台州民田及還至新昌值玉山鄉盜倉猝不備遂遇害年五十六追封河南郡公諡忠定父老請畱葬會稽不得乃立祠祀之天祐能詩文有節齋集子夔苻陂屯田萬戶初在揚州聞天祐遇盜死泣請於行省

元史卷三十四 列傳

七

願復父讎禽其賊魁戮於紹興市弟天祥天祥字吉甫少隸軍籍善騎射中統三年署千戶偕諸將東備李壇事平歸鄉里耕偃師山中講經授徒聲聞日著因密邇緱氏山故世稱緱山先生至元十一年大兵伐宋瀕江立招討司括民間兵械官吏奉行迫脅從事興國軍遂激變行省命權知本軍事天祥請以從便處置許之天祥輕騎入境開誠曉諭民遂解散由是流移復業鄰郡之民來歸相繼伐茅斬木結屋以居天祥命以十家爲甲十甲有長弛兵禁以從民便又用土兵收李必聰山寨不戮一人他寨聞風散去未期年遂成樂土時州縣官吏未有俸祿天祥從便規措而月給之民用弗擾鄰邑謀者時至吏請捕之天祥曰彼見吾境安靖如是歸語其黨乃吾流

亡之招也奚捕爲自是遐邇聞風踵歸恐後居歲餘詔改本軍爲路有代天祥爲總管者務變更舊政天祥去未久而興國復變鄰郡壽昌府及大江南北諸城邑多乘勢殺守將以應之萬戶鄭鼎臣敗死樊口士卒還言賊盛且將攻陽邏堡鄂州城門晝閉時諸軍皆隸參政忽都帖木爾麾下猶豫無出師意天祥謂參政賈居貞曰陽邏堡阻山而壘賊所不能攻政使其來是授首於我且慄慄輕易南寇常態我憑高據險突騎衝之彼烏合眾敗可立待勝此則軍勢大振江南諸郡自靡矣居貞乃力趣忽都引兵出城宿於青山明日果大敗其眾初行省聞變盡執鄂城南中大姓以防內應居貞救之不能得天祥曰是州宿重兵距寇遠使寇能翔亦無從至其主是議者利彼財物耳眾

元史卷三十四 列傳

八

議遂格居貞以天祥有文武才使權壽昌府事且發兵衛送至境爲亂者聞官軍至皆棄城保險天祥下令使自相招誘悔者聽其還業無業者聽所欲居惟禽斬首惡一二其餘獄繫他囚五十餘人以冬至日皆釋桎梏歸期三日復獄至期果皆復乃白宣慰司盡原之由是無復叛者百姓爲立生祠二十一年拜監察御史先是中書右丞盧世榮以掎克聚斂驟遷執政權傾一時御史中丞崔彧奏劾之帝怒下吏案問左司郎中周戴因議事微若反唇坐以沮格奏杖一百死舉朝震懾無敢復言天祥疏言世榮先爲江西轉運使入賄與自盜鈔以錠計如千金銀以斤計如干茶以引計如干馬匹玉器雜物件稱是已經追納及未納見追者人所共知今竟不悔前非狂悖愈甚以苛刻

爲自安之策以誅求爲干進之門是猶以盜蹠而任阿衡不止流殃當代亦恐取笑將來且國與民爲一體民安則國安民危則國危財者土地所生民力所集天地之間歲有常數今欲以一歲之期致十年之積非白取於下厥計無從苟行其言必激怨變計其任事以來百有餘日所行與所言已全不相副徒足賈怨天下臣非不知言出禍隨但事關國家有所不避章凡數千言互詳盧世榮傳世祖遣使召天祥與世榮俱至上都面質之帝直其言世榮遂伏誅二十三年除治書侍御史命出覈湖廣錢糧至鄂即上疏劾行省平章岳東木貪暴不法發其奸利數十桑葛與岳東木姻黨爲之奧援奏未下反誣天祥以罪私繫諸獄迫脅百至天祥略不爲動在幽幾四百日惟取四書循

元史卷三十四 列傳

九

環玩究後會赦乃出二十八年擢江南諸道行御史臺以疾去元貞元年改授山東廉訪使時朝廷遣使郡國議弭盜方略天祥奏言盜賊之起有可矜有不可矜其因歲荒兵擾吏貪役重所激者爲可矜其治平數犯迷頑不悛者不可矜非嚴刑無以創艾且頻赦不足化盜適足資盜於是嚴督捕獲皆杖殺之其亡入他境者選捕盜官密授方略使追捕之由是南至漢江二千餘里羣盜屏息平陰縣女子劉金蓮假妖術惑眾所至官爲建立神堂愚民皆奔走奉之天祥命捕杖於市自此神怪屏息大德三年六月移使河北辭疾不起六年遷江南行臺御史中丞時朝廷方事西南夷天祥上疏言器莫凶兵事莫危戰聖人不獲已乃用去歲行省右丞劉深不度難易請兵往征八百媳

婦國遠在雲南之西南又數千里行未及半八番旁出攻之地喪師燔奉頭鼠竄朝廷復發陝西河南江西湖廣四省兵數萬命平章劉國傑將之期以必取轉餽益急所在不堪運送至播州交納者通計二十餘萬往迴數千里且聞所經皆穹山盲壑毒林刺草處僅容一人一騎如登天入井又其霧毒瘴皆能傷人圖其地不可郡縣版其民不可衣冠故歷代擯之不中國齒設羣蠻聞大軍將至或壁掘以老我師進退兩窮饑疫交困噬臍何及且自朝廷征伐倭國占城交趾瓜哇緬甸以來近三十年未聞得尺土一民而所費奚啻萬億此其爲鑑豈不至近惟望上承天意下順民心早正劉深誤國殃民之罪傳首以諭遠人嗣遣使奉璽書開以禍福懷以恩信如仍爲害徂征

元史卷三十四 列傳

十

未晚不報遂謝病去七年召赴中書拜集賢大學士商議中書省事八月地震河東尤甚厭死數十萬詔丞相御史議天祥援古喻今推本天人以上數十事自被召還京至是且一歲未嘗得見帝言事或謂執政者以其言切直抑不以聞或謂奏皆報可以其言祕故外不克知八年正月移病謝去至通州中書遣使追留不還詔賜楮幣五千貫辭不受九年正月拜中書右丞議樞密院事時年七十有六凡五致詔迄不起仁宗在懷孟潛邸聞其名遣使賜酒若幣仍敕長吏歲時告存至大四年仁宗卽位復召之辭不起延祐三年卒於家年八十始爲招討使經歷諸將以久駐外不可無家各議置妾獨難天祥一日飾送良家子至麗甚天祥曰諸君自安吾無庸此固卻之居惟閱經史一

僕自隨所著有四書集註辨疑十五卷四書選注二十六卷詩文集八卷追封潁川郡公諡文靖張養浩碑其神道歸田類稿

劉宣

劉宣字伯宣太原人少以力學孝友聞爲河東宣撫張德輝所器薦爲中書省掾因從許衡講學攷滿除河北河南道巡行勸農副使至元十二年以行省郎中從丞相伯顏平章阿朮統軍平江南贊畫居多嘗奉命詣闕奏捷世祖召見親問南征事應對稱旨賜器服寵嘉之江南平作詩百韻頌功德宋臣有守節死義者必獎歎之同右丞陳天祥沙汰江淮冗官存革悉合公論除知松江府未幾同知浙西宣慰司事在官五年威惠並著遷江淮行省參議改

元史卷三十四 列傳

十一

江西湖東道按察使二十三年入爲吏部尙書時將伐交趾宣上言曰連年日本之役百姓愁戚官府擾攘今春停罷江浙軍民歡聲如雷安南小邦臣事有年歲貢不缺邊帥生事彼因避竄海島致大舉無功將士傷殘今又下令再征不避盛夏交廣炎瘴遠涉諸軍病死必眾緩急何以應敵又交趾無糧海運險遠難通陸運又無車馬馱載一夫擔米五斗往還自食外官得其半若十萬石用四十萬人止可供一二月軍糧搬載船料軍需通用五六十萬眾廣西湖南調度頻數民多離散况密邇溪洞寇盜常多萬一姦人伺隙乘虛生變豈留後衰弱人馬所能應變何不敕軍官深知事體者論量萬全方略毋復蹈前轍及再征日本宣又上言自梭都建伐占城阿里海牙議平交趾三

數年間湖廣江西供船運糧官民大擾廣東羣盜竝起軍兵遠涉江海瘴毒之地死傷過半連兵未解且交趾接壤之小邦尙未能得志梭都爲賊所害自遺羞辱日本海洋萬里疆土險遠尤非二國比今再出師履險縱不遇風可到彼岸倭國以主待客萬一不利欲發救援豈能飛渡隋代三伐高麗喪師百萬唐太宗親征高麗徒增追悔此等陸地之國近接中原前代尙不能克況日本僻在海隅與中國相懸萬里哉國家自平宋之後要功生事之臣倡言東征輕用其謀於江淮兩廣勦造海船斫伐寺觀墳園樹木殆盡踰山越嶺挽運到船廠所費十倍本價造作軍器衣甲百物皆出於民多致破產大兵卽達海岸未交一矢風浪損壞委十萬取於荒山可爲哀痛百姓瘡痍未蘇軍

元史卷三十四 列傳 十一

家哭聲未已又議大舉民何以堪漢軍自圍襄陽渡江征二王越閩廣攻占城破交趾死損甚眾江南諸路守城巡邏遞送倉庫占役之外調用常是不敷南方新附舊軍十餘年間老病逃亡精銳盡於海東新招軍數皆非習武慣戰之人用此制敵必無倖理國家經營南宋用兵四十餘年中國疲乏歸附以後未聞撫字貪吏武夫布滿郡縣怨毒在民實非心服但畏朝廷兵力而已江淮輕剽陸梁之徒潛伏山海伺我兵力虛耗一旦嘯聚所至殺掠其鎮守官軍寡不敵眾望風潰竄數省震搖倉猝調募豈能應急臣恐國家之憂不在海外而在蕭牆之內也帝嘉納其言二十三年中書省議更鈔用錢宣獻議條其利敝語具食貨志屬桑葛謀立尙書省以專國柄錢議遂罷二十五年

由集賢學士除行臺御史中丞時江淮行省丞相芒古一作台縱恣不法常慮臺臣糾言其罪及宣過揚州又不與相見絕江赴臺益增猜憾陰遣其黨詣建康偵臺中違失臺官皆悚懼託人懇求自解惟宣屹然不動芒古台忌宣愈甚羅織宣之子繫揚州獄又令建康酒務淘金等官及錄事司官以罪免者誣告行臺沮壞錢糧以聞於朝必欲置宣死地朝廷遣使置獄於行省鞫問其事宣及御史六人俱就逮既登舟行省以軍船列兵衛隔異不使往來九月朔宣自剄舟中有遺書緘付從子自誠云觸怒大臣誣構成罪豈能與經斷小人交口辯訟屈膝爲容於怨家之前身爲臺臣義不受辱當自引決但不獲以身殉國爲恨耳嗚呼天乎實鑒此心且別有公文言芒古台罪狀塗注

元史卷三十四 列傳 十一

句抹辭句難辨前治書侍御史霍肅爲敘次其文讀者悲憤宣既引決行省白於朝以爲宣知罪重自殺前後構成其事者郎中張斯立也然宣忠義節操爲世所重聞者莫不嗟悼延祐四年從子自持上宣行實御史臺以聞追封彭城郡公諡忠憲吳澄狀其行事吳文正集

姚天福 陳思濟 秦長卿 申屠致遠

姚天福字君祥絳州人父居實避兵徙鴈門天福幼讀春秋通大義世祖在潛邸時過白登天福以童子獻蒲萄酒世祖喜其儀止畱備宿衛至元五年拜監察御史不畏強禦每廷折權臣帝嘉其直錫名巴爾思蒙古言虎也時御史臺置二大夫綱紀無統天福言古稱一蛇九尾首動尾隨一蛇二首不能寸進今臺綱不張有一蛇二首之患陛

下不急拯之久則素不可理帝諭玉速及李羅二人於是
李羅以年幼自免天福時按行畿內有敢普者舊臣家賜
鐵券子孫赦七死恃勢橫虐莫敢誰何天福乃易服閒行
悉得其狀奏其死罪十有七請赦其七而罪其十詔戮以
徇豪右懼服十二年阿合馬請罷各道按察司天福曰大
夫玉速曰國家境地闊遠易數悖叛是司之設所以廣視
聽虞非常慮至深遠不但繩督有司而已也玉速矍然曰
幾失之夜造禁庭詳奏帝大悟詔復立焉阿合馬銜之乘
駕北幸使人簿錄其家無所得左遷衡州路同知不就起
為河東道按察副使時朔方兵興轉輸煩急人畜顛踏天
福恐激變蠢動奏改和羅徵拜治書侍御史劾阿合馬罪
二十有四召之廷辯按數至三軌引服氣色沮喪上曰此

元史卷三十四 列傳

古

三者罪已在不赦時方倚阿合馬理財姑釋不問十六年
江南既平授淮西道按察使淮甸當兵衝將吏俘虜良民
者悉理歸之轉湖北道按察使發省臣贓事數十以聞帝
原其有勞而盡流其黨與州郡稱治二十年遷山北道按
察使時阿合馬已敗禽治其黨宣慰使阿老瓦丁值旱蝗
立大雨遼東民習射獵鮮知耕學天福教以樹藝詩書屢
決疑獄民驚神明建祠刻石以紀之二十二年入為刑部
尚書尋出為揚州路總管二十六年復為淮西按察使帥
臣昂吉爾父子制兵民權二十年袒庇盜賊恣患一方天
福捕戮其盜并劾奏帥臣受賂不法坐黜淮民大蘇舊史
吉爾傳謂廷臣畏其直道雖可彌失為按察使以察之屢
劾不實後竟以微罪免蓋據其家狀之詞竟似昂吉爾被
誣者故於此但言天福按黜鉅奸一人而諱其姓名以免
與彼傳低倍舊史拙於作偽一至於此雅可彌失即巴爾

轉也音二十八年桑葛敗以天福為平陽總管俾窮治其
黨更其政俄拜甘肅行省參政以母老辭三十一年授陝
西漢中道廉訪使尋除真定路總管真定驛傳當南北衝
徵需日困天福措置有方賒貸而蓄息之歲省官緝而民
不擾憲長劾其違法省臣直之奏頌其制以式諸路大德
四年拜參知政事大都路總管兼大興府尹理勞決壅鑿
隱破堅畿甸大治後之尹京者以天福稱首六年卒年七
十三初天福拜御史時彈劾阿合馬罪眾皆危之其母勉
之曰勿以我為念俾吾追蹤滂母死猶生也天福亦請於
憲府曰言事苟獲譴乞不為親累或以聞帝歎曰巴爾思
母子有古義烈風敕侍臣董文忠宣付史館書之天福遇
上頌賜必固辭身歿後家無餘帛字尤魯抑銘其墓

元史卷三十四 列傳

古

陳思濟字濟民柘城人世祖在潛邸聞其名召備顧問既
即位始建省部俾掌敷奏廉希憲等行中書省於陝西思
濟佐行多所贊畫中統三年王文統伏誅廉希憲入中書
思濟隨還姚樞許衡皆器重之會阿合馬入省恥其位在
希憲左每欲肆行希憲守正不從及希憲去位省臣晨集
思濟先進文牘阿合馬輒於希憲位署押思濟遽掩以手
曰此非君相署位也阿合馬怒目視之思濟神色自若除
右司都事從希憲行省山東未幾召還至元五年分命
善省總百揆御史臺正百官一時黜陟登庸憲章程式多
出其手拜監察御史時阿合馬立尚書省權在中書右思
濟與魏初等劾其不法帝命近臣正之御史各以次對思
濟獨厲聲曰御史言官也非為辯訟設拂袖而出遷同知

紹興路總管府事承檄獄桐廬有囚羸瘠將死縱還家候期來決囚請曰聞公名久矣若不早決恐終不可保為閱其案而釋之歷任兩浙陝西兩淮嶺北湖南監司所至皆有興革累遷僉河南江北等處行中書省事大德五年卒追封潁川郡侯諡文肅

秦長卿洛陽人貌魁偉性倨儻有大志世祖在京兆潛藩已聞其名既即位以布衣徵至京師長卿尚風節好論事與劉宣同在宿衛以氣岸相高是時尚書省立阿合馬專政長卿上書曰臣愚竊能識阿合馬其為政擅生殺人人畏憚之固莫敢言然怨毒亦已甚矣觀其禁絕異議杜塞忠言其情似秦趙高私蓄踰公家資覬覦非望其事似漢董卓春秋人臣無將請及其未發誅之為便事下中書阿

元史卷三十四 列傳

六

合馬為人便佞善伺人主意又其資足以動人中貴人力為抹解事遂寢然由是大憾除長卿興和宣德同知鐵冶事竟誣以折閱課額數萬緡逮長卿下吏籍其家產償官又使獄吏殺之獄吏濡紙塞其口鼻即死未幾王著聚徒殺阿合馬帝後悟亦追罪之斲棺戮尸並誅其子而長卿冤終不白從子山甫為建康府判官聞長卿冤狀即日棄官累薦不起以卒山甫子從龍從德皆仕至臺省

申屠致遠字大用東平壽張人少與李謙孟祺等齊名世祖南征駐兵小濮荆湖經略使乞實力台薦為經略司知事軍中機務多所謀畫師還至隨州所俘男女致遠悉縱遣之崔斌守東平聘為學官宋平焦友直楊居寬宣慰兩浙舉為都事首言宋圖籍宜上之朝江南學田當仍以贖

學行省從之改杭州總管府推官宋駙馬楊鎮從子玠節家富於資守藏吏姚溶竊其銀懼事覺誣玠節陰通宋廣益二王有司榜笞誣服致遠讞得其情溶伏辜玠節以金幣謝致遠怒絕之杭人金淵者欲冒籍為儒儒學教授彭宏不從淵誣宏作詩有異志揭書於市邏者以上致遠執淵窮詰罪之屬縣械反者十七人訊之蓋因寇作以兵自衛實非反者皆得釋西僧楊璉真加作浮圖於宋故宮欲取高宗所書九經石刻以築基致遠力拒之乃止改壽昌府判官時盜寇竊發加之造征日本戰船遠近騷然致遠設施有方眾賴以安二十年拜江南行臺監察御史江淮行省宣使郝顯李兼想平章芒兀台不法有詔勿問仍以顯等付芒兀台鞫之繫於獄必抵以死致遠慮囚浙西知

元史卷三十四 列傳

七

其冤狀將縱之芒兀台脅之以勢致遠不為動親脫其械使從軍自贖桑葛當國治書侍御史陳天祥使至湖廣劾平章要束木桑葛摘其疏中語誣以不道奏遣使往逮時行臺遣御史按部湖廣者咸憚莫敢往致遠慨然請行比至累章極論之桑葛方促定天祥罪會致遠章上桑葛氣沮致遠并劾江西行省平章馬合謀稅外橫取忽辛籍鄉民為匠戶轉運使盧世榮榷茶牟利又言占城日本不可涉海遠征徒耗中國銓選限以南北優苦不均宜攷其殿取量地遠近立為定制則銓衡平而吏敝革他如罷香莎米弛竹課禁設司獄官醫學職員皆致遠發之大德二年卒致遠清修苦節恥事權貴聚書萬卷名曰墨莊家無餘產教諸子如師友所著忍齋行稿四十卷釋奠通禮三卷

杜詩纂例十卷集驗方二十卷集古印章三卷

張雄飛 馬紹 唐仁祖

張雄飛字鵬舉琅邪臨沂人父琮事金守盱眙金人疑之
留其家人於許元兵屠許惟工匠得免有田姓者琮故吏
也自稱能為弓遂庇雄飛母子獲全徙朔方逃還潞州長
師前進士王寶英於趙城又入燕居數歲盡通蒙古及諸
部語廉希憲薦之世祖召見陳當世之務大悅授同知平
陽路轉運司事蠹敝悉除帝問處士羅英誰可大用者對
曰張雄飛真公輔器命驛召雄飛至問以方今所急對曰
太子天下本願早定以繫人心又任職者多非材政事廢
弛宜立御史臺為天子耳目凡政事得失民間疾苦皆得
言百官姦貪不職者皆得糾劾之如此則紀綱舉天下治

元史卷三十四 列傳 支

帝曰善乃立御史臺以前丞相塔察爾為御史大夫雄飛
為侍御史雄飛感勵知無不言有告參議樞密院事費正
寅檢校各罪者詔丞相御史雜治之請託交至雄飛盡發
其罪狀奏誅之會阿合馬議立尚書省雄飛力爭帝前忤
旨左遷同知京兆總管府事入為兵部尚書阿合馬與亦
麻都丁及秦長卿劉仲澤有隙羅織其罪下吏欲殺之雄
飛持不可阿合馬使人以參政昭之雄飛不應阿合馬怒
奏出為澧州安撫使而三人竟死獄中時澧州初下民懷
反側雄飛至布宣德教民遂安改宋敝政力懲不畏法者
澧西南接溪洞蠻人乘間鈔掠遣使諭以威德諸蠻悉服
遷荆湖北道宣慰使有告常德富民十餘家與德山寺僧
將為亂眾議以兵討之雄飛曰告者必其仇也徐察之果

如所言先是荆湖行省阿里海牙以降民三千八百戶沒

入為家奴自置吏治之歲責其租賦有司莫敢言雄飛入
朝奏其事詔還籍為民至元十六年拜御史中丞行御史
臺事阿合馬以子忽辛為中書右丞行省江淮恐不為所
容奏留雄飛不遣既而阿合馬死朝臣皆以罪去拜參政
敕中書雜問忽辛之罪忽辛歷指宰執曰汝曾使我家錢
物何得問我雄飛曰我曾受汝家錢物否曰惟公獨否雄
飛曰如是則我當問汝矣忽辛遂伏辜二十一年春冊上
尊號議大赦天下雄飛諫曰古人言無赦之國其刑必平
故赦者不平之政也聖明在上豈宜數赦帝嘉歎之曰大
獵而後見善射集議而後知能言遂止降輕刑之詔帝聞
其貧甚特賜銀二千五百兩鈔二千五百貫金五十兩及

元史卷三十四 列傳 九

金酒器雄飛受賜封識藏於家後阿合馬之黨以雄飛罷
政詣省乞追奪賜物皇太子遣人諭丞相安童勿行而奸
黨塔即古阿散復請檢核前省錢穀竟矯詔追奪之封識
具存未嘗用毫髮及盧世榮以言利進用雄飛與諸執政
同日皆罷二十三年起為燕南河北道宣慰使決壅滯黜
姦貪政化大行卒於官子五人長師野宿衛東宮時荆湖
行省平章阿里海牙請為荆南總管雄飛固止之謂師野
曰我一日不去此位汝輩勿望有官也其介慎如此
馬紹字子卿濟州金鄉人從上黨張播學以薦授左右司
都事出知單州僉山東東西道按察司事遷同知和州路
總管府事召為刑部尚書多所平反擢尚書省參政杜瑤
言至元鈔公私非便平章政事桑葛怒欲當以重罪紹從

容解之始得免俄拜尚書左丞親王戍邊其士卒有過支廩米者有司以聞帝欲究問其罪紹言方邊庭用兵罪之懼失將士心所支踰數者當嗣年之數可也制可宗親海都作亂其民來歸者七十餘萬散居雲朔間桑葛議徙之內地就食紹持不可曰南土地煥北人居之慮生疾疫若恐餒死曷若計口給羊馬之資俾還本土則未歸者孰不欣慕帝聞之曰馬秀才言是桑葛集諸路總管三十人導之入見欲以趣辦財賦之多寡為殿取帝曰財賦辦集非民力困竭必不能然朕之府庫豈少此哉紹退至省追錄聖訓付太史書之時議增鹽課紹獨力爭山東課不可增或又議增賦紹曰苟不節浮費雖重斂數倍亦不足也事遂寢都城種苜蓿地分給居民皆為權勢所有紹獨不取

元史卷三十四 列傳

二十

桑葛欲奏請賜紹紹固辭桑葛敗歎曰使吾早信馬左丞言不至今日之禍跡其所嘗行賂者索籍閱之獨無紹名帝曰馬左丞忠潔可尚其復舊職尚書省罷改紹中書左丞居再歲移疾還家大德四年卒有詩文數百篇

唐仁祖字壽卿畏兀人祖曰唐古直子孫因以唐為氏年十七隨其國歸附太祖父驥事世祖宿衛東宮仁祖少穎悟通諸方語尤邃音律中統初選諸貴胄為質俾習蒙古字授翰林直學士時中書奏真定保定兩路錢穀逋負屢歲不決遣仁祖往閱其牘皆中統舊案亟還奏罷之拜參議尚書省事時丞相桑葛秉政威焰方熾仁祖議論不同屢忤桑葛遷工部尚書桑葛以漕務煩劇特重困之尋出使雲中桑葛攷工部織課稍緩怒曰誤國家歲用急遣驛

騎追還就見相府中桑葛遽命直吏拘往督工且促其期曰違期必致汝於法仁祖退召諸署長諭之曰丞相怒在我不在爾也汝等勿懼但力加勉眾感激晝夜倍功期未及而辦已而桑葛繫獄有旨命仁祖往籍其家明日桑葛以左右之援得釋眾見駭然仁祖獨不為動桑葛竟敗尋除翰林學士承旨遼陽饑偕近侍速哥左丞忻都往振忻都欲如戶籍口數大小給之仁祖曰不可昔籍之小口今已大矣可皆以大口給之卒追封洹國公諡文貞

程鉅夫

程鉅夫名文海後避武宗諱以字行其先自徽州徙郢之京山叔父飛卿仕宋通判建昌世祖時以城降鉅夫甫弱冠入為質子授管軍千戶遂家焉至元十七年召見賜對

元史卷三十四 列傳

三十一

命給筆札書之立就二十餘紙以進帝奇之授應奉翰林文字尋進修撰累遷集賢直學士兼祕書少監奏言國朝建御史臺雖有攷課之目而未得其要莫可致詰乞仿前代體例應請道州司縣下至曹掾各給出身印紙歷子一卷書本人姓名出身於前俾長官聯名保任書其在官月日功過於後秩滿有司詳視而差其殿取則人之賢否一覽而知攷核得實庶無僥倖又奏請通南北選法置貪贓籍給江南官吏俸朝廷多采行之賜地安貞門以築居室加翰林集賢學士同領會同館事首陳興建國學略曰臣聞家國天下必需才以為用而人才之盛全在教育之勤自中統建元以來中外臣僚表表偉傑者皆自往時故老宿衛薰陶浸灌而然邇來寥寥無幾何矣而議政者每

視學校爲不急謂詩書爲無用不知人才盛衰全本於此望陛下明詔有司重學校之事慎師儒之選京師首善之地尤當興建國學選一時名流爲國人矜式而名都大邑教官有缺必使廷臣擇可爲人儀表者條具奏聞視教化之興廢爲攷第之高下其諸生有經明行修者調免賦役庶他日隨取隨足無臨事乏才之患又言省院諸司皆參用南人惟御史臺按察使則否江南風俗南人所諳不宜過於區別帝命爲御史中丞臺臣言鉅夫南人且年少帝怒曰汝未用南人何以知南人不可用自今省部臺院必參用南人遂拜侍御史行御史臺事奉詔訪求江南人才初書詔令皆用蒙古字及是帝特命以漢字書之帝素聞趙孟適葉李名臨行密諭必致此二人鉅夫又薦趙孟頫

元史卷三十四 列傳

三

余恁萬一鶚張伯淳胡夢魁曾晞顏孔洙曾冲子凌時中包鑄等二十餘人帝皆擢置臺憲及文學之職時桑葛專政法令苛急四方騷動鉅夫入朝上疏曰臣聞天子之職莫大於擇相宰相之職莫大於進賢苟不以進賢爲急而以殖貨爲心非爲上爲德爲下爲民之意漢文帝以決獄及錢穀問丞相周勃勃不能對陳平進曰陛下問決獄責廷尉問錢穀責治粟內史宰相上理陰陽下遂萬物之宜外鎮撫四夷內親附百姓觀其所言可知宰相之職矣今權奸用事立尙書省鉤攷錢穀以割剝生民爲務所委任者率皆貪饕要利之人江南盜賊竊發良以此也臣竊以爲宜清尙書之政損行省之權罷言利之官行恤民之事於國爲便桑葛大怒羈留京師不遣奏請殺之凡六奏帝

皆不許仍還行臺已改闕海道廉訪使上言比年劫盜殺人者所在多有一經告發巡尉吏卒名爲體覆而被盜之家并其鄰右先已騷然及付有司則主吏教以轉板平民坐展歲月幸而讞定不過杖一百七而杖蔓逮捕平人之死於獄者反十四五況劫盜幸免必圖報復而告發之家無遺種矣被劫者誰敢告發盜勢日張其禍有不可勝言者夫藏兵器者法論死況以兵器行劫而罪止於杖此何理也今後強盜持軍器劫人財物應照藏兵器從重論罪郡府以便宜從事竝免待報庶使凶人警畏平民安帖其於治勢實非小補大德八年召拜翰林學士會星變應詔陳弭災五策曰敬天尊祖清心持體更化帝稱善至大初預修成宗實錄皇慶改元又預修武宗實錄時亢旱應詔

元史卷三十四 列傳

三

陳桑林六事忤時宰意仁宗遣近侍賜上尊勞之曰中書集議惟卿所言甚當後臨事其極言無隱詔借平章李孟參政許師敬議行科舉法鉅夫力言經學當主程朱傳註文章宜革唐宋宿敝帝命草詔班行以病乞骸骨命廷臣飲餞齊化門外給驛南還敕行省及有司常加存問卒年七十泰定二年追封楚國公諡文獻○原稟闕今參以舊傳及類編補

元史卷三十四終

元史卷三十五

治麻治水漕運諸臣

楊恭懿

列傳九

楊恭懿字元甫奉元人力學強記日數千言雖從親逃亂未嘗廢業年十七西還家貧服勞為養暇則就學尤深易禮春秋父歿居喪盡禮宣撫司行省以掌書記辟不就至元七年與許衡俱被召恭懿不至衡拜中書左丞日稱於右相安童前安童以聞十年詔遣使召之以疾不起十一年太子下教中書聘之丞相遣使為書致命乃至京師既入見世祖遣國王和童勞其遠來十二年正月帝御香殿以大軍南征使久不至命筮之其言祕侍讀學士徒單公履請設取士科詔與恭懿議之恭懿言明詔有謂士不治

元史卷三十五 列傳

一

經學孔孟之道日為賦詩空文斯言誠萬世治安之本今欲取士宜敕有司舉有行檢通經史之士使無投牒自售試以經義論策帝善之會北征恭懿遂歸田里十六年詔安西王相敦遣赴闕入見詔於太史院改麻十七年二月進奏日臣等徧攷自漢以來麻書四十餘家精思推算舊儀難用而新者未備故日行盈縮月行遲疾五行周天其詳皆未精察今權以新儀木表與舊儀所測相較得今歲冬至晷景及日躔所在與列舍分度之差大都北極之高下晝夜刻長短參以古制剗立新法推算成辛巳麻雖或未精然比之前改麻者附會麻元更立日法全踵故習顧亦無愧然必每歲測驗修改積三十年庶盡其法可使如三代日官世專其職測驗良久無改歲之事矣又合朔議

日日行歷四時一周謂之一歲月躔一周復與日合謂之一月言一月之始日月相合故謂合朔自秦廢麻紀漢太初止用平朔法大小相間或有二大者故日食多在晦日或二日測驗時刻亦匙中宋何承天測驗四十餘年進元嘉麻始以月行遲速定小餘以正朔望使食必在朔名定朔法有三大二小時以異舊法罷之梁虞翻造大同麻隋劉焯造皇極麻皆用定朔為時所阻唐傅仁均造戊寅麻定朔始得行貞觀十九年四月頻大人皆異之竟改從平朔李淳風造麟德麻雖不用平法遇四大則避人言以平朔間之又希合當世為進朔法使無元日之食至一行造大衍麻謂天事誠密四大二小何傷誠為確論然亦循常不改臣等更造新麻一依前賢定論推算皆改從實今十

元史卷三十五 列傳

二

九年麻自八月後四月并大實日月合朔之數也授集賢學士兼太史院事十八年辭歸二十年以太子賓客召二十二年以昭文館學士領太史院事召二十九年以議中書省事召皆不行三十一年卒年七十

王恂 齊履謙

王恂字敬甫中山唐縣人父良金末為中山府掾時民遭亂後之以註誤繫獄良前後所活數百人已而棄去吏業潛心伊洛之學及天文律麻無不精究年九十二卒恂性穎悟書過目成誦十三歲通九九數太保劉秉忠北上途經中山見而奇之及南還從秉忠學於磁之紫金山癸丑秉忠薦之世祖召見六盤山命為太子伴讀中統二年擢太子贊善時年二十八三年皇太子封燕王守中書令兼

判樞密院事敕兩府大臣凡有咨稟必令與聞以中書左丞許衡所進唐虞以來嘉言善政令恂講解且命太子受業焉又詔恂於太子起居飲食慎爲調護非所宜接之人勿令得侍左右恂言太子天下本付託至重當延明德與之居處況兼領中書樞密之政詔條所當徧覽庶務亦當屢省官吏以罪免者毋使更進軍官害人甚者改用之際尤不可非其人民至愚而神變亂之餘吾不之疑則反覆化爲忠厚帝深然之太子嘗從問算術對曰算數六藝之一定國家安人民乃大事也每侍左右必發明三綱五常爲學之道及歷代治忽興亡之所以然又以遼金事近接耳目者區別其善惡論著其得失上之太子問以心之所守恂曰許衡嘗言人心如璽篆惟璽篆不差則雖印千萬

元史卷三十五 列傳

三

紙無差者璽篆差則印之於紙亦無不差太子深然之詔擇勳戚子弟使學於恂師道卓然嘗從太子撫軍稱海乃以諸生屬之許衡及衡告老而去復命恂領國子祭酒國學之制實始於此帝以國朝承用金大明麻歲久浸疏知恂精於算術命釐正之恂薦許衡能明麻理詔驛召赴闕恂與衡及楊恭懿鄭守敬等徧攷麻書四十餘家晝夜測驗勘立新法參以古制推算極爲精密詳在守敬傳至元十六年授太史令十七年麻成賜名授時麻以其年冬頒行天下十八年居父喪哀毀卒年四十七後帝思定麻之功以鈔五千貫賜其家延祐二年追封定國公諡文肅其所薦用者齊履謙取知名

齊履謙字伯恆大名人父義善算術履謙生而穎悟年十

一效以推步星麻卽通其法十三從師聞聖賢之學自是以窮理爲務非洙泗伊洛之書不讀至元十六年初立太史局改治新麻履謙補新麻生爲太史王恂所知又從許衡郭守敬預修麻經麻議從浚通惠河薦授星麻教授奏凡儀象未完者命完之都城刻漏舊以木爲之其形如碑故名碑漏內設曲筒鑄銅爲丸自碑首轉行而下鳴鏡以爲節經久廢壞晨昏失度中書俾履謙視之見刻漏旁有宋舊銅壺四於是按圖攷定蓮花寶山等漏制修復其舊大德二年遷保章正始專司麻事三年八月朔大史言時加已依麻當日蝕二分有奇至期不蝕眾皆懼履謙曰當蝕不蝕在古有之矧已時近午陽盛陰微宜當蝕不蝕遂攷唐開元以來當蝕不蝕者凡十事以聞六年六月朔時

元史卷三十五 列傳

四

加戊依麻日當蝕五十七秒眾以涉交既淺且復近濁欲匿不報履謙曰吾所掌者常數也其食與否則繫於天獨以狀聞及其時果食眾皆爭沒日不能決履謙曰氣本十五日而間有十六日者餘分之積也故麻法以所積之日命爲沒日不出本氣者爲是眾服其議七年八月戊申夜地大震邨堡移徙地裂成渠壞廬舍萬八百區詔問弭災之道履謙按春秋言地爲陰而主靜妻道臣道子道也三者失其道則地爲之弗寧弭災之道大臣當反躬責己去專制之威以答天變不可徒事禳禱時帝寢疾宰臣及中宮多專威福故履謙言及之九年冬始立南郊祀昊天上帝履謙攝司天臺官舊制享祀司天雖掌時刻無鐘鼓更漏每至旦始行禮履謙白宰執用鐘鼓更漏俾早晏有節

武宗至大二年太常請修社稷壇及浚太廟廷中井或以歲君所直止其役履謙曰國家以四海為家歲君豈專在是明年升授時郎秋官正仁宗嘉尚儒術臺臣言履謙有學行可教國學子弟擢授國子司業與吳澄同被命時號得人每五鼓入學風雨寒暑弗少怠其教育有法諸生皆畏服未幾命仍僉太史院事皇慶二年春彗星出東井履謙奏宜增修德政以答天意因陳時務八事仁宗為之改容自履謙去國學澄亦移病歸學制漸廢延祐改元詔擇善教者於是復以履謙為司業教道益張每齋置伴讀一人為長雖助教闕員而諸生講授不絕時初命國子生歲貢六人以入學先後為次第履謙曰不攷其業何以興善而得人乃酌舊制立升齋積分之法每季攷其學行以次

元史卷三十五 列傳 五

遞升既升上齋又必踰再歲始與私試每孟仲月試經疑經義季月試古賦詔誥章表策蒙古色目人試明經策問辭理俱優者積一分辭平理優者為半分歲終積至八分者充高等以四十人為額集賢禮部定其藝業及格者六人充歲貢三年不通一經及在學不滿一歲者竝黜帝從其議英宗至治元年拜太史院使泰定二年以原官奉使宣撫江西福建黜罷汚吏四百餘人調免括地虛糧數萬石州縣長吏有以先賢子孫充房夫諸役者悉令罷遣福建憲司職田每畝歲輸米三石民不勝苦履謙命準令輸之由是召怨及還憲司果誣以他事坐免久之始得直天厯二年卒履謙篤學勤苦家貧無書及為星厯生在太史局會祕書監輦亡宋故書畱置本院因晝夜諷誦深究自

得故其學博洽精通自六經諸史天文地理禮樂律厯下至陰陽五行醫藥卜筮無不淹貫尤精經籍著大學四傳小註一卷中庸章句續解一卷論語言仁通旨二卷書傳詳說一卷易繫詞旨略二卷易本說四卷春秋諸國統紀六卷以皇極之名見於洪範皇極之數始於邵氏經世書數非極也特寓其數於極耳著經世書八式一卷經世書有內外篇內篇則因極而明數外篇則由數而會極著外篇微旨一卷授時厯行五十年未嘗推攷履謙曰測晷景并晨昏五星宿度自至治三年冬至至泰定二年夏至天道加時真數各減見行厯書二刻著二至晷景攷二卷授時厯雖有經串而經以著定法串以紀成歲然求其法之所以然數之所從出則略而不載作經串演撰八法一卷

元史卷三十五 列傳 六

元立國百有餘年而郊廟之樂沿襲宋金未有能正之者履謙謂樂本於律律本於氣而候氣之法具載前史可擇僻地為密室取金門之竹及河內葭葦候之上可以正雅樂薦郊廟和神人下可以同度量平物貨厚風俗列其事上之又得黑石古律管一長尺有八寸外方內為圓空中有隔隔中有小竅蓋以通隔上九寸其空均直約徑三分以應黃鐘之數隔下九寸其空自小竅也遞殺至管底約徑二寸餘蓋以聚其氣而上之其製與律家所說不同蓋古所謂玉律是也適遷他官事遂寢至順三年追封汝南郡公諡文懿

郭守敬

郭守敬字若思順德邢臺人太父榮通五經精算數水利

時劉秉忠張文謙張易王恂同學於州西紫金山榮使守敬從秉忠學中統三年文謙既達薦守敬於朝世祖召見面陳水利六事其一中都舊漕河東至通州引玉泉水以通舟歲可省雇車錢六萬緡通州以南於蘭榆河口徑直開引由蒙邨跳梁務至楊邨還河以避浮鷄甸盤淺風浪遠轉之患其二順德達泉引入城中分爲三渠灌城東地其三順德澧河東至古任城失其故道沒民田千三百餘頃此水開修成河其田即可耕種自小王邨徑滹沱合入御河通行舟楫其四磁州東北滏漳二水合流處引水由滏陽邨鄆洛州京年下經鷄澤合入澧河可灌田三千餘頃其五懷孟沁河雖澆灌猶有漏堰餘水東與丹河餘水相合引東流至武陟縣北合入御河可灌田二千餘頃其

元史卷三十五 列傳 七

六黃河自孟州西開引少分一渠經由新舊孟州中間順河古岸下至濶縣南復入大河其閒亦可灌田二千餘頃世祖奇其才卽授提舉諸路河渠四年加授銀符副河渠使至元元年從張文謙行省西夏先是古渠在中興者一名唐來其長四百里一名漢延長二百五十里它州正渠十皆長二百里支渠大小六十八灌田九萬餘頃兵亂廢壞淤淺守敬更立牖堰皆復其舊二年授都水少監守敬言舟自中興沿河四晝夜至東勝可通漕運及見查泊兀郎海古渠甚多宜加修理又言金時自燕京之西麻峪邨分引盧溝一支東流穿西山而出是謂金口其水自金口以東燕京以北灌田若干頃利不可勝計兵興以來典守者懼有失以大石塞之今若按故蹟使水得通流上可致

西山之利下可廣京畿之漕又言當於金口西預開減水口西南還大河令其深廣以防漲水突入之患帝善之十二年丞相伯顏南征議立水站命守敬行視河北山東可通舟者圖而奏之乃得汶泗與衛河相通形勢是爲會通河張本二十八年有言灤河自永平輓舟踰山而上可至開平有言盧溝自麻峪可至尋麻林朝廷遣守敬相視皆不可行因復陳水利十一事其一大都運糧河不用一畝泉舊原別引北山白浮泉水西折而南經瓮山泊自西水門入城環匯於積水潭復東折而南出南水門合入舊運河每十里置一牖比至通州凡爲牖七距牖里許上重置斗門互爲提闕以過舟止水帝覽奏喜曰當速行之於是復置都水監俾守敬領之帝命丞相以下皆親操舂牖倡

元史卷三十五 列傳 八

工待守敬指授而後行事先是通州至大都陸運官糧歲若干萬石方秋霖雨驢畜死者不可勝計至是皆罷之三十年帝還自上都過積水潭見舳艫蔽水大悅名曰通惠河賜守敬鈔萬二千五百貫仍以舊職兼提調通惠河漕運事守敬又言於澄清牖稍東引水與北垣河接且立牖麗正門西令舟楫得環城來往志不就而罷三十一年拜昭文館大學士知太史院事大德二年召守敬至上都議開鐵幡竿渠守敬奏山水頻年暴下非大爲渠堰廣五七十步不可執政吝於工費以其言爲過縮其廣三之一明年大雨山水下注渠不能容漂沒人畜盧帳幾犯行殿上下始神其言初秉忠以大明麻自遼金承用二百餘年浸以後天議欲修正而歿世祖既平江南思用其言遂以守

敬與王恂率南北日官分掌測驗推步而命文謙與樞密張易主之左丞許衡參預其事守敬首言麻之本在於測驗而測驗之器莫先儀表今司天渾儀宋皇祐中汴京所造不與此處天度相符比量南北二極約差四度表石年深亦復敲側乃盡攷其失移置之既又別圖高爽地以木為重棚柵作簡儀高表用相比覆又以為天樞附極而動昔人嘗展管望之未得其的作候極儀極辰既位天體斯正作渾天象象雖形似莫適所用作玲瓏儀以表之矩方測天之正圓莫若以圓求圓作仰儀古有經緯結而不動守敬易之作立運儀日有中道月有九行守敬一之作證理儀表高景虛罔象非真作景符月雖有明察景則難作闕几麻法之驗在於交會作日月食儀天有赤道輪以當

元史卷三十五 列傳 九

之兩極低昂標以指之作星晷定時儀又作正方案丸表懸正儀座正儀為四方行測者所用又作仰規覆矩圖異方渾蓋圖日出入永短圖與上諸儀互相參攷至元十六年改局為太史院以恂為太史令守敬同知太史院事給印章立官府及奏進儀表式守敬當帝前指陳理致至於日晏帝不為倦守敬因奏唐一行開元閒令南宮說天下測景書中見者凡十三處今疆宇比唐尤大若不遠方測驗日月交食分數時刻不同晝夜長短不同日月星辰去天高下不同即曰測驗人少可先南北立表取直測景帝可其奏遂設監候官十有四員分道而出東至高麗西極滇池南踰朱崖北盡鐵勒四海測驗凡二十七所其北極出地度數詳麻志十七年新麻告成守敬與諸臣同上奏

曰臣等竊聞帝王之事莫重於麻自黃帝迎日推策帝堯以閏月定四時成歲舜在璇璣玉衡以齊七政爰及三代麻無定法周秦之間閏餘乖次西漢造三統麻百二十年而是非始定東漢造四分麻七十餘年而儀式方備又百二十一年劉洪造乾象麻始悟月行有遲速又百八十年姜岌造三紀甲子麻始悟以月食衝檢日宿度所在又五十七年何承天造元嘉麻始悟以朔望及弦皆定大小餘又六十五年祖沖之造大明麻始悟大陽有歲差之數極星去不動處一度餘又五十二年張子信始悟日月交道有表裏五星有遲速雷逆又三十三年劉焯造皇極麻始悟日行有盈縮又三十五年傅仁均造戊寅元麻頗采舊儀始用定制又四十六年李淳風造麟德麻以古麻章部

元史卷三十五 列傳 十

元首分度不齊始為總法用進朔以避晦晨月見又六十年三年一行造大衍麻始以朔有四大三小定九服交食之異又九十四年徐昂造宣明麻始悟日食有氣刻時三差又二百三十六年姚舜輔造紀元麻始悟食甚泛餘差數以上計千一百八十二年麻經七十改其辦法者十有三家自是又百七十四年聖朝專命臣等改治新麻臣等用柵造簡儀高表憑其測到實數所攷正者凡七事一曰冬至自丙子年立冬後依每日測到晷景逐日取對冬至前日差同者為準得丁丑年冬至在戊戌日夜半後八刻半又定丁丑夏至在庚子日夜半後七十刻又定戊寅冬至在癸卯日夜半後三十三刻己卯冬至在戊申日夜半後五十七刻庚辰冬至在癸丑日夜半後八十一刻各減

大明曆十八刻遠近相符前後應準二曰歲餘自大明曆以來凡測景驗氣得冬至時刻真數者有六用以相距各得其時合用歲餘今攷驗四年相符不差仍自宋大明壬寅年距至今日八百一十年每歲合得三百六十五日二十四刻二十五分其二十五分爲今曆歲餘合用之數三曰日躔用至元丁丑四月癸酉望月食既推求日躔得冬至日躔赤道箕宿十度黃道箕九度有奇仍憑每日測得太陽躔度或憑星測月或憑月測日或徑憑星度測日立術推算起自丁丑正月己卯十二月凡三年共得百三十四事皆躔於箕與月食相符四曰月離自丁丑以來至今憑每日測到逐時太陰行度推算變從黃道求入轉極遲疾并半行處前後凡十三轉計五十一事內除去不真

元史卷三十五 列傳

十一

的外有三十事得大明曆入轉後天又因攷驗交食加大明曆三十刻與黃道合五曰入交自丁丑五月以來憑每日測到太陽去極度數比擬黃道去極度得月道交於黃道共得八事仍依日食法度推求皆有食分得入交時刻與大明曆所差不多六曰二十八宿距度自漢大初曆以來距度不同互有損益大明曆則於度下餘分附以大半少皆私意牽就未嘗實測其數今新儀皆細刻周天度分每度爲三十六分以距線代管窺宿度餘分並依實測不以私意牽就七曰日出入晝夜刻大明曆日出入晝夜刻皆據汴京爲準其刻數與大都不同今更以本方北極出地高下黃道出入內外度立術推求每日日出入晝夜刻得夏至極長日出寅正二刻日入戌初二刻晝六十二刻

夜三十八刻冬至極短日出辰初二刻日入申正二刻晝三十八刻夜六十二刻永爲定式所勘法凡五事一曰太陽盈縮用四正定氣立爲升降限依立招差求得每日行分初末極差積度比古爲密二曰月行遲疾古曆皆用二十八限今以萬分日之八百二十分爲一限凡析爲三百三十六限依埃疊招差求得轉分進退其遲疾度數逐時不同蓋前所未有三曰黃赤道差舊法以一百一度相減相乘今依算術句股弧矢方圓斜直所容求到度率積差差率與天道實脗合四曰黃赤道內外度據累年實測內外極度二十三度九十分以圓容方直矢接句股爲法求每日去極與所測相符五曰白道交周舊法黃道變推白道以斜求斜今用立渾比量得月與赤道正交距春秋二

元史卷三十五 列傳

十一

正黃赤道正交一十四度六十六分擬以爲法推逐月每交二十八宿度分於理爲盡十九年恂卒時曆雖頽然其推步之式與夫立成之數尙皆未有定彙守敬於是比次篇類整齊分秒裁爲推步七卷立成二卷麻議擬彙三卷轉神選擇二卷上中下三麻注式十二卷二十三年繼爲太史令遂上表奏進又有時候箋注二卷修改源流一卷其測驗書有儀象法式二卷二至晷景攷二十卷五星細行攷五十卷古今交食攷一卷新測二十八舍雜坐諸星入宿去極一卷新測無名諸星一卷月離攷一卷並藏之官守敬麻法大旨在舍虛數而憑實測去積年日法之拘無寫分換母之陋行之數百年未嘗有先後之差傑然出古曆七十餘家之上而水利河渠皆爲一代實效嘗進七

寶鏡漏每大明殿朝會張之其中鐘鼓皆應時自鳴又進
櫃香漏屏風香漏行漏以備郊廟從幸大德二年起靈臺
水渾蓮渾天漏大小機輪轉相撥擊以象周天左旋日月
右轉之勢皆巧伴造化又嘗進木牛流馬以仿諸葛古制
惟張衡地動儀不能造蓋坤體敦靜無從起算昔人傳會
失實非後人智不古若也七年詔內外官年及七十並聽
致仕獨守敬不許其請自是翰林太史司天官不致仕著
為令延祐三年卒年八十有六

賈魯 尚文 成遵

賈魯字友恆河東高平人延祐至治間兩以明經領鄉貢
泰定初授東平路儒學教授會詔修遼金宋三史召魯為
宋史局官書成遷中書省檢校官上言十八河倉近歲淪

元史卷三十五 列傳

三

沒官糧百三十萬斛其敝由富民兼并貧民流亡宜先正
經界然事體重大非處置盡善不可輕發書累數萬言切
中其敝俄拜監察御史首言御史有封事宜專達聖聰不
宜臺臣先有所可否遷工部郎中至正四年河決白茅堤
又決金堤曹濮濟兗諸州郡民居昏墊帝遣使體驗仍訪
求治河方略特命魯行都水監魯循河道攷察地形往復
數千里備得要害為圖上進二策其一議修築北堤以制
橫潰則用工省其一議疏塞並舉挽河東行使復故道其
功數倍會遷右司郎中議未竟尋調都漕運使復條陳漕
政八事一曰京畿和糴二曰優恤漕司舊領漕戶三曰接
運委官四曰通州總治豫定委官五曰船戶困於填夫海
運壞於填戶六曰疏濬運河七曰臨清運糧萬戶府當隸

漕司八曰宣忠船戶宜付本司節制事未盡行既而河水
北侵安山淪入運河延袤濟南河間將墮兩漕司鹽場實
妨國計九年脫脫復相論及河決魯復以前二策進丞相
取其後策以其事屬魯十一年四月以工部尚書總治河
防使領河南北諸路軍民發汴梁大名十有三路民丁十
五萬廬州等戍十有八翼軍二萬供役一切大小軍民官
咸聽節制是月鳩工七月鑿河成八月決水故河九月舟
楫通十一月諸埽諸堤成水土工畢河復故道自黃陵岡
南達白茅由淮入海帝遣使報祭河伯召魯還京師魯以
河平圖獻超拜集賢大學士敕翰林承旨歐陽玄製河平
碑宣付史館尋拜中書左丞從脫脫平徐州既旋師命魯
追餘黨分攻濠州甫誓師督戰忽頭眩下馬須臾卒於軍

元史卷三十五 列傳

四

年五十有七子稹
靳輔曰賈魯治河用沈舟之法人皆稱之以為塞決簡便
之用無如此者竊嘗疑之夫河底淺深坦陷不一惟草柳
性柔一經歷擠則周遭充滿故塞決必用埽今以至平之
舟底而沈之深淺坦陷不一之湍流則埽根透溜之患必
有不俟終日而見者若沈舟之後仍用埽工繼之則所費
不資何如專用埽之便而省然以魯之才而成功如是必
非孟浪姑試之人及詳繹歐陽玄至正河防記始知魯之
沈舟蓋以代埽而逼水非以塞決而合龍也蓋彼時故河
已通流但決河勢大水流多於故河十之八又適當秋水
灌河洞漩湍急埽不能下又其上逼水三堤短弱而勢不
支恐埽行一遲水盡涌入決河則故河復淤前功盡墮魯

乃精思障水入故河之方急沈舟爲埧以通之所謂搶救也船堤之後乃加築前短弱之三堤草埽三道並舉迨至船埧四堤并就河勢南流然後塞決耳不然魯於九月七日沈舟而龍口之合何以直至十一月十一日邪雖然魯於是役也有三忌焉魯自受命以及還朝僅逾半載昏曉百刻役夫分番無少閒斷不恤民力一也築堤塞決正值伏秋用功於河流異溢之候不審天時二也廢農冒暑聚十數萬軍民於一跡不念國家隱憂三也蓋魯惟上恃其君相之信任下恃其強敏果敢之才氣力排羣議犯三忌以成功蓋以治河則有餘以之體國則不足史因石人一眼之事竟坐以亡元之罪則過矣夫石人一眼之謠是亦大澤中篝火狐鳴之類殆韓山童李芝麻等所爲耳然則

元史卷三十五 列傳

五

元之亡卽不因魯毋乃火將然而投之燧邪

尙文字周卿保定人張文謙宣撫河東辟掌書記至元六年始立朝儀太保劉秉忠言於世祖詔文與諸儒采唐開元禮及近代禮斟酌損益成書百官肄習帝臨觀大悅遂爲定制十七年出守輝州十九年進戶部郎中二十二年除御史上封事言上春秋高宜禪位皇太子皇后不宜外預太子聞之懼中稟祕其章不發而阿合馬餘黨答卽古阿散等知之以聞於帝太子益懼丞相安童及御史大夫月呂魯咸憂不測文徧檢舊案得奸黨罪贓數十以白丞相等請先發以奪其謀丞相卽入言狀帝雖震怒前事而宣敕緩蒐檢於是答卽古等竟坐奸贓論死其機實自文發之成宗元貞初拜中臺侍御史時浙西憲司劾江浙行

省平章不法者十七事制遣文往詰之左驗明著平章猶不服反劾御史取會防鎮軍數違國制成宗命省臺大臣雜議咸左平章謂國制軍數禁祕御史不當預罪重文抗辨數四與省臺入奏帝意始悟平章御史各杖遣之二年建言治平之世不宜數赦不急之役宜且停罷授河北河南廉訪使大德元年河決蒲口臺檄令文按視防河之策文建言長河萬里西來其勢湍猛至孟津而下地平土疏移徙不常失禹故道爲中國患不知幾千百年矣自古治河處得其當則力省而患遲失之則力費而患速今陳畱抵睢東西百有餘里南岸舊河口十一已塞者二自涸者六通川者三河槽淤地高於水計六七尺或四五尺北岸故堤其水高於田三四尺或高下等大概南地高於北約

元史卷三十五 列傳

六

八九尺堤安得不決水安得不北也蒲口今決千有餘步迅疾東行得河舊瀆行二百里至歸德橫堤之下復會正流或強湮遏上決下潰功不可成揆今之計惟有順水之性聽河北流遠築長堤以禦泛濫歸德徐邳民避衝潰擇從所安其被患之家宜於河南退灘地內量給永業異時河決他所者亦如之毋庸強河南行庶因勢利導轉敗爲功之上策蒲口不塞便朝廷從之會河北郡縣山東憲部爭言不塞則河北桑田盡爲魚鼈塞之使帝復從之明年蒲口復決歲歲潰是後河復北行故道竟如文言元代治河諸臣能知北流之利者以尙文爲取其識出賈魯上七年召拜中書右丞浙西饑發廩不足請募民入粟補官以振之山東歲凶盜賊竊發出鈔八百五十餘萬賈以弭

之奏請選十道使者巡行天下問民疾苦又奏斥罷南方白雲宗與民均事賦役西域賈人有進押忽大珠者其價六十萬錠省臣平章一坐傳玩文問何所用之平章曰含之可不渴熨面可使面有光文曰一人含之千萬人不渴則誠寶也若一寶止濟一人用已微矣吾所寶者米粟也人一日不食則饑三日不食則疾七日則死有則百姓安無則天下亂功不較愈於彼乎竟不取視年六十九以老疾歸十年以中書右丞召不起武宗仁宗世屢延致訪以國事延祐六年拜太子詹事使三往乃起仁宗命太子待以殊禮泰定中以中書平章致仕明年卒年九十有二成遵字誼叔南陽穰縣人至順閒至京師受春秋業於夏鎮爲國子生時陳旅爲助教喜其文數以語虞集集見之

元史卷三十五 列傳 七

曰公輔器也元統初中進士第授翰林國史院編修官尋拜監察御史扈從至上京上封事言天子宜慎起居節嗜慾以保養聖躬又言臺察四事一曰差遣臺臣越職問事二曰左遷御史杜塞言路三曰御史不思盡言循敘求進四曰體覆廉訪聲蹟不實賢否混淆復陳時務四事請法祖宗節財用抑奔競明激勸是歲言事并舉劾凡七十餘事皆指訐時敝執政者惡之屢遷工部尙書先是河決白茅鄆城濟寧皆爲巨浸或言當築堤以遏水勢或言必疏南河故道以殺水勢而漕運使賈魯言必疏南河塞北河使復故道役不大興害不能已廷議莫能決乃命遵偕大司農圖魯行視議其疏塞之方以聞至正十一年春自濟寧曹濮汴梁大名行數千里掘井以量地形之高下測岸

以究水勢之淺深徧閱史籍博采輿論以謂河之南道不可得復其議有八而丞相脫脫已先入賈魯之言及遵與圖魯至力陳不可且曰濟寧曹鄆連歲饑饉民不聊生若聚二十萬人於此地恐後日之憂有重於河患者脫脫怒曰汝謂民將反邪自辰至酉辨論終不能入十四年調武昌路總管武昌自被沔寇殘燬民死於兵疫者十六七而大江上下皆劇盜阻絕米直翔涌遵言於省臣假軍儲鈔萬錠募勇士具戈船且戰且行羅粟於太平中興民賴全活會省臣出師遵攝省事乃遠斥候塞城門籍民兵五千餘人設萬夫長四配守四門號令嚴肅賊船不敢近岸十五年召拜參議中書省事時河南賊數渡河北焚掠郡縣上下視若常事遵率左右司僚佐持其牘詣丞相言曰今

元史卷三十五 列傳 八

天下州縣喪亂過半而河北民稍安室家者以黃河天塹賊兵不能飛渡所以剝膚椎髓以供軍儲而無深怨今賊北渡河而官軍不禦是大河之險已不能守河北民心復搖國勢將如之何語未畢哽咽不能言宰相以下皆爲之揮涕乃以入奏詔切責守河將帥自是防禦頗嚴先是湖廣賊倪文俊質威順王之子而遣人請降求爲湖廣平章遵曰平章之職亞宰相承平時雖德望漢人尙不輕與今叛賊挾勢要求而輕與之如綱紀何或曰王子世戶嫡孫不許是棄以與賊遵曰項羽執大公以脅高祖高祖尙不受其挾制柰何以王子故廢天下大計乎眾皆聽其論十七年遷中書左丞分省彰德時賀太平在相位以事忤皇后皇太子太子深銜太平欲去之以遵及參政趙中皆太

平黨也十九年用事者承望風旨使人誣告遵等受賊事太子命太宗正府等官雜問之鍛鍊成獄遵等竟杖死中外冤之時至正十九年也後五年御史臺臣辨明其枉詔復給還所授宣敕

羅璧

朱清張瑄 李世雄

羅璧字仲玉鎮江人從宋將朱禩孫降於江陵右丞阿里海牙授管軍千戶隸丞相阿朮麾下進討欽寇有功從元帥張弘範定廣南授管軍總管鎮金山居四年海盜屏絕徙鎮上海督造海舟六十艘至元十二年始運江南糧後以河運弗便於十九年用丞相伯顏言初通海道漕運抵直沽以達京城立運糧三萬戶以璧與張瑄朱清爲之乃首部漕舟由海洋抵楊邨不數十日入京師賜金虎符進

元史卷三十五

列傳

九

管軍萬戶兼管海道運糧二十四年乃顏叛璧復以漕舟至遼陽浮海抵錦州小凌河至廣寧諸軍賴以濟授同知淮西道宣慰司事請兩淮荒閒之田給貧民耕墾三年量收其入歲得粟數十萬斛大德三年除饒州路總管改廣東道宣慰使都元帥山海遼夷負固反側乃誘致諸洞蠻夷酋長假以官位曉以禍福咸率眾以歸除都水監時通州多水患鑿二渠以分水勢又浚阜通河而廣之歲增漕六十餘萬石奉命括兩淮屯田得疾歸鎮江卒朱清者崇明海盜也嘗爲富家傭般人亡命入海島與嘉定張瑄乘舟抄掠近境備知海道曲折尋就招爲防海義民元兵伐宋瑄有眾數千負海橫行至元十二年參政董文炳遣招討使王世強招之降伯顏既平宋遣清等載宋

庫藏圖籍自崇明州泛海入大都授千戶十七年以瑄從收宋二王有功授沿海招討使時東南漕運維艱伯顏追憶前事謂海運可行於是請於朝議造平底船六十艘運從海道抵直沽以至京命羅璧及清瑄共領之初清瑄之懼捕逃海也引舟東行三日夜得沙門島又東北過高句麗水口見文登夷維諸山又北見燕山與碣石往來若風與鬼形迹不可得稍怠則復來亡慮十五六返私念南北海道此固徑直不逢淺角識之及就撫遂勅海運自平江劉家港入海出揚子江盤轉通州海門縣黃連沙嘴萬里長灘開洋沿山澳而行抵淮安鹽城縣歷西海州海寧府東海縣過膠州牢山一路至延真島放靈山洋投東北路多淺沙行月餘始抵成山西行至九皋島劉家島過登

元史卷三十五

列傳

十

州沙門島放萊州大洋收入界河計水程自上海至楊邨凡一萬三千三百五十里兩月餘始抵直沽後以其路險惡復開生道自劉家港開洋至擲腳沙轉沙嘴至三沙揚子江過區擔沙大洪又過萬里長灘放大洋至青水洋又經黑水洋至成山過劉家島至之罘沙門二島放萊州大洋收進界河口其道差爲徑直有千戶殷明略者又開新道從劉家港入海至崇明三沙放洋向東行離長灘至白水綠水入黑水大洋北望延真島取成山轉西至劉家島過沙門島放萊州大洋進界河始盡避沙礁之險一歲之中往返兩運漸多至二百餘萬石當舟行風信有時自浙西達京師不過旬日然風濤漂沒之患無歲無之所傷民命實眾二十年征東行省阿塔海請軍官習舟楫者同征

日本命清瑄從行是年遂罷新開河專事海運立都漕運萬戶府二以璧為管軍萬戶清為中萬戶瑄子文虎為千戶二十三年以清瑄並為海道運糧萬戶總四歲計之實運糧一百一萬石其閒風浪飄沒者詔令免償以海漕有勞遙授宣慰使草木子云賜鈔印聽其自印清等言山東宣慰使樂寶所運江南米陸負至淮安易牖者七然後入海歲止二十萬石若由江陰入海至直沽倉民無陸負之苦且省運值費乞罷膠萊海道運糧萬戶府而以漕事責臣當歲運三十萬石許之清瑄二人起自海盜及富貴日驕汰不法凡沿海富有良田美宅者輒挾圖之不予即誣以通洋有何長者舊與同夥及富後何長者好善樂施力諫清瑄所為不聽元貞元年正月有飛書言清瑄懷異圖

元史卷三十五 列傳 王

者詔弗問二月增江西河南各參政一員以清瑄為之大德六年中書奏清瑄屢被人言乞罷職徙其諸子官江南者來京師時二人父子皆位通顯宗戚累大官田園館舍徧天下巨艘大舶交諸番廩藏倉庾相望車馬填巷僕從佩金虎符為萬戶千戶者數十人多以金帛結貴近至是河南僧石祖入告清瑄不法事命御史臺鞫問得實皆坐誅妻子流遠方仍籍其家拘其軍器海舶等物中書平章而下皆以賂故治罪獨璧雖與清瑄共事而潔已奉公始終一節自清瑄敗後璧專掌海漕逐年益增額

李世雄 無傳

元史卷三十五終

元史卷三十六

列傳二十

平叛藩諸臣

元之叛藩與國終始以蒙古攻蒙古皆盡朔漠騎射之長故戰功往往可觀然自諸大帥外凡舊史所傳若口爾吉若孛爾速若明安若忽林失若失刺拔都爾若徹里若曷刺若拔都爾若乞台若脫因納若孛爾奚若王綽則皆偏裨因人成事而動輒專傳繆矣今一切刪并惟存功首

商挺 暗伯

商挺字孟卿曹州濟陰人其先本姓殷氏避宋諱改焉父衡僉陝西行省員外郎以戰死挺年二十四汴京破北走依冠氏趙天錫與元好問楊奐遊東平嚴實聘為諸子師實卒子忠濟嗣辟挺為經歷贊忠濟興學養士癸丑世祖

元史卷三十六 列傳 一

在潛邸受京兆分地聞挺名遣使徵至鹽州入對稱旨字而不名閒陪宴語因曰挺來時李壇城胸山東平當餽米萬石東平至胸山率十石致一石且車淖於雨必後期後期罪死請輸沂州使壇軍取食便世祖曰愛民如此忍不汝從楊惟中宣撫關中挺為郎中兵火之餘八州十二縣戶不滿萬皆驚憂無聊挺佐惟中進賢良黜貪暴明尊卑出淹滯定規程主簿責印楮幣頒俸祿務農薄稅通其有無期月民乃安誅一大猾羣吏咸懼且請減關中常賦之半明年惟中罷廉希憲來代擢挺宣撫副使丙辰徵京兆軍需布萬匹米二千石帛三千段械器稱是輸平涼軍期迫甚郡人大恐挺曰他易集也運米千里妨我蠶麥郡長王姓者平涼人也挺召與謀對曰不煩官運僕家有積粟

請以代輸挺大悅載值與之他輸亦如期復命兼治懷孟
境內大治憲宗崩阿藍荅等謀擁阿里不哥僭號世祖自
鄂北還道遣張文謙與挺計事挺曰軍中當嚴符信以妨
姦詐文謙急追及言之世祖大悟罵曰無一人爲我言此
非商孟卿幾敗大計速遣使至軍立約未幾阿里不哥之
使至軍中執而斬之召挺北上至開平與廉希憲密贊大
計世祖既卽位挺奏曰南師宜還扈乘輿西師宜軍便地
從之以廉希憲及挺宣撫陝蜀合謀定議遣將破賊甘州
東斬阿藍荅渾都海事聞改宣撫司爲行中書省進希憲
右丞挺僉行省事中統二年進參知政事宋將劉整以瀘
州降繫前降宋者數百人來歸軍吏請誅以懲後挺盡奏
釋之興元判官費寅有罪懼誅以借兵完城事訟挺與希

元史卷三十六 列傳 二

憲於朝帝召挺便殿問曰卿在關中懷孟兩著治效而毀
言日至豈同寅有沮卿者邪抑位高而志怠邪比年論王
文統者甚眾卿獨無一言何邪挺對曰臣素知文統之爲
人嘗與趙壁論之想陛下猶能記也臣在秦二年多過其
或從權應變者有之若功成以歸已事敗分咎於人臣必
不敢請就戮挺出帝顧駙馬忽刺出樞副合荅等數挺前
後大計凡十有七因嘆曰挺有功如是猶自言有罪罪之
誰復爲朕戮力邪四年賜金符行四川行樞密院事至元
元年入拜參知政事建議史事附修遼金二史宣令王鶚
李治徐世隆高鳴胡祇適周砥等爲之三年與姚樞寶默
王鶚楊果纂五經要語凡二十八類以進六年同僉樞密
院事八年遷副使數軍食定軍官品級給軍吏四千人屯

田開墾三萬畝收其穫以餉親軍汰不勝軍者戶三萬戶
一丁者亦汰去丁多業寡業多丁寡財力相資合出一軍
九年皇子芒哥刺封安西王以挺爲王相十四年從王北
征王命挺曰關中事有不便者可悉更張之挺言延安民
兵數千宜使李庭玉練習之以備不虞未幾圖魯叛以延
安民應敵果獲其力挺進十策於王曰陸親鄰安人心敬
民時備不虞厚民生一事權清心源謹自治固本根察下
情王爲置酒嘉納王薨王妃使挺請命於朝以子阿難荅
嗣帝曰吾孫年少祖訓未習卿姑行王相府事初運使郭
琮郎中郭叔雲與王相趙炳構隙或告炳不法妃命囚之
六盤獄以死朝廷疑擅殺之執琮叔雲鞫問伏辜事具趙
炳傳初無一毫及挺惟王府女奚徹徹以預二郭謀臨刑

元史卷三十六 列傳 三

望以求生始有曖昧語連挺父子帝怒命廷臣讞其罪吏
部尚書青陽夢炎以議劾奏帝謂其黨符寶郎董文忠亦
白其誣帝默然命籍其家釋其父子二十年復樞密副使
二十一年趙炳子復訟父冤挺又被繫百餘日乃釋二十
五年卒年八十有詩千餘篇尤善隸書追封魯國公諡文
定子五人琥璘璘璘琦琥字台符至元十四年以姚樞許
衡薦拜江南行御史臺監察御史建康成卒有利湯氏財
者投戈於其家誣爲反具琥直其冤華亭蟠龍寺僧思月
謀叛被禽其黨縱火來劫民大擾琥急誅其魁都昌妖賊
杜辛一僭號倡亂行臺檄琥按問械繫脅從者盈獄琥悉
以誑誤縱遣之揭榜招徠其黨與不三日雲集皆得免二
十七年徵拜中臺監察御史屬地震琥上書言昔漢文帝

有此異而無其應蓋以德化弭災因條陳漢文時政以進又奏舉天下名士十餘人帝皆召用待以不次三十年遷國子司業卒有彝齋文集璿字禮符仕為右衛屯田千戶歲餘謝病侍親年三十三後還鄉里築室曰晦道堂蓋取七世祖宗弼宋仁宗時為太子中舍人年五十挂冠所築堂名也琦少事武宗備宿衛仁宗在東宮奏授集賢直學士調大名路治中不赴授集賢侍講學士泰定元年遷祕書卿卒琦善山水嘗使蜀持平守法秋毫無私

暗伯唐兀人弱冠以世胄入宿衛嘗親迎於燉煌阻兵不得歸乃客居于闕宗王阿魯忽之所世祖遣薛徹干使阿魯忽以通好阿魯忽留使者數年不遣暗伯悉以己馬駝厚贖之令逃去薛徹干等得脫歸具以白世祖世祖稱歎

元史卷三十六 列傳

四

久之既而命元帥不花與薛徹干等征于闐暗伯乘閒至行營薛徹干曰公之忠義已上聞矣不花遂承制命暗伯權充樞密院客省使俄有旨護送暗伯妻子來京師未幾世祖親征乃顏暗伯在行間屢捷命為克流速不魯合不周兀等處萬戶又討諸王哈魯駙馬圖滿答爾之叛戰於克流速石巴圖之地斬圖滿答爾於陳生禽哈魯以獻世祖嘉其功命長唐兀衛尋知樞密院事卒贈溫夏郡公諡忠遂子亦憐真班別見元末文臣傳

李庭

伯帖木爾 塔出

李庭小字勞山本金人蒲察氏金末來中原改稱李氏家濟陰後徙壽光至元六年以材武選隸軍籍權管軍千戶從伐宋圍襄陽屢立戰功復從伯顏渡江攻城略地破常

州入臨安及師還大宴帝諭之曰汝在江南多出死力然男兒立功要在西北始為上也今西北有違朝廷者汝往征之乃別降大虎符加漢軍都元帥仍命庭至哈刺和林晃兀爾之地越嶺北與叛王撒里蠻諸軍大戰敗之移軍河西擊走叛臣霍虎追至大磧而還諸王昔里吉脫脫木爾反庭襲擊生獲之啟皇子只必帖木爾賜之死復引兵會諸王納里忽渡塔密爾河擊走其餘黨河西悉平十四年入朝拜福建行省參政十七年進中書左丞東征日本十八年軍次竹島遇風船盡壞庭抱壞船板漂流抵岸下收餘眾由高麗還京師士卒存者十一二繼以父歿歸益都召拜中書左丞司農卿不赴二十四年宗王乃顏叛驛召至上都統諸衛漢軍從帝親征叛黨塔不台金家奴來

元史卷三十六 列傳

五

拒戰眾號十萬帝親麾諸軍圍之庭調阿速軍繼進流矢中胛裹創復戰帝遣止之乃已令軍中備百弩俟敵列陳百弩齊發敵乃不復出帝問庭彼今夜當何如庭奏必遁去乃引壯士十人持火礮夜入其陳礮發果自相殺潰散帝問何以知之庭曰其兵雖多而無紀律見車駕駐此而不戰必疑有大軍在後是以知其將遁帝大喜庭奏若得漢軍二萬從臣便宜用之乃顏可禽也命與月爾魯蒙古軍並進遂縛乃顏以獻二十五年宗王哈丹圖魯干復叛於遼東詔庭及樞密副使哈答討之大小數十戰弗克而還既而整軍再戰流矢中左脇追至一大河選銳卒潛負火礮夜泝上流發之馬皆驚走大軍潛於下流畢渡天明進戰其眾無馬莫能拒敵哈丹圖魯干走高麗死拜尚書

左丞商議樞密院事庭因奏今漢軍力困於北征若依江南軍每歲二月八月放散以次番上甚便帝可其奏命著爲令宗王海都將犯邊伯顏以聞帝命庭議所以爲備庭請下括馬之令凡得馬十一萬匹軍中賴其用拜平章政事商議樞密院事世祖崩與月爾魯伯顏等劾戴成宗兩宮眷遇甚至每大宴坐於左面諸王之下百官之上大德八年卒追封益國公諡武毅子大用同知歸德府事大椿益都新軍萬戶大誠襲職後衛親軍都指揮使

伯帖木爾欽察人也至元中充哈刺赤入備宿衛僉左衛親軍都指揮使司事二十四年征叛王乃顏隸御史大夫王速陁下屢敗乃顏兵於忽爾阿刺河於海刺河於札刺馬圖河追至夢哥山并禽金家奴又從諸王乃麻台討叛

元史卷三十六 列傳

六

王哈丹連敗之於斡麻站兀刺河於帖麥哈必川進至明安倫城哈丹迎戰敗走追至忽蘭葉爾河又與其將阿圖一日三戰禽裨將一人至帖里揭山突擊哈丹挺矛陷陳身中三十餘矢而還復與王速從車駕親征於兀魯輝河戰捷於貴列河招降餘黨達達百姓一千戶及女真等五百餘戶於納兀河東二十六年春師還復遣成耶真大王之境五月海都謀擾邊命伯帖木爾軍先行至怯呂連河值拜要王叛即移兵致討禽其黨小伯顏以獻詔賜以所得小伯顏女茶倫是年冬立東路蒙古軍上萬戶府統欽察乃蠻閻古思那亦勤等四千餘戶二十七年哈丹復入高麗奉命偕徹里帖木爾進討明年與哈丹子老的戰鴨綠江失利帝命乃麻台薛徹干等征之仍以伯帖木爾爲

先鋒薛徹干軍先至禪定州擊敗哈丹踰數日乃麻台以兵至合攻哈丹又敗之伯帖木爾將百騎追至一大河虜其妻孥追奔逐北哈丹尚有八騎伯帖木爾止餘三騎再戰兩騎士皆重傷不能進伯帖木爾單騎追之至一大山日暮遂失哈丹所在乃麻台上其功于朝厚賚其軍二十九年聞叛王閻怯烈尚在濠來倉伯帖木爾率兵擊虜其妻子畜產追至陳河閻怯烈以二十餘騎脫身走遂定其地得所管女真戶五百餘以聞帝命以充漁戶伯帖木爾官車駕幸上京徵其兵千人從歲以爲常云

元史卷三十六 列傳

七

城舉國遁入海島高麗計窮遂內附塔出以勳臣子至元十七年授東京路總管府達魯花赤改遼東宣慰使二十三年探知乃顏謀叛遣人馳驛上聞命領軍一萬與皇子愛耶赤同力備禦女真水達達官民與乃顏連結塔出遂棄妻子與麾下十二騎馳抵建州距咸平千五百里與乃顏黨大撒拔都等合戰兩中流矢繼知其黨帖哥抄赤等欲襲皇子軍以數十人退戰千餘人扈從皇子渡遼水乃顏軍來襲塔出轉鬪而前射殪其酋帖古台追兵乃退遂軍懿州至遼西罷山北小龍泊得叛酋史徒林台盧全等納款書期而不至塔出即遣將討禽之又獲其黨王賽哥復與曲迭大王等戰破之禁止俘掠追乃顏餘黨北至金山戰捷二十八年賜明珠虎符充蒙古軍萬戶是歲復領

軍討哈丹於女真還攻建州逐阿海投江死明年哈丹涉海南襲高麗塔出復進兵討之入朝世祖嘉其功拜遼陽等處行省平章兼蒙古軍萬戶卒子荅蘭遼陽行省參政

昔班 鐵連

昔班畏吾人也父闕里別斡赤歸太祖從征回國數立功命為本國坤闔城達魯花赤中統元年改戶部尚書宗正府札魯花赤阿里不哥之叛帝命昔班詣河西督糧運給軍還至西京北聞萬戶阿失鐵木爾等方選士卒將從阿里不哥昔班矯制召其軍赴行在阿失狐疑未決昔班委曲諭之且曰皇帝兒也阿里不哥弟也從兄効順又何疑焉阿失期以翌日復命且以兵圍昔班以待明日皆至曰從爾之言矣即便宐以西京錢糧給其軍遂率之以行

元史卷三十六 列傳 八

入見帝嘆曰戰陳之閒得一夫之助猶為有濟今以二萬軍至其功豈少哉海都叛世祖大閱兵將討之先命昔班使海都使之罷兵置驛來朝昔班至海都所傳旨諭之海都聽命既退軍置驛而丞相安童軍先已克火和大王部曲盡獲其輜重海都懼將逃謂昔班曰我不難於殺汝念我父嘗受書於汝姑遣汝歸以安童之事聞非我罪也昔班以聞帝曰汝言是也前此來者亦嘗有此言尋命為中書右丞商議政事妻以宗王之女布魯真公主明年復使海都諭之來歸且曰苟不從我爾能敵諸王藩衛之兵乎海都辭以畏死不敢昔班奉使奔走三年風沙翳目時年已七十矣命為翰林承旨給全俸養老年八十九而卒子翰羅思密浙東宣慰使

鐵連乃蠻人居絳州祖伯不花為宗王拔都王傅鐵連魁偉寡言有謀略早歲宿衛王府拔都分地平陽以鐵連監隰州中統初調平陽馬步站達魯花赤至元初宗王海都叛廷議欲伐之世祖曰朕以宗室之情惟當懷之以德其擇謹密者往使焉左右以鐵連對遂召見語及大事鐵連應對稱旨帝嘉其辯慧曰此事非汝不可然必先詣拔都蒙哥鐵木王所相與計事而後行拔都王者朮赤太子之子襲封阿羅思地宗盟之長也其地東與海都諸王相連帝恐其煽動故先遣使離之鐵連既奉命欲直造海都境視其虛實然後議於諸王副使弗從曰上命我輩先詣宗王今遽造敵境不可鐵連曰親承密旨汝輩違則當誅副者懼從之行既至海都日召宗親宴飲譁論將伺其隙害

元史卷三十六 列傳 九

之鐵連厲聲曰且食勿語望語言脫口相摭為罪邪海都愕然曰直哉酒半鐵連求衣為歡海都嘉其雄辯解與之因語其屬曰為使者當如是矣厚贈以行既至拔都蒙哥鐵木王所具告以故王曰祖宗有訓叛者人得誅之如通好不從王師徂征我即以本藩兵待命協討有罪鐵連還報且曰海都兵多而銳不宐速戰來則堅壘待之去則勿追自守既固則無虞矣帝深然之敕所受海都皮服全飾以金凡朝會服之以表示焉後屢使拔都王所道遇海都游兵副者前行失對遇害鐵連後至曰我為天子使可以非禮犯之邪游兵語屈乃曰前者偽使此真使也釋之遂獨得還帝嘗謂侍臣曰有鐵連則朕之宗族將不失和矣海都覘伺拔都王已嚴備意乃消沮鐵連始終凡四往反

歷十四年帝謂鐵連曰在朝要官惟汝所擇對曰臣志在王室其事未辦不敢奉命今臣母在絳州老且病得侍朝夕幸也詔從其請授絳州達魯花赤十八年病卒於官子荅刺帶同知大同路總管府事

石天麟 劉好禮

石天麟字天瑞順州人年十四見太宗于行在留宿衛天麟好學不倦不數歲於諸國文字語言無不通習命爲中書參佐與耶律楚材釐正庶務賜名蒙古台猶云國族也從宗王征西域爲斷事官憲宗即位復選爲諸路斷事官旋使於北方海都王所見留久之世祖至元十四年諸王昔里吉劫皇子北平王歸塞外亦寓天麟所天麟稍與其用事臣親狎數諷以宗親君臣大義及逆順禍福天道人

元史卷三十六 列傳

十

事海都感悟遂遣天麟護北平王以歸據此傳則北平王海都傳則又云海都天麟被拘留二十八傳則又云海都年始得還世祖大悅賞賚甚厚拜中書左丞兼斷事官天麟以奉使無狀不敢復叨榮寵力辭帝嘉其誠從之有譖丞相安童嘗受海都官爵者帝怒天麟奏曰海都實親王非仇賊比安童不以死拒絕之所以釋其疑心導其臣順也不然皇子安得歸朝乎帝怒乃解江南道觀存宋主遺像有僧與道士交惡發其事將置之大辟天麟曰前遼帝后銅像西京寺內金世尙有之事乃得寢天麟年七十餘帝以所御金龍頭杖賜之命杖以出入宮掖時權臣桑葛柄用納賄鬻爵中外莫敢言天麟獨發其奸無所顧忌成宗即位加大司徒觴於玉德殿召天麟與宴醉甚命御筆送還家武宗即位進平

章政事至大二年卒年九十二追封冀國公諡忠宣天麟歷事六朝夔夔一節罔有擇言擇行奉使之節同於蘇武蕭軒碑其神道述天麟告坐客之言曰人之爲人惟孔夫子扎薩克不可違耳扎薩克華言法律也客問公有之乎曰有俾取示客則編之以韋如西域書乃論語也其樸誠如此

劉好禮字敬之汴梁祥符人幼通蒙古語廉訪府辟爲參議至元五年應詔建言有司奏請宜先啟皇太子俾得閱習庶政陝西重地宜封皇子諸王出鎮朔築都城宜給直以市民地選格不宐以中統三年爲限後是者不錄帝是其言敕中書施行七年遷益蘭州等五部斷事官益蘭距京師九千餘里民俗不知陶冶水無舟航好禮請工匠於

元史卷三十六 列傳

十一

朝以教其民咸便之或言椎鹽酒可以佐經費好禮曰朝廷設官要荒務以綏遠寧欲奪其利邪言者慚服十年北方諸王叛好禮被執留軍中幾死幸以其善應對得釋十六年春叛王召好禮至欠欠州一作謙謙州即古烏孫地謙州以謙河得名一作欠曰皇帝疑我至有今日好禮曰果疑王前歲召王至京肯還之邪十七年春好禮率眾走別部守陔以待兵至遇叛王軍迫之西踰雪峩嶺好禮自度踰是則無望生還遂以衣賂其下始獲東出鐵壁山口閒道南走糧絕捕獵以爲食七月至菊海始與戍兵接得乘傳至昌州入見帝賜之食與鈔累官禮部尙書奏言象力取巨上往還兩都乘輿多象駕萬一有失從者雖多力何能及未幾象果驚幾傷從者二十一年出爲北京路總管再入爲戶部尙書

卒子設河西隴右道廉訪使

玉哇什 劉哈刺 圖堅不花

玉哇什什舊阿速人父耶列拔都從其國主來歸太宗命充宿衛歲戊午從憲宗征蜀為游兵前行至重慶戰數有功嘗出獵遇虎於隘下馬搏虎張吻欲噬之以手探虎舌拔刀刺殺之帝壯其勇賞黃金五十兩別立阿速一軍使領其眾從世祖征阿里不哥又從親王哈必什征李璫俱有功賜金符授本軍千戶從下襄陽又從下沿江諸城宋安撫使洪福既降復誘其入城宴乘醉殺之長子耶速台代領其軍從攻揚州中流矢卒玉哇什襲父職為阿速軍千戶從丞相伯顏平宋賜巢縣二千五十二戶只爾瓦台叛率所部兵擊之至懷魯哈都禽其將失刺察爾斬

元史卷三十六 列傳

十一

於軍其眾悉平諸王和林及失刺等叛從皇子北安王討之至斡爾罕河無舟躍馬涉流而渡俘獲甚眾時北安王方戰失利陷敵陳中玉哇什從諸王藥木忽爾追至金山王乃得脫改賜金虎符進定遠大將軍前衛親軍都指揮使世祖親征乃顏玉哇什為前鋒乃顏遣哈丹領兵萬人來拒擊敗之追至不里古都伯塔哈之地乃顏兵號十萬玉哇什陷陳力戰又敗之追禽乃顏帝嘉其功賜金帶只孫衣錢幣甚厚復討乃顏餘黨塔不台金家奴平之既而哈丹復叛於曲連江追擊其軍渡河而遁移甲北征海都與其將巴璘帖里哥等戰於亦必爾之地屢捷成宗時在潛邸帝以海都連年犯邊命出鎮金山玉哇什率所部在行從皇子闊闢出丞相多爾朵懷擊海都軍突陳而入大

破之復從擊海都將巴璘敗之海都復使圖苦馬領精兵三萬人直趨撒刺思河欲據險襲我師玉哇什率善射者三百人守其隘注矢以射竟全軍而歸帝嘉之賜鈔萬五千緡金織段三十四海都及篤哇以兵來襲擊走之武宗以懷寧王出鎮北邊海都復入寇至兀爾圖玉哇什敗之獲其駝馬器仗以獻時札魯花赤孛羅帖木爾所將兵為海都困於小谷王命玉哇什援出之王喜謂諸將曰今日大丈夫之事舍玉哇什其誰能之縱以黃金包其身猶未足以厭我志武宗南還命玉哇什後從敵懼莫敢近因畱之戍邊賜以金察刺二玉束帶渾金段各一仍賜糶米七十石使為酒以犒其軍後海都子察巴爾等遣人詣闕請和朝廷許之遂徹邊備大德十年五月晝寢于衛舍不疾

元史卷三十六 列傳

十一

廷楨

而卒子亦乞里台襲哈刺舊連八河東人本姓劉氏家世業醫至元八年世祖駐蹕白海以近臣言得召見世祖謂其目有火光異之遂畱侍左右賜名哈刺八都魯十七年擢大醫院管句昔里吉叛宗王別里奉命往征帝以哈刺善醫復畱騎射命從行哈刺請受甲帝不許即馳至宗王所一日獵於野射無不中王妃有疾與藥即愈王喜奏為其府長史及將戰從王請甲王曰上不與汝我何敢與因使領輜重哈刺不肯曰大丈夫當効命行陳乃守營帳如婦人邪見有甲者飲以酒高價取之明日被以往中道三遇賊賊射之皆不中師次金山路隘頓兵未能進有使者云自脫忽王所來願見天子而道遠無援今聞王來甚喜乞得一見王信之哈

刺曰此詐也脫忽所居要害殆與昔里吉爲耳目願勿聽乃羈其人遣兵閒道窺之果獲游騎三十人訊得其情知脫忽方飲酣遂出不意進擊大敗之因獲昔里吉所遣使知其無備又乘勢進擊大破禽之王乃命哈刺獻俘行宮帝見其瘠甚輟御膳羊載以賜卽拜受先割其半懷之帝問故對曰臣始與母訣今歸母幸存請以君賜遺之帝命自今凡賜之食必先賜其母以功授和林等處宣慰使賜與甚厚二十五年海都犯邊尙書省以和林屯糧當得知緩急輕重者掌其出納奏用法伯帝曰錢穀非怯伯所知劉哈刺可使也二十六年海都兵至皇子北安王使報怯伯率其民避去怯伯與哈刺南行六日止巴爾不刺距海都軍五十里怯伯大懼曰事急矣不如順之哈刺語其

元史卷三十六 列傳

十四

弟欽祖榮祖曰怯伯有二心矣遂潛遁與探馬赤千戶忽刺思遇從騎百餘人爲之結陳乘高立於西南怯伯遣騎來追屢拒卻之道遇送軍裝者因護之至鹽海及入見帝喜曰人言汝陷賊乃能來邪二十七年遷河東山西道宣慰使奏曰臣累戰而歸衣裘盡敝河東臣故鄉也願乞錦衣以爲榮帝以金織文衣賜之居二年召還帝諭之曰自此而北乃顏故地曰阿八刺忽者產巨魚吾今立城而以兀速慙哈納思乞里吉思三部人居之名其城曰肇州汝往宣慰復賜以繡衣玉帶及鈔五千貫既至定市里安民居一日得魚九尾皆千斤遣使來獻俄召還三十一年春世祖崩太傅伯顏奉皇太后旨仍命往鎮東方爲咸平宣慰使元貞元年卒

圖堅不花舊作不花燕之大興人也本姓賈氏自曾祖昔刺以來世典御膳語詳藝術傳祖丑尼方幼入見世祖嘗坐之御席旁長善騎射從征雲南躍馬入水斫戰船破敵軍帝奇其勇敢而戒其輕銳己未從伐宋還自鄂州卒追封臨汾郡公謚顯毅父虎林赤從征阿里不哥車駕幸和林中道值大風晝晦敵猝至擊走之還佩其大父金符提點尙食尙藥二局常入侍帝問治天下何爲本曰重農爲本何爲先曰用賢爲先帝深善之僉宣徽院仍領尙膳使卒圖堅不花襲世職爲提點從征乃顏軍次航海敵猝至我軍畏其勢盛圖堅不花卽馳入其陳疾戰禽其首將以歸移軍哈罕大風晝晦敵兵鼓譟以進圖堅不花奮擊身被十餘創猶力戰復大破之叛黨請降眾議以爲親犯王師宜

元史卷三十六 列傳

十五

盡誅之圖堅不花獨曰航海本吾人脅誘從叛豈其本心且兵法殺降不祥宜赦之帝以此益知其可用遷同僉宣徽院事每論政帝前言直而氣不懾帝令察宿衛之士有才器者以名聞所論薦數十人用之皆稱職成宗卽位諸侯王會於上京凡芻餼宴享之節賜予多寡疏戚之分無一不當其意帝喜曰宣徽得此足矣將拜宣徽使辭曰先臣服勤於茲三世位不過僉佐臣何敢有加於先臣乎帝嘉其退讓乃允其請武宗至大二年詔出金帛大賚北邊諸軍以圖堅不花明習事宜使卽軍分給之屢爲同官賈廷瑞所嫉俄廷瑞以擅易官制被劾帝大怒欲殺之圖堅不花力諫帝曰賈廷瑞毀卿不直一錢卿何力言邪對曰廷瑞所坐不當死不敢以臣私隙誤陛下失刑廷瑞遂得

免鐵失王廷顯皆同官也仁宗嘗賜鐵失海船圖堅不花曰此軍國所資上不空賜下不空受又賜廷顯玉帶廷顯欲取大官羊錢一萬五千緡充其價復執不可於是怨之者眾延祐七年以疾去官英宗即位鐵失竟潛殺之後鐵失以大逆伏誅事乃白追封冀國公諡忠隱後進封冀安王加贈其三代皆王爵

土圖哈 子藏兀爾 張立 囊加台

土圖哈 舊作土伯身吾氏其先世為欽察國王父曰班都察即國王亦納思之孫也降于太祖語詳削平諸國傳從征麥怛斯有功率欽察百人從世祖征大理伐宋以強勇稱嘗侍左右掌尚方馬畜歲時捐馬乳以進因曰其屬曰哈刺赤班都察卒土圖哈襲父職備宿衛宗王海都構亂

元史卷三十六 列傳 六

漠北世祖命皇子北平王率諸王鎮守阿力麻里至元十四年諸王脫脫木失烈吉叛寇抄諸部掠憲宗所御大帳以去土圖哈率兵討之敗其軍於納蘭不刺邀諸部以還應昌部族只爾瓦台構亂脫脫木引兵應之土圖哈中途獲其候騎數十遂進敗只爾瓦台追脫脫木等至土兀刺河三宿而後返尋復敗之於斡歡河奪回所掠大帳還諸部之眾於北平十五年大軍北征率欽察千騎以從追失烈吉踰金山禽札忽台等以獻又敗寬折哥等襄瘡力戰獲羊馬輜重甚眾還朝帝召至榻前親慰勞之仍賜以奪回所掠大帳而諭之曰祖宗武帳非人臣所得御以卿能歸之故以授卿命欽察人隸諸王者皆別籍之以隸土圖哈選其材勇以備禁衛請以所部哈刺赤屯田畿內詔給

霸州文安縣田四百頃益以宋新附軍人八百俾領其事賜近郊田二千畝籍河東諸路蒙古軍子弟四千六百人隸其麾下二十三年置欽察親軍衛遂兼都指揮使聽以宗族將吏備官屬海都兵犯金山詔與大將多爾朵懷共禦之二十四年宗王乃顏叛陰遣使來結耶不干王勝刺哈王為土圖哈所執盡得其情以聞勝刺哈設宴邀二大將飲多爾朵懷將往土圖哈以事不可測遂止勝刺哈計不得行未幾有旨令勝刺哈入朝將由東道進土圖哈言於北安王曰彼分地在東脫有不虞是縱虎入山林也乃命從西道進既而有言耶不干王叛者眾欲先聞於朝然後發土圖哈曰兵貴神速若彼果叛我軍出其不意可即圖之否則與約而還即日啟行疾驅七晝夜渡圖兀刺河

元史卷三十六 列傳 七

戰於孛怯嶺大敗之耶不干僅以身免世祖時親征乃顏聞之遣使命土圖哈收其餘黨沿河而下遇叛王鐵哥軍萬騎擊走之獲馬甚眾并禽叛王哈爾魯等獻俘行在所誅之欽察康里之屬自叛所來歸者即以付土圖哈置哈刺魯萬戶府欽察之散處安西諸王部下者悉令統之中書僉省王遇奏土圖哈多取良民指為欽察俘土圖哈奏辨詔不問時成宗以皇孫撫軍於北詔以土圖哈從追乃顏餘黨於哈刺溫誅叛王兀塔海盡降其眾二十五年諸王耶只里為叛王火魯哈孫所攻遣使告急復從皇孫移師援之敗諸兀魯輝還至哈刺溫山夜渡貴烈河敗叛王哈丹盡得遼左諸部置東路萬戶府世祖多其功以宗王耶只里女弟妻之二十六年從皇孫晉王征海都抵杭海

嶺敵先據險諸軍失利惟土圖哈以其軍直前應戰翼晉王而出追騎大至乃選精銳設伏以待之寇不敢逼秋七月世祖巡幸北邊召見慰諭之曰昔太祖與其臣同患難者飲班朮河之水以記功今日之事何愧昔人還至京師大宴羣臣論功行賞帝欲先欽察之士土圖哈言慶賞之典宜先蒙古帝曰爾毋飾讓蒙古人誠居汝右力戰豈在汝右邪召諸將頒賞有差初世祖既取宋命籍建康廬饒租戶千爲哈刺赤戶益以俘獲千七百戶賜土圖哈仍官一子以督其賦二十八年土圖哈奏哈刺赤軍以萬數足以備用詔賜其部曲毳衣縑素萬匹於是率哈刺赤萬人北獵於漢塔海邊寇聞之皆引去二十九年秋略地金山獲海都之戶三千餘還至和林有詔進取乞里吉思三十

元史卷三十六

列傳

六

年春師次欠河冰行數日始至其境盡收五部之眾屯兵守之奏功加龍虎衛上將軍仍給行樞密院印海都聞取乞里吉思引兵至欠河復敗之禽其將孛羅察三十一年成宗即位詔以邊境事重其免會朝遣使就賜七寶金壺盤盃各一鈔萬貫白氈帳一獨峯駝五別賜其麾下士鈔千二百萬貫元貞元年春仍出守北邊二年秋諸王附海都者率眾來歸邊民驚擾身至玉龍罕界饋餉安集之導諸王藥木忽等入朝帝解御衣以賜大德元年卒追封延國公諡武毅後加封昇王子八人其三曰藏兀爾舊作林兀兒襲父職領征北諸軍大德元年帥師踰金山攻巴鄰之地巴鄰之南有答魯忽河其將帖良台阻水而軍伐木柵岸以自庇士皆下馬跪坐持弓矢以待我軍

矢不能及馬不能進藏兀爾命吹銅角舉軍大呼聲震林野其眾不知所爲爭起就馬於是麾師畢渡涌水拍岸木柵漂散因奮戈馳擊追奔五十里盡得其人馬廬帳還次阿雷河與海都援將孛伯遇河之上有高山孛伯陳於山上馬不利下馳藏兀爾麾軍渡河蹙之其馬多顛躓急擊敗之追奔三十餘里孛伯僅以身免二年北邊諸王都哇徹徹圖等潛師襲火爾哈圖之地其地亦有山甚高敵兵據之藏兀爾選壯士持挺刃四面仰攻盡殪其軍拜欽察親軍都指揮使是時武宗在潛邸領軍朔方軍事必諮於藏兀爾及戰藏兀爾常爲先四年秋拒叛王徒麥幹魯思等於闊客之地及其未陳直前搏之敵不能支追踰金山乃還五年海都兵越金山而南止於鐵堅古山因高以自

元史卷三十六

列傳

七

保藏兀爾急引兵敗之復與都哇相持於兀爾圖之地藏兀爾以精銳馳其陳左右奮擊殺傷幾盡武宗親視其戰嘆爲壯勇遣御史大夫圖只等即其地集諸王軍將問戰勝功狀咸稱藏兀爾功第一七年秋入朝帝諭勞之賜以衣帽金珠等物甚厚拜樞密院副使欽察親軍都指揮使仍賜其軍鈔四千萬貫九年諸王都哇察巴爾明里等相約罷兵請罪帝許赦之於是明里諸王先後入朝特爲置驛以通往來十年知樞密院事成宗崩武宗時在渾麻出海上藏兀爾請急歸定大業以副天下之望武宗即位賜以先朝所御大武帳珠衣等物拜平章政事仍兼樞密封容國公至大二年入朝加封句容郡王改授金印又以其足疾賜以世祖所乘安輿藏兀爾叩首固辭別命有司置

賜之俾得乘至殿門下仁宗即位入朝延祐初敗叛
王耶先不花等軍於亦忒海彌什之地又敗耶先不花所
遣將於赤麥干之地追出其境至鐵門關遇其大軍於札
亦爾之地又敗之帝念其功而憫其老召入商議中書省
事仍知樞密院事大理國進象身金飾轎即以賜之每見
必賜坐賜食待以宗室親王之禮卒封揚王子六人燕帖
木爾答刺罕太師右丞相太平王自有傳撒敦左丞相答
里襲封句容郡王

張立泰安長清人初隸嚴實麾下略江淮有功署為百戶
成戊午憲宗征蜀徵諸道兵立從行次大獲山城攻陷外
堡奪戰船百餘艘復從攻釣魚山有功中統初從世祖北
征屢遷左衛親軍副都指揮使賜金虎符十四年春率步

元史卷三十六 列傳

手

卒千人轉粟赴和林道出應昌會酋帥畔換謀不軌以射
士三千踵其後欲乘閒劫奪資糧立覺有異急命環車為
柵以備之賊眾已合矢如雨下立之初發上都也每車載
二板以備不虞至是建板於車矢不能入騎卒稍前即以
戈撞之強弩繼發賊不得近相持連日乃解去

囊加台乃蠻人會祖以下皆仕其國太祖平乃蠻父麻察
來歸太祖命與察刺同總管蒙古漢軍由是從世祖伐宋
破阿里不哥平李璫皆有功囊加台幼從父習戰有謀略
從阿朮圍襄陽以功授漢陽千戶從丞相伯顏攻復州與
宋人戰敗宋兵於風波湖渡江後伯顏南攻鄂州阿朮北
攻漢陽囊加台與張弘範等以戰艦五十焚其蒙衝三千
兩城大恐皆出降伯顏軍次安慶賈似道督師江上遣宋

京來請和軍至池州遣囊加台偕宋京報似道時暑雨江
漲世祖慮士卒不習水土遣使令緩師伯顏阿朮與諸將
議乘勢徑前遂進軍至丁家洲似道師潰伯顏次建康遣
囊加台赴闕陳軍事奉旨還諭伯顏自是先後往報宋使
師逼臨安復遣取降表玉璽徵宋將相文武百官出迎師
至皋亭山伯顏遣囊加台以降表玉璽馳獻旋與阿刺罕
董文炳等取溫台福州召為都元帥管領通事軍馬東征
日本未至而還詔以所管軍充萬戶武宗在潛邸囊加台
嘗從北征與海都戰於帖堅古山明日又戰海都圍之山
上囊加台決圍而出與大軍會武宗還師囊加台殿海都
遮道不得過囊加台選勇敢千人直前衝之海都披靡乃
由稱海與晉王軍合以疾歸成宗崩仁宗奉母后在懷州

元史卷三十六 列傳

主

成宗后欲立安西王阿難荅仁宗遣囊加台與八思台詣
諸王圖刺議事察察人心向背時內外洶洶猶豫莫敢言
囊加台獨贊圖刺定策迎立乃先歸白仁宗曰先發制人
遲則受制於人矣仁宗意乃決內難既平仁宗監國命同
知樞密院事武宗即位真拜同知樞密院事仁宗嘗語近
臣曰今春之事吾疑不能主賴囊加台一語而定亦漢文
帝從代來之宋昌也尋以老病乞骸骨不允仁宗即位授
河南江北行省平章佩金虎符終其身卒封浚都王子教
化執禮和台孫脫堅皆世襲有位

阿沙不花

弟康里托托

阿沙不花者康里國王族也初太祖拔康里時其祖母麻
里舊作葛麻氏新寡有二子曰曲律口牙牙皆幼而國亂

家破無所依欲歸朝廷念無以自達一夕有數駝皆重負突入營中驅之不去旦乃繫駝營外置所負其旁俟有求者歸之如是十餘日終無人問乃發視其裝皆西域重寶驚曰殆天欲資我而東邪遂驅駝載二子越數國至京師時太宗甫立盡獻其所有帝深異之命有司治邸舍具廩餼居二年聞國中已定謁帝欲歸帝曰汝昔何爲而來今何爲而去對曰昔國亂無主遠歸陛下今賴陛下威德聞國已定欲歸守墳墓畱二子事陛下帝喜立召二子入宿衛而禮遣之後十三年復來則二子已從憲宗伐蜀逮至和林聞憲宗崩諸將皆還而二子獨後方以爲憂禱於神廟得吉語還至舍則二子已至矣遂畱居焉曲律無子身身後封康國王生六子阿沙不花取賢年十四入侍世祖

元史卷三十六 列傳

三

賜土田給奴隸使居興和之天成會西蕃遣使者有所奏請既諭遣之後數日帝以其事問近侍諸大臣皆莫能對阿沙不花從旁代對甚悉帝怒諸大臣曰卿等任天下之重如此反不若一童子邪嘗扈從上都方入朝而宮草多露跣足而行帝御大安閣望見之謂失侍臣體命諸門衛勿納阿沙不花乃從水竇中入帝問故以實對且曰臣一日不入侍身將何歸帝大悅更諭諸門衛聽其出入命飭四宿衛兵器無敢或慢復使掌門無敢闌入帝曰可用矣乃顏叛諸王納牙等皆潛應帝患之奏曰臣愚以爲莫若先撫安諸王乃行天討則叛者勢自孤帝即命其行北說納牙曰大王聞乃顏反邪曰聞之曰大王知乃顏已遣使自歸邪曰不知也曰聞大王等皆欲爲乃顏外應今乃顏

既自歸是獨大王與主上抗幸主上聖明知非大王意置不問然二三大臣不能無惑大王何不往見上自陳爲萬全計納牙許之於是諸王之謀皆解及還報帝始親征命阿沙不花徵兵遼陽以千戶帥昔寶赤之眾從行及師還上言大同興和兩郡當車駕所經有帷臺嶺數十里無居民請令有司作室嶺中徙邑民百戶居之割境內昔寶赤牧地使耕種自養帝復欲盡徙桃山民以其地爲牧地阿沙不花固請存三千戶以給鷹食民德之至元三十年成宗以皇孫撫軍北邊備禦海都阿沙不花從踰金山戰杭海有功及卽位會太宗正脫爾速以賊敗就命代之有訴朱清張瑄陰私既抵罪帝遣兵馬都指揮使忽刺朮籍其家以受賂誅更命阿沙不花往具以實聞賜鈔萬五千緡

元史卷三十六 列傳

三

兼兩城兵馬都指揮使事先是武宗爲懷寧王總軍漠北訪人材可大用者對曰母弟托托將相材也命從行後果爲名臣成宗崩安西王阿難荅乘間覲大統武宗適遣托托上京計事丞相哈刺合孫令急還報而成后已密諭通政院禁止驛馬阿沙不花知事急乃倒署先日文書給馬去太后及仁宗將至大都有言安西王謀以三月三日奉成后舉事者阿沙不花聞之密報哈刺合孫曰先人者勝後人者敗后一垂簾則舉朝聽命我等皆受制於人矣哈刺合孫乃於朔日白仁宗以計執安西王送上都縛誅丞相阿忽台以下諸姦臣仁宗即日監國中外警服莫敢動乃遣使北迎武宗而武宗遲迴不進遣使還報太后曰非阿沙不花往不可乃遣奉衣帽尙盪以往至野馬川見武

宗備道兩宮意及陳安西王謀變始末且言太弟監國所以備他變臣萬死保其無他武宗大悅解衣衣之拜中書平章政事詔先奉蒲萄酒及錦綺還報兩宮仁宗即日率羣臣出迎武宗入上都命與丞相塔思不花還京師治安西黨諸連坐三十餘人皆釋之帝嘗出太府金分賜諸王貴戚阿沙不花入朝見一人倉皇狀曰此必盜金者搜之果得黃金五十兩白金百兩以聞詔即以金賜之阿沙不花請辭金以贖盜死帝悅從之有近臣蹴踘帝前帝命賞鈔十五萬貫諫曰以蹴踘而受上賞則奇技淫巧日進而賢者日退將如國家何臣不敢奉詔乃止武宗嘗御五花殿丞相中丞等侍阿沙不花見帝容色日悴乃進曰萬金之身不知愛此古人所戒也陛下不思祖宗倚託之重天

元史卷三十六 列傳 五

下仰望之切而惟麴蘖是耽姬嬪是好是猶兩斧伐孤樹未有不顛仆者陛下縱不自愛如宗社何帝曰非卿孰為朕言命進酒謝曰臣方欲陛下節飲而反勸之不敢奉詔左右皆賀帝得直臣遂進中書右丞相錄軍國重事封康國公至大二年卒年四十七至正元年追封順寧王諡忠烈子伯嘉訥亦廉直憂國如家嘗為京尹屯儲衛誘小民誣首海商百餘人為盜而掠其貲獄具械送刑部伯嘉訥盡白其冤後遷翰林侍讀學士
康里托托托托舊作脫脫阿沙不花之弟也生而姿貌魁梧少時從其兄獵於燕南使歸獻所獲世祖見其骨氣沈雄步履莊重歎曰後日大用之才也命入宿衛成宗初奉使至北邊丞相伯顏見之問曰汝誰氏子托托以實對伯顏曰吾

老矣他日可大用者汝也武宗以懷寧王撫軍北鄙托托從行大德五年海都犯邊托托從大軍至杭海山兵始交王銳欲出戰托托執轡力諫王怒力鞭其手不退曰皇子在軍中如身有首如衣有領脫有不虞眾安所附臣請以身陷陳先士卒遂破之成宗大漸丞相哈刺合孫稱疾臥直廬中托托適以使事至即俾馳告武宗以國恤時仁宗奉興聖太后至自懷孟定內難太后惑於陰陽家言欲武宗讓位於弟武宗聞之不懌急遣托托往察事機而親率大軍由西道進按輝由中道藏兀爾由東道各以勁卒一萬從托托馳至大都入見太后具道武宗意太后復命往軍中致語武宗感悟釋然無疑先遣阿沙不花還報武宗正位尊太后為皇太后立仁宗為皇太子三宮無間托托

元史卷三十六 列傳 五

兄弟之力為多先是知樞密院只爾哈忽在潛邸時嘗有不遜語武宗既立將置於法托托諫曰陛下新正位大信未立而以私憾行誅戮恐人人自危況其人習先朝典故當今有用才也乃宥之海都子察巴爾嗣王位素服武宗威名至是率諸王內附詔設宴大庭故事凡大宴必命近臣敷宣王言為告戒托托令只爾哈忽具其言以進果稱旨及諸王大臣被燕服就列托托即席陳西北諸藩始終離合之由去逆效順之義辭旨明暢聽者傾服拜同知樞密院事尋進中書平章中書左丞相知無不言言無不行中外翕然稱賢相至大三年丞相三寶奴等謀勸武宗立皇子和世球為皇太子托托曰太弟曩定大難功在宗社位居儲宮已有成命自是兄弟叔姪世世相承孰敢紊其

序者三寶奴曰今日兄以授弟後日能保叔必授姪乎托
托曰前日能以弟推兄他日不能以子傳姪邪且我不渝
信而彼渝之責有攸歸莫能奪其議是時尚書省賜予無
節遷敘無法財用日耗名爵日濫托托極言其敝且以去
就爭遂詔濫受宣敕者赴所屬繳納僥倖路塞奔競頓衰
邊將脫火赤請以新軍萬人益宗王丑漢廷議俾托托往
給其資裝托托謂時方寧謐不宜挑變生事辭不行遂遣
丞相圖忽魯等二人往幾致激變仁宗即位以爲江浙行
省左丞相下車問民利病或謂杭城故有便河通于江潯
堙廢已久若疏鑿以通舟楫物價必平時有旨以災異禁
興上功托托曰敬天莫先勤民民蒙其利則災沴自弭土
功何尤竟以便宜行之不一月而成是時鐵木迭爾爲丞
相欲固寵乃議立仁宗子英宗爲皇太子而明宗以周王
出鎮雲南又譖托托爲武宗舊臣詔逮至京師居數日藏
兀爾失列門傳兩宮旨諭復還鎮英宗嗣位召拜御史大
夫時鐵失先爲大夫陰忌之喉言者劾其擅離職守家居
不出者五年卒年五十六追封和寧王謚忠獻托托嘗卽
宣德別墅延師訓子鄉人化之皆向學朝廷賜其精舍額
曰景賢書院歿卽其中祠焉子九人位宰輔者曰塔識見
忠節者曰達識各有傳

元史卷三十六 列傳

美

元史卷三十六終

元史卷三十七

列傳二十一

平南夷東夷諸臣

元代戎事雄於西北而絀於東南長於野戰馳驅而短於
舟楫炎瘴天時地利人力自古難兼然爲民捍患者功多
立生毀開邊者役必衄斯若有天意焉若陳天祥諫征八
百媳婦之疏劉宣諫交趾日本之役劉切深痛垂鑒百世
已見中葉直臣傳然實與此征蠻征島諸臣傳相表裏焉
列傳之立非紀耀武乃懲黷武也至若舊史平緬有怯烈
平南蠻有脫力世官征交趾有昔都爾征日本有張禧征
高麗有王國昌皆偏裨鷹犬止宜附傳大帥之末而動輒
特傳此史法之所以不尊與

兀良合台

信直日

怯烈

愛魯

樊楫

昔都

元史卷三十七 列傳

一

兀良合台速不台子也初事太祖時憲宗爲皇孫尙幼以
兀良合台世爲功臣家使護育之憲宗在潛邸遂分掌宿
衛歲癸巳領兵從定宗征女真國破完顏萬奴于遼東繼
從諸王拔都征欽察兀魯思阿孛烈諸部丙午又從拔都
討孛烈爾乃闐迷思部平之戊申定宗崩拔都與宗室大
臣議立憲宗事久未決閱三年諸王大曾定宗皇后問所
宜立皆惶惑莫敢對兀良合台以太宗生前褒憲宗之語
宣於眾議遂定憲宗即位之明年世祖以皇弟總兵討西
南夷烏蠻白蠻鬼蠻諸國以兀良合台總督軍事鬼蠻卽
赤徒哥國也三年癸丑秋大軍自旦當嶺入雲南境摩些
二部酋長迎降遂至金沙江兀良合台分兵入察罕章蓋
白蠻也所在寨柵以次攻下之獨阿塔刺所居半空和寨

依山枕江牢不可拔使人覘之言當先絕其汲道兀良合台率精銳立礮攻之阿塔刺遣人來拒兀良合台遣其子阿朮迎擊之寨兵退走遂并其弟阿叔城俱拔之進師取龍首關翊世祖入大理國城四年甲寅秋復分兵取附都善闡轉攻合刺章水城屠之合刺章蓋烏蠻也前次羅都府大酋高昇集諸部兵拒戰大破之於洩可浪山下遂進至烏蠻所都押赤城城際滇池三面皆水既險且堅選驍勇以礮摧其北門縱火攻之皆不克乃大震鼓鉦進而作作而止使不知所爲如是者七日伺其困乏夜五鼓遣其子阿朮潛師躍入亂斫之遂大潰至昆澤禽其國王段智興及其渠帥馬合刺昔以獻餘眾依阻山谷者分命裨將耶里脫伯押真掩其右合台護尉掩其左約三日捲而內

元史卷三十七 列傳

二

向及圍合與阿朮引善射者二百騎期以三日四面進擊兀良合台陷陳慶戰又攻纖寨拔之至乾德哥城兀良合台病委軍事於阿朮環城立礮以草填塹眾軍始集阿朮已率所部搏戰城上城遂破五年乙卯攻不花合因阿合阿因等城阿朮先登取其三城又攻赤徒哥山寨阿朮緣嶺而戰遂拔之乘勝擊破魯斯國之塔渾城又取忽蘭城魯斯國大懼請降阿伯國有兵四萬不降阿朮攻之入其城復由阿魯山寨進攻阿魯城克之乃搜捕未降者遇赤徒哥軍於合達台山追赴臨崖盡殺之自出師至此凡二年平大理五城八府四郡泊烏白等蠻三十七部兵威所加無不款附六年丙辰征白蠻波麗國阿朮生禽其驍將獻俘闕下詔以便宐取道與鐵哥台兵合遂出烏蒙趨瀘

江剋土刺蠻三城卻宋將張都統兵三萬奪其船二百於馬湖江斬獲不可勝計遂道嘉定重慶抵合州濟蜀江與鐵哥台會七年丁巳以雲南平遣使獻捷於朝且請依漢故事以西南夷悉爲郡縣從之賜其軍銀五千兩綵幣二萬四千匹加大元帥還鎮大理遂經六盤山至臨洮府與大營合月餘復西征烏蠻秋九月遣使招降交趾不報冬十月進兵歷交趾境國主陳日昷隔江列象騎步卒甚盛兀良合台分軍爲三隊濟江徹徹都從下流先濟大兵居中駙馬懷都與阿朮在後仍授徹徹都方略曰汝軍既濟勿與之戰彼必來逆我與駙馬隨斷其後汝伺便奪其船蠻若潰走至江無船必爲我禽矣師既登岸徹徹都違命卽縱與戰交趾兵雖大敗得駕舟逸去兀良合台怒曰先

元史卷三十七 列傳

三

鋒違我節度軍有常刑徹徹都懼飲藥死兀良合台入交趾軍令嚴肅秋毫無犯越七日日昷請內附於是置酒大饗軍士還軍押赤城八年戊午引兵入宋境其地炎瘴軍士皆病遇敵少卻時兀良合台復病將旋師阿朮戰馬五十四匹夜爲土刺蠻所掠藏匿山寨乃親率將士攀崖擣破其巢生禽賊酋盡得前後所盜馬千七百匹乃屠押赤城而還時憲宗方遣世祖征宋詔交趾軍以明年正月會長沙南北夾攻乃率四王騎兵三千蠻僉萬人破橫山寨關老蒼關徇宋內地宋陳兵六萬以俟遣阿朮與四王潛自間道衝其中堅大敗之盡殺其眾乘勝躡貴州蹂象州入靜江府連破辰沅二州直抵潭州城下潭州出兵二十萬斷我歸路復遣阿朮與大納玉龍帖木爾軍其前而自與

四王軍其後夾擊破之兵自入敵境轉鬪數千里未嘗敗
北大小十三戰殺宋兵四十餘萬禽其將大小三人其畱
守又遣兵來攻追至門濠掩溺殆盡乃不敢復出壁城下
月餘時世祖已渡江駐鄂州遣耶里蒙古領兵二千來援
且加勞問遂自鄂州之許黃洲北渡與大軍合庚申世祖
卽位夏四月兀良合台還至上都後十二年卒年七十二
子阿朮自有傳

信苴日契人也姓段氏世爲大理國王憲宗朝王師平大
理獲其王段智興獻諸朝詔赦之使歸國丙辰入覲獻地
圖請悉平諸部并條奏治民立賦法憲宗大喜命智興悉
主諸蠻白蠻等部智興遂委國任其弟信苴日自與信苴
福率契蠻軍二萬爲前鋒導大將兀良合台討平諸部之

元史卷三十七 列傳

四

未附者攻降交趾入朝智興在道卒中統二年信苴日入
覲世祖復賜虎符詔領大理等城各萬戶以下皆受節制
至元初烏蠻長舍利畏結三十七部諸蠻各殺守將以叛
信苴日率眾進討大敗之於洱水復遣字羅攻賊於統矢
城又大破之遂定統矢其秋舍利畏又以眾十萬謀攻大
理詔都元帥耶先與信苴日討之破諸安寧遂復善闡諸
城蠻部平十一年舍利畏復叛信苴日遣石買等詭爲商
旅執費往見挺矛撞殺之梟其黨于市於是立郡縣置守
令行賦役施政化與中州等十三年緬國擁象騎數萬掠
金齒南甸欲襲大理行省遣信苴日與萬戶忽都領騎兵
禦之有功與其子阿慶入覲進大理威楚金齒宣慰使都
元帥留阿慶宿衛東宮尋尚公主十九年詔同右丞拜答

爾迎雲南征緬之師行至金齒卒信苴日治大理凡二十
三年其子孫世守大理與元代相始終

怯烈西域人世居大原由中書譯史從平章賽典赤經略
川陝旋署雲南行省幕官分省大理會緬夷入寇怯烈以
戰具資軍士討平之平章納速刺丁遣詣闕敷奏邊事世
祖愛其聰辯拜鎮西平緬麓川等路宣撫司達魯花赤兼
招討使至元二十年諸王相吾答爾右丞大卜參政耶罕
的斤奉詔征緬耶罕的斤造船二百于阿昔阿禾兩江怯
烈率之爲鄉道順流破江頭城以都元帥袁世安守之遣
使招諭緬王不應建都大公城乃其巢穴遂水陸並進攻
大公城拔之建都金齒十二城皆降振旅而還復從雲南
王入緬總兵三千屯鎮驃國後入覲世祖詢以緬國始末

元史卷三十七 列傳

五

擢僉緬中行省事命頒詔于緬宣布威德緬王稽顙稱謝
遣世子信合八的入貢進怯烈雲南行省左丞大德四年
卒耶罕的斤匣刺魯氏以征蜀征幹端征緬累官雲南行
省右丞四川行樞密院副使舊史怯烈及耶罕的斤皆專傳今并附
愛魯唐兀人父昔里鈴一作鈴部太宗時從諸王拔都
皇子貴由皇姪蒙哥征欽察征幹羅思征阿速拔蔑怯思
城有功授千戶進秩大名路達魯花赤愛魯襲職至元五
年從征金齒諸部蠻兵萬人絕縹甸道擊之斬首千餘諸
部震服六年再入平二十四砦得七馴象以還七年改中
慶路達魯花赤兼管義熒軍十年平章賽典赤行省雲南
令愛魯疆理永昌中慶版籍卽其地屯田十三年詔開烏
蒙道帥師至玉連等州所過城砦未附者盡擊下之水陸

皆置驛傳再平忙部之叛禽其酋耶可布薛送京師伏誅
屢遷雲南行省參政十八年復討烏蒙羅佐山白水江叛
蠻十九年諸王相吾答爾征緬甸魯魯俱餉二十二年烏
蒙土官阿蒙殺宣撫使以叛與右丞拜答往征之愛魯習
知其山川道理指授諸軍分道進擊生禽阿蒙以歸二十
四年進右丞以六千人從鎮南王征交趾破其軍四萬於
木兀門比三月大小一十八戰至其王城與諸軍會戰又
二十餘合功為多二十五年感瘴瘴卒封魏國公諡忠節
贈其父昔里鈴卜大師子教化中書平章

元史卷三十七

六

分二道一入永平一入女兒關楫與參政烏馬爾將舟師
入海與敵舟遇安邦口擊斬四千餘級獲船百餘艘遂至
萬劫山合鎮南王兵進攻十二月陳日烜棄城走敵南堡
二十五年正月王師破堡日烜走入海中交人皆匿其粟
而逃王師抵海口而張文虎餽餉之舟不至二月天暑食
目盡於是王命班師楫與烏馬爾將舟師還交兵邀遮白
藤江湖落舟膠敵舟大集矢下如雨力戰自卯至酉楫被
創投水中交兵鉤執毒殺之至順元年贈上黨郡公諡忠
定傅若金狀其行見傳與

木追擊叛將於黑城哈刺火林之地平之十七年遷侍衛
軍百戶時亡宋猶有未附城邑昔都爾自請舉兵下之行
省從其請諸城聞風而附二十四年遷漢洞左江萬戶府
達魯花赤是年秋七月從鎮南王征交趾冬十月至其境
駐兵萬劫江右丞阿巴赤命進兵拔其一宇城射交人奪
其戰艦明年春正月大兵進逼興道王居與交人戰於塔
兒山奮戈撞擊之右臂中毒矢流血盈掬灑血奮戰射死
交人二十餘仍督諸軍乘勝繼進大敗之遂入其都城四
月戰於韓村堡禽其將黃澤是夜二鼓交人突至謀劫營
官軍堅壁以待敵失計詰旦鳴鼓出營交人退卻追殺甚
眾還營立木柵增邏卒交人不敢犯五月鎮南王引兵還
以昔都爾為前軍行次陷泥關戰數百合敵稍卻遂還迎

元史卷三十七

七

鎮南王於女兒關交人四萬餘截其要道時大軍乏食且
疲於戰將佐相顧失色昔都爾率勇士揮戈衝擊之交人
卻軍十餘里遂全師還二十六年賜虎符授礮手軍匠萬
戶府達魯花赤大德二年卒

劉國傑

楊漢英 脫力世官

劉國傑字國寶本女真人姓烏古倫氏後入中州改姓劉
氏少從軍漣海以材武為隊長至元六年選其兵取襄陽
以益都新軍千戶從張弘範成萬山堡以兵數百敗宋兵
萬人斬首四千餘級由是有名從略荆南抵歸峽轉戰數
千里從攻樊城被傷血戰世祖聞其勇召見遷管軍總管
從伯顏南征謀取黃家灣堡國傑先登拔之宋將張世傑
盛兵焦山來禦施鐵繩聯戰船旋江中以示必死阿尤率

諸軍進戰國傑與董文炳左右夾擊焚其船宋軍大潰追奔至圖山奪黃鵠船數百帝壯之賜號霸都國傑行第二因呼之曰劉二霸都而不名宋平入朝以漢軍都元帥將衛兵萬人征叛王於北方大雪環車爲柵與士卒同臥起諸王脫脫木寇和林國傑度其眾悉出營必虛選輕騎襲之降其萬眾脫脫木屢戰不利又殘暴失眾心眾殺之來降十九年上欲復征日本召國傑爲征東行省左丞治軍淮揚會閩盜黃華嘯眾十萬江浙爲震乃命以征東兵會福建行省左丞忽刺出討之國傑直抵赤巖寨斬黃華而忽刺出軍始至欲搜誅潰賊國傑曰首亂者華也餘皆脅從招諭不歸誅之未晚未幾果盡出降復檄止未到之蒙古兵三萬閩民德焉二十三年朝廷以東南盜未靖改國

元史卷三十七 列傳 八

傑湖廣左丞既至羣盜以次破降將校請曰此輩久亂急則降降而有變將復反不如盡阮之國傑持不可乃相要地爲三屯衡曰清化永曰烏符武岡曰白倉每屯分眾五百人使墾田備賊未半歲皆自歸招討廣西諸盜時肇慶懷集諸賊保險自固國傑鑿山入掩殺略盡由賀州移軍道州江西盜起龍泉下令往擊或曰此他省盜也國傑曰害民之寇何問彼此乃選輕兵棄旗鼓去纓飾一日夜趁賊境賊眾數千逆戰望見軍容不整曰此鄉丁也易之國傑以數十騎陷陳眾從之賊大敗日暮忽收兵去堡中民望見莫知其誰明日又忽至召堡民告之曰汝知吾劉二霸都邪民驚以爲神江西萬戶劉某兵至賊已平矣遷湖廣行樞密院副使還軍武昌時上思州黃勝許恃險遠悍

兵毒矢出入巖洞篁竹中如飛與交趾表裏寇邊詔國傑討之身率士奮戰賊走象山山近交趾皆深林不可入乃柵阻其出入徐伐山通道且戰且進二年拔其寨勝許走交趾禽其妻子戮之盡取賊巢地爲屯田募慶遠諸種人耕之爲兩江蔽障蠻人莫敢犯帝謂朝臣曰湖廣重地惟劉二霸都足以鎮此他人不能也命無遷他官俄議問罪交趾加湖廣安南行平章事副諸王亦吉列台征之未行會帝崩乃止成宗卽位復置行樞密院於衡州仍除副使初黔中諸蠻酋旣內附復叛又巴洞蠻犯澧州泊崖洞楠木洞蠻犯辰州朝廷嘗討降之升泊崖爲施溶州以其酋知州事旋復叛攻之不能下赦之亦不降國傑馳至辰州以施溶賊之腹心而石農坎三羊峯其左右臂乃麾諸軍

元史卷三十七 列傳 九

先攻石農坎賊不能支棄寨遁遂擣施溶斬其酋復窮捕其黨刊木闢路千餘里元貞元年卽軍中加湖廣平章以辰澧地接溪洞乃復宋時民屯之制在澧者曰隘丁在辰者曰寨兵繼又經畫周湖廣四境東盡交廣西互黔中凡盜所出沒地南北三千里置戍三十有八列屯守之由是諸蠻不能復寇盜賊遂息國傑在軍中傾家貲以賞將士帝聞命倍償之部曲有功者各遷官大德五年朝廷以右丞劉深言興師征八百媳婦國所過邊民不堪蹂躪于是羅鬼國女酋蛇節及獠官宋隆濟叛遮劉深兵圍貴州糜爛汗漫不可收拾詔國傑將諸翼兵合四川雲南思播兵討之劉深以下皆受節制賊土產健馬習地險北騎不利於山戰屢失利國傑令蜀軍二萬入烏蒙芒部而自統三

萬及思播兵萬人分三道進國傑從中道節制諸軍賊所至柵險以拒國傑身先士卒選勁弩列前或設伏或間襲又令人持一盾布釘其上陳交即棄盾佯遁以陷賊馬轉戰數千里或捕或降抵雲南昔安境賊不能復軍七年春禽斬蛇節宋隆濟等西南夷悉平詔領其將士入見張宴享之命還益都省墓旋卒追封齊國公諡武宣子脫歡湖廣平章尙憲宗孫女許有壬碑其神道曰至元初江南蕩平天下甫定如大病始愈必有餘疾此甫息而彼旋見未可易視致病加於小愈故閩中江西湖南黔中之諸盜廣東西之諸獠是雖南服之餘疾非朔方士馬所能殄也國傑獨任其責獨雜招來威名所及莫不斂迹南北萬里始終百戰取後小人啟釁於荒遠之蠻敗軍亡將復收功救

元史卷三十七列傳

十

敗於國傑之手其齋志以逝者獨有未取交趾世以爲國傑恨而亦爲國傑幸焉又完者拔都欽察人從伯顏平江南有功閩賊陳弔眼聚黨數萬劫掠汀漳諸路連年未平十七年命完者同塔里赤以兵五千往討而賊黨黃華三萬眾擾建寧完者先引兵鼓行歷其境黃華驚懼納款完者知其可用乃聞於朝詔授華征蠻副元帥使爲前驅破賊五寨十九年禽陳弔眼餘黨悉平累官江浙行省平章卒贈太尉封林國公塔里赤康里人從破襄樊渡江入臨安以禽陳弔眼復漳州功取授福建宣慰使舊史完者拔都完者都本一人而復傳塔里赤專傳今并附楊漢英字熙載又稱賽因不花者賜名也其先太原人唐季南詔陷播州有楊端者以應募起竟復播州遂使領之

五代以來世襲其職漢英年八歲襲父職至元二十五年入朝帝善其應對復因宰臣奏安邊事帝益嘉之改授宣撫使尋升侍衛親軍都指揮使成宗即位漢英再入覲大德五年宋隆濟及女酋蛇節等叛詔湖廣行省平章劉國傑率兵偕漢英討之六年秋九月師出播境連破賊前駐蹉泥賊騎猝至漢英奮擊先進大軍繼之賊潰遂降阿其下竿籠望塵送款者相繼七年正月進軍暮窩賊眾復合又破之於墨特川斬蛇節及宋隆濟等西南夷悉平至大四年播南盧崩蠻內侵詔偕思州宣慰使田茂忠率兵討之卒於軍年四十追封播國公諡忠宣

元史卷三十七列傳

十一

慰司事卒於官脫力世官襲父職時定昌路總管谷納與其千戶阿夷同叛脫力世官引兵禽阿夷殺之復以軍千人從左丞愛魯討平亦奚不辭地未附民寨進攻羅羽抵落穿奪其關又攻怯爾地山寨先登破之遂總左手四翼兵悉平其地降蠻子童於納土原山寨進兼管軍副萬戶復討斬威龍州叛酋阿遮籍其民五百餘戶爲農入覲授三珠虎符進羅維斯宣慰使兼管軍萬戶既還治括戶口立賦稅以給屯戍昌州蘇尼巴翠等作亂以雲南王命討降之徙其眾於平川未幾入覲卒於京師子梭南班由宿衛襲職

洪福源 子俊奇 張禧 王國昌

洪福源其先中國人唐遣才子八人往教高麗洪其一也

子俊奇 張禧 王國昌

子孫世貴於三韓名所居曰唐城父大宣以都領鎮麟州福源爲神騎都領因家焉歲丙子蒙古兵起金源契丹九萬餘眾竄入高麗丁丑奪江東城據之戊寅太祖命哈赤吉札刺追討大宣迎降與哈赤吉等其擊之降其元帥趙忠壬午又遣著古與等十二人窺覘納款虛實還過害辛卯太宗命將撒里荅討之福源率先附之民併力進攻至王京高麗王噉請降置京府州縣達魯花赤七十二人監其國師還壬辰噉復叛殺所置達魯花赤悉驅國人入據江華島福源招集北界四十餘城遺民以待太宗復遣撒里荅將兵往討福源盡率所部合攻之至王京處仁城撒里荅中流矢卒其副帖哥引兵還唯福源留屯癸巳冬高麗率眾來攻屠西京劫大宣以東福源遂盡以北界之眾

元史卷三十七 列傳

十一

來歸處於遼陽瀋陽間帝嘉其忠甲午夏五月特賜金符管領歸附軍民仍招討本國未附人民乙未帝命唐古拔都與福源進討攻拔四縣五州乙巳定宗命同阿母罕共拔威州平虜城辛亥憲宗即位改授虎符癸丑從諸王耶虎攻拔禾山五城甲寅與札刺台合兵攻拔朮州七城會高麗族子王綽入質陰欲併統本國歸順人民請福源於帝遂見殺年五十三後贈瀋陽侯諡忠憲子七人俊奇君祥取知名

俊奇小字茶丘福源第二子也幼從軍以驍勇受知世祖嘗以小字呼之中統二年秋俊奇訟父冤世祖閱之命帶元降虎符襲父職管領歸附高麗軍民至元六年高麗權臣林衍叛冬十一月詔以其軍三千從國王頊帶討平

之遷江華島臣民復歸王京十二月命率兵往鳳州等處屯田八年林衍餘黨立高麗承化侯爲王引三別抄軍據珍島以叛五月命俊奇偕經略使欣都進兵討破之殺承化侯其黨金通精率餘眾走耽羅俊奇議先招其黨於王京通精不受撫十年乃與欣都率兵渡海擊破耽羅斬通精高麗始平十一年又命監造戰船經營日本八月投東征右副都元帥與都元帥忽敦等領舟師二萬渡海征日本拔對馬一岐空蠻等島十四年正月授東征都元帥鎮高麗二月率蒙古高麗女真漢軍從丞相伯顏北征叛臣只魯瓦台等四月至脫刺河猝與賊遇俊奇突陣無前以功賜金鞍勒弓矢十七年授征東行省右丞十八年與右丞欣都將舟師四萬由高麗金州合浦以進會右丞范文

元史卷三十七 列傳

十二

虎等之師於日本一岐平戶等島登岸兵未交遇颶風壞舟而還十九年十月命俊奇於平瀾監造戰船七百以圖後舉二十四年車駕征乃顏命率高麗女真漢軍三千扈從猝遇乃顏騎兵萬餘俊奇夜令軍中多裂裳帛爲旗幟斷馬尾爲旄掩映林木張設疑兵乃顏兵謂官兵大至遂降凱還授遼陽等處行尙書省右丞二十七年叛王哈丹等竄入高麗侵撓其國西京距遼陽二千里皆騷動特起俊奇鎮遼左便宣行事二十八年以疾卒年四十有八弟君祥從伯顏渡江平宋子萬從征乃顏俱有功

舊史君祥及萬皆有傳今

張禧東安州人以水軍總管從平宋立功至元十八年議征日本拜行省平章與右丞范文虎左丞李庭同率舟師

泛海東征至日本禧即捨舟築壘平湖島約束戰艦各相去五十步止泊以避風濤觸擊八月颶風大作文虎庭戰艦悉壞禧所部獨完文虎等議還禧曰士卒溺死者半其脫死者皆壯士也曷若乘其無回顧心因糧於敵以進戰文虎等不從曰還朝問罪我輩當之公不與也禧乃分船與之時平湖島屯兵四千乏舟禧曰我安忍棄之遂悉棄舟中所有馬七十匹以濟還至京師文虎等皆獲罪禧獨免子弘綱年十八嘗省父獄中獄卒併繫之弘綱佯狂謔笑守者易之既寢遂與禧逸去後從禧攻城徇地屢有功累遷定遠大將軍招討使從右丞劉深征八百媳婦國師次八番力戰而歿追封齊郡公諡武宣

元史卷三十七 列傳

古

王國昌膠州高密人中統初為左武衛親軍千戶至元五年人有上書言高麗境內黑山海道至宋境為近帝命國昌往視之泛海千餘里風濤洶涌從者恐勸還國昌神色自若徐曰奉天子威命未畢事而遽返可乎遂至黑山乃還帝延見慰勞時東夷皆內屬惟日本不受正朔帝知隋時曾與中國通遣使諭以威德令國昌率兵護送道經高麗時高麗有叛臣據珍島國昌與經略使卯突史樞等攻拔之八年復遣使入日本乃命國昌屯於高麗之義安郡以為援冬十月卒於軍子通襲職

史弼

高興 亦黑彌什

史弼字君佐一名塔刺渾蠡州博野人會祖彬率鄉人數百家詣降於木華黎木華黎書帛為符遣還既而州破得免弼長通蒙古語膂力絕人能挽強弓舉石師重四百斤

置數步外潼關守將王彥弼奇其才妻以女又薦其材勇於左丞相耶律鑄弼從至北京近侍見弼所挽弓以聞世祖召之試以遠堞連發中的令給事左右賜馬五匹中統末授金符管軍總管命從劉整伐宋攻襄樊嘗出挑戰手橫刀大呼曰我史奉御也宋兵卻退至元中諸將分十三道圍樊城弼攻東北隅凡十四晝夜破之遂從丞相伯顏南征攻沙洋堡飛矢中臂城拔凝血盈袖事聞賜金虎符軍至陽邏堡伯顏誓眾曰先登南岸者為上功弼率健卒直前宋兵逆戰奮呼擊走之遂登南岸論功第一進定遠大將軍鄂州平移軍而東駐瓜州以楊子橋乃揚州出入之道伯顏授弼三千人立木堡據其地宋將姜才以萬眾乘夜來攻人挾束薪填塹弼戒軍中無譁俟其至下柵木

元史卷三十七 列傳

五

發礮石擊之殺千餘人才乃退弼出兵擊之會相威阿朮兵繼至大戰才敗走禽其將張都統十三年六月才復以兵夜至弼三戰三勝天明才見弼兵少進迫圍弼弼復奮擊之騎士挾火鎗迎刺弼揮刀禦之左右皆仆手刃數十百人及出圍追者尚數百騎弼殿後敵不敢近會援兵至大破之才奔泰州及守將以揚州降弼從數騎由堡城入揚州出南門與之會以示不疑十五年入朝進江淮行省參政黃州路宣慰使是時盜起淮西及南康都昌弼皆討平之罷江州宣課司米稅以招徠米商十九年改浙西宣慰使二十一年黃華反建寧春復霖雨米價涌貴弼即發米十萬石平價糶之而後聞於省省臣欲增其價弼不允益出十萬石民得不飢改淮東宣慰使弼凡三官揚州人

喜刻石頌之號三至碑二十六年拜尚書左丞行淮東宣慰使冬入朝世祖欲征瓜哇謂弼曰諸臣爲吾腹心者少欲以瓜哇事付汝對曰陛下命臣臣何敢自愛二十九年拜福建行省平章往征瓜哇以亦黑彌什高興副之十二月弼以五千人合諸軍發泉州風急濤涌舟掀簸士卒皆數日不能食過七洲洋萬里石塘歷交趾占城界明年正月至東董西董山牛崎嶼入混沌大洋橄欖嶼假里馬荅句蘭等山駐兵伐木造小舟以入時瓜哇與鄰國葛郎構怨瓜哇主已爲葛郎所殺其壻土罕必閣耶攻葛郎不勝退保麻喏八歇聞弼等至遣使以其國山川戶口及葛郎國地圖迎降求救弼與諸將進擊葛郎兵大破之其酋走歸國高興言瓜哇雖降倘中變與葛郎合則孤軍懸絕事

元史卷三十七 列傳

共

不可測弼遂分兵三道與興及亦黑彌什各將一道攻葛郎至荅哈城破其兵十餘萬遂圍之其酋出降併取其妻子官屬以歸土罕必閣耶乞歸易降表及所藏珍寶入朝弼與亦黑彌什許之遣萬戶二人以兵二百人護還國土罕必閣耶於道殺二人以叛乘軍還夾路攘奪弼自斷後且戰且行行三百里得登舟行六十八日夜達泉州士卒死者三千餘人有司數其俘獲金寶香布等直五十餘萬又以沒理國所上金字表及金銀犀象等物進於是朝廷以其亡失多杖十七沒家貲三之一元貞元年起同知樞密院事月爾魯奏弼等以五千人渡海數萬里入近代未嘗至之國俘其王及諭降附近小國宜加矜憐遂詔以所籍還之拜江西行省右丞三年遷平章政事封鄂國公卒

於家

高興字功起蔡州人能挽強命中屢殪猛虎宋黃州制置陳弈奇其相貌妻以甥女十二年從弈降於丞相伯顏承制授興千戶從破瑞昌進拔南陵遂專將一軍爲先鋒由開道奪獨松關進至武康禽宋將張濡十三年春宋平伯顏北還留興以兵取衢婺二州追宋嗣秀王與樺入閩禽之下興化獲海舶七千餘艘遷管軍萬戶十四年春還鎮婺州充衢婺招討使復從都元帥芒古台平福建漳三州詔興立行都元帥府於建寧以鎮之討降叛人黃華高日新等召入朝侍燕悉獻江南所得珍寶世祖曰卿何不少自取對曰臣素貧賤今幸蒙富貴已過所望又何隱俘獲爲詔爵賞所部士卒有差遷浙東道宣慰使漳州盜陳弔

元史卷三十七 列傳

七

眼有眾數萬據高安寨官軍討之久不下詔興與都元帥完者拔都合討之直抵其壁賊乘高下擊興命人挾束薪蔽身進至山半棄薪而退如是六日誘其矢石殆盡乃然薪焚其柵時盜蔓延五十餘寨扼險自固興攻破其十五寨弔眼走保千壁嶺興上至山半誘與語掣其手禽下斬之漳州境悉平十九年入朝改浙西道宣慰使降賊黃華復叛攻建寧興與福建軍合蹙之華走死二十三年拜江淮參政平婺州盜丁母憂詔起復討平處州徽州等盜二十八年諭降漳州盜二十九年拜福建行省平章與史弼亦黑彌什帥師同征瓜哇三十年春浮海抵瓜哇亦黑彌什將水軍興將步軍會八節瀾瓜哇主壻土罕必閣耶降進攻葛郎國降其主又諭降諸小國葛郎酋子昔刺丹不

合逃入山谷與獨帥千人深入虜之還至荅哈城史彌亦
黑彌什已遣使護土罕必閣耶歸國易降表具貢禮興深
言其失計果中道叛殺使者合眾來攻興力戰御之遂誅
葛郎父子以歸詔治縱瓜哇者弼與亦黑彌什皆獲罪興
獨免議成宗即位復拜福建行省平章汀州總管府同知
阿里挾怨告興不法召入對盡得其誣狀阿里伏誅武宗
即位召見拜左丞相商議河南省事皇慶二年卒追封梁
國公諡武宣元統三年加封南陽王

亦黑彌什畏吾人也至元二年入備宿衛九年奉世祖命
使海外八羅孛國十一年偕其國使以珍寶奉表來朝帝
嘉之賜金虎符十二年再往與其國師以名藥來獻十八
年拜荆湖占城等處行中書參政二十一年召還復命使

元史卷三十七 列傳

大

海外僧伽刺國觀佛鉢舍利二十二年自海上還從鎮南
王征占城戰失利大將梭都死焉梭都傳死於交趾不
死於占城與此互異亦
黑彌什言於鎮南王請屯兵大浪湖觀雙而後動全軍而
歸二十四年使馬八兒國取佛鉢舍利浮海阻風行一年
乃至得其良醫善藥遂與其國人來貢方物又以私錢購
紫檀木殿材并獻之嘗侍帝於浴室問曰汝險海者凡幾
對曰臣四踰海矣帝憫其勞遙授江淮行省左丞二十九
年入朝盡獻其所有珍異時方議征瓜哇立福建行省亦
黑彌什與史弼高興並為平章詔軍事付弼海道事付亦
黑彌什軍次占城先遣郝成劉淵諭降南巫里速木都刺
不魯不都八刺刺諸小國三十年攻葛郎國降其主合只
葛當又遣鄭珪招諭木由來諸小國皆遣其子弟來降瓜

哇主婿土罕必閣耶既降歸國復叛諸將議班師亦黑彌
什欲先遣使入奏請旨弼與興不從遂引兵還以所俘及
諸小國降人入見帝罪其與弼縱土罕必閣耶沒家貲三
之一尋復還之告老居家仁宗念其屢使絕域詔封吳國
公卒

趙良弼

趙良弼字輔之女真人本姓兀要甲音譌為趙家因以趙
為氏父愨金威勝軍節度使諡忠閼愨長子良貴從子良
材守太原俱死事良弼明敏多智略初舉進士教授趙州
世祖在潛藩召見占對稱旨擢邢州安撫司幕長邢久不
得善吏且當要衝使者劾午民多逃去良弼區畫有方事
或掣肘則請諸藩邸再閱歲凡六往返所請無不從脫兀

元史卷三十七 列傳

九

脫以斷事官鎮邢其屬要結罪廢者交構嫌隙動相阻撓
世祖時征雲南良弼馳驛白其事遂黜脫兀脫罷其屬邢
大治戶口增倍世祖在潛藩時分地在關陝奏以廉希憲
商挺宣撫陝西以良弼參議司事阿藍荅當國憚世祖英
武說於憲宗言大弟要結民心遂以阿藍荅為陝西省左
丞相劉太平參知政事鈞校京兆錢穀鍛鍊成獄死者二
十餘人眾皆股栗良弼力陳大義詞氣懇款二人卒不能
誣故宣撫司一無所坐己未七月世祖南征召參議元帥
事兼江淮安撫使親執桴鼓率先士卒五戰皆捷焚焚廬
舍殺降民所至宣布恩德民皆安堵既渡江攻鄂州聞憲
宗崩世祖北還良弼陳時務十二事言皆有徵至衛遣如
京兆察訪秦蜀人情事立不踰月具得實還報曰宗王穆

哥無他心宐以西南六盤悉委屬之渾都海屯軍六盤土馬精強咸思北歸恐事有不意紐璘總秦川蒙古諸軍多得秦蜀民心年少鷲勇輕去就當寵以重職而解其兵柄劉太平霍魯懷今行尙書省事聲言辦餉陰有據秦蜀志百家奴劉疑汪惟正兄弟俱傾心歸向宐專委任其言皆見采用庚申良弼凡五上言勸進世祖既即位立陝蜀宣撫司復以廉希憲商挺爲使副良弼爲參議良弼先行謀諸斷事官八春曰今渾都海日夜思北歸紐璘遷延不即行當先遣使以上旨促紐璘入朝劉太平速還京兆八春從其議至則紐璘果移營將入涇劉太平將趨六盤聞命乃止後渾都海果叛北歸良弼與汪惟正劉疑二宣撫決議執渾都海黨元帥乞台不花彌立火者誅之希憲及挺

元史卷三十七 列傳

三

慮有擅殺名良弼以身任之遷參議陝西省事蜀人費寅以私憾誣廉希憲商挺在京兆有異志者九事以良弼爲徵帝召良弼詰問良弼泣曰二臣忠良保無是心願剖臣心以明之帝意不釋會平李璫得王文統交通書益疑二臣切責良弼至欲斷其舌良弼誓死不少變帝意乃解費寅卒以反誅至元七年以良弼爲經略使領高麗屯田良弼言屯田不便固辭遂以良弼奉使日本先是至元初數遣使通日本卒不得要領至是良弼請行帝憫其老不許良弼固請乃授祕書監以行良弼奏臣父兄四人死事於金乞命翰林臣文其碑臣雖死絕域無憾帝從其請給兵三千以從良弼辭獨與書狀官二十四人俱舟至金津島其國人望見使舟欲舉刃來攻良弼舍舟登岸喻旨金津

守延入板屋以兵環之滅燭大譟良弼凝然自若天明其國太宰府官陳兵四山問使者來狀良弼數其不恭罪仍諭以禮意太宰官愧服求國書良弼曰必見汝國王始授之越數日復來求書且曰我國自太宰府以東上古使臣未有至者今大朝遣使至此而不以國書見授何以示信良弼曰隋文帝遣裴清來王郊迎成禮唐太宗高宗時遣使皆得見王王何獨不見大朝使臣乎太宰官復索書不已詰難往復數四至以兵脅良弼良弼終不與但頗錄本示之後又聲言大將軍以兵十萬來取書良弼曰不見汝國王盍持我首去書不可得也日本知不可屈遣使介十二人入覲仍遣人送良弼至對馬島十年五月良弼至自日本入見帝詢知其故曰卿可謂不辱命矣後帝將討日

元史卷三十七 列傳

三

本三問良弼良弼言臣居日本歲餘觀其民俗很勇嗜殺不知有父子之親上下之禮其地多山水無耕桑之利得其人不可役得其地不加富況舟師渡海海風無期禍害莫測是謂以有用之民力填無窮之巨壑臣謂勿擊便帝從之十一年十二月以良弼同僉書樞密院事丞相伯顏伐宋良弼言宋重兵在揚州宐以大軍先擣錢塘後訖如其計又言宋亡江南士人多廢學宐設經史科以育人材定律令以戢奸吏皆用其議帝嘗從容問曰高麗小國也匠工弈技皆勝漢人至於儒生皆通經書學孔孟漢人惟務課賦吟詩將何用焉良弼對曰此在國家所尙何如耳尙詩賦則人必從之尙經學則人亦從之十九年乞病居懷孟良弼別業在溫縣故有地三千畝乃析爲二六與懷

州四與孟州皆永隸廟學以贈生徒卒封韓國公諡文正

梁曾

梁曾字貢父燕人中統四年以翰林學士承旨王鶚薦辟中書左三部令史三轉為中書省掾至元十七年朝廷以安南世子陳日烜不就徵選曾使其國進兵部尚書與禮部尚書柴椿偕行至安南明年日烜遣其叔遺愛奉表從曾入朝獻方物帝封遺愛為安南國王賜幣帛遣歸日烜死其世子日烜嗣立令曾再使安南授吏部尚書賜三珠金虎符以禮部郎中陳孚為副三十年正月至安南其國有三門中曰陽明左曰日新右曰雲會部臣郊迎將由日新門入曾大怒曰奉詔不由中門是我辱君命也即回館既而請開雲會門入曾復執不可始自陽明門迎詔入又

元史卷三十七 列傳

三

責日燭親出迎詔且講新朝尚右之禮以書往復者三具宣布天子威德而風其君入朝日燭大感服令其國相從曾詣闕請罪并上萬壽頌金冊表章方物而以黃金器幣奇物為贖曾不受八月還京師入見進所與安南往復書帝大悅解衣賜之且令坐地上右丞阿里意不然帝怒曰梁曾兩使外國以口舌息兵戈爾何為者是日有親王至自和林帝命酌酒先賜曾而後及王復於便殿賜酒饌留宿禁中語安南事至二鼓方出明日安南使臣入見詔陳其方物象鸚鵡於庭而命曾引所獻象會以袖引之象隨會轉如素馴者復命引他象亦然帝以曾為福人敕中書以使安南三珠金虎符與之大德中屢遷雲南行省參政尋召還京皇慶元年仁宗以曾先朝舊臣特授昭文館大

學士復起為集賢侍講學士國有大政必命與諸老議之至治二年卒年八十有一

張立道

張立道字顯卿大名父善登金進士第歲壬辰元兵下河南以策干太弟拖雷命為必闡赤立道年十七以父任備宿衛從世祖北征至元四年奉使西夏給所部軍儲以榦敏稱皇子忽哥赤封雲南王往鎮其地立道為王府文學勸王務農以厚民署大理等處勸農官兼領屯田事尋與侍郎竇端甫使安南定歲貢之禮雲南都元帥寶合丁專制久有竊據之志忌王來設宴置毒酒中且賂王相府官無泄其事立道聞之趨入守門者拒之立道怒與爭王聞其聲使召之入王引其手使探口中肉已腐矣是夕王

元史卷三十七 列傳

三

薨寶合丁遂據王坐使人諷王妃索王印立道潛結義士得十三人約共討賊刺臂血和金屑飲之推一人走京師告變事露寶合丁囚立道將殺之族兄張忠結壯士夜劫諸獄出之共亡至吐蕃界遇帝所遣御史大夫博羅歡王傅別帖與告變人俱來遂與俱還按寶合丁及王府官嘗受賂者皆伏誅有旨召立道入朝問王薨時狀帝聞立道言泣數行下曰汝等為我家事甚勞苦今欲事朕乎事太子乎事安西王乎惟汝意所向立道等奏願留事陛下於是皆賜金授官有差八年復使安南宣建國號十年授大理等處巡行勸農使佩金符其地有昆明池介碧雞金馬之間環五百餘里夏潦暴至必冒城郭立道求泉源所自出役丁夫二千人治之洩其水得壤地萬餘頃皆為良田

爨人雖知蠶桑而未得法立道始教之飼養收利十倍雲南益富庶羅羅諸蠻慕之相率來降收其地悉爲郡縣先是雲南未知尊孔子祀王羲之爲先師立道首建孔子廟置學舍擇蜀士之賢者爲弟子師歲時率諸生行釋奠禮人習禮讓風俗稍變行省平章賽典赤表言於朝有旨進官以褒之十七年入朝力請於帝以雲南王子耶先帖木爾襲王爵帝從之遂命爲臨安廣西道宣撫使兼管軍招討使仍佩虎符會禾泥路大首領必思反扇動諸蠻夷亟發兵討之拔其城邑鼓行而前徇金齒甸七十城越麻甸抵可蒲皆下之又籍兩江土司所部戶二十五萬有奇以其籍歸有司遷臨安廣西道軍民宣撫使復勸廟學於建水路書清白之訓於公廨以警貪墨風化大行人朝條

元史卷三十七 列傳

五

陳十二策皆切當時之務帝嘉納焉二十七年安南世子陳日煇遣其臣嚴仲羅陳子良等詣京師告襲爵先是其國主陳日烜累召不至僅遣族叔遣愛入貢朝廷因封爲安南王遺愛還日烜陰害之遣使問罪日烜拒使者不受命遂遣將討之失利而還帝怒欲再發兵丞相完澤平章不忽木言蠻夷小邦不足以勞中國張立道嘗再使安南有功今復使往空無不奉命帝召至香殿諭遣之遂授禮部尚書佩三珠虎符賜衣段金鞍弓矢以行至安南界謂郊勞者曰語爾世子當出郭迎詔日煇乃率其屬焚香伏謁道左既抵府日煇拜跪聽詔如禮立道傳上命數其罪爲書曉之日煇曰比三世辱公使公大國之卿小國之師也何以教我立道曰昔鎮南王奉詞致討汝非能勝之也

由其不用鄉導率眾深入不見一人遲疑而還曾未出險風雨驟至弓矢盡壞眾不戰而自潰天子亦既知之汝所恃者山海之險瘴癘之惡耳且雲南與嶺南之人習俗同而技力等今發而用之繼以北方之勁卒汝復能抗哉汝戰不利不過遁入海中島夷必乘鸞來寇抄汝汝食少不能支必爲彼屈汝爲其臣孰若爲天子臣乎今海上諸夷歲貢於汝者亦畏我大國之汝與也聖天子有德於汝甚厚前年之師殊非上意邊將譏汝爾汝曾不悟不遣一介之使謝罪請命輒稱兵抗拒逐我使人以怒我大國之師今禍且至矣惟世子計之日煇拜且泣日公言良是爲我計者皆不知出此前日之戰救死而已天子使公來必能活我北面再拜誓死不敢忘天子之德遂迎立道入出奇

元史卷三十七 列傳

五

寶爲賄立道一無所受但要日煇入朝日煇曰貪生畏死人之常情誠有詔貸以不死臣將何辭乃先遣其臣隨立道上表謝罪修歲貢如初廷臣有害其功者以爲必先朝而後赦日煇懼卒不敢至議者惜之二十八年遣立道奉使按行兩浙尋以爲四川南道宣慰使遷陝西漢中道廉訪使三十年皇曾孫松山封梁王出鎮雲南大德二年廷議求舊臣可爲梁王輔行者立道遂以陝西行臺侍御史拜雲南行省參政視事期月卒於官立道凡三使安南官雲南取久頗得土人之心爲之立祠於善闡城西所著詩文有效古集平蜀總論安南錄雲南風土記六詔通說若干卷子元雲南行省左右司郎中

張庭珍

弟庭瑞

張庭珍字國寶臨潢全州人父楫金商州南倉使籍其民數千來降太宗命爲北京都轉運使因家北京歲辛亥憲宗卽位以庭珍爲必闡赤高麗不請命擅徙居海中江華島遣庭珍往問之其王言臣事本朝未嘗不謹而大軍歲入侵掠避而走險不得已也且賂庭珍金銀數千兩庭珍卻之歸以狀聞帝爲禁戍兵毋擅入其地高麗以安帝伐宋至閬州授安撫使中統初世祖自將北伐以庭珍熟知西京入漠南路遣立沙井諸驛兼給糧運俄投同僉吐蕃經略使至元六年安南入貢不時以庭珍爲安南國達魯花赤佩金符往使世子光昞立受詔庭珍責之曰皇帝不欲以汝土地爲郡縣而聽汝稱藩遣使諭旨德至厚也王猶與宋爲唇齒安自尊大今百萬之師圍襄陽拔在旦夕

元史卷三十七列傳

庚

席捲渡江則宋亡矣王將何恃且雲南兵不兩月可至汝境覆汝宗祀有不難者光昞皇恐下拜受詔既而語庭珍曰聖朝每使者來多無禮汝官朝列我王也相與抗禮古有之乎汝過益州見雲南王拜否庭珍曰雲南王天子之子汝蠻夷小邦特假以王號豈得比雲南王況天子命我爲安南之長王人雖微序於諸侯之上光昞慙使衛兵露刃環立以恐庭珍庭珍解所佩弓刀坦臥室中曰聽汝何爲光昞及羣下皆服明年遣使人貢庭珍具陳所對帝大悅命付翰林承旨王磐紀之授襄陽行省郎中與阿里海牙從數騎抵襄陽南門呼諭宋將呂文煥明日文煥遣黑楊都統來議納款將遣之還報庭珍曰彼來或以計覘我未必果降此人呂氏腹心不如留之以伐其謀元帥阿朮

然之乃留不遣又明日文煥舉城降以功授金虎符襄陽總管兼府尹改郢復二州達魯花赤宋平遷南京路總管兼開封府尹開封有控鶴軍士十餘人賃大宅聚居縱橫街陌庭珍始至察其必爲盜急捕之得寶玩器服子女滿室窮索其黨俱戮之民以爲神河決灌大康漂溺千里庭珍括漁船木筏載糗糧四出救之全活甚眾水入善利門親督夫運薪土捍之不能止乃頽城爲堰水既退卽發民增外防百三十里人免水憂俄卒於官庭珍性清慎丞相伯顏嘗語人曰諸將渡江無不荒貪始終自守唯我與國寶聞者榮之弟庭瑞

庭瑞字天表幼以功業自許兵法地志星麻卜筮無不推究以宿衛從憲宗伐蜀爲先鋒中統二年授元帥府參議

元史卷三十七列傳

庚

畱成青居諸軍攻開州達州庭瑞將兵築城虎嘯山扼二州路宋將夏貴以師數萬圍之城當礮皆身穿築柵守之柵壞乃依大樹張牛馬皮以拒礮貴以城中人飲於澗外絕其汲道庭瑞取人畜洩沸煮之澗土中以洩臭人日飲數合脣皆瘡裂堅守踰月援兵不敢進庭瑞度宋兵稍懈三分其兵夜劫貴營宋兵驚潰斬千餘級庭瑞亦被重傷屢遷陝西四川道按察副使政過於猛上官弗便陷以罪徙四川屯田經略副使東西川行樞密院發兵圍重慶舟楫兵仗糧儲皆倚以辦蜀平升諸蠻夷部宣慰使礪門羌與婦人老幼入市爭價殺人礪門魚通司繫其人羌酋怒斷繩橋謀入劫之魚通司來告急左丞汪惟正問計庭瑞曰羌俗暴悍以鬪殺爲勇今如蜂毒一人而卽以門牆之寇

待之不可宜遣使往諭禍福彼悟當自回矣惟正曰使者無過於君遂從數騎抵羌界羌陳兵以待庭瑞進前語之曰殺人者償死羌與中國之法同有司繫諸人欲以爲見證耳而汝即肆無禮如行省聞於朝召近郡兵空汝巢穴矣其酋長棄槍弩羅拜曰近者生裂羊脾卜之視肉之文理何如則吉其兆曰有白馬將軍來可不勞兵而罷今公馬果白敢不從命乃論殺人者餘盡縱遣之遂與約自今交市以礪門爲界無相出入官買蜀茶增價鬻於羌人以爲患庭瑞更變引法使每引納二緡而付文券與民聽其自市於羌蜀使之先時運糧由楊山沂江往往覆陷庭瑞始立屯田人得免患都掌蠻叛蠻善飛鎗聯松枝爲牌自蔽行省命庭瑞討之庭瑞所射矢出其牌半餘蠻驚曰

元史卷三十七列傳

天

何物弓矢如此之力即請服惟斬其酋蘭德西等十餘人而招復其餘民授敘州等處蠻夷部宣撫使改潭州路總管時湖廣省臣方剝民爲功庭瑞知不可拒乃辭歸關中久之思成都遂從漢中分家奴往居焉以疾卒庭瑞初屯青居其土多橘時中州艱得蜀藥其價倍常庭瑞課閑卒日入橘皮若干升儲之人莫曉也賈人有喪其資不能歸者人給橘皮一石得錢以濟莫不感之家有愛妾一日見老人與之語乃其父也妾以告庭瑞召視之其貌甚似問欲得汝女歸邪其人以給侍左右爲幸庭瑞曰汝女居吾家不過羣婢歸嫁則良人矣盡取匱裝書券還之時人以爲難

元史卷三十七終

元史卷三十八

中葉相臣

哈刺合孫

哈刺合孫幹羅納一作那氏曾祖啟昔禮始事克烈部王罕及王罕息太祖得眾將襲太祖啟昔禮潛告其謀太祖與二十餘人一夕由班朱河遁去招集諸部還攻滅王罕併其眾擢啟昔禮爲千戶賜御帳什器及宴飲樂節如宗王儀錫號荅刺罕令世襲之從平河西西域諸國祖博理察太宗時從太弟拖雷攻河南取汴蔡滅金賜分邑順德父囊加台從憲宗伐蜀卒於軍時哈刺合孫甫及歲不妄言笑長善騎射工蒙古書又雅重儒術至元九年世祖錄勳臣後命掌宿衛襲祖父號自是人稱荅刺罕而不名嘗

元史卷三十八列傳

從征叛王初入敵境率三百騎猝遇敵即整隊突出敵背連發矢殪數人敵披靡出入整暇如宿將帝歸語皇太子謂可大用益倉邑欽廉二州拜太宗正賜珠衣錄郡縣囚僅決六十人時相柄政以僞鈔連坐富民百餘家又以保定郡民當輸米京師者多以輕資就糴欲坐以籍產哈刺合孫盡釋之又逮治時相家僮之犯法者時相益忌之欲中以事乃請以江南獄隸宗正哈刺合孫曰江南新附教令未孚且相去數千里何由遙制其刑獄事遂止二十八年拜湖廣行省平章臺臣言其在宗正決獄平不可去帝曰湖廣地朕嘗駐蹕非斯人不可遂行時江湖盜賊出沒剽斂商旅發卒悉禽誅之水陸始無梗初樞密置行院於各省兵民分職各自植黨哈刺合孫入覲極陳其不便帝

為罷之或言廉訪官反撓吏治帝咨之對曰風憲以糾奸
愚特不便於貪吏耳帝然其言三十年平章劉國傑將兵
征交趾哈刺合孫戒將吏無擾民有奪民魚菜者杖其千
戶軍中肅然俄有旨發湖湘富民萬家屯田廣西以圖交
趾哈刺合孫密奏曰上年遠征無功瘡痍未復今又徙民
瘴鄉必將怨叛遂罷其役而別用廣西元帥府言募南丹
五千戶屯田謂土著之民習水土便餽餉足以內實空荒
外捍蠻寇即命度地立五屯統以屯長給牛種農具聞於
朝西南利賴之湖廣舊無夏稅宣慰使張國紀建言欲按
唐宋末世為徵哈刺合孫曰衰敝之政聖朝其可行邪竟
奏罷成宗大德二年遷江浙行省左丞相視政七日綱舉
七十餘事民譽翕然徵拜中書左丞相斥言利之徒一以

元史卷三十八 列傳

二

節用愛民為務有大政事必引儒臣雜議慨然以天下自
任奏建孔子廟及國學選名儒為學官采近臣子弟入學
又集羣議建南郊為一代定制五年完澤用雲南行省左
丞劉涇議謂上嗣位未有武功西南夷有八百媳婦國者
未奉正朔請往征之哈刺合孫曰山嶠小夷遠絕萬里可
諭之使來不足以煩中國不聽竟發兵二萬命劉涇將以
往道出湖廣民疲於餽餉中道為女酋蛇節所圍首尾不
能相採平章劉國傑往援出之士卒存者纔十一二轉餉
者亦如之帝始悔不用其言會赦有司議釋劉涇罪哈刺
合孫曰微功首贖喪師辱國非常罪比不誅無以謝天下
奏誅之七年進中書右丞相以治道必先守令精加遴選
時號得人定官吏贓罪十二章及丁憂婚聘盜賊等制禁

獻戶及山澤之利每歲車駕幸上都哈刺合孫必畱守京
師時帝疾連歲制出中宮羣邪黨附哈刺合孫以身維之
故政不大撓十年冬十一月帝寢疾篤甚入侍醫藥出總
宿衛藩王欲入侍疾者不聽日理機務如故十一年春成
宗崩時武宗撫軍北邊仁宗出居懷慶諸奸臣謀斷北道
請成后垂簾聽政立安西王阿難荅哈刺合孫密遣使南
北分迎兩親藩間走踰兩驛始得馳傳悉收京城百司符
印封府庫稱疾臥闕下內旨召日數至並不聽文書皆不
署眾欲害之未敢發及仁宗至近郊眾猶未知也三月朔
列牘請署后決以三月三日御殿聽政乃立起視事署文
書眾莫測其意明日迎仁宗入執左丞相阿忽台及安西
王阿難荅等以靖內難自冬至春未嘗一至家休沐夏四

元史卷三十八 列傳

三

月奉皇太后及仁宗如上都五月武宗至自北即皇帝位
拜太傅錄軍國重事仍總百揆賜宅一區以其子脫歡入
侍初仁宗之入也阿忽台有勇力人莫敢近諸王圖刺實
手縛之以功封越王三宮盡幸其第賜與甚厚以慶元路
為其食邑哈刺合孫力爭之曰祖宗之制非親王不得加
一字之封圖刺疏屬豈得以一日之功廢萬世之制哉帝
不聽圖刺因譖於帝曰方安西王謀干大統哈刺合孫亦
嘗署文書由是罷相出鎮北邊詔曰和林為北邊重鎮今
諸部降者又百餘萬非重臣不足以鎮之念無以易丞相
者賜黃金三百兩白銀三千五百兩鈔十五萬貫帛四萬
端乳馬六十匹以太傅右丞相和林省事皇太后亦加
賜鈔帛至鎮禁盜賊通商旅分遣使者振降戶出鈔帛易

牛羊以給之近水者給網數千教取魚食會大雪阻金山命諸部置傳車相去各三百里凡十傳轉米數萬石牛羊稱是又度地置倉積粟以待來者全活不可勝計和林歲羅軍餉數十萬主吏視利繆出納以飽囊橐立法釐之稱海屯田廢弛重爲經理歲得米二十餘萬又浚古渠溉田數千頃穀以恆賤北邊大治至大元年賜大帳如諸王禮諸藩稟命戎事則以宴之十一月卒年五十二追封順德王諡忠獻英宗至治三年仁宗寶錄成丞相拜住詣國史院聽讀首卷於大德十一年事不書左丞相哈刺合孫定策功惟書越王圖刺勇決拜住謂史官曰無左丞相雖百越王何益錄鷹犬之勞而略發縱指示之人可乎子脫歡官至平章行省江浙進左丞相重厚有父風善讀書爲政

元史卷三十八 列傳

四

不尙苛暴得眾心致和元年卒於官年三十七

李孟

李孟字道復先世居潞州上黨父唐歷仕秦蜀因徙家漢中孟七歲能文博學強記通貫經史善論古今治亂授徒於家遠近爭從之一時名人商挺王博文皆折行輩與交郭彥通名能知人嘗語唐曰此兒骨相異常公輔器也至元十四年隨父入蜀行省辟爲掾主簿行御史臺亦交薦之皆不就後以事至京師中書右丞楊吉丁薦於皇太子得召見東宮未幾皇太子薨不及擢用成宗立首命采訪先朝聖政備史官紀述陝西省使孟討論編次乘驛以進時武宗仁宗皆未出閣徽仁裕聖皇后求名儒輔導有薦者曰布衣李孟有宰相才可以爲王子師大德元年武宗

撫軍北方仁宗留宮中孟日陳善言正道多所進益武宗聞而嘉之詔授太常少卿執政以孟未嘗一造其門沮之不行改禮部侍郎命亦中止仁宗侍母居懷州又如官山孟常單騎以從在懷州四年誠節如一左右化之皆有儒雅風由是上下益親有暇則就孟講論古先帝王得失成敗孟特善論事忠愛懇惻淡切明白厥後仁宗入清內難故事武皇篤孝母后端拱以成太平文物典章號爲極盛嘗與羣臣語握拳示之曰所重乎儒者爲其握持綱常如此其固也其講學之功實孟啟之初成宗崩安西王阿難答謀繼大統成后爲之主丞相樞密同聲附和中書左丞相哈刺合孫密使來告仁宗疑未行孟曰支子不嗣世祖典訓今宮車晏駕懷靈王遠在萬里宗廟社稷危疑之秋

元史卷三十八 列傳

五

殿下當奉大如急還宮庭以折奸謀固人心不然爲他人所先以一紙書召還則王母子且不保何論宗社仁宗悅乃奉大如還大都時哈刺合孫稱病堅臥仁宗遣孟往問之適成后使者絡繹問疾孟入長揖而坐已而前引其手診其脈眾以爲醫乃不疑之既得知安西王卽位有日還告曰事急矣先發者制人後發者制於人不可不早圖之左右皆不能決惟曲出伯鐵木爾勸其行或曰皇后淡居九重八璽在手四衛之士一呼而應者累萬安西王府中從者如林王侍衛寡弱不過數十人兵仗不備奮赤手而往事未必濟不如靜守以俟阿合之至然後圖之未晚也阿合者中國稱兄謂武宗也孟曰羣邪違棄祖訓舍嫡立庶人心必皆弗與王入造內庭以大義責之則凡知君臣

之義者無不爲王用何求弗獲先清宮禁以迎大兄之至則大事濟矣若安西王既正位號縱懷蜜王至彼安肯兩手進璽退守藩國必將鬪於國中生民塗炭宗社危矣得時弗爲非智也臨機不斷非勇也仗義而動事必萬全仁宗曰當以卜決之命召卜人有儒服持囊遊於市者召之至孟出迎語之曰大事待汝而決但言其吉乃入筮遇乾三五皆九立而獻卦曰是謂乾之睽乾剛也睽外也以剛處外乃定內也君子乾乾行事也飛龍在天上治也輿曳牛掣其人形且剝內兌廢也厥宗噬膚往必濟也大君外至明相麗也乾而不乾事乃睽也剛運善斷無惑疑也孟曰筮不違人是謂大同時不可以失仁宗喜振袖而起乃其扶上馬孟及諸臣皆步從入自延春門哈刺合孫自東

元史卷三十八 列傳

六

掖來就之至殿廊收首謀及同惡者悉送都獄奉御璽北迎武宗中外翕然隨定仁宗監國使孟參知政事孟久在民間備知閭閻幽隱損益庶務悉中利病遠近無不悅服然抑絕僥倖羣小多不樂孟不爲動事定乃言於仁宗曰執政大臣當自天子親用今鸞輿在道孟未見顏色不敢言當重任固辭弗許遂逃去不知所之夏五月武宗即位有言於帝曰內難之初定也李孟嘗勸皇弟以自取如彼言豈有今日武宗察其誣弗聽仁宗亦不敢復言孟至大二年仁宗爲皇太子嘗侍帝同太后內宴飲半仁宗淡思戚然改容帝顧語曰吾弟何故不樂仁宗從容起謝曰賴天地祖宗之靈神器有歸然成今日母子兄弟之歡者李道復之功也帝感其言即命搜訪之得之許昌陘山遣使

召之三年春入見於玉德殿帝指謂宰臣曰此皇祖妣命爲朕賓師者特授中書平章政事集賢大學士同知樞密院事仁宗嗣立眞拜中書平章孟感知遇力以國事爲己任節賜與重名爵覈大官之濫費汰宿衛之冗員貴戚近臣惡其不便於己而心服其公無間言焉司空司徒太尉古之三公自大德以來封拜繁多釋老二教設官統治權抗有司撓亂政事僧道尤苦其擾孟言人君之柄在賞與刑賞一善而天下勸罰一惡而天下懲柄乃不失所施失當不足勸懲何以爲治僧道既爲出世法何用官府繩治乃奏雪冤死者復其官蔭濫冒名爵者悉奪之罷僧道官天下稱快時承平日久風俗奢靡車服僭擬上下無章近臣恃恩求請無厭時宰不爲裁制乃更相汲引望幸恩賜

元史卷三十八 列傳

七

耗竭公儲孟言貴賤有章所以定民志賜與有節所以勸臣下請各爲之限制帝皆從之孟在政府雖多所補益而自視常若不及嘗因閒請曰陛下堯舜之主也臣不能使天下爲堯舜之民上負陛下下負所學乞罷政權避賢路帝曰朕在位必卿在中書相與終始自今勿復言繼賜爵秦國公親授印章命學士院降制又圖其像敕詞臣贊之及御書秋谷二字識以璽而賜之入見必賜坐語移時字之而不名賜鈔十萬貫令將作爲治第孟悉辭不受皇慶元年正月授翰林學士承旨知制誥兼修國史仍平章政事未幾請告歸葬其父母入朝因請謝事優詔不允請益堅乃命以平章政事議中書省事二年夏乞還國公印解機務奏三上始如所請帝每與孟論取士之方孟曰人材

所出固非一途然漢唐宋金科舉得人爲盛帝淡然其言
決意行之延祐元年十二月復拜平章政事二年春命知
貢舉及廷策進士爲監試官改封韓國公職任如故已而
以衰病乞致政歸里帝不得已從所請復爲翰林學士承
旨入侍燕閒禮遇尤厚七年仁宗崩英宗初立太師鐵木
迭爾復相以孟前共政時不附己譏構誣謗盡收前後封
拜制命降授集賢侍講學士度其必辭因中害之孟拜命
欣然適翰林學士劉廣來慰問卽與同入院宣徽使以聞
曰李孟今日供職舊例當賜酒帝愕然曰李道復乃肯俯
就集賢邪時鐵木迭爾子八爾吉思侍帝側帝顧謂曰爾
輩謂彼不肯爲是官今定何如由是讒不得行至治元年
卒詔復元官進封魏國公諡文忠孟字量閔郭材略過人

元史卷三十八 列傳

八

三入中書民間利害知無不言引古證今務歸至當士無
貴賤苟賢不進拔不已遊其門者後皆知名退居一室蕭
然如布衣爲文有奇氣其論必主於理其獻納謀議常自
毀其橐家無幾存皇慶延祐之世每一政之繆人必以爲
鐵木迭爾所爲一令之善必歸之於孟焉子獻御史中丞
同知經筵事

拜住

拜住安童孫也五歲而孤母夫人教養之稍長宏遠端亮
有祖風至大二年襲爲宿衛長仁宗延祐四年進大司徒
六年加開府儀同三司餘竝如故每議大政必問曰合典
故否同官有異見者曰大朝止說典故邪拜住微笑曰公
試言之國朝何事不依典故同官不能對每退食必延儒

士詔訪古今禮樂刑政治亂得失盡日不倦嘗曰人之仕
宦隨所職司事皆可習至於學有本原施於事業非俗吏
所知也英宗在東宮問宿衛之臣於左右咸稱拜住賢遣
使召之拜住謂使者曰嫌疑之際君子所慎我掌天子宿
衛而與東宮私往來我固得罪亦豈太子福邪竟不往英
宗登極拜中書平章政事會諸侯王於大明殿詔進讀太
祖金匱寶訓威儀整暇語音明暢莫不注目竦聽夏五月
太皇太后薨幸宣徽使失烈門要東木等憚帝英明不得
自恣謀廢立帝密得其事御穆清閣召拜住謀之對曰此
輩擅權亂政日久鄙夫患失何所不至天威宜速不宜遲
帝卽命率衛士禽斬之其黨皆伏誅拜中書左丞相先時
近侍傳旨以姓名赴中書銓注者六七百員選曹爲壅拜

元史卷三十八 列傳

九

住奏閣之一依選格注授吏無容姦刑曹情可矜者宥之
貪暴不法必不少容帝常諭左右曰汝輩慎之苟陷國法
我雖曲赦拜住不汝恕也至治元年春正月帝欲結綵樓
於禁中元夕張燈設宴時居先帝喪參議張養浩疏諫拜
住謂當面陳卽袖其疏入奏帝悅而止仍賜養浩帛以旌
直言三月從幸上都次察罕海子帝以行宮亭麗殿制度
卑隘欲更廣之拜住奏曰此地苦寒入夏始種粟麥陛下
初登大寶不求民瘼而遽興大役以妨農恐失民望乃止
延祐間朔漠大風雪羊馬駝畜盡死人民流散以子女鬻
人爲奴婢拜住請立宗仁衛總之命縣官贖置衛中以遂
生養至元十四年始建太廟於大都至是四十年未行親
享之禮拜住奏言禮樂百年而後興郊廟祭享宜在今日

帝悅冬十月始有事於太廟二年春正月孟享始備法駕設黃麾大仗帝服通天冠絳紗袍出自崇天門拜住攝太尉以從致齋大次行酌獻禮升降周旋儼若素習中外肅然明日還宮鼓吹交作萬姓聳觀百年廢典一旦復見有感泣者拜住率百僚稱賀執事之臣賜金帛有差又奏建太廟前殿議行禘祫配享等禮帝從容謂拜住曰朕思天下之大非一人思慮所及汝爲朕股肱毋忘規諫以輔朕之不逮時右丞相鐵木迭爾貪濫譎險屢殺大臣鬻獄賣官廣立朋黨凡不附己者必以事去之尤惡平章王毅右丞高昉因在京諸倉糧儲失陷欲奏誅之拜住密言於帝曰論道經邦宰相事也以金穀細務責之可乎帝然之俱得不死鐵木迭爾復引參政張思明爲左丞以助己思明

元史卷三十八 列傳

十

爲盡力忌拜住方正每與其黨密語謀中害之左右得其情乘間以告且請備之拜住曰大臣不和國之災也今以右相讐我我求報之非特吾二人之不幸亦國家之不幸吾知盡吾心上不負君父下不負士民而已死生禍福天實鑒之未幾奉旨往立忠獻王碑於范陽鐵木迭爾久稱疾聞拜住行將出蒞省事入朝至內門帝遣使賜之酒且曰卿年老宜自愛待新年入朝未晚遂怏怏退然其黨猶布列朝中事必稟於其家以拜住故不得大肆其奸百計傾之終不能遂在京倉漕管庫之職歲終例應注代營求鬻賂者眾時張思明亦稱疾不出眾皆願望拜住以事不可緩乃日坐省中遣人善慰思明乃出共畢銓事拜住每以學校政化大源似緩實急而主者不務盡心遂至廢弛

請令內外官議整治之有言佛教可治天下者帝問之對曰清靜寂滅自治可也若治天下舍仁義則綱常亂矣又嘗謂拜住曰今亦有如唐魏徵之敢諫者乎對曰槃圓則水圓孟方則水方有太宗納諫之君則有魏徵敢諫之臣帝竝善之敕賜平江腴田萬畝拜住辭曰陛下命臣釐正庶務若先受賜田人其謂何秋七月奏召張思明詣上都數其罪杖而逐之鐵木迭爾繼亦病卒拜住哭之慟初浙民吳機以累代失業之田賣於司徒劉夔夔賂宣政使八刺吉思買置諸寺以益僧廩矯詔出庫鈔六百五十萬貫酬其直田已久爲他人之業鐵木迭爾父子及鐵失等上下蒙蔽分受之爲贓鉅萬真人蔡道泰以奸殺人獄已成鐵木迭爾納其金令有司變其獄拜住舉奏二事命臺察

元史卷三十八 列傳

十一

鞠之盡得其情以田歸主劉蔡八刺吉思等皆坐死餘論罪有差特赦鐵木迭爾冬十二月進右丞相監修國史帝欲爵以三公懇辭遂不置左相獨任以政首薦張珪復平章政事召用致仕老臣優其祿秩議事中書不次用才惟恐少後日以進賢退不肖爲重務患法制不一有司無所守奏詳定舊典以爲通制帝幸五臺拜住奏曰自古帝王得天以得民心爲本錢穀民之膏血多取則民困而國危薄斂則民足而國安帝曰民爲重君爲輕國非民則何以爲君凡利民之事卿當熟慮以聞朕必行之三年拜住以海運糧視世祖時頓增數倍今江南民力困極而京倉充滿奏請歲減二十萬石帝遂併鐵木迭爾所增江淮糧免之時鐵木迭爾過惡日彰拜住悉以奏聞帝悟奪其官仆其

碑奸黨鐵失等甚懼是時中書參議王結謂拜住曰除奸不可猶豫猶豫恐生他變拜住是其言而不能決鐵失方以御史大夫掌宿衛親兵而不之奪帝在上都夜寐不寧命作佛事拜住以國用不足諫止之既而懼誅者復陰誘羣僧言國當有厄非作佛事而大赦無以禳之拜住叱曰爾輩不過圖得金帛而已又欲庇有罪邪奸黨聞之益懼乃生異謀晉王耶孫鐵木爾時鎮北邊鐵失潛遣人至王所告以逆謀約事成推王爲帝王命囚之遣使赴上都告變未至車駕南還次南坡鐵失與赤斤等夜以所領阿速衛兵爲外應殺拜住遂弑帝於行幄晉王卽位鐵失等伏誅詔有司備儀衛百官書宿前導與拜住畫像於海雲寺大作佛事觀者數萬無不嘆惜泣下拜住憂國忘家常直

元史卷三十八 列傳

七

內廷知無不言大官以酒進則憂形於色有盜其家金器百餘兩他寶直鉅萬繼而獲盜得金家僮來法色無不備自延祐末水旱相仍民不聊生及拜住入相振立紀綱修舉廢墜裁不急之務杜僥倖之門加惠兵民輕徭薄斂英宗倚之相與厲精圖治時天下晏然國富民足遠夷自古未通中國者皆朝貢請吏而奸臣畏之卒構禍難云母怯烈氏年二十二寡居守節初拜住爲太常禮儀院使年方二十吏就第請署文書適在後圃游玩出稍後母厲呵之拜住淡自刻責一日入內侍宴英宗素知其不飲是日強以數卮旣歸母戒之曰天子試汝量故強汝飲汝當日益戒於酒拜住之賢母之教也後封東平王夫人秦定初中書奏丞相拜住盡忠效節殞於羣凶乞賜褒崇以光後世

追封東平王諡忠獻

元史卷三十八 列傳

七

元史卷三十八終

元史卷三十九

列傳二十三

中葉文臣

虞集 弟榮

虞集字伯生宋丞相允文五世孫也曾祖剛簡爲利州路提刑有治績嘗與臨邛魏了翁成都范仲黼李心傳輩講學蜀東門外著易詩書論語說蜀人師尊之祖珏知連州亦以文學知名父汲僑居臨川崇仁與吳澄爲友澄稱其文清醇嘗再至京師贖族人被俘者十餘口以歸由是家益貧晚稍起家教授於諸生中得李昉魯珙歐陽玄而稱許之以翰林院編修官致仕集三歲卽知讀書歲乙亥汲挈家趨嶺外干戈中無書冊可攜母楊氏國子祭酒楊文仲女也口授集論語孟子左氏傳歐蘇文聞輒成誦比還

元史卷三十九 列傳

一

長沙就外傳則已盡讀諸經文仲世以春秋名家而族弟參政棟明性理之學集與弟榮皆受業其門又從吳澄遊授受具有源委左丞董士選自江西除南行臺中丞延集家塾大德初始至京師以薦授大都路儒學教授除國子助教卽以師道自任丁內艱服除再爲助教大成殿新賜登歌樂北人不習節奏集親教成曲仁宗卽位拜臺臣爲祭酒除吳澄司業與集皆欲有所更張以副帝意而時論沮之澄投檄去集亦以病免未幾除太常博士朝廷方以科舉取士集謂欲治其源必師道立而後善人多因會議學校乃爲議上之六年除翰林待制兼國史院編修官英宗卽位拜住爲相頗超用賢俊時集以憂還江南拜住言於上遣使求之於蜀不見求之江西又不見集方省墓吳

中使至受命趨朝則拜住不及見矣泰定初考試禮部言於同列曰國家科目之法諸經傳注各有所主者將以一道德同風俗非欲使學者專門擅業如近代五經學究之固陋也聖經深遠非一人之見可盡試藝之文推其高者取之不必專主一說以狹賢路後兩爲考官所取皆稱得人除國子司業遷祕書少監帝幸上都以講臣多高年命集與集賢侍讀學士王結預經筵取經史中切心德治道者用蒙古語漢文兩進讀潤譯之際每患詞不達意輒數日乃成一篇專以體用爲啟沃拜翰林直學士俄兼國子祭酒嘗因講罷論京師恃東南運糧竭民力以航不測非所以寬遠人而因地利京東瀕海數千里北極遼海南濱青齊桂葦之場海濱沃壤宜用浙人之法築隄捍水爲田

元史卷三十九 列傳

二

聽富民欲得官者合其眾分授以地官定其畔以爲限能以萬夫耕者授以萬夫之田爲萬夫之長千夫百夫亦如之察其惰者而易之一二年勿征也三年視其成以地之高下定爲額漸次征之五年有積蓄命以官就所儲給以祿十年佩之符印得以傳子孫如軍官之法則東面民兵數萬可以近衛京師外禦島夷遠寬東南海運以紓疲民遂富民得官之志而獲其用江海游食盜賊之類皆有所歸上是之而羣議畏難遂寢其事其後海口萬戶之設大略宗之文宗在潛邸已知集名旣卽位命集仍兼經筵集乞郡不許除奎章閣侍書學士時關中大饑帝問集何以裒之對曰承平日久人情宴安欲有興舉每生怨謫今大儲之餘正爲治作新之會若遣一二有仁術知民事者假

以事權治溝洫限畝賦薄征斂招其流亡正其封域可復
古人井田經界遺意幸假臣一郡試行三五年必有以報
朝廷者左右有曰虞伯生欲以此去爾遂罷其議時宗藩
睽隔功臣汰侈政教未立帝將策士於朝集擬制策以進
首以勸親親體羣臣一風俗協萬邦爲問帝不用集以入
侍燕閒無益時政且媚嫉者多力辭職帝曰朕立奎章閣
置學士員以講求祖訓及古昔治亂得失若軍國機務自
有省院臺任之非卿等責也其勿復辭有旨修國朝經世
大典命集與中書平章政事趙世延同任總裁集請令禮
部尙書馬祖常國子司業楊宗瑞翰林修撰謝端應奉蘇
天爵太常李好文國子助教陳旅前詹事院照磨宋駿通
事舍人王士點助撰錄帝以諸人方修遼金宋三史未成

元史卷三十九 列傳

三

令閣學士專率其屬以修大典集又請以翰林國史院修
祖宗實錄時百司所具事蹟參訂翰林院臣言實錄法不
得傳於外則事蹟亦不當示人又請以國書托卜赤顏增
修太祖以來事蹟承旨塔什海身復以托卜赤顏非可令
外人傳者遂皆已俄世延歸集專領其事再閱歲書乃成
凡八百帙既上進以目疾旬解職不允乃舉治書侍御史
馬祖常自代不報御史中丞趙世安乘間爲集請假一外
任便醫帝怒曰一虞伯生汝輩不容邪帝方鄉用文學以
集弘才博學一時大典冊成出其手故重聽其去集每承
顧問及古今政治得失必委曲盡言或隨事規諫冀有開
悟眾患其知遇思閒之乃摘其文辭爲譏訕賴帝覺察不
能中傷一日命集草制封乳母夫爲營都王使貴近阿榮

嘖嘖傳旨二人者素忌集謬言制封營國公集具稟俄承
相自稱前來索制詞甚急集以稟進丞相愕然問故集知
爲所給立請易稟以進終不自言二人者愧之其雅量類
如此其薦人材必先器識未嘗徇情市恩評議文章不折
之於至當不止雖以此二者忤物速謗終不爲動光人龔
伯璉以才俊爲馬祖常所喜屬集薦引集不可一日邀集
過其家設宴酒半出薦贖求集署集固拒之祖常不樂而
罷後伯璉以用事敗殺其身人始服集知人文宗崩乃謝
病歸臨川初文宗在上都將立其子而忌明宗之子安歡
帖穆爾乃託其乳母夫言明宗在日素謂安歡太子非其
子黜之江南驛召翰林學士承旨阿鄰帖木爾奎章閣太
學士忽都魯篤彌實書其事於托卜赤顏又召集使書詔

元史卷三十九 列傳

四

播告中外順帝元統二年遣使召集還禁林以疾不能行
侍臣有以舊詔爲言者帝曰此我家事豈由彼書生邪至
正八年卒年七十有七贈仁壽郡公集家素貧歸老後食
指益眾登門之士邸舍至不能容然碑版未嘗苟作南昌
富民有伍真父者貲產甲一方壻於諸王女充本位下郡
總管既卒其子厚幣求銘墓集不許嘗欲取太原元好問
中州集遺意別爲南州集表章江左先賢以病目而止早
歲與弟榮同闢書舍爲二室左室書陶淵明詩於壁題曰
陶庵右室書邵堯夫詩題曰邵庵故世稱邵庵先生國學
諸生若蘇天爵王守誠輩終身不名他師皆當世名卿也
榮字仲常延祐五年進士授吉安永豐丞改湘鄉州判官
性癖古有富民殺人使隸己者坐之上下皆阿從榮獨不

署卒正富民之罪有巫至其州稱神降告其人曰某方火即火至達晝夜告者數十寢食盡廢縣長吏以下皆迎至家厚禮之又曰將有大水且兵至州大家皆盡室逃繁執劫火卒一人訊之盡得巫黨所為坐捕盜司召巫至鞠之無敢施鞭箠者繁乃斷巫竝其黨如法一時吏民始驚服繁於詩書春秋皆有論著而春秋尤其家學吳澄亟稱之集接方外士必扣擊其說以窮吾道異端疑似之辨繁不然聞諸僧在坐輒不入竟去其性方正雖集亦嚴憚之年不及艾而卒

白察罕

雅爾丁 脫烈海牙

察罕西域板勒紇城人也仁宗賜姓白氏父伯德那歲庚辰元兵下西域舉族來歸事親王旭烈授河東民賦副總

元史卷三十九 列傳

五

管因居河中猗氏縣後徙解州贈芮國公察罕生於河中是夜天氣清明月白如晝賀者曰是兒必貴國人謂白為察罕故以名焉長而魁偉穎悟博覽強記通諸國字書為行軍府奧魯千戶奧魯赤參政湖廣及進平章皆辟為理問政事悉委裁決且令諸子受學焉前後從奧魯赤出入湖廣江西兩省凡二十一年多著勳績成宗大德四年丞相哈刺合孫以察罕廉潔固宜居風憲然武昌大郡非斯人不可治竟除武昌治中廣西妖賊高仙道以左道惑眾平民誑誤者以數千計既敗湖廣行省命察罕與憲司雜治之鞠得其情議誅首惡數人餘皆縱遣且焚其籍眾難之察罕獨任其責以治取聞擢河南省郎中武宗即位立太弟仁宗為皇太子河南平章囊加台薦之即驛召至上

都授詹事院判進詹事院事尋命領都總管府至大元年開戶口江南諸省還進詹事府正加昭文館大學士遷家令武宗崩仁宗哀慟不已察罕勸發府庫振饒寡孤獨為先帝資福東官故有左右衛兵命囊加台察罕總右衛且命審擇官屬仁宗即位拜中書參政但總持綱維不屑細務識者謂得大臣體帝以察罕清素賜金束帶鈔萬貫前後賞賚不可勝計皇慶元年進平章政事商議中書省事乞歸解州立碑先塋許之暮年居德安白雲山別墅以白雲自號閒入觀帝望見曰白雲先生來也嘗問張良狄仁傑之為人察罕以史傳對并誦范仲淹所撰狄仁傑碑詞甚熟帝歎息曰察罕博學如此邪獻所譯貞觀政要帝悅詔繕寫偏賜左右且詔譯帝範又命譯脫卜赤顏名曰

元史卷三十九 列傳

六

聖武開天紀及紀年纂要太宗平金始末等書俱付史館嘗以病請告暨還朝帝御萬歲山圓殿與平章李孟入謝帝問其病對曰荷陛下哀矜放歸田里不覺沈疴去體爾命賜茵以坐顧李孟曰知止不辱今見其人察罕天性孝友田宅在河中者悉分與諸昆弟昆弟貧來歸者復分與田宅奴婢縱奴為民者甚眾故人多稱長者既致仕優游八年以壽終又有曲樞者西土人以太后宫臣仁宗幼時阿保累官至平章政事子孫貴顯皆緣藩邸恩舊無事可書舊史專傳今不錄

雅爾丁字太初回回人亦赫氏氏

舊連氏 為名

父亦速馬因仕

至大都南北兩城兵馬都指揮使雅爾丁幼穎悟嗜學所讀書過目終身不忘尤工其國書國語初為中書掾以年

勞授江西行省員外郎入爲刑部員外郎改中書右司郎中刑部嘗有獄事上讞既論決已而丞相知其失以譴右司主者雅爾丁因取成案補署名其下或訝之曰茲獄之失公實不與丞相方譴怒何反追署之雅爾丁曰吾偶不署此案耳豈有與諸君同事而獨幸免哉丞相聞而賢之同列因以獲免遷左司郎中時左司闕一都事平章梁暗都刺謂之曰人之材固嘗有之惟篤實不欺爲難得公當舉所知雅爾丁遂以王毅李迪爲言輿論稱允又嘗謂朝士如王仁卿賈元播高彥敬威卿李清臣輩可大用後皆如其言遷翰林侍講學士轉集賢大學士至大初元詔參議尙書省事不就復拜參議中書省事亦以疾辭延祐初卒

元史卷三十九

列傳

七

脫烈海牙畏吾氏世居別什巴里之地曾祖闊華當太祖西征導其主亦都護迎降祖八刺朮始徙眞定父闊里赤性純正知讀書脫烈海牙幼嗜學喜從文士遊由中書宣使出爲寧晉主簿改隆平縣達魯花赤均賦興學勸農平訟橋梁水防備荒之政無一不舉及滿去民勒石以紀其政拜監察御史時江西胡參政殺其弟訟久不決脫烈海牙一訊竟伏其辜出僉燕南道廉訪司事務存大體不事苛察在任六年黜汚吏百四十有奇召爲戶部郎中仁宗在東宮知其嗜學出祕府經籍及聖賢圖像以賜時人榮之母霍氏卒哀毀骨立事聞賜鈔五萬貫給葬事起爲吏部尙書量能敘爵以平允稱改禮部尙書領會通館事遷荆湖北道宣慰使適峽人艱食先發廩振之而後以聞卒

馬祖常

馬祖常

馬祖常字伯庸世爲雍古部居淨州天山高祖錫里吉思金季爲鳳翔兵馬判官以節死贈恆州刺史子孫因其官以馬爲氏曾祖月合乃一作月忽乃性好施禮士所薦引參佐皆一時名流後多致卿相料民丁於中原凡儒通一經者卽不同編戶著爲令甲從世祖攻宋畱汴掌饋餉請於淮北立榷場歲得鐵百三萬餘斤鑄農器易粟四萬石官民兩便累官禮部尙書父潤同知漳州路總管府事始家光州延祐初行科舉祖常鄉貢會試皆中第一廷試以南人居第二授應奉翰林文字拜監察御史是時仁宗在御已久猶居東宮近侍每因宴享輒有陳請祖常上書請

元史卷三十九

列傳

八

御正殿立朝儀御史執簡太史執筆使懷姦利乞官賞者不敢出諸口天子承天地祖宗之重當極調攝一以沈涵爲戒及立英宗爲皇太子又上書請慎簡師傅時鐵木迭爾爲丞相專權勢作威福祖常率同列劾其不法十罪仁宗震怒黜罷之秦州山移祖常言山不動之物今而移焉由在野有當用而不用之賢在官有當言而不言之佞大臣宜辭官讓能待罪修省疏聞大臣皆家居待罪祖常薦賢拔滯知無不言劾鐵木迭爾腹心博羅劉吉馮翊霄劉允中等依藉威勢交通賄賂又薦前中書平章蕭拜住左丞王毅昔在政府數抗權相宜置機要勿令外補前監察御史徹里中書參議韓若愚皆被奸相誣罔排擯宜早賜錄用以作士氣又薦翰林承旨劉敏中司業吳澄修撰陳

觀主事史惟良宜備訪問居諫職亡何鐵木迭爾復相左遷開平縣尹因欲中傷之遂退居光州久之奸相既死乃除翰林待制泰定初兼翰林直學士除禮部尚書尋辭歸天祿元年召為燕王內尉仍入禮部兩知貢舉一為讀卷官時稱得人元統元年拜御史中丞持憲務存大體黜苛細已而辭職歸光州兩除江南陝西行臺中丞皆以疾不赴至元四年卒追封魏郡公諡文貞祖常立朝既久多所建明嘗議今國族及諸部既誦聖賢書當知尊諸母以厚彝倫又議將家子弟驕脆有孤任使而庶民有挽強蹶張老死草野者當建武學武舉儲材以備非常時雖弗用識者建之有文集行於世嘗預修英宗實錄又譯潤皇圖大訓承華事略又編集列后金鑑千秋記略若干卷蘇天爵

元史卷三十九 列傳 九

銘其墓見瀋溪文稿祖常曾祖月合乃舊史專傳今併入

夔夔 兄同回

夔夔字子山康里氏父不忽木自有傳祖燕真事世祖從征有功夔夔幼肄業國學師許衡長襲宿衛以兵部郎中轉祕書監丞奉命往覈泉舶歸裝無珠犀屨遷至禮部尚書監羣玉內司國制大樂諸坊咸隸本部遇公燕眾伎畢陳夔夔視之泊如僚佐肅然尋拜翰林學士承旨知制誥兼修國史知經筵事提調宣文閣崇文監屢以經史格言講誦多所裨益順帝即位翦除權奸思更治化夔夔侍經筵日勸帝務學嘗於經筵力陳張商英所論七臣之狀左右錯愕然素知其賢不復肆愠帝暇日欲觀古名畫夔夔即取郭忠恕比干圖以進因言商王受不聽忠臣之諫遂

亡其國帝一日覽宋徽宗畫稱善夔夔進言徽宗多能惟一事不能帝問何事對曰獨不能為君爾或遇天變民災必懇請側身修行以回天意帝察其真誠虛己以聽特賜只孫燕服玉帶楮幣以旌其言夔夔嘗謂人曰天下事宰相當言宰相不得言則臺諫言之臺諫不敢言則經筵言之備位經筵得言人所不敢言於天子之前志願足矣故於時政得失有當匡救者未嘗稍默大臣議罷先朝所置奎章閣學士院及藝文監諸屬官夔夔進曰民有千金之產猶設家塾延館客豈富有四海一學房乃不能容邪帝深然之即日改奎章閣為宣文閣藝文監為崇文監命夔夔董治時科舉既輟夔夔從容為帝言科舉人材所由出必不可廢遂復舊制一日進讀司馬光資治通鑑因言國

元史卷三十九 列傳 十

家當及斯時修遼金宋三史以資殿監卒得置局纂修又請行鄉飲酒於國學使民知遜悌及請褒贈唐劉蕡宋邵雍以旌道德正直皆從其請夔夔以重望居高位而愛士甚於饑渴四方士大夫翕萃其門有達官謂曰儒有何好而君愛之夔夔曰裕宗學於贊善王恂今祕書所藏裕宗做書親署御名學生某習世祖嘗召我先人坐寢榻下陳說四書及古史治亂至丙夜不寐世祖喜曰朕所以令卿從許仲平學正欲卿以嘉言入告耳今汝言儒不足愛則聖祖神宗何為篤好之乎出拜江浙行省平章明年復以翰林學士承旨召還時中書平章闕員近臣以言規帝意帝曰平章已有其人今行半途矣意在夔夔也至京七日感疾卒時至正五年也家貧幾無以斂夔夔善真行草

書得晉人意趙孟頫能日楷書萬言變能日楷書三萬
言片紙人爭寶之諡文忠兄回回字子淵亦有文學武宗
時以藩邸舊臣出使稱旨至大開歷山南江南淮西河南
廉訪使皆有政聲英宗即位丞相拜住首薦參議中書泰
定初廷議漕運事奏減糧數以紓東南民力文宗立擢中
書右丞力辭還第聞明宗中途崩流涕不食自是杜門不
出數年卒與變變皆爲名臣世號雙壁

自當

答里麻 月魯帖木爾

自當蒙古人燕只吉台氏曾祖忙怯圖以千戶從憲宗南
征有功父阿忽台事成宗爲左丞相武宗初被誅後贈和
寧忠獻王自當於至治中拜監察御史錄囚大興縣人有
收道傍死囊駝置囊中者會官囊駝被盜乃捕而勘之

元史卷三十九 列傳

七

其人自誣服自當疑其冤而御史臺不聽竟處死後數日
遼陽行省以獲盜聞冤始白人以是服其明慎泰定二年
扈從至上都糾參政楊庭玉贓罪不報卽納印還京師帝
遣使追還卽再上章劾庭玉竟如其言又劾奏平章政事
圖滿迭爾入怯辭之日英宗被弑必預聞其謀不當蒙金
帶之賜不省自當遂辭職改工部員外郎中書省委開渾
河自當往視奏言水性不常民力亦瘁難以成功罷其役
會次三皇后殂命工部盡徹行殿車帳而新之自當請入
對奏曰皇后行殿車帳尙新何必改作徒勞民費財且先
皇后令終初無惡疾居之奚嫌倘一后棄世必盡舍舊更
新則大明殿乃自世祖所御列聖嗣位豈皆改作乎帝大
悅從之遷吏部員外郎帝欲加太后號曰太皇太后命朝

堂議之自當曰太皇太后之號孫可施之祖母子不可以
施之母也議遂格文宗卽位除中書左司郎中有詔使自
江浙還言行省臣意若懷不服者帝怒命遣使問不敬狀
自當言於丞相燕帖木爾曰上新卽位雲南四川猶未定
未可以使臣一空言遽罪行省大臣況江浙膏腴地安知
非使臣不服所欲故造言陷之邪事乃止既而參議中書
省事燕帖木爾議加封太保柏顏王爵自當曰太保位列
三公而復加王封後再有大功將何以處之且丞相封王
宐出自上意王爵非中書選法也遂罷其議拜治書侍御
史初文宗在集慶潛邸欲劫天靈寺令有司起民夫江南
行臺監察御史亦乞刺台以爲宐出錢募夫不當役民至
是文宗欲黜之自當諫曰當陛下在潛邸時御史盡心爲

元史卷三十九 列傳

七

陛下言此忠臣也奈何黜之非所以示天下乃除湖南僉
憲文宗嘗欲游西山裂帛湖自當諫不聽遂稱疾不從行
文宗在舟中顧謂臺臣曰自當終不滿朕此游邪臺臣嘗
奏除目文宗以將作院官閭閻代之自當言閭閻善諧諛
惟可任教坊司不可居風紀帝乃止順帝初除福建都轉
運鹽使先是泰定帝嘗欲以河間江浙福建鹽引六萬賜
中書參議撒迪自當執不可至是自當復建言鹽引宐盡
資國用以舒民力時撒迪方爲御史大夫不以爲怨數遣
人省自當母於京邸人兩賢之改浙西廉訪使時有駙馬
爲江浙行省丞相其宦豎恃勢強買民物自當輒械以徇
自是丞相府無敢擾民尋召同僉樞密院事寧夏人有告
買邁等謀害太師柏顏者柏顏命偕中書樞密官往鞫歸

坐以誣告柏顏怒自當前曰太師令吾三人往勘者非欲得實情邪如不欲得實而罪鞠者則我主其事宜獨當罪遂左遷同知徽政院事自當歷事四朝衍衍在位終始一節近古之遺直然卒以是忤權貴不復柄用弟別怯不花至正中拜右丞相為御史劾罷舊史有傳今不錄

答里麻高昌人太父撒吉思斯一作思為遼王傳世祖稱其賢從討李壇以勳授山東行省大都督答里麻弱冠入宿衛大德十一年拜監察御史同亦憐真馬祖常劾丞相鐵木迭爾貪肆罪罷之至治元年鐵木迭爾復相以報復為事答里麻辭去明年改燕南道廉訪副使屢平反疑獄除濟寧路總管興學勸農百廢具修府無停事泰定元年遷福建廉訪使劾宦官奉使橫取民財者及宣政院判官取賂

元史卷三十九 列傳 三

富僧者遷浙西廉訪使會文宗發江陵阿爾哈圖來諭旨求賂不獲還譖於朝召至京將處以重罪比至帝怒解遷上都同知留守天祿三年召拜刑部尚書國制新君即位必賜諸王駙馬妃主及宿衛官吏金帛答里麻唱名給散革虛冒之數國費大省賜黃金腰帶以旌其能元統三年遷山東廉訪使時山東盜起白晝殺掠答里麻先劾去貪吏而後上禽賊方略齊魯以安除大都路留守帝宴大臣於延春閣特賜白鷹以表其貞廉嘗命修七星堂先是修繕必用赤綠金銀裝飾答里麻獨務樸素令畫工圖山林景物左右年少皆不然是歲秋車駕自上京還入觀之乃大喜以手撫壁歎曰有心哉留守也至正七年遷陝西行臺中丞致仕後召商議中書平章政事不拜全俸優養終

身

月魯帖木爾者卜領勒多禮伯臺氏曾祖以下世官宿衛父普蘭奚由宿衛為中書右司員外郎與丞相哈刺合孫建議迎立武宗累遷至山北遼東道廉訪使月魯帖木爾幼警穎讀書強記儼有大志年十二成宗命與哈刺合孫之子脫歡同入國學仁宗時入宿衛一日帝見其容貌不凡詢知為普蘭奚之子帝曰汝父贊謀以定國難朕未嘗忘因命脫忽台傳旨四怯薛令常侍禁衛先是哈刺合孫欲用為中書蒙古必闡赤輒辭哈刺合孫曰汝年幼欲何為乎對曰欲為御史爾人壯其志久之遂拜監察御史巡按上都劾奏太師右丞相鐵木迭爾受富民張弼賂六萬貫貸死帝怒碎太師印賜月魯帖木爾鈔萬貫除兵部

元史卷三十九 列傳 四

郎中拜殿中侍御史尋為右司郎中帝語近臣曰今皇太子且長可居大位朕欲為太上皇與若等游觀西山以終天年可乎御史中丞蠻子翰林學士明里董阿皆稱善月魯帖木爾獨起拜曰臣聞唐宋禪位嗣主自稱太上皇者若玄宗徽宗皆當禍亂不得已之舉陛下處承平春秋鼎盛正勵精圖治之日何至法前代權變之事哉帝曰月魯帖木爾識量明遠可大用仁宗崩鐵木迭爾復入中書據相位使人懇月魯帖木爾為御史時誣丞相受賂皇太后命丞相哈散等即徽政院推問不實事遂釋鐵木迭爾乃奏為山東鹽運司副使以父憂去官旋改山南江北道廉訪副使泰定初遷汴梁及武昌路總管皆以資親不赴致和元年河南行省平章柏顏矯制起為本省參政共議起

兵迎懷王月魯帖木爾固辭曰皇子北還問參政受命何人則將何辭以對柏顏怒會明里董阿牙皇子過河南而月魯帖木爾爲御史時嘗劾其娶倡女冒受封明里董阿因說柏顏收之丞相別不花亦與之有隙乃謫月魯帖木爾安置雷州順帝至元六年召還至正九年拜翰林學士承旨知經筵事進讀之際引援經史壹本於王道帝嘉納焉十二年江南諸郡盜賊充斥詔拜平章行省江浙因言於丞相脫脫曰守禦江南爲計已緩若得從權行事猶有可爲不從陛辭賜尙醞御衣弓矢甲冑衛卒十人鈔萬五千貫以行比至鎮引僚屬集父老詢守備之方招募民兵數千號令明肅統師至建德獲首賊何福斬於市遂復淳安等縣俘獲萬餘復業者三萬餘家是年卒於徽州軍中

元史卷三十九 列傳

五

宋本 敬儼

宋本字誠夫大都人幼穎拔異羣成童從父禎官江陵師王奎文造詣日深善爲古文辭必已出峻潔刻厲多微辭至治元年賜進士第一人授翰林修撰泰定元年春除監察御史踰月調國子監丞其夏風烈地震有旨集百官雜議弭災之道本抗言鐵失餘黨未誅仁廟神主盜未得宿衛剽掠桓州未治蒙古千戶奪民妻女不問刑政失度民憤天怨災異之見職此之由辭氣激奮眾皆聳聽冬移兵部員外郎二年轉中書左司都事會議招撫溪洞民故將李牢山之子嘗假兵部尙書從諸王帥兵征鬱林州徭在道納妾畱不進兵敗歸樞密副使王卜憐吉台言李平徭有功當遷官本言李棄軍娶妾逗撓軍期宜亟寘諸法副

使色阻乃不敢言右丞相旭蔑傑卒左丞相倒刺沙當國得君與平章政事烏伯都刺皆西域人西域富賈以其國異石來獻其直鉅萬未酬又其門下嘗有過爲司憲視官乃乘三年冬星孛地震之變赦詔中命中書酬累朝獻物之直起用憲臺奪官者本讀竟白曰今警災異而但酬獻物之直此有司細故形諸王言必貽笑天下司憲視有罪者官此世祖成憲今擢用之後復有邪佞賊穢者將治之邪置不問邪宰執心折本言明日竟宣詔本遂稱疾不出至順三年文宗崩順帝未至皇太后在興聖宮正旦議循故事行朝賀禮本言宜上表興聖宮廢大明殿朝賀眾是而從之元統二年卒年五十四本性高抗不屈持論堅正歷仕通顯猶僦屋以居及卒非賻贈幾不能給棺斂執紼

元史卷三十九 列傳

六

者近二千人皆縉紳大夫門生故吏及國子諸生未嘗有一雜實所著有至治集四十卷行於世諡正獻弟裝字顯夫登泰定元年進士第累官至翰林直學士諡文清裝嘗爲監察御史於朝廷政事多所建明其文學與本齊名人稱之曰二宋

敬儼字威卿其先河東人後徙易水五世祖嗣徽仕金官參政曾祖子淵祖鑑皆以進士起家父元長有學行官至太常博士儼其仲子也長嗜學善屬文御史中丞郭良弼薦其文學爲殿中知班著憲章若干卷選充中書省掾朱清張瑄爲海運萬戶豪縱不法適儼典其文牘嘗致厚賂儼怒拒之二人以罪伏誅權貴多以賄連坐獨儼不與至大元年擢江南諸道行御史臺治書侍御史先是儼以議

立尙書省忤宰臣意適兩淮鹽法久滯乃左遷儼爲轉運使欲以陷之比至首劾場官之貪污者法既大行課復增羨至二十五萬引河南行省參政來會鹽筴將以羨數爲歲入常額儼以亭戶凋敝已甚以羨爲額民力將殫病人以爲己非宰臣事事遂止仁宗踐阼召爲戶部尙書皇慶二年拜江西行省參政舊俗民有爭往往越訴於省吏得竝緣爲奸利訟以故繁儼令下省府非有司不得侵民訟事遂簡詔設科舉儼薦臨川吳徵金陵楊剛中爲考試官得人爲多延祐四年召爲侍御史湖廣省臣以賊敗儼一日五奏卒正其罪五年拜中書參政臺臣復奏留之儼亦陛辭不允賜大學衍義及所服犀帶每入見帝字之而不名舊制諸院寺監皆得奏除僚屬歲久多冒濫富民或以

元史卷三十九 列傳

七

賂進至大官儼以名爵當慎惜會臺臣亦以爲言奏請悉追奪著爲令六年告病遣醫視療儼以其鄉在近圻恐復徵用乃徙居淮南雖親故皆不接見至治泰定兩召皆不赴泰定四年春遣使賜酒徵爲集賢大學士商議中書省事儼令使者先返而挈家歸易水復賜酒召之乃與疾入見賜食慰勞命朝會日無下拜是月拜中書平章政事復以老病辭不從天厯改元朝議欲盡戮朝臣之在上京者儼抗論謂是皆循常歲例從行殺之非罪眾賴之獲免居月餘傷足告歸家居十餘年痺不能行猶劬書不廢臨終正冠幘端坐而逝封魯國公諡文忠有詩文若干卷叔祖鉉與太原元好問同登金進士第元初爲中都提學著春秋備忘四十卷仁宗朝命刻行之

郝天挺 曹伯啟 趙師魯 王壽 謝讓 王伯勝 韓若愚

郝天挺字繼先出於朵魯別族自曾祖而上居安肅州父和上太宗憲宗之世多著武功爲河東行省五路軍民萬戶天挺少有志略受業於元好問以勳臣子召見世祖命宿衛東宮皇太子遇之甚厚累遷中書右丞與宰相論事有不合輒面斥之成宗崩仁宗首定大難及武宗還自朔方入正大統定策之際天挺與有力焉仁宗臨御收召故老天挺與少保張閻等十人共議大政革尙書省之敝遂成皇慶之治又出爲江西河南二省右丞召拜御史中丞入見首陳紀綱之要以獵爲喻曰御史職在擊奸猶鷹揚焉禽之弱者易獲也其力大者必借人力不然不惟失其前禽且有傷鷹之患願陛下爲言官作主帝嘉其言既出

元史卷三十九 列傳

七

臺臣皆賀風紀大振又上疏陳七事曰惜名爵抑浮費止括田久任使論好事獎農務本勵學養士詔中書省舉行之尋俾均逸於外拜河南行省平章時河南王卜憐吉台爲丞相待以師禮由是政化大行皇慶二年卒封冀國公諡文定天挺嘗參議雲南行省修雲南實錄五卷又註唐人鼓吹集十卷行於世子佑字君輔由宿衛補官仁宗時拜殿中侍御史以廉直著名大受知遇遷陝西行省參政曹伯啟字士開濟寧陽山人弱冠從東平李謙游篤於問學至元中以吏起家遷河南省都事台州路治中以薦擢拜西臺御史改都事關陝自許衡倡學教士伯啟請建祠立學以表其績覈實涇陽奸民之誣其尹不法者糾四川廉訪僉事關闕木苛刻之罪延祐元年遷刑部侍郎丞相

鐵木迭爾專政一日召刑曹官屬問曰西僧訟某之罪何爲久弗治眾莫敢對伯啟從容言曰犯在赦前丞相雖甚怒莫之奪宛平尹盜官錢鐵木迭爾欲併誅守者伯啟執不可杖遣之八番帥擅殺起邊警朝廷已用帥代之矣命伯啟往詰其事次沅州道梗伯啟恐兵往則激亂乃遣令史楊鵬單騎往諭新帥備得其情止奏坐前帥擅殺罪邊民以安大同宣慰使法忽魯丁撲運嶺北糧歲數萬石肆欺罔累虧鉅萬朝廷遣使督徵率以賂免取後伯啟往其人已死諭其子弟曰負官錢雖死必徵與其納賄於人曷若償之於官第條汝父所賂之數官爲徵理諸受賂者懼潛歸之於其子爲鈔五百餘萬緡糧遂足民之逋負無可理者卽列上與免之英宗立召拜山北廉訪使時敕建西

元史卷三十九 列傳

九

山佛宇甚亟御史觀音保等以歲饑請緩近臣激怒上聽遂欲誅言者伯啟曰主上聰明睿斷是不可以不諍迺劾臺臣緘默使昭代有殺諫臣之名帝爲悚聽俄拜集賢學士御史臺侍御史有詔同刊定大元通制伯啟言五刑者刑異五等今黥杖徒役於千里之外百無一生還者是一人身備五刑也法當改丞相是之會伯啟除浙西廉訪使不果行泰定初引年北歸優游鄉社殫人賢之表所居爲曹公里伯啟性莊肅奉身清約在中臺所獎借名士尤多爲侍讀學士考試國子首取呂思誠姚紱雲南僉事范震言宰臣欺上罔下不報范飲憾死伯啟書其事於太史眞州知州呂世英以剛直獲罪伯啟白其枉進擢風憲其好彰善率類此天麻中起爲陝西諸道行御史臺中丞伯啟

喟然曰吾年且八十尚忘知止之戒乎終不起一時被命者因相繼去位天下之士高之有詩文十卷號漢泉漫槩續集三卷行世

劉正字清卿清州人年十五知讀書習吏事辟尙書戶部令史至元八年罷諸路轉運司立局攷覈逋欠正掌其事大都運司負課銀五百四十七錠逮繫倪運使等四人徵之及覈本路歲入籍實無所負冤久不決正徧閱吏牘得至元五年李介甫關領課銀文契七紙適合其數驗其字畫皆司庫辛德柔所書也辛交結權貴莫敢誰何正白尙書捕鞠之遂伏其辜而四人得釋正由是知名辟掾中書分省上都會諸王昔里吉叛邊將請黃金符充戰賞主者告乏中書檄工部造給之後帝以爲工部專擅欲詰治

元史卷三十九 列傳

十

正曰軍賞貴速先造符印而後稟命豈不可乎帝釋之十五年擢左司都事時阿合馬當國與江淮行省阿里伯崔斌有隙誣以盜官糧四十萬命刑部尙書李子忠與正馳驛往按以實覆忤阿合馬旨復遣其黨四人雜治之竟眞二人於死正遂移疾還家十八年徵爲中書左右司員外郎阿合馬敗和魯霍孫爲右丞相中書傳旨捕正與參政札喜魯丁等謂皆黨於阿合馬械繫關東踰數日姦黨多伏誅復械繫正於拱衛司和魯霍孫曰上嘗謂劉正衣白衣行炭穴十年可謂廉潔豈肯黨姦臣者乎乃免歸二十五年桑葛既立尙書省擢爲戶部尙書嘗舉賑河間鹽運官虧課事忤桑葛幾陷於罪復移疾歸二十八年桑葛敗完澤爲丞相再擢戶部尙書參議中書省事遷江南行御

史臺中丞大德初改雲南行中書省左丞極言征緬之不可朝廷不從師果無功雲南民歲輸金銀近中慶城邑戶口則詭稱逃亡旬寨遠者則季秋遣官領兵往徵人馬芻糧往返之費歲以萬計所差官必重賂省臣乃得遣徵收金銀之數必十加二而折閱之數又如之其送迎饋贖亦如之以銅雜銀納官之敝又如之正首疏其敝給官稱俾土官身詣官輸納其敝始革始至官儲貳二百七十萬索白銀百錠比四年得貳千七十萬索金百錠銀三千錠仁宗即位召諸老臣入議政正詣闕言八事曰守成憲重省臺辨邪正貴名爵正官符開言路慎賞罰節財用會行赦改元集議行之仁宗初政風動天下正與諸老臣陳贊之力居多累乞致仕不許拜平章政事議中書省事延祐六年卒封趙國公諡忠宣子秉德歷兵工二部侍郎秉仁累官工部尚書

元史卷三十九 列傳 三

謝讓字仲和潁昌人祖義有材勇金貞祐間為義軍千戶讓幼穎悟好學及壯推擇為吏累擢南臺御史舉哈刺合孫可為御史大夫陳天祥可為御史中丞高昉可任風憲劾江浙省臣聽詔不恭及不法事成宗遣使雜問既款服詔令讓與俱來人皆危之讓泰然若無事者臺綱以振大德開詔立陝西行御史臺以讓為都事凡御史封章及文移其可否一決於讓入為中書省右司都事遷戶部員外郎四年出為湖廣行省左右司郎中時廣西兩江岑雄黃聖許等屢相讎殺為邊患讓謂此曹第可懷柔不可力競當寬其法以羈縻之使不至跳梁不當舍中國有用之民

爭荒炎不毛之地因書榜招諭以攜其黨湖廣宣慰使張國紀建言科江南夏稅讓極言其非便遷河南行省左右司郎中是時江淮屯戍軍二十餘萬親王分鎮揚州皆以兩淮民稅給之不足則漕於湖廣江西是歲會計兩淮僅少三十萬石讓請以淮鹽三十萬引鬻之收其價鈔以給軍食不勞遠運公私便之至大開轉戶部侍郎尋拜戶部尚書時京倉主計吏以倉廩多罅漏久雨米壞請覆稊稅其上因採諸米中以給內外工人及宿衛者讓察其奸易以稊秬奸敝悉除改刑部尚書仁宗即位罷尚書省讓白前此省臣構殺畱守鄭阿爾思蘭之冤以所籍貲產給還之有旨六部事疑不決者須讓共議而後上聞於是戶部更定鈔法禮部議正禮文讓皆與焉讓上言古今有天下

元史卷三十九 列傳 三

者皆有律以輔治堂堂聖朝詎可無法以準之使吏任其情民罹其毒乎帝善其言即命中書省纂集典章以讓精律學使為校正官延祐二年朝廷以吏多滯事責法曹按不如程期者令下讓曰刑獄非錢穀銓選之比寬以歲月尚慮失實豈可律以常限乎乃入白於宰相由是刑曹獨得不責稽遲卒封陳畱郡公諡憲穆
王伯勝霸州文安人兄伯順給事內廷為世祖所親幸因以伯勝入見命在宿衛時伯勝年十一廣穎巨鼻狀貌屹然帝顧謂伯順曰此兒當勝卿可名伯勝嘗進沃盥水溫冷甚稱旨帝曰此兒他日必知為政達人情矣至元二十五年從征乃顏以功授拱衛直都指揮使賜金虎符成宗大德五年扈從上都天久兩夜聞城西北有聲如戰聲然

伯勝率衛卒百人出視之乃大水暴至立具菴鋪集土石
甃罽以塞門分決壕隍以泄其勢至旦始定而民弗知丞
相完澤以聞帝嘉之九年以侍成宗疾忤安西王出爲大
寧路總管伯順亦出爲梁王傅武宗卽位召拜耶可札魯
花赤刑部尚書至大二年加右丞明年進大都留守兼少
府監初大都土城歲必衣葦以禦雨日久土益堅而勞費
不已伯勝奏罷之仁宗立拜遼陽行省平章增郡學弟子
員擇賢師以化其俗又擇隙地爲館廡以待使客之至度
閒田百頃募民耕種以廩餼之歲大旱伯勝齋戒禱畢卽
兩人謂之平章雨延祐二年召爲大都留守遼陽民狀其
行事言於中書乞留不報民涕泣而去卒封薊國公諡忠
敏長子恪累官至兵部尚書次馬兒襲武衛親軍都指揮

元史卷三十九 列傳

五

使孫善果襲伯順官至大司徒

韓若愚字希賢保定滿城人由武衛府史累遷中書左司
郎中時議禁民田獵犯者抵死若愚曰昔齊圍殺其麋鹿
者如殺人之罪孟子非之眾以爲然遂輕其刑繼命參議
中書省事鐵木迭爾爲右丞相以愛憎進退百官恨若愚
不附已羅織以事仁宗知其枉不聽拜戶部尚書延祐六
年命理河間等路囚輕重各得其情復拜參議中書省事
鐵木迭爾復入相以舊憾誣若愚罪欲殺之帝不從復奏
奪其官除名歸鄉里泰定元年拜刑部尚書復改侍御史
時左丞相倒刺沙擅威福以事誣侍御亦憐珍等下樞密
獄無敢言其冤若愚以計奏移左丞相倒刺沙爲右大夫
其事遂解三年拜河南省左丞會文宗平內難若愚畫策

中機天祿三年遷淮西北道廉訪使卒封南陽郡公諡
貞肅

趙師魯字希顏霸州文安人父趾祕書少監師魯爲人風
采端凝在太學力學如寒士延祐七年補中書省掾於朝
章故實律令文法無不練習臨事敏果執政奇之及典銓
選平允無私人無不服泰定中拜監察御史時大禮未舉
師魯言天子親祠郊廟所以通精誠迎福釐生蒸民阜萬
物百王不易之禮宜鑑成憲講求故事親祀對越以格純
嘏帝嘉納焉元夕令出禁中命有司張燈山爲樂師魯上
言燕安怠惰肇荒淫之漸奇巧珍玩發奢侈之端觀燈事
雖微而縱耳目之欲則上累日月之明疏聞遠命罷之賜
上尊酒且命御史大夫傳旨以嘉忠直是時宰相倒刺沙

元史卷三十九 列傳

五

密專命令不使中外預知師魯又上言古之人君將有言
也必先慮之於心咨之於眾決之於故老大臣然後斷然
行之渙若汗不可反未有獨出柄臣之意不咨眾謀者不
報倒刺沙雖剛愎亦服其敢言天祿中復爲樞密判官持
節治四川兵諭上威德大閱於郊寬簡有法士卒懷其恩
信改河間路轉運鹽使除害興利法度修飭絕巡察之奸
省州縣廚傳贈遺之費竈戶商人無不便之歲課遂大增
暇日又割己俸率僚吏新孔子廟命吏往江右製雅樂聘
工師春秋釋奠士論稱之師魯由從官久典金穀每鬱鬱
不樂病篤棄官歸京師至元三年卒贈天水郡侯諡文清
王壽字仁卿涿郡新城人幼穎敏嗜學長通蒙古文字至
元間爲中書掾用薦入侍皇太子眷遇特異二十八年任

吏部郎中以堦康里不忽木柄用當道即自免去明年授大司農丞不赴元貞二年出為燕南河北道廉訪副使大德二年不忽木為中執法復棄官歸三年擢御史臺侍御史論事剴切六年命徧祠江南嶽鎮海濱密旨去歲風水為災百姓艱食凡所經過采訪入對使還具奏民之利病繫於官吏善惡宜選公廉愛物者專撫字剛方識體者居風憲而豪右之家據權要者當罷其職處之京師以保全之又與臺臣奏宰相內統百官外均四海位尊任重不可輕假非人三代以降國之興衰民之休戚未有不由相臣之賢否也世祖初置中書省以忽魯不花塔察爾線真安童伯顏等為丞相史天澤劉秉忠廉希憲許衡姚樞等實左右之當時稱治比唐貞觀之盛迨至阿合馬郝禎耿仁

元史卷三十九 列傳

五

盧世榮桑葛忻都等壞法黷貨流毒億兆近者阿忽台巴顏八都馬辛阿里等專政煽惑中禁幾搖神器君子小人已試之驗較然如此臣願推愛君思治之心邪正互陳成敗對舉庶幾上悟天衷懲其既往知所進退天下之事可從而理也九年參議中書省事十年改吏部尚書武宗即位首拜御史中丞至大三年夏遷集賢大學士卒封薊國公諡文正

吳元珪

臧夢解 陳顯

吳元珪字君璋廣平人簡重好深思凡征謀治法律令章程無不通習至元十四年世祖召見命侍左右授後衛經歷佩金符從幸上都受命取御藥於大都萬歲山元珪乘傳未盡一晝夜而至帝奇其速擢樞密經歷嘗從同知樞

密院事俺伯一作俺進西番鎧甲帝問其制度元珪應對詳明帝益奇之初江南既定樞密奏裁定官屬京師五衛行省萬戶府設官有差均俸祿給醫藥設學校置屯田多元珪所論建大德元年除吏部尚書選曹銓注多私其鄉里元珪曰此蜀黨朔黨之漸風不可長請謁悉謝絕之三年宣撫燕南劾貪吏若干人遷工部尚書河朔連年水旱五穀不登元珪言春秋之義以養民為本凡用民力者必書民力息則生養遂生養遂則教化行請息土木之工從之六年拜江浙行省參政初朱清張瑄以財雄江南以金幣徧結當路及伏誅錄其家具籍所交權貴而江浙省臣尤甚惟元珪一無所染武宗即位拜樞密副使詔元珪二十餘人議政中書如惜人力嚴選舉節財用定律令謹賞罰

元史卷三十九 列傳

五

建科舉課農桑汰冗員易封贈皆切世務初詔發軍萬人屯田稱海以實邊海都之亂被俘者眾有來歸者饑寒不能存至鬻子以活元珪以聞詔賜錢贖之帝在軍中即聞元珪名至是特加平章政事仁宗即位詔與十六人議時政皇慶元年出拜江浙行省左丞江淮漕臣言江南殷富由多匿腴田若再行檢覈當益田畝累萬計元珪曰江南之平幾四十年戶有定籍田有定畝一有動搖其害不細固爭月餘不能止移疾去延祐初復為樞密副使奏曰昔世祖限田四百畝以給軍需餘田悉供賦稅今經理江淮田土第以增多為能加以有司頭會箕斂俾小民困苦日甚臣恐變生不測非國之福帝曰凡爾軍士之田並遵舊制英宗至治元年與知樞密院事帖木不花上軍民之政

十餘事大抵言諸王近侍不可干軍政管軍官吏不可漁取軍戶軍官之材者當遷其職有司賦役當務均一而軍民不可偏枯軍官襲職惟傳適嗣而支庶不可冒亂帝並降旨施行以年老致仕卒封趙國公諡忠簡

臧夢解慶元人宋末中進士第未官而國亡至元十三年從其鄉郡守將內附浙東宣慰司舉夢解才兼儒吏可試州郡授海鹽知州時准東按察副使王慶之按行至其州見夢解剛直廉慎凡有差役皆當其貧富戶增田闢榆柘交蔭乃舉夢解政平訟簡爲諸州縣取御史臺亦交薦其廉能除同知桂陽路總管府事三十年擢廣西廉訪副使凡煙瘴地行部咸徧歷焉遂按問賓州藤州兩路達魯花赤黜貪官姦吏八十餘人屢平反冤獄大德元年遷江西

元史卷三十九 列傳

七

廉訪副使有臨江路總管李侗素狡猾附貴臣勢以控持省憲夢解按其贓罪一道肅清九年除廣東廉訪使以老病致仕夢解博學洽聞而敏於政事操守尤爲介特所著書有周官攷三卷春秋微一卷大夫士皆稱曰魯山先生云同時有陸屋者與夢解齊名監察御史鄭鵬南嘗以二人竝薦於朝屋字仁重江陰人自幼以孝友聞至元開承相伯顏以師南下屋年未冠率其鄉人見之議論有合兵遂不涉其境伯顏奏授同知徽州路總管府事以廉能擢置臺憲累遷湖南浙西廉訪使所至以黜賊吏洗冤獄爲己任且嘗上章奏免儒役及舉行浙西助役法卒諡莊簡陳顯字仲明清州人少游京師登翰林承旨王槃安藏之門槃熟金典章安藏通諸國語顯兼習之安藏乃薦顯入

宿衛尋爲仁宗潛邸說書從居懷孟日開陳以古聖賢居艱貞之道會成宗崩仁宗入定內難迎武宗顯皆預謀及仁宗卽位以推戴奮勳特拜集賢大學士仍宿衛禁中政事無不預聞科舉之行顯贊助尤力時伺帝燕閒輒取聖經所載大經大法有切治體者陳之每見嘉納帝嘗坐便殿羣臣入奏事望見顯喜曰陳仲明在列所奏必善事矣顯以父年老力請歸養帝特命顯長子孝伯知清州以就養而用顯爲中書平章政事顯叩首謝曰臣無汗馬之功經濟之略一旦實之政塗徒速臣咎臣願得朝夕左右獻替可否庶少裨萬一亦以全臣愚忠乃允之仁宗崩辭祿家居者十年文宗卽位復起爲集賢大學士上疏勸帝大興文治增國子學弟子員調儒之徭役先後薦士牘累數

元史卷三十九 列傳

七

百有許之者顯曰謬舉之咎愈於蔽賢順帝元統初顯扈蹕行幸上都至龍虎臺帝握其手曰卿累朝老臣更事多矣凡議政事宜極言無隱明年卒封薊國公諡文忠顯出入禁闥數十年樂談人善而惡聞人過大夫士因其薦拔以至顯列有終身莫知其所自者是以結知人主上下無怨尤次子敬伯至正中拜中書平章政事

王都中

王都中字元俞福寧州人父積翁仕宋爲寶章閣學士福建制置使以全閩八郡圖籍降於軍授福建道宣慰使尋除參政行省江西自請使日本未至爲舟人害於海中都中甫七歲從母張氏在京師世祖給驛券俾南還賜平江田八千畝宅一區年十七特授平江路總管府治中僚吏

頗易其年少都中劄事動中肯綮崑山吳江獄有數年不
 決者各閱實其罪吏咸聘貽秩滿除浙東道宣慰副使發
 積贓鋤豪民遷荆湖北道宣慰副使適歲祿都中躬履山
 谷以拯其饑全活數十萬武宗詔更鈔法行銅錢以都中
 為通才除江淮泉貨監凡天下為監者六惟江淮所鑄錢
 號取精改郴州路總管郴居楚上游谿洞獠獠往來民間
 憚其強猾莫敢相與賈易且民染蠻俗喜鬪爭都中服以
 恩威乃大治學舍作籩豆簞簋笙磬琴瑟之屬延宿儒教
 學以開曉之俗為丕變鄰州茶陵富民覃乙死無子惟一
 小妻誣其贅婿拜屍成婚藏隱玉杯夜明珠株連八百餘
 人奉使宣撫移其獄委都中窮治悉得其情州長吏而下
 計贓至十餘萬緡人以為神明遷饒州路總管年饑米價

元史卷三十九 列傳

无

翔踊都中請於行省以官倉米減糶下價未報又於下等
 價減糶十之二時宰怒其專擅都中曰饒去杭幾二千里
 比議定往還非半月不可人七日不食則死安能忍死以
 待乎吾甘任罪乃止又核郡中金戶貧者更定其額又包
 銀之法戶不過二兩而州縣徵加十倍皆革之一以詔書
 從事境內產兩歧麥六穗禾上聞於朝以內憂去官服闋
 除兩浙都轉運鹽使舊制鹽亭竈戶三年一比附推排任
 事者恐斂怨久不舉行都中請於行省徧歷三十四場驗
 其物力高下以損益之役既平而課亦足遷浙東道宣慰
 使都元帥天麻初徙廣東道宣慰使都元帥元統初朝廷
 以兩淮鹽法久壞命都中行戶部尚書轉運兩淮其施行
 如兩浙法尋拜河南行省參政以疾請告歸卒諡清獻都

中歷仕四十餘年所至有政聲而治郡尤追古循吏當世
 南人以政事聞天下位省憲者惟都中一人而已所賜田
 宅外不增一疇不易一椽廩祿悉給族姻貧者幼留京師
 及拜許衡之門即知所趨鄉取大學修身為本之誼自號
 本齋

王克敬 劉敏中

王克敬字叔能大寧人幼戲道旁丞相完澤奇其貌謂異
 日必令器朔土習尚武而克敬獨好儒既仕累遷江浙行
 省照磨尋遷檢校徽州民汪俊上變誣富人反省臣遣克
 敬往驗之克敬察其言不實中道數為開陳禍福俊悔將
 對簿竟仰藥以死除江浙行省左右司都事往四明監倭
 人互市悉去兵衛推誠撫之皆帖然無敢譁有吳人從征

元史卷三十九 列傳

三

日本陷於倭者至是從至中國訴請還鄉或恐階禍克敬
 竟請於朝而受之鄱陽大饑總管王都中出廩大振行省
 欲罪其擅發克敬曰彼為仁而吾屬顧為不仁乎都中因
 得免拜監察御史尋遷左司都事時英宗勵精圖治丞相
 拜住請更前政不便者會議中書堂克敬首言江南包銀
 民貧有不能輸者有司以責之役戶當罷之兩浙煎鹽戶
 牢盆之役其重者尤害民當免其它役帝悉從之泰定初
 出為紹興路總管行省檄克敬抽分賈舶拗番者例籍其
 貨商人以風水為解有司不聽克敬曰某貨出某國地有
 遠近貨有輕重冒重險出萬死舍近而趨遠棄重而取輕
 豈人情邪具以上聞眾不能奪商人德之調海道都漕運
 萬戶值天麻之變海漕舟有後至直沽者不果輸復漕而

南還行省欲坐罪督運者勒其還趨直沽克敬謂常年若是信可罪今蹈萬死完所漕而還豈得已哉乃令附次年漕舟達京師召參議中書省事有以飛語中大臣者下其事克敬謂勳貴有八議法且罪狀不明何得輕罪大臣宰相傳旨大長公主爲皇外姑賜錢若干平雲南軍還賜錢若干英宗后入覲賜錢若干克敬曰用財宜有道大長公主供饋素優今賜錢出無名是不當也自諸軍征討以來賞格未下平雲南省獨先受賞是不均也英后遠還徒御眾多非大錫賚恩意不能洽今賜物鮮少是不周也宰相以聞文宗可其議遷淮東廉訪使以正綱紀爲已任不縱貪墨不阿宗戚聲譽益著元統初爲江浙行省參政請罷富民承佃江淮田又言松江大姓有歲漕米萬石獻京師

元史卷三十九 列傳

圭

者其人既死子孫貧且行乞有司仍歲徵弗足則雜置松江田賦中令民包納閩郡受害宜免之江浙大旱諸民田減租惟長寧寺田不減遂移牘中書請蘇其困嶺海搖賊竊發朝廷調行省戍兵往討會提調軍馬官缺故事漢人不得與軍政眾莫知所爲克敬抗言行省任方面之寄萬一有重於此者亦將拘法坐視邪卽調兵捕之視事甫五月請老去年未六十也卒封梁郡公諡文肅

劉敏中字端甫濟南章丘人幼卓犖不凡年十三語其父景石曰昔賢足於學而不求知豐於功而不自衒此後人所弗逮也父奇之嘗與同儕言志曰自幼至老相見而無愧色此吾志也世祖至元中由兵部主事拜監察御史桑葛秉政敏中劾其奸邪不報遂辭歸既而起爲御史臺都

事時同官王約以言去敏中杜門稱疾臺臣請視事敏中曰使約無罪而被劾吾固不當出誠有罪邪則我既爲同僚又爲交友不能諫止亦不無過也久之遷翰林直學士兼國子祭酒成宗大德初有暴風星芒之變敏中論事之本政之先其略有七曰畏天敬祖清心持體更化察吏治除民害詔遣宣撫使巡行諸道敏中出使遼東嘗以法繩貴倖發廩振災民被實惠累擢集賢學士商議中書省事復疏陳十事曰整朝綱省庶政進善良剔奸蠹顯公道杜私門廣恩澤實鈔法嚴武備舉封贈武宗嗣位召至上京庶政多所更定加太子贊善仍商議省事轉翰林學士承旨皇慶元年上言陛下卽位之日遵述世祖成憲頒降明詔播告天下至謂除樞密院御史臺徽政宣政二院各依

元史卷三十九 列傳

圭

舊制其餘諸衙門及近侍人等敢有擅自奏啟中書政務者以違制論又至元三十年已後諸衙門改升擢設多冗員非世祖定制者從省臺分別裁罷詳此二條聖意之所以假權中書畀重憲臺者昭然可見然欲得患失與喜奪悲人情所同慮或萋菲之言伺便而入浸潤膚受謗歸省臺省臺一搖政本隨易願密遏潛弭則事權自一紀綱自振仁宗然其言敏中爲文理備辭明有中庵集二十五卷卒封齊國公諡文簡

元史卷三十九 終

元史卷四十

列傳二十四

中葉言臣

陳思謙

秦起宗 李元禮

陳思謙字景讓其家世見祖天祐傳中思謙少孤警敏好學文宗天厯初政收攬賢能丞相高昌王亦都護舉思謙召見與聖宮授禮部主事首請併教坊儀鳳二司入宣徽以清禮部之選其官屬不當與文武臣並列朝會宜置百官之後大樂之前詔從之至順元年拜西行臺監察御史建明八事曰正君道結人心崇禮讓正綱紀併銓衡勵孝行紓民力修軍政先是關陝大饑民多粥產流徙及來歸皆無地可耕思謙言聽民倍直贖之使富者收兼入之利貧者獲已棄之業從之明年拜監察御史首陳四事言爲

元史卷四十

列傳

一

天子者上有宗廟社稷之重下有四海臣民之寄前有祖宗勩業之艱後有子孫長久之計通計秦漢以來上下二千餘年天下一統者六百餘年而已我朝開國百有餘年混一六十餘年土宇人民三代漢唐所未有也民有千金之產猶謹守之以爲先人所營況君臨天下承祖宗艱難之業而傳祚萬世者乎臣當國家全盛之時而以興亡懇懇言者易曰豐亨勿憂宜日中古聖王憂盛危明不於衰微已著之時而於倚伏未形之日圖治機宜不可失也治天下之本其大者在君心常持敬然不自滿假之心懷匹夫一能勝予之懼此在經典謨訓史籍箴鑒已詳言之臣無庸贅至治法大綱莫如足食足兵理財用人以戶部賜田支用計之諸怯薛月請海青獅豹肉食及局院工糧佛

事布施一切濫支較之至元三十年以前動增數十倍至順經費缺二百三十九萬餘錠苟不節無益不急之費罷土木畋獵之工以備軍國之用三分損一以惠民而徒恃目前之豐亨豫大則財用之竭計日可待也又軍站消乏僉補則無殷實之戶接濟則無羨餘之財倘有征行必括民馬皆由馬政不修所致方今西越流沙北際沙漠東及遼海地氣高寒水甘草美無非牧養之地乃不設置羣牧使司統領十監專治馬政并畜牛羊俾收馬畜蕃息之利以致軍站不給無以振兵威而優民力牲餼不供無以飽邊軍而裨國用使國家馬上取天下之強而坐成金宋末年之弱誠可惜也至銓衡用人之敝由入仕之門太多黜陟之法太簡州郡之任太淹朝省之除太速欲救四敝宜

元史卷四十

列傳

二

設三策一曰至元三十年以後增設衙門冗濫不急者從實減并其外有選法者并入中書二曰參酌古制設辟舉之科令三品以下各舉所知得才則受賞失實則受罰三曰古者刺史入爲三公郎官出宰百里蓋使外職識朝廷治體內官知民間利病今後歷縣尹有能聲者授郎官御史歷郡守有異績者任憲使尙書其餘各驗資品通遷在內者不得三考連任京官在外者須歷兩任乃遷內職績非出類守不敗官者則循以年勞處以常調凡朝缺官員須二十月之上方許遷除則治法立而人材可漸出矣文宗嘉其奏曰此方稱祖宗立臺憲之意命中書議行之順帝至正初改中書省右司郎中歲凶盜賊竄起剽掠州邑思謙力言於執政當竭府庫以賑貧民分兵鎮撫中夏以

一
丹
黃
參
四
章
全
書
10
文
內

防後患五年參議中書省事轉刑部尚書十一年改淮西廉訪使廬州盜起思謙亟命廬州路總管杭州不花領弓兵捕之而賊已不可撲滅請於宣讓王帖木不花率王府屬怯薛人討賊王以鞍馬器械未備爲言思謙括官民馬置兵甲不日而集分道竝進遂禽賊渠廬州平旣而穎寇將東渡淮又言於王請亟調芍陂屯卒用之而身任擅發之罪王從其言尋召入爲集賢侍講學士修定國律十三年拜御史中丞卒追封魯國公諡通敏

秦起宗字元卿廣平淡水縣人曾祖當金季兵起竄山麓爲洞奉其親以居旁窳大洞匿其里中唐人閉之具牛酒出待兵兵入索惟見其親屬曰孝士也釋之去里人曰秦父生我起宗生長兵間學書無從得紙父順削柳爲筒寫

元史卷四十

列傳

三

以授之成誦削去更書年十七會立蒙古字學學輒成辟武衛譯史御史中丞塔察爾愛其才遷中臺史仁宗卽位累遷太子家令司典簿官上言東宮官屬輔導德義財賦非所治也朝廷是之遷南臺御史建康多水或實災而有司抑之或無災而訴災起宗微行得實人以爲神明文宗初立命威順王征八番是時蜀省囊加台拒命未平起宗極言武昌重鎮當備上流之師親王不可遠去力止之及王入見帝謂曰八番之行非秦元卿幾爲失計其後八番師還無敢擾於道路者拜中臺御史劾中丞和上受人婦女賤買縣官屋不報起宗從臺官入見跪辨至日暮出明日立太子有赦起宗又奏不罪和上無以正國法和上卒服幸帝曰爲御史當如是矣元會賜只孫服令得與大宴

自是盡言無諱皆見聽用有御史奏議一卷遷都漕運使改撫州路總管至官有司供張甚盛問其費所從出小吏不敢隱曰借辦於民遂亟使歸之几席僅給而已自是官府僚佐有宴集成禮卽止因諭眾曰我素農家安儉約務安靜庶使吾民化之居一歲以老去官明年以兵部尚書致仕又明年卒諡昭肅子鈞西臺御史

李元禮字庭訓真定人資性莊重燕居不妄言笑歷易州大都路儒學教授遷太常博士定撰世祖裕宗尊諡議及請諡園丘升祔太室禮文多所詳定元貞元年拜監察御史彈劾無所回撓二年有旨建五臺山佛寺皇太后將臨幸元禮上疏曰伏見五臺搆建寺宇土木旣興工匠夫役不下數萬附近數路州縣供億煩重男女廢耕織百物踊

元史卷四十

列傳

四

貴民不聊生伏聞太后親臨五臺布施金幣廣資福利其不可行者有五時當盛夏禾稼方茂百姓歲計全仰秋成扈從經過千乘萬騎不無蹂躪一也太后春秋已高親勞聖體往復暑途數千里山川險惡不避風日輕冒霧露萬一調養失宜悔將何及二也陛下卽位以來遵守祖憲正當兢業持盈之日君舉必書貽萬世法書而不法將焉用之三也財不天降皆出於民今日支持調度方之曩時百倍而又勞民傷財以奉土木四也佛本西方聖人以慈悲方便爲教不與物競雖窮天下珍奇供養不爲喜雖無一物爲獻不爲怒今太后爲國家蒼生祈福福未獲而民先受病必爲大覺慈尊所不忍五也伏願中路回轅端居淡宮儉以養德靜以頤神上循先皇后之懿範中盡聖天子

之孝心下慰元元之望如此則不祈福而福至矣臺臣不敢以聞大德元年侍御史萬僧與御史中丞崔彥不合詣架閣庫取前章封之入奏曰李御史為大言謗佛崔中丞私黨漢人帝大怒敕右丞相完澤平章政事不忽木等鞠問完澤曰其意正與吾同往吾亦嘗以此面諫太后不忽木亦抗言曰他御史懼不肯言惟李御史敢言吾等誠當愧之遂與完澤等以章上聞帝沈思良久曰御史言是也乃罷萬僧復元禮職未幾改國子司業卒追封隴西郡侯

蓋苗

蓋苗字耘夫大名元城人延祐五年進士授濟甯路單州判官累遷江南行臺監察御史建言嚴武備以備不虞簡兵卒以壯國勢全功臣以隆大體惜官爵以清銓選攷實

元史卷四十 列傳 五

行以抑奔競明賞罰以杜姦欺計利害以孚民情去民賊以崇禮節皆切時務天祿初文宗詔以建康潛邸為佛寺務窮壯麗毀民居七十餘家仍以御史大夫督其役苗上封事曰昔漢高帝興於豐沛為復兩縣光武中興南陽免稅三年既不務此而奪農時廢民居以隆重佛氏何以副斯民之望抑豈稱慈悲方便之教臺臣職專糾察表正百司今乃委以修繕之役豈使臣之禮哉書奏御史大夫果免督役入為監察御史文宗幸護國仁王寺泛舟玉泉苗進曰今頻年不登邊隅不靖政當恐懼修省何暇逸游帝嘉納之即日還宮臺臣擬苗僉准東廉訪司事以聞帝曰仍留蓋御史朕欲聞其諫言也以憂去至元四年起為左司都事在左司僅十八日凡決數百事復以憂去至正二

年起為戶部郎中俄擢御史臺都事御史大夫欲以故人居言路苗曰非其才也大夫不悅而起其晚邀至私第以謝人兩賢之出為山東廉訪副使益都淄萊地舊稱產金朝廷建一府六所綜其事民歲買金以輸官計六十年來猾吏有欲魚肉其民者輒謂所居地有金礦掘地及泉莫敢誰何苗建言罷之四年遷刑部尚書初盜殺河南省憲官延坐五百餘家已有詔除首罪外餘從原宥而宰臣追復欲盡誅戮苗堅持不可卒免之出為山東廉訪使民饑為盜所在羣聚乃上救荒弭盜十二事劾宣慰使馱不為法者六年入為侍御史尋拜中書參政同知經筵事大臣以兩京馳道狹隘奏毀民田廬廣之苗執曰馳道初自至元初何今日獨隘力辯乃罷又欲宿衛士悉出為郡長官

元史卷四十 列傳 六

俾以養貧苗曰郡長所以牧民豈養貧之地哉果有不能自存賜之錢帛可也議遂寢又欲以鈔萬貫與角觚者苗曰民饑不蒙振恤力戲何功獲此重賞於是時相顧謂僚佐曰所以引蓋君至樞機者欲其相助也迺每事相抗何邪今後有公務毋白參政苗聞即引告適有旨拜江南行臺御史中丞然宰臣怒苗終不解比至改除甘肅行省右丞詔趣赴任苗昇疾就道至鎮即上言甘肅每歲中糧姦敝百端請以糧鈔兼給庶軍民咸利朝廷從之遷陝西行御史臺中丞到官數日即上疏乞骸骨明年卒封魏國公諡文獻苗恂恂謙謹及至遇事張目敢言雖經挫折無少回撓有古遺直之風

王約 王結 何瑋

王約字彥博真定人少從中丞魏初游博覽經史工文辭務達國體時好不以動其心至元十三年翰林學士王磐薦爲從事二十四年拜監察御史首請建儲及修史事時丞相桑葛銜參政郭佑爲中丞日奏誅右丞盧世榮等故誣以他罪約上章直佑冤南臺侍御史程文海入言事多斥桑葛罪桑葛怒又以約與之表裏六奏殺之上不從約以隴西地遠請立行臺陝西詔從之遷中書右司員外郎成宗卽位言二十二事曰實京師放差稅開獵禁調逋負振窮獨停冗役禁鷹房振風憲除宿蠹慰遠方卻貢獻詢利病利農民勵學校立義倉聚稅戶重名爵明賞罰擇守令汰官屬定律令革兩司又請中書去繁文一取信於行省一責成於六部改禮部郎中請行贈諡之典以旌忠勳

元史卷四十

列傳

七

付時政於史館以備纂錄立供需府以專供億皆允行拜翰林直學士知制誥同修國史奉詔振京畿東道饑民發米五十萬石所活五十餘萬人因條疏京東利病十事請發米續振之民獲以甦高麗王昨年老傳國於世子源有不妥其政者飛讒離間及諫朝京師潛使人賂用事者留源不遣擁昨復位委用小人厚斂淫刑國人羣怨於朝中書令執其首惡繫刑部其黨復不悛奏屬約驗問約至宣詔諭之曰天地間至親者父子至重者君臣彼小人知自利寧肯爲汝家國地邪昨感泣謝曰臣年耄聽信儉邪是以致此願奉旨自雪且請子諫還國其邪黨悉聽使者治翼日約逮捕覆按其罪流二十二人杖三人黜有官者二人命故臣洪子藩爲相俾更敝政罷非道水磨十三免耽

羅貢非土產物東民大喜還報稱旨除太常少卿尋詔約同宗正御史讞獄京師約辭職在清廟帝不允乃閱諸獄決二百六十六人當死者七十二人釋無罪者八十六人拜刑部尙書大德十一年成宗至自懷州肅清宮禁以平章賽典赤巴顏安西王阿難荅與左丞相阿忽台潛謀爲變命刑曹按責其狀約曰在法謀逆不必榜掠竟當伏誅由是結知仁宗宗王兄弟二人守邊兄陰有異志弟諫不聽卽上馬馳去兄遣奴挾弓矢追之弟發矢斃其奴兄訴囚其弟獄當死約慮囚曰兄之奴卽弟之奴況殺之有故立釋之遷禮部尙書請定丁憂之制申旌表之恩免都城煤炭之徵皆從之仁宗在東宮雅知約名思用以自輔擢太子詹事丞從幸五臺山約諫不可久留卽日還上京初

元史卷四十

列傳

八

安西王封於秦旣以謀逆誅國除版賦入詹事院至是大臣奏請封其子復國仁宗以問約約曰安西以何罪誅今復之何以懲將來議遂寢明年進太子副詹事抗章諫湛飲仁宗嘉納焉承制立左衛率府統侍衛軍萬人同列欲署軍官約持不可仁宗復詔問約對曰皇太子事不敢不爲天子事不敢爲仁宗悟竟罷議同列復傳命增立右衛率府取河南蒙古軍萬人統之約屏人語曰左衛率府舊制有之今置右府何爲諸公宜深思之不可累儲宮也又命取安西兵器給宿衛士約謂詹事完澤曰詹事移文數千里取兵器人必驚疑主上聞之奈何完澤慙謝曰實慮不及此又命福建輪繡工童男女六人約言曰福建去京師六七千里使人父子兄弟相離有司承風動擾豈美事

邪仁宗稱善再三家令辭居敬上言陝西分地五事因被命往理之約不為署行語之曰太子潛龍也當勿用之時為飛龍之事可乎遂止薦翰林學士李謙為太子少傅請立故丞相淮安忠武王伯顏祠於杭皆從之仁宗常字之而不名諭羣臣曰事未經王彥博議者勿啟又謂中丞朵台曰在詹事而不求賜予者惟彥博與汝二人耳一日仁宗西園觀角觝戲有旨取緡帛賜之約入遙見問曰汝何為來仁宗遽止之又欲觀俳戲事已集而約至即命罷去其見敬如此仁宗即位欲用陰陽家言即位光天殿即東宮也約諍之遂即位大明殿拜河南行省右丞先是至大間尚書省受冒獻河汴官民地為無主奏立山糧府歲輸數萬石是歲詔罷之命河南行省復其舊業行省方竝緣

元史卷四十

列傳

九

為奸田猶未給約至立期檄郡縣釐正如詔會詔更銅錢銀鈔法且令天下稅盡收至大鈔約度河南歲用鈔七萬錠必致上供不給乃下諸州凡至大至元鈔相半以方詔命為言約曰吾豈不知第歲終諸事不集責亦匪輕遣使白中書省遂徧行天下南陽亭尤魯拙以書謁約大奇之即署為郡學正既又薦之中書擢翰林國史院編修官皇慶改元召拜集賢大學士奏河南行省丞相卜憐吉台勳闕舊臣不宜久外召至封河南王又建議行封贈禁服色興科舉皆著為令疏薦國子博士姚登孫應奉翰林文字揭傒斯成都儒士楊靜請起復中山知府致仕輔惟良前尚書參議李源左司員外郎曹元用皆除擢有差英宗即位鐵木迭爾復相約辭職致仕至治三年丞相拜住一

新政務傳詔起約復拜集賢大學士商議中書省事以其祿居家每日一至中書省議事又嘗奉詔與中書省官條定國朝律令名曰大元通制頒行天下朝廷議罷征東省立三韓省約議曰高麗去京師四千里地瘠民貧夷俗雜尚非中原比萬一梗化疲力治之非幸事也不如守祖宗舊制丞相稱善罷不行高麗人聞之圖其像歸祠而事之所著有史論三十卷高麗志四卷潛丘橐三十卷行於世王結字儀伯先世居易州定興太父徙家中山結嘗從太史董朴受經年二十餘游京師上執政書陳時政八事曰立經筵以養君德行仁政以結民心育英才以備貢舉擇守令以正銓衡敬賢士以厲名節革冗官以正職制辨章程以定民志務農桑以厚民生其言剴切純正皆治國之

元史卷四十

列傳

十

大經宰相不能盡用時仁宗在潛邸或薦結充宿衛乃集歷代君臣行事可鑒戒者日陳於前近侍以俳優進結言昔唐莊宗好此卒致禍敗殿下方育德春宮視聽宜謹太子優納之仁宗即位遷集賢直學士出為順德路總管教民務農興學孝親弟長戢奸禁暴悉登於書俾朝夕閱習之屬邑鉅鹿沙河有唐魏徵宋璟墓乃祠二公於學以勵多士改東昌路境有黃河故道而會通堤遏其下流夏月潦水壞民麥禾結疏為斗門以泄之民獲耕治之利至治二年參議中書省事時拜住為丞相結言為相之道當正己以正君正君以正天下除惡不可猶豫猶豫恐生它變服用不可奢僭奢僭則害及於身丞相是其言未幾除吏部尚書薦名士宋本韓鏞等十餘人泰定元年會有月食

地震烈風之異結言今朝廷君子小人混淆刑政不明官賞太濫故陰陽錯謬咎徵薦臻宜修政事以弭天變是歲詔結知經筵扈從上都結援引古訓證時政之失冀帝有所感悟中宮聞之亦召結等進講結以故事辭天麻間明宗行在朔漠奉迎未至文宗近侍求官賞者結皆曰俟天子至議之又或籍人妻孥貨產者結復論之近侍益怒諧詆日甚遂罷政元統元年召拜翰林學士與張起巖歐陽玄修泰定天麻兩朝實錄拜中書左丞先時有罪者北人則徙廣海南人則徙遼東去家萬里往往道死結請更其法移鄉者止千里外改過聽還其鄉因著爲令職官坐罪者多從重科結曰古者刑不上大夫今貪墨雖多然士之廉恥不可不養聞者謂其得體至元元年以疾乞退卒追

元史卷四十

列傳

十一

封太原郡公諡文忠有詩文十五卷行世

何瑋瑋一作瑋伯祥之子也襲父職知易州以千戶從圍襄樊

又從丞相伯顏伐宋渡江屢有功至元三十一年拜中書

參政時宰執凡十一人瑋曰古者一相專任賢也今宰執

員冗政出多門轉相疑忌請損之不從遂乞代大德七年

授御史中丞陳當世要務十條以紓民力制國用備荒政

重吏祿開賢路爲急成宗嘉納之又言唐虞三代國都閭

巷莫不有學今孔廟既成宜建國學於其側從之地震上

疏言咎在大臣明日政府四人皆罷而賽典赤巴顏八都

馬辛等還自貶所復相位瑋言姦黨不可復用宜選正人

以居廟堂不報監察御史郭章劾郎中哈刺合孫受贓而

權要反以枉劾誣章瑋率臺臣奏辨章遂得釋復陳十三

事首言信賞罰定律令和大臣杜僥倖成宗崩丞相阿忽台奉皇后旨集廷臣議祔廟及攝政事且以唐則天后事爲言瑋難之阿忽台變色曰中丞獨不畏死邪眾皆危懼瑋從容曰死患不義耳苟死於義夫復何畏勸丞相苦刺罕亟迎懷王於懷州武宗至自上都臨朝問曰孰爲何中丞瑋出拜帝曰知卿忠直爲國當匡朕之不逮瑋進十四策以擇相爲先至大元年擢河南行省平章佩金虎符提調屯田事增河南屯米十七萬石又經理荆湖屯田廢地歲可出粟百餘萬又請置洪澤芍陂屯田萬戶府所至以興學校薦賢能申冤抑恤孤寡爲己任三年改河南行尙書省平章政事卒追封梁國公諡文正程文海碑其神道

元史卷四十

列傳

十二

張養浩

張養浩字希孟濟南人幼有行義嘗出遇有遺鈔幣於途者其人已去追而還之游京師獻書於平章不忽木大奇

之薦入御史臺一日病不忽木親至其家問疾四顧壁立

歎曰此真臺掾也及爲丞相掾選授堂邑縣尹人言官舍

不利居無免者竟居之首毀淫祠三十餘所仁宗在東宮

召爲司經未至拜監察御史初議立尙書省養浩言其不

便既立又言變法亂政將禍天下臺臣抑不以聞乃揚言

曰昔桑葛用事臺臣不言後幾不免今御史既言之而不

以聞臺將安用武宗將親祀南郊不豫遣大臣代祀風忽

大起人多凍死養浩於祀所揚言曰代祀非人故天示之

變大違時相意時省臣奏用臺臣養浩歎曰尉專捕盜縱

不稱職使盜自選可乎遂疏時政萬餘言賞賜太多刑禁太疏名爵太輕臺綱太弱土木太盛號令太浮倖門太多風俗太靡異端太橫取相之術太寬言皆切直當國者不能容遂除翰林待制復搆以罪罷之戒省臺勿復用養浩恐及禍乃變姓名遁去尚書省罷始召為右司都事遷翰林直學士改祕書少監延祐初設進士科遂以禮部侍郎知貢舉英宗即位命參議中書省事會元夕帝欲於內庭張燈為鼇山即草疏投左丞相拜住拜住袖其疏入諫略曰世祖臨御三十餘年每值元夕閭閻燈火亦禁況闕庭之嚴宮掖之邃尤當戒慎今燈山之構臣以為所翫者小所繫者大所樂者淺所患者深伏願以崇儉慮遠為法以喜奢樂近為戒帝初大怒既覽而喜曰非張希孟不敢言

元史卷四十 列傳 三

即罷之仍賜尚服金織幣一帛一以旌其直後以父老棄官歸養召為吏部尚書不拜丁父憂未終喪復以吏部尚書召力辭不起泰定元年屢召皆不赴天祿二年關中大旱饑民相食特拜陝西行臺中丞既聞命即散其家之所存與鄉里貧乏者登車就道遇饑則振之死者葬之道經華山禱雨嶽祠泣拜不能起天忽陰翳一雨二日及到官後禱於社壇大雨如注水三尺乃止禾黍自生秦人大喜時斗米直十三緡民持鈔出糶稍昏即不用詣庫換易則豪猾黨蔽易十與五累日不可得民大困乃檢庫中未毀昏鈔文可驗者得千八十五萬五千餘緡悉以印記其背又刻十貫五貫為券給散貧乏命米商視印記出糶詣庫驗數以易之於是吏傲不敢行又率富民出粟因上章請

行納粟補官之令聞民間有般子以奉母者為之大慟出私錢以濟之到官四月未嘗家居止宿公署夜則禱天晝則出振終日無少怠遂勞瘁得疾不起關中人哀之如失父母至順二年追封濱國公諡文忠有文集若干卷

張珪

張珪字公端弘範之子也少能射虎命中又善擊窩書剛勁有氣至元十六年弘範平廣海宋禮部侍郎鄧光薦將赴水死弘範救而禮之命珪受學光薦嘗遺一編書曰熟讀此後必賴其用師還道出江淮珪年十六攝管軍萬戶十七年佩其父虎符治所統軍鎮建康未幾襲父爵世祖召見親撫之奏曰臣年幼軍事重有聶禎者從臣父祖久歷行陣幸以副臣帝歎曰求老成自副常兒不知出此厚

元史卷四十 列傳 古

賜遺之徧及其從者十九年檄討太平宣徽羣盜申紀律斬驕卒屢戰皆克又出奇設伏連殲賊酋宣州平而賊之寇徽者又敗兩萬戶軍珪縱所俘歸巢使諭威德降者大半進剿其負嶠諸盜悉平二十九年入朝時廷議謂天下事定行樞密院可罷會江浙行省參政張瑄領海道亦以為言帝召對珪曰縱使行院可罷亦非瑄所宜言遂得不罷命為樞密副使成宗大德三年遣使巡行天下珪使川陝問民疾苦賑卹孤貧罷冗官黜貪吏還擢江南行御史臺侍御史遷浙西廉訪使未數月劾罷郡長吏以下三十餘人府史胥徒數百徵贓巨萬計又得監司奸利事將發之行省有內不自安者欲中以危法賂遺近臣妄誣珪厭勝且沮鹽法帝遣官雜治之得行省大小吏及鹽官欺罔

狀皆伏罪召珪僉樞密院事賜只孫冠服侍宴既又知其貪命買宅以賜辭不受拜江南行臺御史中丞因上疏極言天人之際災異之故藉修德行廣言路進君子退小人信賞必罰滅冗官節浮費以法祖宗成憲累數百言劾大臣之不法及近侍之熒惑者不報遂謝病歸久之拜陝西行臺中丞不赴武宗即位召拜中丞至大四年帝崩仁宗將即位廷臣用皇太后旨行即位禮於隆福宮法駕已陳矣珪言天位太祖世祖之位隆福太后之宮也舍大明殿不御天子果即何位乎帝悟即移仗大明殿既即位加賜只孫衣二十襲又親解衣悅賜之皇慶元年拜樞密副使徽政院使什列門請以洪城軍隸興聖宮而已領之以上旨移文樞密院眾恐懼承命珪曰徽政有兩指揮軍足備

元史卷四十

列傳

五

工役又頷此軍何爲固不署事得寢於是東朝近侍始怨之矣延祐二年拜中書平章請減煩冗還有司以清政務得專修輔相之職命著爲令教坊使曹交住拜禮部尚書珪曰伶人爲宗伯何以示後世力諫止之皇太后以中書右丞相鐵木迭爾爲太師萬戶別薛參知行省政事珪曰太師論道經邦鐵木迭爾非其人別薛無功不得爲外執政上淡許之而東朝之怨益甚會車駕度居庸什列門遂傳皇太后旨召珪切責杖之珪創甚輿歸京師明日遂出國門子景元掌符璽至是以父病篤告遽歸帝驚曰曩別時卿父無病景元頓首涕泣不敢言帝不懌數日遣使賜上尊酒遂拜大司徒謝病家居繼丁母憂廬墓三年至治二年英宗召見易水上將昇以政珪辭歸遣近臣設醴丞

相拜住問曰宰相之體何先珪曰莫先於格君心莫急於廣言路是年冬起爲集賢大學士先是鐵木迭爾既復爲丞相以私怨殺平章蕭拜住御史中丞楊多爾只上都雷守賀伯顏朝臣不能自保會地震風烈敕廷臣集議弭災之道珪抗言曰弭災當究其所以致災者漢殺孝婦三年不雨蕭楊賀冤死非致沴之端乎死者固不可復生而情義猶可昭白毋使朝廷終失之也拜中書平章政事三年秋御史大夫鐵失既行弒逆夜入都門坐中書堂矯制奪執符印珪以密疏託親王徹徹圖郵寄漠北極陳誅逆定亂之宜既而泰定帝至上都珪迎駕帝自揆佩囊出片紙付翰林書之史即珪密奏也賊黨既皆伏誅惟鐵木迭爾之子治書侍御史鎖南南坡之夕穀弓矢露刃以佐鐵失

元史卷四十

列傳

五

行弒親斫丞相拜住臂至是止議遠流珪曰強盜尙不分首從况親從弒逆而可與戴天乎遂并伏誅泰定元年六月車駕在上都先是帝以災異詔百官集議珪乃與臺院官極論當世得失凡萬餘言詣上都奏之大旨謂國之安危在乎論相論相之要莫大於別忠姦嚴賞罰收威福伸言路爲治之要莫先於安民安民之道莫急於除濫費汰冗員輕賦斂重邊釁今弒逆未討姦惡未除忠憤未雪冤枉未理政令不信賞罰不公賦役不均財用不節民怨神怒皆足以感傷和氣臣聞日食修德月食修刑應天以實不以文動民以行不以言刑政失平故天象應之惟陛下矜察允臣等議乞悉行之帝終不能盡從已而珪病增劇非扶掖不能行有詔常見免拜跪賜小車得乘至殿門下

帝始開經筵令左丞相與珪領之珪進翰林學士吳澄等以備顧問自是辭位甚力猶封蔡國公知經筵事別刻蔡國公印以賜泰定二年夏得旨暫歸三年春上遣使召之期於必見珪至拜翰林學士承旨知制誥兼修國史經筵如故命養病西山繼得旨還家所受國公月俸千緡悉籍送還官未幾起珪商議中書省事復以疾辭四年十二月卒珪正色立朝屢挫而氣益昌嶽然為名臣嘗自號曰澹菴子六人景武景魯景哲景元景德景誠多貴顯虞集誌銘其墓見道園學古錄

楊多爾只 蕭拜住 趙世延 張思明 張起巖

楊多爾只河西寧夏人少孤即知自立語言儀度如成人事仁宗於藩邸甚見倚重大德丁未從遷懷孟仁宗聞朝

元史卷四十 列傳 七

廷有變將北還命多爾只與李孟先之京師與右丞相哈刺合孫定議迎武宗於北藩仁宗還京師多爾只譏察禁衛密致警備仁宗親解所服帶以賜既佐定內難仁宗居東宮論功以為大中大夫家令丞日夕侍側雖休沐不至家會兒卒涕泣不勝哀仁宗憐之存問優厚仁宗始總大政執奸黨將盡誅之多爾只言新政不宜尚殺帝感其言特誅其尤者他日帝與中書平章李孟論元從人材以多爾只為第一拜禮部尚書初尚書省改作至大銀鈔視中統一當其二十五又鑄銅為至大錢至是議罷之多爾只曰法有便否不當視立法之人為廢置銀鈔固當廢銅錢與楮幣相權而行昔之道也國無棄寶民無失利錢未可遽廢也有言近臣受賄者帝怒其非所當言將誅之時張

珪為御史中丞叩頭諫不聽多爾只言於帝曰誅告者失刑違諫者失諛帝善而從之拜多爾只為侍御史每宴問時羣臣侍坐者或言笑踰度帝見其正色為之改容有犯法者雖貴幸無所容貸怨者因共譖之帝知之深譖不得行拜御史中丞劾中書平章張閭奪民河渡地罷之劫江東西奉使翰來不稱職權臣匿其奸冀不問杖之御史納璘言事忤旨帝怒叵測多爾只救之一日至八九奏曰臣非愛納璘誠不願陛下有殺御史名始左遷納璘為昌平令昌平畿內劇縣欲以是困璘多爾只復為從容言之不允後數日入侍帝方讀貞觀政要顧謂曰魏徵古之遺直也朕安得用之對曰直由太宗太宗不聽徵雖直將焉用之帝笑曰卿意在納璘邪遂召還有上書論朝政闕失面

元史卷四十 列傳 七

觸宰相宰相怒將取旨殺之多爾只曰前日詔書云言雖不當無罪今若此何以示信天下帝悟釋之特加昭文館大學士時位一品者多乘間邀王爵贈先世或謂多爾只眷倚方重苟言之當可得也多爾只曰家世寒微遭遇至此已懼弗稱尚敢求多乎且我為之何以風勵僥倖遷集賢大學士為權臣鐵木迭爾所害而死年四十二初武宗崩皇太后在興聖宮鐵木迭爾為丞相踰月仁宗即位居二歲得罪斥罷更自結興聖宮近侍復入相恃勢貪虐凶穢愈甚中外切齒羣臣不知所為惟御史中丞蕭拜住拜中書平章稍牽制之多爾只拜御史中丞慨然以糾正其罪為己任上都富民張弼子坐奴殺人繫獄鐵木迭爾使大奴脅留守賀伯顏出之及強以他奸利事不能得一日

坐都堂盛怒以官事召畱守將罪之畱守執法正言鐵木迭爾語訕得解去多爾只廉得其所受彌賊鉅萬萬大奴猶數千使御史徐元素按得實入奏而御史亦輦真又發其私罪二十餘事帝震怒有詔逮問鐵木迭爾逃匿帝爲不御酒數日以待決獄盡誅其大奴同惡數人鐵木迭爾終不能得多爾只持之急徵政近臣以太后旨詔多爾只至宮門責以違旨對曰待罪御史奉行祖宗法必得罪人非敢違太后旨也帝仁孝恐誠出太后意不忍重咈之但罷其相位而遷多爾只爲集賢學士猶數以臺事問之對曰非臣職事臣不敢與聞所念者鐵木迭爾雖去君側反得爲東宮師傅在太子左右恐售其奸則禍有不可勝言者仁宗崩英宗猶在東宮鐵木迭爾復相乃宣太后旨召

元史卷四十

列傳

九

蕭拜住多爾只至徵政院與徵政使什列門等雜問之責以前違太后旨之罪多爾只曰中丞之職憾不卽斬汝以謝天下果違太后旨汝豈有今日邪鐵木迭爾又引同時爲御史者二人證成其獄多爾只顧二人唾之曰汝等嘗得備風憲乃爲是犬彘事邪坐者皆慚俯首卽起入奏未幾矯太后旨執多爾只與蕭拜住殺諸國門之外是日風沙晦冥都人恟懼道路相視以目英宗卽位詔書遂加以誣罔大臣之罪鐵木迭爾權勢旣成毫髮怨無不報太后驚悔帝亦覺其所譖皆先帝舊臣未及論治而鐵木迭爾以病死會有天災求直言會議廷中集賢大學士張珪中書參議回回皆稱蕭楊等死甚冤是致不雨聞者失色言終不得達及珪拜平章卽告丞相拜住曰賞罰不當枉抑

不伸不可爲治蕭楊之冤天下莫不亟昭雪無以服中外拜住遂請於帝詔雪其枉特贈思順佐理功臣夏國公諡襄愍多爾只死時權臣欲奪其妻劉氏與人劉氏剪髮毀容以自誓乃免子不花幼有才氣好讀書善書初仁宗聞而召之應對稱旨欲以爲翰林直學士力辭後遭家難蓋自勵節爲學僉河東廉訪司事嘗出按部民有殺子以誣怨者獄成不花讞之曰以十歲兒受十一創且彼以斧斲所怨必盡其力何創痕之淺反不入膚邪遂得其情平反出之河東民饑先捐己貲以賑請未得命卽發公廩繼之民賴不死天祿初文宗入繼大統除通政院判將行值陝西諸軍拒詔郡邑守吏率民逃之不花獨率眾出禦陳潰見殺二僕被執亦罵賊死之至順二年贈禮部尙書

元史卷四十

列傳

十

以襄其忠蕭拜住契丹石抹氏也曾祖丑閭仕金爲古北口屯戍千戶歲庚午降於太祖擢檀順昌平萬戶祖青山父哈刺帖木爾皆襲萬戶典宿衛蕭拜住嘗從成宗北征出知中山府以憂去官多譖之者屬仁宗過中山行田野間見老嫗問之曰府中官孰賢嫗對曰有蕭知府餘不知也復過神祠有數老人焚香羅拜遣問之合辭對曰蕭知府奔喪還欲速其來是以禱也帝意遂釋武宗卽位屢遷戶部尙書遂拜御史中丞延祐三年進中書平章英宗卽位之十有九日右丞相鐵木迭爾怨拜住在省中牽制其所爲又發其姦賊專制等事遂矯皇太后旨并前御史中丞楊多爾只皆殺之竝籍其家語詳楊多爾只及鐵木迭爾傳奉定

閒追封薊國公諡忠愍拜住之死有吳仲者潛守其屍三日不去竟收葬之

趙世延字子敬祖按竺邇從太祖征伐有功為蒙古漢軍征行大元帥鎮蜀因家成都自有傳父國寶一名黑梓以門功襲父職兼文州吐蕃萬戶達魯花赤世延少喜讀書弱冠世祖召見俾入院臺肄習官政至元二十六年擢監察御史與同列五人劾丞相桑葛不法中丞趙國輔桑葛黨也抑不以聞更以告桑葛於是五人悉為所擠而世延幸免奉敕按平陽郡監耶先忽都賊鉅萬鞫左司郎中董仲威殺人獄皆明允二十九年出僉江南湖北道廉訪司事敦儒學立義倉徹淫祠修澧陽壞堤嚴常澧掠賣良民之禁部內晏然大德十年除安西路總管安西故京兆省

元史卷四十

列傳

五

臺所治號稱會府前政壅滯者三千牘視事不三月剖決殆盡陝民饑省臺議請於朝振之世延曰揀荒如揀火願先發廩以振朝廷設不允世延當傾家財以償省臺從之所活者眾至大元年改四川廉訪使革蒙古軍之科差繁重戍兵往來害人者及軍官抑良為奴者又修都江堰以便民四年遷陝西行臺侍御史先是八百媳婦為邊患右丞劉深往討之兵敗而還坐罪棄市及是右丞阿忽台當繼行世延言蠻夷事在羈縻而重煩天討致軍旅覆沒屢威損重藉使盡得其地何補於國與其窮兵黷武何如選重臣知治體者付以邊寄兵可勿用事聞樞密院以為用兵國家大事不宜以一人之言為輿輟世延再疏爭之事卒罷皇慶二年召拜侍御史延祐元年拜中書參政逾年

遷御史中丞敕省臣自平章以下率送之官其禮前所無有由是為權臣所忌乃用皇太后旨出世延為雲南行省右丞陛辭帝特命仍還御史臺為中丞三年劾奏權臣太師右丞相鐵木迭爾罪惡十有三詔奪其官職尋遷翰林學士承旨兼御史中丞世延固辭改昭文館學士守大都雷守乞補外拜四川行省平章即重慶路立屯田墾江津巴縣間田七百八十三頃歲得粟萬有二千石明年仁宗崩鐵木迭爾復居相位銳意報復屬其黨何志道誘世延從弟誣告世延罪逮世延置對至夔路遇赦世延以疾抵荆門雷就醫鐵木迭爾遣使督追至京師俾其黨鍛煉成獄會有旨事經赦原勿復問鐵木迭爾更以它事白帝繫之刑曹逼令自裁世延不為動居囚再歲其原告從弟白

元史卷四十

列傳

五

以所訴誣欺亡去左丞相拜住屢言世延亡辜得旨出獄先是帝獵北涼亭願謂侍臣曰趙世延先帝所尊禮而鐵木迭爾妄入其罪數請誅之此殆報夙怨耳朕豈能從之侍臣皆叩頭稱萬歲鐵木迭爾在上京聞世延出獄索省牘視之怒甚未幾鐵木迭爾死事乃釋世延出居金陵泰定四年遷中書右丞詔中書徧移天下昭雪其非辜仍加翰林學士承旨知經筵事同知樞密院泰定帝崩文宗即位拜中書平章政事固辭不允詔以世延年高多疾許乘小車入內至順元年詔與虞集等纂修皇朝經世大典世延屢奏臣衰老乞解中書政務專意纂修帝不許仍加翰林學士承旨封魯國公秋以疾致仕明日即行養疾於金陵之茅山詔徵還朝不能行二年改封涼國公元統二年

賜錢四萬緡至元二年卒年七十有七諡文忠世延以文章名嘗較定律令彙次風憲宏綱行於世

張思明字士瞻輝州人至元十九年由侍儀司舍人屢遷至兩浙鹽運使歲課充贏僚屬請上增數思明日贏縮不常萬一以增爲額是我希一己之榮遺將來之害延祐三年拜中書參政浮屠妙總統有寵敕中書官其弟五品思明執不可帝召見怒責之對曰選法天下公器徑路一開來者雜還故盜違旨獲戾不忍墮祖宗成憲帝心然其言而業已許之曰姑暫與之後勿爲例久之近臣疾其持法峭直日構讒間出爲工部尙書五年除西京宣慰使嶺北戍士多貧歲凶相挺爲變思明威惠並行邊境乃安因疏和林運糧不便事十一條會左丞相哈散辭職帝不允其

元史卷四十

列傳

三

請蓋堅帝詰之則願得張思明爲助即日拜思命中書參政遷左丞帝崩英宗宅憂右丞相鐵木迭爾用事日誅大臣不附己者中外洶洶思明語鐵木迭爾曰山陵甫畢新君未立丞相恣行殺戮國人皆謂陰有不臣之心萬一諸王駙馬疑而不至將柰之何鐵木迭爾亦悟曰非左丞言幾誤吾事帝造壽安山寺監察御史五人強諫鐵木迭爾激帝怒殺觀音保瑣交爾哈的彌什以成珪李謙亨屬吏思明白丞相曰言事御史職也祖宗已來未嘗殺諫臣成李旣屬吏當論法二人得從輕典鐵木迭爾益樹朋黨賊害忠良思明懼禍及累表辭不獲後竟誣以他事遂廢於家杜門六年文宗天祿元年起爲江浙行省左丞會陝西大饑中書撥江浙鹽運司歲課十萬錠振之吏白周歲所

入已輸京師當回咨中書思明日其以下年未輸者如數與之有罪吾當坐二年復以中書左丞召入覲慈仁殿敷陳累朝任賢使能治民足國之道因以衰老辭帝未允明日即移告去思明平生不治產不畜財收書三萬七千餘卷尤明於律與謝仲和曹鼎新同稱三絕卒年七十有八贈封清河郡公諡貞敏

張起巖字夢臣濟南人中延祐乙卯進士除同知登州事改集賢修撰屢遷監察御史中書參政楊廷玉以墨敗臺臣奉旨就廟堂逮之下吏丞相倒刺沙疾其摧辱同列悉誣臺臣罔上欲置之重辟起巖以新除留臺抗章論之章三上不報起巖廷爭愈急帝感悟事乃得釋猶皆坐罷免還鄉里屢遷禮部尙書轉參議中書省事文宗崩順帝未

元史卷四十

列傳

五

立燕南有妄男子上變言部使者謀不軌按問皆虛法司謂唐律告叛者不反坐起巖奮謂同列曰方今嗣君未立人情危疑不取誅此人以杜奸謀慮妨大計趣有司具獄都人肅然屢轉爲燕南廉訪使搏擊豪強貧民吐氣滹沱河水爲真定害起巖修其堤防淪其湮鬱水患遂息遷翰林學士承旨右丞相別怯不花爲臺臣所糾去位未幾再入相諷詞臣言臺章之非起巖執不可俄拜御史中丞論事剴直無所顧忌詔修遼金宋三史起巖熟於金源典故宋儒源委充總裁官多所正定史成乞骸骨卒諡文穆起巖面如紫瓊美髯方頤而眉目清揚可觀外和中剛不受人籠絡安南修貢其陪臣致其世子之辭必俟起巖起居性孝友少處窮躬致米百里之外以養父母舉親族弗

克葬者二十餘喪凡獲俸賜必與故人賓客其之卒之日
廩無餘粟起廢博學有文善篆隸有華峰漫秦華峰類彙
金陵集各若干卷藏於家

元史卷四十

列傳

三

元史卷四十終

元史卷四十一

天祿交兵

倒刺沙

倒刺沙者西域回回人事素定帝於晉邸為王府內史深
見親信仁宗朝以其子合散事丞相拜住得入宿衛常以
朝廷機事報王久之合散歸言御史大夫鐵失為舊相鐵
木迭爾之黨與拜住意相忤志在傾害王甚憂之至治三
年三月鐵失遣其黨宣徽使探忒來王帳為倒刺沙言主
上將不容於晉王汝益思之王知其傾險置不答八月二
日晉王獵于土刺河鐵失復遣其黨幹羅思來告王曰我
與阿散耶先鐵木爾失圖爾等謀已定事成推王為帝又
以告倒刺沙且言汝與馬速忽知之勿令宗王旭邁傑得

元史卷四十一

列傳

一

聞也於是王大驚命囚幹羅思遣別烈彌什等赴上都以
逆謀首未至英宗已遇害諸王按梯不花淇陽王耶先鐵
木爾奉皇帝璽綬北迎帝於鎮所九月癸巳即皇帝位於
龍居河以倒刺沙平章政事命諸王分路捕諸逆賊誅耶
先鐵木爾等於行在所誅鐵失等於大都並戮其子孫籍
入家產是冬駕至大都受朝賀進倒刺沙為左丞相詔雪
鐵木迭爾誣陷楊多爾只諸忠臣之冤詔誅鐵木迭爾子
瑣南並流逆黨諸王月魯不花於雲南按梯不花於海南
曲呂不花於奴兒干孛羅及兀魯思不花於海島封告變
之諸王邁奴為秦寧王以厲忠義明年改元泰定以誅逆
臣耶先鐵木爾等詔天下徙周王和世球鎮和林召親王
圖帖木爾於瓊州來覲京師封懷王徙治江陵命諸王遠

徙者盡還其部凡近年奸臣用事以來賞罰不公政令不信賦役不均財用不節忠憤未雪枉抑未申者諸臣集議以聞中外大悅皆倒刺沙密贊之力相泰定帝六載行事寬大君無甚失德朝無甚敝政遇災異則言天變游至咎在宰相請免臣等而寬諸司之罪致和元年秋七月庚午帝崩于上都倒刺沙受顧命立皇太子阿速吉巴年甫九歲時諸王大臣未會集故未頒即位詔舊史謂倒刺沙專權諭月不立君朝廷疑懼錢大昕曰泰定以七月庚午崩至八月甲午燕帖木爾舉事不及三旬元諸帝即位皆必諸王大臣畢會始集議之距前君之崩或兩月或三月蓋其家法如此況泰定儲位早建本無異議燕帖木爾逆謀早萌豈因諭月不頒詔之故乎此皆文宗所修實錄時僉樞密事燕帖木爾誣謗之詞舊史不知而本之也時僉樞密事燕帖木爾留守大都謂沖主立則權盡歸倒刺沙謀立武宗之子以邀功賞遂於八月甲午舉兵脅諸王大臣遣使分道迎懷

元史卷四十一 列傳

二

王於江陵迎周王於漠北分兵守居庸關古北口大和嶺潼關其黨河南行省平章柏顏舉兵應之事聞倒刺沙奉皇后皇太子命發兵分道攻大都討之遣梁王王禪右丞相塔失鐵木爾御史大夫紐澤太尉不花等以兵次於榆林九月朔燕帖木爾與其子弟率師抗拒梁王等兵屢不利燕帖木爾復陰使人勾引上都諸王滿圖阿馬刺台大臣闊闢出邁闕等為內應事覺倒刺沙奉皇太子命誅之遣使徵遼東兵并頒即位詔於四方改元天順所至響應陝西行省殺燕帖木爾所遣使者刺馬黑巴以應上都舉兵入河中府諸王失刺平章政事乃馬台詹事欽察等與南兵戰敗復遣諸王耶先帖木爾平章圖滿迭爾以遼東兵攻入遷民鎮上都兵攻居庸關之碑樓口敗指揮使耶

速台之兵又遣諸王忽刺台等以兵攻崞州梁王王禪兵襲破居庸關大都將士皆潰梁王游兵至大口燕帖木爾軍次榆河再戰於紅橋之北梁王兵不利南軍遂據紅橋又大戰於白浮之野而遼東軍亦戰脫脫木爾於薊州之檀子山會大霧梁王退保山隘旋集散兵戰白浮之西敗走昌平倒刺沙復遣知樞密院事竹溫台以兵入古北口潰其守軍又遣靖安王闊不花等將陝西兵襲潼關南水門入之萬戶李羅棄關走遂分據陝州進攻洛陽遼東軍復戰脫脫木爾於薊州南遂抵大都燕帖木爾驅兵民乘城守禦並檄冀寧晉寧兩路嚴備所轄代州之雁門關崞州之陽武關嵐州之大澗口皮庫口保德州之寨底天橋白羊三關石州之塢堡口汾州之向陽關隰州之烏門關

元史卷四十一 列傳

三

吉州之馬頭關秦王嶺靈石縣之陰地關皆穿塹壘石為固上都諸王忽刺台等兵入紫荆關守關將士皆潰陝西行臺御史大夫耶先帖木爾引兵從大慶關渡河般河中府守吏萬戶徹里帖木爾軍望風潰遁河東聞陝西兵至官吏皆棄城走耶先帖木爾悉以上都官吏代之是月懷王已至燕稱尊號改元天祿頒詔四方多拒不受命冬十月遼東兵戰燕帖木爾於通州之潞河而忽刺台兵復自紫荆關進偪涿州至良鄉游騎偪南城遼東兵又戰唐其勢於檀子山陽翟王太平死之忽刺台兵戰脫脫木爾及耶先涅於良鄉轉戰至盧溝橋忽刺台被創扼橋頓宿聞燕帖木爾大軍將至遂退湘寧王八刺失里泰定帝大弟迭里哥不花之子也時北鎮察罕海子聞難與趙王馬札

罕諸王忽刺台各起所部兵勤王而南湘寧王趙冀寧燕帖木爾遣萬戶和尚將兵出故關赴援會湘寧王兵大至和尚軍退保故關湘寧王遂入冀寧陝西行省官再焚大都詔書下其使於獄河南行省調兵守虎牢以禦陝西軍而四川行省平章囊加台復起兵應上都湖廣行省調兵守歸峽以禦四川軍雲南行省耶爾吉尼亦拒大都之召遼東兵復入古北口戰燕帖木爾於檀州南燕帖木爾議以上都兵盡南下上都守備必虛覆其根本則四方自瓦解乃遣齊王月魯帖木爾等以兵潛出居庸徑襲上都梁王王禪遁遼王脫脫戰死齊王遂入上都執皇太子及倒刺沙盡收上都諸王符印奉傳國璽歸獻於燕倒刺沙死

舊史稱倒刺沙肉袒奉璽出降至燕京下獄死此猶明之承樂時修實錄誣建文諸忠臣以叩頭乞哀之類也

元史卷四十一 列傳 四

時各路尙未知上都之敗是月西臺御史耶先帖木爾軍復取晉寧路易上都官吏陝西鐵木哥軍亦奪武關湘寧王趙王及諸王忽刺台合兵自冀寧還次馬邑爲大都將耶速答所破湘寧王趙王忽刺台俱被執十一月耶先帖木爾軍至潞州聞上都守遂以軍降於耶先涅河東州縣盡殺其所署官吏而陝西靖安王等兵時方進據虎牢偃汴梁分遣鐵木哥兵入襄陽至是奉荆王耶速不干檄亦罷兵西去大都始遣使迎周王於漠北惟四川平章囊加台不奉命自稱鎮西王以其省左丞脫脫爲平章前雲南廉訪使楊靜爲左丞殺其省平章寬徹等稱兵燒絕棧道欲以恢復大都保護皇太子明年天祿二年正月文宗遣近侍星吉班以詔往四川招諭囊加台囊加台遣兵

攻播州播州宣慰使楊延里不花開關納之據烏江北岸諸王月魯帖木爾統蒙古諸軍五萬人至烏江囊加台遣兵據雞武關又焚棧道遂奪三义柴關等驛兵至金州與陝西行省軍相持文宗命武靖王朔思班會湖廣河南兵攻之囊加台分兵徧襄陽夏四月湖廣行省參政孛羅奉詔至四川赦囊加台等罪囊加台等聽命蜀地悉定各省兵皆罷囊加台坐指斥乘輿死皇太子至燕後不知所終是年翰林國史院臣言纂修英宗實錄請具倒刺沙款伏事狀付史館從之故舊史所書多誣

諸王圖堅者先赴上都兵敗走陝西四川天祿二年四川囊加台敗復走雲南明年正月與萬戶伯忽阿禾等據雲南起兵陷中慶路殺廉訪司官尋攻陷仁德府至馬龍州

元史卷四十一 列傳 五

圖堅自立爲雲南王以伯忽爲丞相阿禾忽刺忽等爲平章立城柵焚倉庫拒命朝廷簡乞住爲雲南平章帖木不花爲左丞從豫王阿刺忒納失里由八番分道進討遙授烏蒙土官祿余爲雲南參政使助軍四月四川行省復調重慶五路軍救雲南未幾祿余殺烏撒宣慰官降於伯忽羅羅斯諸蠻俱起兵與伯忽應帖木不花遇害祿余以蠻兵據烏撒順元界立關固守文宗復命諸王云都思將江浙河南江西兵以進五月羅羅斯土官撒加伯阿漏土官阿刺里州土官德益等皆附祿余拒命會四川軍至雲南雪山峽遇羅羅斯軍敗之雲南兵稍卻朝議復立行樞密院發朵甘思朵思麻及鞏昌諸軍命河南平章徹里帖木兒同武靖王朔思班由四川陝西平章教化從豫王由八

番兩路夾擊撒加伯合烏蒙土兵攻建昌右丞躍里拒之
斬獲無算四川軍亦敗撒加伯於蘆古驛而圖堅伯忽等
勢日熾祿余亦乘勢連結烏蒙東川芒部諸蠻令伯忽弟
拜延順襲順元路撒加伯復徹毀棧道遣把事曹通潛結
西番欲據大渡河進攻建昌躍里至建昌執曹通斬之詔
趣兩省各進兵於是四川平章塔出引兵由永寧左丞李
羅引兵由青山芒部以邛部州土官馬伯為鄉導陳兵周
泥驛祿余眾潰即奪其關隘與順元諸軍合撒加伯復攻
建昌戰於木託山為躍里所敗既而伯忽兵復戰於馬龍
州再戰於馬金山敗死餘黨駭散獨祿余猶據金沙江會
塔出等將蜀兵抵烏撒境與祿余戰於七星關六日凡十
七戰祿余大潰走俄而朔思班師次羅羅斯與躍里期至

元史卷四十一 列傳

六

三泊郎躍里倍道兼往奪金沙江阿禾引蒙古軍至敗績
阿禾走中慶與躍里連戰被禽斬於軍前於是圖堅自出
拒戰於伽橋古壁口兵方交躍里中流矢洞耳後拔矢復
戰大捷遂復省治分兵追捕圖堅於嵩明州次年正月祿
里帖木爾孛羅等敗蠻兵射中祿余肩降其眾豫王阿刺
忒納失里至當當驛安輯人民圖堅使其弟必刺都舊作必刺
都迷偽降於豫王陰以私圖之平章乞住妻子皆被掠圖
堅方繕城固守諸軍協力攻破之圖堅不知所往事平各
班師未幾撒加伯復掠良民為亂祿余又會伯忽姪阿福
領蒙古兵殺烏撒官吏詔遣西域指揮使瑣住發陝西兵
直抵羅羅斯發礮門兵截大渡河直趨邛部州五戰大破
之蒙古都元帥怯烈追擊於靖江路海中山破其柵圖堅

弟必刺都舊作必刺舉家赴海死蓋自秦定晏駕二都雲
擾內而遼東外而秦晉楚蜀滇南皆之秦定之子而不之
武宗之子使倒刺沙等能固守上都天下事未可知也有
荀息之忠無霍光之略兵敗身殉復蒙惡名惜哉順帝至
正間御史烏古孫良楨奏言遼陽行省丞相駙馬荅失帖
木爾昔事晉邸擢居首相位百僚之上受任託孤躬承顧
命及乎干戈擾攘盡領北上之兵以救顛危乃陰畜二心
坐觀成敗南至紅橋逗畱不進致干敗亡覩面入降大虧
臣節反藉口矜為己功視丁公之不忠於項罪又甚焉天
厭初賄賂權臣出轄江浙貪墨敗政流毒一方今又移治
遼陽似此賣國賣君之臣設使已死尙追討其罪豈宜久
追天誅則重位使國法不頒邪正不辨恐奸賊接迹仿效

元史卷四十一 列傳

七

非國家之福詔削奪荅失官爵一時推為正論見孔齊至
論曰倒刺沙以秦定潛邸心腹股肱之臣自漠北擁戴入
正大統討賊復仇風行雷厲是豈無一言匡贊者在相位
五年君臣魚水政由己出是豈無一言獻替者何以本紀
列傳寥寥若無其人乎秦定實錄修於文宗之時故本紀
天祿二年有翰林國史院請於英宗實錄著倒刺沙款服
之語亦猶建文革除事迹修於永樂之世以方孝孺而有
叩頭乞哀之誣何況倒刺沙輔秦定之政績有不深沒其
文以快誣詆者乎方其受遺託孤倡義討罪傳檄所至四
方響應即使不成亦必嬰城固守巷戰陳亡以身殉社稷
豈有被執俘至燕京之理即使被執見文宗亦必如方孝
孺齊泰黃子澄見燕王面斥篡弒罵賊而亡豈有俯首無

言就戮之理竭股肱之力加以忠貞不濟則以死繼之古之託孤如荀息者春秋亦許其不食言未嘗苛責之也倒刺沙者不得為荀息乎哉尤可怪者任速哥之傳其人不過英宗時襲父職為右衛千戶至屬微末家居五六年與國事風馬牛不及乃謂痛英宗之亡居常狂醉痛哭又稱其預燕帖木爾擁立之舉及文宗即位辭賞不受官至都水使不知據何家狀幻此疊樓然即如其言則任速哥真逆黨也不以躬行推刃之文宗為逆而反以討賊之泰定為逆明初修史諸臣無識於實錄家傳所逆則逆之胡粹中續通鑑不加刊削亦為其所愚於舊史所逆則逆之至責泰定帝盡誅奸黨而不能致討於倒刺沙并不以囊加台等起義四川雲南有死無貳為泰定之忠臣而反謂其

元史卷四十一 列傳

八

背叛君父罪當大逆不當僅以指斥乘輿蔽辜烏乎春秋作而亂臣賊子喜是之謂矣

燕帖木爾

燕帖木爾欽察氏藏兀爾第三子世系見土圖哈傳武宗鎮朔方備宿衛十餘年及即位同知宣徽院事皇慶元年襲左衛親軍都指揮使泰定帝致和元年進僉書樞密院事帝崩丞相倒刺沙宗王禪等奉遺詔立皇太子即位上都燕帖木爾時總環衛事掌兵權留大都與丞相倒刺沙不合自以受武宗恩寵欲援立其子以建奇功時周王居朔漠懷王居江陵距燕都皆遠非可旦夕至燕帖木爾將家子梟雄輕上都諸臣皆不知兵敢行險僥倖遂與其腹心密議以八月甲午昧爽率勇士納圖魯等入興聖宮

會集百官兵皆露刃誓眾曰祖宗正統屬在武皇帝之子敢有不順者斬遂執異議之中書平章烏伯都刺伯顏察爾等眾皆潰散下持異議諸臣於獄與西安王阿剌特納失里入守內庭分處腹心於樞密自東華門夾道重列軍士使人傳命往來其中以防漏洩即命前河南參政明里董阿前宣政院使荅刺麻失里乘驛迎懷王於江陵且令密諭其黨河南行省平章柏顏選兵備扈從於是封府庫拘百司印遣兵守諸要害推別不花為中書左丞相塔什海涯為平章速速為中書左丞王不憐吉台為樞密副使蕭芒古台仍為通政院使與中書右丞趙世延通政院使塞食分典機務募死士購戰馬運京倉粟以餉軍將士既受命未知所謝注目而立乃指使南向拜眾皆愕然始知其意所在燕帖木爾宿衛禁中達旦不寐一夕再徙人莫知其處密召其弟撒敦長子唐其勢於上都皆棄妻子來歸使將兵分守居庸關古北口丁酉再遣撒里不花鎖南班往江陵趣大駕早發令塔失帖木爾矯為南使揚言懷王旦夕且至復令乃馬台為北使稱周王已總漠北軍南來中外乃安辛亥撒里不花至自江陵云懷王已啟塗詔拜燕帖木爾知樞密院事丙辰率百官備法駕郊迎丁巳文宗至京師入居大內己未上都王禪及太尉不花右丞相荅失帖木爾平章買闕御史大夫紐澤等軍分道薄京畿進次榆林九月庚申朔詔燕帖木爾督師居庸關遣撒敦先驅至榆林西乘其未陳薄之上都兵大敗戊辰遼東平章圖滿迭爾以兵攻遷民鎮斬關入遣撒敦拒戰於薊

元史卷四十一 列傳

九

其意所在燕帖木爾宿衛禁中達旦不寐一夕再徙人莫知其處密召其弟撒敦長子唐其勢於上都皆棄妻子來歸使將兵分守居庸關古北口丁酉再遣撒里不花鎖南班往江陵趣大駕早發令塔失帖木爾矯為南使揚言懷王旦夕且至復令乃馬台為北使稱周王已總漠北軍南來中外乃安辛亥撒里不花至自江陵云懷王已啟塗詔拜燕帖木爾知樞密院事丙辰率百官備法駕郊迎丁巳文宗至京師入居大內己未上都王禪及太尉不花右丞相荅失帖木爾平章買闕御史大夫紐澤等軍分道薄京畿進次榆林九月庚申朔詔燕帖木爾督師居庸關遣撒敦先驅至榆林西乘其未陳薄之上都兵大敗戊辰遼東平章圖滿迭爾以兵攻遷民鎮斬關入遣撒敦拒戰於薊

州東沙流河敗之燕帖木爾以爲擾攘之際不正大名不足以係天下之望與諸王大臣伏闕勸進懷王固讓燕帖木爾曰周王道遠而上都迫在咫尺人心向背且難保一或失之噬臍無及懷王乃曰必不得已當明詔天下以著攝位待駕之意壬申卽位改元天曆癸酉封燕帖木爾爲太平王錄軍國重事中書右丞相知樞密院事如故卽日詔將兵出薊州拒遼東兵次三河而王禪等軍已破居庸關遂進屯三家丙子燕帖木爾蓐食倍道還抵榆河關帝出都城將親督戰燕帖木爾單騎請見曰乘輿出則民心必驚軍旅之事請一以責臣帝乃還宮己卯遇王禪前軍於榆河北奮擊敗之追至紅橋北王禪將樞密副使阿刺帖木爾指揮忽都帖木爾引兵會戰二人皆驍將也燕

元史卷四十一 列傳

十

帖木爾與部將和尚馳擊皆斫其左臂敵軍奪氣辛巳復鏖戰於白浮之野周旋馳突戈戟戛摩燕帖木爾手斃七人會日晡對壘而宿夜二鼓遣精銳百騎鼓譟射其營敵眾驚潰明日天大霧獲敵卒二人知王禪等脫身竄山谷矣明日王禪復集散卒成列出山燕帖木爾駐白浮西堅壁不動是夜命撒敦潛軍繞其後別遣驍騎壓其前夾營吹銅角以震盪之敵軍驚擾自相搗擊三鼓後西遁遲明追及昌平北斬首數千級降者萬餘人帝遣賜上尊諭旨丞相每戰親冒矢石脫有不虞其若宗社何自今後但憑高督戰察將士之用命不用命者賞罰之可也對曰臣以身爲諸將先敢後者斬若付諸將萬一失利悔將何及是日敵軍再戰再北王禪單騎亡乃分軍三萬守居庸關而

自還昌平俄報上都兵入古北口略石槽燕帖木爾遣撒敦爲先鋒自以大軍倍道趨石槽敵軍方炊掩其不備蹂之追擊四十里至牛頭山禽駙馬孛羅帖木兒平章芒古答失歹失帖木爾等獻闕下逐其餘兵出古北口而圖滿迭爾及諸王耶先帖木爾復以遼東軍陷通州將襲京師燕帖木爾急還軍趨救十月己丑朔至通州乘其初至直前薄之敵軍走渡潞河夾河而陳敵然火植楛爲疑兵夜遁及旦渡河追之戰於檀子山之棗林士皆殊死戰至晚唐其勢陷陳殺陽翟王太平死者蔽野餘兵宵遁是時四方人心不服義兵蠶起雲中之兵入故關破冀寧陝西之兵攻潼關陷河中四川之兵絕棧道皆與上都兵相響應勝負莫決天下觀望獨燕帖木爾以大都軍戰畿輔而柏

元史卷四十一 列傳

十一

顏以河南軍助拒秦晉二人狼狽相倚且皆習兵事出奇陷陳屢敗義兵移檄四方斥倒刺沙爲逆黨會是月上都諸王忽刺台等兵復入紫荆關薄良鄉游騎逼南城燕帖木爾率諸將兵循北山而西令囊莖豆繫馬口而脫其銜且食且行晨夜兼程至盧溝河忽刺台望風西走是日凱旋入自肅清門陛見帝大悅賜宴興聖殿盡懽而罷會圖滿迭爾復以遼東軍入古北口燕帖木爾卽以師赴之戰於檀州南圖滿迭爾敗走還遼東獲忽刺台阿刺帖木爾安童朵羅台塔海等戮之先是齊王月魯帖木爾東路蒙古元帥不花帖木爾等聞文宗卽位起兵趨上都圍之時上都屢敗勢蹙壬寅破其城執倒刺沙收皇帝璽齊王調兵護送至京師庚戌文宗御興聖殿受之下倒刺沙於獄

上都平加燕帖木爾答刺罕號十二月分欽察軍置龍朔衛命兼領衛事明年燕帖木爾乞解相印還宿衛帝勉之曰卿已官省院惟未入臺其聽後命二月遷御史大夫太平王如故未幾復拜中書右丞相帝以內難既定遣使迎周王於漠北三月辛酉乃詔燕帖木爾護璽寶北上周王即位和林是為明宗六月加拜太師餘如故從明宗南還八月乙酉朔明宗次旺忽察都之地庚寅暴崩燕帖木爾聞帳殿哭聲奔入取璽寶授文宗扶上馬疾驅而還晝則率士扈從夜則環甲巡幄癸巳達上都遂與諸王大臣陳勸復正大位己亥文宗復即位於上都以燕帖木爾有大功封其三世皆王爵又明年命禮部尚書馬祖常撰文紀其功立石於北郊至順改元命獨為丞相以示尊異一切

元史卷四十一 列傳 三

大政悉聽裁決政有隔越聞奏者以違制論知樞密院事闊徹伯脫脫木爾等十人惡其權勢大重欲圖害之既而謀泄燕帖木爾即率欽察軍掩捕誅之二年二月敕為建第於興聖宮西南命留守司董其役尋立生祠於紅橋南詔養其子塔刺海為子賜龍慶州之流杯園池水磴土田又賜平江松江江陰蘆場蕩山沙塗沙田等地四年文宗大漸遺詔立兄明宗之子已而文宗崩燕帖木爾立明宗次子懿璘質班即位年甫七歲月餘即殂文宗后臨朝燕帖木爾復議立文宗子燕帖古思后不從乃命迎明宗長子妥懽帖睦爾於廣西至良鄉具鹵簿迎之燕帖木爾於馬上舉鞭指畫告以國家多難遣使奉迎之故妥懽帖睦爾心畏之卒無一語燕帖木爾不測其意且自以明宗之

崩實與逆謀恐其即位追理前事故遷延數月不立而神志日以昏亂燕帖木爾自秉大權以來挾震主之威肆意無忌一宴或宰十三馬取泰定帝后為夫人前後尚宗室女四十人或交禮三日遽遣歸者而後房充斥不能盡識至是荒淫日甚體羸溺血而死於是明宗子妥懽帖睦爾始即位是為順帝以撒敦為左丞相唐其勢為御史大夫元統二年四月命唐其勢總管高麗女真漢軍萬戶府達魯花赤授撒敦錄軍國重事答刺罕榮王太傅賜廬州路為食邑贈燕帖木爾太師追封德王諡忠武後至元改元立其女伯牙吾氏為皇后是時撒敦已死唐其勢代為左丞相柏顏居右丞相特用事唐其勢忿曰天下本我家天下柏顏何人而位吾上遂與撒敦弟答里潛蓄異謀交

元史卷四十一 列傳 三

通嘉王兒火帖木爾謀援立以危社稷帝數召答里於上都不至鄰王徹徹圖遂發其謀六月晦日唐其勢伏兵東郊身率勇士突入宮闕柏顏率兵掩捕獲之唐其勢攀折殿檻不肯出其弟塔刺海亦走匿皇后坐下后蔽之以衣左右曳出斬之并遷后出宮尋醜之於開平民舍語詳后妃傳其黨北奔答里及嘉王於上都者亦為柏顏遣兵追襲伏誅遂簿錄燕帖木爾家財貨山積擬於天府至是悉入官

柏顏

柏顏蔑爾吉台氏曾太父以下世給事宿衛柏顏年十五侍武宗於藩邸從北征海都累功為諸將先賜號拔都及即位屢遷御史中丞至尚書平章政事泰定三年改河南

行省平章舊所賜河南田五千頃以二千頃奉帝師祝釐八百頃助給宿衛自取不及其半宿姦頑豪嘗毒民者必深治之致和元年會秦定帝崩燕帖木爾遣明里董阿迎立武宗子懷王於江陵道過河南燕帖木爾夙與柏顏皆以將種同事武宗意氣相善使以謀密告柏顏約其外應柏顏慨然許諾即集僚屬明告以故於是會計倉廩府庫穀粟金帛之數乘輿供御牢餼膳羞徒旅委積士馬芻糶供億之需及賞賚犒勞靡不備至不足則檄州縣募民折輸明年田租及貸商人貨貨約倍息以償又不足則邀東南常賦之經河南者輒止之以給其費徵發民丁增置驛馬補城櫓浚濠池修戰守具嚴徵邏斥候即遣使馳告懷王又使人報燕帖木爾曰公但盡力京師河南事我當自

元史卷四十一 列傳

古

効乃別募勇士五千人南迎而躬勒兵以俟參政脫別台曰今蒙古軍與宿衛士皆在上都而令探馬赤軍守諸隘吾恐事不可成與柏顏議不合其夜脫別台欲手刃柏顏事覺柏顏拔劍殺之奪其所部軍馬懷王發江陵遣使拜柏顏河南行省左丞相比至柏顏屬囊鞬擐甲胄與百官父老導入咸俯伏稱萬歲即上前叩頭勸進明日扈從北行文宗即位命柏顏仍領宿衛尋加太尉錄軍國重事天曆二年正月拜太保特授忠翊侍衛親軍都指揮使未幾明宗即位八月拜中書左丞相明宗崩文宗復嗣位拜知樞密院事至順元年帝以柏顏功大不有異數不足以報稱特命尚世祖闕出皇子女孫卜顏公主賜黃金雙龍符鐫文曰廣忠宣義正節振武佐運功臣組以寶帶世爲明

券凡宴飲視諸宗王禮二年封浚寧王追封其先三世爲王順帝初立柏顏以翼戴功拜中書右丞相進太師奏復經筵加知經筵事進封秦王總領蒙古欽察幹羅思諸衛親軍都指揮使會唐其勢塔刺海兄弟謀變柏顏奉詔誅之餘黨北奔又親率師往上都擊破其眾遂鳩般皇后伯牙吾氏爲匿唐其勢塔刺海於後宮也詔賜柏顏以荅刺罕號世襲罔替至元元年柏顏贊帝率遵舊章奏寢妨農之務停海內土木營造四年息彰德萊蕪冶鐵一年調京圻漕戶雜徭減河閒兩淮福建鹽額振沙漠貧戶及南北饑民至千萬計其知經筵日當進講必與講官敷陳格言以盡啟沃太皇太后賜第時雍坊有旨雄麗視諸王邸柏顏力辭制度務從損約又出賜田歲收所積鈔萬錠濟關

元史卷四十一 列傳

古

北諸驛之困乏者四年求解政柄三宮交勉雷五年十月詔爲大丞相加號元德上輔賜七寶玉書龍鳳牌柏顏初輔政頗攬人心博名譽人以爲賢於燕帖木爾自誅唐其勢後獨秉國鈞威福自恣羣小愆慝日益驕橫變亂祖宗成憲專制朝廷不復守臣節帝始患之柏顏慮帝不平乃以其弟子脫脫宿衛伺帝起居懼涉物議又以樞密知院汪家奴翰林承旨沙刺班同侍禁近實屬意脫脫故脫脫政令日修而衛士拱聽約束柏顏自領諸衛精兵以燕者不花爲屏蔽道從之盛填湓街衢諸衛精兵收爲己用內府錢物聽其出納擅爵人赦死罪任邪佞無辜勢焰灼天下脫脫故讀書知大義不善其伯父所爲深憂家禍及己知柏顏不可諫乃乘閒自結於帝而柏顏不知也是年

車駕自上都還京柏顏數以兵巡行紅城諸處歸輒在後
 三人謀益果柏顏構陷鄒王徹徹圖奏賜死帝未允輒傳
 旨行刑復奏貶宣讓王帖木不花威順王寬徹皆化辭色
 憤厲不待旨而行帝益忿之六年二月柏顏自領兵衛請
 帝出田帝託疾不往柏顏固請太子燕帖古思出次柳林
 脫脫遂與世傑班阿魯合議白於帝戊戌脫脫悉拘門鎗
 領軍阿魯世傑班侍帝側傳密旨是夜帝御玉德殿主符
 檄發號令漏二鼓遣月可察爾率三十騎抵太子營取之
 入城夜半見帝四鼓命只爾瓦台奉詔往柳林出柏顏為
 河南行省左丞相己亥柏顏遣人來城下問故脫脫倨城
 門上宣言有旨黜丞相一人諸從官無罪可各還本衛柏
 顏奏乞陛辭不許遂行道出真定父老奉觴酒以進柏顏
 問曰爾曾見子反父事耶父老曰不曾見子反父惟見奴
 反主柏顏俛首不能答三月辛未詔徙南恩州陽春縣安
 置未至死於江西龍興路驛舍

元史卷四十一 列傳 七

阿禮

阿禮舊連海畏吾氏集賢太學士脫列之子也兄野訥事
 仁宗於潛邸從居懷州從者單弱多懷去計野訥獨無貳
 心成宗崩權臣阿附中宮不遣使告哀宗藩仁宗有聞將
 自懷州入京宮臣或持不可野訥屏人密啟勸駕仁宗從
 之遂定大計及即位拜樞密院副使進同知樞密院事命
 為中書平章辭不拜於國家事知無不言言無不納然韜
 晦惡盈不泄於外卒封趙國公諡忠靖阿禮亦早事武宗
 仁宗為宿衛以清慎通敏與父兄並見信任十餘年間敷

歷華近入侍帷幄出踐省闈廷無閒言至治初出為平章
 政事歷鎮江浙湖廣河南陝西四省皆有惠政歸朝拜翰
 林學士承旨丁父憂解官家居天祿元年秋文宗入承大
 統阿禮即易服迎於汴郊帝命復鎮汴省時艱難之際時
 糧儲治戎器閱士卒括馬民間以備不虞先是文宗即位
 詔已播告天下而陝西官府結連靖安王闊不花等起兵
 東擊潼關阿禮開府庫量出鈔二十五萬緡屬行省犒軍
 河南以禦之令都鎮撫卜伯率軍吏巡行南陽高門武關
 荆子諸隘南至襄川二江之口督以嚴備萬戶博羅守潼
 關不能軍其月陝西兵突出潼關東略閿鄉披靈寶盩陝
 州新安諸郡邑放兵四劫地邇前進河南告急之使狎至
 而朵列圖亦以兵寡為言冬十月己丑朔阿禮集省憲官

元史卷四十一 列傳 七

屬問計無有言者阿禮曰汴在南北之交使西兵得至此
 則江淮之道不通於畿甸軍旅何日息乎今重且急莫如
 足兵足食吾徵湖廣之平陽保定兩翼軍與吾省礮弩手
 諸軍以備虎牢裕州鄧州兩萬戶軍以備武關荆子口以
 屬郡之兵及蒙古兩都萬戶左右兩衛諸部丁壯之可入
 軍者給馬乘裝立行伍以次備諸隘徹回襄鄧諸軍之
 屯芍陂者益以丁壯使守襄陽白土峽州諸隘別遣塔海
 以備巴蜀之兵以汴汝荆襄兩淮之馬給之府庫不足則
 命郡縣假諸殷富之家安豐等郡之粟溯黃河運至於陝
 糴諸汴汝近郡者則運諸滎陽以達於虎牢吾與諸軍各
 奮忠義以從王事宜無不濟者眾曰唯命即日部分行事
 凡省之屬吏與有官而家居者各授以事而出廉訪使董

守中僉事沙守南陽右丞脫帖木爾廉訪使卜顏守虎牢分遣兵馬以聽其調用餽餉之行千車相望自虎牢以南至於襄漢無不畢給爲粟二十萬石豆如之兵甲五十萬芻萬萬是時朝廷置行樞密院以總西事襄漢荆湖河南郡縣皆缺官阿禮便宜擇材以處之朝廷皆從其請是月西兵逼河南行院使來報曰西人北行者度河中以趨懷孟磁南行者帖木哥過武關略鄧州而殘之直趨襄陽攻破郡邑三十餘橫絕數千里所過殺官吏焚廬舍虜民人婦女財物賊虐暴殄西結囊加台以蜀兵至矣阿禮益督餉西行遣行院官塔海領兵攻帖木哥而又設備於江黃置鐵繩於峽口作舟艦以待戰丁未師與西兵遇於鞏縣之黑石渡而湖廣所徵太原之兵取爲可用甫至未

元史卷四十一 列傳

六

及食或趣之倍道以進轉戰及暮兩軍殺傷與陸淵谷死者相等而虎牢遂爲敵有兵儲巨萬阿禮盡其心民殫其力者一旦悉亡焉行省院與諸軍斂兵退庚戌西兵至汴民大恐阿禮前後遣使告于朝輒爲耶先涅留不遣不得朝廷音問己二十日阿禮亦憂之親出行撫其民乃修城闕以備衝突立四門以通往來戒卒伍以嚴守衛時雖甚危急阿禮朝夕出入聲色不動怡然如平時眾賴以安十一月甲子西師逼城百里而近阿禮告行院將吏曰行院之出唯敵是圖而退保吾城何其示怯且敵亦烏合之眾耳吾甲兵非不堅勁芻峙非不豐給而弗利者太平日久將校不知兵吏士不練習故彼得披猖至此吾今遣使告於朝請降詔大赦脅從註誤明示利害吾整大軍西向以

征之別遣驍將率精騎數千上龍門繞出其後使之進無所投退無所歸必成禽於鞏洛之閒而我軍所獲陝西官吏命有司羈而食之一無所戮當可使亂軍自定眾從之即日與行院整兵南薰門外以行會有使者自京師還言齊王已克上都奉天子寶璽來歸刻日至京矣阿禮乃置酒高會於省堂以賀發書告屬郡報諸江南三省而募士得蘭住者齋書諭之西軍猶榜掠蘭住訊以其實而朝廷亦遣都護月魯帖木爾從十餘人奉詔放散西軍之在虎牢者西人殺其從者之半械都護以送諸荆王所荆王時在河南之白馬寺以是西軍雖未解散各已駭悟又聞行省院以兵至猶豫不敢進朝廷復使參政馮不花親諭之乃信服靖安王遣使四輩與蘭住來請命逡巡而去難平

元史卷四十一 列傳

九

阿禮乃解嚴報捷斂餘財以還民從陝西求民人之被俘掠者歸其家凡數千人陝西官吏被獲者皆遣還其所阿禮居汴省數月後以功遷陝西行臺御史大夫復拜中書省平章政事又有和上者乃蠻台氏天麻初以後衛親軍千戶從拒上都兵戰紅橋戰白浮戰昌平栗園戰石槽戰檀州南桑口舊史專傳今附姓名於後

元史卷四十一 終

元史卷四十二

列傳二十六

元末相臣

塔識

舊冠鐵木爾

字九齡和寧忠憲王康里托托之子事

明宗於潛邸文宗初屢遷同知樞密院事順帝至元六年拜中書右丞至正改元遷平章政事柏顏罷相庶務多所更張塔識盡心輔贊每入直帝為出宿宣文閣賜坐榻前詢以政道必夜分乃罷二年郊祀塔識言大祀竣事必有實惠及民以當天心乃賜民明年田租之半嶺北地寒不任穡事歲募富民和羅為邊餉民雖稍利費官鹽為多塔識乃請轉輸京倉米百萬斛儲和林以為備日本商百餘人遇風漂入高麗高麗掠其貨表請沒其人為奴塔識持

元史卷四十二 列傳

一

不可曰天子一視同仁豈宜乘人之險以為利宜資其還已而日本果上表稱謝俄有日本僧告其國遣人刺探國事者塔識曰刺探在敵國固宜防之今六合一家設果刺探正可令知中國之盛歸告其主使向化兩浙閩鹽額累增而課愈虧江浙行省請減額塔識奏歲減十三萬引五年拜御史大夫務持大體不苛嬖以立聲威建言近歲大臣獲罪重者族滅輕者籍其妻孥祖制父子罪不相及請除之著為令明年仍入中書平章政事大駕時巡塔識留鎮大都舊法細民糴於官倉出印券月給之者其直三百錢謂之紅帖米賦籌而給之盡三月止者其直五百錢謂之散籌米貧民買其籌帖以為利塔識請別發米二十萬石遣官坐市肆使人持錢得米茲敝遂絕七年拜左丞相

修飭綱紀立內外通調之法朝官外補許得陛辭親受帝訓責以成效郡邑賢能吏次第甄拔入補朝闕分海漕米四十萬石置沿河諸倉以備凶荒令僧人與齊民均受役於官以復舊制奏進孔子後衍聖公階為三品歲一再詣國學獎勵諸生中書故事用老臣預議大政久廢不設塔識奏復其規起腆合張元朴等四人為議事平章曾未半午敝政漸革初柏顏議罷科舉塔識時在參議府訖不署奏及入中書首議復之徵用處士待以不次中外咸悅卒年四十六追封冀寧王諡文忠塔識好研伊洛諸儒之書故議論有本原而在位未久中外惜之

多爾只

多爾直班

多爾只舊作朵兒只木華黎六世孫江浙行省丞相託託子也

元史卷四十二 列傳

二

生一歲而孤稍長備宿衛至治二年授集賢學士年未及冠一時同僚如郭貫趙世延鄧文原諸老皆器重之天厯初多羅台國王自上都領兵至古北口與大都兵迎敵被殺以多爾只襲王爵扈蹕上都詔因便送至遼陽之國順帝至元四年多羅台弟乃蠻台藉太師柏顏勢謂當襲王位愬於朝柏顏妻欲索大珠環價直萬六千錠多爾只慨然曰王位我祖宗所傳不宜從人求售我縱不得得者亦我家人非外人也於是乃蠻台以賂故得為國王而除多爾只遼陽行省左丞相至正四年移江浙行省左丞相時杭城荐經災燬別怯不花先為相庶務寬紓多爾只繼之咸仍其舊民心翕然汀州寇竊發調遣將士招捕數月即平帝嘉其績錫九龍衣上尊酒居二年方面晏然杭之耆

老請建生祠如前丞相故事固辭七年召拜御史大夫會丞相虛位即拜中書右丞相多爾只進曰臣藉先人之蔭早襲王位未諳國家之事今備位宰相非得賀太平共事不可帝悅即以太平爲左丞相是時朝廷無事稽古禮文有墜必舉歲餘畱守司行致賀禮其物先畱鴻禧觀多爾只家臣寓觀中察知其致左相者特豐具以告多爾只曰彼縱不及我亦又何怪即命受之郊王家產既籍於官多爾只俾掾史錄其數明日掾史以復韓嘉訥爲平章不知出丞相命勃然變色叱掾史曰公事須自下而上何竟白丞相命客省使扶出多爾只不爲動知者咸服其量九年罷相復襲王爵之國遼陽十四年丞相脫脫總兵南討中書參議龔伯遂一作建言宜分遣諸宗王及異姓王俱出

元史卷四十二 列傳

三

軍吳王多爾赤厚賂伯遂獲免多爾只獨曰吾國家世臣天下有事正効力之秋也何辭焉即領兵出淮南聽脫脫節制脫脫遣攻六合拔之及脫脫罷多爾只乃以本部兵守揚州十五年卒於軍年五十二其爲相務存大體而太平則兼理庶務故一時政權頗出於太平趨附者眾多爾只處之泰然不與較太平亦能推讓盡禮中外皆稱賢相云

多爾直班多舊字惟中木華黎七世孫也祖碩德父別理哥多爾直班甫晬而孤育於從祖母拜住其從父也請於仁宗降璽書護其家南坡之變拜住遇害賊臣并欲殺其弟集賢學士多爾只時多爾直班從行年方八歲走詣怯薛官求免故多爾只得脫於難年十四見文宗適將幸上

都親閱御衣命錄於簿顧左右無能書漢字者多爾直班引筆書之文宗喜曰世臣之家乃能知學如是命爲尙衣奉御尋授工部郎中順帝元統初擢監察御史首疏宗廟宜親祀赦命不宐數又陳時政五事其一請修刑政辨忠邪以弭災變二曰親祀郊廟以敬天法祖三曰博選勳舊端謹子弟前後輔導使嬉戲不接於目俚言不及於耳以日新聖德四曰樞機之地宜公賞罰以服民心五曰振饑民以弭安盜賊是時日月薄蝕烈風暴作河北山東旱蝗爲災乃復條陳九事上之一杜僥倖之門二罷不急工役止無名賞賜三停禁中佛事四省內外冗員五均公田六鑄錢幣七罷山東田賦總管府八調河南自實田糧九禁取姬妾於海外正月元日朝賀故事教坊官位在百官後

元史卷四十二 列傳

四

御史大夫撒迪傳旨俾入正班多爾直班執不可撒迪以奉詔爲詞多爾直班曰事不可行大夫宜覆奏西僧爲佛事內廷醉酒失火多爾直班劾其不守戒律延燒宮殿震驚九重撒迪傳旨免其罪多爾直班又執不可一日間傳旨者八乃已丞相柏顏御史大夫唐其勢二家奴怙勢爲民害多爾直班巡歷至潮州悉捕其人致之法民大悅及還唐其勢怒之不謝又劾唐其勢從子馬沙原作馬爲欽察親軍指揮使恣橫不法會唐其勢被誅乃已屢遷侍書學士兼經筵官時甫弱冠又勦家子乃獨以經術侍帝左右是時學士康里巉巉在上前敷陳經義多爾直班爲翻譯曲盡其意多所啟沃俄遷太宗正宗王有殺其大母者多爾直班與同僚拔實力請於朝必正其罪時相難之出

為淮東廉訪使尋拜中書參政提調宣文閣時纂集至正條格多爾直班謂是書上有祖宗制誥安得獨稱今日年號又律中條格乃其一門耳豈可為書名時相不能從惟除制誥而已有以善音樂得幸者有旨用為崇文監丞多爾直班改擬一人以聞帝怒曰選法盡由中書省邪多爾直班頓首曰用倖人居清選臣恐後世議陛下尋拜御史中丞御史劾別性不花章甫上黜御史大夫懿憐真班平章行省江浙多爾直班曰若此則臺綱安在乃再上章劾奏竝留御史大夫不允乃約臺臣皆上印綬辭職帝諭留不從即杜門謝賓客尋出為遼陽行省平章到官詢民疾苦知米粟羊豕薪炭諸貨皆藉鄉民販負入城而貴室僮奴公府隸卒爭強買之僅酬其半直又其俗編柳為斗大

元史卷四十二 列傳

五

小不一豪賈猶僧得以高下其手民咸病之即飭有司厲防禁齋稱量由是貨集價平又存恤孤老平準錢法清銓選汰胥吏慎句稽輿廢墜鉅細舉苟有罪雖勳不貸王耶百司聞風悚息召還京師拜中書平章政事時盜起河南首請旌死節以勸忠義守荆襄湖廣以絕後患又言祖宗朝用兵匪專於殺人今倡亂止數人願乃盡坐華民為叛逆豈足以服人心其言頗迂丞相脫脫意脫脫方倚信左司郎中汝中柏員外郎伯帖木爾兩人擅權用事多爾直班正色立朝無所附麗適陝州告急因出為陝西行臺御史大夫行至中途聞商州陷武關不守即輕騎晝夜兼程至奉元而賊已入鴻門即日就署督諸軍復商州乃修築奉元城壘募民為兵出庫銀為大錢射中的者賞之由

是人皆為精兵金商義兵以獸皮為矢房狀如瓠號毛胡盧軍甚精銳列其功以聞敕書褒獎其軍遂為勁旅乃開義谷棚置七驛以便道路時脫脫弟御史大夫耶先帖木爾師敗於河南西臺御史同詞劾奏多爾直班當署字願謂左右曰吾其為平章湖廣矣未幾命下果然關中人遮道泣留多爾直班慰遣之不聽乃從間道得出汝中柏及伯帖木爾猶言不殺此人則丞相終不安蓋謂其四怯薛後必入相耳乃命多爾直班專供給湖廣軍食時官廩無儲乃親貸民粟約俟朝廷頒鈔至即還以直又遣官糴粟河南四川之境民間其名爭輸粟以助軍而總兵者希丞相旨尚以供軍需失期數見侵辱達刺罕軍帥王不花奮言曰平章國之貴臣今坐不重茵食無珍味徒為我曹軍

元史卷四十二 列傳

六

食耳百需立辦猶欲誣之是無人心也我曹當勸公憤以申雪之耶先帖木爾復遣國子助教完者至軍中風使害之完者至反加敬禮然多爾直班積勞成疾遂卒於黃州年僅四十多爾直班立朝以持名教植人才為己任留心經術凡伊洛諸儒書未嘗去手喜為詩尤精書畫其在經筵開陳大義類次前賢遺言為書四卷以進曰學本曰君道曰臣職曰國政明道厚倫制行稽古游藝五者為學本之目敬天愛民知人納諫治內五者為君道之目宰輔臺察守令將帥督御五者為臣職之目興學訓農理財審刑議兵五者為國政之目帝覽而善之賜名曰治原通訓藏之宣文閣

脫脫

脫脫字大用馬札爾台之子柏顏之弟子也世系見柏顏傳馬札爾台蚤扈從武宗後侍仁宗於潛邸以恭謹爲仁宗親信及卽位令領虎賁親軍都指揮使泰定四年拜陝西行臺待御史文宗入承大統時陝西行臺方附上都起兵焚詔書殺其使馬札爾台奉召不至及事定議罪以其兄柏顏有功特免議命爲上都留守遷知樞密院事柏顏既罷黜遂代爲右丞相未幾以疾辭遂以太師就第封忠王至正七年卒於甘肅長子曰脫脫次子曰耶先帖木爾脫脫生而岐嶷及就學請於其師浦江吳直方曰終日危坐讀經書易若日記古人格言美事而服行之乎稍長膺力過人能挽弓一石文宗時授忠翊侍衛親軍都指揮使順帝至元初唐其勢謀不軌事覺伏誅其叔父荅里等稱

元史卷四十二 列傳

七

兵外應脫脫選精銳與戰盡禽之再遷御史大夫扈從上都還至雞鳴山之渾河帝將畋於保安州馬蹶脫脫諫曰古者帝王端居九重日與大臣宿儒講求治道飛鷹走狗非其事也是時柏顏爲中書右丞相既誅唐其勢益無所忌帝積不能平脫脫雖幼養於柏顏而微諫不聽常憂其敗私請於其父曰伯父驕縱已甚一旦天子震怒則吾族赤矣曷若於未敗圖之以報國家其父以爲然乃決疑於吳直方直方告以春秋大義誠親脫脫意乃決乘間言於帝自陳殉國忘家之意帝始猶未之信時帝左右前後皆柏顏黨獨世傑班阿魯及錢塘楊瑀爲帝腹心因遣三人日與之往復論難知其忠義無他心遂不之疑五年秋車駕出上都柏顏時出赴應昌脫脫與世傑班阿魯謀禦之

東門外懼弗勝而止會河南范孟矯殺省臣事連廉訪使段輔柏顏風臺臣言漢人不可爲廉訪使時別怯不花亦爲御史大夫畏人議已辭疾不出故其章未上柏顏促之急脫脫度不能遏乃先入告於帝言漢人爲廉訪乃祖制不可廢及章上帝如脫脫言柏顏偵知出於脫脫大怒言於帝曰脫脫雖臣之猶子其心專右漢人必當治之帝曰此出朕意非脫脫罪也及柏顏擅貶宣讓威順二王帝不勝其忿決意逐之一日與脫脫語相對泣下歸復謀於直方直方曰此宗社安危所繫不可不密議論之際左右爲誰曰阿魯及脫脫木爾直方曰子之伯父挾震主之威此輩苟利富貴其語一泄則主危身戮矣脫脫乃延二人於家晝夜置酒張樂不令出欲候柏顏入朝禽之戒衛士嚴

元史卷四十二 列傳

八

宮門出入螭坳悉置兵柏顏見之驚問故對曰天子所居防禦不得不爾柏顏退脫脫益增兵自衛六年二月柏顏請帝出獵脫脫勸帝稱疾不出乃挾太子燕帖古思出畋柳林脫脫遂與阿魯等合謀以所掌兵及宿衛士拒之遂拘京城門鑰命所親信列布城門下夜奉帝御玉德殿召近臣及省院大臣先後入見集午門聽命又召楊瑀入草詔數柏顏罪狀詔成夜已四鼓命中書平章只爾瓦台齎詔赴柳林黜柏顏爲河南左丞相柏顏遣騎士至城下問故脫脫坐城門上實告有旨逐丞相一人餘無所問諸從官可各還本衛於是柏顏遂南行時馬札爾台方鎮北邊詔入爲右丞相脫脫知樞密院事然馬札爾台爲人貪庸實不可居相位脫脫密勸其父請退十月馬札爾台移疾

辭詔以太師就第至正改元遂命脫脫為右丞相封馬札爾台為忠王脫脫乃悉更柏顏舊政復科舉取士及太廟四時祭雪郊王之免召還宣讓威順二王使居舊藩以阿魯圖正親王之位開馬禁滅鹽額調負通開經筵遴選儒臣勸講中外翕然稱賢相三年詔修遼金宋三史命脫脫為都總裁官又請修至正條格頒天下脫脫欲帝日親儒臣講學頗聞左右多沮撓者一旦帝御宣文閣脫脫取裕宗當日所授書以進曰設使經文不足觀世祖豈以是教裕皇哉帝嘉納之皇太子愛猷識理達臘嘗保育於脫脫家每有疾飲藥必嘗之而進帝嘗駐蹕雲州遇烈風暴雨山水大至車馬人畜皆漂溺脫脫抱皇太子單騎登山乃免至六歲皇太子始還宮脫脫復以私財造大壽元忠國

元史卷四十二 列傳

九

寺於健德門外為皇太子祝釐四年領宣政院事諸山主僧請復僧司且曰郡縣所苦如坐地獄脫脫曰若復僧司何異地獄中復置地獄邪時有疾體漸羸且術者亦言年月不利乃上表辭位帝不允後凡十七上始從之有旨封鄭王食邑安豐賞賚巨萬俱辭不受乃賜松江田為立稻田提領所領之七年別怯不花為右丞相以宿憾譖其父馬札爾台詔徙甘肅脫脫力請俱行復移西域撒思嘉之地至河召還甘州就養馬札爾台尋卒帝念脫脫勤勞召還京師拜太傅總理東宮事九年丞相多爾只賀太平皆罷復命脫脫為右丞相時開端本堂皇太子學於其中命領端本堂事於是脫脫引用烏古孫良楨龔伯遂汝中柏伯帖木爾等為僚屬皆委以腹心小大事悉與之謀事行

而羣臣不知也帝以吳直方有協贊功由長史超授集賢大學士御史王士點劾其黷晉官階直方亦力辭乃止用吏部尚書僕哲篤言更至正交鈔詔臺院集議祭酒呂思誠言其不可脫脫不聽終變鈔法而鈔竟不行事見思誠傳用參議李羅帖木爾言欲於都城外開河置閘放運河金口水引通州船至麗正門外役丁夫數萬訖無成功黃河決白茅又決金堤方數千里民被其患五年不能塞脫脫用賈魯計議塞之請身任其事乃奏以賈魯為工部尚書總治河防使發河南北兵民十七萬役之築決堤成使復故道凡八月功成事見河渠志帝嘉其功賜世襲荅刺罕號又敕儒臣歐陽玄製河平碑以紀其功仍賜淮安路為其食邑郡邑長吏聽其自用已而汝潁間妖賊起以紅

元史卷四十二 列傳

十

巾為號蔓延襄樊唐鄧間十一年脫脫奏以弟御史大夫耶先帖木爾為知樞密院事將諸衛兵十餘萬討之甫克上蔡既而駐兵沙河軍中夜驚耶先帖木爾棄軍北奔汴梁收散卒屯朱仙鎮朝廷以其素不習兵詔別將代之耶先帖木爾徑歸昏夜入城仍為御史大夫陝西行臺監察御史十二人劾其喪師辱國脫脫聽其弟言乃遷西行臺御史大夫多爾直班為湖廣平章除御史十二人各府添設判官以鉗言口由是脫脫賢名頓損十二年紅巾賊芝麻李據徐州眾五萬僭號猖獗脫脫請自將討之師次徐州攻其西門賊出戰以鐵翎射馬首脫脫不為動麾軍奮擊敗之入其外郭明日大兵四集賊不能支城破賊首遁去獲其黃繖旗鼓燒其積聚遂屠其城帝遣使即軍中加

脫脫太師趨還朝而立徐州平寇碑以章其績十三年二月脫脫用左丞烏古孫良楨右丞悟買哈台議屯田京畿以二丞兼大司農卿而自領大司農事西至西山東至遷民鎮南至保定河間北至檀州凡官地屯田皆募江南善種水田及修園築堰之人立法佃種歲用大稔故海運雖不通而京師足食是時徐壽輝據湖廣郭子興據濠張士誠據高郵號召江淮梗南北運道諸將連年征討無成效盜轉滋蔓十四年詔脫脫總制諸王諸省軍討之一切聽便宜行事臺省院部諸司聽選官屬從行稟受節制西域西番皆發兵來會旌旗累千里師次濟寧遣官詣闕里祀孔子過鄒縣祀孟子十一月至高郵連戰皆捷分兵平六合賊勢大蹙攻高郵城垂破俄有詔罪其老師費財以

元史卷四十二列傳

十一

河南行省左丞相太布花中書平章政事月闊察爾知樞密院事雪雪代將其兵削官爵安置淮安先是脫脫之侍父西行也別怯不花欲陷之死哈麻屢言於帝召還近地脫脫深德之至是引爲中書右丞而是時脫脫信用汝中柏由左司郎中參議中書省事平章以下見其議事莫敢異同惟哈麻不爲之下汝中柏因譖之脫脫奏改爲宣政院使於是哈麻深銜之哈麻嘗與脫脫議授皇太子冊寶禮脫脫每言中宮有子將實之何所以故久不行脫脫之將出師也以汝中柏爲治書侍御史使輔耶先帖木爾居中汝中柏恐哈麻必爲後患欲去之脫脫猶豫不決令與耶先帖木爾謀耶先帖木爾以其有功於己不從哈麻知之遂譖脫脫於皇太子及皇后奇氏會耶先帖木爾方移

疾家居監察御史袁寶因不花等承哈麻風旨上章劾脫脫出師三月無尺寸功傾國家之財爲己用半朝廷之官爲己隨竝劾其弟耶先帖木爾庸碌三奏乃允奪御史臺印出都門外聽旨以汪家奴代爲御史大夫而脫脫亦有安置淮安之命詔至軍中參議龔伯遂曰春秋之義大夫出疆有以安國家利社稷者專之可也將在軍君命有所不受今江淮之盜關社稷安危丞相出師時嘗被密旨便宣行事今一意進討賊破則讒言自息詔書且勿開則大事去矣脫脫曰君臣之義何可抗也既聽詔卽出兵甲及名馬三千分賜諸將俾各帥所部以聽新帥節制客省副使哈刺答曰丞相此行我輩必死他人之手今日寧死丞相前遂拔刀刎頸而死俄有旨移置脫脫於亦集乃路

元史卷四十二列傳

十二

十五年三月哈麻恐其復柄用乃風臺臣猶以譖輕列疏其兄弟罪於是詔流脫脫於雲南鎮西路耶先帖木爾於四川棚門脫脫長子哈刺章肅州安置次子三寶魯蘭州安置家產簿錄入官脫脫行至大理騰衝知府高惠欲以女事之許築室一程外以居脫脫曰吾罪臣也安敢念及此異辭謝之九月遣官再移置阿輕乞之地高惠以脫脫前不受其女首發鐵甲軍圍之十二月己未哈麻矯詔遣使鳩之死年四十二訃聞中書遣使至其地易棺衾以殮脫脫儀狀雄偉頎然出於千百人中而器宏識遠不矜不伐輕貨色好賢士憂國忘家出於天性功在社稷而始終不失臣節有古大臣之風惟袒其不肖弟致冒物議爲羣小口實君子憾焉然自脫脫謫而江淮盜遂不可制二十

三年監察御史張冲等上章雪其冤於是詔復脫脫官爵
竝給復其家產召其子哈刺章三寶魯還朝授哈刺章中
書平章封申國公分省大同三寶魯知樞密院事時耶先
帖木爾已死矣二十六年監察御史聖魯耶先撒都失里
等復言前者奸邪構害大臣臨敵易將致我國家將士由
此沮挫盜賊由此縱橫生民由此塗炭設使脫脫不黜軍
令不變羣賊早蕩平何至有今日之亂朝廷是其言未及
報而國亡舊史脫脫父馬札爾台別傳今併入

賀太平子耶先忽都

太平姓賀氏名惟一字允中賀勝子也初勝以非罪死太
平年尚幼秦定帝雪其父冤而撫卹之太平資性開朗弱
冠儼如老成人嘗受業於趙孟頫又師事雲中呂弼始襲

元史卷四十二 列傳

三

父職為虎賁親軍都指揮使順帝元統初屢遷御史中丞
時中書參議佛家奴者儉人也御史劾其罪時宰庇之寢
不問太平辭疾去至正二年詔起為中書參政辭進右丞
又辭會御史祁君璧復劾佛家奴黜之乃起就職宗室諸
王歲賜祿廩衣幣不均太平請於帝均其厚薄守令多失
職請選臺閣名臣充之仍遣使覈其治行治最者增秩賜
金時粟貴而金銀賤太平請出官本委官收市所得不貲
其後兵興卒獲其用四年遷中書平章政事六年拜御史
大夫故事臺端非國姓不以授太平固辭特賜蒙古氏更
名太平七年遷中書平章政事班同列上時木華黎孫多
爾只居政府薦太平為左丞相太平請勒僧道有妻子者
為民以減蠶耗給校官俸以防虛冒請賜經筵講官坐以

崇聖學選清望官專與陳言以求治道立行都水監以治
黃河舉隱士董立張樞李孝先等平生好訪問人材不問
南北必記錄於冊至是多進用之初脫脫既罷相出居西
土會其父馬札爾台卒太平力請於上俾得歸葬脫脫既
還朝即拜太傅然不知太平之有德於己也因汝中柏讓
間成隙反欲中傷之是時中書參政孔思立等皆一時名
人為太平所拔用悉誣以罪斥去九年罷太平為翰林學
士承旨既又誣劾其過失而竝論其子耶先忽都不宜僭
娶宗室女脫脫之母聞之亦以責脫脫兄弟侍御史撒馬
篤揚言於朝曰御史欲害正人壞臺綱如天下後世何即
臥病不起太平遂還奉元杜門謝客以書史自適十五年
河南盜起詔起太平為淮南行省左丞相兼知行樞密院

元史卷四十二 列傳

古

事總制諸軍駐濟寧時諸軍久出糧餉苦不繼太平命有
司給牛具種麥自濟寧達海州民不擾而兵賴以濟議立
土兵元帥府輪番耕戰未幾移遼陽行省糴粟以給軍處
置有法十七年五月召拜中書左丞相山東賊毛貴率大
眾由河間趨直沽遂犯湖州略柳林逼畿甸樞密副使達
國珍戰死京師震駭廷議或勸帝北巡或遷都關陝以避
之太平力持不可徵同知樞密院事劉哈刺不花於彰德
引兵入衛大敗賊眾於柳林賊走還濟南京師遂安會張
士誠以浙西降而晉冀關陝間察罕帖木爾亦屢奏捷於
是中外翕然有中興之望太平又攷求死節之臣雖布衣
亦加贈諡有官者就官其子孫人尤感動而太布花之事
起太布花者弘吉刺氏以世胄入官累遷雲南行省右丞

歷通政使上都留守遼陽行省平章至正八年太平爲丞相力薦太布花可大用召入爲中書平章政事及太平旣罷脫脫復爲相太布花因黨於脫脫謀欲害太平十二年盜起河南知樞密院事老章出師久無功詔拜太布花河南行省平章加太尉將兵往代之未期月平南陽汝寧唐隨又下安陸德安等路招降服叛軍聲頗震十四年脫脫以太師右丞相總大兵征高郵尋詔奪其兵柄而遷太布花本省左丞相與太尉月闕察爾樞密知院雪雪代總其兵山東河北諸軍悉令太布花節制而太布花乃以乏餉故頗偃蹇不遵朝命軍士又往往剽掠爲民患十五年監察御史耶里忽都等劾其慢功虐民之罪詔奪職從平章答失拔都魯進征頃之復拜湖廣行省左丞相節制湖廣

元史卷四十二 列傳

五

荆襄諸軍招捕沔陽湖廣等處水陸賊徒會朝廷復拜太平爲中書左丞相太布花聞之意不能平歎曰我不負朝廷朝廷負我矣太平漢人今乃復居中用事安受逸樂我反在外勤苦邪及擊賊賊且退諸將皆欲乘勝渡江而太布花乃反勒兵退以養銳爲名其後賊犯汴梁守臣請援兵至十往反太布花始率兵援汴猶按甲不進時唯毫太康俱已陷邊警日急太布花反縱軍出掠百里之內蕩然無遺繼又渡師河北聲取曹濮遂駐於彰德衛輝俄而曹濮之賊奔竄晉冀大同亦相繼不守遂蔓延不可制朝廷以爲憂兩遣重臣指授機宜而太布花藐不爲意其子壽童以同知樞密院事將兵分討山東久無功嘗以事入奏詔壽童慢帝由是惡之十八年山東賊愈充斥且逼京畿

於是詔拜太布花以中書右丞相總其兵討山東旣渡河卽上疏謂賊勢張甚軍行糧餉爲先昔漢韓信行軍蕭何餽餉方今措畫無如丞相太平者如令太平至軍中供給事乃可濟不然兵不能進時參政卜顏帖木爾張晉等分省山東二人者嘗劾壽童不進兵太布花至則以其餽運不前斷遣之又以知樞密院事完者帖木爾爲右丞之日嘗劾其非亦誣以他罪擅改其官徵至軍欲害之事聞廷議喧然及請太平主餉疏至太平知其欲害己也遂諷監察御史彌只海等劾其緩師拒命之罪下詔削其官爵奪其兵柄安置蓋州以知樞密院事悟良哈台總其兵太布花聞有詔夜馳詣故部將劉哈刺不花於保定時劉哈刺不花方械賊毛貴於柳林保障京師有功慨然許之卽走

元史卷四十二 列傳

六

至京首見太平求救解太平曰太布花跋扈不臣今詔已下爾乃敢爲緩頰耶不審處禍將及爾哈刺聞言噤不能發太平度太布花必在哈刺所卽語之曰爾能致太布花以來功與禽賊等乃引見帝賜賚優渥哈刺還縛太布花父子送京師未至皆誅之於路太布花旣誅中外軍令頗肅太平方銳意討山東賊而皇后太子之變復起時二皇后與皇太子謀內禪遣宦者朴不花諭意太平不答二皇太后又召太平至宮中舉酒申前意太平復依違以出是時皇太子欲盡逐近臣先令監察御史劾帝所親暱者未及奏而所令御史遷他官皇太子疑太平子耶先忽都泄其事蓋決意去太平政柄知樞密院事紐的該數於帝前左右之以故皇太子志未及逞會紐的該死皇太子遂令監

察御史買住桑葛失理劾左丞成遵參政趙中等下獄死
以去太平之黨太平遂數以疾辭位二十年二月拜太保
俾養疾於家臺臣交章留之帝不能從會陽翟王阿魯輝
帖木爾倡亂騷動北邊勢逼上都京師大震皇太子乃言
於帝命太平留守上都實欲置之死地太平毅然往有同
知太常院事脫權者耶先忽都故將也引兵縛陽翟王感
太平父子恩願歸功報闕下必蒙復召而太平固不受令
其自獻俘不以爲己功及奏至京師解嚴帝亦聞其功未
幾拜太傅賜田歸奉元帝欲以伯撒里爲丞相伯撒里言
非得太平同事不可於是有詔復起用皇太子惡其既去
而復留也於二十三年令御史大夫普化劾太平故違上
命詔悉拘所授宣命及所賜物往居陝西之西初右丞相

元史卷四十二列傳

七

朔思監者以家人造僞鈔事覺當逮太平力爲解免嗣朔
思監罷黜太平又分祿饋之及是不德太平前事反迎合
皇太子意誣奏太平安置吐蕃尋遣使者逼令自裁太平
至東勝賦詩一篇乃自殺年六十三二十七監察御史
辨其非辜請加褒贈子耶先忽都名均字公秉少好學有
俊才累遷翰林侍讀學士太平之爲相也務廣延才彥而
耶先忽都以丞相子又傾己下士以故名稱籍甚已而被
劾罷從親還奉元及太平再相授知樞密院事十九年羣
盜由開平東掠遼陽冬詔率師往討太平以其年少數請
改命不允至則遣將拔懿州省治盜踰遼河東奔會中朝
讒搆日甚罷爲上都留守已而朔思監徇二皇后意搆成
大獄誣老的沙耶先忽都及脫權等不軌執脫權鍛鍊其

獄連逮不已帝知其無辜欲釋之特命大赦而朔思監增
入條畫內獨不赦前獄惟老的沙逃入孛羅大軍中餘
皆貶死耶先忽都當貶撒思嘉之地道由朵思麻行宣政
院使桓州間素受知其父太平因留居其地執政奏其違
命杖死之年四十四有詩集十卷舊史大不花劉哈刺
不花各專傳今併入
論曰太平相業始終盡美盡善無可議者國運凌夷官闈
內梗非天意非人力惟陽翟王阿魯輝兵逼上都京師戒
嚴太子既以此爲死地而陷太平太平卽可以自陳歸美
朝廷威福與中宮東宮襄贊所致則勢必內召而兩宮之
憾亦可漸解何必避功不居而專居待罪之地卒使國家
有殺士之名而上下兩無益所謂德有餘而智不足者乎

元史卷四十二列傳

六

元史卷四十二終

元史卷四十三

列傳二十七

元末文臣

許有壬

許有壬字可用湯陰人讀書一目五行嘗閱衡州淨居院碑文近千言一覽輒背誦無遺延祐二年登進士第授同知遼州事會關中有警鄰州聽民出避棄嬰孩滿道有壬獨率弓箭手閉城堅守卒獲無虞州有追逮不用胥隸唯給信牌令里役呼之民不擾而事集州大治至治二年轉江南行臺監察御史行部廣東以貪墨劾罷廉訪副使二人至江西會廉訪使苗好謙監焚昏鈔檢視鈔者日至百餘人好謙恐有敝痛鞭之人畏罪率別真偽以迎其意管庫吏榜掠無全膚迄莫能償有壬覲視之率真物也遂

元史卷四十三 列傳

釋之凡勢官豪民虎而冠者悉禽治以法部內肅然召拜監察御史三年八月英宗暴崩於南坡賊臣鐵失遣使者自上京至封府庫收百官印有壬知事急即往告御史中丞董守庸守庸謂宮禁事非子所當問十月鐵失伏誅泰定帝發上都上都有壬即疏劾守庸及經歷多爾只班監察御史郭耶先忽都阿附鐵失之罪及帝至復奏鐵木迭爾之子瑣南與聞大逆乞賜典刑其兄弟勿令出入宮禁中書平章王毅右丞高昉橫羅奪爵四川行省平章趙世延受禍尤慘皆請雪冤復職繼上正始十事一輔翼太子宜先訓導二遴選長官宜先培養三通籍宮禁宜別貴賤四欲謹兵權宜削兼領五武備廢弛宜加修飭六賊臣妻妾宜禁勢官徵索七前赦權以止變宜再詔以正名八鐵木迭

爾諸子宜籍沒以懲惡九攷驗經費以減民賦十樽節浮費以紓國用帝多從之泰定元年改中書左司員外郎京畿餼有壬請發糧四十萬解濟之賴以活者甚眾國學舊法每以積分次第貢以出官執政用監丞張起巖議欲廢之而以推擇德行爲務有壬折之曰積分雖未盡善然可得博學能文之士若惟擇德行恐皆厚貌深情專意外飾或憊不能識丁矣議遂寢獲盜例有賞論者多疑其偽有淹滯四十餘年者羣訴於馬首有壬曰盜賊方熾求疵大甚緩急何以使人但經部使覈實者皆子官俄移左司郎中每遇公議有壬屢爭得失汛掃積滯幾無留牘都事宋本退語人曰此貞觀開元間議事也元統二年拜治書侍御史轉奎章閣學士院侍書學士仍治臺事俄拜中書參

元史卷四十三 列傳

政知經筵事至元初中書平章徹里帖木爾議罷科舉又欲損太廟四祭爲一祭監察御史呂思誠等列劾其罪狀帝不允詔徹里仍出署事時罷科舉詔已書而未用寶有壬入爭之太師柏顏曰舉子多以賂敗又有假蒙古色目名者有壬曰科舉未行之先臺臣賊罰無算豈盡出於舉子舉子不可謂無過較之於彼則少矣柏顏因曰舉子中可任用者惟參政耳有壬曰若張夢臣馬伯庸丁文苑之政事歐陽原功之文章皆可大用何謂無人柏顏曰科舉雖罷士之欲求美衣美食者果能自尙學豈有不至大官者邪有壬曰所謂士者初不以衣食爲事其事在治國平天下耳柏顏又曰今科舉取人實妨選法有壬曰古人有言立賢無方科舉取士豈不愈於通事知印等出身者今

通事天下凡三千三百二十五名歲餘四百五十六人王
典赤太醫控鶴皆入流品又路吏及任子其途非一今歲
自四月至七月白身補官受宣敕者七十二人而科舉一
歲僅三十餘人科舉於選法果相妨邪柏顏心然其言然
其議已定不可中輟乃為溫言慰解之翌日崇天門宣詔
特令有王為班首以折辱之有王懼及禍勉從命治書侍
御史普化請有王曰參政可謂過河折橋者矣有王以為
大恥遂移疾不出初徹里帖木爾之在江浙也會行科舉
驛請考官供張甚盛心頗不平故其入中書以罷科舉為
第一事先論學校貢士莊田租可給怯辭衣糧動當國者
以發其機至是遂論罷之徹里嘗指斥武宗為那壁那壁
者猶謂之彼也又嘗以妻弟阿魯渾沙女為己女冒請珠

元史卷四十三 列傳

三

袍等物於是臺臣復劾其罪而柏顏亦惡其忤已欲斥之
詔貶徹里於南安遂死貶所人皆快之長蘆韓公溥因家
藏兵器遂起大獄株連臺省多以賊敗獨無有王名由是
忌者益甚有壬度不可留遂歸彰德六年詔入中書參知
政事尋轉左丞至正二年襄加慶及李羅帖木爾獻議開
西山金口導渾河踰京城達通州以通漕運丞相脫脫主
之甚力有壬曰渾河之水湍悍易決足以為害淤淺易塞
不可行舟況地勢高下甚懸徒勞民費財耳不聽後卒如
所言南臺監察御史木八刺沙緣睚眦有壬兄弟有壬遂
沙日立東岡書院沽名並構浮詞誣讒有壬兄弟有壬遂
稱病歸七年夏授御史中丞未幾復乞病十二年盜起河
南聲撼河朔間有壬畫備禦策十五條以授郡將民藉以

安十三年起拜河南行省左丞朝廷遣將出征環河南境
連營以百數一切芻餉皆仰給之有壬從容集事若平時
然十五年拜中書左丞力言朝廷務行姑息之政賞重罰
輕故將士貪掠子女玉帛無鬪志動倡招降之策轉集賢
大學士兼太子左諭德一日入見太子方臂鷲禽為樂遽
呼左右屏去十七年以老病力乞致仕卒年七十有八有
壬歷事七朝垂五十年當權臣恣睢時稍忤意輒誅竄隨
之有壬錚錚力辨不少屈所著有至正集若干卷諡文忠

蘇天爵

蘇天爵字伯修真定人父志道歷官嶺北行省郎中和林
大饑救荒有惠政天爵由國子學生試第一授大都路薊
州判官至順二年擢翰林修撰遷江南行臺監察御史明

元史卷四十三 列傳

四

年慮囚湖北湖北地僻遠民獠雜居天爵冒瘴毒徧歷其
地雖盛暑猶夜篝燈治文書屢平反疑獄詳黃潛所撰
蘇御史治獄記
元統元年入為監察御史在官四閱月章疏凡四十五上
自君身至朝廷政令稽古禮文閭閻幽隱其關大體繫得
失者知無不言所劾者五人所薦舉者百有九人明年預
修文宗實錄遷翰林待制尋除中書右司都事兼經筵參
贊官後至元五年出為淮東道廉訪使憲綱大振六年改
吏部尚書參議中書省事是時朝廷更立宰相庶務多所
弛張天爵夙夜謀畫須髮盡白至正四年拜集賢侍講學
士兼國子祭酒自以起自諸生進為師長端己悉心以範
學者五年出為山東道廉訪使尋召還集賢充京畿奉使
宣撫究民所疾苦察吏之奸貪其興除者七百八十有三

一書 二升 續修四庫全書 2 反文內

事其糾劾者九百四十有九人都人有包韓之譽然以忤時相意竟坐不稱職罷歸七年天子察其誣乃復起拜江浙行省參政江浙財賦居天下十七事取煩劇天爵條分目別細鉅不遺九年召爲大都路都總管以疾歸俄復起爲兩浙都轉運使時鹽法敝甚天爵拯治有方所辦課爲鈔八十萬錠及期而足十二年妖賊自淮右蔓延及江東詔仍江浙行省參政總兵於饒信所克復者一路六縣其方略之密節制之嚴雖老師宿將不能過之然以憂深病積遂卒於軍其學博而知要長於紀載嘗著國朝名臣事略十五卷國朝文類七十卷又有詩彙七卷文彙二十卷時中原前輩凋謝殆盡天爵獨身任一代文獻之寄討論講辨雖老不倦晚歲復以釋經爲己任學者因其所居稱

元史卷四十三 列傳

五

爲滋溪先生其他所著文有松廳章疏五卷春風亭筆記二卷遺金紀年黃河原委未及脫藁云

王思誠

王思誠字致道兗州嶧陽人本農家子自力於學後從汝陽曹元用游學大進中至治元年進士第授管州判官召爲國子助教改翰林國史院編修官至正二年拜監察御史疏言京畿去秋不雨三冬無雪方春首月蝗生黃河水溢蓋不雨者陽之亢水涌者陰之盛也嘗聞一婦銜冤三年大旱往歲柏顏專擅威福讐殺不辜鄭王之獄燕鐵木爾宗黨死者不可勝數非直一婦之冤而已豈不感傷和氣邪宜雪其罪敕有司行禱百神陳牲幣祭河伯發卒塞其缺被災之家死者給葬具庶幾召陰陽之和消水旱之

變此應天以實不以文也行部至檀州首言采金鐵冶提舉司設司獄掌囚之應徒配者鈇趾以春金鑛舊嘗給衣食天麻以來水壞金冶因罷其給醬草飲水死者三十餘人瀕死者又數人夫罪不至死乃拘囚至於饑死不若加杖而使速死之愈也況州縣俱無囚糧輕重囚不決者多死獄中獄吏妄報其病月日用藥次第請定瘐死多寡罪著爲令又言至元十六年開垣河設垣夫戶八千三百七十有七車戶五千有七十出車三百九十兩船戶九百五十出船百九十艘垣夫累歲逃亡十損四五而運糧之數十增八九船止六十八艘戶止七百六十有一車之存者二百六十七兩戶之存者二千七百五十有五晝夜奔馳猶不能給垣夫戶之存者千八百三十有二一夫日運四

元史卷四十三 列傳

六

百餘石肩背成瘡顛顛如鬼甚可哀也河南湖廣等處打捕鷹房府打捕戶尙玉等萬三千二百二十五戶阿難答百姓劉德元等二千三百戶可以簽補使勞逸相資又言燕南山東密邇京師比歲饑饉羣盜縱橫巡尉弓兵與提調捕盜官會鄰境以討之賊南則會於北賊西則會於東及與賊會望風先遁請立法嚴禁之又言初開海道置海仙鶴哨船四十餘艘往來警邏今敝船十數止於劉家港口以捕盜爲名實不出海以致寇賊猖獗宜卽萊州洋等處分兵嚴守不令泊船島嶼禁鎮民與梢水爲婚有能捕賊者以船界之獲賊首者賞以官仍移江浙河南行省列戍江海諸口以詰海商還者審非寇賊始令泊船下年糧

幾海道寧息朝廷多是其議僉河南山西道廉訪司事行部武鄉縣監縣來遼思誠私語吏屬曰此必賊吏未幾果有愬於道者問曰得無訴監縣放汝馬乎曰然監縣抵罪吏屬問思誠先知之故曰衣敝衣乘駿馬非詐而何陝西行臺言欲疏鑿黃河三門立水陸站以達於關陝移贖思誠會陝豫省憲臣及郡縣長吏往視之皆畏勞憚險欲以虛辭復命思誠怒曰吾屬自欺何以責人何以對朝廷吾當躬詣其地眾惶恐從之河中灘磧百餘里礁石錯出路窮舍騎徒行攀藤葛以進眾皆喘汗凡三十里度其不可乃作詩歷敘其險執政采之遂寢其議召修遼金宋三史調國子監司業遷兵部侍郎丁內憂朝廷行內外通調法選郡縣守令起思誠河間路總管磁河水頻溢決真定境

元史卷四十三 列傳 七

召其邑吏責懲之遂集民丁作堤晝夜督工葺月而塞復築夾堤於外互十餘里命瀕河民及弓手列置草舍於上擊木以防盜決是年民獲耕藝歲用大稔乃募民運碎甃治郭外行道高五尺廣倍之往來者無泥塗之病初南皮民嘗瀕御河種柳輸課於官名曰柳課後河決柳俱沒官猶徵之凡十餘年其子孫益貧不能償思誠連請於朝除之郡庭生嘉禾三本一本九莖一本十六莖一本十三莖莖五六穗僚屬欲上進思誠曰吾嘗惡人行異政沽美名乃止所轄景州廣川鎮漢董仲舒之里也河間尊福鄉博士毛萇舊居也皆請建書院設山長員召拜禮部尚書以集賢侍講學士兼國子祭酒應詔言事曰置行省丞相以專方面寬內郡徵輸以固根本汰冗兵以省糧運改祿秩

以養官廉罷行兵馬司以便詰捕復倚郭縣以正紀綱設常選以起淹滯尋出為陝西行臺治書侍御史辭以老病不允十七年春紅巾賊陷商州奪七盤進據藍田縣距奉元一舍思誠會豫王及省院官於安西王月魯帖木爾邸眾洶懼無言思誠曰陝西重地天下之重輕繫焉察罕帖木爾河南名將賊素畏之宜遣使求援此上策也成將嫉客兵軋已論久不決思誠曰吾兵弱旦夕失守咎將安歸乃移書察罕曰河南為京師門戶陝西為內郡藩籬兩省相望互為唇齒陝西危則河南豈能獨安察罕新復陝州得書大喜曰先生真有為國為民之心吾寧負越境擅發之罪遂提輕兵五千倍道來援思誠犒軍於鳳皇山還定守禦九事夜宿臺中未嘗解衣同官潛送妻子過渭北思

元史卷四十三 列傳 八

誠止之分守北門其屬聞事急欲圖苟免思誠從容諭之曰諸君畏死乎自古皆有死在遲與速耳既而援兵破賊河南總兵官果以察罕擅調遣人問之思誠亟請於朝立命察罕專守關陝仍令便宜行事詔從之俄起五省餘丁軍思誠爭曰關中方用兵困於供給民多愁怨復有是役萬一為變所繫非輕事遂寢尋召為國子祭酒卒於旅舍年六十有七諡獻肅

李好文

李好文字惟中大名之東明人登至治元年進士第授大名路濟州判入為翰林國史院編修官國子助教泰定四年除太常博士會盜竊太廟神主好文言在禮神主當以木為之金玉祭器宜貯別室又言祖宗建國以來每遇

大禮皆臨時取具博士不過循故事應答而已往年有詔集禮乃令各省各郡縣置局纂修宜其久不成也禮樂自朝廷出郡縣何有哉白長院者選僚屬數人仍請出架閣文牘以資采錄三年書成凡五十卷名曰太常集禮拜監察御史時復以至元紀元好文言年號襲舊於古未聞襲其名而不蹈其實未見其益因言時政不如至元者十餘事錄囚河東有李拜者殺人而行兇之杖不明凡十四年不決好文立出之王傅撒都刺以足踹人而死眾皆曰殺人非刃當杖之好文曰怙勢殺人甚於用刃況因有所求而殺之其情尤重乃置之死河東爲之震肅六年帝享太室召僉太常禮儀院事至正元年除國子祭酒三年郊祀召爲同知太常禮儀院事帝之親祀也至寧宗室遣阿魯

元史卷四十三 列傳

九

問曰兄拜弟可乎好文與博士劉聞對曰爲人後者爲之子也帝遂拜由是每親祀必命好文攝禮儀使四年除江南行臺治書侍御史未行改禮部尙書與修遼金宋史除治書侍御史仍與史事俄除參議中書省事視事十日以史故仍爲治書已而復除陝西行臺治書侍御史時臺臣皆缺好文獨署臺事西蜀奉使以私憾摭拾廉訪使曾文博僉事兀馬爾王武事文博死兀馬爾誣服武不屈以輕侮抵罪好文曰奉使代天子行事當問民疾苦黜陟邪正今行省以下至於郡縣未聞舉劾一人獨風憲之司無一免者此豈正大之體乎率御史力辨武等之枉并言奉使不法者十餘事九年召爲太常禮儀院使帝以皇太子年漸長開端本堂命太子入學以右丞相脫脫大司徒雅不

花知端本堂事而命好文以翰林學士兼論德好文上書宰相力辭帝不允好文取孝經大學論語孟子中庸摘釋要略又取史傳及先儒論說有關治體者加以所見爲書十一卷名曰端本堂經訓要義奉表以進詔付端本堂令太子習焉好文又集歷代帝王故事總百有六篇以爲太子問安餘暇之助又取古史自三皇迄金宋歷代授受國祚長短治亂興廢爲書曰大寶錄又取前代帝王是非善惡所當法戒者爲書名曰大寶龜鑑皆錄以進久之遷翰林學士承旨十六年復上書皇太子請以所進諸書參以貞觀政要大學衍義等篇一一推行之則萬幾之政太平之治不難致太子深嘉納之後屢引年乞致仕

李朮魯朮 子遠

元史卷四十三 列傳

十

李朮魯朮字子遠其先隆安人金泰和間定女真姓氏屬聖廣平祖德從憲宗南征因家鄧之順陽以功封南陽郡侯父居謙辟掾江西以家自隨生朮贛江舟中釜鳴者三人以爲異朮稍長卽勤學從新喻蕭克翁學蕭故宋大家也隱居教授學行爲州里所敬嘗夜夢大鳥止其居翼覆軒外驚出視之冲天去明日朮至蕭奇之爲易今名字以符夢後復從京兆蕭蚪游攻苦食淡學益宏肆翰林學士承旨姚燧尤稱賞其文於是蚪妻以女大德十一年用薦授襄陽縣儒學教諭至大四年授翰林國史院編修官延祐五年拜監察御史時英宗爲皇太子未出閣朮言宜擇正人以輔導帝嘉納之尋劾奏中書參議元明善帝初怒不納明日乃命改明善他官而傳旨慰諭朮巡按遼陽有

旨給弓矢環刀後因為定制還往淮東覈憲司官聲跡淮東憲臣惟尙刑多置獄具种曰國家所以立風紀蓋將肅清天下初不尙刑也取其獄具焚之時有旨凡以吏進者例降二等從七品以上不得用种言科舉未立人才多以吏進若一概屈抑恐未足持天下之平請吏進者止於五品許之因著為令時相鐵木迭爾專以刑戮復私憾种因避去及拜住為左相以翰林修撰起之兼領國子監种強為起拜住謂之曰爾可為相否种對曰宰相固不敢當然終日所學宰相事也夫為宰相者必福德才量四者皆備乃可勝任拜住以酒觴种曰非公不聞此言迎駕至行在所种入見帝賜之坐遷右司員外郎奉旨預修大元通制泰定元年遷國子司業明年出為河南行省左右司郎中

元史卷四十三 列傳

七

三年擢燕南河北道廉訪使又纂修太常集禮書成而未上有旨命种兼經筵官文宗之入也大臣問以典故种所建白近漢文故事眾皆是之文宗嘗字之而不名命與平章政事溫迪罕等十人商論大事曰夕備顧問宿直東廡下文宗祀天地社稷宗廟竣進天麻大慶詩三章從幸上都嘗奉敕撰碑文稱旨遷集賢直學士兼國子祭酒种以古者教育有業退必有居舊制弟子員初入學以羔羊贄种命搏集之得錢二萬緡有奇作屋四區以居學者諸生積分有六年未釋褐者皆試而官之帝師至京師詔朝臣一品以下皆郊迎大臣俯伏進觴帝師不為動惟种舉觴立進曰帝師釋迦之徒天下僧人師也余孔子之徒天下諸人師也請各不為禮帝師笑而起舉觴卒飲眾為慄然

奎章閣偶缺大學士員近臣乘間以某官為言文宗怒曰女何不言馬伯庸魯子輩而以斯人為言乎文宗崩順帝既即位大臣以為赦不可頻行种曰今上以聖子神孫入繼大統當新天下耳目豈可收怨於新造之君邪議乃定遷禮部尙書丞相柏顏將封秦王事下吏部議种曰秦大國也非宗王不可今丞相食邑高郵高郵邑名秦淮非秦地也宜以淮易之眾不敢忤柏顏卒封於秦然皆壯种之直至元四年卒年六十贈南陽郡公諡文靖种狀貌魁梧不妄言笑而記問淹博文章簡奧久居國學論者謂自許衡之後能立師道者惟耶律有尙及种而已有菊潭集六十卷太常因革禮七十五卷子遠字朋道以廩調祕書郎轉襄陽縣尹需次居南陽賊起遠傾財募丁壯千餘拒戰死遠妻雷亦罵賊死舉家皆被害种之沒也蘇天爵碑其

元史卷四十三 列傳

七

神道見滋溪文彙

呂思誠

崔敬 貢師泰 亦憐真班 達禮麻識理

呂思誠字仲實平定州人擢泰定元年進士第授同知遼州事未赴丁內艱改景州舊縣尹差民戶為三等均其徭役每歲春行田樹畜勤敏者賞以農器地無遺力民多復業印識文簿界社長藏之季月報縣不孝弟不事生業者悉書之罰其輸作胥吏至社者何人用飲食若干多者責償其直豪猾者竄名職田戶思誠祛其蔽天麻兵興豫貸鈔於富民令下造軍器事皆先集民用不擾於後得官價亟以還民有罷彝者自其祖父因河南亂被掠為人奴歲納丁粟以免作思誠知彝力學召其主贖為良民他日買

羊劉智社民有愬其弟匿羊者思誠叱退之訪知王青兒弟四人友愛親至其家取酒勸酬惟同骨月前告羊者兄弟各相責悔過復還同餐鎮民張復叔母孀居且誓旬食以活恐思誠聞之即日迎養天旱道士持青蛇曰盧師谷小青謂龍也禱之即雨思誠殺蛇逐道士雨亦隨至遂有年毀縣中淫祠百餘惟存江都相董仲舒祠入爲翰林國史院編修文宗在奎章閣取閱國史左右昇輿以往院長貳無敢言思誠在末僚獨跪閣下爭曰國史紀當代人君得失自古天子不親閱國史事遂寢尋擢國子監丞遷司業拜監察御史與幹玉倫徒等劾中書平章徹里帖木爾變亂朝政章上留中不下思誠納印綬殿前遂出僉廣西廉訪司事巡行郡縣土官有于元帥者恃勢魚肉人恐事

元史卷四十三 列傳

三

覺陰遣其子返思誠於道思誠縛之悉發其陰私痛懲其罪一道震肅移浙西達識時爲南臺御史大夫與江浙省臣有隙嗾思誠劾之思誠曰吾爲天子耳目不爲臺臣鷹犬已而劾行省平章左吉貪墨流之海南復召爲國子司業遷中書左司員外郎盜殺河南省臣以僞檄呼廉訪使段輔入行省事及事敗誣誤者三十餘人將實於法思誠言於朝皆釋之屢遷侍御史劾平章政事鞏卜班不法忤御史大夫耶先帖木爾即謁告未幾召爲集賢侍講學士兼國子祭酒出爲湖廣行省參政諸生抗疏留之不可屢遷中書左丞御史大夫納麟誣參政孔思立受賕事或欲連中思誠納麟曰呂左丞素有廉聲難以及之遂止拜集賢學士仍兼國子祭酒吏部尙書契哲篤左司都事武祿

等建言更鈔法以楮幣一貫省權銅錢千文爲母而錢爲子命廷臣集議思誠曰中統至元自有母子料爲母下料爲子譬之蒙古人以漢人子爲後皆人類也尙終爲漢人之子豈有故紙爲父而立銅爲子者乎一座咸笑思誠又曰錢鈔用法見爲一致以虛換實也今歷代錢至正錢中統鈔至元鈔交鈔分爲五項慮下民知之藏其實而棄其虛恐不利於國家也契哲篤曰至元鈔多僞故更之爾思誠曰至元鈔非僞人爲僞爾交鈔若出亦多爲僞者矣且至元鈔猶故戚也家之僮奴且識之交鈔猶新戚也雖不敢不親人未識也其僞反滋多況祖宗成憲豈可輕改哉契哲篤曰錢鈔兼行何如思誠曰錢鈔兼行輕重不倫何者爲母何者爲子汝不通古今道聽塗說何足行也契

元史卷四十三 列傳

古

哲篤忿曰我等策既不可行公有何策思誠曰有世祖至元舊章在丞相脫脫見思誠言狐疑未決已而監察御史承望風旨劾思誠狂妄左遷湖廣行省左丞時武昌失守思誠抵武昌城下語諸將曰賊據城與諸君相持久必不知吾來出其不意可以入城遂行諸將不獲已隨其後賊倉卒無備盡驚走竟不煩轉鬪而入思誠乃大會軍民官吏告之曰賊去示吾弱也規將復來於是申號令戒職事修器械葺城郭明部伍先謀自守徐議出征苗軍暴橫侵辱省憲思誠正色叱之曰若等能殺呂左丞乎自是無敢復至曾未數日召還復爲中書左丞思誠去二日城復陷移大司農俄得疾以至正十七年卒思誠二爲祭酒一法許衡之舊所教諸生後多爲名士有文集若干卷兩漢通

紀若干卷諡忠肅

崔敬字伯恭大寧惠州人通刑名法律之學辟書吏用累考及格授刑部主事拜監察御史至元六年既毀文宗廟主削文宗后皇太后之號徙東安州皇弟燕帖古思文宗子也又放之高麗敬上疏曰文皇獲不軌之愆已徹廟祀叔母有階禍之罪亦削洪名盡孝正名斯亦足矣惟念皇弟燕帖古思太子年方在幼罹此播遷天理人情有所不忍明皇當上賓之日太子在襁褓尙未有知義當矜憫蓋武宗視明文二帝皆親子也陛下與太子皆嫡孫也以武皇之心爲心則皆子孫固無親疏常人有百金之產尙置義田教育宗族不使失所況皇上貴爲天子富有四海子育黎元當使一夫一婦無不得其所今乃以同氣之人置

元史卷四十三 列傳 五

之度外不適足貽笑邊邦取辱外國乎不報又疏諫天子巡幸上都宜御內殿其略曰世祖以上都爲清暑之地車駕行幸歲以爲常閣有大安殿有鴻禧睿思所以保養聖躬適起居之宜存敬畏之心也今失刺行在帳殿乃先皇所以備宴游非常時臨御之所陛下以孝治天下屢降德音祇行宗廟親祀之禮而國家多故天道變更臣願大駕還大內居深宮嚴宿衛與宰臣謀治道萬幾之暇則命經筵進講究古今盛衰以緝熙聖學庶宗社之福時帝數以歷代珍寶分賜近侍敬又言臣聞世皇時大臣有功所賜不過榮革重惜天物爲後世慮至遠也今山東大饑燕南亢旱海潮爲災天象示儆地道失密京畿南北蝗飛蔽天正當聖主恤民之日近侍之臣不知慮此奏稟承請殆

無虛日甚至以府庫百年所積之寶物徧賜僕御闈寺之流乳稚童孩之子帑藏或空萬一國有大事人有大功又將何以行賞乎乞追回所賜以示恩不可濫庶允公論是年出僉山北廉訪司事按部全寧獄有李秀以坐造僞鈔連數十人而皆與秀不相識敬疑而讞之知秀實郵落童子師以捶楚誣服其造僞鈔者乃大同王濁十餘年事不白移文至大同果得王濁正其辜至正初遷河南又遷江東所至抑豪強惠下窮洗冤滯興學勸農十一年遷同知大都路總管府事直沽河淤數年中書省委敬浚治之給鈔數萬錠募工萬人不三月告成咸服其能十五年以兵部尙書兼濟寧軍民屯田使朝廷給鈔十萬錠散於有司招致居民軍士立營屯種歲收粟百萬斛以給邊防居歲

元史卷四十三 列傳 五

餘其法井井十七年召爲大司農少卿遂拜中書參政盜據齊魯敬與平章政事荅蘭參政俺普討之因與俺普密議曰我軍強且勝彼將敗而降如得仗義之士抵其巢穴而招安之亦方面之幸也選國子生王恪等往鄆城見李秉彝田豐等諭以逆順禍福皆悔過自新山東郡邑皆復敬以軍馬供食浩繁民力日疲乃請行納粟補官之令詔從之河北燕南士民踵至積粟百萬石綺段萬匹以給軍費民獲少蘇除山東行樞密院副使卒諡忠敏又遷魯曾者修武人爲太常博士議武宗廟后主配享事已見后妃傳中舊史專傳今不錄
貢師泰字泰甫寧國宣城人父奎以文學名家延祐至治間累官集賢直學士卒諡文靖師泰早肄業國子學泰定

四年釋褐出身授大和州判官除紹興路總管府推官郡有疑獄悉爲讞決山陰白洋港有大船飄近岸史甲二十人適取鹵海濱見其無主因取其篙櫓船中有二死人有徐乙者因誣史等所劫竝連史所傭富民高丙師泰密詢之則里中沈丁載物抵杭而回因竊網中魚爲漁者所殺史高皆弗知情其冤乃白游徼徐裕以巡鹽爲名肆暴郵落間一日遇諸暨商奪其所齎錢撲殺之投尸於水走告縣曰我獲私鹽犯人畏罪赴水死官驗視有傷旋以疑獄釋師泰追詢覆案之具得裕所以殺人狀復俾待報餘姚孫國寶以求盜獲姚甲造偽鈔受賕而釋之執高乙魯丙赴有司誣以同造魯與高未嘗相識也師泰疑窮詰之辭屈而情見卽釋魯高而處姚孫以死治行爲諸郡第一考

元史卷四十三 列傳

七

滿復入翰林爲應奉預修后妃功臣列傳事畢屢遷監察御史自世祖以後省臺不用南人及是始復舊制南士復得居省臺自師泰始至正十四年除吏部侍郎時江淮兵起京師食不足師泰奉命和糴於浙右得糧百萬石以給京師遷兵部侍郎朝廷以京師至上都驛戶凋弊命師泰巡視整飭之驗貧富均徭役數十郡賴以稍蘇豪貴深嫉之莫能中傷也十五年授平江路總管甫視事張士誠自高郵率眾渡江直抵城下攻圍甚急明年春守將弗能支斬關遁去師泰領義兵出戰力不敵亦懷印綬棄城遁匿海濱士誠既納降江浙行省丞相達識以便宣授師泰兩浙都轉運鹽使剔其積蠹通其利源國用資之除江浙行省參政二十年除戶部尚書分部閩中以閩鹽易糧由海

道轉運給京師凡爲糧數十萬石二十二年召爲祕書卿卒師泰以文字知名而尤長政事所至績效輒著尤喜接引後進士翕然歸之有詩文若干卷行於世

亦憐眞班西夏人父俺伯一作暗伯以忠勤事世祖爲知樞密院事亦憐眞班性剛正動有禮法仁宗召見令人宿衛至順初爲翰林學士承旨元統至元之間柏顏爲丞相專權擅政嫉其論事不阿出爲江南行臺御史大夫尋殺其子荅里麻而謫置海南及柏顏敗乃得召還朝至正六年拜御史大夫盡選中外廉能之官置諸風憲一時號稱得人遷宣政院使出爲甘肅行省平章設法弭西羌之寇民立石頌之召還知樞密院事復爲御史大夫知經筵事嘗奏言風俗人心日趨於薄請禁故吏不許彈劾所事官長太

元史卷四十三 列傳

六

師馬札爾台與子丞相脫脫既謫居在外時相欲傾之喉人告變且扳臺臣同上奏亦憐眞班終不從監察御史劾奏時相帝不聽亦憐眞班反復論奏不已由是忤上意出爲江浙行省平章遷湖廣行省左丞相復召知樞密院事十一年穎毫兵起朝廷命將出師多失律致敗數進言於時相不見聽復出爲江浙行省左丞相十二年移江西於是妖賊由蘄黃陷饒州饒之屬邑安仁與龍興接壤其民皆相挺爲亂亦憐眞班道出安仁因駐兵招之來者厚加賞賚不從者命子哈藍多爾只與江西左丞火尼赤等乘高縱火攻散之餘千久爲盜區亦聞風順服先是江西行省平章道童以寬容爲政軍民懈弛亦憐眞班既至風采一新威聲大振十四年八月卒封齊王諡忠獻

達禮麻識理字遵道怯烈台氏至正五年選充經筵譯史十五年拜監察御史歷遷上都留守兼開平府尹時孛羅帖木爾擁兵京師皇太子奔冀寧孛羅命其黨集兵至上都以守禦為名達禮麻識理密請糾集外兵一日布列鐵斡竿山下揚言四方勤王師至其黨大駭乘夜東走達禮麻識理增修武備城守益嚴未幾圖堅帖木爾用孛羅命以兵犯上都鐵甲馬步軍蔽野至呼聲動天達禮麻識理飭軍士城守申明逆順以安人心巡視晝夜不息及孛羅伏誅圖堅奔潰上都以安累除知樞密院大撫軍院事初大撫軍院之立也太子用完者帖木爾等計專以備禦擴廓既而政權不一事務益乖各復引去及達禮麻識理之至事且無可為者未幾遂卒先一夕有怯薛官哈刺章者

元史卷四十三 列傳 九

丞相阿魯圖孫也夜夢太祖召見語之曰我以勤勞取天下傳於安歡帖睦爾而愛猷識理達臘不克肖似廢壞我家法苟不即改圖天命不可保矣爾本功臣之後且誠實故召與語明且即亟以我言告爾主若不以告吾殛汝告而不改則吾他有以處之達禮麻識理其人庶幾識事宜者然知而不言將焉用之吾其先殛之矣明日入見帝具以夢告帝令告皇太子比出則達禮麻識理已無疾而卒

元史卷四十二終

元史卷四十四

列傳二十八

元末言臣

陳祖仁 王遜志 李稷 歸陽

陳祖仁字子山汴梁人至正元年以春秋中河南鄉貢明年賜進士及第授翰林修撰同知制誥兼國史院編修官屢遷翰林侍講學士除參議中書省事二十年五月帝欲修上都宮闕祖仁上疏言上都宮闕自先帝修於累朝白經兵火焚燬殆盡所不忍言然今四海未靖瘡痍未瘳倉庫告虛財用將竭乃欲驅疲民以供大役廢其耕耨而荒其田畝何異扼其吭而奪之食以速其斃乎陛下追惟祖宗宮闕念茲在茲然不思今日所當興復乃有大於此者假令上都宮闕未復固無妨於陛下之寢處使因是而

元史卷四十四 列傳 一

違天道失人心或致大業之墮廢則夫天下者亦祖宗之天下生民者亦祖宗之生民願陛下以生養民力為本以恢復天下為務信賞必罰親正遠邪以圖謀治道使承平之觀不日咸復詎止上都宮闕已乎疏奏帝嘉納之二十三年十二月拜治書侍御史時宦者資正使朴不花與宣政使蒙驪內恃皇太子外結丞相朔思監驕恣不法監察御史傅公讓上章暴其過忤皇太子意左遷它御史連章論諫皆外除祖仁上書皇太子言御史糾劾蒙驪朴不花姦邪等事此非御史之私言乃天下之公論殿下未賜詳察輒加擯斥使姦臣蠹政之情不得達於君父夫天下者祖宗之所統馭臺諫者祖宗之所建立奈何以二豎之微而不恤天下之重且殿下職分止於監國撫軍問安視膳

而已此外予奪賞罰之權自在君父今方毓德春宮而使諫臣結舌凶人肆志豈惟君父徒擁虛器天下蒼生亦將奚望書上皇太子怒令御史大夫老的沙諭祖仁謂臺臣所劾臺驩等俱無是事御史糾言不實已與美除昔裕宗爲皇太子兼中書令樞密使凡軍國重事合奏聞者乃許上聞非獨我今日如是也祖仁乃復上書言御史所劾得於田野之間殿下所詢不出宮牆之外所以全此二人者止緣不見其姦昔唐德宗云人言盧杞姦邪朕殊不覺今此二人姦邪舉朝知之天下知之獨殿下未知耳且裕宗既領軍國重事理宜先閱其綱若至臺諫封章自是御前開折假使必皆由東宮君父或有差失諫臣有言太子將使之聞奏乎不使之聞奏乎使之聞奏則傷其父心不使

元史卷四十四 列傳

二

聞奏則陷父於惡殿下將安所處如知此說則今日糾劾之章不宐阻矣御史不宐斥其人而美其除不知御史所言爲天下國家乎爲一身爵祿乎斥者去來者言言者無窮而美除有限殿下又安所處祖仁書既再上即辭職而御史下至吏卒皆請閑於是皇太子以其事聞朴不花臺驩乃皆辭退帝令老的沙傳諭祖仁等祖仁復上疏曰祖宗以天下傳之陛下今乃壞亂不可救藥雖曰天運使然亦陛下刑賞不明所致也且區區二豎猶不能除況於大者願陛下俯從臺諫之言擯斥此二人不令其以辭退爲名使海內皆知陛下信賞必罰自二人始則將士孰不效力天下可全以還祖宗若猶優柔不斷臣寧有餓死於家誓不與之同朝牽聯及禍疏奏帝大怒而是時侍御

史李國鳳亦疏言二人當斥於是臺臣自老的沙以下皆左遷而祖仁出爲甘肅行省參政時天極寒衣單甚以弱女託於其友朱毅即日就道明年七月李羅帖木爾入中書爲丞相除祖仁山北道廉訪使召拜國子祭酒遷樞密副使累上疏言軍政利害不報辭職除翰林學士遂拜中書參政時天下亂已甚而祖仁性剛直遇事與時宰論議數不合乃仍還翰林學士二十七年明兵已取山東而朝廷方疑擴廓不臣專立撫軍院總兵馬以備之祖仁乃與翰林學士承旨王時待制黃得編修黃肅伏闕上書言近者南軍侵略全齊不踰月而逼畿甸朝廷雖命丞相耶速出師軍馬數少勢力孤危而中原諸軍左牽右掣調度失宐京城四面茫無屏蔽宗社安危正在今日臣愚等以爲

元史卷四十四 列傳

三

馭天下之勢當論其輕重強弱遠近先後不宐膠於一偏狃於故轍前日南軍僻在一方面而擴廓近在肘腋勢將竊持國柄故宐先於致討今擴廓勢已窮蹙而南軍突至將不利於宗社則在先於救難當此時宐改弦更張而撫軍諸官亦不可不以公天下爲心審時制宜今擴廓黨與離散豈能復振若止分撥一軍逼襲必就禽獲其餘彼中見調一應軍馬令其倍道東行勤王赴難與耶速等聲勢相援仍遣重臣分道宣諭催督庶幾有濟如復膠於前說動以言者爲擴廓游說而鉗天下之口不幸猝有意外之變朝廷亦不得聞而天下事去矣不報祖仁又上書皇太子言近日降詔削河南軍馬之權不知此項軍馬終爲南軍所忌設使其有悖逆之心朝廷以忠臣待之其心媿沮將

何所施况聞擴廓屢上書疏自明是其心未絕於朝廷以待朝廷之開悟當今之計不過戰守遷三事以言乎戰則資其犄角之勢以言乎守則望其勤王之師以言乎遷則假其藩衛之力極力勉厲趣行猶恐遲晚豈可使數萬之師棄置一方當此危急存亡之秋萬一有唐玄宗倉卒之變則是以祖宗百年之宗社委而棄之此時雖欲碎首般身何濟於事故今不復避忌惟以宗社存亡為重奉疏以聞亦不報二十八年秋明兵進壓近郊命祖仁及同僉太常禮儀院事王遜志等載太廟神主從皇太子北行祖仁奏言天子有大事出則載主以行從皇太子非禮也還守太廟以俟命俄而帝北奔祖仁守神主不果從八月二日京城破將出健德門為亂軍所害時年五十五祖仁一目

元史卷四十四 列傳

四

眇貌寢身短瘠而語音清亮議論偉然不可犯文簡質詩清麗世多稱傳之

王遜志字文敏惲之曾孫也以廕授侍儀司通事舍人屢遷監察御史劾詹事不蘭奚平章宜童皆逆臣子孫當屏諸遐裔旋僉太常禮儀院事京城不守公卿爭出降遜志獨家居衣冠而坐其友中政院判官王翼來說降遜志艱然斥之自投井死

李稷字孟幽滕州人幼穎敏八歲能記誦經史從父官袁州師夏鎮又從官鉛山師方回孫鎮回孫皆名進士長於春秋稷兼得其傳中泰定四年進士第授淇州判官淇當要衝稷至能理其劇歲大饑告於朝堂發粟振之民獲以蘇游民尚安兒飲博亡賴稷疑其為非督弓兵禽之果盜

鄰邨王甲家財與其黨五人俱伏辜調海陵縣丞亦有能聲入為翰林國史院編修官擢御史臺照磨至正初出為江南行臺監察御史遷都事又入為監察御史劾奏閹宦高龍卜恃賴恩私侵撓朝政擅作威福交通時相請謁公行為國基禍乞加竄逐以正邦刑章上流高龍卜於征東又言御史封事須至御前開折以防壅蔽言事官須優加擢用以開諫諍之路殿中侍御史給事中起居注須任端人直士書百司奏請及帝所可否月達省臺付史館以備纂修之實承天護聖寺火有旨更作乃上言水旱相仍公私俱乏不宜妄興大役議遂寢會朝廷方注意守令因言下縣戶多從吏部銓注或非其才宜併歸省選茶鹽鐵課責備長吏動受刑詎何以臨民宜分委貳佐投下達魯花

元史卷四十四 列傳

五

赤蓋政害民宜為佐貳帝悉可其奏遷中書左司都事又四遷為戶部尚書十一年廷議以中原租稅不實將履畝起徵稷曰方今妖賊竊發民庶流亡此政一行是驅之為盜也相臣是之尋參議中書省事俄遷治書侍御史十二年從丞相脫脫出師征徐州徐既平謁告歸滕州遷會祖父以下十七喪序昭穆以葬救賜碑樹焉既而召為詹事丞除侍御史俄遷中書參政皇太子受冊攝大禮使遂除樞密副使帝躬祀郊廟攝太常少卿遷御史中丞二十四年出為陝西行臺中丞致仕卒封齊國公諡文穆歸賜字彥溫汴梁入至順元年進士授同知潁州事鉅奸擊強山東鹽司遣奏差至潁恃勢為不法賜執以下獄時州縣奉鹽司甚謹願指氣使輒奔走之賜獨不為屈轉大

都路儒學提舉未上至元五年十一月杞縣人范孟謀不軌詐爲詔使至河南省中殺平章月魯帖木爾左丞劫烈廉訪使完者不花總管撒里麻召官屬及去位者署而用之以段輔爲左丞使賜北守黃河口賜力拒不從賊怒繫於獄賜無懼色已而賊敗汗賊者皆獲罪賜獨免同里有吳炳者嘗以翰林待制徵不起賊呼炳司卯西麻炳不敢辭時人爲之語曰歸賜出角吳炳無光賜自此有名明年轉國子博士拜監察御史及入謝臺臣奏曰此卽河南抗賊者也帝曰好事卿宜數爲之賜以上尊已而辭官歸養親沐上至正五年除僉河南廉訪司事行部西京以法繩趙王府官屬之貪暴者王三遣使請不爲動宣寧縣有殺人者蔓引數十人一讞得其情盡釋之沁州民郭仲玉爲

元史卷四十四 列傳

六

人所殺有司以蒲察山兒當之賜察其誣蹤跡得殺人者山兒遂不死七年遷右司都事順江酋長樂孫求內附請立宣撫司及置郡縣二十三處賜曰古人有言鞭雖長不及馬腹果設郡縣有事不救則辜來附之意救之則罷中國而事外夷所謂獲虛名而受實禍也與左丞呂思誠抗辨甚力丞相太平問君策將焉出賜曰其酋長可授宣撫勿責其貢賦使者賜以金帛遣歸足矣卒從賜言京師苦寒有句詬丞相馬前丞相索皮服予之仍覈在官所藏皮服之數悉給貧民賜曰宰相當以廣濟天下爲心皮服能幾何而欲給之邪莫若錄寒饑者稍振之耳丞相悟而止雲南死可伐叛詔以元帥述律遵道往喻之未幾命平章政事亦都渾將兵討之事久無功二人上疏紛紜中書欲

罪述律賜曰一論之而一討之彼將何所適從然亦非使者之罪也湖廣行省左丞沙班卒其子沙的方爲中書掾請奔喪丞相以沙的有兄弟不許賜曰孝者人子之同情以其有兄弟而沮其請非以孝治天下也遂從之廣海獠賊入寇詔江浙行省參政多爾只丹將思播楊元帥軍以討之賜曰易軍而將不諧教令恐不能決勝若令楊就統其眾彼悅於恩命必能自效所謂以夷攻夷中國之利也帝不從後竟無功八年遷左司員外郎中書用賜言損河間餘鹽五萬引以裕民楮幣壅不行廷議出楮幣五百萬錠易銀寶內藏賜復持不可曰富商大賈盡易其鈔於私家小民何利哉六月遷參議樞密院事時方國珍未附詔多爾只丹討之一軍皆沒而多爾只丹被執將罪之賜曰

元史卷四十四 列傳

七

將之失利其罪固當然所部皆北方步騎不習水戰是驅之死地耳宜募海濱民善水性者禽之旣而國珍遣人從多爾只丹走京師請降賜曰國珍已敗我王師又拘我王臣今來非眞降也必討之以令四方時朝廷方事姑息卒從其請後果屢叛如賜言九年改禮部尙書會開端本堂皇太子就學召賜爲贊善未幾遷翰林直學士同修國史仍兼前職賜言師傅當與太子東西相向授書其屬亦以次列坐虛其中坐以待至尊臨幸不然則師道不立時羣臣言人人殊卒從賜議俄以疾辭帝遣左司郎中趙璉賜白金文綺不受初賜在上都時脫脫自甘州還且入相中書參議趙期頤員外郎李稷謁賜私第致脫脫之命屬草詔賜辭曰命相之詔當命詞臣視草今屬筆於賜恐累丞

相之賢也十年正月遷四川行省參政十二年除刑部尚書十五年再除刑部尚書凡三遷皆以疾辭十七年授集賢學士兼國子祭酒使者迫之賜與疾至京師臥於南城不起時海內多故賜上三策一振紀綱二選將材三審形勢疊疊數千言朝廷不能用十一月以集賢學士致仕二十七年卒年六十有三

張楨

烏古孫良楨

張楨字約中汴人元統元年進士授彰德路錄事辟河南行省掾累除中政院判官至正八年拜監察御史劾太尉阿乞刺欺罔之罪并言明里董阿耶里牙月魯不花皆陛下不共戴天之讐柏顏賊殺宗室嘉王鄰王十有二口稽之古法當伏門誅而其妻子兄弟尚仕於朝宜急誅竄別

元史卷四十四 列傳

八

怯不花阿附權奸亦宜遠貶今災異迭見盜賊蜂起海寇敢於要君閭帥敢於玩寇若不振舉恐有唐末藩鎮噬臍之禍不聽及毛貴陷山東上疏陳十禍根本之禍有六征討之禍有四歷數其敝一輕大臣二解權綱三事安逸四杜言路五離人心六濫刑獄此根本之禍也不慎調度不資羣策不明賞罰不擇將帥此征討之禍也其言事安逸之禍略曰臣伏見陛下以盛年入纂大統履艱難而登大寶因循治安不預防慮寬仁恭儉漸不如初今天下多事海內不寧天道變常民情難保是陛下警省之時戰兢惕厲之日也宜臥薪嘗膽奮發悔過思祖宗勗業之難而今日墜亡之易於是而修實德則可以答天意推至誠則可以回人心凡土木之勞聲色之好燕安鳩毒之戒皆宜痛

徹勇改有不盡者亦宜防微杜漸而禁於未然而陛下乃安焉處之如天下太平無事時此所謂根本之禍也其言不明賞罰之禍略曰臣伏見調兵六年初無紀律之法又無激勸之宜將帥因敗為功指虛為實大小相謾上下相依其性情不一而邀功求賞則同是以有覆軍之將殘民之將怯懦之將貪婪之將曾無懲戒所經之處鷄犬一空貨財俱盡及其面諛游說反以克復受賞今克復之地悉為荒墟河南提封三千餘里郡縣星羅碁布歲輸錢穀數百萬計而今所存者封丘延津登封偃師三四縣而已兩淮之北大河之南所在蕭條夫有土有人有財然後可望軍旅不乏餽餉不竭今寇敵已至之境固不忍言未至之處尤可寒心如此而望軍旅不乏餽餉不竭使天雨粟地

元史卷四十四 列傳

九

湧金朝夕存亡且不能保況以地方有限之費而供將帥無窮之欲哉其為自啟亂階亦已危矣陛下方且事佛求福飯僧消禍今天下殺人盈野而天壽節禁屠宰謂可求福福何自至哉願上之寇始結白蓮以佛法誘眾終飾威權以兵抗拒視其所向駸駸可畏其勢不至於亡吾社稷燼吾國家不止堂堂天朝不思靖亂而反為階亂其禍至慘其毒至深其關繫至大有識者為之扼腕有志者為之痛心此征討之禍也疏奏不省權臣惡其訐直二十一年除僉山南道廉訪司事至則劾中書參政耶先不花樞密院副使脫脫木爾治書侍御史奴魯弄權誤國之罪又不報方是時孛羅帖木爾駐兵大同察罕帖木爾駐兵洛陽而毛貴據山東勢逼京畿二將玩寇不進方以爭晉冀為

事構兵相攻互有勝負朝廷乃遣耶先不花脫脫木爾奴魯往解之既受命不前進楨又言其貪懦庸鄙苟懷自安無憂國致身之忠朝廷將使二將釋憾協心討賊此國之大事謂空風馳電走而乃迂回退憚枉道延安以西繞曲數千里遲遲而行使兩軍日夜構殺自相仇敵實此三人誤國所致空急殛之以救時危亦不報楨慨然曰天下事不可爲矣卽辭去居安邑山谷間結茅僅容膝有訪之者不復言時事但對之流涕而已二十四年李羅帖木爾犯闕皇太子出居冀寧奏除贊善又除翰林學士皆不起擴廓將輔皇太子入討李羅遣使傳皇太子旨賜以上尊且訪時事楨復書曰今燕趙齊魯之境大河內外長淮南北悉爲巨墟關陝之區所存無幾江左日思荐食上國湘漢

元史卷四十四 列傳

十

荆楚川蜀淫名僭號幸我有變利我多虞閣下國之右族三世二王得不思廉藹之於趙寇賈之於漢乎京師一殘假有不逞之徒崛起草澤借名義尊君父倡其說於天下閣下將何以處之守京師者能聚不能散禦外侮者能進不能退紛紛藉藉精神分志奪國家之事能不爲閣下憂乎請言其大要有三曰保君父扶社稷衛生靈而已衛出公據國至於不父其父趙有沙丘之變其臣成兌平之不可謂無功而後至於不君其君唐肅宗流播之中忱於那謀遂成靈武之篡千載下雖有智辨百出不能爲雪嗚呼是豈可以不鑒之乎且吾聞之天之所廢不驟也驟其得志肆其寵樂使忘其覺悟之心非安之也厚其毒而降之罰也天遂其欲民厭其汰而鬼神弗福也其能久乎閣下覽

觀焉謀出於萬全則善矣詢之輿議急則其變不測徐則其變必起通其往來之使達其上下之情得其情則得其策矣孔子曰君君臣臣父父子子今九重在上者如寄青宮在下者如寄生民之憂國家之憂也可不深思而熟計之哉擴廓深納其說是用事克有成後三年卒

烏古孫良楨字翰卿世次見父澤傳至治二年蔭補江陰州判官調婺州武義縣尹有惠政改漳州路推官屢平反疑獄上言律徒者不杖今杖而又徒非恤刑意宜加徒減杖遂定爲令屢遷陝西行臺監察御史劾遼陽行省左丞相荅失帖木爾賈國不忠援漢高帝斬丁公故事以明人臣大義并劾御史中丞胡居祐奸邪皆罷之中外震懾疏言天祿數年間紀綱大壞元氣傷夷天祐聖明入膺大統

元史卷四十四 列傳

十一

而西宮秉政奸臣弄權奇憾十有餘年天威一怒陰晦開明以正大名以章大孝此誠兢兢業業祈天永命之秋其要在乎敬身修德而已今經筵多領以職事臣數日一進講不踰數刻已罷而替御小臣恆侍左右何益於盛德哉臣願延儒臣寘禁密常以唐虞三代之道啟沃宸衷日新其德實萬世無疆之福又以蒙古舊俗父死則妻其從母兄弟死則收其妻父母死無憂制遂言綱常皆出於天而不可變議法之吏乃言蒙古人不拘此例諸國人各從本俗是漢南人當守綱常蒙古人諸國人不必守綱常也名曰優之實則陷之外若尊之內實侮之推其本心所以待蒙古人者不若漢南人之厚也請下禮官有司及右科進士在朝者會議自天子至於庶人皆從禮制以成列聖未

遵之典明萬世不易之道又言隱士劉因道學經術可比
許衡宜從祀孔子廟庭皆不報御史臺作新風憲復疏其
所當行者以舉賢才為綱而以厚風俗均賦役重審理汰
冗官選守令出奉使均公田為目指撻剗切不顧忌諱宦
者罕失嬖妾殺其妻糜其肉飼犬上疏乞正重刑竝論宦
寺結廷臣撓政為害可汰黜之檢倂側目至正五年出為
江東道廉訪司副使上官一日辭歸六年授平江路總管
不拜八年復召為右司員外郎十三年屢遷至中書左丞
仍同知經筵事時中書參用非人事多異同不得一一如
志會軍餉不給請與右丞悟良哈台主屯田歲入二十萬
石東宮久未建懇懇為言車駕幸上都始冊皇太子立詹
事院驛召為副詹事每直端本堂則進親君子遠小人之

元史卷四十四 列傳

十一

說時盜賊竊起帝聞惡之下詔分討必盡誅而後已良楨
言平賊在收人心以回天意多殺非道不如赦以安之十
四年遷淮南行省左丞初泰州賊張士誠既降復叛殺淮
南行省參政趙璉進據高郵六合太師脫脫奉詔總諸王
軍南征而良楨泊參議龔伯璠刑部主事廬山等從之既
平六合垂克高郵會詔罷脫脫兵柄遂有上變告伯璠等
勸脫脫勒兵北向者下其事逮問詞連良楨簿對無所驗
即日還中書左丞命分省彰德主調軍食居半歲還中書
十七年進中書右丞辭不允論罷陷賊延坐之令有惡少
年誣知宜興州張復通賊中書將籍其孥良楨卒不署良
楨自左曹登政府多所建白罷福建山東食鹽浙東西長
生牛租瀕海被災圍田稅民皆德之又嘗論至正格輕重

不倫吏得竝緣為奸舉明律者數人參酌古今重定律書
書成而罷有詩文奏議凡若干卷藏於家

元史卷四十四 列傳

十一

元史卷四十四終

元史卷四十五

至正討賊諸臣

秦不華

秦不華字兼善伯牙吾台氏初名達普化文宗賜以今名世居白野山父塔不台入直宿衛歷仕台州錄事判官遂居於台家貧好讀書能記問集賢待制周仁榮養而教之年十七舉江浙鄉試第一明年對策大廷賜進士及第授集賢修撰轉秘書監著作郎拜江南行臺監察御史時御史大夫脫歡怙勢貪暴秦不華劾罷之文宗建奎章閣學士院擢為典籤拜中臺監察御史順帝即位加文宗后太皇太后之號大臣燕帖木爾柏顏皆裂土封王秦不華率同列上章言叔母不宜加徽稱相臣不當受王封奏上太

元史卷四十五 列傳

后怒欲殺言者秦不華語眾曰此事自我發之甘受誅戮決不以累諸公也已而太后怒解曰風憲有臣如此豈不能守祖宗之法乎賜金幣二以旌其直至正元年除紹興路總管革吏敝除沒官牛租令民自實田以均賦役行鄉飲酒禮教民興讓越俗大化召入史館與修遼金宋三史書成授祕書監晉禮部尚書黃河決奉詔以珪玉白馬祭河神竣事上言淮安以東河入海處宜做宋置撩清夫用輓江龍鐵掃撼蕩沙泥隨潮入海朝廷從其言會用夫屯田其事中廢八年台州黃巖民方國珍入海為亂劫掠漕運執海道千戶事聞詔江浙參政多爾只班總舟師捕之追至福州五虎門國珍知事危焚舟將遁官軍自相驚潰多爾只班遂被執國珍迫令上招降之狀朝廷從之國珍

兄弟皆授以官勢益暴橫九年詔秦不華察實以聞既得

其狀遂上招捕之策不聽尋除江東廉訪使已而出為都水庸田使十年十二月國珍復入海燒掠沿海州郡十一年二月詔李羅帖木爾為江浙行省左丞總兵至慶元以秦不華諭知賊情遷浙東道宣慰使都元帥分兵溫州夾攻之未幾國珍寇溫秦不華縱火筏焚之一夕遁去既而密與李羅約以六月乙未合兵進討李羅乃以壬辰先期至大閭洋國珍夜率勁卒縱火鼓譟官軍不戰皆潰赴水死者過半李羅被執反為國珍飾辭上聞秦不華聞之痛憤輟食數日朝廷弗之知復遣大司農達識等至黃巖招之國珍兄弟皆登岸羅拜退止民間小樓是夕中秋月明秦不華欲命壯士襲殺之密白其事達識曰我受詔招降

元史卷四十五 列傳

耳公欲擅命邪乃止達識復檄秦不華親至海濱散其徒眾拘其海舟兵器國珍兄弟仍授官有差既而遷秦不華台州路達魯花赤十二年朝廷征徐州命江浙省臣募舟師守大江國珍懷疑復入海以叛秦不華自以死報國發兵扼黃巖之澄江而遣義士王大用抵國珍示約信使之來歸國珍益疑拘大用不遣以小舸二百突海門入洲港犯馬鞍諸山秦不華語眾曰吾以書生登顯要誠慮負所學今守海隅賊甫招來又復為變君輩助我擊之若克則汝眾功也不克則我盡死以報國耳眾皆踴躍願行時國珍戚黨陳仲達往來計議陳其可降狀秦不華率部眾張受降旗乘潮而前船觸沙不能行垂與國珍遇呼仲達申前議仲達目動氣索秦不華覺其心異手斬之即前搏

賊船射死五人賊躍入船復斫死二人賊舉槳來刺輒斫折之賊羣至欲抱持過國珍船秦不華瞋目叱之脫起奪賊刀又殺二人賊攢槳刺之中頸死猶植立不仆投其屍海中年四十九時十二年三月庚子也僮名抱琴及臨海尉李輔德千戶赤蓋義士張君璧皆死之追贈江浙行省平章政事封魏國公諡忠介立廟台州賜額崇節秦不華博通經史兼善篆隸溫潤遒勁嘗重類復古編十卷攷正譌字於經史多有裨益云

石抹宜孫字申之其先遼之迪烈人五世祖耶先事太祖為御史大夫見平金功臣傳耶先之曾孫曰繼祖為沿海上海上副萬戶初以沿海軍分鎮台州皇慶元年又移鎮婺處兩州馭軍嚴肅平寧都寇有戰功且明達政事宜孫其

元史卷四十五 列傳

三

子也嗜學博覽長於詩歌常借嫡弟厚孫廢襲父職為沿海上海上副萬戶守處州及弟長即讓還其職退居台州至正十一年方國珍起海上江浙行省檄宜孫守溫州其年閩寇犯處州復檄宜孫以兵平之以功授浙東宣慰副使分府台州處屬山寇竝起宜孫復奉省檄往討築城禦敵十七年江浙行省左丞相達識承制授宜孫行樞密院判官總制處州分院治于處又以江浙儒學副提舉劉基為分院經歷蕭山縣尹蘇友龍為照磨而宜孫又辟郡人胡深葉琛章濫參謀軍事處為私山谷聯絡盜賊憑據險阻輒竊發不易平治宜孫用基等謀或擣以兵或誘以計未幾皆殲殄無遺尋同僉行樞密院事時天下多故所在守將各自為計相保守於是浙東則宜孫在處州邁里古思在

紹興並能扞衛一方十八年十二月明兵取蘭谿且逼婺宜孫母時在婺即遣胡深等將民兵數萬赴援親率精銳為之殿比至婺與明兵甫接即敗績時經略使李國鳳至浙東承制拜宜孫江浙行省參政明年明兵入處州宜孫將數十騎走福建境欲圖報復而人心已散事不可為嘆曰處州吾所守也不如還處州死既還至處之慶元縣為亂兵所害事聞贈越國公諡忠愍其幕下劉基章濫葉琛等後並仕明為名臣

邁里古思者寧夏人也字善卿至正十四年進士授紹興路錄事司達魯花赤苗軍主將楊完者在杭縱部下抄掠莫敢誰何民甚苦之俄有至紹興城中強奪人馬者邁里古思禽斬數人苗軍乃懼不敢復至名遂大振會江南行

元史卷四十五 列傳

四

臺移治紹興檄邁里古思為行臺鎮撫乃大募民兵守禦俄處州山賊焚掠婺之永康東陽邁里古思提兵與石抹宜孫夾攻平之擢江東廉訪司經歷仍留紹興以兵衛臺治時浙東西郡縣多殘破獨邁里古思保障紹興境內晏然會方國珍遣兵侵據紹興屬縣邁里古思先遣部將黃中取上虞中還將益兵定時朝廷方倚重國珍資其舟以運糧而御史大夫拜住哥與國珍素通賄賂情好甚厚憤邁里古思擅舉兵且恐生事即使人召至其私第計事命左右以鐵鎚搗殺之斷其頭擲廁溷中城中民無不慟哭黃中乃率其眾復讐盡殺拜住哥家人及臺府官員掾史獨留拜住哥不殺以告於張士誠士誠乃遣其將以兵守紹興拜住哥尋遷行宣政院使監察御史真童糾言拜住

哥陰害帥臣幾至激變不法不忠莫斯爲甚宜真嚴刑於是詔削拜住哥官職安置湖州而邁里古思之冤始白

李黼

李黼字子威潁人也工部尚書守中之子守中性卞急每飲酒醉輒怒詬諸子黼百計承順不可得跪而自訟往往達旦泰定四年以明經魁多士授翰林修撰拜監察御史首言禴祠烝嘗古今大祭今太廟唯二祭而日享佛祠神御非禮也宜據經行之成均教化之基不當隸集賢宜屬省臣兼領諸侯王歲賜有定額分封易代之際陳請恩例世系戚疏無成書可攷宜仿先代修正玉牒皆不報遷宣文閣監書博士兼經筵官數以王道勸講俄中書命黼巡視河渠黼上言曰蔡河源出京西宋以轉輸之故平地作

元史卷四十五

列傳

五

堤今河底湮淤高出地面秋霖一至橫潰爲災宜按故迹修浚他日東河或有不測之阻江淮運物當由此分道達京萬世之利也亦不報授江州路總管至正十一年夏五月盜起河南北據徐蔡南陷蕪黃焚掠數千里造船江北岸銳意南攻九江居下流竄江東西襟喉黼治城濠修器械募丁壯分守要害且上攻守之策於江西行省請兵屯江北以扼賊衝庶幾大江之險賊不得其之不報十二年正月己未賊帥鄒普勝渡江陷武昌威順王及省臣相繼遁舳艦蔽江而下江西大震賊乘勝破瑞昌右丞李羅帖木爾復遁黼愈孤立時黃梅縣主簿耶孫帖木爾願出擊賊黼大喜瀝酒誓天賊遊兵已至境急檄諸鄉落聚木石於險塞處遏賊歸路倉卒無識號乃墨士卒面統之出戰

黼身先士卒大呼陷陳耶孫繼進賊大敗黼曰賊不利於陸必由水道以舟薄我苟失備禦吾屬無噍類矣乃以長木數千冒鐵椎於杪暗植沿岸水中逆刺賊舟謂之七星樁會西南風急賊果揚帆順流鼓譟而至舟遇樁不得動進退無措黼率將士奮擊發火翎箭射之焚溺死者無算餘舟散走行省上黼功請拜江西行省參政行江州南康等路軍民都總管便宜行事已而賊勢更熾西自荆湖東際淮甸守臣往往棄城遁黼守孤城提孱旅斬馘扶傷無日不戰中外援絕二月甲申賊將薄城分省平章圖堅不花自北門遁黼引兵登陣布戰具賊已至甘棠湖焚西門乃張弩射之賊趨起未敢進轉攻東門而入黼與巷戰腹背受敵墮馬與從子秉昭俱罵賊死郡民間黼死哭聲震

元史卷四十五

列傳

六

天相率葬之東門外黼死踰月參政命始下年五十有五黼兄冕居潁亦死於賊秉昭冕季子也事聞贈黼隴西郡公諡忠文詔立廟江州賜額崇烈官其子秉方集賢待制

星吉

納麟

卜顏錄木爾

星吉字吉甫河西人曾祖朵吉祖朵爾只父朔思吉世事太祖憲宗世祖爲怯里馬赤星吉少給事仁宗潛邸以精敏稱至治中屢遷江南行臺御史大夫時承平日久內外方以優容爲政星吉獨持風裁御史行部必敕厲而遣之湖東僉事三寶住儒者也性廉介所至搏貪猾無所貸御史有以私請者拒不納則誣以事劾之章至星吉怒即奏杖御史而白其誣執政者惡之移湖廣行省平章湖廣地連江北威順王歲嘗出獵病民又起廣樂園多萃名倡巨

賈以綱大利有司莫敢忤星吉至謁王王闔中門啟左扉召之入星吉引繩牀坐王中門西言曰吾受天子命來作牧非王私臣也焉得由不正之道入乎聞者懼入告王王命啟中門星吉入責王曰王帝室之懿古之所謂伯父叔父者也今德音不聞而騁獵宣淫賈怨於下恐非所以自貽多福也王急握星吉手謝之為悉罷其所為有胡僧曰小住持者服三品命服恃寵橫甚數以事較轢官府星吉命掩捕之得妻妾女樂婦女十有八人獄具罪而籍之由是豪強斂手貧弱稱快斬州羅田賊徐壽輝起據蘄水游氛日熾星吉會僚屬議之或曰有鄭萬戶老將也可用星吉乃命募土兵完城池修器械嚴巡警悉以其事屬鄭賊聞之遣其黨三千來約降星吉與鄭謀曰此詐也然降而

元史卷四十五 列傳 七

卻之無詞空受而審之果得其詐乃殲之械其渠魁數十於獄以俟命適有旨召為大司農平章和尙受賂賂且嫉其功乃誣鄭罪繫之而釋其在獄者明日賊帥鄒普勝以黨屬至內外響應城遂陷武昌之人駢首夜泣曰大夫不去吾屬豈為俘乎星吉既入見具陳致賊本末帝喜命賜食時宰脫脫以其語侵己弟耶先帖木爾前敗狀不悅奏為江西行省平章員外置星吉至江東詔令守江州時江州已陷賊據池陽星吉開省太平官軍止三百賊號百萬眾皆欲走星吉曰畏賊而逃非勇也坐而待攻非智也汝等皆有妻子財物縱逃其可免乎乃貸富人錢募人為兵先是行臺募兵人給百五十千無應者至是星吉募兵人五十千眾爭赴一日得三千人乃具舟楫直趨銅陵至魯

港威順王之兵亦至士氣益奮遂克銅陵又破賊白馬灣賊敗走分兵躡之抵白涓賊窮急回拒官軍乘勝擊之賊盡殲禽其渠魁周驢俘其眾五千奪船六百艘軍聲大振遂復池州賊走淮西乃部分諸將躡其後已而賊復擾池州貴池石埭諸縣遣兵收復追出境賊忽以舟師三百艘乘順流來攻命萬戶王惟恭列陳禦之鋒始交麾小艦從旁橫擊大破走之乘勝進望江清水灣三日偵報賊艦四百至自上流順風舉帆眾且數倍諸將失色星吉曰無傷也風勢盛彼倉卒必不得泊但伏橫港中偃旗以待俟過而乘上風擊之必勝風怒水駛賊奄忽已過乃舉旗張帆鼓譟出其後賊驚駭官軍奮擊又大敗之獲戰艦甚眾時賊之圍安慶者聞敗燒營解去星吉且追且戰復湖口及

元史卷四十五 列傳 八

江州江州無一日糧乃命惟恭柵守小孤山而自據番陽口扼江湖要衝以圖恢復時湖廣江浙多衄江西亦無援應轉戰六月餘財粟殫匱士卒日困乏或請星吉就食東南以圖再舉星吉曰吾受命守江西去此何之眾莫敢復言賊知星吉兵食俱竭帥大船編葦蔽江而下截筏上下流縱火夾攻我軍力戰眾死且盡星吉之從子伯不華將親兵數十人死之星吉猶堅坐不動賊發矢射之乃昏仆賊素聞星吉名不忍害昇置密室中至旦乃蘇賊羅拜饋食星吉臥叱去遂不復食凡七日乃自力而起北面再拜曰臣力竭矣遂絕時至正十二年九月二十九日也年五十有七贈江西行中書省丞相封威靈王諡忠肅星吉公廉明決與將士同甘苦以忠義感激人心故能以少擊眾

得人死力與余闕皆以無援先後死東南事遂不可爲宋
濂碑其神道見文憲集

納麟高智曜之孫睿之子也大德六年納麟以名臣子用
丞相哈刺合孫薦入備宿衛延祐初拜監察御史以言事
忤旨仁宗怒叵測中丞楊多爾只力救之乃解又言風憲
持糾劾之權而受人賂者宜刑而加流累官至中書參政
遷同知樞密院事授江浙河南行省平章至正四年入爲
中書平章七年拜御史大夫所薦用御史必老成更事者
八年請老不許加太尉御史劾罷之退居姑蘇十二年江
淮盜起帝命爲南臺御史大夫納麟承詔即起仍命兼大
尉設僚屬總制江浙江西湖廣三省軍馬至則修築集慶
城郭會江浙杭城失守淮南行省平章什列門引兵往援

元史卷四十五 列傳

九

次采石納麟使止之曰聞杭城易破不足憂今宣城危急
宜先以兵救宣城乃調典瑞院使脫火赤率蒙古軍應之
大破賊於桐下門宣城以安已而賊陷徽州廣德常州宜
興溧水溧陽蔓延丹陽金壇句容略上元江寧游兵至鍾
山集慶勢甚危納麟乃力疾治兵部署士卒命治書侍御
史左蒼納失理守城中中丞伯家奴成東郊是時湖廣行
省平章耶先帖木爾軍和州納麟遣使求援耶先帖木爾
曰我奉命鎮江北不敢往援江東納麟仍遣監察御史鄭
郊力促其行耶先帖木爾引步騎度采石至臺城入候納
麟疾納麟喜即以其故聞於朝已而耶先帖木爾兵東趨
秣陵殺賊二千餘人平湖熟鎮盡復上元江寧境乘勝入
溧陽溧水賊潰奔廣德其據龍潭方山者奔常州時江浙

行省平章參旦巴右丞佛家閻亦引兵來會所在羣賊皆
敗北州郡悉平十三年納麟固請謝事從之命守太尉如
故乃退居慶元十六年詔以江南行臺移治紹興復命爲
御史大夫十八年赴召由海道入朝至黑水洋阻風而還
十九年復由海道趨直沽山東賊俞寶率戰艦斷糧道納
麟命其子安安及同舟人拒之破其眾於海口八月抵京
師帝遣使勞以上尊皇太子亦饋酒脯而納麟感疾日亟
卒於通州年七十有九

元史卷四十五 列傳

十

百時湖廣平章耶先帖木爾江西平章星吉江南行臺御
史中丞蠻子海牙皆以兵駐太平逗畱不進卜顏至乃與
俱前賊方聚丁家洲官軍猝與遇奮擊敗之遂復銅陵縣
禽其賊帥復池州遂分遣萬戶普賢奴屯陽陵王建中屯
白面渡閻兒討無爲州而自率鎮撫不花萬戶明安駐池
口以防遏上流爲之節度已而江州再陷星吉死之蠻子
海牙及威順王寬徹普化軍俱潰而東安慶被圍益急遣
使求援諸將皆欲自守信地卜顏曰何言之不忠邪安慶
與池止隔一水救患之義何容緩且上流官軍雖潰然皆
百戰之餘所乏者錢穀器械耳吾受命總師其可視之而
不恤哉即大發帑藏以周之潰軍皆大集而兩軍之勢復
振安慶之圍遂解十三年三月賊眾復來攻池州眾且十

萬諸縣皆應之下顏會諸將謀曰賊表裏連結若俟其壘成而坐食諸縣之粟破之實難今新至疲敝乘其驕情盡銳攻之即頃刻間功可成矣眾曰諾遂分番與戰大敗之禽其偽帥俘斬無算諸縣復平遂乘勝率舟師以進五月與戰於望江又戰小孤山及彭澤又戰龍開河皆破走之進復江州雷兵守之七月進兵攻蘄州禽賊帥鄒普秦遂克其城進兵道士泐焚其柵抵蘭溪口及賊巢黃連砦盡殲之分兵平兩巴河於是江路始通十一月與蠻子海牙四川行省參政哈臨圖左丞桑圖失里西寧王牙罕沙軍合湖廣左丞伯顏不花等軍皆會十二月分道進攻蘄水縣拔偽都獲偽將相而下四百餘人徐壽輝僅以身免以功賜上尊黃金帶時丞相脫脫方總戎南征聞諸賊皆已

元史卷四十五 列傳

十一

破乃檄伯顏不花征淮東蠻子海牙守裕溪口威順王還武昌而卜顏獨控長江十六年六月復以軍守池州十一月卒卜顏持身廉介人不敢干以私其為將所過不受禮遺宴犒民不知有兵性至孝幼養於叔父阿朮事之如親父常乘花馬時稱為花馬平章

荅什拔都魯

荅什拔都魯舊作荅失曾祖紐璘祖耶速荅自有傳荅什

南加台子也南一作囊附以世襲萬戶鎮守羅羅宣慰司

土人作亂荅什捕獲有功四川省舉充船橋萬戶出征雲

南遷大理宣慰司都元帥至正十一年特除四川行省參

政撥本部探馬赤軍三千從平章交住討賊於荆襄時交

住兵既平江陵荅什請自攻襄陽十二年進次荆門賊十

萬官軍止三千餘用宋廷傑計招募襄陽官吏及土豪避兵者得義丁二萬編部伍申約束至蠻河賊守要害兵不得渡即令屈萬戶率奇兵由間道出其後首尾夾攻賊大敗追至襄陽城南大戰生禽偽將三十人賊閉城不復出荅什乃相形勢內列八翼包絡襄城外置八營軍峴山楚山以截其援自將中軍四千據虎頭山以瞰城中署南漳宜城二縣尹拊循其民以賦軍饋城中民受圍日久夜半二人縋出叩營具告虛實願為內應荅什與之約期攻城授以密號而去至期四更民垂繩以引官軍先登者近十人時賊船百餘艘在城北陰募善水者鑿其底天將明城破賊若戰不勝走就船船壞皆溺死賊將王權領千騎西走遇伏兵被禽襄陽遂平賜號拔都魯以其弟識里木為

元史卷四十五 列傳

十二

襄陽達魯花赤子孛羅帖木爾為雲南行省理問比賊再犯荆門安陸沔陽荅什輒引兵敗之尋詔益兵五千以烏撒烏蒙元帥成都不花聽其調發十三年定青山荆門諸寨九月率兵略均房平穀城攻拔武當山寨數十二月趣攻峽州破木驢寨遷四川行省右丞十四年正月復峽州三月遷四川行省平章兼知樞密院事總荆襄諸軍五月命玉樞虎吐華代荅什守中興荆門令荅什以兵赴汝寧十月詔與太布花會軍討安豐是月復苗軍所據鄭鈞許三州十二月復河陰鞏縣十五年命荅什就管領太布花一應諸王藩將兵馬許以便宣行事六月拜河南行省平章進次許州長葛與劉福通野戰為其所敗將士奔潰九月至中牟收散卒團結屯種賊復來劫營掠其輜重遂

與其子孛羅帖木爾相失劉哈刺不花進兵來援大破賊兵獲孛羅歸之復駐汴梁東南青堤十二月調兵進討大敗賊於太康遂圍亳州僞宋主小明王遁十六年三月朝廷差知院脫歡來督兵蒼什父子親與劉福通對敵自己至西大戰數合蒼什墜馬孛羅扶令上馬先還自持弓矢連發以斃追者夜三鼓步回營中十月移駐陳留十一月攻取夾河劉福通寨十二月庚申次高柴店偪太康三十里是夜二鼓賊五百餘騎來劫以有備亟遁火而追之比曉督陳力戰自寅至巳壯士緣城入其郭斬首數萬禽僞將軍張敏孫韓等九人斬僞丞相王羅二人太康平遣孛羅告捷京師帝賜勞內殿王其先二世拜河南行省左丞相仍兼知樞密院事守禦汴梁識里木雲南行省左丞孛

元史卷四十五 列傳

十三

羅四川行省左丞將校僚屬賞爵有差十七年三月詔朝京師加太尉四川行省左丞相九月取胙城東明長垣三縣十月詔遣知院達里麻失理來援分兵雷澤濮州而達里麻失理爲劉福通所殺達諸軍皆潰蒼什力不能支退住石邨朝廷每疑其玩寇失機使者促戰相踵賊規知之詐爲蒼什通和書遺諸道路使者果獲以進蒼什聞之一夕憂憤死十二月庚子也

余闕

余闕字廷心一字天心唐兀氏世家河西武威父沙刺藏卜官廬州遂爲廬州人闕少喪父授徒以養母與吳澄弟子張恆游文學日進元統元年賜進士及第授同知泗州事爲政嚴明宿吏皆憚之俄召入應奉翰林文字轉中書

刑部主事以不阿權貴棄官歸尋以修遼金宋三史召復入翰林爲修撰拜監察御史改中書禮部員外郎出爲湖廣左右司郎中會莫徭蠻反右丞沙班當帥師堅不往無敢讓之者闕曰右丞當往受天子命爲方嶽重臣不思執弓矢討賊乃欲自逸邪右丞當往沙班曰郎中語固是如芻餉不足何闕曰右丞第往此不難致也闕下合趣之日皆集沙班行復以集賢經歷召入遷翰林待制出僉浙東道廉訪司事丁母憂歸廬州盜起河南陷郡縣至正十二年行中書于淮東改宣慰司爲都元帥府治淮西起闕副使僉都元帥府事分兵守安慶於時南北音問隔絕兵食俱乏抵官十日而寇至乃集有司與諸將議屯田戰守計環境築堡砦選精甲外扞而耕稼於中屬縣濠山八社

元史卷四十五 列傳

十四

土壤沃饒悉以爲屯明年春夏大饑人相食乃捐俸爲粥以食之得活者甚眾民失業者數萬咸安集之請于中書得鈔三萬錠以振民升同知副元帥又明年秋大旱爲文祈濤山神三日雨歲以不饑盜方據石蕩湖出兵平之令民取湖魚而輸魚租十五年夏大雨江漲屯田禾半沒城下水湧有物吼聲如雷闕祠以少牢水輒縮秋稼登得糧三萬斛闕度軍有餘力乃浚墮增陴陞外環以大防深塹三重南引江水注之環植木爲柵城上四面起飛樓表裏完固俄升都元帥廣西苗軍五萬從元帥阿爾思蘭沿江下抵廬州闕移文謂苗蠻不當使之窺中國詔阿爾思蘭還軍苗軍有暴於境者卽收殺之莫敢犯時羣盜環布四外闕居其中左提右挈屹爲江淮一保障論功拜江淮行

省參政仍守安慶通道於江右商旅四集池州趙普勝帥眾攻城連戰三日敗去未幾又至相拒二旬始退懷寧縣達魯花赤百家奴戰死十七年趙普勝同青軍兩道來攻關拒戰一月餘賊敗走秋拜淮南行省右丞安慶倚小孤山為藩蔽命義兵元帥胡伯顏統水軍成馬十月沔陽陳友諒自上游直擣小孤山伯顏與戰四日夜不勝負趨安慶賊追至山口鎮明日癸亥遂薄城下關遣兵扼於觀音橋俄饒州祝寇攻西門關擊斬之其軍乃退乙巳賊乘東門紅旗登城關簡死士力擊賊復敗去戊申賊并軍攻東西二門又卻之賊恚甚乃樹柵起飛樓庚戌復來攻金鼓聲震地關分命諸將各以兵扞賊晝夜不得息癸卯賊益生兵來攻丙午普勝軍東門友諒軍西門祝寇軍南門羣

元史卷四十五 列傳 五

盜四面蟻集外無一甲之援西門勢尤急關身當之徒步提戈為士卒先仍分麾下將督三門之兵自以孤軍血戰斬首無算而關亦被十餘創日中城陷火起關知不可為引刀自剄墮清池塘中關妻郭卜氏及子德生女福童皆赴井死同時死者守臣韓建一家被害建方臥疾罵賊不屈賊執之以去不知所終城中民相率登城樓自捐其梯曰寧俱死此誓不從賊焚死者以千計其知名者萬戶李宗可紀守仁陳彬金承宗元帥府都事帖木補化萬戶府經歷段桂芳千戶火失不花新李盧廷玉萬延齡巨魯許元炎奏差兀都蠻百戶黃寅孫安慶推官黃圖倫白經歷楊恆知事余中懷寧尹陳巨濟凡十八人城陷之日至正十八年正月丙午也關號令嚴信與下同甘苦然稍有違

令即斬以徇關嘗病不視事將士皆籲天求以身代關聞強衣冠而出當出戰矢石亂下如雨士以盾蔽關關卻之曰汝輩亦有命何蔽我為故人爭用命稍暇即注周易帥諸生謁郡學會講立軍士門外以聽使知尊君親上之義有古良將風烈或欲挽關入翰林闕以國步危蹙辭不往其忠國之心蓋素定也卒時年五十六事聞贈淮南江北等處行省平章追封幽國公諡忠宣議者謂自兵興以來死節之臣關與楮不花為第一云關留意經術五經皆有傳注為文有氣魄能達其所欲言詩體尚江左高視鮑謝徐庾以下不論也篆隸亦古雅可傳初關既死賊義之求屍塘中具棺斂葬於西門外及明定安慶嘉關之忠詔立廟於忠節坊命有司歲時致祭云○原稟關今以舊傳補

元史卷四十五 列傳 六

董搏霄 弟昂霄

董搏霄字孟起磁州人由國子生辟陝西行臺掾時天大旱從侍御史郭貞讞獄華陰縣有李謀兒累殺商賈于道為賊十五年至百餘事事覺獄已具賄賂有司謂徒黨未獲五年不決人皆以為憤搏霄知之以言于貞即以尸諸市天乃大雨授四川肅政廉訪司知事除涇陽縣尹入為戶部主事升員外郎拜監察御史又出僉遼東肅政廉訪司事歷江西行省左右司郎中遷浙東宣慰副使其歷官所至往往理冤獄革敝政才譽益著稱于時至正十一年除濟寧路總管奉旨從江浙平章教化進征安豐兵至合肥定林站遇賊大破之時朱皋固始賊復猖獗軍少不足以分討有大山民砦及芍陂屯田軍搏霄皆獎勞而約束

之遂得障蔽朱皋官軍屯朱家寺賊至追殺之乃遣進士程明仲往諭賊中招來者千二百家因悉知其虛實夜縛浮橋于肥水既渡賊始覺賊眾數萬據礮南官軍渡者輒爲其所敗搏霄乃麾騎士別渡淺灘襲賊後賊回東南向與騎士迎敵搏霄忽躍馬渡礮揚言于眾曰賊已敗諸軍皆渡一鼓而擊之賊大敗亟追殺之相藉以死者二十五里遂復安豐十二年有旨命搏霄攻濠州又命移軍援江南遂渡江至湖州德清縣而徽饒賊已陷杭州教化問計搏霄曰賊皆野人見杭州子女玉帛非平日所有必縱掠不爲備宜急攻之今欲退保湖州設使賊乘銳直趨京口則江南不可爲矣教化猶豫未決諸將亦難其行搏霄正色曰江浙相君方面既陷于賊今可取而不取誰任其咎

元史卷四十五 列傳

七

復拔劍顧諸將曰諸君荷國厚恩而臨難苟免今相君在是敢有慢令者斬計乃決遂進兵杭城賊迎敵至鹽橋搏霄麾壯士突前諸軍相繼夾擊凡七戰追殺至清河坊賊奔接待寺塞其門而焚之賊皆死遂復杭州已而餘杭武康德清次第以平搏霄亦受代去徽饒賊復自昱嶺關寇於潛行省乃假搏霄爲參政俾復提兵討之搏霄即日引兵至臨安新溪是爲入杭要路分兵守之而以大軍進至叫口及虎檻遇賊皆大破之追殺至於潛遂復其縣治既又克復昌化縣及昱嶺關降賊將潘大齋二千人賊又有犯千秋關者搏霄還軍守於潛而賊兵大至焚倚郭廬舍搏霄按軍不動左右請出兵搏霄曰未也遣人執白旗登山望賊約曰賊以我爲怯必少懈伺其有閒則麾所執旗

又伏兵城外皆授以火礮復約曰見旗動礮即發已而旗動礮發兵乃盡出斬首數千級遂復千秋關未幾賊復攻獨松百丈幽嶺三關搏霄乃先以兵守多溪多溪三關要路也既又分爲三軍一出獨松一出百丈一出幽嶺然後會兵擣賊巢遂乘勝復安吉七戰而克之賊將以其徒降者數百人越數日賊復來窺獨松搏霄即以兵守苦嶺及黃沙嶺賊帥梅元來降且言復有帥十一人欲降者即遣偏將余思忠至賊營諭之賊皆入暗室潛議思忠持火投入室內拔劍語眾曰元帥命我來活汝汝復何議已而火起焚其營賊黨散去而引賊帥來降明日進兵克廣德時斬饒諸賊復犯徽州賊中有道士能作十二里霧搏霄以兵擊之已而妖霧開豁諸伏兵皆起賊大潰亂斬首數

元史卷四十五 列傳

六

萬級禽千餘人獲道士焚其妖書而斬之遂平徽州十四年除水軍都萬戶俄升樞密院判官從丞相脫脫征高郵分戍鹽城興化賊巢在大縱德勝兩湖閒凡十有二悉剿平之即其地築芙蓉砦賊入輒迷故道盡殺之自是不敢復犯賊恃習水渡淮北據安東州搏霄招善水戰者五百人與賊戰安東之大湖大敗之遂復安東十六年勦平北沙廟灣沙浦等砦尋進兵泗州不利賊乘勝東下斷官軍糧道乃回軍屯北沙糧且絕與賊死戰凡七晝夜賊敗走奪賊船七十餘乃得渡淮保泗州時方暑雨湖水溢諸營皆避去而搏霄獨守孤城賊環繞數十重攻之搏霄坐城上遣偏將以騎士由四門突出賊後約曰旗一麾即還既而旗動步卒自城中出夾擊之賊大敗然賊猶阻西行之

路乃結陳而往翼以奇兵轉戰數十合軍始得至海寧朝廷嘉其功升同僉淮南行樞密院事搏霄建議於朝曰淮安為南北襟喉江淮要衝其地一失兩淮皆未易保也救援淮安誠為急務為今日計莫若於黃河上下并瀕淮海之地及南自沭陽北抵沂莒贛榆諸州縣布連珠營每三十里設一總砦就三十里中又設一小砦使斥埃烽燧相望而巡邏往來遇賊則并力野戰無事則屯種而食然後進有緩邊有守此善戰者所以常為不可勝以待敵之可勝也又海寧一境不通舟楫軍糧惟資陸運而凡瀕淮海之地人民屢經盜賊宜加存撫權令軍人搬運其陸運之方每人行十步三十六人可行一里三百六十人可行一十里三千六百人可行一百里每人負米四斗以夾布囊

元史卷四十五 列傳 九

盛之用印封識人息肩米不著地排列成行日行五百回計路二十八里輕行一十四里重行一十四里日可運米三百石每運給米一升可供二萬人此百里一日運糧之術也又江淮流移之民并安東海寧沭陽贛陽等州縣俱廢其民壯者既為軍老弱無所依歸者宜設置軍民防禦司擇軍官材堪牧守者使居其職而籍其民以屯故地練兵積穀且耕且戰內全山東完固之邦外禦淮海出沒之寇而後恢復可圖也十七年毛貴陷益都般陽等路有旨命搏霄從知樞密院事孛蘭奚討之而濟南又告急搏霄乃提兵援濟南賊眾自南山來攻濟南望之兩山皆赤搏霄按兵城中先以數十騎挑之賊率眾來鬪騎兵少卻至礮上伏兵起遂合戰城中兵又大出大破之而般陽賊

復約泰安之黨踰南山來襲濟南搏霄列兵城上弗為動賊夜攻南門獨以矢石禦之黎明乃默開東門放兵出賊後既旦城上兵皆下大開南門合擊之賊敗走復進殺之賊眾無遺者於是濟南始寧詔就升淮南行樞密院副使兼山東宣慰使都元帥仍賜上尊金帶楮幣名馬以勞之有疾其功者謚於總兵太尉紐的該令搏霄依前詔從孛蘭奚征益都搏霄即出濟南城屬老且病請以弟昂霄代領其眾朝廷從之授昂霄淮南行樞密院判官未幾有旨命搏霄守河間之長蘆十八年搏霄以兵北行謂人曰我去濟南必不可保既而濟南果陷搏霄方駐兵南皮縣之魏家莊適詔使拜搏霄河南行省右丞甫拜命毛貴兵已至而營壘猶未完諸將謂搏霄曰賊至當如何搏霄曰我

元史卷四十五 列傳 十

受命至此當以死報國耳因拔劍督兵以戰而賊眾突至搏霄前猝而問曰汝為誰搏霄曰我董老爺也眾刺殺之無血惟見有白氣衝天是日昂霄亦死之事聞贈河南行省平章追封魏國公諡忠定昂霄贈禮部尚書追封隴西郡侯諡忠毅搏霄早以儒生起家輒為能吏會天下大亂復以武功自奮其才略有大過人者而當世用之不能盡其才君子惜之。原案關今以舊傳補

慶童

慶童字明德康里氏祖明里帖木爾大府少卿父幹羅思世祖至元中拜監察御史以忤桑葛被謫籍其家惟金玉帶各一黃金五十兩皆上所賜者乃以公用係官孽畜加之罪帝曰此口腹之事也釋不問後宣慰八番平諸蠻有

功至大開召拜中書右丞兩世皆封益國公慶童早歲以勤臣子受知仁廟給事內廷遂長宿衛三遷至上都留守又累出爲江西河南二行省平章入爲太府卿復爲上都留守出爲遼陽行省平章以寬厚爲政遼人德之至正十年遷平章行省江浙適時承平頗沈湎於宴樂凡遺逸之士舉校官者輒擯斥不用由是不爲物論所與明年盜起汝潁蔓延於江浙江東之饒信徽宣鉛山廣德浙西之常湖建德所在不守慶童分遣僚佐往督師不踰時以次克復既命長吏按視民數註誤者悉置不問招來流離俾安故業省治燬於兵則拓其故址而新之役貧民趨工以代振十四年脫脫以太師右丞相統大兵南征一切軍資衣甲器仗穀粟薪橐咸取具於江浙慶童規措有方陸運川

元史卷四十五 列傳

三

輸千里相屬朝廷賴之明年盜起常之無錫嚴議以重兵殲之慶童曰赤子無知迫於苛政故弄兵耳其先諭以禍福盜果投戈解甲請爲良民十六年平江湖州陷義兵元帥方家奴以所部軍屯杭城之北關鉤結黨惡白晝劫掠慶童言於江浙行省丞相達識曰我師無律何以克敵必斬方家奴乃可出師達識乃與慶童入其軍數其罪斬首以徇民大悅繼而苗軍帥楊完者以其軍守杭城達識既承制授完者江浙行省右丞而完者益驕恣強委禽求娶慶童女慶童初不許時苗軍勢甚張達識強勸其婚慶童不得已與之明年出鎮海鹽州距杭百里地瀕海饒瘠居二年盜息民阜在江浙七年涉歷艱險勞績甚著十八年拜江南行臺御史大夫賜以御衣上尊二十年召還乃由

海道趨京師拜中書平章政事俄有譖其子剛僧私通宮人者帝怒殺之慶童因執鞅不得志移疾家居日飲酒自遣二十五年拜陝西行省左丞相時李思齊擁兵關中慶童至則御之以禮待之以誠居三年關陝用寧召還京師二十八年七月明兵逼京畿帝與皇太子六宮及宰臣近戚皆北奔而命淮王帖木不花監國慶童爲中書左丞相以輔之八月二日京城破淮王與慶童出齊化門皆被殺慶童父幹羅思魯史專傳今并入

耶速

耶速蒙古人倜儻有能名由宿衛歷尙乘寺提點遷宣政院參議至正十四年河南賊芝麻李據徐州耶速從太師脫脫南征以巨石爲礮晝夜攻之不息賊困不能支耶速

元史卷四十五 列傳

三

又攻破南關外城賊遁走以功除同知中政院事繼又領軍從其父太尉月闊察爾征淮西會賊圍安豐卽往援之渡淮無舟因策馬探水深淺浮而過賊大駭徹圍去進攻濠州有詔班師乃還復從太尉征淮東取盱眙遷淮南行樞密院副使俄同知樞密院事討賊海州大敗之賊走航海襲山東盡有其地耶速計賊必乘勝北侵急引兵還表裏擊之復勝兗二州及費鄒曲阜靈陽泗水五縣賊勢遂衄未幾復泰安州及平陰肥城萊蕪新泰四縣又平安水等五十三寨禽蒲臺賊杜黑兒獻京師東昌賊將北寇道出陵州耶速邀擊於景州斬獲殆盡復阜城縣詔耶速以軍屯單家橋斷賊北路戰於長蘆流矢貫左手不顧轉鬪無前殺賊五百餘奪馬三千匹於是分兵下山寨民爭來

歸拜中書平章改行省淮南繼平雄州蔚州各賊知樞密院事劉哈刺不花所部卒掠懷來雲州欲為亂耶速以輕騎擊降其眾隸麾下賊陷大寧詔耶速往討遇賊侯家店力戰自昏抵曙散而復合乃遣別騎繞出賊後腹背攻之遂拔大寧禽首賊三十五人磔於都市召入覲賞賚優渥進知樞密院事既而賊雷不花程思忠等陷永平詔耶速出師遂復灤州及遷安縣時遼東郡縣惟永平不被兵儲粟十萬芻橐山積居民殷富賊乘閒竊入增土築城因河為塹堅守不可下耶速乃外築大營絕其樵采數與賊戰獲其偽帥以下二百餘人平山寨數十又復昌黎撫寧二縣禽雷不花送京師賊急乃乞降於參政徹力帖木爾力作爲請命於朝詔許之命耶速退師耶速嚴備賊棄城遁

元史卷四十五 列傳

三

亟追至瑞州殺獲萬計賊遂東走金復州詔還京師拜遼陽行省左丞相知行樞密院事撫安迤東兵農委以便宜開省於永平總兵如故金復海蓋乾王等賊竝起西侵與中州陰由海道趨永平聞耶速開省乃止耶速亟分兵防其衝突賊乃轉攻大寧爲守將王聚所敗斬其渠魁眾潰皆西走耶速慮賊窺上都卽調右丞忽林台提兵護上都簡精銳自躡賊後賊果寇上都忽林台擊破之賊眾又大潰永平大寧於是始平乃分命官屬勞來安輯其民使什伍相保以事耕種民立石頌其勳德二十四年李羅帖木爾與右丞相朔思監宦者朴不花有怨遣兵犯闕執二人去耶速遂拜中書左丞相七月李羅帖木爾留兵守大同自率兵復向闕京師大震百官從帝城守皇太子統兵迎

於清河命耶速軍昌平而李羅前鋒已度居庸關至昌平耶速一軍皆無鬪志不戰而潰皇太子馳入城尋出奔於太原李羅遂入京城爲中書右丞相二十五年皇太子在太原與擴廓謀响內難承制調甘肅嶺北遼陽陝西諸省諸王兵入討李羅李羅乃遣御史大夫圖堅帖木爾率兵攻上都之附皇太子者且以禦嶺北之兵又調耶速率兵南禦擴廓部將竹真額高之兵耶速軍次良鄉不進謀之於眾皆謂李羅圖危宗社中外同憤遂勒兵歸永平西連太原擴廓東連遼陽耶速不花國王軍聲大振李羅患之遣其將同知樞密院事姚伯顏不花以兵往攻軍過通州白河水溢不能進駐虹橋築壘以待姚伯顏素輕耶速不設備耶速規知之襲破其軍禽姚伯顏李羅大恐自將攻

元史卷四十五 列傳

三

耶速至通州大雨三日乃還李羅先以部將保安不附已殺之至是又失姚伯顏二人皆驍將也如失左右手鬱鬱無計遂敗伏誅二十七年詔以耶速爲中書右丞相分省山東二十八年明兵取山東閏七月耶速與部將哈刺章田勝周達等禦於莫州眾敗潰乃盡掠莫州殘民北遁

察罕帖木爾

擴廓

察罕帖木爾字廷瑞系出北庭或云姓李氏曾祖闊闊台元初隨大軍收河南遂家潁州之沈丘察罕幼篤學嘗應進士舉有時名修眉覆目左頰有三豪怒則豪皆直指居嘗慨然有當世之志至正十一年紅巾賊劉福通作亂所過殘破不數月江淮諸郡皆陷朝廷徵兵致討訖無成功察罕奮義起兵沈丘子弟願從者數百人與信陽羅山人

李思齊合兵同設奇計襲破羅山賊事聞授汝寧府達魯花赤思齊知府事所在義士俱將兵來會得萬人自成一軍屯沈丘數與福通戰輒捷十五年賊由汴南陷鄧許嵩洛諸州察罕轉戰而北遂成虎牢以遏賊鋒賊北渡孟津焚掠至覃懷河北震動察罕引兵奮擊賊敗走河北遂定朝廷奇其功除中書刑部侍郎苗軍以滎陽叛察罕夜襲俘其眾遂營中牟已而淮右賊眾掠汴西來擣中牟營察罕結陳待之會大風揚沙自率猛士鼓譟出擊其中堅賊披靡棄旗鼓走軍聲益大振十六年加兵部尚書繼而汝穎賊黨李武崔德等西陷陝州遂斷殺函勢欲趨秦晉時平章蒼什拔都魯方節制河南軍調察罕及思齊往擊之即鼓行而西夜拔殺陵立柵交口陝州城阻山帶河賊轉

元史卷四十五 列傳

五

南山粟給食固守攻之猝不下察罕乃焚馬矢營中如炊煙狀賊畏兵眾不敢逼而夜提兵拔靈寶城賊始覺即棄陝州渡河陷平陸掠安邑蹂晉南鄙察罕追蹙至下陽津溺死者眾相持數月賊宵遁以功加僉河北行樞密院事十七年福通遣其黨毛貴陷膠州倪文俊陷陝州李武陷商州由武關逕趨長安至灊上分掠同華諸州三輔震動陝西省臺來告急察罕即提兵入潼關長驅而前與賊遇戰輒勝賊黨皆散潰走南山入興元朝廷嘉其復關陝功授陝西行省左丞未幾賊出自巴蜀陷秦隴據鞏昌潛窺鳳翔察罕先分兵守鳳翔而遣謀者誘賊來圍察罕自將鐵騎夜馳二百里比至去城五里分軍張左右翼掩擊賊中軍亦出呼聲動天地賊大亂自相踐蹂伏屍百餘里關

中悉定十八年毛貴分道由蔚州犯京畿朝廷大恐徵諸道兵入衛詔察罕以兵屯涿州察罕即留兵成清湫義谷屯潼關塞南山口以備他盜而自將銳卒赴召是時曹漢賊方分道踰大行焚上黨掠晉冀陷雲中雁門代郡烽火數千里復大掠南還察罕先遣兵伏南山隘自勒重兵屯聞喜絳陽賊果出南山縱伏橫擊賊皆棄輜重走乃分兵屯澤州塞盩子城屯上黨塞吾兒谷屯并州塞井陘口以杜大行諸道河東悉定詔進右丞兼西臺御史中丞同知河南行樞密院事命守關陝晉冀兼撫漢沔荆襄便定行事察罕益以平定四方爲己任是年福通等陷汴梁迎僞主號召羣盜自巴蜀荆楚江淮齊魯遼西以至甘肅所在兵起察罕命北塞大行南守鞏洛自將中軍軍沔池會河

元史卷四十五 列傳

五

南行省周全叛附福通棄單懷入汴合兵攻洛陽察罕令嚴守備別以奇兵出空陽而自將精騎發新安來援賊至城下見堅壁不可犯潛引去追至虎牢塞成皋諸險而還拜陝西行省平章仍同知行樞密院事十九年圖復汴梁以大軍次虎牢先發游騎南道出汴南略歸亳陳蔡北道出汴東戰船浮於河水陸並下略曹南據黃陵渡乃大發秦兵出函谷過虎牢晉兵出大行踰黃河俱會汴城下首奪其外城諸將環城而壘賊屢戰輒敗夜伏兵城南日遣苗軍跳梁者略城而東賊傾城出追伏起邀擊敗之又令弱卒立柵外城以餌賊賊出爭弱卒佯走薄城西因縱鐵騎突擊悉禽其眾賊益氣阻不敢出八月謀知城中食且盡遣出分掠無復還者乃與諸將各分門而攻至夜將上

賈勇斬關入福通挾偽主韓林兒從數百騎出東門遁獲偽后及羣賊妻子數萬符璽印章寶貨無算保全居民二十萬眾不旬日河南悉定捷聞進河南平章政事兼臺院如故察罕既定河南更以兵分鎮關陝荆襄河洛江淮而重兵屯大行營壘相望數千里日修車船繕兵甲務農積穀謀大舉以復山東時山西晉冀諸地皆察罕所平定而蒼什拔都魯之子孛羅帖木爾以兵駐大同陰欲并據晉冀日事兵爭天子屢下詔和解終不聽二十一年察罕謀知山東羣賊自相攻殺濟寧義兵萬戶田豐降於賊與福通黨王士誠據山東乃與疾自陝抵洛大會諸將議師期發并州兵出井陘遼沁軍出邯鄲澤潞軍出磁州懷衛軍出白馬及汴洛軍水陸俱下而自建大將旗鼓渡孟津踰

元史卷四十五 列傳 七

覃懷鼓行而東復冠州東昌八月師至鹽河遣義子擴廓及諸將以精卒五萬擣東平直抵城下察罕以田豐據山東久軍民素服因遺書招之豐及士誠皆降遂復東平下濟寧時大軍猶未渡河賊眾皆聚濟南常出入齊河禹城相擾察罕先遣奇兵取間道出賊後南略泰安逼益都北徇濟陽章丘中徇瀕海郡邑始自將大軍畢渡進逼濟南城下齊河禹城俱降南道諸將捷亦至再敗益都賊於好石橋濱海郡邑皆聞風送款圍濟南三月城乃下詔拜中書平章政事兼臺院如故遂移兵圍益都環城列營治攻具百道竝進賊悉力拒守復掘重塹築長圍遏南洋河灌城仍命分守要害招集流亡郡縣戶口漸次收復二十二年六月豐士誠陰結賊復圖叛當豐之降也察罕待之不

疑數獨入其帳中及是豐將謀變忽請察罕觀營壘眾謂不宜往察罕曰吾推心待人安得人人防之左右請以力士從不許惟帶輕騎十人行至豐營遂為士誠所刺死於益都先是有白氣如索長五百餘丈起危宿掃大微垣太史奏山東當大水帝曰不然山東必失一良將即馳詔戒察罕勿輕舉未至已及於難追贈潁川王諡忠襄食邑沈丘所在立祠歲時致祭封其父阿魯溫汝陽王進封梁王擴廓舊連帖木爾號本王姓小字保保察罕帖木爾甥也自幼養以為子順帝賜名擴廓帖木爾察罕既沒復即軍中拜擴廓太尉中書平章政事知樞密院事襲總察罕兵以討賊攻圍益都愈急穴地通道以入至正二十二年十一月拔其城執田豐王士誠剖其心以祭察罕縛渠魁陳孫頭等

元史卷四十五 列傳 七

二十餘人獻闕下餘黨皆就誅即遣關保以兵取莒州山東悉平引兵還駐太原孛羅帖木爾復數以兵爭晉冀帝雖屢解諭而讐隙日深二十三年御史大夫老的沙與知樞密院事圖堅帖木爾得罪於皇太子出奔大同投孛羅老的沙者帝母舅以故帝命皇太子寢其事皇太子不從帝無如之何傳旨密令孛羅匿之軍中而丞相朔思監宦者朴不花皆附皇太子必窮竟其事二十四年朔思監宦不花因誣孛羅老的沙謀為不軌三月帝下詔盡削孛羅官奪其兵柄孛羅不受詔遂遣兵逼京師必欲得朔思監朴不花乃已帝不得已縛二人與之七月孛羅又與老的沙合圖堅兵同犯闕皇太子求援於擴廓擴廓遣部將白鎖住以萬騎衛京師駐於龍虎臺與戰不利遂奉皇太子

奔太原李羅既入朝據相位白鎖住又將二萬騎屯漁陽爲朝廷聲援二十五年擴廓以兵擣大同取之皇太子乃趣擴廓大舉以討逆發丞相耶速兵屯東鄙魏遼齊吳豫幽諸王兵駐西邊而自率擴廓兵取中道抵京師亡何李羅伏誅擴廓從皇太子入覲拜太傅左丞相擴廓功雖高起行閒驟至相位中朝舊臣多忌之者而擴廓久典軍亦不樂在內居兩月卽請南還視師是時中原雖無事而江淮川蜀皆淪陷皇太子累請出督師帝難之乃詔封擴廓河南王俾總天下兵代皇太子出征擴廓分省中官屬之半以自隨用孫翥趙恆等爲謀主二十六年二月自京師還河南欲廬墓以終喪左右咸以爲受命出師不可中止乃復北渡居懷慶又移居彰德初李思齊與察罕同起義

元史卷四十五 列傳

五

師齒位相均及是擴廓總其兵心不能平張良弼遂首拒命孔興脫列伯等亦皆以功自恃各懷異見請別爲一軍莫肯統屬擴廓乃遣關保虎林赤以兵西攻良弼於鹿臺思齊遂與良弼合兵連不能罷皇太子之奔太原也欲用唐肅宗靈武故事自立擴廓不從及還京師皇后奇氏令擴廓以重兵擁太子入城欲脅帝禪位擴廓知其意比至京城三十里卽畱其軍以數騎入朝由是皇太子心銜之及是屢趣出師江淮擴廓欲遂定思齊等然後南征第遣弟脫因帖木爾及部將完哲貂高以一軍屯濟南防遏南兵而自引軍入關攻思齊等相持經年數百戰莫能決帝又下詔和解之擴廓戕殺詔使廷臣譁言其跋扈有狀帝亦心忌之二十七年八月乃下詔命皇太子親出總天下

兵馬分命擴廓自潼關而東肅清江淮李思齊自鳳翔而西進取川蜀圖魯與張良弼孔興脫列伯等取襄樊王信固守山東信地然詔書雖下皇太子竟不行擴廓亦不肯受分兵之命於是貂高關保等皆叛於擴廓列其罪狀於朝舉兵共攻之皇太子立撫軍院總制天下軍馬專備擴廓以貂高等能倡大義賜號忠義功臣十月詔落擴廓太傅中書左丞相依前河南王凡擴廓所總諸軍在帳前者白鎖住虎林赤領之在河南者李克彝領之在山東者耶速領之在山西者沙藍答里領之在河北者貂高領之擴廓既受詔卽退軍屯澤州朝廷以擴廓勢孤乃詔圖魯李思齊張良弼孔興脫列伯率兵東向與貂高合攻擴廓二十八年朝命左丞孫景益分省太原關保以兵爲之守擴

元史卷四十五 列傳

五

廓憤甚引兵據太原盡殺朝廷所置官於是帝下詔削擴廓爵邑令諸軍四面討之其將士官吏效順者與免本罪惟孫翥趙恆罪在不赦二月擴廓退守平陽關保遂據澤潞二州以與貂高合時明兵已及河南思齊良弼皆遣使詣擴廓告以出師非本心乃解兵大掠西歸七月貂高關保進攻平陽當是時擴廓氣稍沮而關保貂高勢張甚數請戰擴廓不應或師出卽復退一日諜知貂高分軍掠祁縣卽夜出師薄其營掩擊之大敗其眾貂高關保皆就禽朝廷聞之遽罷撫軍院既而擴廓上疏自陳情悃帝尋亦悔悟下詔滌其前非而明兵已定山東收河洛中原俱不守閏七月帝乃下詔復命擴廓仍前河南王太傅中書左丞相孫翥趙恆並復舊職以兵從河北南討耶速以兵趨

山東圖魯兵出潼關李思齊兵出七盤金商以圖復汴洛未幾耶連兵潰圖魯思齊兵亦不出擴廓又自平陽退守太原不敢復南向國事已不可為矣已而明兵迫京城帝北奔大都遂陷明兵自澤州徇山西擴廓遣將禦之戰於韓店明兵大敗會帝自開平命擴廓復大都擴廓乃北出雁門將由保安徑居庸以圖舊京明將徐達常遇春乘虛擣太原擴廓還救部將潛約降於明明兵夜劫營營中驚潰擴廓倉猝以十八騎北走明兵遂西入關思齊以臨洮降明良弼走靈夏為擴廓所執其弟良臣以慶陽降明既而復輸款於擴廓明兵破誅之於是元臣無復以一旅號召中土者惟擴廓擁兵塞上往來甘肅志圖恢復明遣徐達出西安擣定西擴廓方圍蘭州趨赴之戰於沈兒峪盡

元史卷四十五 列傳 三

亡其眾獨與妻子數人奔和林時順帝崩太子嗣立復任以國事踰年明復遣徐達等將十五萬眾分道出塞取擴廓至嶺北擴廓大敗明兵死者數萬人劉基嘗言於明祖曰擴廓未可輕也至是明祖思其言戒諸將稀復出塞明年擴廓又攻雁門其後從其主徙金山卒於哈刺那海之身庭其妻毛氏亦自經死時北元昭宗即順帝太子宣光五年明洪武八年也初察罕破山東江淮震動明祖遣使通好朝廷因命戶部尚書張昶郎中馬合謀浮海如江東授明祖江西行省平章甫至聞察罕被刺遂不受及擴廓視師河南明祖乃復遣使通好擴廓輒留使者不遣凡七致書皆不答既出塞復遣人招諭亦不應取後使李思齊往始至則待以客禮尋使騎士送歸至塞下騎士曰主帥有命

請公留一物為別思齊曰吾遠來無所齎騎士曰願得公一臂思齊知不免遂斷與之還未幾死明祖以是心敬擴廓嘗曰吾不能臣王保保其人奇男子也原案關今以邵氏類編補察罕傳以舊史及明史參補擴廓附傳

元史卷四十五 列傳 三

元史卷四十五終

元史卷四十六

儒林一

列傳三十

自女真蹂宋據中原之後廢道德性命之說以辨博長雄為詞章發揚稱述率皆誕漫叢雜理偏而氣豪許衡獨得伊洛之學於南北未通之日及宋亡之後又有江漢趙氏流傳其書北敷於中國保定劉因關中蕭綱始尊信而表章之兼有姚樞竇默廉希憲諸名流主持於上而後學始畫一然許衡初立國學時所教皆蒙古子弟風氣渾厚人材樸茂故先以小學四書端其趨向未暇如宋胡瑗立湖學之法禮樂刑政兵農漕運河渠等事分門講習以儲經濟之實又未嘗如朱熹議貢舉法使經則通漢唐各儒之說史則兼通鑑綱目大學衍義以明體達用可實見諸行

元史卷四十六 列傳

事自是以來沿襲日甚而惟脣腐舌敝於四書之講義以言尊德性則內不出於心得力行以言求實用則不知國計民生為何物且鄙以為俗吏之事議禮止於誠敬言樂止於中和不曉史事則謂漢唐下皆霸道不能修詞則謂之玩物喪志以質疑辨難為躡等以無猷為為涵養德性以深中厚貌為變化氣質甚至治平事業不出於節用愛人一語其能知王道通人情深悉天下之利害而內空淵泉溥博之餘者蓋一代中無一人又況至元平宋之初即罷科舉以吏為師經師老宿稟死山林後生晚進靡所矜式冒進取者又闊遠於事情類為刀筆吏所訕侮所用非所養所養非所用歷朝士風之不振未有如元代者而欲收百年養士之恩於未造不亦難乎今錄國初宋金遺逸

諸儒於前而以制作諸儒傳經諸儒次之其特立獨行自由心得者次於未亦一代得失之林也

趙復

趙復字仁甫德安人太宗七年命皇子闊出帥師伐宋德安以其民嘗逆戰數十萬皆俘戮無遺時楊惟中行中書省軍前姚樞奉詔即軍中求儒道釋醫卜士凡儒生掛倂籍者輒脫之歸復在其中樞與之言奇之以九族俱殘不欲生因與樞訣樞恐其自裁留帳中其宿既覺失復所在遽馳馬周號積屍間行及水際則見復被髮徒跣仰天而號欲投水樞曉以布衣未仕徒死無益不如隨吾而北可以傳學教化復強從之先是南北道絕載籍不相通復至燕以所記程朱諸經傳註盡錄付樞燕學徒從遊者常百餘人世祖在潛邸召見問曰我欲取宋卿可導之乎對曰宋父母國也未有引他人以伐父母者世祖悅因不強之仕惟中聞復論議始嗜學乃與樞謀建書院祠周子以二程張楊游朱六君子配食選取遺書八千餘卷請復講授其中復作傳道圖而以書目條列於後別著伊洛發揮標其宗旨又取伊尹顏淵言行作希賢錄示學者求端用力之方樞既退隱蘇門乃即復傳其學由是許衡郝經劉因皆得其書而尊信之北方知有程朱之學自復始復為人樂易而耿介雖居燕不忘故土與人交尤篤分誼元好問文名擅一時其南歸也復贈之言以博溺心未喪本為戒以自修讀易求文王孔子之用心為勉其愛人以德類若此復家江漢上學者稱之曰江漢先生

元史卷四十六 列傳

此復家江漢上學者稱之曰江漢先生

金履祥

金履祥字吉父婺州蘭谿人其先本劉氏後避吳越錢武肅王嫌名更為金氏履祥從曾祖景文當宋建炎紹興間以孝行著稱履祥事同郡王柏從登何基之門基學於黃幹得朱熹之傳時宋事已不可為履祥遂絕意進取然未忍一日忘世會襄樊之師日急宋人坐視不救履祥因進牽制搆虛之策請以重兵由海道直趨燕薊則襄樊之師不攻自解且備敘海舶所經凡州郡縣邑下至巨洋別島難易遠近歷歷可據以行宋廷臣莫能用及伯顏師入臨安得其書及圖乃命以宋庫藏及圖籍儀器由海道運燕京其後朱清張瑄獻海漕之策所由海道視履祥圖書咫尺無異然後人服其精識德祐初以迪功郎史館編校起

元史卷四十六 列傳

三

之辭弗就宋將改物所在盜起履祥屏居金華山中兵燹稍息則上下巖谷追逐雲月寄情嘯詠視世故泊如也尤篤於分義有故人子坐事母子分配為隸不相聞者十年履祥傾貲營贖卒贖完之後其子貴履祥終不自言相見勞問而已何基王柏之喪履祥率其同門之士以義制服觀者始知師弟之禮履祥以司馬光作資治通鑑託始戰國而周以前則屬祕書丞劉恕為外紀不本於經而信百家之說是非頗謬於聖人不足以傳信自帝堯以前不經夫子所定固野而難質夫子因魯史以作春秋王朝列國之事非有策書赴告則魯史不得而書在聖人筆削之外況左氏所記或闕或誣凡此類皆不得以碎經為辭乃用邵氏皇極經世麻胡氏皇王大紀之例損益折衷一以尚

書為主下及詩禮春秋旁采舊史諸子表年繫事斷自唐堯以下接於通鑑之前勒為二十卷名曰通鑑前編而自書其後曰荀悅漢紀之書志在獻替而遭值建安之季王仲淹續經之作疾病而聞江都之亂泣然流涕曰生民厭亂久矣天將啟堯舜之運而吾不與焉命也斯吾述作之微意也夫他所著書曰大學章句疏義二卷論語孟子集註攷證十七卷尚書表註四卷天麻初廉訪使鄭允中上其書於朝履祥居仁山之下學者因稱為仁山先生其淵源雖出王柏然柏支離桀悍於學實無所得物議不與而履祥踐履實用皆出王柏之上大德中卒至正中賜諡文安王禱為之撰傳見王忠文集

許謙 張樞

元史卷四十六 列傳

四

許謙字益之金華人父觥登宋淳祐七年進士第謙生數歲而孤母陶氏口授孝經論語稍長肆力於學年三十始受業金履祥之門履祥語之曰吾儒之學理一而分殊理不患其不一所難者分殊耳聖人之道中而已學當致其辨於分之殊而要其歸於理之一每事每物求夫中者而用之道不外是矣又曰士之為學若五味之在和醯醬既加則酸鹹頓異子來見我已三日而猶夫人也豈吾之學無以感發子邪謙聞之惕然居數年盡得其所傳之奧讀四書尚書各有叢說若干卷讀詩集傳有名物鈔讀春秋三禮有溫故管窺其觀史有治忽機微做史家年經國緯之法起太皞氏迄宋元祐元年秋九月尚書左僕射司馬光卒備其世數總其年歲原其興亡著其善惡蓋以為光

卒則中國之治不可復興以附於左氏續經之義又有自
省編畫之所為夜必書之其不可書者則不為也延祐初
謙居東陽八華山講學隨其材質咸有成就獨不以科舉
之文授人曰此義利所由分也大德中熒惑入南斗句已
而行謙以災應在吳越竊深憂之是歲大疫謙貌加瘠或
問曰豈食不足邪謙曰今公私匱竭道殣相望吾何能獨
飽廉訪使劉庭直副使趙宏偉皆論薦於朝郡復以遺逸
應詔鄉闈大比請司文衡皆莫能致後至元三年卒年六
十有八嘗以白雲山人自號世稱為白雲先生朝廷賜諡
文懿先是何基王柏及金履祥歿其學猶未大顯至謙而
其道益著學者稱金華四先生然何金許三人篤實皆在
王柏之上江浙行中書省為請於朝建四賢書院以奉祠

元史卷四十六 列傳

五

事而列於學官其弟子著名者有張樞朱震亨震亨兼長
於醫別見藝術傳

張樞字子長金華人許謙之弟子也幼居外家潘氏盡讀
其藏書數萬卷輒通其大意尤長於歷代史書掌故嘗為
春秋三傳歸一義三十卷刊定三國志六十五卷林下竊
議一卷張曲江年譜一卷宋季逸事若干卷詩文曰敝帚
編若干卷卒於至正八年許謙之歿命其子師事樞至正
十一年朝廷纂修宋遼金三史丞相脫脫奏擢遺逸之士
四人以兩院次對之職俾參筆削仍辟樞為本府長史樞
力辭不拜後五年申命史臣纂修本朝后妃功臣傳特起
山林之士五人樞以翰林修撰同知制誥召復不就江西
大吏奉書幣迎主鄉闈文衡返其幣而卻其請四方士莫

不高其風節其卒也黃潛表其墓見黃文獻集

吳澄 鄭淵孫陶孫 牟應龍

吳澄字幼清撫州崇仁人宋末鄉貢士嘗舉進士不第至
元十三年民初附盜賊所在蜂起樂安鄭松招澄居布水
谷乃著孝經章句校定易書詩春秋儀禮及大小戴記侍
御史程鉅夫奉詔求賢江南起澄至京師未幾以母老辭
歸鉅夫請置澄所著書於國子監以資學者朝廷命有司
卽其家錄上元貞初左丞董士選薦澄有道擢應奉翰林
文字有司敦勸久之乃至而代者已到官澄卽日南歸未
幾除江寧儒學副提舉居三月以疾去至大元年召為國
子監丞先是許衡為祭酒始以朱子小學等書授弟子久
之漸失其舊澄更廣以經義各因其材質反覆訓誘其學

元史卷四十六 列傳

六

誠篤不及衡而淹博過之皇慶元年遷司業用程純公學
校奏疏胡文定公六學教法朱文公學校貢舉私議約之
為教法四條一曰經學二曰行實三曰文藝四曰治事未
及行澄一夕謝去諸生有不謁告而從之南者俄拜集賢
直學士俾乘驛至京師次真州疾作不果行英宗卽位超
遷翰林學士先是朝廷集善書者泥金寫浮屠藏經詔澄
為序澄曰佛教所言為善者升高明為惡者墮污穢列聖
之神上同日月何庸薦拔且國初以來凡寫經追薦不知
幾舉若未效是無佛法若已效是誣其祖撰為文辭不可
以示後世會帝崩而止泰定元年初開經筵首命澄與平
章政事張瑄國子祭酒鄧文原為講官先是至治末詔作
太廟議者習見同堂異室之制乃作十三室未及遷奉而

國有大故有司疑於昭穆之次命集議之澄議曰世祖混一天下悉攷古制而行古者天子七廟廟各有宮太祖居中左三廟為昭右三廟為穆昭穆神主各以次遞遷其廟之宮頗如今之中書六部夫省部之設亦倣金宋豈以宗廟敘次而不攷古乎有司急於行事竟如舊次云時澄已有去志會修英宗實錄命總其事居數月實錄成未上即移疾不出中書左丞許師敬奉旨賜宴國史院仍致朝廷勉留之意宴罷即出城登舟去中書問之遣官驛追不及而還詔加資善大夫賜金織文綺二及鈔五千貫澄於易春秋禮記各有纂言而書纂言祇注伏生所傳二十八篇不用東晉梅賾所上偽孔古文尤有卓識又校正老子莊子太玄經樂律及八陳圖郭璞葬書初澄所居草屋數間

元史卷四十六 列傳 七

程鉅夫題曰草廬故學者稱之為草廬先生晚年作尊德性齋記謂問學之功不本於德性則流於訓詁故或者謂澄學宗陸而異朱然其一生從事著述實於陸學無涉也卒年八十五追封臨川郡公諡文正長子文終同知柳州路總管府事京終翰林院典籍官孫當處元末明初以節義著自有傳又有鄭滌孫者字景歐處州人宋景定開登進士第知溫州樂清縣累歷宗正丞禮部郎官至元三十年薦至京世祖召見授集賢直學士尋遷侍講學士乞致仕歸田里弟陶孫字景潛亦登宋進士第監西嶽祠先陶孫徵至闕授翰林國史院編修官會纂修國史至宋德祐末年事陶孫曰臣嘗仕宋宋是年亡義不忍書世祖嘉之授應奉翰林文字後出為江西儒學提舉滌孫兄弟在當

時取號博洽隆福宮太后以其兄弟前朝士製衣親賜人以為異數焉滌孫所著有太易法象通贊周易記玩等書陶孫有文集若干卷吳澄舊史在列傳今移入牟應龍字伯成其先蜀人後徙居吳興祖子才仕宋贈光祿大夫諡清忠父嘯為大理少卿應龍當以蔭補京官盡讓諸從弟而擢咸淳進士第時賈似道當國謂馬廷鸞曰君故與清忠游其孫幸來謁當處以高第應龍拒之不見及對策具言上下內外之情不通及國勢危急之狀考官不敢實上第調光州定城尉沿海制置司辟為屬以疾辭宋亡故相留夢炎事世祖為吏部尚書以書招之許以館職應龍不答起家教授溧陽州晚以上元縣主簿致仕諸經皆有成說惟五經音攷盛行於世又從李心傳游得史

元史卷四十六 列傳 八

學端緒勝國文獻如指諸掌故為文長於敘事時人多求碑版稱曰隆山先生

熊朋來 陸文圭

熊朋來字與可豫章人宋咸淳甲戌登進士第第四人授寶慶府僉書判官未及就而宋亡世祖初得江南盡求宋之遺士用之而朋來隱處州里授生徒無志利祿久之從游日眾名動遐邇廉希憲之子惇為江西參政事以師禮終身稱門人劉宣為按察使尤加禮會朝廷遣治書侍御史王構銓外選於江西於是參政徐珍李世安列薦朋來為閩海提舉儒學官而朝廷以東南儒學之士唯福建廬陵最盛特起朋來連為兩郡教授所至攷古篆籀文字調律呂協詩歌以興雅樂制器定辭必則古昔學者化焉既

滿考以常格調建安縣主簿改福清州判官皆不就自號彭蠡釣叟又號天慵子嘗歎詩樂無傳仿朱子所得趙彥肅家十二詩譜增二十四詩協以律呂俾皆可歌每燕居鼓瑟而歌考槃蒹葭衡門白駒諸詩以自樂嘗著瑟賦二篇學者爭傳誦之門人歸之者日盛旁近舍皆滿至不能容延祐初詔以進士科取士時科舉久廢有司咸不知其典故以不稱明詔爲懼行省官諮於朋來手條程式動中軌轍因以申請四方得遵用之及請爲考試官則曰應試者十八九及吾門不可其後江浙湖廣皆卑詞致禮請爲主文朋來屢往應之及對大廷其所選士居天下三之一焉初朋來以周禮首薦鄉郡而元制周官不與設科治戴記者又勉朋來屢以爲言蓋朋來經學三禮尤深是以當

元史卷四十六 列傳

九

世言禮樂者咸推宗之至治中英宗始采用古禮親御袞冕祠太廟銳意制作翰林學士元明善以朋來薦未及召而卒年七十八所著有瑟譜六卷文集三十卷吳澄銘其墓

陸文圭字子方江陰人幼讀書過目成誦博通經史百家宋咸淳初年十八以春秋中鄉選宋亡隱居城東學者稱之曰牆東先生延祐設科有司強之就試凡一再中鄉舉朝廷數遣使幣聘之以老疾不果行卒年八十有五文圭剛明超邁以奇氣自負於地理攷覈尤詳凡天下郡縣沿革人物土產悉能默記如指諸掌先屬續一日語門人曰以數攷之吾州二十年後必有兵變慘於五代建炎吾死當焚不食之地勿封勿樹使人不知吾墓庶無暴骨之患

其後江陰之亂冢墓盡發人乃服其先知有牆東類彙二十卷融會經傳縱橫變化莫測同里有梁益者字友直其先福州人亦博洽工文自文圭既卒浙以西稱師表者惟益而已益所著書有三山稟詩緒餘史傳姓氏纂又有詩傳旁通發揮朱熹氏學年五十有六卒

劉因 安熙

劉因字夢吉保定容城人世爲儒家父述刻意問學好長嘯中統初劉肅宣撫眞定辟爲武邑令以疾辭歸年四十未有子因生之夕述夢神人馬載一兒至其家既覺而生乃名曰駟字夢驥後改今名及字因天資絕人三歲識書日記千百言過目成誦六歲能詩七歲能屬文落筆驚人甫弱冠才器超邁日閱方冊思得如古人者友之作希聖

元史卷四十六 列傳

十

解國子司業硯彌堅教授眞定因從之游同舍生皆不能及初爲經學究訓詁疏釋之說歎曰聖人精義殆不止此及得周程張邵朱呂之書一見能發其微曰我固謂當有是也嘗評其學之所長曰邵至大也周至精也程至正也朱子極其大盡其精而貫之以正也因早喪父事繼母孝有父祖喪未葬投書先友翰林待制楊恕憐而助之始克襄事因性不苟合不妄交接家雖甚貧非其義一介不取里居教授師道尊嚴弟子造其門者隨材器教之皆有成就公卿過保定者聞名來謁多遜避不見嘗愛諸葛孔明靜以修身之語表所居曰靜修不忽木以因學行薦於朝至元十九年有詔徵因擢右贊善初皇太子建學宮中命贊善王恂教近侍子弟恂卒命因繼之未幾以母疾辭歸

明年丁內艱二十八年復召為集賢學士以疾固辭且上書宰相曰因聞君臣之義無所逃於天地之間因生四十二年未嘗效尺寸之力以報國家養育生成之德而恩命連至因尚敢偃蹇不出以博高尚之名以負國家知遇之恩得罪於聖門中庸之教哉且自幼及長未嘗一日敢為崖岸卓絕之行未嘗自居於高人隱士之目曷者先儲皇以贊善之命來召即與使者俱行再奉旨令教學亦即時應命後以老母中風請還家省視不幸竟遭憂制遂不復出初豈有意於不仕邪今聖天子選用賢良一新時政雖前日隱晦之人亦將出仕況平昔非隱晦者哉又況加以不次之寵處以優崇之地者哉獨是形畱意往命與心違病臥空齋惶恐待罪因素有羸疾自去年喪子憂患之餘

元史卷四十六 列傳 七

繼以疝瘡今歲七月蒸發舊積腹痛如刺下血不已恐一旦身先朝露遂遣人於容城先人墓側修塋待盡乃聞使荷持恩命復至手足不知所措拜命後屈畱使者候病勢稍退即與俱行乃服療至今百無一效皆使者所目擊不得已請其先發伏望閣下俯加鑒諒曲為矜全蓋疏遠微賤之臣與帷幄諸公不同其進退似非難處之事惟閣下始終成就之書上朝廷不強致明年卒年四十五無子延祐中贈翰林學士追封容城郡公諡文靖舊史在列傳今移入安熙字敬仲真定藁城人祖滔父松皆以學行淑其鄉熙既承家學及聞保定劉因而向慕之所居相距數百里將造其門而因已歿乃從因門人烏叔備問緒說錄其遺書而還建祠堂以奉四世冠昏喪祭一遵文公禮書其教人

以敬為本以經術為先弟子去來常至百人出入閭巷帶規佩矩望而知為安氏弟子遺時承平不屑仕進家居教授垂數十年四方來學者多所成就既歿鄉人立祠於藁城之西其門人蘇天爵輯其遺文為默菴集十卷虞集序之曰使熙得見劉氏廓之以高明厲之以奮發則劉氏之學當益昌大於時矣袁桷表其墓見滋溪集道園集清容集

蕭剡 韓擇 侯均 同恕 第五居仁

蕭剡字惟斗其先北海人父仕秦中遂為奉元人剡性至孝少為府史與上官語不合即日謝去隱終南山下鑿土室讀書其中三十年一言一動必則古先久之行解相應內外如一兼以博極羣書自三禮六書九數以及諸史靡不研究及門受業者甚眾嘗出遇一婦人失金釵道旁疑

元史卷四十六 列傳 七

剡拾之釵令隨至門取家釵以償其婦後得所遺釵愧謝還之鄉人有騎馬自城中暮歸者遇盜逐之詭言我蕭維斗也盜驚愕釋去征西兵屯長安大帥一日入未張里里人走避帥諭止之曰汝勿怖聞此有蕭先生者見之即歸吾非侵擾汝也世祖分藩在秦辟剡與楊恭懿韓擇侍秦邸剡以疾辭授陝西儒學提舉不赴省憲大臣即其家具宴為賀使一從史先詣剡舍剡方汲水灌園從史至不知其為剡也使飲其馬即應之不拒及冠帶迎賓從史見剡有懼色剡殊不為意後累授集賢直學士國子司業改集賢侍讀學士皆不赴成宗大德九年夏制若曰蕭維斗山中讀書不求名利皇祖及朕屢召不至豈將命者非其人而不來乎今特命使者前往行省給安車一乘楮幣百匹

學家借來倘堅不欲仕可進嘉言一二朕當遣人送還於是行省臺所在敦道力疾北行會成廟不豫命宰臣以治道爲問武宗至大元年仁宗爲太子博選名儒輔導以右諭德召至京師入覲東宮書酒誥爲獻以朝廷時尚湛飲故也尋以病力請去職人問其故則曰在禮東宮東面師傳西面此禮今可行乎俄除集賢學士國子祭酒依前右諭德復以辭卑居尊爲嫌固辭而歸卒年七十有八賜諡貞敏制行甚高難進易退論者謂元初逸民惟剡與劉因二人其教人必基諸禮發爲文辭言近旨遠尤長六書其示學者入門必自小學始關輔之士翕然興起所著有禮說小學標題駁論九州志及勤齋文集行於世奉元韓擇者字從善尤邃三禮學有質問者口講指畫無弗貫

元史卷四十六

列傳

五

穿士大夫游宦過秦中必往見擇世祖嘗召赴京以疾辭其卒也門人爲服細麻者百餘人又奉元侯均者字伯仁父母蚤亡獨與繼母居賣菜奉養積學四十年羣經百氏無不淹貫每讀書必熟誦乃已嘗言書不干徧讀終於已無益故隨所叩問如取諸篋世咸服其博聞貌嚴氣剛而應接和易用薦起爲太常博士後以上書忤時相意不待報卽歸關中自宋初張載呂大臨以禮爲教至蕭剡韓擇侯均同恕而關學復興其教大旨宗程朱而專精三禮則出其鄉先正之傳云剡之卒也蘇天爵銘其墓見滋溪文集同恕字寬甫其先太原人五世祖遷秦中遂爲奉元人祖昇父繼先博學能文廉希憲宣撫陝右辟掌庫鑰家世業備同居二百口無閒言至元間朝廷始分六部選名士爲

吏屬關陝以恕貢禮曹辭不行仁宗踐阼卽其家拜國子司業使三召不起陝西行臺侍御史趙世延請卽奉元置魯齋書院以恕領教事學者殆千數延祐設科再主鄉試六年以左贊善召入見東宮賜酒慰問繼而獻書歷陳古誼盡開悟涵養之道明年春英宗繼統以疾歸致和元年拜集賢侍讀學士以老疾辭恕之學長於禮平居盛暑未嘗不冠帶居父喪哀毀幾喪明祭必如事生扁所居曰架菴與人交雖外無適莫而中有繩尺家無儋石之儲而聚書萬卷時蕭剡居南山下亦以道高當世入城府必主恕家恕自京還家居十三年海內並稱蕭同後至元二年卒年七十有八制贈翰林直學士封京兆郡侯諡文貞其所著曰架菴集二十卷弟子第五居仁字士安幼師蕭剡弱冠從恕受學博通經史躬率子弟力農而學徒滿門嘗行田間遇有竊其桑者自引避之鄰人借驛而死償其直不受曰物之數也何以償爲鄉里高其行訖率多化服稱曰靜安先生

元史卷四十六

列傳

五

杜瑛

杜瑛字文玉其先霸州信安人父時昇金史有傳瑛長七尺美須髯氣貌魁偉金將亡士猶以文辭規進取瑛獨避地河南緱氏山中時兵後文物彫喪瑛搜訪諸書究古今得失中書粘合珪開府彰德瑛赴其聘遂家焉與良田千畝辭不受術者言其所居下有藏金家人欲發視輒止之後來居者果得黃金百斤其不苟取如此歲己未世祖南伐至彰德召見問計瑛從容對曰漢唐以還人君所恃以

爲國者法與兵食三事而已國無法不立人無食不生亂無兵不守今宋皆蔑之殆將亡矣興之在聖主若控囊機之師委戈下流以擣其背大業可定也帝悅曰儒者中乃有人乎瑛復勸帝數事以謂事不如此後當如彼帝納之心賢瑛謂可大用命從行以疾弗果中統初詔徵瑛時王文統方用事辭不就左丞張文謙宣撫河北奏爲懷孟彰德大名等路提舉學校官又辭遺執政書略言天子神聖俊又幅湊言納計用宜用經術取士與先王之禮樂教化以育材正俗立百年不拔之基不當專任刀筆吏從事簿書期會文法末節反出漢唐之下人或勉之仕則曰爲政不能復古因習舊敝不知先王之法爲何事以此求治不亦難乎吾不能苟且隨時將焉用仕於是杜門著書一

元史卷四十六 列傳 五

不以窮通得喪動其志年七十遺命其子處立處愿曰吾卽死當表吾墓曰緱山杜處士天庥中贈翰林學士追封魏郡公諡文獻所著書曰春秋地理原委十卷語孟旁通八卷皇極引用八卷皇極疑事四卷極學十卷律呂律麻禮樂雜志三十卷文集十卷其於律則究其始研其義長短清濁周徑積實各以類分取經史而折衷其是非其於麻則謂造麻者皆從十一月甲子朔夜半冬至爲麻元獨邵子以爲天開於子取日甲月子星甲辰子爲元會運世之數無朔虛無閏餘率以三百六十爲歲而天地之盈虛百物之消長不能出乎其中矣論閉物開物則曰開於己閉於戊五天之中也六地之中也戊己月之中星也又分卦配之紀年金之大定庚寅交小過之初六國朝之甲寅

三月二十有二日寅時交小過之九四多先儒所未發授其要著於篇云舊史在隱逸傳今移入

張特立

張特立字文舉東明人初名永避金衛紹王諱易今名中泰和進士爲偃師主簿改宣德州司候州多金國戚號難治特立至官俱往謁之有五將軍率家奴劫民羣羊特立命大索閭里遂造將軍家溫言誘之曰將軍宅廩有盜羊者邪聊視之以杜眾口潛使人索其後庭得羊數十遂縛其奴繫獄其子匿他舍捕得之以近族得減死論豪貴由是遵法正大初遷洛陽令時軍旅數起郡縣窘迫東帥紇石烈牙兀台又侮慢儒士會移鎮陝右道經洛陽見特立古樸不禮之遽責令治糧具期三日足後期如軍法縣民

元史卷四十六 列傳 六

素賢特立爭輸於庭帥大奇之旣而拜監察御史首言世宗諸孫不宜幽囚尙書右丞顏蓋石魯與細民爭田參知政事徒單兀典諂事近習皆當罷黜執政者忌之會平章白撒犒軍陝西特立又劾其掾不法白撒訴於金哀宗言特立所言事失實哀宗宥之遂歸田里特立通程氏易晚教授諸生東平嚴實每加禮焉歲丙午世祖在潛邸諭曰前監察御史張特立養素巨園易代如一白首通經誨人不倦今年幾七十研究聖經宜錫嘉名以光潛德可特賜號中庸先生且名其讀書之堂曰麗澤癸丑卒年七十五所著有易集說歷年繫事記舊史在隱逸傳今移入

陳庚

陳庚字子京平陽人金末四方兵起隱盧氏山中旋署郡

教授日與弟子講習問辨來學日眾會中書令耶律鑄奏
置經籍所於平陽命庾頌校讎事世祖徵至六盤山與語
大悅中統初以宣慰張德輝薦授平陽路提舉學校官進
德義樹教化勉學戒惰風俗一變其學沈潛貫穿先行後
言其事親也日暮必盛服與兄弟婦妯序拜堂下問起居
受訓敕然後退居洛西每值佳辰令節具琴尊約親友奉
父仲謙升藍輿登女几山歷白馬烏喙諸峯上龍門臨八
節灘徘徊嵩高少室訪裴司空邵康節遺迹然後歸及遭
亂離執喪盡禮兵寇相戒無犯其境與元好問李獻卿李
微楊奐麻革杜仁傑商挺諸人友善早居汴翰林學士趙
秉文楊雲翼參政楊慥監察御史雷淵劉祖謙爭相薦引
莫能屈太原李汾者負才使氣一日會相國寺語侵庾庾

元史卷四十六 列傳

七

正色曰漢有董賈唐有杜韓宋有歐蘇皆能上為國家重
下為儒林表我輩幸遭盛明不能以道義勸猷濟世徒以
文墨小技陵人乎李沮而退坐客大服故其教人也一本
諸道德仁義臨終猶手書為學之要九篇以遺子孫嘗有
馬病腰醫小愈或欲售之庾曰安用誤人為後鄉里見人
儉薄輒曰君是不鬻馬陳先生邪嘗暮歸得金釵玉瑤道
旁求主名三日不得潛瘞其所過樂安誤碎逆旅主人器
論償不受密緘白金臥所而去見貧乏不能自存孤惻不
能婚嫁者必資給之一日語兄廣曰吾聞財多害身今喪
亂若此而吾廩有餘粟藏有餘布不散不止與為他人守
孰若分諸鄰里鄉黨乎兄大喜立散之所著書有經史要
論三十卷三代治本五卷唐編年二十卷澹軒文集三十

卷程文海銘其墓

見雪樓集

儒林二

張翌

孔思晦 趙侃

張翌字達善其先蜀之導江人蜀亡僑寓江左金華王柏
得朱熹三傳之學講道上蔡書院翌從而受業焉自六經
語孟傳註以及周程張邵之微言朱子所嘗論定者靡不
潛心玩索究極根柢久而不懈所學益宏深微密南北士
魁能及之世祖至元中行臺中丞吳曼慶聞其名延至江
寧學宮中州士大夫皆遣子弟從游或闕私塾迎之其在
真州來學者尤眾遠近翕然尊之稱曰導江先生以大臣
薦朝命為孔顏孟三氏教授著釋奠儀注其序曰禮曰皮
弁祭菜示敬道也禮書殘缺釋奠釋菜名義徒存儀文無

元史卷四十六 列傳

六

可攷者唐開元禮彷彿儀禮饋食篇節文為詳朱文公謂
政和新儀差錯獨於開元禮有取申明至於再三竟格不
下身歿之後郡邑倣而行之能通其義者少矣中原文物
肇起四方取則舍魯奚適闕里昔羅兵革宮室荆榛蓋三
十年牲殺器皿衣服不備勢使然而儀章度數固多可
議者象設非古也開元禮猶云設席是無象也高臺巍坐
而席地之禮不可見帶劍秦漢冠服之飾也開元禮朝會
猶有解劍之席冕服挾劍未之前聞二者之失所從來久
矣神位西坐東向戶位也配位東坐西向主人位也自尸
禮廢禮家謂自內出者無匹不行自外至者無主不止故
立神以配而為主焉開元以後遷神位南面配位猶故也
進顏孟南向參列如浮圖老子宮者孔氏祖庭廣記謂金

大定十四年所行何所稽乎楹間兩階五齋三酒以四代之器為備物之享也列數瓦缶果為何說尸尊不就洗禮也登饗爵於牀洗者以尸尊自居犧象不錯諸地主人遂不坐寶爵簡亦甚矣幣之未薦置諸神位之左示不敢褻陳之階凡與主人俱升則不嚴矣蓋事由草創未之講也予典教於茲思有以正之乃取朱文公所攷訂自儀禮開元禮而下哀為一編命學徒肄習且與講說義數使之入耳著心既知義理之安將不期改而自改併附社稷風雨雷之祀庶幾好禮者有取焉若夫器樂冠服之度則又博采諸家之說從其是者與此篇并藏孔氏俾後來之文獻足徵云嬰氣字端重音吐洪亮講說特精詳子弟從之者說說如也其及門知名者甚多夾谷之奇楊剛中尤顯卒

元史卷四十六 列傳 九

無子有經說及文集行世吳澄序其書以為議論正援據博貫窮縱橫儼然新安朱氏之尸祝也至正中真州守臣以嬰及郝經吳澄皆常留儀真作三賢祠祀焉
孔思晦字明道孔子五十四世孫受業於導江張嬰家貧躬耕為養雖寒暑力學不懈遠近爭聘為師大德中游京師祭酒耶律有尚欲薦之以母老辭歸居喪勺水不入口者五日至大中舉茂才為范陽儒學教諭延祐初調靈陽學先是兩縣校官率以廩薄不能守職而思晦儉約自持教養有法比代去學者皆不忍舍之於是孔氏族人相與議思晦適長且賢宜襲封爵奉祠事狀上政府事未決仁宗雅尚儒道一日問孔子裔今幾世襲爵為誰廷臣對曰未定帝親取孔氏譜牒按之曰以嫡且長者思晦也復笑

疑命襲封衍聖公月俸五百緡賜四品印泰定三年山東廉訪副使王鵬南言襲爵上公而階止四品於格弗稱且失尊崇意明年改賜三品印初廟燬於兵後雖苟完而角樓圍牆及金絲堂皆未備思晦竭力營度以復其舊祭器禮服悉加整飭又以尼山故廟已毀民冒耕祭田且百年思晦復其田里請置尼山書院以列於學官三氏學舊有田三千畝占於豪民子思書院舊有營運錢萬緡歲取子息以供祭祀久之并負其本思晦皆理而復之聖父舊封齊國公思晦言於朝曰宣聖封王而父爵猶公願加褒崇乃詔加封聖父啟聖王聖母王夫人五季時孔末之後方盛欲以偽滅真害宣聖子孫幾盡至是其裔復欲冒稱宣聖後思晦以為不共戴天遂會族人稽典故斥之既又重

元史卷四十六 列傳 十

刻宗譜於石以杜偽冒元統元年卒至正中賜諡文肅子克堅襲封衍聖公至正十五年召為同知太常禮儀院事拜陝西行臺侍御史遷國子祭酒擢山東廉訪使不赴孫希學襲衍聖公自列傳
趙侃字和之金章宗時試太常禮樂科中首選由協律郎累官古樂署直長金末南遷校量鐘律獨黃鐘抑而不揚既至汴林鐘復爾雖更鑄尚然嘆曰八音與政通陰陽消長所在中興其不競乎既而金亡嘗會飲市樓樂甫作語所知曰革音很戾即去果有酬而鬪死者壬辰北渡後隱居鄉里編集祀典樂志辯三十卷曰以備他日之訪求也戊戌衍聖公孔元揚薦於朝攝大樂丞乘傳徧歷四方搜訪前代禮官樂師祭器圖籍故中統以來文物制作郁然

侃有力焉王暉爲作盧龍趙氏家傳見秋澗集

耶律有尙

耶律有尙字伯強遼東丹王十世孫祖父在金世嘗官於東平因家焉有尙受業許衡以誠篤稱高弟子言動必中規矩識與不識莫不服其爲有道之士至元八年衡除集賢大學士兼國子祭酒以教國人之子弟乃奏以門人十二人爲齋長伴讀有尙其一也及衡告歸以有尙爲助教嗣領學事居久之拜監察御史不赴除祕書監丞出知薊州爲政以寬簡得民情皇太子召爲詹事院長史自有尙去而大學事頗廢乃復除國子司業時學館未建師弟子皆寓居民屋有尙屢以爲言二十四年朝廷乃大起學舍始立國子監增廣弟子員於是尙遷國子祭酒士風再

元史卷四十六 列傳

主

振二十七年以親老辭職歸大德改元復召爲國子祭酒尋除集賢學士兼其職頃之遷太常卿又遷集賢學士八年葬父還鄉里已而朝廷思用老儒以安車召之於家累辭不允復起爲昭文館大學士兼國子祭酒有尙前後五居國學其立教不尙文辭惟以反身窮理爲本致誠力行爲先是諸生知趨正學崇經術多成德達材之士卒年八十有六諡文正舊史在列傳今移入

楊桓

楊桓字武子兗州人幼警悟讀論語至宰予晝寢章慨然有立志由是終身非疾病未嘗晝寢弱冠爲郡諸生補濟州教授召爲太史院校書郎奉敕撰儀表銘麻日序文辭典雅賜楮幣千五百緡辭不受遷祕書監丞至元三十一

年拜監察御史有得玉璽於木華黎曾孫碩德家者桓辨其文爲秦璽語詳禮志卽爲文述璽始末奉上徽仁裕聖

皇后成宗卽位疏上時務二十一事一日郊祀天地二日親享太廟備四時之祭三日先定首相四日朝見羣臣訪問時政得失五日詔儒臣以時侍講六日設大學及州郡學教養生徒七日行誥命以褒善敘勞八日異章服以別貴賤九日正禮儀以肅宮庭十日定官制以省內外冗員十一日講究錢穀以裕國用十二日訪求曉習音律者以協太常雅樂十三日國子監不可隸集賢院宜正其名十四日試補六部寺監及府州司縣吏十五日增內外官吏俸祿十六日禁父子骨肉奴婢相告許十七日定婚姻聘財十八日罷行用官錢營什一之利十九日復笞杖以別輕重之罪二十日郡縣吏自中統前仕宦者宜加優異二十一曰爲治之道宜各從本俗奏入帝嘉納之未幾擢祕書少監預修大一統志秩滿歸兗州以貲業悉讓弟楷鄉里稱焉大德三年以國子司業召未赴卒年六十有六桓爲人寬厚篤孝博覽羣籍尤精篆籀著六書統六書源流書學正韻大抵推明許慎之說皆行於世自列傳移入

元史卷四十六 列傳

主

贈思

贈思字得之其先大食國人元初內附大父魯坤以材授眞定濟南路監榷課稅使因家眞定父幹直始從儒門先生問學輕財重義不干仕進贈思生九歲日記古經傳千言比弱冠以所業就正於翰林學士承旨王思廉之門由是博極羣籍踐履篤實延祐初詔以科第取士贈思不應

既而侍御史郭思貞翰林學士承旨劉廣參政王士熙交章論薦泰定三年詔以遺逸徵至上都見帝龍虎臺時倒刺沙柄國西域人多附焉贍思獨不往屢使人招致之以養親辭歸天祿三年召為應奉翰林文字賜對奎章閣進所著帝王心法預修經世大典以論議不合求去命奎章閣侍書學士虞集諭留之贍思堅以母老辭遂賜幣遣之後至元二年拜陝西行臺監察御史即上封事十條曰法祖宗攬權綱敦宗室禮勳舊惜名器開言路復科舉罷數軍一刑章寬禁網時姦臣變亂成憲贍思所言皆人所不敢言戚里有執政陝西行省者恣為非道贍思發其罪而按之輒棄職夜遁會有詔勿逮問然猶杖其私人及分巡雲南按省臣之不法者其人即解印去遠藩震悚襄漢流

元史卷四十六 列傳

三

民悉居宋紹熙府故地私開鹽井自相部署往往劫囚徒殺巡卒贍思禽其魁而釋其黨復上言紹熙土饒利厚流戶日增若以其人散還本籍恐為邊患宜設官府以撫定之詔即其地置宣撫司三年除僉浙西廉訪司事即按問都轉運鹽使海道都萬戶行宣政院等官贓罪浙右郡縣無敢為貪墨者復議以浙右諸僧寺私蔽猾民有所謂道人道民行童者類皆瀆常倫隱徭役使民力日耗契勘嘉興一路為數已二千七百請勒歸本族俾供王賦朝廷即著為令四年改僉浙東廉訪司事以病免歸贍思歷官臺憲所至以理冤澤物為己任屢平反大獄然未嘗故出人罪以市私恩至正四年除江東廉訪副使十年召為秘書少監議治河事皆辭疾不赴十一年卒於家年七十有四

追封恆山郡侯諡文孝所著述有四書闕疑五經思問奇偶陰陽消息圖老莊精詣鎮陽風土記續東陽志重訂河防通議西國圖經西域異人傳金哀宗紀正大諸臣列傳審聽要訣及文集三十卷

袁桷

袁桷字伯長慶元人宋同知樞密院事詔之曾孫龍圖閣學士燮之從孫也家世文學桷少從王應麟講求制度典故之學又學古文於戴表元故精博有根柢舉茂材異等為麗澤書院山長成宗大德初閭復程文海王構薦為翰林國史院檢閱官時初建南郊桷進十議曰天無二日天尤不得有二五帝不得謂之天作昊天五帝議祭天歲或為九或為二作祭天名數議圓丘不見於五經郊不見於

元史卷四十六 列傳

四

周官作圓丘非郊議后土社也作后土即社議三歲一郊非古也作祭天無間歲議燔柴見於古經周官以禋祀為天其義各有旨作燔柴泰壇議祭天之牛角繭栗用牲於郊牛二合配而言之增羣祀而合祠非周公之制矣作郊不當立從祀議郊質而尊之義也明堂文而親之義也作郊明堂禮儀異制議郊用辛魯禮也卜不得常為辛作郊非辛日議北郊不見於三禮尊地而遵北郊鄭玄之說也作北郊議禮官推其博多見施行遷應奉翰林文字同知制誥兼國史院編修官請購求遼金宋三史遺書歷兩考遷待制又再任拜集賢直學士久之移疾去復召入改翰林直學士知制誥同修國史至治元年遷侍講學士泰定初辭歸桷在詞林朝廷制冊勳臣碑銘多出其手博聞洽

識尤長江左文獻嘗謂張伯雨宋東都典故能以歲紀之南渡以後事能以月舉之所著有易說春秋說清容居士集泰定四年卒年六十一追封陳畱郡公諡文清蘇天爵銘其墓見滋溪文稿

曹元用

曹元用字子貞世居阿城後徙汶上祖義不仕父宗輔德清縣主簿元用始以鎮江路儒學正考滿游京師翰林承旨闔復於四方士少許可及見元用大奇之薦爲翰林國史院編修官即論史院寮屬非材請較試取其優者用之御史臺辟爲掾史元用初不習吏事而見事明決吏反師之轉中書省右司掾與清河元明善濟南張養浩號爲三傑除應奉翰林文字遷禮部主事時累朝皇后既崩者猶

元史卷四十六 列傳

蓋

以名稱而未有諡號元用言后爲天下母豈可直稱其名宜加徽號以彰懿德改尚書省右司都事轉員外郎及尚書省罷退居任城久之齊魯間從學者甚眾延祐六年授太常禮儀院經歷屬英宗躬修祀事銳意禮樂其親祀儀注鹵簿輿服之制率所裁定初太廟九室合饗於一殿仁宗崩無室可耐乃於武宗室前結綵爲次英宗在上京召禮官集議元用言古者宗廟有寢有室宜以今室爲寢當更營大殿於前爲十五室帝嘉其議行之授翰林待制擢直學士至治三年八月鐵失之變賊黨赤斤遠至京師收百司印趣召兩院學士北上元用獨不行曰此非常之變吾寧死不從未幾賊果敗泰定二年授太子贊善轉禮部尚書兼經筵官及大朝會爲糾儀官申卷班之令俾以序

退無爭門而出之擾又謂太醫儀鳳教坊等官不當序正班當自爲一列後皆遵行時宰執有欲罷科舉法者又有欲損太廟四時之享止存冬祭者元用皆斥其非三年夏帝以日食地震星變詔議所以弭災者元用謂應天以實不以文修德明政應天之實也宜擯浮費節財用選守令恤貧民嚴禮祀汰佛事止造作以紓民力慎賞罰以示勸懲皆切中時敝又論科舉取士之法當革冒濫嚴攷覈俾得真材之用拜翰林侍講學士兼經筵官預修仁宗英宗兩朝實錄又奉旨纂集甲令爲通制譯唐貞觀政要爲蒙古語書成皆行於時凡大制誥率元用所草天祿二年代祀曲阜孔子廟還以司寇像及代祀記獻帝甚喜值太禧宗禮院副使缺中書奏授元用帝不允曰此人翰林中所

元史卷四十六 列傳

美

不可無者將大用之會卒帝嗟悼賜賻鈔五千緡追封東平郡公諡文獻詩文四十卷號超然集二子偉儀自列傳移入

儒林三

胡長孺 胡一桂 胡炳文 陳櫟 陳祐

胡長孺字汲仲婺州永康人其先世當唐季自天台來徙宋南渡後以進士科出身者十人持節分符先後相望祖巖起嘉定甲戌進士知福州閩縣事父居仁淳祐丁未進士知台州軍州事皆以文辭政事聞於時長孺少從外舅僑蜀銓試第一與高彭李湜梅應春等號南中八士屢遷福寧州倅會宋亡退棲永康山中至元二十五年詔下求賢有司強起之至京師待詔集賢院既而召見內殿拜集賢修撰與宰相議不合改教授揚州元貞元年移建昌轉

台州路寧海縣主簿大德丁未浙東大祲戊申復無麥民相枕死宣慰同知脫歡察議行振荒之令斂富人錢百五十萬給之至縣以餘錢二十五萬屬長孺貯之乃行旁州長孺察其有乾沒意悉散於民閱月再至索其錢長孺奉成案進曰錢在是矣脫歡察怒甚然不敢問縣有銅巖惡少年狙伺其閒恆出抄掠長孺僞衣商人服令蒼頭負貨以從陰戒驕卒十人躡其後至巖中禽之俾盡首其黨實於法夜行無虞羣姬聚浮屠庵誦佛經為禳祈一姬失其衣適長孺出姬訟之長孺以牟麥真羣姬合掌中命繞佛誦經如初身自閉目叩齒作集神狀且曰吾使神監之矣盜衣者行數周麥當芴一姬屢開掌視長孺指縛之還所竊衣督白事帥府歸吏言有姦事屢問弗服者長孺夜伏

元史卷四十六 列傳

毛

吏案下佯言有詔出迎之縛姦者置東西楹空縣而出庭無一人姦者相謂曰事至此死亦無承行將自解矣語畢案下吏囁而出姦者叩頭驚服永嘉民有弟質珠步搖於兄者贖焉兄妻貪之給以亡於盜屢訟不獲直往告長孺長孺曰爾非吾部民也叱之去未幾長孺治他盜令盜誣訟者兄受步搖為贓逮至辨甚力詰曰爾家故有何謂誣其人叩頭曰誠有之乃弟所質者趣持至呼其弟示曰非爾家物乎遂還之延祐元年以病辭歸不復仕隱杭之虎林山以終長孺初師青田余學古學古師其同邑王夢松夢松傳龍泉葉味道之學味道則朱熹弟子也胡一桂字庭芳徽州婺源人父方平從饒州德興沈貴寶受朱熹之易於黃夢程嘗著易學啟蒙通釋一桂承其家

學宋景定間年十八領鄉薦試禮部不第退而講學遠近師之號雙湖先生所著書有周易本義纂疏本義啟蒙翼傳朱子詩傳纂疏十七史纂並行於世其同郡胡炳文字仲虎亦以易名家作易本義通釋而於朱熹所著四書用力尤深與餘干饒魯皆羽翼朱氏傳注鄉塾童蒙戶有其書所居室面南山一峯學者稱雲峯先生炳文嘗用薦署明經書院山長再調蘭溪州學正二人之學皆不如長孺所得之深又有陳櫟者字定字徽之休寧人著四書發明書傳纂疏禮記集義等書專發明朱氏學延祐初詔以科舉取士櫟不欲就試有司強之鄉閭中選遂不復赴禮部教授於家不出門戶者數十年揭傒斯誌其墓乃與吳澄並稱然澄於漢唐諸傳說多所旁通而櫟則墨守一家言

元史卷四十六 列傳

毛

不容一字出入其於朱氏學亦僅涉其藩而未深入也與胡一桂胡炳文略等又有都昌陳澐者號雲柱行事無攷著禮記集說以便蒙誦明代科舉因禮記無專經師姑用以取士遂從祀闕里

吳師道

吳師道字正傳婺州蘭溪人自羈卯知學即善記覽工詞章才思溢涌發為歌詩清麗俊逸弱冠因讀宋儒真德秀遺書幡然有志於為己之學又從事同郡許謙登至治元年進士第授高郵縣丞明達文法吏不敢欺再調寧國路錄事會歲大旱饑民仰食於官者三十三萬口師道勸富民捐粟三萬七千六百石又言於部使者請官粟四萬石鈔三萬八千四百錠振之人賴以存活遷池州建德縣尹

郡學有田七百畝為豪民所占師道按其圖籍悉以歸於
學建德素少茶而權稅重極言於所司減權額民以不病
中書左丞呂思誠侍御史孔思立薦為國子助教尋遷博
士六館諸生人人自以為得師以禮部郎中致仕終於家
所著有易詩書雜說春秋胡傳附辨戰國策校註敬鄉錄
及文集二十卷其學亦在王柏之上同郡有王餘慶字叔
善仕為江南行臺監察御史亦以儒學名重當世

韓性

程端禮端學

周仁榮仔肩

孟夢恂

韓性字明善紹興人其先家安陽宋魏忠獻王琦八世孫
也高祖左司郎中膺胄扈從南渡家於越性七歲讀書日
記萬言九歲通小戴禮作大義文意蒼古老生宿學皆稱
異焉及長博綜羣籍文辭博達儔俦變化不測自成一

元史卷四十六

列傳

五

言延祐初以科舉取士學者多請其程式性告以朱熹學
校貢舉私議俾從事根柢以應有司之求性出無與馬僕
御所過負者息肩行者避道巷夫街叟至於童穉廝役咸
稱之曰韓先生云憲府嘗舉為教官不赴暮年愈自韜晦
然郡之良二千石往咨訪政事皆心折以去天祿中趙世
延以名上聞後十年門人李齊為南臺監察御史力舉其
行義而性已卒矣南臺御史中丞月魯不花嘗學於性為
請於朝賜諡莊節先生其所著有禮記說四卷詩音釋一
卷書辨疑一卷郡志八卷文集十二卷當性時慶元有程
端禮端學兄弟者端禮字敬叔慶元自宋季皆尊尚陸九
淵氏之學端禮獨從史蒙卿游以傳朱熹氏窮理讀書之
指學者及門甚眾所著有讀書工程國子監以頒示郡邑

校官為學者式仕衢州路儒學教授卒端學字時叔通春
秋登至治辛酉進士第改國子助教動有師法學者嚴憚
遷太常博士卒後以子徐貴贈禮部尚書所著有春秋本
義三十卷三傳辨疑二十卷春秋或問十卷

周仁榮者字本心台州臨海人父敬孫宋太學生從金華
王柏講學於台之上蔡書院與同郡楊珣陳天瑞車若水
黃超然朱致中薛松年等同門嘗著易象占尚書補遺春
秋類例仁榮承其家學又師珣天瑞治易禮春秋而工為
文章用薦者署美化書院山長地在處州萬山中人魁知
學仁榮舉行鄉飲酒禮士俗為變後辟江浙行省掾史省
臣皆呼以先生泰定初召拜國子博士遷翰林院修撰其
所教弟子多名人而泰不華取著鄭元祐僑吳集紀仁榮

元史卷四十六

列傳

五

逸事云仁榮居台州築一室甫落成有友人楊公道與疾
至門曰願假君新宅以死仁榮讓正寢居之妻子咸不然
仁榮弗顧未幾楊死箱財二十有八莫有主者楊之弟詣
仁榮求分財仁榮不許曰若兄寄死於我意固在是喪事
之需悉自己出對眾封籍所貯物遣人至平陽呼其子至
悉付與之其篤於親故如此仁榮弟仔肩字本道以春秋
登延祐五年進士第終惠州路總管府判官亦以文學名
同郡有孟夢恂者字長文黃巖人與仁榮同師事楊珣陳
天瑞以薦署本郡學錄至正十三年以設策禦寇擿擿鄉郡
有功授常州路立興縣判官未受命而卒賜諡號曰康靖
先生所著有性理本旨四書辨疑漢唐會要七政疑解及
筆海雜錄五十卷此皆浙東之儒傳金華之學不失師傳

者

黃澤

黃澤字楚望蜀之資江人蜀土治經必先古注疏澤於名物度數攷覈精審而義理一宗程朱作易春秋二經解二禮祭祀述略大德中江西行省相臣聞其名授江州景星書院山長使食其祿以施教又為山長於洪之東湖書院受學者益眾秩滿即歸閉門授徒以養親不復言仕嘗揭六經中疑義千餘條以示學者令其自思索而得之自言每於幽閒寂寞顛沛流離疾病無聊之際盡悟失傳之旨及其久也則豁然無不貫通於易以明象為先其機括則盡在十翼作十翼舉要忘象辨象略辨同論於春秋以明書法為主其大要則在攷覈三傳作三傳義例攷筆削本

元史卷四十六 列傳

三

旨又作元年春王正月辯諸侯娶女立子通攷魯隱公不書即位義殷周諸侯禘祫攷周廟太廟單祭合食說作上甲辯如是者十餘通以明古今禮俗不同見虛辭說經之無益嘗言學者必悟經旨廢失之由然後聖人本意可見若易象義例與春秋書法大略相似苟通其一則餘可觸類又懼學者道聽耳食不復致思故所著多引而不發乃作易學濫觴春秋指要示人以求端用力之方其於禮學則謂鄭氏深而未完王肅明而實淺作禮經復古正言如王肅混郊丘廢五天帝併崑崙神州為一趙伯循言王者禘其始祖之所自出以始祖配之而不及羣廟之主胡宏家學不信周禮以社為祭地之類皆引經以證其非其辯釋諸經要旨則有六經補注詆排百家異議則有翼經罪

言近代經學覃思推澤為第一吳澄嘗觀其書以為平生所見明經士未有能及之者然澤雅自慎重未嘗輕與人言李河使過九江請北面稱弟子受一經且將經紀其家澤謝曰以君之才何經不可明然筆授其義終非心得若余則悟於艱苦之餘吾非邵子不敢以二十年林下期君也河歎息而去家甚窶貧且年老不復能教授經歲大祿家人采木實草根以療饑晏然曾不動意至正六年卒年八十七門人惟新安趙汭為高弟傳其春秋之學

儒林四

董朴

董朴字大初順德人自幼強記比冠幡然有求道之志至元十六年用薦起家為陝西知法官未幾以親老歸養尋

元史卷四十六 列傳

三

召為太史院主事復辭不赴皇慶初年已踰八十詔以翰林修撰致仕延祐三年無疾而終朴所為學自六經及孔孟微言與凡先儒所以開端闡幽者莫不研極其旨而會通之故其心所自得往往有融貫之妙其事親孝與人交無智愚貴賤一待以誠或有犯之者夷然不與校中山王結曰朴之學造詣既深充養交至其為人清而通和而介君子人也所居近龍岡學者因稱之曰龍山先生云

宇文公諒

宇文公諒字子貞其先成都人父挺祖徙吳興公諒弱冠有操行嘉興富民延為子弟師夜將半聞有叩門者問之乃一婦人聲公諒叱去之翼日即以他事辭歸終不告以其故至順四年登進士第授徽州路同知婺源州事改同

知餘姚州事夏不雨公諒出禱輒應省檄察實松江海塗田公諒以潮汐不常後必遺患請一概免科省臣從之除國子助教調應奉翰林文字同知制誥兼國史院編修官以病得告改僉嶺南廉訪司事以疾請老公諒平居雖暗室必正衣冠端坐嘗挾手記一冊晝有所爲夜必書之其不可書即不敢爲所著述有折桂集觀光集璧水集以齋詩藥玉堂漫稿越中行稿凡若干卷門人私諡曰純節先生

杜本

杜本字伯原其先居京兆後徙天台又徙臨江之清江博學善屬文江浙行省丞相忽刺木得其救荒策奇之薦於武宗嘗被召至京師未幾歸隱武夷山中文宗在江南時

元史卷四十六 列傳

重

聞其名及即位以幣徵不起至正三年右丞相脫脫以隱士薦召爲翰林待制兼國史院編修官行至杭州稱疾固辭而致書於丞相曰以萬事合爲一理以萬民合爲一心以千載合爲一日以四海合爲一家則可言制禮作樂而躋五帝三王之盛矣謹誦所聞以備采納何必躬造闕庭哉遂不行本湛靜寡欲無疾言遠色與人交尤篤於義有貧無以養親無貲以爲學者皆濟之天文地理律厯度數靡不通究尤工篆隸所著有四經表義六書通編十原等書學者稱爲清碧先生至正十年卒年七十有五

孫轍

吳定翁

孫轍字履常其先自金陵徙家臨川轍幼孤母蔡氏教之知警策自樹立比長學行純篤事母甚孝家居教授問業

者日盛部使者長吏以下慕其賢者必造焉轍樂易莊敬接之以禮言不及官府憲司屢辟皆不就江西行省特以遺逸舉轍一人吳澄嘗敘其集曰所謂仁義之言藹如也元統二年年七十有三卒於家同郡吳定翁字仲谷其先當宋初自金陵來徙定翁清修文雅與孫轍齊名而取工於詩揭傒斯稱其幽茂疏澹可比盧摯辟薦相望終身不出嘗曰士毋求用於世惟求無愧於世人以爲名言

何中

危復之

何中字大虛撫州樂安人家有藏書手自校讐其學宏深該博廣平程鉅夫清河元明善柳城姚燧東平王構同郡吳澄揭傒斯皆推服之至順二年江西行省平章全岳柱聘爲龍興郡學師明年六月以疾卒所著有易類象二卷

元史卷四十六 列傳

重

書傳補遺十卷通鑑綱目測海三卷知非堂彙十七卷同郡危復之字見心宋末爲太學生工詩師事湯漢博覽羣書尤好讀易世祖至元開元帥郭昂屢薦爲儒學官不就朝廷屢遣使以幣徵之皆弗起隱紫霞山中士友私諡曰貞白先生

武恪

武恪字伯威宣德府人初以神童游學江南吳澄爲江西儒學副提舉薦入國學明宗在潛邸選爲說書秀才及出鎮雲南恪在行明宗欲起兵陝西恪諫曰太子北行於國有君命於家有叔父之命今若向京師發一箭史官必書太子反左右惡恪言乃曰武秀才有母在京合遣其回恪遂還京師居陋巷教訓子弟文宗知其名除祕書監典簿

秩滿丁內艱再除中瑞司典簿改汾西縣尹皆不起人或勸之仕恪曰向為親屈今親已死不復仕矣居數歲會朝廷選守令秦不華舉恪為平陽沁水縣尹亦不赴近臣又薦為授經郎恪遂陽為瘖瘡恪好讀周易每日堅坐與人言學必以敬為本所著有水雲集若干卷其從之學者如太尉佛家奴陳樞密完者不花皆有賢名

黃許

黃許字與可處州人元季國日陵夷紀綱不振方遣大臣宣撫各道許以姑蒼處士謁見獻抹時十策曰嚴選舉革貪污除吏欺抑不并省冗官汰僧道嚴田賦興武舉作士氣結人心磊落以千言鑿鑿可見諸行事而大臣暗不能用及豪傑竝起內分裂中書省參政普顏帖木爾內臺

元史卷四十六 列傳

畫

治書侍御史李國鳳奉詔經略江南得許十策嘆曰世未嘗無才顧上無人用才耳欲薦起之則已病矣初許及懷玉鄭元善同里葉峴林定老相師友三人皆第進士而許獨隱居不遇定老僉浙東廉訪司事時舉為麗水儒學教諭不就中州李彥方持使節至郡見許儀觀甚偉美髯過膝議論慷慨自謂行天下未見如此人竟不仕死識者憾之所著有四書會要讀易大意詩書類要天文地志官制皆有類編及古今人詩文駢儷類選先居石壁山下有石壁晚棄若干卷生平不為華靡無益之言所居溪堂前直南山學者稱為南岫先生國子助教貝瓊銘其墓見清江文集陳樞字君采東陽人父取青從鄉先生石一鼈游與聞考亭之學樞承家傳繼受易詩書春秋於程直方書無不讀

讀無不解屏卻傳注獨取遺經精思四十年恍然有得著易象數解新說洪範傳經解四書本旨孝經新說常製鹿皮為衣種藥園谷中自稱鹿皮子集

鄭玉

黃昇

鄭玉字子美徽州歙縣人邃於春秋絕意仕進門人受業者為構師山書院文章不事雕鍛揭侯斯歐陽玄咸稱之至正十四年朝廷除玉翰林待制賜御酒名幣浮海徵之玉辭疾不起而為表以進曰名爵者祖宗之所以遺陛下使與天下賢者共之待制之職臣非其才不敢受酒與幣天下所以奉陛下陛下得以私與人臣拜賜不敢辭也玉既不仕家居日以著書為事所著有周易纂註十七年明兵入徽州守將將要致之玉曰吾豈事二姓者邪因被拘

元史卷四十六 列傳

畫

囚久之親戚朋友攜具餉之則從容為之盡歡明日具衣冠北面再拜自縊而死其妻聞之亦從死焉舊史列忠義今改入儒林黃昇字殷士撫州金谿人博學明經善屬文九長於詩至正十七年用左丞相太平奏授淮南行省照磨未行除國子助教遷太常博士轉國子博士陞監丞擢翰林待制兼國史院編修官二十八年京城既破昇嘆曰我以儒致身累蒙國恩今縱無我戮何面目見天下士乎遂赴井而死年六十一有詩文傳於世舊史列忠義今改入儒林

顏師聖

顏師聖一名伯顏字宗道哈刺魯氏隸軍籍蒙古萬戶府世居開州濮陽縣師聖生三歲常以指畫地或三或六如八卦狀長受業宋進士建安黃坦坦曰此子穎悟過人非

諸生可比因命以顏爲氏且名而字之焉至正四年以隱士徵至京師授翰林待制預修金史既畢辭歸已而復起爲江西廉訪僉事數月以病免及還四方來學者千餘人其學務深造自得不屑詞章而必期實用十八年河南賊蔓延河北師聖言於省臣將結其鄉民什伍自保而賊兵大至乃渡漳北行邦人從者數十萬家至磁與賊遇被執賊知其名誘以富貴師聖怒罵不屈引領受刃與妻子俱死之年六十有四既死人或剖其腹見其心數孔曰古稱聖人心有七竅此非賢士乎乃納心其腹中覆牆而揜之有司上其事贈僉太常禮儀院事諡文節所著述皆燬於兵

吳當

元史卷四十六

列傳

七

吳當字伯尚澄之孫也幼承祖訓精通經史百家言澄既歿四方從游者悉就當卒業以薦由國子助教歷官翰林直學士至正中江南盜起大臣有言當世居江右習知民俗且其才可任政事者特授江西廉訪使偕兵部尚書黃昭招捕諸郡當以朝廷兵力不給既受命卽募民兵由浙闕入克復建撫兩郡時參政朵台方駐兵於此忌當屢捷功在己上因構爲飛語謂當與賊通詔解兵柄尋除名先是當平賊功狀自廣東海道未達京師而朵台等公牘先至故朝廷責當左遷及得功狀知其誣復拜江西參政命未下而陳友諒已陷江西當戴黃冠服道士服杜門不出日以著書爲事友諒遣人辟之臥牀不食以死自誓乃昇牀載之送江州拘留一年終不屈歸隱廬陵之谷坪所著

有周禮纂言及學言彙自列傳移入

元史卷四十六

列傳

七

元史卷四十六終

元史卷四十七

文苑一

姚燧

姚燧字端甫世系見燧伯父樞傳父格燧生三歲而孤育於伯父樞樞隱居蘇門謂燧蒙暗教督甚急楊奐馳書止之曰燧令器也長自有成何以急為且許醮以女年十三見許衡於蘇門十八始受學於長安衡未嘗教以為文二十四自讀韓愈文而好之因是益沈酣於古稍出所作就正於衡衡亦賞之且戒曰弓矢為物以待盜也使盜得之亦將待之文章固發聞士子之利器然先有能一世之名將何以應人之見役者哉非其人而與之與非其人而拒之均罪也非周身斯世之道也至元七年衡以國子祭酒

元史卷四十七列傳

教貴胄奏召舊弟子十二人燧自太原驛致館下年三十八始為秦王府文學兼提舉陝西四川中興等路學校十二年以秦王命安輯庸蜀明年漢嘉新附入諭其民又奉命招王立於合州又明年撫循夔府凡三使蜀皆稱職十七年除陝西漢中道按察司副使錄囚延安平反註誤入服其明決調山南湖北道按部澧州興學振民二十三年自湖北奉旨趨朝明年為翰林直學士二十七年授大司農丞元貞元年以翰林學士召修世祖實錄初置檢閱官究覈故事燧與侍讀高道凝總裁之書成大德五年授江東廉訪使移病太平九年拜江西行省參政至大元年仁宗居潛邸開宮師府燧年已七十遣正字呂洙起燧為太子賓客未幾除承旨學士尋拜太子少傅燧拜辭曰昔臣

先伯父樞尚力辭是官臣何敢受明年授翰林學士承旨知制誥兼修國史四年得告南歸再召不赴卒於家年七十六諡曰文燧學出許衡而辭章英挺則有天授宋末文士皆宗歐蘇其傲也亢沓平易至燧始宗韓柳以紹秦漢不屑歐蘇以下雄視元初遂開一代風氣故元代古文遠出南宋之上元初名臣世勳顯閣皆燧所書氣昌奇而聲奧闕歸然躋有元於兩漢高麗藩陽王父子連姻帝室傾貲結朝臣一日欲求燧詩文燧靳不與至奉旨乃與之王贈謝幣帛金玉名畫五十筐盛陳致燧燧即時分散諸屬官及史胥侍從止留金銀付翰林苑為公用器皿燧一無所取人問之燧曰彼藩邦小國唯以貨利為重吾能輕之使知大朝不以是為意其器識豪邁類此然其文專長碑

元史卷四十七列傳

版必附麗於事物酬酢於請託罕能自抒胸臆至於匡扶世教如賈誼陸贄韓愈杜牧之立言則亦未之有燧亦自言文章有題目者吾能為之無題目者惟元明善能為之吾不能也其在朝惟推轂士類未嘗一言建白利敝人或問之雖自言得人則法行然亦文士不究心政事之徵所著有牧庵文集五十卷國統離合圖若干卷行於世子三壩圻城論曰前明葉子奇草木子曰傳世之盛漢以文晉以字唐以詩宋以理學元世詩書文學皆不如前代其可傳獨北樂府而明沈德符顧曲雜言論南曲北曲之分遂謂元未滅宋以前以雜劇取士語絕無稽況元之詩不如唐宋而古文則姚燧揭傒斯歐陽玄張養浩黃潛柳貫蘇天爵皆

祖述韓歐遠在南宋之上明黃宗義論元文獨以虞集姚燧二人竝稱尚非篤論也使燧更留意於經世進之於義理其成就豈可量哉

趙孟頫 趙與鼎 鮮于樞

趙孟頫字子昂宋太祖子秦王德芳之後也五世祖秀安僖王子偁四世祖崇憲靖王伯圭高宗無子立子偁之子是爲孝宗伯圭其兄也賜第湖州故孟頫爲湖州人曾祖師重祖希承父與嘗仕宋皆至大官孟頫年十四用父蔭補官試中吏部銓法調真州司戶參軍宋亡家居力學至元二十三年行臺侍御史程鉅夫奉詔搜訪遺逸於江南以孟頫入見孟頫才氣英邁神采煥發如神仙中人世祖顧之喜使坐右丞葉李上或言孟頫宋宗室子不宜使近

元史卷四十七 列傳

三

左右帝不聽時方立尙書省命孟頫草詔班天下帝覽之喜曰得朕心之所欲言詔集百官於刑部議法眾欲計至元鈔二百貫贓滿者死孟頫曰始造鈔時以銀爲本虛實相權今二十餘年間輕重相去至數十倍故改中統爲至元又二十年後至元必復如中統使民計鈔抵法疑於大重古者以米絹民生所須謂之二寶銀錢與二物相權謂之二虛四者爲直雖升降有時終不大相遠也以絹計贓取爲適中況鈔乃宋人所創施於邊郡金人襲而用之皆出於不得已迺欲以此斷人命恐不可行也或輕孟頫南人年少責以沮格詔書孟頫持之愈堅議者無以難帝初欲大用孟頫忌者沮之二十四年六月授兵部郎中兵部總天下諸驛時使客飲食之費幾十倍於前吏無以供

給強取擾民增鈔給之而至元鈔法滯澀復不能行詔遣尙書劉宣與孟頫馳驛至江南問行省丞相慢令之罪許徑答諸路官孟頫受命往比還不答一人丞相桑葛太以爲譴時有王虎臣者言平江路總管趙全不法卽命虎臣往按之葉李執奏不宜遣虎臣帝不聽孟頫進曰趙全固當問然虎臣前守此郡多強買人田縱賓客爲姦利全數與爭虎臣怨之虎臣往必將陷全事縱得實人心不服帝悟乃改遣他使桑葛柄政每日巨鐘初鳴時卽坐省中六曹官後至者則答之孟頫偶後至斷事官遽引受答孟頫入訴於都堂右丞葉李曰古者刑不上大夫所以養其廉恥教之節義且辱士大夫是辱朝廷也桑葛乃慰孟頫使出自是所答惟曹史以下他日行東御牆外道險孟頫馬

元史卷四十七 列傳

四

跌墮於河帝聞之移築御牆稍西二丈許二十七年遷集賢直學士是歲地震北京尤甚地陷黑沙水涌出人死傷數十萬帝深憂之時駐蹕龍虎臺遣阿剌渾撒里馳還召集賢翰林兩院官詢致災之由議者畏忌桑葛但泛引經傳及五行災異之言以修人事應天變爲對莫敢語及時政時桑葛遣使理算天下錢糧已徵入數百萬未徵者尙數千萬害民特甚民不聊生自殺者相屬逃山林者則發兵捕之皆莫敢沮其事孟頫勸阿剌渾撒里奏請赦天下盡與調除庶幾天變可弭帝從之草詔已具桑葛怒謂必非帝意孟頫曰凡錢糧未徵者其人死亡已盡何所從取非及是時除免之他日言事者尙以失陷錢糧數千萬歸咎尙書省豈不爲丞相深累邪桑葛悟民始獲蘇孟頫又

勅奉御徹里劾桑葛誅之自後大臣多以罪去帝欲使孟
頰與聞中書政事孟頰固辭有旨令出入宮門無禁每見
必從容語及治道多所裨益帝問汝趙太祖孫太祖行事
汝知之乎孟頰謝不知帝曰太祖行事多可取者朕皆知
之孟頰自念久在上側必爲人所忌力請補外二十九年
出同知濟南路總管府事時總管關孟頰獨署府事官事
清簡慎獄矜疑爲僉廉訪事章哈刺哈孫所忌將以事申
之會修世祖實錄召孟頰還京師乃解奉旨書金字藏經
既成除集賢直學士江浙等處儒學提舉遷泰州尹未上
至大三年召至京師以翰林侍讀學士預撰祀南郊祝文
及擬進殿名議不合謁告去仁宗在東宮素知其名及即
位屢遷翰林學士承旨常字之而不名帝嘗以語近臣比

元史卷四十七 列傳 五

之唐李白王維宋蘇軾有不悅者聞之帝初若不聞者延
祐六年得請南歸帝遣使賜衣幣趣之還朝以疾不果行
至治元年英宗遣使即其家俾書孝經二年賜上尊及衣
二製是歲六月卒年六十九追封魏國公諡文敏孟頰所
著有尚書註有琴原樂原律呂不傳之妙詩文清逸旁
通佛老之旨篆隸行草書無不工絕外國使者多求其書
其畫山水木石花竹人馬尤精緻前史官楊載稱孟頰之
才頗爲書畫所掩知其書畫者不知其文章知其文章者
不知其政事云妻管夫人子雍奕及弟孟頰竝以書畫肖
其父兄雍二子鳳麟亦能畫蘭竹人馬與雍逼眞
趙與票字晦叔宋宗室子嘗登進士第爲鄂州教授至元
十一年丞相伯顏既渡江與票率其宗人之在鄂州者詣

軍門上書力陳不嗜殺人可以一天下且乞全其宗黨後
伯顏朝京師世祖問宋宗室之賢者伯顏首以與票對十
三年秋九月遣使召見上京授翰林待制朝廷立法多所
咨訪進直學士轉侍講疏陳江南科斂急督移括大姓宋
世巨壘暴露皆大臣擅易明詔所爲二十七年京師霧四
塞明年正月甲寅虎入南城與票又疏言虎應苛政乃權
臣專政之咎退而家居待罪未幾桑葛敗平章不忽木奏
與票貧窶有守世祖曰得非指權臣爲虎者邪賜鈔萬三
千貫歲給其妻子衣糧後累遷翰林學士其伯祖師淵嘗
從朱熹游預修通鑑綱目凡例與票得家學之傳及入北
方復從許衡講論衡重之與票既老成宗命特官其子孟
實以終養大德七年卒貧無以葬成宗命有司賻鈔五千

元史卷四十七 列傳 六

貫給舟車還葬台州封天水郡侯諡文簡
鮮于樞字伯璣號困學山民漁陽人官至太常典簿學書
於張天錫早歲愧未及古偶適野見二人輓車行泥淖中
遂悟書法酒酣驚放吟詩作字奇態橫生與趙孟頰齊名
終元世學者不出此兩家或言孟頰妒其書重價購而燬
之故傳世不多其語本無稽然亦可見其與趙頡頏矣作
畫亦秀韻子去矜孫端皆能世其家學又其甥伯顏不花
字蒼崖畏吾人草書似舅氏

黃潛 柳貫 吳萊

黃潛字晉卿婺州義烏人母童氏夢大星墜於懷乃有娠
歷二十四月始生比成童授以書詩不一月成誦中延祐
二年進士第授台州寧海丞凡鹽場亭戶及編戶之隸漕

司與財賦府者恃其不統於有司橫恣病民潛皆痛繩以法民有後母與僧通而醜殺其夫者反誣前子所爲獄將成潛微服陰察之卒白其姦僞惡少年名在盜籍方謀劫奪未行而邑大姓執之圖中賞格初無獲財左驗事久不決潛爲之疏別以其獄上論之如本條免死者十餘人遷兩浙都轉運鹽使司石堰西場監運改諸暨州判官巡海官刑例以三載一新費出於官而責足於民有餘則總其事者私焉潛擲節浮蠹而以餘錢還民驩呼而去奸民以僞鈔鈎結黨與脅擄人財官若吏聽其謀挾往新昌天台寧海東陽諸縣株連所及數百家郡府下潛鞠治潛一問皆引伏官吏除名同謀者皆杖遣之有盜繫錢塘縣獄游民賂獄吏私縱之假署文牒發其來爲鄉導逮捕二十餘

元史卷四十七

七

家潛訪得其情以正盜宐傳重議持僞文書來者又非州民俱械還錢塘誣者自明轉國子博士視弟子如朋友未始以師道自尊輕納人拜而來學者滋益恭業成而仕皆有聞於世時欲增設禮殿配位四配位合東坐而西向學官或議分置於左右同列不敢爭潛獨面折之事乃止出爲江浙等處儒學提舉潛亟請致仕絕江徑歸未幾召除翰林直學士知制誥同修國史尋兼經筵官旋上章求歸不俟報而行帝聞之遣使追還京師復爲前官久之始得謝南還凡七年卒年八十一追封江夏郡公謚文獻潛天資介特在州縣唯以清白爲治月俸弗給每鬻產佐之及升朝足不登權勢之門所著有日損齋彙二十三卷義烏志七卷筆記一卷宋濂狀其行事

見宋文憲集

柳貫字道傳婺州浦江人少嘗受學於蘭溪金履祥又從宋諸遺老方鳳謝翱吳思齊仇遠戴表元吳澄游肆力於先秦兩漢程頤夫授以墨一丸曰文章正印屬子矣始用察舉爲江山儒學教諭仕至翰林待制監察御史馬祖常薦其堪任風憲不報滿秩而歸杜門十餘年饋粥不給處之裕如與黃潛及臨川虞集豫章揭傒斯齊名號儒林四傑其處州廟碑記一篇論者謂直追韓愈旁工篆隸杜本謂不減李陽冰所著有文集四十卷字系二卷近思錄廣輯三卷金石竹帛遺文十卷門人宋濂狀其行

元史卷四十七

列傳

八

不遺一字三易他編皆如初因盡出所有書使讀之延祐七年以春秋舉上禮部不利退居深裏山中益窮諸書奧旨著尚書標說六卷春秋世變圖二卷春秋傳授譜一卷古職方錄八卷孟子弟子列傳二卷楚漢正聲二卷樂府類編一百卷唐律刪要三十卷平生喜論文嘗云作文如用兵法有正有奇正是法度要部伍分明奇是不爲法度所縛千變萬化坐作進退擊刺一時俱起及其欲止什伍各還其隊元不曾亂聞者服之柳貫素慎許與每稱萊爲絕世才黃潛晚年謂人曰萊之文嶄絕雄深類秦漢間人作吾操觚一世安敢及之御史行部舉茂才署饒州長蕪書院山長未上而卒年僅四十有四門人宋濂胡翰等私謚曰淵穎先生

貫雲石

貫雲石名進海功臣阿里海牙孫也父名貫只哥因以貫為氏自號酸齋母廉氏夜夢神人授以大星吞之已而有娠及生神采秀異年十二三英爽有膂力使健兒驅三惡馬疾馳已持槊立待馬至騰上之越二而跨三運槊生風觀者辟易稍長折節讀書吐辭不蹈襲故常初襲父官為兩淮萬戶鎮永州御軍嚴肅稍暇輒雅歌投壺意所暢適不為形迹拘一日呼弟忽都海牙語曰吾平生宦情最薄願祖父之爵不敢不襲今已數年矣願以讓弟語訖即解所緇金虎符佩之北從姚燧學燧見其古文峭厲有法及歌行古樂府慷慨激烈大奇之仁宗在東宮聞其以爵讓弟謂宮臣曰將相家子弟有如是賢者那選為說書秀才

元史卷四十七 列傳

九

宿衛禁中仁宗踐阼上疏條六事曰釋邊戍以修文德教太子以正國本設諫官以輔聖德表姓氏以旌勳胄定服色以變風俗舉賢才以恢至道書凡萬餘言未報拜翰林侍讀學士忽喟然嘆曰辭尊居卑昔賢所尚今禁林清要與所讓軍資孰高人將議吾後矣遂稱疾還江南賣藥錢塘市詭姓名易服色人無有識之者偶過梁山樂見漁父織蘆為被欲易之以紬漁父疑其人陽曰君欲吾被當為賦詩遂援筆立就竟持被去遠近喧傳蘆花被詩晚年文日遠詩益沖澹草隸書稍取古人所長變化自成一家其視死生若晝夜絕不凝滯於物脩然欲遺世而獨立卒封京兆郡公諡文靖有詩文若干卷孝經直解一卷

阿榮

阿榮字存初怯烈氏祖耶先不花湖廣行省左丞相贈太師父按攤中書右丞阿榮幼事武宗備宿衛累遷湖南道宣慰副使溫德亨奉使宣撫湖南事無大小悉以委之會列郡歲饑阿榮分其廩祿為粥以食餓者仍發粟振之所活甚眾廣西寇起眾皆洶懼阿榮鎮之以靜督有司治兵守其境寇不敢入遷湖廣行省左右司郎中召僉會福院事尋除吏部尚書泰定初出為湖南宣慰使改浙東道宣慰使都元帥以疾辭天祿初復起為吏部尚書尋參議中書省事二年拜中書參政知經筵事進奎章閣大學士太禧宗禋院使都典制神御殿事文宗眷遇之甚而阿榮亦盡心國政知無不言久之心忽鬱鬱不樂謁告南歸武昌後至元元年卒初阿榮閒居以文翰自娛博究前代治亂

元史卷四十七 列傳

十

得失見其會心者則扼腕曰忠臣孝子國家之寶為奇男子烈丈夫者固不當如是邪日與韋布之士游所至山水佳處鳴琴賦詩日夕忘返尤淡於數學逆推事之成敗及人福禍天壽貴賤多奇中天祿三年春策士於廷阿榮與虞集會於直廬慨然興歎語集曰更一科後科舉當輟輟兩科而復復則人材彬彬大出矣又歎曰榮不復見之矣君猶及見之集應曰得士之多幸如存初言今文治方興未必有中輟之理存初國家世臣妙於文學以盛年登朝在上左右斯文屬望集老且衰見亦何補邪阿榮又歎曰數當然耳集問何以知之弗荅後三年卒元統三年科舉果罷至正元年始復如其言

戴表元

戴表元字帥初一字曾伯慶元奉化州人宋咸淳中登進士乙科教授建寧府後遷臨安教授行戶部掌故皆不就大德八年執政薦於朝起家拜信州教授再調教授婺州以疾辭初表元閔宋季文章氣萎茶而辭賦傲傲已甚慨然以振起斯文爲己任時四明王應麟天台舒岳祥並以文學師表一代表元皆從受業故其學博而肆其文清澹雅潔化陳腐爲神奇蓄而始發至元大德間東南以文章大家名重一時者惟表元而已其門人取知名者曰袁桷楠之文其體裁議論一取法於表元者也表元晚年翰林集賢以修撰博士二職論薦而老疾不可起年六十有七卒有剡源集行於世當表元時有四明任士林者亦以文章知名云

元史卷四十七 列傳

七

閻復

閻復字子靖高唐人始生有奇光照室性簡重美丰儀弱冠入東平學師事名儒康晔時嚴實領東平行臺招諸生肄進士業迎元好問校試預選者四人復爲首徐珍李謙孟祺次之歲己未始掌書記於行臺擢御史掾至元八年用王磐薦爲翰林應奉以才選充會同館副使兼接待使扈駕上京賦應制詩二篇寓規諷意世祖顧和禮霍孫曰有才如此何可不用十二年升翰林修撰十四年出僉河北河南道按察司事十六年入爲翰林直學士以州郡校官多不職建議定銓選之法二十三年遷翰林學士帝屢召至榻前面諭詔旨具草以進輒稱善二十八年尙書省罷復立中書省帝勵精圖治急於擇相一日召入便殿論

之曰朕欲命卿執政何如復謝不足勝任帝謂侍臣曰書生識義理存謙讓是也勿強出爲浙西道廉訪使先是姦臣桑葛當國嘗有旨命翰林撰桑葛輔政碑桑葛既敗詔有司陪其碑復亦坐是免官三十一年成宗卽位以舊臣詔入朝除集賢學士疏言京師立首建宣聖廟學定用釋奠雅樂其後詔賜孔林灑掃二十八戶祀田五千畝皆復之請也三年因星變又上疏言定律令頒封贈增俸給通調內外官且曰古者刑不上大夫今郡守以徵租受杖非所以厲廉隅江南公田租重宜減以貸貧民後多采用大德元年拜翰林學士承旨十一年春武宗踐阼復首陳三事曰惜名器明賞罰擇人材言皆剴切未幾遷授平章政事餘如故復力辭不許上疏乞骸骨詔從其請給半俸終養時仁宗居東宮賜以重錦俾公卿祖道都門外及卽位遣使召復復以疾辭卒諡文康有靖軒集五十卷

元史卷四十七 列傳

七

揭傒斯

揭傒斯字曼碩龍興富州人父來成宋鄉貢進士傒斯幼受庭訓貧攻苦大德間出游湘漢湖南帥趙淇暨程鉅夫盧摯先後咸器重之鉅夫因妻以從妹延祐初鉅夫與摯列薦於朝特授翰林國史院編修官時平章李孟監修國史讀其所撰功臣列傳嘆曰是謂史筆他人直騰吏牘爾傒斯久在翰林熟於朝廷掌故天厯初開奎章閣首擢授經郎以教勸戚大臣子孫兼預修經世大典文宗時幸閣中有所咨訪奏對稱旨恆字之而不名每中書奏用儒臣必問曰其材何如揭曼碩開出其所上太平政要策以

示臺臣且屢稱其純實欲進用之會晏駕而止順帝元統初詔對便殿慰諭良久屢遷翰林待制集賢學士先是儒學官赴吏部銓者必移集賢考校其所業集賢下國子監監下博士吏頡淹稽動踰累月侯斯請更其法以事付本院屬官人甚便之奉旨祠北嶽濟瀆南鎮便道西還時太師柏顏當國屢促其還朝侯斯引疾固辭既而柏顏敗擢奎章閣供奉學士乃即日就道未至改翰林直學士及開經筵再遷侍講學士同知經筵事經筵無專官曰領曰知多宰執大臣凡微辭與義皆屬侯斯訂定而後進務寓獻替以裨治道至正三年年七十乞致仕尋復召還求去不許命丞相脫脫及執政大臣面諭毋行侯斯曰使侯斯有一得之獻諸公用其言而天下蒙其利雖死於此何憾不

元史卷四十七 列傳

圭

然何益之有丞相因問方今致治何先侯斯曰儲材為先養之於位望未隆之時用之於歷仕諸艱之後則無失材無廢事一日集議朝堂侯斯抗言當兼行新舊銅錢以救鈔法之敝持之甚堅丞相雖稱其不阿而言竟莫用預修遼金宋三史為總裁官四年遼史成有旨獎諭仍督早成金宋二史侯斯留宿史館朝夕不敢休服無重裘因得寒疾七日卒帝聞嗟悼賜楮幣萬緡仍給驛舟護喪歸江南六年贈豫章郡公諡文安侯斯少處窮約能使親忘其貧既祿入稍踰於前慨親之不逮也故一生清苦至老不渝其為授經郎時入直多步行同僚謀為貴馬聞之即自置一騎旋復賣去立朝雖居散地而急於薦士揚人之善惟恐不及聞墨吏病民者則深疾焉嘗白免富州金課鄉里

至今德之為文章敘事嚴整簡當與姚燧並冠一代朝廷大典冊及元勳碑碣咸出其手而詩則清揚婉麗與其文如出二人虞集自負其詩為漢庭老吏而古文不敢傲揭有文安集若干卷子法取知名

歐陽玄

歐陽玄字原功其先家廬陵與文忠公修同所自出至曾大父新始遷居瀏陽登延祐二年進士授岳州路平江州同知調太平路蕪湖縣尹在縣多平反疑獄豪右之奴良民者免之貢賦徵發及時蝗不入境改武岡縣尹縣控制溪洞蠻獠雜居撫字稍乖輒弄兵犯順玄至踰月赤水大清兩洞聚眾相攻殺即日單騎從二人徑抵其地諭之獠人熟玄名棄兵仗羅拜馬首曰我曹非不畏法緣訴其事

元史卷四十七 列傳

西

於縣縣官不為直反令繇役培克之情有弗堪乃發憤就死耳玄諭以禍福理其曲直獠人遂安致和元年屢遷翰林待制兼國史院編修官時當兵興玄領印攝院事日直內庭參決機務凡遠近調發制詔書檄暨改元天祿郊廟建后立儲肆赦之文皆經撰述復條時政數十事實封以聞多推行之明年初置奎章閣學士院又置藝文監隸焉皆選清望官居之文宗親署玄為藝文少監奉詔纂修經世大典元統元年拜翰林直學士編修四朝實錄俄兼國子祭酒後至元五年拜翰林學士懇辭去位不允免其行朝賀禮至正改元更張朝政事有不便者集議廷中玄極言無隱科目之復沮者尤眾玄尤力爭之詔修遼金宋三史召為總裁官發凡舉例史官中有議論不公者玄不以

口舌爭俟其呈稟授筆竄定之統系自正至於論贊表奏皆玄屬筆五年拜翰林學士承旨已而乞致仕復不允御史臺奏除福建廉訪使行次浙西疾作乃上休致之請復拜翰林學士承旨玄屢力辭不獲命奉勅定國律尋懇乞致仕將行復降旨不允十四年汝穎盜起蔓延南北州縣幾無完城玄獻招捕竝行之策請信賞罰聯聲勢寬脅從擢謀士精間諜凡千餘言當時不能用十七年春乞致仕以中原道梗欲由蜀還鄉帝復不允時將大赦天下宣赴內府命肩輿至延春閣是歲十二月卒年八十五追封楚國公謚曰文玄性度雍容含宏縝密處己儉約爲政廉平曆官四十餘年屢主文衡兩知貢舉及讀卷官凡宗廟朝廷瀉文大冊播告萬方制詔多出其手金縢上尊之賜幾

元史卷四十七 列傳

五

無虛歲海內名山大川釋老之宮王公貴人墓隧之碑得其文辭以爲榮奉詔撰河平碑又爲至正河防記萬言爲歷代河渠志所未有有圭齋文集若干卷行於世危素狀其行事見悅學齋集

元明善

元明善字復初大名清河人其先蓋拓拔魏之裔居清河者至明善四世矣治經皆有師法而尤淡春秋浙東使者薦爲安豐建寧兩學正辟掾行樞密院時董士選僉院事實賓友之及士選遷江西左丞又辟爲省掾會贛州賊劉貴反明善從士選將兵討之擒賊三百人明善議緩誅誤得全活者百三十人一日將佐白宜多戮俘獲及尸一切死以張軍聲明善固爭既又得賊所書贖吉民丁十萬

於籍者有司喜欲滋蔓爲利明善請火其籍以滅迹二郡遂安仁宗居東宮首擢太子文學卽位改翰林待制與修成宗順宗實錄遷翰林直學士詔節尙書經文譯其關政要者以進明善舉宋忠臣文天祥子集賢直學士文陞同譯潤許之書成每奏一篇帝必稱善曰二帝三王之道非卿莫聞也興聖太后既受尊號廷臣請因肆赦明善曰數赦非善人之福宥過可也奉旨出振山東河南饑時彭城下邳諸州連數十驛民餓馬斃而官無振貸明善以便宜出鈔萬二千錠給之還修武宗實錄又遷翰林侍講學士預議科舉服色等事延祐二年始會試天下進士明善首充考試官及廷試又爲讀卷官所取士後多爲名臣改禮部尙書正孔氏宗法以宣聖五十五世孫思晦襲封衍聖

元史卷四十七 列傳

六

公事上制可之擢參議中書省事會朝廷遣蒙古大臣一員使交趾明善副之將還國王贈以金幣蒙古大臣受之明善固辭其王曰彼使臣已受矣公獨何爲明善曰彼所以受者安小國之心我所以不受者全大國之體國王歎服尋遷翰林學士修仁宗實錄至治二年卒泰定間追封清河郡公謚文敏有清河集行世初在江西金陵每與虞集劇論以相切劘明善言集治諸經惟主宋儒而於漢以來先儒傳註攷之未博集亦言凡爲文辭得所欲言而止必如明善所云若雷霆之震驚鬼神之靈變然後可非性情之正也二人初相得甚驩至京師乃復不能相下董士選之自中臺行省江浙也二人者俱送出都門外集早還士選約明善復送至二十里外入邸舍同飲乃舉酒屬明

善曰士選以功臣子出入臺省無補國家惟求得佳士數人爲朝廷用之如復初與伯生他日必皆光顯然恐不免爲人構間復初中原人也仕必當道伯生南人將爲復初摧折今爲我飲此酒慎勿兩賢相厄明善跪而酬之起立言曰誠如公言請公再賜二卮誓推此心以栽培善類終身誓不敢忘乃再飲而別遂與集驩如初其後明善每作文必招集就正之集輒泚筆刪百十字而文益精當馬祖常碑其神道

謝端字敬德蜀之遂寧人宋末蜀士多避兵江陵因家焉端弱冠與尚書宋本同師又同教授江陵城中以文學齊名時號謝宋史杜宣慰荆南數加延禮薦之姚樞樞薦署校官不報延祐五年擢進士乙科授潭州路同知湘陰州

元史卷四十七 列傳 七

事歲滿入爲國子博士遷太常博士盜入太廟失第八室金主坐罷去端禮官非典守不當坐亦不辨尋除翰林修撰再遷翰林直學士端治湘陰時猾吏束手不敢舞文法豪民無賴者遠避去部使者行部旁郡滯訟皆委端讞端剖決如流績譽籍然其文章嚴謹有法靈約近瘠無奢滋駁居翰林久至順元統以來國家大制冊多出其手預修文宗明宗宣宗三朝實錄及累朝功臣列傳時稱其有史才初文宗建奎章閣蒐羅中外才俊置其中嘗語阿榮曰當今文學之士惟未識謝端無何文宗崩竟不及用端又與趙郡蘇天爵同著正統論辨金宋正統甚悉至元六年卒年六十一元世祖士以文章名者曰虞集而謝端次之

以上舊史皆在 列傳今移入

文苑二

陳孚 馮子振

陳孚字剛中台州臨海人至元中孚以布衣上大統賦江浙行省聞於朝署上蔡書院山長考滿謁選京師二十九年世祖命梁曾以吏部尚書再使安南選南士爲介朝臣薦孚博學有氣節調翰林國史院編修官攝禮部郎中爲曾副陛辭賜五品服佩金符以行三十年正月至安南世子陳日燁以憂制不出郊遣陪臣來迎又不由陽明中門入曾與孚回館致書詰日燁以不庭及不出郊迎詔之罪往復三書宣布天子威德辭直氣壯皆孚筆也其所贈孚悉卻之詳見梁曾傳中使還除翰林待制兼國史院編修官帝方欲實之要地而廷臣以孚南人且尚氣頗忌之

元史卷四十七 列傳 六

遂除建德路總管府治中再移衢州台州所至多著善政大德七年詔遣奉使宣撫循行諸道時台州旱饑道殣相望江浙行省檄浙東元帥脫歡察爾發粟振濟而脫歡察爾怙勢立威不恤民隱驅脅有司動實重刑孚遂詣宣撫使懇其不法蠹民事十九條按實坐罪亟發倉振民賴全活者眾孚亦以此致疾卒於家年六十四孚天材過人性任俠不羈其詩文任意疾成不事雕斲有文集行於世攸州馮子振其豪俊與孚略同孚自以爲不及子振於書無所不記其爲文酒酣耳熱命侍吏二三人潤筆以俟子振據案疾書隨紙數多寡頃刻輒盡事料醲郁美如簇錦律之法度未免乖刺人亦以此少之

范梈

范梈字亨父一字德機清江人家貧早孤母熊氏守志教之梈天資穎異所誦讀輒記憶雖癯然清寒若不勝衣於流俗中克自樹立無苟賤意居則固窮守節竭力以養親出則假陰陽之技以給旅食耽詩工文用力精深人罕知者與虞集友善年三十六始客京師中丞董士選延之家熟以朝臣薦爲翰林院編修官秩滿御史臺擢海南海北道廉訪司照磨巡歷遐僻所至興學雪冤遷江西湖東長吏素稱嚴明於僚屬中獨敬異之選充翰林供奉御史臺又改擢福建閩海道知事閩俗素污文縉局取良家子爲繡工無別尤甚梈作歌詩一篇述其敝廉訪使取以上聞皆罷遣之未幾移疾歸故里天厯二年授湖南嶺北道廉訪司經歷以養親辭明年卒年五十九所著詩文與虞集

元史卷四十七 列傳

九

楊載揭傒斯齊名梈居官廉正不可干以私疏食飲水泊如也吳澄稱爲特立獨行之士云

楊載

楊剛中

李桓

劉詵

龍仁夫

劉岳申

楊載字仲弘其先居建之浦城後徙杭因爲杭人年四十二仕戶部賈國瑛數薦於朝以布衣召爲翰林國史院編修官與修武宗實錄延祐初仁宗以科目取士載首應詔遂登進士第授饒州路同知浮梁州事遷寧國路總管府推官旋卒初吳興趙孟頫在翰林得載所爲文極推重之由是有名其文跌宕有奇氣詩宗漢魏盛唐一洗宋季之陋虞集詩自負爲漢庭老吏而稱載詩如百戰健兒云建康之上元有楊剛中字志行自幼厲志操及爲江東憲府照磨風采凜凜其文奇奧簡澀力矯凡俗爲元明善歎賞

仕至翰林待制而卒有霜月集行世其甥李桓字晉仲同郡人由鄉貢進士累遷江浙儒學副提舉亦以文鳴江東載與剛中同輩行而桓則稍後云

劉詵字桂翁吉安之廬陵人少有文名江南行御史臺屢以教官館職遺逸薦皆不報詩文曰桂隱集桂隱詵所號也至正十年卒年八十三同郡龍仁夫字觀復劉岳申字高仲其文學皆與詵齊名有集行世而仁夫之文尤奇逸流麗所著周易多發前儒所未發岳申用薦爲遼陽儒學副提舉仁夫江浙儒學副提舉皆不就

陳旅

程文

陳繹曾

鄭村

柯九思

李孝光

陳旅字眾仲興化莆田人受學於溫陵傅古直用薦爲閩海儒學官適御史中丞馬祖常使泉南一見奇之謂旅曰子館閣器也胡爲畱滯於此因勉游京師既至翰林侍講學士虞集見其所爲文慨然歎曰我老將休付子斯文矣卽延至館中朝夕講習自謂得起予之助與祖常交口游譽於諸公間中書平章政事趙世延又力薦之除國子助教居三年考滿諸生不忍其去請於朝再任焉元統二年出爲江浙儒學副提舉至元四年入爲應奉翰林文字至正元年遷國子監丞卒年五十有六旅文典雅峻潔不徇世好有集十四卷每感虞集爲知己其在浙江時集歸田已數載歲且大比請於行省參政李朮魯紳親奉書幣請集主文鄉闈欲爲問候計乃衝冒炎暑千里訪集於臨川畱旬日而別一日集夢旅舉杯相向既而聞旅卒集淡悼之同時有程文陳繹曾者皆爲集所稱文字以文徽州人

元史卷四十七 列傳

十

仕至禮部員外郎繹曾字伯敷處州人爲人口吃而精敏異常諸經註疏多能成誦文辭彪炳官至國子助教二人皆與旅相伯仲又有鄭杓者字子經羅源人泰定中辟南安儒學教諭與陳旅爲文字交著衍極五篇衍極記載三篇其書自蒼頡迄蒙古凡古人籀篆無所不備宣撫使齊伯亨采而上之作衍極堂以藏其書

柯九思字敬仲台州仙居人父謙由文學掾爲江浙提舉九思以蔭補華亭尉不就文宗知之於潛邸及卽位擢典瑞院都事置奎章閣特授監書博士賜牙章得通籍禁署以謙善教子錫碑名訓忠敕虞集爲文旌之寵顧日隆漸招物議九思乘閒請曰臣以文藝末技遭逢聖明孤危見忌乞補外以自効上曰朕在汝復何憂未幾文宗上賓因

元史卷四十七 列傳

主

流寓中吳以卒九思善寫竹石始得筆法於文同嘗自謂寫籀用篆法枝用草書法寫葉用八分生意飛動有龍翔鳳翥之狀故四方大夫士爭寶愛之又善鑒識金石鼎彝之器時吳人陸友號爲博物亦嘆爲不及有任齋詩集四

卷虞集陳旅爲之序

見歷代小史

李孝光字季和溫州樂清人博學好古隱居鴈蕩山五峯下四方之士遠來受學泰不華師事之南行臺鑒察御史闕辭屢薦居館閣至正七年詔徵隱士以祕書監著作郎召與完者圖執禮哈琅董立同應詔赴京師見帝於宣文閣進孝經圖說賜上尊明年遷祕書監丞卒於官年五十三孝光以文章負名當世非先秦兩漢語弗以措辭有文集二十卷

張翥

張翥字仲舉晉寧人少負才雋豪放不羈好蹴鞠喜音樂不屑家計一旦翻然易業閉門讀書受業於李存存字安仁傳陸九淵之學翥從聞道德性命之說未幾留杭又從仇遠學詩已而薄游維揚學者及門甚眾後至元末同郡偵嚴起居中書薦翥隱逸至正初召爲國子助教分教上都生尋退居淮東會朝廷修遼金宋三史起爲翰林國史院編修官屢遷侍講學士兼祭酒翥勤於誘掖後進絕去崖岸不徒以師道自尊學者皆樂親之嘗奉旨詣中書集議時政眾論蜂起翥獨默然丞相朔思監詰之對曰諸人之議皆是也但事勢有緩急施行有先後在丞相所決耳俄除集賢學士旋以翰林學士承旨致仕李羅帖木爾之

元史卷四十七 列傳

主

入京師也命翥草詔削奪擴廓官爵且發兵討之翥毅然不從乃命他學士爲之李羅亦不忍也及李羅既誅詔給全俸終其身二十八年卒年八十有二翥於詩尤工近體長短句文不如詩而每以文自負然未嘗構思特任意屬筆而已善諧諢談吐輒令人失笑一座盡傾國亡後其遺藁不傳僅存律詩樂府三卷

舊史在列傳今移入

顧輝

顧輝字德潤鄞縣人其大父應春鄉貢進士父學海字叔川皆名士輝幼承家學甫十歲卽善屬文郡博士俞希魯欲以神童貢辭不就既長大肆力於經傳卓然欲以事功自見會無有薦之者乃閉關卻掃喟然嘆曰吾身不遇矣殆將立言已乎惟經以載道史以紀事古先哲王所藉以

屬斯民者也自是默索精思晝夜孜孜垂三十年著釋圖一說約六十三圖徽二十一希言二十四事刻六十二治要十八體卦八解八辯十二議二十四傳七記論序文銘各三雜著十八賦六騷十九雜詩三百二十一合三十卷分爲前後外三集通謂之守齋類彙宋濂爲之序見文集

周伯琦

周伯琦字伯溫饒州人父應極至大閒以翰林待制爲皇太子說書日侍英邸仁宗卽位遷集賢待制終池州路同知總管府事伯琦以蔭授南海縣主簿三轉爲翰林修撰至正元年爲宣文閣授經郎教戚里大臣子弟每進講輒稱旨日被顧問帝以伯琦工書法命篆宣文閣寶仍題扁宣文閣及摹王羲之所書蘭亭序智永所書千文刻石閣

元史卷四十七 列傳

五

中嘗字之而不名十二年有旨命南士皆得居省臺伯琦遂與貢師泰同擢監察御史時御史大夫耶先帖木爾以失律喪師爲陝西行臺監察御史劉希曾等十人所劾伯琦反劾希曾等越分干譽希曾等皆坐左遷由是不爲公論所與十四年爲江夏廉訪使長槍鎖南班陷寧國伯琦與僚佐倉皇出見之尋遁走至杭州改浙西廉訪使江南行臺監察御史余觀糾劾伯琦失陷寧國宜正其罪十七年江浙行省丞相達識承制假伯琦參知政事招諭平江張士誠士誠既降江南行臺監察御史亦辯釋伯琦罪除同知太常禮儀院事士誠留之未行拜江浙行省左丞於是留平江者十餘年士誠既滅伯琦乃得歸鄱陽尋卒伯琦儀觀溫雅遭時多艱善於自保博學工文尤以隸篆真

草擅名當時嘗著六書正譌說文字原二書又有詩文集若干卷自列傳

李河

李河字漑之滕州人少以文受知姚燧薦授翰林國史院編修官轉太常博士拜住爲丞相聞河名擢監修國史長史泰定初除翰林待制以葬親辭歸天祿初文宗方開奎章閣延天下知名士充學士員河數進見奏對稱旨特授奎章閣承制學士河既被知遇乃著書曰輔治篇以進命預朝廷大議同修經世大典謁告歸復除翰林直學士稱疾不起河骨清神朗裘冠褰衣望之如圖畫中人爲文揮灑天放每去官後歷游匡廬王屋少室諸山留連久之乃去僑居濟南有湖山花竹之勝構亭其間文宗嘗敕虞集

元史卷四十七 列傳

五

記之河尤善書自篆隸真草皆見重於世卒年五十九有文集四十卷自列傳

楊維禎

丁鶴年

楊維禎字廉夫諸暨人泰定初進士署天台尹罷去張士誠據浙西累使求致不能屈且撰五論反復告以順逆成敗之說識者韙之生平氣度高曠喜戴華陽巾披羽衣周游山水閒以聲樂自隨早歲居吳山鐵冶築萬卷樓輒輶傳會讀書其上者五年故以鐵崖自號已得鐵笛於湘江吹之亦號鐵笛子文辭非秦漢弗之學久與俱化晚年築蓬臺於松江東南才俊士投贄求文者無虛日當疾亟撰歸全堂記頃刻立就擲筆而逝著有四書一貫錄五經論鍵春秋透天關禮經約歷代史鉞二百卷詩有瓊臺曲洞

庭雲間雜吟五十卷

丁鶴年以字行其先西域人父職馬祿丁徙居武昌因以丁爲氏年十七通詩書禮經至正間淮兵渡江襲武昌鶴年奉母行備歷艱阻聞從兄吉雅謨丁爲定海令徒步往依焉省臺交薦凡九上皆不就既而方國珍據浙東鶴年淡匿海島賣藥以自給凡憂君憂國之念皆發之詩歌著有海巢集

元史卷四十七 列傳

三十五

元史卷四十七終

元史卷四十八

列傳三十二

良吏

譚澄字彥清德興懷來人父資榮金末爲交城令元兵下河朔以縣來附未幾賜虎符行元帥府事從攻汴有功年四十移病舉弟資用自代資用卒澄襲職澄幼穎敏爲交城令時年十九豪民有持吏短長爲奸者察得其主名皆以法治之歲乙未籍民戶有司多以浮客占籍及征賦逃竄殆盡官爲稱貸積息數倍民無以償澄入覲因中書耶律楚材面陳其害太宗惻然爲免其逋負其民間私債定令積年雖久息惟取倍而止亡民能歸者復三年詔下公私便之壬子復大籍其民澄盡削交城之土著者賦以時集甲寅世祖還自大理澄進見留藩府凡遣使必以澄

元史卷四十八 列傳

一

偕而以其弟山阜代令交城中統元年帝卽位擢懷孟路總管俄賜金虎符歲旱令民鑿唐溫渠引沁水以溉田教之種植地無遺利民用不饑至元二年遷河南路總管改平灤路總管七年入爲司農少卿俄出爲京兆總管居一年改陝西四川道按察使建言不孝有三無後爲大宜令民年四十無子聽取妾以爲宗祀計朝廷從之遂著爲令嚴忠範守成都爲宋將咎萬壽所敗退保子城帝命澄代之至則葬暴骸修焚室振饑貧集逋亡民心稍安會西南夷羅羅斯內附帝以撫新國宜擇文武全才遂以澄爲副都元帥同知宣慰使司事比至以疾卒年五十八世祖嘗與太保劉秉忠論一時牧守秉忠曰若邢之張耕懷之譚澄何憂不治哉游顯宣撫大名嘗爲諸路總管求虎符澄

至中書辭曰皇上不識譚澄邪乃為顯所舉中書特為去之其介如此子克修歷湖北河南陝西三道按察使

許楫字公度太原忻州人幼從元好問學年十五以儒生

中詞賦選河東宣撫司舉楫賢良方正孝廉至京師平章

王文統命為中書省掾以不任簿書辭改知印丞相安童

左丞許衡深器重之一日從省臣立殿下世祖見其美髯

魁偉問曰汝秀才邪楫頓首曰臣學秀才耳未敢自謂秀

才也帝善其對授中書省架閣庫管句兼承發司事未幾

立大司農司以楫為勸農副使時商挺為安西王相遇於

途楫因言京兆之西荒野數千頃宋金皆嘗置屯如募民

屯田耕種得穀可給王府之需挺以其言入奏從之三年

屯成果獲其利尋佩金符為陝西道勸農使至元十三年

元史卷四十八 列傳

二

宋平帝命平章廉希憲行中書於荆南府以楫為左右司

員外郎荆南父老與金帛求見楫曰汝等已為大元民矣

今置吏以撫字汝輩奚用金帛求見為明年擢嶺北湖南

按察副使武岡富民有毆死出征軍人者陰以家財之半

誘其佃戶款服楫審得其情罪主者人服其明改江西道

按察副使行省命招討郭昂討叛賊董旗兵士俘掠甚眾

楫詢究得良民六百口遣還鄉里授徽州總管桑葛立尙

書省會計天下錢糧參政忻都戶部尙書王巨濟倚勢刻

剝遣吏徵徽州民鈔多輸二千錠巨濟怒其少欲更益千

錠楫曰公欲百姓死邪生邪如欲其死雖萬錠可徵也巨

濟意解州賴以免二十四年授太平總管謝事二年卒年

七十一

田滋字榮甫開封人至元二年由汴梁路總管府知事入

為御史臺掾十二年拜監察御史十三年宋平建言江南

新附民情未安加以官吏侵漁宜立御史臺以鎮之詔從

其言遂拜行臺侍御史歷兩淮鹽運使河南路總管大德

二年遷浙西廉訪使有縣尹張或者被誣以賊獄成滋密

之但俛首泣而不語滋以為疑明日齋沐詣城隍司禱曰

張或坐事有冤狀願神相滋明其誣廟令老人進曰曷有

王成五人同持誓狀到祠焚禱火未滅而去於爐中得其

遺囊藏於壁間豈其人邪視之果然明日詣憲司詰成等

不服因出火中誓狀示之皆驚愕服辜或得釋十年改濟

南路總管尋拜陝西行省參政時陝西不雨三年滋道過

西嶽禱於神到官果大雨因開倉以麥五千石給小民之

元史卷四十八 列傳

三

無種者俾來歲收成以償官民大悅未幾以疾卒追封開

封郡公諡莊肅

卜天璋字君章洛陽人幼穎悟長負直氣讀書史識成敗

大體至元中為南京府史時河北饑民數萬人集河上欲

南徙有詔令民復業勿渡河眾洶洶不可止天璋慮生變

勸總管張國寶聽其渡從之遂以無事河南按察副使程

思廉察其賢辟為憲府長史聲聞益著後為中臺掾有侍

御史倚勢貪橫御史發其賊天璋主文牘未及奏顧為所

諸俱拘內廷御史對食悲哽天璋問故御史曰吾老唯一

女心憐之聞吾繫不食數日矣是以悲耳天璋曰死職義

也奈何為兒女子泣邪御史慚謝俄見原免大德四年為

工部主事五年以薦授都事秩滿當代樞密奏留之特以

代者為增員武宗時遷部郎值盜賊充斥朝議有犯者并家屬咸服青衣中以別平民天璋曰赭衣塞路秦傲政也尙足法邪相悟而止尙書省臣得罪仁宗召天璋入見與聖太后在坐帝指曰此不貪賄卜天璋也因問今何官對曰臣待罪刑部郎中復問誰所薦者對曰臣不才誤蒙擢用帝曰先朝以謝仲和為尙書卿為郎中皆朕親薦也宜奉職勿怠賜酒及錦衣三襲後被命治反獄帝顧左右曰天璋廉慎人也必得其情及獄定獄賴不冤皇慶初知歸德府勸農興學復河渠河患遂弭時羣盜據要津商旅不通天璋禽百數人悉磔以徇盜為止息升浙西道廉訪副使以舊制改饒州路總管天璋聽民自實事無苛擾版籍為清縣以饑告即抗論發粟振之火延饒之東門天

元史卷四十八 列傳

四

璋具衣冠向火拜勢遂熄以治行第一聞遷廣東廉訪使初豪民瀕海築堰專商船以射利歷任得賄置不問天璋至發卒決去之嶺南地素無冰至是有之人謂天璋政化所致尋乞致仕天璋二年蜀兵起荆楚大震復拜山南廉訪使人意其老必不行矣天璋曰國步方艱吾年八十懼弗獲死所耳敢避難乎遂行至則厲風紀清吏治州郡肅然會詔三品官言時政得失因列上二十事凡萬餘言曰之曰中興濟治策皆中時敝因自引去既歸汴以餘祿施其族黨家無僮石處之晏如至順二年卒贈禮部尙書河南郡侯諡正獻

楊奐字煥然乾州奉天人母嘗夢東南日光射其身旁一神人以筆授之已而奐生其父以為文明之象因名曰奐

年十一母歿哀毀如成人金末舉進士不中歸教授鄉里歲癸巳北渡冠氏帥趙壽之延致待以師友之禮東平嚴實聞其名數問行藏奐終不一詣戊戌太宗詔宣德稅課使劉用之試諸道進士奐就試東平兩中賦論第一從監試官北上謁中書耶律楚材楚材薦授河南南路徵收課稅所長官兼廉訪使奐將行言於楚材河南兵荒之後遺民無幾烹鮮之喻正在今日急而擾之糜爛必矣願假以歲月使得撫摩瘡痍以為朝廷愛養基本楚材是之奐既至禮名士訪得失約束簡易按行境內親問監務月課幾何難易若何有以增額言者輒責其剝下欺上即減元額四之一公私使之不險月政成時論翕然在官十年乃請老於燕之行臺壬子世祖在潛邸驛召奐參議京兆宣撫司

元史卷四十八 列傳

五

事累上書得請而歸乙卯疾篤處置後事如平時引觴大笑而卒年七十賜諡文憲奐博覽強記為文務去陳言不治生產家無十金之業而喜周人急揚人善所著有還山集六十卷大興近鑑三卷正統書六十卷行於世自列傳移入韓鏞字伯高濟南人延祐五年中進士第授翰林國史院編修官尋遷集賢都事泰定四年轉國子博士俄拜監察御史當時由進士入官者僅百之一由吏致位顯要者常十之九帝欲以中書參議傅巖起為吏部尙書鏞上言吏部掌天下銓衡巖起從吏入官烏足盡知天下賢才況尙書秩三品巖起累官四品耳於法亦不得遷制可其奏天祿元年除僉浙西廉訪司事擊姦暴黜貪墨而特舉烏程縣尹干文傳治行為諸縣取所至郡縣肅然二年轉江浙

一第 216 第 36 版反內

財賦副總管至順元年除國子司業尋遷南行臺治書侍御史順帝初歷僉宣徽及樞密院事至正二年除翰林侍講學士既而拜侍御史以剛介爲時所忌言事者劾其賊私乃罷去五年臺臣辨其誣遂復起參議中書省事七年朝廷慎選守令參政魏中立言於帝當今必欲得賢守令無如鏞者乃授饒州路總管饒俗尙鬼有覺山廟自昔爲妖以禍福人盜賊事之尤至鏞至卽徹祠宇沈其土偶盡毀境內淫祠人初駭終服又求宿儒爲五經師每政暇必延見諸生講討經義由是人力於學科第冠於他郡鏞自奉澹泊僚屬化之先是朝使至外郡者官府奉之甚侈不厭所欲卽騰謗於朝惟使饒者鏞延之郡舍中供以糲飯退皆無有後言其後有旨以織幣脆薄遣使督行省臣及

元史卷四十八 列傳

六

諸郡長吏獨鏞無預十年拜中書參政十一年丞相脫脫在位而龔伯遂輩方用事朝政悉議更張鏞有言不見聽人或以鏞優於治郡而執政非其所長遂出爲甘肅行省參政及脫脫罷用事者悉誅而鏞又獨免禍乃遷西行臺中丞歿於官

袁裕字仲寬聊城人中統初辟中書右司掾始建言給重囚衣糧醫藥毆人至死者免籍其孥產止令出焚瘞錢後著爲令順天路民王住兒因鬪誤殺人其母年七十言於朝曰妾寡且老恃此兒以爲生兒死則妾亦死矣裕言於執政始立誤殺畱養之令南京總管劉克興掠良民爲奴隸後以矯制獲罪當籍孥產之半裕言於中書止籍其家奴隸得復爲民者數百至元六年遷開封府判官洧川縣

達魯花赤貪暴盛夏役民捕蝗禁不得飲水民不勝忿擊之而斃有司當以大逆置極刑者七人連坐者五十餘人裕曰達魯花赤自犯眾怒而死安可歸罪於民議誅首惡者一人餘各杖之有差部使者錄囚至縣疑其太寬裕辨之益力遂陳其事狀於中書刑曹竟從裕議八年授西夏中興等路新民安撫副使時徙鄂民萬餘於西夏有司雖與廩食而流離顛沛猶多裕與安撫使獨吉請於朝計丁給地立三屯使耕以自養又言西夏羌渾雜居驅良莫辨宜驗已有從良書者則爲良民從之得八千餘人官給牛具使力田爲農十九年授順德路總管郡有鐵冶提舉張鑑無子買妾其妻妬而殺之裕捕其妻訊之服辜二十一年卒於官

元史卷四十八 列傳

七

鄧文原字善之一字匪石涇州人父漳徙錢塘文原年十五通春秋在宋時以流寓試浙西轉運司魁四川士吳澄道碑謂文原中宋進士與此不符至元中辟爲杭州路儒學正大德中擢應奉翰林文字并修撰授江浙儒學提舉皇慶初召爲國子司業請更學校之政當路重改作論不合移病去科舉而行文原校文江浙慮士守舊習大書朱熹舉私議揭於門延祐五年僉江南浙西道廉訪司事平江僧有誣其府判官理熙以賊者熙誣服文原行部按問得實杖僧而釋熙與民夜歸巡邏者執之繫亭下其人遁去有追及之者刺其脅仆地明日家人尋之以歸比死其兄問殺汝者何如人曰白帽青衣長身者也其兄愬於官有司問直巡邏初更者曰張福執之使服焉械繫三年文原駁之曰

福身不滿六尺未見其長也刃傷右脅而福素用左手傷
宜在左何右傷也鞠之果得真殺人者而釋福桐廬人戴
汝惟家被盜有司得盜獄成送郡夜有焚戴氏廬者而不
知汝惟所之文原曰此必有故也訪得其妻葉與弟謀殺
狀而於水涯樹下得屍與漬血斧俱在焉人以爲神六年
移江東道徽寧國廣德三郡歲入茶課鈔三千錠後增至
十八萬錠竭山谷所產不能充其半餘皆罄空取諸民間
歲以爲常而轉運司得專制有司凡五品官以下皆杖決
州縣莫敢如何文原請罷其專司俾郡縣領之不報徽民
謝蘭家僮汪姓者死蘭姪回賂汪族人誣蘭殺之蘭誣服
文原錄得其情釋之而反坐回時久旱不雨獄決乃雨至
治二年召爲集賢直學士地震詔議弭災之道文原請決

元史卷四十八 列傳 八

滯囚振饑民竝申前議請罷榷茶轉運司又不報明年兼
國子祭酒泰定元年兼經筵官以疾乞致仕再召不起文
原少貧客京師有一書生疾篤取橐中金屬之以歸其親
既死而同舍生竊金去文原代償終身不以語人有文集
若干卷內制集若干卷至順五年制贈江浙行省參政諡
文肅吳澄碑其神道以上三傳皆自列傳移入
耶律伯堅字壽之桓州人氣豪俠喜與名士游用薦舉入
官爲工部主事至元九年轉保定路清苑縣尹初安肅州
苦徐水爲害訴於大司農司大司農欲奪水故道導水使
東東則清苑境也地勢不利伯堅陳其形勢圖其利害要
大司農司官及郡守行視可否事遂得已縣西有塘水溉
民田甚廣勢家據以爲磴民訴失利伯堅命毀磴決水注

田許以溉田餘月乃得堰水置磴仍以其事聞於省部著
爲令縣居南北衝歲爲親王大官治供帳明年復徹而新
之其費不貲伯堅築館代帳其儲遂絕凡賦役有重於他
縣者輒詣府力爭之在清苑四年擢恩州同知去民立石
頌之

段直字正卿澤州晉城人金季宣宗南遷汴河北河東山
東盜賊充斥直聚其鄉黨族屬結壘自保元兵略地晉城
直以其眾歸之幕府承制署直潞州元帥府右監軍其後
論功行賞分土世守命直佩金符爲澤州長官澤民多避
兵未還者直命籍其田廬於親戚鄰人之戶俟業主至析
而歸之逃民間之多來還素無產者則出粟振之爲他郡
所俘掠者出財購之以兵死而暴露者收瘞之未幾澤爲

元史卷四十八 列傳 九

樂土修學宮割田千畝置書萬卷迎儒士李俊民爲師不
五六年士子以通經被選者百二十人在官二十年朝廷
特命提舉本州學校事未拜而卒
暗都刺字瑞芝凱烈氏祖阿思蘭嘗從大將阿朮伐宋仕
至冀寧路達魯花赤子孫因其名蘭遂以蘭爲氏暗都刺
通經史兼習諸國語成宗時爲翰林院札爾里赤職書制
誥會有旨命書藩王添力聖旨暗都刺曰此旨非惟有虧
國體行且爲民殃矣帝聞之謂近臣曰小吏如此真難得
也事乃止尋授應奉翰林文字凡蒙古傳記多所校正除
遼州達魯花赤以政聞賜上尊名幣至順元年遷襄陽路
達魯花赤山西大饑河南行省恐流民入境爲變檄守武
關暗都刺驗其良民輒聽度關吏恐違上命暗都刺曰吾

防茲耳非仇良民也既又養粥以食之所活數萬人襄陽城臨漢水歲有水患爲築長堤城遂無虞元統二年除益都路總管俗頗悍黠而諳都刺務興學校以平易治之有馬賊白晝劫人久不能捕諳都刺生禽之其黨賂宣慰使誣以枉勘縱其賊已而賊劫河間復被獲其誣始白俾再任一考親王邁魯原作買奴鎮益都其府屬病民諳都刺裁抑之民以無擾至正六年卒年七十子燮徹堅同知新喻州事以孝稱

楊景行字賢可吉安太和州人登延祐二年進士第授贛州路會昌州判官會昌民素不知井飲汲於河流故多疾病不知陶瓦以茅覆屋故多火災景行教民穿井陶瓦免於災癘豪民號十虎悉捕置法乃勸學舍禮師儒置田以

元史卷四十八 列傳 十

饒士絃誦遂盛調永新州判官奉邵府命覈民田租一割宿敝改江西行省照磨轉撫州路宜黃縣尹總管府推官發撻奸伏郡無冤獄金溪奸民陶甲屢誣陷其縣長吏官吏畏之不敢詰陶遂暴橫一郡景行至以法痛繩之徙五百里外金溪僧雲住發人家墓取財物事覺官吏受賄緩其獄景行急案之卒治如法豪猾屏迹所歷州縣皆有惠政以翰林待制致仕年七十四卒

林興祖字宗起福州羅源人至治二年登進士第授同知黃巖州事三遷而知鉛山州鉛山豪民吳友文以造偽鈔致富遠至江淮燕薊莫不行使友文奸黠悍鷙分遣惡少四五十人爲吏於有司伺有欲告者輒先事戕之前後殺人甚眾奪人妻女十一人爲妾民銜冤不敢訴者十餘年

興祖至官卽張榜募民首告偽鈔俄有告者至伴以不實斥去又有告獲偽造二人竝贓者乃鞠之款服友文自至官爲之營救興祖命併執之須臾來訴友文者百餘人擇其重罪一二事鞠之獄立具逮捕其黨二百餘悉寘之法政聲籍甚江浙行省丞相別怯不花薦諸朝至正八年特遷道州路總管行至城外獐賊已迫其後相去僅二十里時湖南副使哈刺帖木爾屯兵城外聞賊至以乏軍需欲退兵興祖聞卽夜詣說雷之哈刺曰明日得鈔五千錠桐盾五百乃可破賊興祖許之入城視事卽以恩信勸諭鹽商貸鈔五千錠且取郡樓舊桐板爲盾日中皆備哈刺得鈔盾大喜遂雷禦賊賊聞新總管至一日具五百盾以爲大軍且至中夕遁去永明縣洞窩屢竊發興祖手榜諭之

元史卷四十八 列傳 十一

皆曰林總管廉而愛民三年不入境春旱蟲食麥苗興祖爲文禱之大雨三日蟲死而麥稔已而罷興作振貧乏輕徭薄斂郡中大治考課第一以年老致仕終於家

觀音奴字志能唐兀氏居新州登泰定四年進士第由戶部主事再轉而知歸德府廉明剛斷發撻如神民有銜冤不直者雖數十年前事皆千里奔訴觀音奴立爲剖決旬日悉清彰德富商任甲抵睢陽驢斃令郝乙剖之任以怒毆郝經宿而死郝有妻王氏妾孫氏孫訴於官官吏納任賄謂郝非傷死反抵孫罪置之獄王來訴冤觀音奴立破械出孫於獄呼府胥語之曰吾爲文具香幣若爲吾以郝事禱諸城隍神令神顯告於吾有睢陽小吏亦預郝事畏觀音奴嚴明且懼神顯其事乃以任所賂鈔陳首日郝實

傷死任賂上下匿其實吾亦得賂敢以首於是罪任商而釋孫氏靈陵民王乙有田三頃歲饑攜其妻就倉淮南而王得疾死其妻還則田為豪民楊某所據王妻訴之官楊行賄偽作售券觀音奴令王妻挽楊同就崔府君神祠質之楊懼神之靈先期以羊酒浼巫囑神勿泄其事及王與楊詣祠質之果無所顯明觀音奴疑之召巫詰問巫吐其實曰楊以羊酒浼我囑神曰我實據王田幸神勿泄也因坐楊罪歸其田竝徹神祠亳州有蝗倉禾觀音奴以事至亳民以蝗訴立取蝗向天祝之以水研碎而飲是歲蝗不為災後遷都水監官

周自強字剛善臨江路新喻州人好學能文練吏事以文法推擇為吏秦定閒廣西洞猺反自強往見猺酋說以禍

元史卷四十八 列傳

三

福中其要害猺酋立罷兵納款事聞於朝特超授廣西兩江道宣慰司都事再遷婺州路義烏縣尹周知民情而寬厚不為刻深民有以爭訟訴於庭者一見即能知其曲直然不遽加刑必反覆開譬之能悔悟首實則原其罪必怙惡不悛然後繩以法民畏且愛獄訟頓息民間田稅之籍多失實以故差徭不平自強出令履畝覈之豪猾不能欺於是賦役均平部使者數以廉能譽於朝以江州路總管致仕

白景亮字明甫南陽人明法律善書算由征東行省譯史有勞超遷南恩知州升沔陽府尹奏取於朝特授衢州路總管先是為郡者於民間徭役不盡校田畝以為則吏得竝縱高下其手富民或優有餘力而貧弱多至破產景亮

始覈驗以均之視田多寡為役輕重由是民不勞而事易集郡學久廢從祀諸賢無塑像諸生無廩饗祭服樂器有缺景亮皆為備之儒風始振景亮自奉甚薄與妻脫粟對飯部使者上其事特詔褒美賜以宮錦改授台州路總管卒於官

王良字止善紹興諸暨人准東廉訪司辟為書吏遷淮西會例革南士就為吏於兩淮都轉運鹽使司以歲月及格授廬州錄事判官淮東宣慰司辟為令史以廉能稱再調峽州總管府知事又辟江浙行省掾史會朝廷復立諸市船司良從省官至泉州建言若買舊有之船以付船商則費省而工易集且可絕官吏培克之敝中書省報如良言凡為船六艘省官錢五十餘萬緒歷建德縣尹除兩浙都

元史卷四十八 列傳

三

轉運鹽使司經歷紹興路總管王克敬以計口倉不便議稍損其額以紓民力沮之者謂成籍不可改良曰奈何重改民籍而輕棄民命乎且浙右之郡商賈輻輳未嘗以口計也曷移其所賦散於商旅之所聚於是議歲減紹興倉鹽五千六百引尋有復排前議者良欲辭職去丞相亟遣畱良而議遂定遷海道漕運都萬戶府經歷紹興之官糧入海運者十萬石城距海十八里歲令有司拘民船以備短送吏胥得竝緣為奸及至海次主運者又不即受有折缺之患良執言曰運戶既有官賦之直何復為是紛紛也乃責運戶自載糧入運船運船為風所敗者當覈實除其數移文往返連數歲不絕良取吏牘披閱即除其糧五萬三千石鈔二百五十萬緡遷檢校江浙有詣中書訟松江

富民匿湖田沙蕩宜設官追取其糧行省遣良驗視良反
覆辨其誑且謂輕聽擾民非國家培養根本之策事遂寢
除江西行省左右司員外郎安福小吏誣富民包隱田租
株連數百家屢按無實良言是州之糧比原額已增豈復
有所欺隱行省用良言悉調之在任歲餘以淮東道副使
致仕

盧琦字希韓惠安人登至正二年進士第十二年稍遷至
永春縣尹始至振饑饉止橫斂均賦役減口鹽百餘引調
包銀權鐵之無徵者乃新學宮延師儒課子弟鄰邑仙遊
盜發琦適在邑境盜遙見之迎拜曰此永春大夫也爲大
夫百姓者何幸乎吾邑長乃以暴毒驅我至此琦因立馬
喻以禍福眾皆投刃槩請縛其首以自新琦許之旋縛至

元史卷四十八

列傳

五

琦械送帥府自是威惠行於境外十三年泉郡大饑死者
相枕籍其能行者皆老幼扶攜就食永春琦命分居浮屠
及大家使食之所存活不可勝計十四年安溪寇數萬人
來襲永春琦聞召邑民喻之曰汝等能戰則與之戰不能
則我當獨死之爾眾皆感憤曰赤子忍以父母界賊邪且
彼寇方將虜掠我妻子焚毀我室廬今日之事有進無退
因踊躍爭奮大敗之明日賊復傾巢而至又破之大小三
十餘戰斬獲千二百餘人賊遂遁去時兵革四起列郡皆
洶洶不寧獨永春晏然十六年改調寧德縣尹而去
鄒伯顏字從吉高唐人爲建寧崇安縣尹崇安之爲邑區
別其土田名之曰都者五十五都之田上送官者爲糧
六千石其大家以五十餘家而兼五千石細民以四百餘

家而合一千石大家之田連跨數都而細民之糧或僅升
合有司常以四百之細民配五十大家之役故貧者受役
旬日而家已破伯顏取其糧籍而分計之有糧一石者受
一石之役有糧升斗者受升斗之役田多者受數都之役
田少者稱其所出而無倖免民始得以休息邑有宋趙抃
所鑿溝溉民田數千畝歲久湮廢伯顏修長溝十里繞楓
樹陂累石爲固悉復抃遺迹田遂常稔安慶路嘗得造偽
鈔者遣卒械囚至崇安捕其黨囚與卒結謀將肆虐良民
家伯顏執而歸諸安慶省臺咸舉其能選調漳州路判官
劉秉直字清臣大都武清人至正八年爲衛輝路總管平
徭役興教化賊劫汲縣民張聚鈔并殺之賊不獲秉直具
詞致禱城隍祠而使人伺於死所忽有邨民阿蓮者戰怖

元史卷四十八

列傳

五

仆地具言賊之姓名及所在乃命尉襲之果得賊於汴遂
正其罪秋七月螟生民患之秉直禱於八蜡祠螟皆自死
天不雨禾且槁秉直詣城北太行之蒼峪神祠祈祝有青
蛇宛延而出還行數里雷雨大至秩滿以親老去官侍養
許義夫碭山人爲夏邑縣尹每親詣鄉社教民稼穡以勤
惰爲賞罰三年境內豐足後尹封丘值至正四年大饑盜
賊羣起抄掠州縣至近境乃單馬出郊十里外迎賊力言
封丘縣小民貧皆已驚竄幸哀之無入吾境也賊感其誠
竟他往封丘民得免於難

元史卷四十八終

元史卷四十九

列傳三十三

忠義一 元初及至元延祐至正間效忠者六傳

月里麻思乃馬氏初太宗命與斷事官忽都那同署後又同阿尤魯充達魯花赤破南宿州太宗十三年辛丑使宋議和從行者七十餘人馳抵淮上宋將以兵脅之降誘以官爵月里麻思曰吾持節南來以通國好反誘我以不義汝國既不懼亡吾豈懼死邪竝語同行者當仗義死毋辱君命皆慷慨不少屈宋將知其不可奪乃幽之長沙飛虎寨三十六年及伯顏兵渡江前使臣郝經自真州釋還而月里麻思已死不及生還世祖深悼之詔復其家以子忽都哈思為荅刺罕給日廩忽都哈思自請從征宋以雪父恥帝嘉之授以上均州監戰萬戶至元十三年宋亡十八

元史卷四十九 列傳

一

年以招討使將兵征日本死於敵又有唐慶者太宗時為國信使取金質子歲幣以金曹王來見帝於官山再往令金主黜帝號稱臣金主不從輒語侵之金君臣不能忍夜殺使者及從人於館和議遂絕此倚強凌弱自取殺身非行人之體君子無取焉 舊史唐慶傳今附
石珪泰安新秦人宋徂徠先生守道之裔孫也材武倜儻金貞祐南渡兵戈四起珪率少壯保險與滕陽陳敬宗聚兵山東破張都統李霸王兵於龜蒙山宋將鄭元龍以兵迎敵珪敗之於毫陽遂乘勝引兵入盱眙會宋賈涉誘殺漣水忠義軍統轄季先人情不安眾迎珪為帥歲戊寅太祖使葛不罕與宋議和己卯珪令麾下劉順直抵尋斯干城入覲太祖慰勞順且敕珪曰如宋和議不成吾與爾永

元史卷四十九 列傳

二

結一家庚辰宋果渝盟珪棄其妻孔氏子金山仗劍渡淮宋將追之曰太尉迴完汝妻子珪不願宋將沈其妻子於淮遂率順及李溫因亭里海歸木華黎木華黎承制授珪濟兗單三州兵馬都總管山東路行元帥佩金虎符後金棄東平珪與嚴實分據收輯濟兗沂滕單諸州癸未詔授東平兵馬都總管山東諸路都元帥秋七月珪破曹州與金將鄭從宜連戰數晝夜糧絕援兵不至珪臨陳馬仆被禽囚至汴金主壯之誘以名爵珪憤然曰丈夫能一身受封二國那假我一朝當縛爾以獻金主怒蒸殺於市珪怡然就死色不變其麾下立社克州祀焉子天祿孫興祖皆襲千戶從伐金宋有戰功又李伯溫者大寧義州人長兄惟則平陽征行萬戶次兄伯通死錦州張致之難伯溫襲平陽元帥府弟守正守忠先後襲職守平陽俱於太祖時與金兵戰死 舊史石天祿李伯溫皆專傳今并附
攸哈刺 舊連拔 渤海人初名興哥世農家善騎射以武斷鄉井金末避地大寧保高州富庶寨屢挫大軍木華黎率兵攻之寨破奔高州元兵圍城下令曰能斬攸興哥首以降則城中居民皆獲生守者召謂曰汝奇男子吾寧忍獻汝首汝其往降乎不然吾一城且無噍類攸興哥乃折矢出降諸將怒欲殺之木華黎曰壯士也畱之為吾用俾隸麾下從攻通州獻計一夕造礮三十雲梯數十附城州將懼出寶貨以降木華黎命恣取之攸興哥獨取良馬三以賞兵士木華黎以其功聞太祖賜名哈刺拔都從木華黎略地燕南為先鋒至大名金將徒單登城督戰攸哈刺射

之中左目其部將開門南奔追殺將盡論功賜金符充隨營監察戍寅授金虎符河東北路都元帥鎮太原時太原新破攸哈刺修城池繕兵甲招降屬邑市肆不改遠近來歸令軍中凡俘獲有親者聽贖無貴者官爲贖之民大悅辛巳三月金兵攻壽陽縣王胡莊垂破時左右裨將各分兵守險城中見卒不滿百攸哈刺夜半引甲騎十餘人救之金兵舉烽東西兩山攸哈刺趨之大戰天將明金兵遁去擣太原之虛獲其家屬攸哈刺聞之徑趨西山復奪以還五月金趙權府率兵三萬圍太原攸哈刺將騎三十出西門令騎曳柴揚塵聲言曰蒙古兵三萬至矣金兵懼潰去癸未太原諸邑皆平惟孟州陵井寨忻州清泉寨相唇齒皆未下甲申十月將兵至陵井遣卒叩寨門詐曰納糧

元史卷四十九 列傳

三

芻門啟徑入潰之餘寨皆降丁亥五月姦人夜獻太原東門於武仙仙引兵入攸哈刺慶戰仙兵大至諸將自城外呼之出攸哈刺曰眞定史天倪平陽李守忠隰州田雄皆失守矣我又棄太原將何面目見主上及國王乎誓與城存亡遂歿於陳事聞命其長子芒兀台嗣鎮太原又潞州任志者歲戍寅歸木華黎於潞州授虎符充元帥收輯山寨數與金兵戰金營禽其長子如山以招之志親射殺其子赴木華黎大軍道經武安其縣已反爲金志死之子存亦戰死潞州又耶律忒末及子天祐以金都統降元會眞定將武仙之叛父子先後戰死舊史專傳今以其皆金降將也類附於此

合刺普華岳璘子也自唐至元世相高昌國十餘世至岳

璘隨兄附太祖事見元初文臣傳合刺普華幼習畏兀書及經史記誦精敏李璘叛其母與敦氏攜季子脫烈普華避地登萊聞音問隔絕合刺普華從從叔父撒吉思平賊山東卒奉其母以歸撒吉思深器重之自謂其才不及言於世祖召給宿衛嘗以事至益都於四腳山下置廣興商山二冶以勞授金符爲商山鐵冶都提舉以職讓其弟元兵南伐宋以行都漕運使帥諸翼兵萬五千主餽運江南平上疏言親肺腑禮大臣以存國家之體興學校獎名節以勵天下之士正名分嚴攷課以定百官之法通泉幣卻貢獻以厚生民之本又言江南新附宜招舊族力穡通商弛征薄入以撫馴其民不然恐煩後慮帝多采用其言屬漕米二十萬緡邗溝達於河舟覆損十之一而又每斛

元史卷四十九 列傳

四

視都斛虧三升時阿合馬專政責償舟人合刺普華伏闕抗言舟戶無罪苟朝廷必不任虧損臣獨當其辜詔勿治阿合馬憤之出爲寧海路達魯花赤後改廣東都轉運鹽使兼領諸番市舶時盜梗鹽法東莞香山惠州負販之徒萬人爲亂江西行省命與招討使荅失蠻討捕之先驅斬渠魁乃躬抵賊巢招降餘黨仍奏除鹽法之不便者劾按察使脫歡姦利罷之羣盜歐南喜僭王號僞署丞相招討眾號十萬因圖上其山川形勢及攻取之策三十餘條遂與都元帥課伯海身宣慰都元帥白佐萬戶王守信等分兵搃之未幾右丞梭都督兵征占城交趾屬護饗道比至東莞博羅二縣界中遇劇賊歐鍾等橫絕石灣其鋒銳甚合刺普華身先士卒且戰且行矢竭馬創徒步格鬪殺數

十人眾寡不敵為所執賊欲奉之為主不屈遂遇害是夕其妻希召特勒氏夢其來告曰吾死矣知事張德劉閏亦夢之二人相繼死而軍中往往見其乘騾督戰云後贈戶部尚書諡忠愍子二人僕文質越倫質僕文質官至吉安路達魯花赤贈宣惠安遠功臣雲中郡侯諡忠襄子六人僕玉立僕直堅僕哲篤僕朝吾僕列篋五人皆第進士僕哲篤官至江西行省右丞以文學政事稱於時越倫質子善著僕哲篤子僕百寮遜善著子正宗阿爾思蘭皆相繼登第一門世科之盛當代罕倫歐陽玄為撰高昌僕氏家傳又至元間死於叛藩之難有伯巴者舊作巴兒晃合丹氏祖明里耶赤哥父脫倫閣里必事太祖太宗累有戰功伯巴舊臣子孫於世祖時為萬戶領諸部軍馬屯守謙州至

元史卷四十九 列傳 五

元十二年親王昔列吉脫鐵木爾叛奔海都伯巴以聞且願提兵往討未得命為彼所襲死焉脫鐵木爾虜其二子曰八刺曰不蘭奚分置左右待之頗厚居歲餘八刺陰結其近侍謀報父仇謀泄將家族南奔至一河馬驚不能渡回拒追騎射中數人力窮就禽脫鐵木爾責之曰我待汝厚甚而汝反何邪八刺曰我誓殺汝以報君父之讐今力窮被執任汝所為逼令跪不屈以鐵搗碎其膝終不屈兄弟同被害幼子何都兀赤官至河北河南道廉訪使舊史伯八

兒專傳
今并附

劉天孚字裕民大名人中書譯史為東平總管府判官改都漕運司判官知冠州再知許州所至有治績時檢核屯田臨潁鄧艾口民稻田三百頃有欲害之者指為右屯

陳於中書請復築之中書下天孚按實天孚為辨其非章數上乃止襄城與葉縣接壤其南為湛河襄城民食滄鹽葉縣民食解鹽刻石河南岸為界葉縣令妄徙石於北二里誣其民食私鹽繫治百餘家兩縣鬪辯天孚為攷正經界申中書葉令乃伏罪歲大旱天孚禱即雨野有蝗俄為羣鳥啄盡明年麥熟時有青蠡食麥忽生大花蟲盡齧之許人立碑頌焉延祐間知河中府視事始兩月時明宗封周王出鎮雲南行次延安陝西行省丞相阿思罕謀擁戴舉兵至河中時事起不虞天孚日夜治戰守具選丁壯分守要害令河東縣達魯花赤脫因都守大慶關津口盡收船舫東岸又遣官守汾陽守禹門守風陵等渡阿思罕軍列柵河西岸使來索舟天孚度不能拒凡八遣人至晉寧

元史卷四十九 列傳 六

乞援兵不報居七日阿思罕縛柵河上欲縱火屠城同知府事鐵哥與河東廉訪副使明安答見事急且患城中人偏乃詣阿思罕軍阿思罕囚之而斂船濟兵兵既入城阿思罕方坐府治號令諸軍天孚佩刀直前眾遏之不得進退謂幕僚王從善等曰與其辱於賊吾寧蹈河以死遂拂衣出時天寒河冰方堅天孚拔所佩刀斫冰開北望再拜投水死阿思罕大怒籍其家郡人咸哀痛之事平召其弟天惠給驛歸葬贈彭城郡侯諡忠毅

昔班帖木爾夫婦者蒙古人先是昔班帖木爾嘗為趙王位下同知怯憐口總管府事其妻嘗保育趙王及順帝至正十八年趙王部落蔑里叛欲殺之昔班與妻謀以其子觀音奴服王平日衣冠居王宮夜半夫妻衛趙王微服遁

去比賊至執觀音奴知其假王遂殺之而趙王竟得免事
聞詔授昔班同知河東宣慰司事其妻刺八哈屯雲中郡
夫人子觀音奴贈同知大同路事仍旌表其門閭舊史本紀今節取入忠義傳

忠義二元末死於楚賊者七傳

伯顏不花的斤字蒼崖畏吾氏駙馬都尉中書丞相封高
昌王雪雪之孫駙馬都尉江浙行省丞相封荆南王朵爾
之子也好學曉音律初用父蔭同知信州路事又移建德
路會徽寇犯遂安伯顏不花將義兵平之又禽淳安叛賊
方清之以功遷本路總管至正十六年授衢州路達魯花
赤明年行樞密院判官阿魯輝引兵經衢州軍無紀律所
過輒大剽掠伯顏不花曰以官軍而爲民患此國賊也帥

元史卷四十九列傳

七

兵逐之出境郡賴以寧擢江東道廉訪副使十八年十二
月江西陳友諒遣賊黨王奉國等號二十萬寇信州明年
正月伯顏不花自衢引兵援焉遇賊城東力戰破走之時
鎮南王子大聖奴樞密院判官席閏等屯兵城中聞伯顏
不花至爭開門出迎後數日賊復來攻伯顏不花大饗士
約曰今日破賊不用命者斬乃部分諸將命阿速諸軍及
民義爲左翼出南門高義范則忠將信陽一軍爲右翼出
北門自與忽都不華將沿海諸軍爲中軍出西門因奮擊
入賊營斬首數千級幾禽奉國適賊將突至官軍幾陷復
勒兵力戰大破之二月友諒弟友德營於城東繞城植木
柵攻益急又遣僞萬戶周伯嘉來說降高義潛與之通給
忽都不華等謂與奉國相見則兵變可解忽都不華信之

率則忠等十人往見奉國囚之不遣明日奉國令高義以
計來誘伯顏不花時伯顏不花坐城上見義單騎來怒謂
曰汝誘十帥無一人還今復來誘我邪數其罪斬之由是
日夜鏖戰糧竭矢盡不少衰夏四月有大呼於城下者稱
有詔來自江西招降伯顏不花曰如此乃賊耳吾大臣
子可受爾僞詔乎城存與存城亡與亡吾計之熟矣時軍
民惟食草苗茶紙既盡乃至播糶底掘鼠羅雀殺老弱
以食五月大破賊兵六月奉國親來攻城晝夜不息者踰
旬穴地百餘所或魚貫梯城而上伯顏不花登城麾兵拒
之已而士卒力疲不能戰萬戶顧馬爾以其眾叛城遂陷
席閏出降大聖奴及參謀海魯丁皆死之伯顏不花力戰
不勝遂自殺其部將蔡誠盡殺妻子乃與蔣廣奮力巷戰

元史卷四十九列傳

八

俱死之先是伯顏不花之援信州也嘗南望泣下曰我爲
天子司憲視彼城之危急忍坐視乎吾知上報天子下拯
生民餘皆無可恤所念者太夫人耳即日入拜其母鮮于
氏曰兒今不得事母矣母曰爾爲忠臣吾即死復何憾鮮
于氏太常典簿樞之女也伯顏不花因命子耶先不花奉
其母聞道入福建以江東廉訪司印送行御史臺遂力守
孤城而死朝廷賜諡曰桓敏
道童高昌人自號石巖性深沈寡言以世胄入官至正十
一年以平章政事行省江西是年徐壽輝起斬黃平章圖
堅理不花將兵捍江州既而土寇蠶起道童素不知兵倉
皇無所措用左右司郎中普顏不花言請撫州致仕左丞
章伯顏至署商軍務以便宣使署本省左丞事專任調遣

乃與普顏不花設禦敵計甚悉明年正月武昌陷圍堅理不花由江州遁還二月普顏不花將兵往江州至石頭渡遇賊戰敗道童聞之大恐即懷印遁走普顏不花還與章伯顏定守城計後數日道童始自南昌民家來歸遂議分門各守以備敵三月賊眾來圍城中置各廂官及各巷長晝夜堅守眾心翕然而道童素恤民多為之用賊圍城凡兩月民無離志普顏不花密召死士數千面塗青額抹黃布衣黃衣為前鋒又別選精銳數千為中軍而募助戰者殿後命萬戶章安因卜魯哈台領之夜半開門伏柵下黎明鉦鼓四面攻之賊驚為神敗走遂乘勝擣其營復分掃其餘黨皆任章伯顏普顏不花之功伯顏尋以疾卒朝廷以道童捍賊有功加大司徒開府仍賜龍衣御酒及秋

元史卷四十九 列傳

九

命亦憐真班為江西行省左丞相火尼赤為左丞同將兵來江西未幾亦憐真班卒道童屬火尼赤平富瑞二州分鎮其地適歲大旱公私匱乏道童乃移咨江浙行省借米數十萬石鹽數十萬引與軍民約三日人糶官米一斗入昏鈔二貫又三日買官鹽十斤入昏鈔二貫民皆便之由是按堵如故賊不敢犯十八年夏四月陳友諒復攻江西城時火尼赤已遷平章行便宜事素與道童不相能且貪忍不得將士心見城且陷遂夜遁去道童退保撫州路欲集諸縣義兵以圖克復勢已不可為遂為賊害事聞賜諡

忠烈

自列傳

全普庵撒里字子仁高昌人初為中書省檢校時太師汪家奴擅權用事臺諫無敢言者普庵撒里獨於眾中歷數

其過謬謬無懼色拜監察御史即首劾汪家奴十罪乃見黜然氣益振歷詆權貴朝臣莫不畏出為廣東廉訪使尋除兵部尚書未幾授贛州路達魯花赤發摘奸惡一郡肅然至正十一年潁州盜起即修築城壘旬月守禦畢備募勇士三千人日練習之屬邑有為賊所陷者遣兵復之境內悉安十六年以功拜江西行省參政分省於贛十八年江西下流諸郡皆為陳友諒所據乃與總管哈海赤戮力同守友諒遣其將幸文才率兵圍贛使人脅降普庵撒里斬其使日擐甲登城拒戰凡四月兵少食盡義兵萬戶馬合某沙欲舉城降賊普庵撒里不從遂自刎事聞贈諡曰傲哀哈海赤守贛尤有功城陷之日賊將脅之使降哈海赤謂之曰與汝戰者我也毋殺贛民惟速殺我遂見害

元史卷四十九 列傳

十

又瀏陽周鏜者字以聲通春秋登泰定四年進士第授衡陽縣丞再調大冶縣尹抑豪強惠窮民治行為諸縣取累遷翰林國史院編修官出為四川儒學提舉便道還家無何湖南北盜起瀏陽無城守者皆驚竄賊至得鏜欲推為主鏜瞠目厲聲罵賊死其同里謝一魯者鄉貢進士嘗為石林書院山長亦舉家死潭州之賊舊史周鏜專傳今并附

聶炳字韞夫江夏人元統元年進士授同知平昌州事轉寶慶路推官至正十二年遷知荆門州纔半歲淮漢賊起荆門不守炳出募土兵得眾七萬復荆門又與四川行省平章交往復江陵既而斬黃安陸之賊復振賊將俞君正合兵來攻荆門炳率孤軍晝夜血戰援絕城陷為賊所執極口罵不絕賊以刃抉其齒盡乃斷左臂而支解之未幾

賊陷潛江縣達魯花赤明安達爾率勇敢出擊禽其偽將
進營蘆泆賊眾奄至出關死其家皆被害一子桂山海牙
懷印綬去得免明安達爾唐兀氏字士元炳同年進士也
又茶陵劉畊孫字存吾至順元年進士授臨武縣尹建學
校歷建德徽州瑞州三路推官所至有聲至正十二年春
斬黃賊攻破湖南畊孫傾家募士以援茶陵賊至輒卻故
茶陵久不失守十五年轉寧國路推官歲饑勸振活者萬
計會長鎗賊鎖南班程述謝璽等攻寧國畊孫分守城西
南江浙行省遣援兵至則已疲而城恃有援不為備賊夜
四鼓引眾緣堞而上城遂陷畊孫力戰遇害弟壽孫常寧
州儒學正湖南陷常寧長吏棄城走民奉印請壽孫為城
守城賴以寧者一年外援俱絕死之長子碩為武昌江夏

元史卷四十九 列傳 十一

縣魯湖大使起義兵援茶陵亦死又沔陽州推官俞述祖
平江路管軍鎮撫守昱嶺關桂完澤湖廣行臺御史中丞
守饒州魏中立安陸知府丑閻竝以城守死於斬黃之賊
是時賊既陷湖廣分攻州郡官軍多疲懦不能拒所在無
賴子多乘間竊發不旬日眾輒數萬皆短衣草屨木杷竹
鎗截緋帛為巾襦彌野皆赤寶烏合不能戰而州郡望風
驚潰以至賊長驅如入無人之境其賢者又各以倉卒敗
死傳不勝傳故彙敘於此舊史劉畊孫俞述祖桂完澤
高昌字羅木兒高昌人字國賓由宿衛補官至襄陽路達
魯花赤至正十一年盜起汝潁均州鄖縣人田端子等亦
聚眾殺官吏字羅將民兵捕斬之未幾行省廉訪司同檄
字羅以其所領兵會諸軍於均房同討賊賊始退而穀城

光化以急告帥兵趨穀城而分遣樊城主簿脫因等趨
光化且使求糧於襄陽不應遣同知耶先不花促之又不
應軍乏食不能行乃駐於柴店復遣從子馬哈失力往告
詞甚苦切廉訪分司王僉事本路總管柴順禮怒其責望
械之適紐真來獻光化所獲首級且言字羅在穀城與賊
相持未知存歿宜急濟其糧少緩恐弗及矣於是脫二人
械遣還而命耶先不花率數千人會字羅討賊明年正月
襄陽失守耶先不花等聞之驚潰字羅領義兵二百且戰
且行至監利縣遇沔陽府達魯花赤交住同知三山安陸
府同知燕只不花荆襄提舉相哥失力之師時濱江有船
千餘乃糾合諸義兵丁壯水工五千餘人署以軍號給以
刀稍具哨馬五十水陸繼進比至石首縣聞中興路亦陷

元史卷四十九 列傳 十一

乃議趨岳州就元帥帖榮而道阻不得前仍趨襄陽賊方
駐楊湖港乘其不虞擊之獲船二十七生禽賊黨劉交兒
訊得其情進次潛江又斬賊數百級獲三十餘船梟賊將
劉萬戶許堂主等是日甫止兵未食而賊大至與戰抵暮
交住等軍各當一面不能救字羅被重創磨馬哈失力使
去曰吾以死報國汝無留此馬哈失力泣曰死生從叔父
既而字羅被執賊請同為逆字羅怒罵之遂遇害馬哈失
力帥家奴求其尸復與賊戰俱歿於陳舉家死者凡二十
六人又卜理牙敦者山南廉訪使治中興至正十二年斬
黃賊來犯與前判官上都皆力戰被執不屈死卜理牙敦
今并
潮海札刺台氏靖安縣達魯花赤至正十二年斬黃賊起

潮海與縣尹黃紹同集義兵禦賊未幾賊數萬來寇紹赴行省求援潮海獨率眾戰象湖大破之乃起進士胡斗元塗淵舒慶遠甘棠等謀畫而以勇士黃雲為前鋒自二月至於八月戰屢捷禽賊將洪元帥而賊黨益盛黃雲戰死我軍挫衄潮海遂被圍尋為賊所執死於富州子民安圖襲父職為本縣達魯花赤十三年帥眾敗走賊將復縣治十四年賊兵復至民安圖迎戰力竭賊執而高之紹字仲先臨川人登至正八年進士第以求援出靖安而道阻絕遇官軍護之得入龍興而龍興亦被圍其後圍解紹乃與民安圖招諭叛境過建昌之高坪遇賊紹與戰不勝正衣冠罵賊死之斗元字元浩靖安人至正十年領江西鄉薦第一賊至靖安斗元以鄉兵擊敗之入縣治與潮海共圖

元史卷四十九 列傳

三

戰守及潮海被執賊脅之使降斗元罵不屈乃以土埋其腰不死又縛置暗室斗元仆牆以出逃入深山狂罵而死黃雲撫州人寓靖安素以勇捷稱每接戰獨以身當敵嘗為數十人所圍即奮勇躍出至是身中數十槍噴血罵賊而死

汪澤民字叔志徽之婺源州人宋端明殿學士藻之七世孫也擢延祐五年進士第授同知岳州路平江州事以母年八十上書願奪所授官一等或二等得近地以便養不允南歸奉母之官州民李氏以貨雄誣其孀弟婦以好事將據有其財獄成而澤民至卒雪之會朝廷徵江南包銀府檄澤民分辨民不擾而事集尋遷南安路總管府推官鎮守萬戶多爾赤持官府短長其黨王甲為府史毆傷縣

令訴郡同僚畏多爾赤之勢不敢申理澤民獨捕甲繫之獄多爾赤賂巡按御史欲出之澤民正色與辨御史沮怍乃卒罪王甲潮州府判官錢珍以奸淫事殺推官梁楫事連廣東廉訪副使劉珍坐繫者二百餘省府凡六委官鞫問皆顧忌淹延弗能白復檄澤民識之獄立具改平江路總管府推官有僧淨廣與他僧有憾久絕往來一日邀廣飲廣弟子急欲得師財且苦其筆楚潛往他僧所殺之明日訴官他僧不勝攷掠誣服三經審錄詞無異結案待報澤民取行凶刀視之上有鐵工姓名台工問之乃其弟子刀也一訊吐實即械之而出他僧人罵以為神調濟寧路兗州知州建議衍聖公襲封職僅三品宜進其品秩以示崇聖之意廷議從之至正三年除國子司業與修遼金宋

元史卷四十九 列傳

四

史書成遷集賢直學士未兩月即移疾致仕歸十五年斬黃賊犯宣州城中兵不滿數百江東廉訪使道童雅重澤民日就之詢守禦計城得無虞明年長槍賊鎮南班等叛來寇城或勸澤民去澤民曰昔江萬里寓鄱陽大軍偏城不隨眾走況軍民離合視吾去留吾何忍去父母之邦乎畱不去凡戰鬪籌畫多澤民參決之屢敗賊兵既而寇益眾城陷被執罵賊遇害年七十事聞贈江浙行中書省左丞追封譙國郡公諡文節宋濂碑其神道舊史在列傳今移入

忠義三元未死淮浙之難者六傳

李齊字公平廣平人家甚貧客於江南工辭章元統元年進士第一歷僉河南淮西廉訪司事移知高郵府有政聲至正十年盜突入府驛取十二馬去齊躬追殺之十一年

州人秦觀保造兵仗將圖劫掠復獲誅之十三年秦州白駒場亭民張士誠破秦州河南行省遣齊往招降被拘久之賊酋自相殺始縱齊來歸秦州平賊徒尙彙聚士誠復鼓變殺參政趙璉掠官庫民財走入得勝湖俄陷興化縣行省以左丞僕哲篤偕宗王鎮高郵使齊出守暨社湖夏五月乙未數賊入城一譟呼而省憲官皆遁齊急還救城賊已閉門拒守遂連興化接得勝湖舟艦四塞蔓入寶應縣已而有赦詔至高郵不得入賊給之曰請李知府來乃受命行省強齊往至則下齊獄中齊益辨說士誠本無降意特遷延爲繕飭計官軍謀知之乃進攻城士誠呼齊使齊齊叱曰吾膝如鐵豈爲賊屈士誠怒扼之跪齊立而詬之乃曳倒搥碎其膝而尚之論者謂大科三魁若秦不華

元史卷四十九 列傳

五

沒海上李輔隕九江洎齊之死皆不負所學云同死趙璉者字伯器宏偉之孫也至治元年進士第屢遷杭州路總管強毅開敏杭人碑其政績會朝廷命李齊招諭士誠乃移璉以參知政事鎮秦州璉方治戈船趨濠泗士誠疑懼不敢發又覘知州城無備遂夜四鼓復反襲城璉力戰墜馬被執又盛昭者字克明歸德人官淮南行省照磨行省遣入高郵授士誠官不受被拘皆罵賊死趙璉盛昭舊史專傳今并附石普字元周徐州人至正五年進士授國史院編修官改經正監經歷淮東西盜起朝廷方用兵普以將略薦丞相脫脫討徐州以普從行徐平錄功遷兵部主事尋遷樞密院都事從樞密院官守淮安時張士誠據高郵普詣丞相面陳破賊之策且曰高郵負重湖之險地皆沮洳騎兵莫

能前與普步兵三萬保取之高郵既平則濠泗易破請先驅爲天下忠義倡丞相壯之命權山東義兵萬戶府事招義勇萬人以行而汝中柏者方用事陰沮之減其軍半初令普便宜行事及行又使聽淮南行省節制普行次范水砦日未夕趣軍中具食夜漏三刻下令銜枚趨寶應其營中更鼓如平時抵縣卽登城樹幟城賊驚潰因安撫其民諸將忌普功始水陸進兵乘勢拔十餘砦斬賊數百將抵高郵城分兵三隊一趨城東備水戰一爲奇兵虞後路普自將攻北門遇賊與戰賊不能支遁入城普先士卒躡之縱火燒關門賊懼謀棄城走而援兵按不進有蒙古軍千騎突出普軍前欲收先入功賊以死捍蒙古軍恇怯卽馳回遂爲賊所蹂踐墜水中普軍亦亂賊乘之普勒餘兵血

元史卷四十九 列傳

六

戰良久仗劍大呼曰大丈夫當爲國死有不進前者斬奮擊直入賊陣中從者僅三十人至日西援絕被創墜馬復步戰數合左脅爲賊鎗所中猶手握其鎗斫賊死賊眾攢鎗以刺普普與從者皆力戰死之納速刺丁字士瞻其父馬合木從征襄陽以勞擢濬州達魯花赤因家大名納速刺丁起身鄉貢進士辟掾淮東宣慰司至正十年以民兵襲真州賊有功已而秦州賊大起鎮南王府宣慰司請參議軍事納速刺丁建議築四城立外寨捷堤穿河募兵與賊抗行省檄其提戰艦六十海舟十四上下巡捕以固江面且設蒙古軍五百往江寧道遇賊斬擊二百餘級遂抵龍潭而還未幾出邏江上奪賊火船二百賊遁走俄復據龍潭口又擊走之追斬三百餘級

其子寶童禽賊首及其號旗捷聞賞賚優渥召還真州南
行臺檄使援蕪湖及主賊船已薄岸遂三分戰艦縱擊之
賊奔潰俘斬甚眾賊不得渡江者多納速刺丁之功也秦
州賊李二起行省移之捍高郵得勝湖賊船七十餘柁乘
風而來即前擊之焚其二十餘船賊潰去李二失援遂降
其黨張士誠殺李二復為亂戕參政趙璉入據興化而水
陸襲高郵屯兵東門納速刺丁以舟師會諸軍討之距三
珠鎮麾兵挫賊前鋒後賊鼓譟而前乃發火箭火鏃射之
死者蔽流而下賊繚船於背盡力來攻而阿速衛軍及真
滁萬戶府等官見賊勢急皆遁去納速刺丁顧必死謂其
三子寶童海魯丁西山奴等速走寶童等不肯去遂皆死
之事聞贈納速刺丁淮西元帥府經歷又樊執敬者鄆城

元史卷四十九 列傳

七

人以江浙行省參政督海運於平江舟將發海口為海寇
劫糧以去俄守杭州昱嶺關賊至城陷騎馬奮力斫賊死
樊執敬舊史事

褚不華字君實隰州石樓人沈默有器局泰定初補中瑞
司譯史授海道副千戶連拜南臺西臺監察御史遷淮東
廉訪副使汝穎盜發勢張甚不華行部至淮安極力守禦
多所斬獲且請知樞密院老章判官劉甲守韓信城相倚
角復劾諸將逗撓之罪擢廉訪使劉甲有智勇與賊戰輒
勝賊憚之號曰劉鐵頭不華頗賴之總兵者聞不華劾己
益恚嫉乃檄甲別將共擊賊冀以困不華甲去韓信城陷
賊乃掘塹相銜捷水寨以合圍既而天長青軍叛普顏帖
木爾所統黃軍復叛賊皆挾之來攻不華知事危退入哈

刺章營賊稍引去乃出抵楊邨橋賊奄至殺廉訪副使不
達火里不華以餘兵入淮安時城之東西南三面皆賊惟
北門通流陽阻赤鯉湖指揮使魏岳楊暹駐兵流陽淮安
倚其芻餉而赤鯉湖為賊據流陽之路又絕賊計孤城可
取進柵南鎖橋不華與元帥張存義出大西門會僉事忽
都不華兵突賊柵殊死戰賊敗走追北二十餘里城中食
且盡元帥吳德瑋運糧萬斛入河為賊所掠賊與青軍攻
圍日益急總兵者屯下邳相去五百里按兵不出凡遣使
十九輩告急皆不聽城中餓者仆道上即取啖之草木螺
蛤魚蛙燕鳥及鞞皮鞍轡革箱敗弓之筋皆盡徹屋為薪
人多露處坊陌生荆棘力盡城陷不華猶據西門力鬪中
傷見執為賊所繫次子伴哥冒刃護之亦見殺時至正十

元史卷四十九 列傳

六

六年十月乙丑也不華守淮安五年殆數百戰精忠大
節人比之張巡云朝廷聞之贈翰林學士承旨衛國公諡
忠肅

月魯不花字彥明蒙古遜都思氏太祖四傑功臣赤老溫
次子納圖爾之玄孫也生而容貌魁偉咸以令器期之未
冠父脫帖木爾以千戶戍越因受業於韓性試江浙鄉闈
中第一方揭曉試官夢月中有花象已而果符其名登元
統元年進士第至正中除吏部員外郎奉命至江浙糴粟
二十四萬石至則第戶產之高下以為糴之多寡不擾而
事集既而軍餉不給又奉命出糴於江浙召父老諭之不
踰月糧事以畢太師石丞相脫脫南征辟從軍事督饋餉
尋拜監察御史首上疏言郊廟禮缺天子宜躬祀南郊殷

祭太室皇太子天下之本當簡老成重臣爲輔導以成其德選吏部侍郎有建議欲於河間長蘆置局造海船三百者卽上書中書省言其非便忤議者遷工部侍郎後分部彰德道過河間民遮擁拜謝曰微公言吾民其斃矣會除保定路達魯花赤保定歲輸糧數十萬石於新鄉苦弗便月魯不花請輸京倉以恤之俄除吏部尙書保定父老百數詣闕乞留監郡以撫吾民遂以尙書仍知郡事會賊北渡河日修城浚濠爲戰守具廷議發五省八衛兵出戍外鎮月魯不花疏請留其兵護本郡遂兼統黑軍數千人及團結西山十二寨民人軍勢大振賊再侵境皆敗去召還爲詳定使保定民不忍其去繪像祀之去保定一月而城陷朝廷以月魯不花素負民望令入城招諭之抵城賊閉

元史卷四十九 列傳

九

關不出改大都路達魯花赤轉吏部尙書會劇賊程思忠據水不堅壁不下詔月魯不花招撫之眾悉難其行月魯不花毅然竟入城諭賊賊皆感泣羅拜納降還遷翰林侍講學士拜江南行御史臺中丞乃由海道趨紹興既而除浙西廉訪使會張士誠據浙西僭王號度弗可與竝處令具舟載妻子而匿身木櫃中蔽以藁秸脫走至慶元士誠部下覺之遣百騎追至曹娥江不及而反俄改山南道廉訪使浮海北而往道阻還抵鐵山遇倭賊船甚眾乃挾同舟人力戰拒之倭賊給言投降弗納於是賊卽登舟攫月魯不花令拜伏月魯不花罵曰吾朝廷重臣寧拜賊耶麾家奴擲海刺殺首賊遂與次子樞密院判官老安姪百家奴皆死之同舟死者八十餘人事聞贈遼陽行省平章政

事諡忠肅

自列傳

達識舊連帖字九成康里托托子也幼與其兄塔識俱入國學爲諸生讀經史悉能通大義初以世胄補官至正九年遷湖廣平章沅靖柳桂等路獠獠竊發達識請置三分省一治靜江一治沅靖一治柳桂以左右丞參政分兵鎮其地已而諸獠獠悉降召還復爲大司農十一年台州方國珍起海上奉詔與浙東宣慰使泰不華同往招諭之屢遷江浙行省左丞相許便宜行事時江淮盜勢日盛南三道梗達識獨治方面而任用非人通賄鬻爵謗議紛然所部郡縣往往淪陷十六年正月張士誠陷平江七月逼杭州達識棄城走富陽萬戶普賢奴力拒之而苗軍帥楊完者時駐嘉興亦引兵至擊走士誠初達識引完者爲江浙

元史卷四十九 列傳

十

右丞而苗軍素無紀律所過抄掠蕩然淫虐無人理喜則人怒則獸無論貴家命婦室女必圍宅勒污信宿始得縱還否則指以通賊縱兵屠害民間謠曰死不怨秦州張生不謝寶慶楊而達識方倚完者軍爲重莫敢禁遏故其軍日肆明年士誠寇嘉興屢爲完者所敗士誠乃遣蠻子海身以書詐降而書詞多不遜完者欲納之達識不可完者固勸乃許之士誠始要王爵不許又請爵爲三公達識遂承制授士誠太尉其弟士德士信及其黨皆授官有差於是朝廷以招安張士誠爲達識功詔加太尉時徽州建德皆已陷完者屢出師不利士誠素欲圖完者而完者時又強娶平章慶童女且縱兵淫掠達識久厭苦之乃陰與士誠合謀令以兵除之揚言使士誠出兵復建德完者營於

杭州不為備遂被圍苗軍潰完者盡殺所有婦女數十人而後死士誠兵遂據杭州達識徒存虛名而已俄而士誠令其部屬自頌功德必欲求王爵達識不得已以聞於朝再三不報士誠遂自立為吳王徙達識至嘉興逼取其符印峻垣錮門守之又使人至紹興從御史大夫普化帖木爾索行臺印普化封印置庫中曰我頭可斷印不可與又迫之登舟曰身可死義不可辱也從容沐浴更衣與妻子訣賦詩二章仰藥死臨死擲杯地上曰我死矣逆賊當踵我亡也後數日達識聞之歎曰大夫且死吾不死何為遂進藥酒飲之而卒士誠乃使載其柩及妻孥北返於京師普化字遷善蒼魯乃蠻氏行臺御史大夫帖木哥子也論者以為其死視達識為差勝云

元史卷四十九

列傳

三

忠義四

元末死明兵者八傳

普顏不花字希古蒙古氏倜儻有大志至正五年由國子生登右榜進士第一人授翰林修撰十一年遷江西行省左右司郎中斬黃賊徐壽輝來寇普顏不花戰守功為多語在道童傳十六年轉山東行中書參政十八年詔與治書侍御史李國鳳同經略江南至建寧江西陳友諒遣鄧克明來寇而平章政事阿魯溫沙等皆夜遁國鳳時分鎮延平城陷遁去普顏不花命築各門甕城前後拒戰六十四日既而大敗賊眾明年召還授山東宣慰使再轉知樞密院事平章山東行省守禦益都明兵壓境將眾捍城力戰城陷而平章保保出降普顏不花還拜母趨官舍坐堂上主將素聞其賢召之再三不往既而面縛之普顏不花

不屈死先是其妻阿魯真瑟呼家人告以殉死而二弟婦已各抱幼子及婢妾溺舍南井死井填咽不可容遂抱子投舍北井其女及妾女孫女皆隨溺焉是時有申榮者平章山東行省守東昌見列郡皆降告其父曰人生世間不能全忠孝者兒也父曰何為榮曰城中兵少不敵戰則萬人之命由兒而廢但有一死報國耳遂自經

福壽唐兀人幼俊茂知讀書尤善應對既長入備宿衛屢遷同知樞密院事至正十一年潁州賊起時車駕在上都朝廷皆欲驛奏待命福壽謂侯得請還則事必無及決議調兵五百遣衛官哈刺章忻都怯來討之而後以聞明年改耶可札魯忽赤未幾出為淮南行省平章是時濠泗俱已陷師久無功福壽至議築石頭斷江面守禦有方眾恃

元史卷四十九

列傳

三

以固十五年遷江南行臺御史大夫先是集慶嘗有警阿魯輝以湖廣平章將軍來援事平其軍鎮揚州苗軍無紀律日事殺虜俄并殺阿魯輝以叛高郵廬和等州相繼淪陷集慶勢日孤且倉庫無積蓄人心日震恐福壽乃使民兵自守勸餉激士明兵圍集慶福壽盡閉諸門獨開東門數出戰勢不能支城遂破福壽獨據胡牀坐鳳凰臺下指麾左右或勸之去叱曰吾為國家重臣與城存亡去將安往遂魯花赤達尼達思見其獨坐亦從雷弗去俄而亂兵四集皆死之又同時死者有治書侍御史賀方字伯京晉寧人以文學名事聞贈福壽江浙行省左丞相衛國公諡忠肅

自列傳移入

閔本字宗先河內人刻志於學早歲得推擇為禮部令史

御史大夫不花辟為掾平反冤獄甚有聲拜監察御史五轉為吏部尚書移刑戶二部皆以能見稱授集賢侍講學士明兵薄京師本乃朝服與妻程氏北向再拜大書於屋壁曰元中奉大夫集賢侍講學士閔本死此遂各縊焉二女亦自縊其旁有拜住者康里人也字聞善以材累官至太子司經明兵至謂家人曰吾始祖海藍伯封河東公與太祖同事王罕太祖取王罕收諸部落吾祖引數十騎馳西北方太祖使人追問之曰昔者與皇帝同事王罕王罕今已滅欲為之報仇則帝乃天命欲改事帝則吾心有所不忍故避之於遠地以沒吾生耳吾祖生沙漠其言尚如此今吾生長中原讀書國學而不知大義乎遂赴井死家人瘞之舍東悉焚書籍為殉云

元史卷四十九 列傳

三

趙弘毅字仁卿真定晉州人少好學家貧無書僂於巨室晝則為役夜則借書讀之嘗受經於臨川吳澄始辟翰林書寫再轉為國史院編修官調大樂署令明兵入京城弘毅與妻解氏皆自縊其子恭中書管句與妻子訣曰今乘輿北奔吾父母已死尚何敢愛死乎或止之曰我曹官卑何自苦若此恭叱曰忠義人各盡豈問職之崇卑乎遂公服北向再拜就縊死恭女官奴年十七亦自經以殉

朴賽因不花字德中肅良合台人有膂力善騎射累官至嶺北行省右丞平章政事會皇太子撫軍冀寧承制拜中書平章政事明兵逼京師詔守順承門所領僅數百羸卒歎息謂左右曰國事至此吾但知與此門同存亡也城陷被執不屈死之是時有張庸者字存中溫州人性豪爽精

太乙數會世亂以策干經略使李國鳳承制授庸福建員外郎治兵杉關頃之計事赴京師因進太乙數圖順帝喜之擢祕書少監皇太子立大撫軍院命庸團結房山除刑部尚書仍領團結會諸寨既降庸守駱駝谷遣從事段頑求援於擴廓不報庸獨堅守拒戰眾將潰庸無去志已而寨民李世傑執庸出降與頑同被害

丁好禮字敬可真定蠡州人精律算初試吏於戶部辟中書掾屢遷京畿漕運使建議置司於通州講究漕運利敝著為成法人皆便之除戶部尚書時國家多故財用空乏好禮能撙節浮費以給國用至正二十年拜中書參政時京師大饑天壽節廟堂欲用故事大饗會好禮言今民父子有相食者君臣當修省以弭大患議會宜改常度不聽

元史卷四十九 列傳

五

遂乞致仕家居擴廓從皇太子還京輸山東粟以遺朝貴餽好禮麥百石不受二十七年復起為中書平章政事尋以議論不合謝政去特封趙國公明兵入京城大帥召之不肯行昇至齊化門抗辭不屈而死年七十五是日中書參政郭庸亦昇至齊化門眾叱之拜亦不屈死庸字允中蒙古氏由國學生釋褐出身屢遷為陝西行臺監察御史與同列劾知樞密院事耶先帖木爾喪師左遷中興總管府判官其後耶先以罪黜召拜監察御史累轉參政中書其節義與好禮並稱云

柏帖穆爾字君壽蒙古人家世履歷無攷居官所至著廉能至正中累遷福建行省左右司郎中二十七年明騎兵出杉關取邵武以舟師由海道趨閩奄至城下柏帖穆爾

知城不可守引妻妾坐樓上慷慨謂曰丈夫死國婦人死夫義也今城且陷吾必死於是若等能吾從乎皆泣曰有死而已無他志也縊而死者六人有十歲女度其不能自死則給之曰汝稽顙拜佛庶保我無恙也甫拜即挈米囊歷之死乳媪抱其幼子旁立以泣柏帖穆爾熟視歎曰父死國母死夫妾與女從父者也皆當死汝三歲兒於義何所從乎為宗祀計可也乃命媪抱匿旁近民舍而斂金珠昇之曰即有緩急可以此贖兒命有頃兵入城即舉鎧自然四圍窗火大發遂焚死

迭里彌實字子初回回人性剛介事母至孝年四十猶不仕或問之曰吾不忍舍吾母以去也以宿衛年勞授行宣政院崇教三遷為漳州路達魯花赤居三年民甚安之時

元史卷四十九 列傳

姜

陳有定據全閩八郡之政皆用其私人以總制之朝廷命官不得有所與明兵既取福州興化泉州皆納款亡何吏走白招諭使者至請出城返之迭里彌實從容語之曰爾第往吾行出矣乃詣廳事具公服北面再拜畢引斧斫其印文又大書手版曰大元臣子即入位端坐拔所佩刀刺喉中以死既死猶手執刀按膝坐儼然如生郡民相聚哭庭中斂其尸葬東門外時又有獲獨步丁者回回人前進士累官僉廣東廉訪司事有呂復者為江西行省左右司都事皆閑居寓福州以行省命攝長樂縣尹福州既下獲獨步丁曰吾兄弟三人皆忝進士受國恩四十年今雖無官守然大節所在其可辱乎以石自繫其腰投井死復亦曰吾世食君祿今雖攝官若不以死報國則無以見先人

於地下引繩自經死獲獨步丁之兄曰穆魯丁者官建康日海魯丁者官信州先後皆死國難云

忠義五 元末死河南遼陽山東閩粵者八傳

張桓字彥威真定藁城人父木知汝寧府因家焉桓以國子生釋褐歷遷陝西行臺監察御史以言事不合去未幾汝寧盜劉福通兵起桓避之確山賊久知桓名襲獲之羅拜請為帥弗聽囚六日擁至渠魁前桓直趨據榻坐與之抗論逆順賊徒摔桓起跪桓仰天大呼嗚叱且屢唾賊面賊猶不忍殺謂桓曰汝但一揖亦恕汝死桓瞋目曰吾恨不斬汝首反為汝折腰邪賊知終不可屈遂刺之年四十八賊後語人曰張御史真鐵漢害之可惜事聞贈禮部尚書諡忠潔

元史卷四十九 列傳

姜

郭嘉字元禮濮陽人祖昂父惠俱以戰功顯嘉登泰定三年進士第屢遷監察御史會朝廷以海寇起欲於浙東溫台慶元等路立水軍萬戶鎮之令嘉乘驛至慶元與江浙行省會議可否嘉至首詢父老知其弗便請罷之會方擇守令綏靖遼東乃授嘉廣寧路總管兼諸奧魯勸農防禦屬盜起軍旅數興供餉無虛日民苦和糴轉輸而吏胥得因時為奸嘉設法計其戶口第其甲乙民甚便之有詔團結義兵嘉招集民數千教以坐作進退千百夫各統以長號令齊一賞罰明信故富強為東方諸郡取十八年劉福通賊黨關先生等由大同陷上都嘉率義兵出禦既而遼陽陷嘉將眾巡邏去城十五里遇青號隊五百餘人紿言官軍嘉疑其詐俄果脫青衣變紅嘉分兵兩隊夾攻之生

禽賊數百死者無算然賊勢日熾孤城無援乃集同官議
攻守計竭家所有衣服財物犒士頃之賊至圍城互數十
里有大呼降者嘉挽弓射殺之賊稍引退嘉遂開西門逐
之賊大至力戰死事聞贈太原郡公諡忠烈

周喜同河西人初爲後宮衛士眾稱其才選充承徽寺經
歷再調南陽縣達魯花赤居二歲妖賊起陷鄧州人情洶
洶俄而賊鋒抵南陽南陽無城無兵賊入之若虛邑喜同
以計獲數賊詰之云賊將大至悉斬之以安眾心晝夜督
丁壯巡邏守備時大司農錢木爾以兵駐諸葛庵爲賊襲
死賊遂乘銳取南陽喜同守西門望見賊勢盛即與家人
訣已而城中皆哭喜同策厲義兵連日再戰殺賊數百賊
知無援攻益急城遂陷喜同突圍賊橫刺其馬馬蹶喜同

元史卷四十九 列傳

毛

鞭馬躍而起手斬刺馬者俄爲他賊追及身被數創遂見
執爲所殺妻邢氏聞喜同戰死帥家僮數人出走遇賊奪
賊刀斫之且罵且前亦見殺一家死者二十餘人贈南陽
路判官時襄陽錄事司達魯花赤塔不台字彥暉者元統
元年進士魏王軍汝毫塔不台來供餉魏王嗜酒輕戰備
一夕賊劫王王臥不能起爲所執塔不台馳騎奪王亦爲
賊所得比明見賊酋王拜乞活塔不台以足蹴王曰猶欲
生乎賊復屈其拜塔不台拒而詬之且與縛者角遂支解
死

王英字邦傑益都人性剛果有膂力善騎射襲父職爲莒
州翼千戶父子皆善用雙刀人號之曰刀王至元二十九
年江西行樞密院命討南雄賊元貞元年從左丞董士選

討太山賊二年討永新安福二州賊皆平之延祐二年寧
都賊起行省命英率各萬戶軍討之屢戰皆勝行省平章
李世安遣英返江浙平章張閻所領軍於閩境至上虎嶂
遇賊三千餘人盡殲之至治元年以大臣薦授忠武校尉
益都淄萊萬戶府副千戶天祿元年授宣武將軍至順二
年行省命英招捕桂陽州賊張思進等二千人相率請降
元統元年授懷遠大將軍同知海北海南道宣慰使司事
後至元三年平萬安軍賊吳汝期等三千人未幾李志甫
起漳州劉虎仔起潮州詔江西行省右丞燕帖木爾討之
時英已致仕平章伯撒里謂僚佐曰是雖鼠竊狗盜非刀
王行不可乃使迎致之英曰國家有事吾雖老可坐視乎
據鞍橫槊精神飛動馳赴焉及賊平英功居多至正中毛

元史卷四十九 列傳

毛

貴陷益都英時年九十有六乃謂其子弘曰我世受國恩
今老矣縱不能事戎馬以報天子尚忍食異姓粟以求生
乎水漿不入口者數日遂卒毛貴聞之使具棺衾以葬將
斂舉其尸不動焚香祝曰公子弘請公歸葬先塋祝畢尸
遂起觀者莫不驚異山東宣慰使普顏不花及憲司請卹
典於朝有曰不食寇粟餓死芹泉有夷齊之風爲臣之清
者也芹泉谷名英所居也

自列傳移入

彭庭堅字允誠溫州瑞安人擢至正四年進士第授同知
沂州事毀牛皇神祠驅鄰郡上馬賊免民橫急征斂民甚
便之俄以平反獄囚忤上官意遂棄去十年詔選守令以
建寧路崇安縣尹起庭堅於家屬鉛山寇周良竊發犯閩
關庭堅禦之有法寇不入境十一年同知建寧路總管府

鄂江西寇熾庭堅率民兵克復建陽又進兵平浦城十二年攝僉都元帥府事與邵武路總管吳按攤不花夾攻邵武庭堅設雲梯火礮晝夜搏擊寇遁追斬渠凶邵武悉平總兵官江浙參政章嘉上功於朝升同知福建道宣慰使司副都元帥鎮邵武冬寇陷建寧十三年庭堅統兵次泰甯寇懼請降復建寧還師邵武十四年盜侵政和松溪江南行臺中丞吳鐸檄庭堅赴援時麾下萬戶岳煥素悍縱卒為暴庭堅繩以法煥懼使部卒乘不備詐為賊兵突入營眾潰庭堅獨留不去遂遇害年四十三故吏張椿儒士夏志行江晃奉柩還崇安民哀泣如喪父母立祠祭禱數降靈響旁邑立祠亦如之南行臺監察御史余觀行部巡察獲其賊斬之為上其事贈福建道宣慰使都元帥封忠

元史卷四十九 列傳

元

感侯

王伯顏字伯敬濱州霑化人至正九年知福寧州居三歲大著威惠遷福建鹽運副使將行會鄰境賊警州父老數百詣憲府乞留伯顏仍領州事從之乃與監州阿撒都刺令民丁分掘險要各自為守而自練壯士千五百人備戰賊柵楊梅嶺伯顏與子相馳破之是秋賊自邵武間道迫福寧賊帥王善擁眾萬餘直壓州西門眾寡不敵士卒奔潰伯顏惟率麾下百十人奮身射賊俄馬中流矢墜地遂見執善聞伯顏政聲欲使為州尹伯顏訶叱之左右搯以跪弗屈遂毆之伯顏嚙舌出血嘆善面罵曰反賊殺即殺何以毆為吾民天民也汝不可害大丞相親討叛逆百萬之師雷擊電掃汝輩小醜將無遺種顧敢爾耶賊亦執阿

撒都刺至善厲聲責其拒鬪噤不能對伯顏復唾善曰我與監州殺賊何言拒耶我死必為明神以滅汝言訖挺頭受刃頸斷不僵出血皆白死數日而色如生州人哭聲連巷子相亦被執賊欲官之相詈曰汝吾君父之仇義不戴天恨不寸斬汝賊復殺之相妻潘氏挈二女為賊所獲亦罵賊母子同死伯顏既死賊時睹其陳兵出入明年州有僧林德誠者起兵討賊乃望空拜禱曰王州尹宜率陰兵助我破賊時賊正祠神觀紅衣軍來以為偽帥康將軍亟往迎之無有也四面皆青衣官軍賊大駭敗走斬其酋江二蠻福寧遂平事聞贈濟南路總管上輕車都尉太原郡侯陳高狀其行見不繁舟漁集

劉濬字濟川其先興州人曾祖海金進士第一仕至河南

元史卷四十九 列傳

手

府尹死國難子孫遂家河南濬由廉訪司書吏調連江縣寧善鄉巡檢至正十三年江西賊帥王善寇閩官軍守羅源縣與連江接壤勢將迫濬妻真定史氏故相家女也有才識謂濬曰事急矣可聚兵以捍一方盡出篋中物募壯士百餘命仲子健將之浹旬至數萬賊尋破羅源分兩道攻福州濬拒之辰山三戰三捷俄聞福州陷眾多潰去濬獨帥健兵進遇賊於中麻突其陳斬前鋒五人賊兵大至鏖戰三時頃濬中箭墮馬健下馬掖之俱被獲濬忿戟手大罵賊縛之塔下先斫一指罵彌厲再斫一指亦如之指且盡斫兩腕次及兩足濬色不少變罵聲猶不絕遂割其喉舌而死健亦以死拒賊善義之舍健使斂濬屍瘞之健歸請兵於帥府以復父仇弗聽遂盡散家貲結死士百

人詐爲工商流勾入賊中夜半發火大謀賊驚擾自相屠戮健手刃其殺父者并會言及寇首陳伯祥來獻磔之事聞贈濬福建行省檢校官授建古田縣尹官爲濬立祠福州北門外

多里不花多舊字端甫蒙古人始爲宿衛官累歷顯要拜江西行省平章政事與平章阿爾渾沙等分道討陳友諒遂泛海南下趨廣東駐師揭陽降土寇金元祐招復循梅惠三州之寇承制官其酋長俾治賊以給兵食又別規粟四千石輸送京師自是英肇欽連諸郡皆附且治兵由梅嶺以圖江西而元祐有異志託以鎮服其土遮道固畱先是制書命劉巨海僉廣東元帥府事未發元祐竊取易其名私昇猛賊劉文遠誘與偕亂事覺文遠伏誅而元祐及

元史卷四十九 列傳

三

其弟元泰子榮竄匿不獲俄榮率外賊突入奪符信殺官吏多里不花與參政楊泰元等勒兵拒戰而賊來益眾多里不花中鎗創甚其子達蘭不花率麾下力抗死之多里不花被執擁至太平橋罵不絕口遂爲賊殺其妻卜顏氏妾高麗氏在側不去皆遇害其部將哈乞吳普顏阿刺不花台不花等俱戰死

忠義六元末死節士人并遺老共四傳

顏瑜字德潤兗州曲阜人克國復聖公五十七代孫也以行誼舉教諭至正十八年田豐起山東瑜攜家走郟城道遇賊脅瑜曰爾書生吾不爾殺可從我見主帥瑜罵曰爾賊何主帥邪賊怒欲殺瑜瑜無懼色復使之寫旗瑜大詬之賊以槍刺瑜至死罵不絕口妻子皆爲所害又有曹彥

可者亳州人會妖盜起里中多田野無賴子目不知書既破毫揭帛於竿皆羣趨彥可家劫之使寫旗迫以刀斧不願亦見害年七十矣有司具以事聞中書給貨以葬賜諡節愍

喬彝字仲常晉寧人少時高介有名至正十八年汝穎賊黨關先生等由絳州垣曲縣襲晉寧城陷城中死者十二三彝整衣冠聚家人坐井上令妻子婢輩循次投井中而已隨之彝既死賊首王士誠使人即其家邀致之至則已死矣賊平朝廷贈彝臨汾縣尹諡純潔有汾州張岳起晉寧王佐者皆士人也竝以不屈賊死又有建昌吳德新者工醫畱京師久之嘗往靈夏遇盜見執脅降不屈自投井中猶仰罵賊賊下射矢貫其頂罵益力賊怒以長槍刺之

元史卷四十九 列傳

三

然亦壯其志憐其死曰此真丈夫也以土埋井而去楊乘字文載濱州渤海人至正初爲介休縣尹民饑散爲盜乘立法招降之累官江浙行省左右司員外郎坐海寇掠漕糧舟免官寓居松江張士誠入平江其徒郭良弼董綬交推之士誠遣張經招乘乘曰良弼綬皆名臣今已失節願欲引我以濟其惡邪且讓經平日讀書云何經俛首不能對乘日與客痛飲竟日不言經急促其行乘整衣冠自經死年六十四

劉鶚字楚奇永豐人累官至翰林修撰少力於學愛孔子富貴如浮雲之語築浮雲書院以教鄉族子弟割田廩養吳澄重之爲序其詩皇慶壬子遊淮東董宣慰聞其賢薦於朝充揚州儒學錄泰定乙丑授汴省掌教齊安河南三

書院至正元年擢湖廣儒學提舉時學田若干畝為有力所據者三十年鶚首建言臺省盡復其田居未幾擢祕書監郎與虞集揭傒斯歐陽玄往還唱和其浮雲書院揭記之歐虞賦之十年擢翰林修撰十二年除江州路總管時紅巾賊起郡邑瓦解鶚勵精為恢復計兵威甚振寇莫敢犯十七年遷廣東廉訪副使十九年奉命鎮韶修城池繕甲兵二十年擢廣東閩帥其少子運亦以功特加廣東副元帥二十二年拜行省參政屢卻寇氛民恃為保障二十四年韶洞獠作亂鶚分兵討之疏請益師不報而贛寇數萬猝至父子親冒鋒鏑戰數月兵困城陷運先陳亡鶚被執幽於滸之慈雲寺終始罵賊不屈而死粵人為立憲節祠所著有惟實集若干卷史無傳此編劉鶚集者錄其事蹟

元史卷四十九 列傳 三

元史卷四十九終

元史卷五十

孝義 一事 續傳

蕭道壽京兆興平人家貧無資自給事母盡禮每旦夫婦親侍盥櫛日三飯必待母食然後退就食夕必待母寢然後寢出外必以告母乃敢出母性嚴急或怒欲罰之道壽自進杖伏地受杖起復再拜謝違教拱立左右俟色霽乃退母嘗有疾醫累歲不能療道壽割股肉進之而愈至元八年賜羊酒表其門

尹莘汴梁洧川人至治初遊學京師忽夢母疾心怪之馳歸母已亡居廬蔬食哀毀骨立每鷄鳴起手治祭饌詣墓所哭奠之風雪不廢父輔臣嘗病疫莘侍奉湯藥衣不解帶嘗其糞以驗差劇夜則禱天請代父死數日而愈又有

元史卷五十 列傳 一

高唐孫希賢母病痢希賢閱方書有曰血溫身熱者死血冷身涼者生希賢嘗之血溫乃號泣祈天求身代之母遂愈又高郵卜勝榮母痢不能藥日嘗痢以求愈兄疾禮北辰乞減己年延之並痊

劉通亳州譙縣人家貧力耕母卜氏好聲樂每眩技者以箏鼓至門必令娛侍或自歌舞以悅母心卜氏目失明通誓斷酒肉禱之三十年不懈卜氏年八十五忽復明又至大間鄱陽黃鑑皇慶間諸暨丁祥一皆親喪明以舌舐之復能視竝命喪表

張旺舅安豐霍丘人幼失父母陳氏居貧守志旺舅九歲賣錫以養及長母病數月無力延醫惟日夜痛哭禮天求代未幾遂愈量力不給竟不娶以終母年縣請旌於朝

葛守德字仲謙清苑人母病痿在牀數十年衣帶筋七必躬奉之不以屬諸人身處疏淡奉養極溫旨使母忘其貧燕南部使者欲薦名於朝守德不忍離其親解疾不起乃俾師鄉校後教授中山保定二郡軍載母以行徒步推挽一日醉歸母不悅輒戒不飲非尊者賜未嘗染唇母歿後其兄利分爨力諍不能得恣其所取不與校兄讎且老復迎以歸養死嫁其孤女至正之季盜起中原舉家避亂唐明府山采樵以食忽逢大風西南來若萬馬奔家人懼走逃匿既而兵至餘皆遇害守德家獨存人咸稱孝子至行可感鬼神宋濂序其事見文憲集

匡國政邳州人父才仕金為邳徐兵馬都巡使金亡帥所部歸元屢戰淮北破宋兵授沂邳東阿元帥王子宋兵大

元史卷五十一 列傳

二

入境戰不利死之妻高氏被斫不死氏年始三十五撫孤國政方六歲一日宋兵復暴至母子相失氏冒鋒鏑求於亂屍中得之卒幸全中統三年李璫叛國政母子為宋兵所俘居之淮安至元十三年宋亡率三百餘戶北歸屢遷睢州判官虞城縣尹所至以廉惠稱事母尤極孝母年五十疾甚刲股活之復疾復刲股後數載又疾又刲腦和藥以進疾竟愈母年八十九而終國政廬墓終喪有暨時至廬所若素餐者郡邑聞而異之曰父死忠母守貞子盡孝有一猶難矧兼之邪上其事表其里曰貞孝程文海碑其事

孝義二 萬里尋親七傳

高必達建昌人五歲時父明大好道忽棄家遠遊莫知所

適必達既長晝夜哀慕乃娶妻以養母而歷往四方求其父十餘年不得見心愈悲忽相傳黃州全真道院中有虛明子者學道三十年矣本姓高氏建昌人也匿姓名為道人云必達詢知為父即往拜之具言家世及己所生歲月太父母喪葬始未因哀號叩頭不已虛明猶瞑坐不顧久之斥曰我非汝父不去何為必達留侍左右不少懈辭氣哀惻可矜其徒謂虛明日師有子如此忍弗歸乎虛明不得已乃還家必達孝養篤至鄉里稱之

劉琦岳州臨湘人生二歲而母劉氏遭亂陷於兵琦獨事其父稍長思其母不置嘗歎曰人皆有母我獨無輒歔歔泣下及冠請於父往求其母徧歷河之南北淮之東西數歲不得後求得於池州之貴池迎以歸養其後十五年而

元史卷五十一 列傳

三

父歿又三年而母歿終喪猶蔬食有司上其事表其門曰孝義

曾德漁陽人宗聖公五十七代孫母早亡父仲祥遊襄陽樂其土俗繼娶左氏因家焉亂兵陷襄陽遂相失德徧往南土求之五年乃得繼母於廣海間奉迎以歸有司以聞詔旌復其家

羊仁廬州廬江人至元初阿朮兵南下仁家為所掠父被殺母及兄弟皆散去仁年七歲賣為人奴力作二十餘年其主憐之縱為良仁蹤迹得母於潁州兄於睢州弟於邯鄲皆為役尙無恙乃徧懇親故貸得鈔百錠歷詣諸家求贖之經營百計更六年大小二十餘口復聚居為良孝友甚篤鄉里美之大德十二年旌其家又有黃覺經建昌人

五歲因亂失母稍長誓天誦佛書願求母所在乃渡江涉淮行乞而往備歷艱險至汝州梁縣春店得其母以歸章卿孫蜀人本劉氏幼為章提刑養子與母富氏相失三十八年徧訪於江西諸郡迎歸養之俞全杭州人幼被掠賣為劉饒家奴後獲為良自汴歸杭尋其母及姊得之事母以孝聞李鵬飛池州人生母姚氏為嫡母不容改嫁為朱氏妻鵬飛幼不知也年十九思慕哀痛誓學醫以濟人願早見母行求三歲至蘄州羅田縣得焉時朱氏家方疫鵬飛起之遂迎還奉養久之復歸朱氏時渡江省親既卒歲時攜子孫往祭墓終其身並以有司請旌其閭

陳斗龍字南仲杭州昌化人父澤民以學行聞於時當事招致弗就築室百丈谿上講所學時宋亡郡縣內附賊起

元史卷五十一列傳

四

婺源澤民挈妻子廬深險處避亂一歲病卒斗龍居喪廬墓哀動行路有羣雁集其上飛鳴三日夜不去長娶妻有四子女得推擇為宗晦書院山長將之甌其婦翁告之曰汝非嫡出也若生母王氏產若未一歲遣歸錢塘聞其家在清湖中斗龍大驚且哭即日與婦訣具裝行曰此去若不見母者誓不歸初澤民以妻無子也買妾錢塘得王氏於清湖生斗龍未周晬妻妒王氏嫁之而自子其子故斗龍不知非嫡出至是赴清湖訪求母家及其故時比鄰經亂離無存者逢白髮媪揖而問焉告曰我知之我家與若母比屋兒時相嬉遊若母自昌化歸無幾時即言當往江東已而泣下我時不知其心何悲亦未問其何州也俄有兩夫舁若母竹轎西北去自是兩不相聞數十年斗龍謹

識之即入江東沿海濟江踰淮復還饒徽信廣德寧國往來數郡聞再過永豐禮賢鎮之逆旅逆旅人怪其來往頻數問焉告之故其人驚曰吾主人小婦王自言家清湖今老矣豈若母邪走施氏告良久出詢斗龍父時門巷兒名歲甫去老婦人哭出斗龍哭前拜母子未嘗相見而自知其為子為母也斗龍求於施氏遂奉母歸歸而徽盜作般掠昌化境上斗龍為廬百丈山身自負母婦擁後未至山廬路逢盜數百人斗龍置母夷處稽首曰壯士斗龍幼不知母去壯長聞母在江東行求母六年母歸未百十日即相遭於此斗龍若夫婦偕死母老誰為養者盜咨嗟釋去且約其徒勿更至此山驚母傷孝子心里中人家頗賴以免斗龍嘗蒔甘瓜圃中秋暮母病渴甚思食瓜而非瓜時

元史卷五十一列傳

五

斗龍視空蔓中芄芄然披之異根合莖並蒂兩實者二摘以奉啖即日渴已病平明年圃之天羅瓜如甘瓜者亦二斗龍作百丈谿書院祠三君子侑以澤民延師教里中子弟又以百丈源山地五百畝為義山鄉鄰饑歲刷葛蕨根續食死以葬焉建魯花赤阿思蘭以其行請於朝旌其家胡長孺為之傳

趙一德龍興新建人至元十二年元兵南伐被俘至燕為鄭畱守家奴歷事三年號忠幹至大元年一日拜請於其主歸省父母許之期一歲而返一德至家父兄已歿惟母在年八十餘一德卜地葬二柩畢欲少畱事母懼得罪如期還燕其主歎曰彼賤隸乃如是吾可不成其孝乎既裂券縱為良一德將辭歸會其主阿思蘭以冤被誅詔籍其

家羣奴各亡去一德獨奮曰主家有禍吾忍同路人邪即詣中書訴枉狀得昭雪還其所籍太夫人勞之日當吏籍吾家時親戚不相顧汝獨冒險以白吾枉疾風勁草於汝見之令吾家業既喪而復存者皆汝力也因分美田廬遺之一德謝不受遂歸養其母以終皇慶元年旌其門

陳韶孫廣州番禺人父瀏以罪流肇州韶孫年十歲不忍父遠謫朝夕號泣願從父不能奪遂與俱往跋涉萬里過遼陽平章塔出憫之曰朝廷寬仁罰不及嗣邊地苦寒非汝所堪吾返汝故鄉願之乎韶孫曰既不能以身代父當死生以之歸非所願塔出驚異賞以錢大德六年瀏死韶孫哀慟見者泣下肇州萬戶府以聞命遣還鄉里仍旌異之

元史卷五十 列傳

六

孝義三 救親代死

郭苟原作郭狗平陽翼城人父寧爲欽察先鋒使首領官成大良平宋將史太尉來攻夜陷大良平寧全家被俘史將殺寧苟年五歲告史曰勿殺我父請殺我史驚問曰是兒幾歲邪寧曰五歲史曰五歲兒能爲是言吾當全汝家即以騎送寧等往合州道遇元兵騎驚散寧家俱得還御史以事聞命旌之

樊淵建康句容人幼失父事母篤孝至元十二年奉母避兵茅山兵至淵抱母號哭以身代死兵兩釋之三十年江東廉訪使者辟爲吏母亡奔喪哀感行路服闋奉神主事之起居飲食十年如生平臺憲交薦淵不忍去墳墓終不起延祐間汀州寧化人賴祿孫母病值蔡五九作亂負母

從邑人避南山盜至眾散走祿孫守母不去以身翼蔽請代母渴不得水祿孫含唾煦之盜相顧駭歎反取水與之有掠其妻去者眾責之曰奈何辱孝子婦使歸之事聞並賜褒表

王閏東平須城人父素饒買老罄其貲不能甘淡薄性復乖戾閏朝夕勤苦奉甘旨左右承順甚得歡心鄉里稱焉父嘗臥疾夜燃長明燈延燒室中閏聞聲驚走煙燄已蔽寢戶閏突入火中解衣蒙父抱而出肌體灼爛而父無少傷一女不能救遂焚死中統二年復其役

郭道卿興化莆田人四世祖義重至孝宋紹興間有詔旌之鄉里爲立孝子祠至元初閩盜起居人竄匿道卿與弟佐卿獨守孝子祠不忍去遂俱被執兄弟爭代死引頸請

元史卷五十 列傳

七

刃盜相顧曰孝門兄弟固不同於人也兩釋之道卿年八十子廷焯爲建寧路平準行用庫使辭歸侍養道卿嘗病疝危甚廷焯憂瘁扶護一夕髮盡白有司言狀旌之

田喜清苑人金貞祐元年元兵陷保州盡驅居民下令老者殺喜聞命欲代父死遂潛往伏其父於下以兩手據地俛而延頸以代之卒舉刃未暇省閱喜項腦中兩刀而死夜半復蘇後旬日令再下無老幼盡殺時喜創已愈以藝被選行次安肅聞其父死逃歸求父尸得之負以涉河水傷脛至血出發母冢下尸而塞之乃還眾不之覺元好問郝經皆爲詩文以美其孝劉因傳之見詳修文集

張紹祖字子讓潁州人讀書力學以孝行聞於朝特授河南路儒學教授至正十五年奉父避兵山中賊至執其父

將殺之紹祖泣曰吾父耆德善人不當害請殺我以代父死且若等非父母所生乎何忍害人父也賊怒以戈擊之戈應手挫鈍賊感而相謂曰此真孝子不可害乃釋之又

元史卷五十 列傳

八

之曰汝父被驅而東矣東軍得所掠民皆殺之汝慎無往就死也抑曰吾可畏死而棄其父乎遂往出入死地屢瀕危殆卒得其父以歸

劉思敬延安宜君人事繼母沙氏杜氏孝慕無異所生父年八十目喪明會亂兵剽掠其鄉思敬負父避巖穴中有兵至欲殺思敬思敬泣言曰我父老矣又目盲我死不足惜我父何依乎兵感其誠不忍殺父子皆免於難又有晉安呂祐字伯通至正二十六年郡城破有卒入其室拔白刃脅其母林氏索財寶不得揮刃斫之祐急以身蔽母而奪其刃手指盡裂被傷仆地良久而甦開目視母曰母幸無恙我死無憾矣遂瞑目死又有溫州瑞安周樂者宋狀元坦之後也父曰成通經能文海賊竊據溫州拘日成海

舟上樂隨往侍其父不離左右一日賊酋遣人沈日成於水樂泣請曰我有祖母幸留父侍養請以己代父死不聽樂抱父不舍遂同死焉

王初應漳州長泰人至大四年二月從父樵劉嶺山有虎出叢棘中搏其父傷右肩初應赴救抽鎌刀刺虎鼻殺之

元史卷五十 列傳

九

徐鉦鎮江人侍父將之婺源過丹陽小谿父墮橋下同行者不能救鉦投谿擁父出鉦力憊且水勢湍急遂溺死屍流四十五里得於灘頭江浙行省以狀請表

孝義四 友睦 八傳

長壽父帖住官平章政事生五子長山壽早世次即長壽次永壽福壽芒古海身元統間帖住歿長壽哀毀盡禮服闋當蔭敘與弟羅拜母前曰吾父廉貧諸弟未有所立願以職讓永壽永壽讓福壽福壽曰二兄能讓福壽獨不能邪以讓季弟芒古海身母從之芒古遂告蔭為太禧宗禋院神御殿侍禮佐郎兄弟奉母尤篤邦閭美之至大間河中梁外僧親喪廬墓兄那海為奧魯官自以嘗遠仕不得養其親即棄職舉外僧代之人稱外僧能孝那海能義又

有畏吾秋舊作畏吾兒氏秋秋及濠州高中嘉定武進皆以侍親不

願仕以祖父蔭讓叔父昆弟云

楊一懷孟人至元閒憐其叔貧遂焚分契同居三十年無閒言張本東昌桂平人篤孝事伯叔皆甚謹伯父嘗病本晝夜不去側復載以巾車步挽詣岱嶽禱之張慶真定人善事繼母伯父秦貧居河南迎歸養之過於所生元善大名父有昆弟五流散江淮久之遂客死至大四年善往尋其骸骨并迎弟姪等十五喪而歸改葬祖父母以諸喪序列耐於瑩次州縣以聞竝旌其家

郭全遼陽人幼喪母哀戚如成人及壯父庭玉又卒居廬三載啜粥面墨繼母生四子皆幼全躬耕以養既長娶婦各求分財異居全不能止凡田廬器物悉自取朽敝者奉

元史卷五十 列傳 十

繼母以居甘旨無乏繼母卒全年六十餘哀痛毀瘠廬墓終喪又有劉德奉元人父娶後妻德事之如所生家貧傭工取直寸錢尺帛皆上之年五十未娶稱貸得錢先爲異母弟求婦諸弟亦化其德一門藹然鄉里稱爲劉佛子其事繼母以孝聞者復有馬押忽及大都人劉居敬竝蒙褒美

吳好直華州蒲城人父歿事繼母孝兄弟嘗求分財好直勸諭不能止卽以己所當得悉推與之出從師學澹泊三十年無少悔又有甄城柴郁陳舜咨皆能孝友讓產兄弟蒙表

劉德泉汴梁杞縣人早喪母父榮再娶王氏生二子居敬居元而王氏病卒德泉撫幼弟甚至至元末歲饑父欲使

析居德泉泣止不能得乃各受其業以去久之父卒復同

爨至治三年真定朱顯自祖父時已分財至顯念姪幼無恃謂弟耀曰同氣可異處乎乃會拜祖墓下焚分券復同居延祐閒蔚州吳思達兄弟六人嘗以父命析居思達爲開平縣主簿父卒還家時兄弟多破產思達治葬畢會宗族泣告其母曰吾兄弟別處十餘年矣一母所生忍使苦樂不均邪卽以家財代償其逋更復其居母卒哀毀甚宅後柳連理人以爲友義所感又有朱汝諧者濮州人父子明嘗命與兄別產父卒兄產盡廢汝諧泣請其居仲父貧病迎至家奉湯藥甘旨甚謹後卒喪葬盡禮州縣各以名聞表其閭

元史卷五十 列傳 十一

劉廷讓大寧武平人至順初北方兵起民被殺掠廷讓挈家避山中有幼弟方乳母王氏置於懷兵急廷讓乃棄己子一手抱幼弟一手扶母疾行得免事聞旌之

扈鐸汴梁蘭陽人早孤育於伯父及壯事伯父如所生伯父老無子鐸爲買妾歲餘產一女其妾性頗不慧熟寐壓女死久之伯父卒鐸喪之甚哀遺腹生一男鐸懲前失告其母及妻妹護視之已復廬戶外中夜審察不敢安寢弟能食常自抱哺與同臥起十年不少怠弟有疾鐸夜稽顙星斗哀禱曰天不伐余家鐸父子閒可去一人勿喪吾弟使伯父無後也明旦弟愈母卒廬墓側不理家事宗族勸之歸鐸曰今歲凶多盜吾家雖貧安知墓中無可欲乎倘驚吾親之靈雖生何爲卒守廬不去

唐轅唐毅四明唐復禮二子也復禮以擅匿官榷事被陷

且執拘以歸於京轅詣吏代父北行不省乃叩頭流血繼之以死吏憫其情遂脫父桎而桎之行至越轂適回自杭遇諸道上即挽轅衣袂頓足哭曰兄為冢子宗嗣所託不可以徒死弟請代兄行轅不從轂給之曰兄訥於言說往對廷尉必不免弟有一策可生幸無苦竟奪其桎加己手吏亦憐而從之轂抵京繫獄者旬日近臣乃奏其非罪例免以歸得不死同時戴良為傳而論之謂可與國風衛宣二子爭烈云

孝義五 喪葬哀 慕七傳

徹徹担古思氏幼喪父事母篤孝稍壯母歿慟哭頓絕水漿不入口者三日既葬居喪有禮每節序祭祀哭泣常如祖括時年四十餘思慕猶如孩童每見人父母則嗚咽流涕人問其故曰人皆有父母我獨無是以泣耳至大三年

元史卷五十一 列傳 三

襄異 邵敬祖宛丘人父喪廬墓母繼歿河決不克葬殞於城西敬祖露宿依其側風雨不去友人哀之為縛草舍庇之前後居廬六年兩髀俱成溼疾至治三年旌其家其後又有永平李彥忠父喪廬墓八年不至家茶陵譚景星幼失父追念之廬墓十年亳州郭成年七十一母喪食粥廬墓一年朝夕哭臨人哀其老而能孝何從義延安洛川人祖良祖母李氏偕亡從義廬墓側旦夕哀慕不脫經帶不食菜果惟啖疏食而已事父母孝養尤至伯祖叔祖皆無子比其亡也從義咸為治葬築高墳祭奠以禮時人義之

孔全亳州鹿邑人父成疾刲股愈之後卒居喪盡哀廬墓左負土為墳日六十肩風雨有虧俟霽則補之三年起墳廣一畝高三丈餘張子夔安西人父喪每夜半以背負土肘膝行地匍匐至葬所篩細土為墳陳乞兒歸德夏邑人年九歲母喪哀毀親負土為墳高一丈廣十六步人憫其幼欲助之則泣拜而辭又有峨眉趙國安解州張琛南陽李廷瑞息州耶律伯顏南陽怯烈台皆居喪有至行廬墓次負土為墳竝以有司所請表異

黃贊字止敬臨江人父君道延祐開求官京師留贊江南時贊年幼及既長聞其父娶後妻居永平乃往省之則父歿已三年矣庶母聞贊來盡挾其貲去更嫁拒不見贊贊號哭語人曰吾思奉父柩歸窆而莫知其墓冀庶母示以葬所爾忍利遺財耶久之聞庶母居海濱亟裹糧往庶母復拒之三日不納庶母之弟憐之與偕至永平屬縣樂亭求父墓又弗得贊哭禱於神一夕夢老父以杖指葬處曰見片軀即可得明日就其地求之庶母之弟曰真是已斂時有某物可驗啟朽棺得父骨以歸

元史卷五十一 列傳 三

靳昺字克昌絳州曲沃人兄榮為奎章閣承制學士奉母王氏官於朝母歿昺與兄榮護喪還家至平定大雷雨流水驟至昺伏柩上榮呼之避水昺不忍舍去遂為水所漂沒後得王氏柩於三里外得昺尸於五里外詔賜孝子靳昺碑 王克己延安中部人父伯通歿克己負土築墳廬於墓側猶高縱兵暴掠縣民皆逃竄克己獨守墓不去家人呼之

避兵克己曰吾誓守墓三年以報吾親雖死不可棄也遂不去俄而兵至見其身衣衰經形容憔悴曰此孝子也遂不忍害竟終喪而歸

孝義六孝感二

丁越楓橋里人母雙目失明丁聞人言舜為瞽瞍目而致明因效之每朝盥漱訖即搗母之目積有年矣俄而母左目明未久右目復明憲司上其事於朝表其閭曰孝子之門至治聞事也孔齊至正直記

王思聰延安人素力田農隙則教諸生得束脩以養親母喪盡哀父繼娶楊氏事之如所生以家多幼稚侵父食別築室曰養老堂朝夕定省父嘗病劇思聰拜祈於天額膝皆成瘡得神泉飲之愈後復失明思聰搗之即能視縣上

元史卷五十列傳

古

狀命表異之

胡光遠太平人母喪廬墓一夕夢母欲食魚晨起號天將求魚以祭忽見生魚五尾列墓前俱有齧痕鄰里驚異方共聚觀有懶出草中浮水去眾知是懶所獻以狀聞於官表其閭至順開永平龐遵母病腫三年不能起忽思食魚遵求於市不得歸途歎恨忽有鯉躍入其舟作羹以獻母悅病瘥

王庸字伯常雄州歸信人事母李氏以孝聞母有疾庸夜禱北辰叩頭出血母病遂愈及母卒露處墓前旦夕悲號一夕雷雨暴至鄰人持寢席往欲蔽之見庸所坐臥地獨不濡溼咸歎異而去復有蜜蜂數十房來止其家歲得蜜蠟以供祭祀

丁文忠許州偃城人業鼓冶喪母廬墓側不與妻面者三年父貴又疾醫不能療文忠造車一輛兄弟共御之載父禱於嵩山五臺泰安河濱諸祠途遇異僧遺藥而愈延祐七年旌之

李忠晉寧人幼孤事母至孝大德七年地大震郇保山移行空中所過居民廬舍皆摧壓傾圮將近忠家分爲二行五十餘步復合忠家獨完又吳國寶雷州人性孝友父喪廬墓大德八年境內蝗害稼惟國寶田無損人皆以爲孝感所致云

元史卷五十列傳

五

燒千餘家火及茂廬皆風返而滅事聞旌之

王薦福寧人性孝而好義父嘗疾甚篤夜禱於天願減己年益父壽父絕而復甦告其友曰適有神人黃衣紅帕首恍惚語我曰汝子孝上帝命錫汝十二齡疾遂愈後果十二年而卒母沈氏病渴語薦曰得瓜以啖我渴可止時冬月求於鄉不得行至深奧嶺值大雪薦避雪樹下思母病仰天而哭忽見巖石開青蔓離披有二瓜焉因摘歸奉母母食之渴頓止兄孟齡早世嫂林氏更適劉仲山仲山嘗以田鬻於薦及死不能葬且無子族以其貧莫肯爲之後薦卽以田還之使置後且治葬焉州禁民死不葬者時貧民畏令悉焚柩棄骨野中薦哀之以地爲義阡收瘞之有死不能斂者復買棺以贈至大四年其鄉大旱薦盡出粟

振之有施福等十一家飢欲死薦聞惻然家粟已竭即以
己田易穀百石分給福等德其活已每月朔會佛祠為祈
福福建宣慰司上狀旌之

梅應發居吳郡閭門市中不由學問天性純篤母嘗疾醫
不能療則剔股肉食之疾良已他日母又有疾危甚更求
良醫投以藥皆弗效莫知所為乃露立北面稽首以名香
燃頂灼臂叩天乞減己年以益母壽是夕天將雨陰雲四
合俄割焉而開若啟半扉盡見北斗之六星惟一星及輔
星不見頃之雲復合而天深黑及還至母所則母已擁衾
坐牀上言有衣白衣者六人以水來灌灑遂霍然而蘇不
覺疾之去體也詰旦母平復如故年八十餘身愈康強四
方大夫多為詩美其事虞集序之黃潛為之傳見黃文獻集

元史卷五十一列傳

夫

陸思孝紹興山陰樵者性至孝母老病痢醫禱久不效欲
刲股為糜以進忽夢寐間恍若有神授藥得而異之即以
奉母其疾遂愈

姜兼嚴州淳安人七歲而孤與二兄養母至孝母死既葬
獨居墓下朝夕哭奠寂焉荒山中躬自樵爨蔬食飲水一
衰麻寒暑不易同里陳氏戴氏子不能事其父母皆慙悔
迎養焉

湯霖字伯雨龍興新建人早喪父事母至孝母嘗病熱更
數醫弗能效母不肯飲藥曰惟得冰我疾乃可愈爾時天
氣甚燥霖求冰不得每日號哭忽聞池中戛戛有聲拭淚
視之乃斷斷也亟取奉母疾果愈

楊暉扶風人父清母牛氏牛氏嘗病劇暉叩天求代遂痊

如是者再母失明暉登太白山取神泉洗之復如故母歿
哀毀特甚葬之日大雨獨暉墓前後數里密雲蔽之雨不
沾土送者大悅葬畢令妻居家養父暉獨廬墓上負土為
墳蔬食水飲終其喪父卒亦如之

余丙建德遂安人幼喪母泣血成疾父亡不忍葬結廬古
山下殯其中日閉戶守視有牧童遺火延殯廬丙與子慈
亟撲不止欲投身火中與柩俱焚忽暴雨火滅

宗祀大都人年十九父卒擗踊號泣絕而復甦水漿不入
口者三日哀氣傷心遂成疾伏臥牀榻猶泣血不止既葬
疾轉甚杞有繼母無他兄弟度不能自起作遺書囑其妻
楊氏曰汝善守志以事吾母遂卒楊氏遺腹生一男人以
為孝感天不絕其嗣云泰定三年旌其門

元史卷五十一列傳

七

趙榮扶風人母強氏有疾榮割股肉者三復負母禱太白
山得聖水飲之乃痊後年七十五卒榮號痛不食三日方
飲水七日乃食粥葬之日白雲庇其墓前後十五里葬畢
而散榮負土成墳廬其側終喪

甯諸苟山丹州人母年七十餘患風疾藥餌不效諸苟割
股肉進遂愈歲餘復作不能行諸苟造板輿夫婦共舁母
行園田以娛之後卒居喪有禮鄉閭稱焉又潭州萬戶移
刺瓊子李家奴九歲母病醫言不可治割股肉煮糜以進
病乃瘳撫州路總管管如林渾州民朱天祥竝以母疾刲
股旌其家

畢耶速荅立彌里氏家秦州父喪廬墓次晝夜悲號有飛
鳥翔集墳土涌起又有尹夢龍中興人母喪負土為墳結

廬居其側手書孝經千餘卷散鄉人讀之有羣鳥集其家

樹
王士宏延安中部人父搏有疾士宏傾家貲求醫見醫即拜徧禱諸神叩額成瘡父歿廬墓三年足未嘗至家墓廬上有奇鵲來巢飛鳥翔集與士宏若相狎然終喪復建祠塋前朔望必往奠祭雖風雨不廢也有司上其事於朝旌之

黃道賢泉州人嫡母唐無子道賢在襁褓而生母蘇以疾去既長思念生母屢請於父得召之歸道賢竭力養二母得其歡心父病篤道賢晝夜奉湯藥莫效乃夜禱天願減己一紀以益父算遂愈至元統二年乃歿果符一紀之數道賢居喪負土築塋廬墓疏食終制至元二年旌曰孝子

元史卷五十一 列傳

丈

黃氏之門

史彥斌邳州人至正十四年河溢金鄉魚臺墳墓多壞彥斌母卒慮有後患乃為厚棺刻銘曰邳州沙河店史彥斌母柩仍以四鐵環釘其上然後葬明年墓乃為水所漂彥斌縛草為人至水中仰天號曰母棺被水不知其處願天矜憐假此芻靈指示母棺乃乘舟隨草人所之經十餘日行三百餘里草人指桑林視之母柩在焉載歸復葬杜佑邳州人河南行省署為三义水馬站提領父成病於家佑忽心驚舉體沾汗即棄職歸父病始二日遂禱神求代且嘗糞以驗疾差否父卒廬墓盡哀有馴兔之瑞孫瑾鎮江丹徒人父喪哀毀嚴冬跣足而步停柩四載衣不解帶常食粥誦佛經及葬載柩渡江湖波方涌俄順風

翼帆如履平地事繼母唐氏尤孝嘗患癰瑾親吮之又喪明瑾湯之復視如故卒卜日將葬時春苦雨瑾夜號天乞霽至旦雲日開朗甫掩壙陰氣復合雨注數日不止又有吳希曾睢寧人父卒葬之日大雨希曾跪柩前炷艾然腕火熾雨止既葬廬墓左竝旌其門

孝義七 義門義士

鄭文嗣婺州浦江人其家十世同居凡二百四十餘年一錢尺帛無敢私至大間表其門文嗣歿從弟大和繼主家事益嚴而有恩家庭中凜如公府子弟稍有過頰白者猶鞭之每遇歲時大和坐堂上羣從子皆盛衣冠雁行立左序下以次進拜跪奉觴上壽畢自右趨出足武相銜無敢參差者見者嗟慕謂有三代遺風狀聞復其家部使者余

元史卷五十一 列傳

九

闕為書東浙第一家以褒之皇太子在青坊聞其事歎曰此國家祥瑞復親書鳳麟二大字賜其家大和方正不奉浮屠老子教冠婚喪葬必稽朱熹家禮而行執親喪哀甚三年不御酒肉子孫從化皆孝謹雖嘗仕宦不敢一毫有違家法諸婦惟事女工不使預家政宗族里閭皆懷之以恩家蓄兩馬一出則一為之不食人以爲孝義所感有家範三卷傳於世元末明兵取婺州鄭氏全家避入諸暨山中李文忠統兵過其故宅歎曰義門也躬為局鑄而去事平遣帳前先鋒率民兵二千護其家歸浦江趙毓唐州人父福遷鄭之管城其先三世同爨毓官福州司獄滿歸以母老不復仕一日會諸弟泣申遺訓願世世無異處且祝天歃血以盟自是大小百口略無閒言同力

合作家道以般毓長兄瑞早世嫂劉氏守志毓率家人虔事之次兄選繼歿嫂王氏年少毓妹贅王佑亦少寡皆守節事姑人謂孝友節義萃毓一家元貞初旌之

張閏延安人隸軍籍八世不異爨家人百餘口無閒言日使諸女諸婦各聚一室為女紅工畢斂貯一庫室無私藏幼稚啼泣諸母見者即抱哺一婦歸寧畱其子眾婦共乳不問孰為己兒兒亦不知孰為己母也閏兄顯卒即以家事付姪聚聚辭曰叔父行也叔宜主之閏曰姪宗子也姪宜主之相讓既久卒以付聚聚紳之家自謂不如至元二十八年旌表其門又有蕪湖芮世通十世同居峽州向存義汴梁丁煦八世同居州縣請於朝竝加旌美魏敬益字士友雄州容城人性至孝居母喪哀毀骨立素

元史卷五十一列傳

手

好施與有男女失時者出貲財為之嫁娶歲凶老弱飢者為糜以食之敬益有田僅十六頃一日語其子曰自吾買四莊邨之田十頃環其邨之民皆不能自給吾深憫焉今將以田歸其人汝謹守餘田可無餒也乃呼四莊邨民諭之曰吾買若等業使若等貧不聊生有親無以養請以田歸若等眾聞皆愕眙不敢應強與之乃受而言諸有司有司以聞於中書丞相賀太平歎曰世乃有斯人哉

皆汝道德州齊河人居喪以孝聞母高氏治家嚴汝道承順甚恭母嘗寢疾晝夜不去側一日母屏人授以金珠若干曰汝素孝室無私蓄我一旦不諱此物非汝有矣可善藏之母令他兄弟知也汝道泣拜辭之母卒哀毀終喪不御酒肉二弟將析居悉以美田廬讓之二弟早世撫諸孤

如己子鄉人劉顯等貧無以為生汝道割己田各畀之使食其租終身里中嘗大疫有食瓜得汗而愈者汝道即多市瓜及攜米歷戶饋之或謂瘡氣能染人不聽益周行問所苦然卒無恙嘗出麥粟貸人至秋蝗食稼人無以償即焚其券縣令李讓請旌其家

孫秀實大寧人性剛毅喜周人急里人王仲和嘗託秀實貸富人鈔二千錠貧不能償棄其親逃去數年其親思之疾秀實日饋薪米存問終不樂秀實哀之悉為代償取券還其親復命奴控馬齎金訪仲和使歸父子歡聚聞者莫不歎美復有買進者大同人大德九年地震民居多傷且乏食進給酒藥炭米濟之每歲冬製木棉衣數百襲衣寒者買地為義阡使無墓者葬之又李子敬陝西三原人嫁

元史卷五十一列傳

手

不能嫁者五十餘人葬不能葬者五十餘喪焚通券四萬餘貫有司以名聞竝旌之

黃國華字叔文處州麗水人性方嚴好禮終日衣冠危坐而施舍無倦宗族賴焉歲歉必賤直糶粟以活民或大雪有不舉火者輒遺之里中爭者多從直其辭宋德祐間惡少年羣聚為盜包氏族取強號包家洞林某能搏虎號林大將劫掠旁郡吏莫能制惟憚叔文不犯境一日般性盟里橋圖為變叔文適過之眾驚散曰長者得無聞之乎叔文知之乃召與飲諭以禍福因出金帛於庭曰汝以貧為不義以此助汝眾慙弗敢取而去乃追與之元兵下處州諸為暴者率改行老於田里歲時相率詣門羅拜日向非長者吾屬且盡夷寧復有今日邪所居之地曰弱溪初大

家右族爭避患其中重貨山積及聞兵猝至委之而走居人欲乘時略所有叔文叱止之命左右收貯一室事定召其主悉歸無遺有何通判者其裝無算子孫至今猶德之數與人道其事後年八十六終明初國子助教貝瓊爲之傳見清江文集

瞿嗣興字華卿常熟人父達元初爲百夫長遷蘇州巡鹽大使兼管內六縣捕盜轉怯憐口提領母患癰潰當長夏穢不可近嗣興燂湯洗滌執扇驅蚊蚋靡晝夜至月餘乃休既而又罹逆氣疾衝擊下上百藥不治或授以割股可療法祝刀於天俟刀躍方可用嗣興頓顙流血刀弗動嗣興情迫強取刀割股肉作羹以進母不食已五日忽啖之氣銷如矢下一日母思芟時芟始華求諸市不獲解衣

元史卷五十一列傳

三

入水歷履其葉覓之雙脛皆赤腫俄得三芟於水中人以爲精誠所感居恆遇單窶者必量給而不使其知甌工王氏家無擔石儲且臥疾不能興鷄初鳴嗣興往其門以錢二十緡投窗隙而去民有告糴者鷄衣百結嗣興受其直五千復陽問曰吾性多忘若乃糴以十千邪遂加數與之負販夫或來賈遷嗣興一聽其言不與較家人怪之則曰彼竭汗血以逐什一之利寧能足吾欲乎歲大歉來相依者數十人嗣興擇旁近舍舍之會瘡氣作病者相枕藉每晨躬攜粥藥撫視卒賴以全有亡契及白金者密偵其人還之其人勢家奴因失主物畏懼幾欲死謝曰三尺微命孝子所賜也嗣興雖不讀書其篤行類鄒魯士州里翕然稱之宋濂爲之傳見宋文憲集

陳謙字子平平江人也性至孝自幼如成人善俟父母顏色問起居躬飲食寒煖之節及長讀書未嘗一日遠去親側嘗一應鄉貢既入院門卒有解儒士衣索挾書者遂趨出不復就試隱居教授資弟子束脩以養有甘旨必跪進勸加膳及父母卒居處葬祭悉遵禮制哀毀踰瘠猶疏食水飲以終其喪初父病痒思鰕因市以進而父歿遂終身不忍食鰕兄訓字師敬嘗爲鹽運司吏以廉能稱及滿攷歸甚饗謙養之如嚴父未幾訓復宦遊於外而謙獨留常熟館范氏者十年始還吳城京口有士友孫子翼者家貧有女及笄不能嫁謙嘗許以貲助及聞子翼病篤瞿然曰吾與子翼約其可食言乎即持貲詣京口訪子翼爲畢嫁事謙於書無所不讀而尤邃於大玄皇極之學文章非古

元史卷五十一列傳

三

義不苟作其有所述必推於理渾渾不窮樂府歌詩尤爲虞集黃潛張翥所推重嘗欲論薦謙不屑也晚歲注意於易以爲四聖之經各有攸主而同於象於是分卦辭象象會粹諸傳以附其說題曰周易解詁別爲河圖說一卷占法一卷至正丙申訓爲江浙行中書省照磨謁告還吳適外兵薄城甚急俄聞城陷即呼其妻竝與謙訣曰吾雖位卑嘗爲王臣義不可去弟處土耳其宜走避兵入不屈遂刃其胸謙翼蔽之請以身代眾以謙儒冠掖之出門謙復入伏屍號慟因竝見害悉投於河惟一子十餘歲得脫明日事定其門弟子范文綱亟告於主帥求其屍得於篠橋下兄弟猶相倚立水中若抱持然官爲給粟助之斂葬求其所著書皆散失獨得周易解詁二卷古體詩二十四篇

顧德玉字潤之，樵人。自幼從靈國路儒學教授，愈觀光學，觀光無子，嘗語人曰：「吾昔寢疾於杭潤之，侍湯藥，情至切。若父子，醫為感動，弗忍受金。今我行且老，必託之以死。」既而訪醫，吳中病且革，趣舟歸。德玉進次尹山，卒。明日，乃至。樵李德玉奉其屍，斂於家，衰經就位。邦人士為德玉來弔者，德玉拜之。越明年葬於海鹽。近顧氏之先塋，歲時祭享，惟謹。或曰：斂於家，禮歟？曰：禮云：師哭，諸寢。又云：生於我乎？館死於我乎？殯非家斂焉，則將師尸委諸草莽，生服其訓，死而委諸草莽，有人心者，弗為也。曰：師無服而為衰經，固近於掠美者矣。曰：疑衰加麻而經帶禮也。故曰：二三子經而出，至葬除之心，喪戚容終三年。夫民生於三師，居其一，與父子何異？今吾則加一等以行之，蓋出於人心天理之本然。若之何其惑也！聞者歎服。

元史卷五十

列傳

一

秦君昭維揚人，少遊京師。友人鄧某載酒祖餞，已而昇一殊色小鬟至前，令拜秦。因指曰：「此吾為部主政某所買妾也。幸君便航，可以附達。秦弗敢諾。鄧作色曰：『縱君自得之，亦不過二千五百緡。何峻拒為秦不得已，勉與偕載。至臨清，天漸暄，夜多蚊蚋，納之幃中，同寢處，直抵都下，置舍館。主婦所攜書往見主政，某某閱書畢，率爾問曰：『足下與家眷來邪？』曰：『無有。某意極不悅，隨以小車取歸。越三日，謁謝曰：『足下長者也。』昨已作簡，附便郵報謝。鄧公且使知足下果能不負鄧付託之意也。人以為其盛德難於柳下。」

皆見鄭元祐集

元史卷五十終

元史卷五十一

遺逸 有目無傳

列傳三十五

謝翱

鄭所南

趙若煥

趙子固

張旻

褚師秀

元史卷五十一

列傳

一

元史卷五十一終

列女一孝女孝婦

葛妙真宣城民家女九歲聞日者言母年五十當死妙真即悲憂祝天誓不嫁終身齋素以延母年母後年八十一卒又畏吾氏三女者家錢塘諸兄遠仕不歸母思之疾三女欲慰母意乃共斷髮誓天終身不嫁以養母同力護侍四十餘年母竟以壽終事上竝賜旌異

葛孝女者金溪人元末江南官吏有鑿山披河取金以充貢者不足則轉市他所必取盈而後已民多鬻產償官爲害無既孝女因有司強其父徵求銀治不忍其榜掠之苦遂投治中死刺史奏止其貢至今邑人賴而祠之危素蘇天爵皆題贊之以警獻利者見蘇天爵滋溪集今直省錢局所供鐘神祠皆重女髮醫

即此事也至邑人因此免刑則與魏紫同功宜其曹娥血食也

元史卷五十二 列傳

秦氏二女河南宜陽人逸其名父嘗有危疾醫云不可攻姊閉戶默禱鑿己腦和藥進飲遂愈父後復病欲絕妹封股肉置粥中父小啜即甦孫氏女河間人父病癩十年女禱於天求以身代且吮其膿血旬月而愈許氏女安豐人父疾割股啖之乃痊張氏女廬州人嫁爲高壘妻母病目喪明張氏歸省抱母泣以舌舐之母復能視州縣各以狀聞表之

聞氏紹興俞新之妻也大德四年新之歿聞氏年尙少斷髮自誓父不能強姑久病風且失明聞氏手滌廁諭不怠時漱口上堂錫其目目爲復明及姑卒與子親負土葬之朝夕悲號聞者慘惻鄉里嘉其孝爲之語曰欲學孝婦當

問俞母又有劉氏渤海李五妻也少寡父母使再醮不從舅患疽劉禱於天數日潰吮其血乃愈既而親挽小車載舅詣嶽祠以答神貺

馬英河內人父兄繼歿英獨事母甚謹又奉二寡嫂與居及喪母卜地葬諸喪親負土爲四墳手植松柏廬墓側終身趙氏女名玉兒冠州人嘗爲許氏婦未婚夫死遂誓不嫁以養父母父母歿負土爲墳鄉里稱孝焉

只魯花真蒙古氏年二十六夫忽都病卒誓不再醮孝養舅姑逾十五年舅姑歿塵衣垢面廬墓終身至元閒旌之其後又有翼城宋仲榮妻梁氏舅歿負土爲墳懷孟何氏大名趙氏竝以夫歿守志養舅姑以壽終親負土築其墳高三丈餘

元史卷五十二 列傳

王德政妻郭氏大名人少孤事母張氏孝謹以女儀聞於鄉及笄富貴家慕之爭求聘張氏不許時德政教授里中年四十餘貌甚古陋張氏以貧不能教二子欲納德政爲婿使教之宗族皆不然郭氏慨然順母志既婚與德政相敬如賓教二弟有成未幾德政卒郭氏年方二十餘勵節自守甚有貞名大德間表其家

朱淑信山陰人少寡誓不再嫁一女妙淨幼哭父目竝失明及長擇偶者不至家貧歲凶母子相依以苦節自勵士人王士貴重其孝乃求娶焉

趙孝婦德安應城人早寡事姑孝家貧備織於人得美食必持歸奉姑自啖麤糲不厭嘗念姑老一旦有不諱無由得棺乃以次子鬻富家得錢百緡買杉木治之棺成置於

家南鄰失火時南風烈甚火勢將及其門孝婦亟扶姑出避而棺重不可移乃撫膺大哭曰吾為姑賣兒得棺天獨不憫之乎言畢風轉而北孝婦家得不焚人以為孝感所致

白氏太原人夫慕釋氏遂棄家為僧白氏年二十留養姑不去服勤績紆以供日膳夫一日還迫使他適白斷髮誓不從夫不能奪乃去姑年九十卒竭力營葬畫姑像祀之終身

胡孝女秦者海鹽人匠氏女也母沈氏患手足攣積年不愈家人侍疾者咸厭倦秦旦夕侍奉盥櫛澣矢起臥必親抱扶之兄後娶妻嫂難於事姑乃謀析居而秦遂及其壻留母家以養母至順閒歲薦飢秦夜作傭織紆給食至剪

元史卷五十二 列傳

三

髮鬻之以贖不足秦傷母病無瘳時乃剔股餌母不效後又聞郡人戴某親有疾刀胸療得差一日俟家人出即引刃割胸取肉雜他肉以進因病創沈氏年且七十病如故秦侍疾三十餘年愈益加謹不衰初秦少時許字里人宋氏子疾弗良弗可託終身或謂秦宜及未婚別圖配偶無貽後悔秦不從卒嫁之事夫甚得婦道夫亦順而化其義

眠外姑如母陳高為之傳見不繫舟漁集任仲文妻林氏寧海人家甚貧年二十八而寡姑患風疾不良於行林氏旦暮扶持惟謹撫育三子皆有成年百又三歲卒

其父母為丈人媪而以女行女欣然從之過橋投水死有高氏婦者同郡人也攜其女從夫出避亂道旁空舍中脫金纏臂與女且語夫令疾行夫挈女稍遠乃解足紗自經賊至焚其舍夫抵儀真夜夢婦來告曰我已死彼舍矣其精爽如此

李景文妻徐氏名彩鸞字淑和浦城徐嗣源之女略通經史每誦文天祥六歌必為之感泣至正十五年青田賊寇浦城徐氏從嗣源逃旁近山谷賊至持刀欲害嗣源徐氏前曰此吾父也盍殺我賊舍父而止徐氏徐氏語父曰兒義不受辱今必死父可速去賊拘徐氏至桂林橋拾炭題詩壁閒有惟有桂林橋下水千年照見影形清之句乃厲聲罵賊投於水賊競出之既而乘閒復投水死

元史卷五十二 列傳

四

臺叔齡妻劉氏順寧人也粗知書克修婦道一日地震屋壞壓叔齡不能起家復失火叔齡母前救不得欲就焚叔齡望見呼曰吾已不可得出當亟救吾母劉謂夫妹曰汝救汝母汝兄必死吾不用復生矣即自投火中死火滅家人得二屍爐中猶手相握不開官嘉其烈上於朝命錄付史臣

李智貞建寧浦城人父子明無子智貞七歲能讀書九歲母病調護甚謹及卒哀慟欲絕不茹葷三年治女工供祭祀及奉父甘旨不乏鄉里稱為孝女父嘗許為鄭全妻未嫁從父客邵武邵武豪陳良悅其慧強納采求聘智貞斷髮拒之且數自求死良不能奪卒歸全事舅姑以孝稱泰定閒全病歿智貞悲泣不食數日而死

姚氏餘杭人居山谷閒夫出刈麥姚居家執爨母何氏往汲澗水久而不至俄聞覆水聲亟出視則虎銜其母以走姚倉卒往逐之即以手毆其脇鄰人競執器械以從虎乃置之而去姚負母以歸求藥療之奉養二十餘年而卒又方寧妻官勝娘者建寧人寧釋田勝娘餽之見一虎方攫其夫勝娘即棄籃奮挺連擊之虎舍去勝娘負夫至中途而死有司旌復其家又有建德王氏女者父出耘舍旁爲豹所噬曳之升山女識父呼聲驚趨救以鋤擊豹腦殺之乃得生至大閒事也又胡烈婦者渤海劉平妻至元七年平戍棗陽車載其家以行夜宿沙河旁有虎至銜平去胡覺起追及之持虎足顧呼車中七歲兒取刀刺虎洞其喉遂奪夫還至季陽僅三日死縣官言狀命復其家而旌

元史卷五十二 列傳 五

其門蘇天爵吳師道皆有詩文紀其事此一女三婦者以孝義生智勇彙而傳之以愧須眉

列女二 節烈二十三傳 賢母才女三傳

崔氏周朮忽妻也丁亥歲從朮忽官平陽金將來攻城克之下令官屬妻子敢匿者死時朮忽以使事在上黨崔氏急即抱幼子禎以詭計自言於將將信之使軍吏書其臂出之崔氏曰婦人臂使人執而書非禮也以金賂吏使書之紙吏曰吾知汝誠賢婦然令不敢違令崔自搥袖吏懸筆而書焉既出有言其詐者將怒命追之崔與禎伏土窖三日得免既與朮忽會未幾朮忽以病亡崔年二十九大慟柩前誓不更嫁斥去麗飾服早布敝衣放散婢僕躬自紡績悉以資產遺親舊有權貴使人諷求娶輒自爬毀其

面不欲生四十年未嘗妄言笑預吉會治家教子有法人比之古烈婦云

武用妻蘇氏眞定人徙家京師用疾蘇氏刲股爲粥以進疾即愈生子德政四歲而寡夫之兄利其資逼之嫁不聽未幾夫兄舉家死惟餘三弱孫蘇氏育之以至成立德政長事蘇氏至孝蘇氏死時天大旱德政方掘地求水以供葬事忽二蛇躍出因默禱焉二蛇一東一北隨其地掘之果得泉有司上其事旌復其家

元史卷五十二 列傳 六

江文鑄妻范氏名妙元奉化人年二十一歸於江及門未合卷夫忽以痢疾死范遂居江氏之家撫諸姪江森江道如己子卒年九十有五又柳氏者薊郡人爲戶部主事趙野妻未成婚而野卒柳哭之盡哀誓不再字寢疾不肯服藥曰我年二十而寡今已逾半百得死此幸矣遂卒

韓希孟宋太師丞相魏國公琦之七世女孫巴陵賈瓊妻也至元初元兵渡江爲軍帥所得義不辱赴江水既死人於衣帶中得其帛書有云借此清江水葬我全首領皇天如有知許我血面請願魂化精衛填海使成嶺其言感慨激切有烈丈夫之風郝經賦詩以道其事

譚節婦趙氏女吉安永新人嫁同里譚氏子年二十有七至元十三年丙子江南內附越一歲丁丑宋丞相文天祥志恢復有書約女弟之壻永新彭震龍起兵以是歲七月十九日兵內外合發而震龍先一月起與元軍合戰永新天祥兵不至遂敗岨元軍突入城城中大亂民咸負攜逃遁婦抱所孔子與舅姑倉卒走縣學禮殿元兵搜得欲犯

之不可且痛罵賊母子遂死於禮殿之南時有同逃者匿殿梁上視婦死事甚悉遂傳於世越百餘歲而婦與子血模糊影留殿階不滅磨鍛去復存其後永新知縣四明烏斯道建祠於泮宮西南碑記其事見春草集

王婦者夫家臨海人至元十三年冬元兵南至貞婦夫舅姑俱被執師中干夫將見婦色麗乃盡殺其舅姑與夫而欲私之王婦憤痛即自刃干夫奪挽不得殺責俘囚婦人雜守之婦欲死不得問自念當被污即伴曰若殺吾舅姑與夫而求妻妾我者欲我一心事若也吾舅姑與夫死而不為之哀是不天也不天焉用我為願請服期月苟不聽我我終死耳干夫許之然愈益置守明年師還挈行至嶧唻守者信之滋益懈過嶧縣青楓嶺上婦仰天竊歎曰

元史卷五十二 列傳 七

吾得死所矣乃齧拇指出血寫口占詩山石上已南向墜哭自投巖下而死或視血漬入石閒盡已化為石天且陰雨復見血墳起如始日後人建祠山上碑記其事見胡五峯集闕文興妻王氏建康人也文興從軍漳州為其萬戶府知事王氏與俱行至元十七年陳弔眼作亂攻漳州文興率兵與戰死之王氏被掠義不受辱乃給賊曰俟吾葬夫即汝從也賊許之遂脫得負屍還積薪焚之火既熾即自投火中死至順三年事聞贈文興英烈侯王氏貞烈夫人有司立廟祀之號雙節云

吳興千涇沈氏者同里邵某婦也邵為軍士所害沈氏有殊色虜置快船上游流迅急乘閒躍身投水中船去疾意其已沒不及顧適張掾舟過之見鬢髮如雲被水面視之

乃婦人衣漾水上不能下沈即引救之問知其姓與其里居易衣置後艦內使守視之其下喻之曰汝遇吾張君幸不死張掾今貴人汝能事之且得幸勿憂也沈氏聞其語度勢不可出視其旁有竹箸一束夜二鼓即以箸納口中面力觸舟箸入喉以死明日張為斂而焚之見稗史集傳

馮氏名淑安字靜君大名宦家女山陰縣尹山東李如忠繼室也如忠初娶蒙古氏生子任數歲而卒大德五年如忠歿兩月馮氏遺腹生一子名伏李氏及蒙古氏之族在北聞如忠歿於官家多遺財相率來山陰馮氏方病乘閒盡取其資及子任以去馮不與較一室蕭然惟餘二柩一嬰兒而已鬻衣權厝葢山下攜其子廬墓側時年始二十二羸形苦節為女師以自給父母來視之憐其孤苦欲使

元史卷五十二 列傳 八

更事人馮爪面流血不肯從居二十年始護喪歸葬汶上齊魯之人莫不歎息

段氏隆興霍榮妻也榮無子嘗乞人為養子榮卒段氏年二十六養舅姑以孝稱舅姑歿榮諸父仲汶貪其產謂段曰汝子假子也可令歸宗汝無子宜改適霍氏業汝無預焉段曰家資非所計但再醮非義尚容妾思之即退入寢室引鍼刺面墨漬之誓死不二大德二年府上狀中書給羊酒幣帛仍命旌門復役又有興和吳氏自刺其面成紀謝思明妻趙氏自髻其髮冀靈田濟川妻武氏溧水曹子英妻尤氏齧指滴血並誓不更嫁俱為有司所旌朱虎妻茅氏崇明人大德開虎官都水監坐罪籍其家吏錄送茅氏及二子赴京師大醫提點師甲乞歸家欲妻之

茅氏誓死不從母子三人以裾相結連晝夜倚抱號哭形貌銷毀師知不可奪釋之茅氏託居永明寺憂憤不食卒秦閨夫妻柴氏晉寧人閨夫前妻遺一子尚幼柴氏鞠如己出未幾柴氏有子閨夫病且死屬柴氏曰我病不復起家貧惟二幼子汝能撫其成立我死亦無憾矣閨夫死家事日微柴氏辛勤紡績遺二子就學至正十八年賊犯晉寧其長子爲賊驅迫在圍中既而得脫初在賊時有惡少與張福爲仇往滅其家及官軍至福訴其事連柴氏長子法當誅柴氏引次子詣官泣訴曰往從惡者吾次子非吾長子也次子曰我之罪可加於兄乎鞠之至死不易其言官反疑次子非柴氏所出訊之他囚始得其情官義柴氏之行爲之言曰婦執義不忘其夫之命子趨死而能成

元史卷五十二 列傳

九

母之志此天理人情之至也遂釋免其長子而次子亦得不死時人皆以爲難二十四年有司上其事旌其門而復其家

鄭琪妻羅氏名妙安信州弋陽人幼聰慧能暗誦列女傳年二十歸琪家世宦族同居百餘口羅氏執婦道無間言琪以軍功擢鉛山州判官羅氏封宜人至正二十年信州陷羅氏度弋陽去州不遠必不免於難輒取所佩刀淬礪令銛甚琪問何爲對曰時事如此萬一遇難爲自全計耳已而兵至羅氏自刎死時年二十九

陳淑眞富州陳璧之女璧故儒者避亂移家龍興淑眞七歲能誦詩鼓琴至正十八年陳友諒寇龍興淑眞見鄰媪倉皇來告乃取琴坐牖下彈之曲終泣然流涕曰吾絕絃

於斯乎父母怪問之淑眞曰城陷必遭辱不如早死明日賊至其居臨東湖遂投焉水淺不死賊抽矢脅之上岸淑眞不從賊射殺之衣帶有刺繡字詞曰海水羣飛士二其行湖水澹澹之子澄清視刃視飴見衣見情又濟南劉公翼妻蕭氏者有姿色頗通書史至正十八年聞毛貴兵將壓境豫與夫謀曰妾詩書家女誓以冰雪自將倘城陷被執悔將何追今以二子一女累君去作清白鬼於泉下耳夫曰事未至何急如此居亡何城陷蕭解縲自經死龍氏永新人左幼白之妻也幼白少負文名有志略試有司不利以父蔭爲江西廣濟庫使後至元丁丑卒於軍龍氏年二十九卽剪髮勺水不入口柩至迎於十里外徒跣號痛親挽舟以前哭奠五年不離几席嘗折海榴一枝插

元史卷五十二 列傳

十

瓶中供几上旬日視之根柢勃然家人移植於庭遂長茂鄰婦感慕皆效節不嫁翰林承旨歐陽玄爲書楮萱二字以表之子二人曰善曰詠皆力學以世其家茶陵李祜爲之傳見李祜雲陽集

張義婦濟南鄒平人年十八歸里人李伍伍與從子零成福寧未幾死成所張獨家居養舅姑甚至父母舅姑病凡四封股肉救不懈及死喪葬無遺禮既而歎曰妾夫死數千里外妾不能歸骨以葬者以舅姑父母在無所仰故也今不幸父母舅姑已死而夫骨終暴棄遠土使無妾卽已妾在敢愛死乎乃臥積冰上誓曰天若許妾取夫骨雖寒甚當得不死踰月竟不死鄉人異之乃相率贈錢大書其事於衣以行行四十日至福寧見零問夫葬地則榛莽四

塞不可識張哀慟欲絕夫忽降靈於童子言動無異生時告張死時事甚悲且指示骨所在處張如其言發得之持骨祝曰爾信妾未邪入口當如冰雪黏如膠已而果然官義之上於大府使零護喪還給錢以葬仍旌門復其役焦士廉妻王氏博興人養姑至孝至正十七年毛貴作亂官軍競出虜掠王氏被執給曰我家墓田有藏金可共取也信之隨王氏至墓所王氏哭曰此我死所非藏金所也乃與妾杜氏皆遇害

柯節婦陳氏者長樂石梁人至正二十一年海賊劫石梁其夫適在縣郭陳氏去避賊道與賊遇被執以行陳氏且行且罵賊亂捶之挾以登舟罵不已忽振厲自投江中其父方臥病見女至呼之不應駭曰吾豈夢邪既而有自賊

元史卷五十二 列傳

十一

中歸者言陳氏死狀乃知其鬼也明日屍逆流而上止石梁岸旁時盛暑屍已變其夫驗其背有黑子乃慟哭曰是吾妻也昇歸斂之

月娥丁氏西域人孝子丁鶴年之姊少聰慧靜幽諸伯氏皆明經工舉子業月娥隨而誦說通奧義及長歸葛通甫事上撫下懷如禮法冢婦盧見月娥德踰於己一日率諸婦諸女請曰願以諸婦諸女屬之姊幸蚤莫教詔之月娥奉命惟謹紉箴之隙必告以婦道及援引古烈女示以為則以是咸淑其化既而豫章上游寇羣起郡邑悚懼盧曰郡有城郭可恃且有兵守因使月娥挾諸婦諸女避諸郡城未幾寇果至城陷寇紀綱民事月娥歎曰吾生簪組世家其忍出大彘下邪遂抱所生女赴水死諸婦諸女咸驚

愕言曰姆之死必安於義吾可幸生乎哉亦相與死水中凡九人莫有後者時夏暑方熾尸七日不沈顏色如生郡人靡不駭異邑父老議曰十節同志死不可異壙乃於故居之南黃池里作巨穴同以葬焉題其石曰十節墓其弟鶴年相與樹碑墓下以昭節行月娥無子其夫子與冢婦盧皆死於寇鶴年通經史以篤孝聞幼時讀書皆月娥口授別見文苑傳見烏斯道文集

鍾節婦宜陽黃氏女年十六為鍾秉敬妻才美相匹情好甚摯秉敬父義昭雄勇當紅巾賊起父子咸挺奮敢於殄寇鄉民賴保完者數萬戶既而盜大至父子戰死居五六年有賈寇者聞鍾婦美將強室之以兵躡其里鍾婦隨里民匿石洞中曰汝等同禍以我故然義不可令鄉里同死

元史卷五十二 列傳

十二

吾當自為計遂出臨小石潭即自投潭中眾遽救幸不死乃誑白賈曰投潭中死矣賈大怒曰死以其首至眾懼無計或曰婢雪兒尤豔可令之代眾然之乃飾婢使出拜曰此鍾相公女也願獻之將軍賈喜以去號之曰娘子鍾婦得免辱然竟以悻疾卒石門梁寅為之傳見石集

劉冀之衡水曹泰才之妻也年十二通古文孝經見小學書固請讀之母不許一日聞諸兄誦內則至姆教婉婉聽從復請於母曰此亦女子事遂通內外篇及并適曹五月紅巾陷河朔曹故大家避兵縣西聊城郵賊掩至大掠見劉美輒驅去劉曰婦人從一而終二夫且不可況賊乎賊乃出金珠置前被以文綺劉手裂之賊擁上馬墜地者數四賊怒繩其項繫馬後曳之劉以爪據地頭觸石流血罵

賊死江西權衡吳興錢震王逢並贊述其事見王逢梧溪集

義烈女朵那者武林偉兀家女奴也年十九勤敏謹愿主

卒某郡官所女奉主婦日謹主婦亦委以腹心至正壬辰

七月十日寇陷杭劫官民府庫至偉兀家無所得乃反接

主婦柱下拔刀礪頸上諸侍婢皆散走女獨身覆主婦請

代死且謂賊曰汝利吾財豈利殺人哉凡家之貨寶皆我

所掌主母固弗知若免主母死我當悉與汝不吝寇允解

主婦縛女乃探金銀珠玉幣帛等散置堂上寇爭相攫取

已而又欲污之女持刀自刎曰我主二千石我誓不奴他

姓主況汝賊乎寇驚異舍而去女泣拜主婦曰棄主貨全

主命權也妾受命主鑰貨今失貨而全身非義也請從此

死遂自殺此女死於賊退主全之後誠愚忠傷勇然人莫

元史卷五十二 列傳 三

不難其義烈見鄭元祐僑吳集

李哥者霸州人生長伎家年十三母教之歌舞泣曰女率

有工繁我獨爲此乎母告以世業不可廢且家無以養乃

曰若此聽母母亦當從我好否則有死而已母陽許之由

是不粉澤不茹葷所歌多仙曲道情有召者必先詢主客

姓名然後往人亦預相戒無犯哥凝立筵前酒行歌闋目

不流盼與之酒弗飲州判官嘗忤之徑還誓不與見孟津

縣達魯花赤厚賂其母夜抵舍哥懷利刃閉臥內罵之曰

汝職在牧民而狗彘之不若可急去不且血污吾刃矣某

慚怒而回翼日州守聞之歎曰州有貞女而吾不知是一

失也吾次子明經舉秀才真若配以禮聘娶之未幾紅巾

賊入寇夫婦被執見哥妍麗將殺其夫哥前抱夫項大哭

曰吾斷不從賊求活賊並殺之論者謂哥生微賤其操行

有爲上大夫家所不可及者見鄭元祐僑吳集。以上節

故輕生殉夫者並守節者烈二十三傳刪去舊史中無

姑無他事述者二十餘傳

杭忽思妻者夫阿速國人降於太宗賜拔都號錫以金符

命領其土民尋以阿速軍千人扈駕親征既還國道遇敵

戰歿救其妻外麻思領兵代有其國外麻思躬擐甲胄平

叛亂後以次子按法普代之長子阿塔赤從憲宗征西川

戰於釣魚山中統二年扈駕親征阿里不哥又南征渡江

皆力戰有功至元十一年從下松江諸郡畱戍鎮巢縱兵

騷掠民不堪命宋降將洪福以計醉而殺之世祖憫其死

賜其家白金五百兩鈔三千五百貫并鎮巢降民千五百

三十九戶且命其子伯荅爾襲千戶佩金符二十二年征

元史卷五十二 列傳 四

別什巴里軍於亦里渾察罕之地復有功二十六年戰杭

海山敵勢甚盛大軍乏食其母輸已帑及畜牧等給軍食

世祖聞而嘉之賜予甚厚諸孫多貴顯舊史立杭忽思傳

拜降母徐氏北庭人拜降父忽都以武勇事世祖由宿衛

爲南宿州鎮將從南征身先士卒冒矢石身被數十創戰

功居多徙居大名路清豐縣卒封漁陽郡侯忽都卒時拜

降生甫數月徐氏鞠育教誨甚至每曰吾惟一子已童卯

矣不可使不知學願縣僻左無良師友遂遣從師大名城

中郡守每旦望入學見拜降容止講解大異羣兒甚愛獎

之比弱冠儀表甚偉兼善騎射以將家子隸丞相阿朮麾

下南征圍襄樊渡江皆有戰功遷慶元路治中大德元年

遷浙東廉訪副使所至令行禁止豪強懾伏同寅有貪穢者輒抗章劾免之屢遷工部尚書有能聲徐氏卒拜降奔喪於杭時酒禁方嚴帝特命以酒十甕官給傳至墓所以備奠禮初徐氏盛年守節教子甚嚴比拜降貴事上於朝特旌其門及老見拜降歷官有聲譽喜曰汝能如是吾死瞑目矣拜降居喪盡禮未及起復延祐二年卒於家贈江浙左丞諡貞惠舊史立拜降傳今以子附母入列女李金兒者濟南章丘人李素女也少慧敏日誦千言其父得張明遠醫卜之傳金兒盡受其術而更造玄妙言人禍福響應父自以為不及也元季旅寓盱眙張士誠兵陷泗州李一門被掠金兒年未及笄隸士誠母曹氏帳下為侍兒是冬元兵圍張士誠於高郵墮其外郭勢甚岌曹氏遣

元史卷五十二 列傳 五

人問卜於外金兒自言能之卦遇需之坎曰維需干泥其利用恆能堅忍則不敗時當冬夜忽聞殷雷發城中金兒夜起賀曰明日可出城戰矣黎明謀告元帥脫脫被詔削奪三軍潰散士誠乘間開門突擊大敗之軍勢大振由是軍中悉稱姑姑明年乙未江陰盜朱英江宗三相仇殺莫能勝渡江求援士誠疑為元兵反間往復不決英乃盛陳江南子女玉帛之富且請以妻子為質士誠妻劉氏遂召金兒卜之曰過江大吉且近者太陰屢犯壘壁軒轅自五月至九月太白累經天晝見人犯太微光掃太梁其應在吳江南必不免劉氏以語士誠遂定計過江先遣弟士德為先鋒英為鄉導至福山登狼山觀長江之險江中沙洲紆繞舟師皆江北新集鄉民未爛地利疑未能決曹氏復

以金兒為言士誠令卜之遇蠱之剝曰羊腸九繁相推稍前止須天孫乃得上天測曰江雖險當有降人相助俄而福山富人曹氏恐士誠渡江禍及遂發江船百艘載牛酒迎之乃徑渡江由常熟至平江縱士卒盡掠曹氏家資僅免於死士誠既入蘇州自謂有天相始有割據一方自王之志欲知國祚修促焚香拜祝自著之得中孚之晉以示金兒對曰中孚陰陽變動六位周而反及游魂之卦互體辛未土以壬午水火用事與乾為飛伏已酉金以丙戌火土用事與艮為飛伏其繇曰日月運行一寒一暑榮光赫赫勗業大數當伺天運一周乃決國祚靈長之兆也士誠大喜且心動其慧麗欲納之曰我默有所禱汝試卜之欲金兒自得吉卜而成之也金兒卜卦成曰大不吉蒼蠅相

元史卷五十二 列傳 六

乘於溷廁涕泣不語與母長訣士誠笑不信曰枯龜朽蓍亦何靈也金兒退泣訣其母曰兒命盡矣前此以術售者欲保全一家然張氏必無成一寒一暑天運一周當有真人享其榮休吾前日詭詞也強得者必暴亡吾能臣妾若輩再為俘虜乎得從郭璞遊地下足矣焚香祝天奄然忽若中風閉目不食不語數日而卒士誠悼惜厚葬之虎丘後山至今尚稱金姬墩相傳吳王葬金妃之所張氏起丙申閏十二年丁未果一周而敗邑人楊儀為作金姬傳賢母才女三傳

藝術

李俊民

李俊民字用章澤州人少得河南程氏之學金承安中以經義舉進士第一授應奉翰林文字未幾棄官歸以所學教授鄉里有不遠千里來者其於理學淵源冥搜隱索片言隻字務有根據金源南遷後隱嵩山再徙懷州俄復隱西山既而變起倉卒人服其先知俊民在河南時隱士荆先生者授以皇極數學時知數者無出劉秉忠右亦自以為弗及世祖在藩邸以安車召至延訪無虛日遽乞還山世祖重違其意遣中貴護送之又嘗令張仲一問以禎祥及即位其言皆驗而俊民已卒年八十餘賜諡莊靜先生

元史卷五十三

列傳

一

朱震亨

朱震亨字彥修婺州義烏人天資爽朗讀書即了大義聞同郡許謙之學摳衣至門師事之謙為開明聖賢大旨震亨心解抑其豪邁歸於純粹不以一毫苟且自恕其清修苦節絕類古篤行士所至人多化之一日母病延醫因自悟曰人子不知醫或委之庸人寧無有失於是研究醫理博求名師得羅知悌之傳治症多奇效嘗著格致餘論局方發揮傷寒辨疑外科精要本草衍義補丹溪心法諸書行世學者稱丹溪先生

○按圖堅不花傳稱其曾祖賈昔刺詳藝術傳又賈默傳稱李俊民別見藝術傳又許謙傳稱謙弟子著名者有朱震亨兼長於醫別見藝術傳而原案僅存朱震亨一傳蓋魏氏重修時原立藝術傳一門多佚去矣今仍立藝術傳目而以原案朱震亨傳及舊史李俊民傳列入以存重修體例焉舊史原有方伎傳意魏氏重修時當有所采錄以

別無左傳

元史卷五十三

列傳

二

元史卷五十三終

元史卷五十四

列傳三十八

釋老無傳

○按不忽木傳原稟就舊史塗改其原文有論西僧一條云西僧為佛事請釋罪人祈福蒙民犯法者皆賄賂之以求免有嚴主殺夫者西僧請被以帝后御服乘黃犢出宮門釋之謂可得福不忽木曰人倫者王政之本風化之基豈可容其亂法如是云云稟中芟略此節而注於眉端曰宜入釋老傳據此知魏氏重修時原立釋老傳一門也而存稟無其傳蓋散佚者多矣夫元代尊西僧修佛事其蠶國病民耗財敝化視往代為尤甚是固不可不為之傳以昭覆轍之鑒爰處立卷目以存魏氏重修義例云

元史卷五十四 列傳

一

元史卷五十四終

元史卷五十五

列傳三十九

奸臣

阿合馬

阿合馬回紇人不知其所由進世祖中統三年命領中書左右部兼諸路都轉運使專委以財賦之任遂頒條約宣諭各路轉運司開河南鈞徐諸州鼓鑄之利更括戶三千興煇鐵冶歲輸鐵一百三萬七千斤就鑄農器二十萬具令易粟輸官得四萬石以太原民糞小鹽越境私販民貪其價廉競相買食以故解鹽不售歲入課銀止二千五百兩合歲增五千兩無問僧道軍匠計戶均輸自是鹽鐵之利始起至元元年秋八月罷領中書左右部併入中書省超拜阿合馬為平章政事三年立制國用司命兼領使職

元史卷五十五 列傳

一

因奏真定順天金銀不中程者宜改鑄別怯赤山出石絨織為布火不能然應遣官采取桓州峪所得銀鑛十六萬斤每百斤可淘銀三兩錫二十五斤開采所需鬻錫以給悉從其請七年立尚書省罷制國用司仍命平章尚書省事時世祖銳意富國試以事頗有成效又見其與丞相線真史天澤爭辯丞相皆屢詘由是奇其材授以政柄言無不從初尚書省之始立也詔凡銓選各官吏部按資品呈尚書省由尚書咨中書省然後轉奏至是阿合馬擢用私人不由部擬不關白中書丞相安童以為言帝問之對曰事無大小既委之臣所用之人須臣自擇雖嫌怨不敢避九年併尚書省入中書復命平章中書省事明年更以其子忽辛為大都路總管安童見其專恣日甚乃奏大都總

管以下多不職乞選人早代尋又奏阿合馬挾宰相權爲商賈以網羅天下大利民困無所訴阿合馬曰誰爲此言臣當與廷辯安童進曰左司都事周祥中木取利罪狀明著帝曰俟徵畢當顯黜之既而樞密院請以忽辛同僉院事帝不允曰彼賈胡事猶不知况可責以機務邪丞相伯顏伐宋既渡江捷屢至帝命阿合馬與姚樞徒單公履張文謙陳漢歸楊誠等議行鈔法於江南及賈易官鹽藥材阿合馬條上眾議曰樞言江南交會不行必致小民失所公履言伯顏已嘗榜諭交會不換今行之恐失信於民文謙言可否當詢伯顏自定漢歸及誠皆言以中統鈔易交會何難之有帝曰樞與公履不識事機朕嘗問左丞陳巖亦言宋交會宜更換今從汝議又奏北鹽藥材樞與公履

元史卷五十五 列傳 二

皆言當使百姓從便販鬻臣謂若聽民自售勢必紊亂不一請於南京衛輝等路籍括藥材蔡州發鹽十二萬斤官自賈易帝從之又言比因軍興之後既減編民額賦又罷轉運官令各路總管府兼領課程以故國用日詘莫若驗戶數多寡酌遠就近設都轉運司選廉幹官分理其事廣行鼓鑄官爲局竝禁民間私造銅器則民力不屈而國用可充乃復立諸路都轉運司悉以其私人爲使又言自今御史臺非白省毋擅召倉庫吏亦毋鈎索錢穀數及集議中書不至者加罪竝報可十五年湖南左丞崔斌入覲劾奏阿合馬濫任子弟悉處津要無以示天下公有旨竝罷黜之然不以是爲阿合馬罪十六年奏設江西樵茶運司以盧世榮爲使又以都轉運司官多俸重改諸路宣課

提舉司都省行省各委一人監理明年中書奏行省阿塔海阿里等言自立宣課提舉司官吏至五百餘員左丞陳巖范文虎謂其擾民且侵盜官錢罷之便阿合馬言定提舉司未三月而請罷此必行省有奸敝故先發制人乃詔御史臺遣能臣往按其事具以實聞未幾崔斌遷江淮左丞阿合馬慮其害己乃奏理算江淮錢穀誣構斌與平章阿里伯右丞燕帖木爾盜官糧四十萬擅易命官八百餘員及鑄造銅印等事三人竟坐誅時阿合馬在位久益肆貪橫援引奸黨郝禎張惠爲左右丞耿仁爲參政罔上剝下眾庶流移民有美田宅輒斂爲己有內通貨賄外以威劫羣臣在廷相視莫敢發有宿衛士秦長卿慨然上書摘其奸謂禁絕異議杜塞忠良似秦趙高私蓄踰公家覬覦

元史卷五十五 列傳 三

非望似漢董卓春秋人臣無將請及其未發誅之書奏不省未幾除長卿同知興和鐵冶事誣以侵課數萬緡斃之獄十九年春帝幸上都皇太子眞金從有益都千戶王著素疾惡因人心憤怨密鑄大銅鎚自誓擊阿合馬首與妖人高和尚結黨八十餘人合謀以三月戊寅詐稱皇太子還都作佛事至期晨遣二西僧詣中書省令市齋物省中疑之俾東宮官屬尙書張九思總管高鵬雜視之皆不識鵬作西番語詰二僧曰皇太子今至何處二僧失色又以漢語詰之倉皇失對遂執二僧屬吏訊之皆不伏及午又矯令旨俾樞密副使張易發兵夜會東宮前易不察遽以兵往著自馳見阿合馬詭言太子將至令省官悉於宮前取候阿合馬素憚太子先遣數騎出關北迎行十餘里盡

為偽太子所殺奪其馬夜二鼓燭籠儀仗入健德門直趨東宮一人前呼啟關甚急鱗九思已先入宮集衛士持弓矢為備戒門者勿啟鱗謂九思曰他日殿下還宮必以完澤賽羊二人先因呼二人不應即語之曰皇太子平日未嘗行此門今何來此也偽太子遂轉趨南門至東宮前鱗九思令官屬守西門復走南門伺之燭影中見其徒皆下馬獨偽太子立馬指揮呼省官至前責阿合馬數語著即牽去以所袖銅鎚碎其腦立斃繼呼左丞郝禎至殺之囚右丞張會時變起倉猝且昏夜樞密院御史臺留守司各官皆遙望莫知所為鱗九思自宮中大呼以為詐留守使博敦遂持挺擊立馬者墜地弓矢亂發眾奔潰高和尚等逸去著獨挺身就縛帝聞之震怒即命司徒和禮霍孫樞

元史卷五十五 列傳 四

密副使孛羅等馳詣大都討亂者獲高和尚於高粱河與王著張易竝醢於市著臨刑大呼曰王著為天下除害今死矣異日必有為我書其事者初阿合馬死帝猶未察其奸及徐詢孛羅始盡得其罪狀怒曰王著殺之誠是也命剖棺戮屍縱犬啗其肉諸子盡伏誅籍其家得積藏二人皮兩耳具存問之其妾引住云每詛呪時置神坐其上應驗甚速又以帛二幅畫甲騎圍守幄殿兵皆挺刃內向如擊刺狀為之畫者陳姓又有曹震圭者嘗推算其年命王臺判者妄引圖讖皆言涉不軌事聞敕剝數人皮以徇已從集賢侍讀學士崔或請并戮郝禎屍刑官復論張易以從亂九思啟太子曰張易應變不審而授賊以兵罪復何辭若坐以與謀則過矣太子言於帝乃免傳首九思字子

有燕之宛平人累官終大德間中書平章高鱗字彥解渤海人官至河南宣慰使

盧世榮

盧世榮大名入當阿合馬專政世榮以賄進為江西榷茶運使坐罪廢阿合馬死廷臣諱言利無以副志意有桑葛者薦世榮才謂能救鈔法增課額上可裕國下不損民世祖召問稱旨令與中書省議所當行丞相和禮霍孫與右丞麥朮丁參政張雄飛溫迪罕皆以議不合同日罷去至元二十一年冬復起安童為右丞相以世榮為右丞而左丞史樞參政不魯迷失即廉撒希思撒的迷失參議拜降皆世榮所薦也世榮既驟被顯用即日坐中書專理鈔法通行中外官吏奉法不虔者加罪因奏言近見老幼疾廢之民衣食不給行乞於市非盛世所宜有宜委各路正官給衣糧

元史卷五十五 列傳 五

又請弛民間買賣金銀江湖魚利禁罷懷孟諸路竹監優卹驛戶困乏大率先反阿合馬所為巧於沽名帝竝可其奏既而言南北食鹽每引十五兩國家未嘗多取今官豪擁貨射利每引價至八十貫貧者多不得食宜以二百萬引給商一百萬引散諸路立常平鹽局或販者增價官平其值售之又京師富戶釀酒價高味薄課不以時輸宜發官鈔五萬錠立權酷法俾民用給而國計亦裕世榮在中書未十日御史中丞崔或極言其不可為相大忤旨下或吏欲致之法尋罷職明年正月世榮奏言天下歲課鈔止九十餘萬錠以臣經畫不取於民可增三百萬錠事未行而中外已非議臣請與臺院面議上前帝曰卿但言之世

榮言自王文統誅後鈔法虛敝已久今莫若依漢唐故事括銅鑄錢并製絞券與鈔參行更立市舶都轉運司於泉杭二州官自具船給本募人入番官取其利七商有其利三禁私販航海者拘其先貯貨物納諸官匿者許告沒其財半給告者各路雖建常平倉實無所蓄宜盡核權勢所擅鐵冶官爲鑄器鬻民以其息合常平鹽課儲穀於倉待貴時出糶則可均物價而獲厚利國家雖立平準庫然無曉規運者以致鈔法虛廢諸物踊貴宜於各路立平準周急庫輕其息以貸貧民則貸者眾而本且不失今隨朝官吏增俸獨州郡未增可於各都立市易司領諸戶會計土產物貨四十分取一以十爲率四給身儉六充官吏俸國家以兵得天下不藉糗糧惟資羊馬宜出官錢置幣帛易

元史卷五十五 列傳

六

羊馬於北方廣開牧地收其皮毛筋角酥酪以十之二與牧者而馬以備軍興羊以充賜予帝每事稱善世榮因奏曰臣所行怨之府也後必有陰中臣者臣實懼焉帝曰疾足之犬狐不愛焉主人豈不愛之汝之所行朕自愛也未幾奏罷行御史臺升六部爲二品改按察司爲提刑轉運司俾兼各路錢穀其刑名事隸內臺錢穀由部申省頃之御史臺言初置行臺時朝廷老臣集議皆謂有益今未見所損何可遽罷至按察司兼轉運則糾彈之職且廢會丞相安童亦言其不可罷帝命復立江浙行臺治江州按察司職掌如故世榮又奏立規措所所司官吏以善賈者充之且曰天下能規運錢穀者向在阿合馬之門今皆籍錄禁錮其中不乏通才堪任使然懼有言臣濫用罪人者帝

曰可用則用之何懼爲於是以前轉運使張宏綱撤都丁不魯合散孫桓並爲河間山東諸路都轉運鹽使其其他擢用甚眾世榮既以利自專知斂怨日甚乃以九事說世祖詔天下一免民間包銀二官吏俸毋令民戶帶納三調大都地稅四江淮民失業鬻妻子者官爲收贖五逃移復業者免差稅六鄉民造醋者免收課七量減江南佃戶租額八添支內外官吏俸九定百官考課升擢法意在釋怨要警帝悉從之已又奏立眞定濟南江淮等處宣慰司兼都轉運司專治課程仍降格條禁諸司不得擅追管課官吏及按察司不得檢察文卷以宣德王好禮並爲浙西宣慰使帝曰宣德人多指其奸世榮言彼自陳能歲辦鈔七十五萬錠是以令往世榮居中書甫數月恃委任之專視丞相猶虛位左司郎中周戴議事稍不合坐以沮格詔旨奏杖一百後斬之朝中震懾無敢言者御史陳天祥獨上章論世榮姦邪不法狀時帝在上都御史大夫玉昔以聞帝悟即日遣梭都等還大都命丞相安童集諸司官吏老成儒士及知民情者同世榮聽讀天祥彈文仍令世榮天祥並赴上都廷辯安童言世榮昔言能不取於民歲辦鈔三百萬錠令鈔復實諸物悉賤民得休息數月卽有成效今已四閱月所行不符所言所出多於所入引用儉人紊亂選法請暴其罪於天下翰林學士趙孟頫等亦言世榮初以財賦自任當時人情不敢預料將謂別有奇術可以增國用及今觀之不過如御史所言若復恣其妄行爲害非細天祥與世榮面質帝前皆款伏傳旨命安童與諸老臣

元史卷五十五 列傳

七

議世榮所行當罷者罷更者更所用非人立皆奏斥下世榮於獄閱七月帝問近侍忽刺出口汝於盧世榮有何言對曰近聞人言世榮獄已竟猶日參之徒費廩食詔誅之刳其肉以食禽獮

桑葛

桑葛西域人膽巴國師弟子也能通諸國語嘗為西番譯史性狡黠好言財利事世祖深喜之及後貴幸乃諱言師膽巴背之至元中擢為總制院使掌浮屠氏教兼治吐番宣慰事中書省嘗令李雷判市油桑葛請以官錢往市司徒和禮霍孫謂非汝所宜為桑葛不服至相毆且謂曰與其使它人侵盜曷若為公家營利乎乃出油萬斤與之後以所營息錢進和禮霍孫曰我初計不及此一日桑葛在

元史卷五十五 列傳

八

帝前論和雇和買事因語及帝益喜始有大任意當合桑葛具省臣姓名以進內廷有所建置人才進退咸得以聞二十四年二月復立尙書省以桑葛平章政事會更造至元寶鈔桑葛言中統鈔行垂三十年省官皆不知其數今已更用至元鈔宜遣官分道置局鈎考中統鈔本又初改至元鈔欲盡收中統鈔今尙未可急斂宜令稅賦並輸至元鈔商販有中統鈔者聽易至元鈔以行然後中統鈔可盡帝是其言嘗奉詔檢覈中書省校出虧欠鈔六十餘錠平章麥朮丁即自伏參政楊居寬謂職掌銓選錢穀非所專桑葛怒令左右批其頰問曰既典銓選果無黜陟失當者乎尋亦引伏奏聞帝命與丞相安童共訊且曰此曹狡獪毋使他日得以脅問誣服為辭數日又奏中書參政

郭佑多所逋負尸位不言每以疾為辭臣見中書庶務墮惰如此故毆辱之今已款服帝益怒命加窮治佑與居寬皆棄市刑部尙書不忽木爭之不得臺吏王良弼與江寧縣尹吳德嘗偶語時政桑葛聞之曰若輩誹謗政事不誅無以懲後並捕殺之桑葛嘗奏以沙不丁遙授江淮行省左丞烏馬爾為參政領泉府市舶事發鈔千錠給行泉府司歲輸珍異物為息又以拜降為福建行省平章既得旨乃言於帝前曰臣前言凡授省臣及行省官並與丞相安童議今奏用沙不丁等適丞相還大都未與議臣恐有執前旨為言者帝曰朕若主也朕已允行何言之有十月帝問翰林集賢諸臣曰以丞相領尙書省事漢唐有此制否咸曰有之翼曰左丞葉李言桑葛柄政久宜進位丞相以

元史卷五十五 列傳

九

繫人望帝大悅遂以為尙書右丞相兼總制院使領功德使司事明年正月以甘肅參政鐵木哥不任事奏乞身帶往代淞江民曹夢炎願歲輸米萬石求官奏授浙東宣慰副使紹興判官白絮矩言亡宋族人散居江南非便宜悉徙京師奏擢絮矩尙書省舍人江西判官蕭儀受賕論死桑葛以儀嘗鈎攷萬億庫有追錢之能奏釋其罪又以平章忽都鐵木爾不職論罷之兵部尙書忽都荅爾不勤於政則先斥而後奏帝曰若輩不罷汝事何由得行自立尙書省摘委六部鈎攷百司倉庫尙以為不專更置徵理司主之以秃烈羊呵吳誠並為使十月奏荆湖行省錢穀已責平章要束木自首償矣他省欺盜正多乞命參政忻都尙書王巨濟等十二人理算江淮江西福建四川甘肅安

西六省耗失之數特授敕印併給兵爲衛帝皆從之當是時天下騷然江淮尤甚而諛者方且諛都民爲之立石頌德帝聞之曰民願立者聽既成樹於省前翰林製文題曰王公輔政碑又以總制院所統西番諸宣慰司軍民財粟事體甚重宜優異奏改爲宣政院秩從一品帝問宜用何人對曰臣與脫因可於是命桑葛以右丞相兼宣政院使二十六年帝將幸上都桑葛入見言去歲聖駕北幸臣視內帑諸庫無虛日今歲欲乘小輿以行恐人竊議帝曰汝但乘之毋畏人言且命以侍衛親軍百人爲導從桑葛又言初以省部成案皆錢穀所繫合赴御史臺照刷近檢左右司文簿凡經照刷者遺漏尙多當令御史就省部稽察并書姓名於卷末苟有遺漏易於歸罪仍命侍御史堅童

元史卷五十五 列傳

十

監視失則連坐乃答監察御史四人自後御史赴省部者掾令史與之抗禮但遣小吏持文簿置案去聽御史自行檢閱而臺綱遂廢又言國家經費既廣歲入恆不敷出今鹽課每引值中統鈔三十貫可增爲一錠茶稅每引值五貫可增爲十貫酒醋稅課江南可增額十萬錠內地五萬錠協濟戶十八萬自入籍至今止輸半賦聞其力已完足宜改爲全賦如此則國用可支詔皆如所議又言有分地之臣近以貧乏爲辭希覬賜與財非天墜地涌苟不慎出入恐國用不足帝曰自今不當給者汝卽止之當給者俟覆奏桑葛既專政凡銓調內外官皆任己出而宣敕尙由中書乃請今後宣敕並付尙書省由是以官爲市貨賂珍寶日夜輦輸其門姦諛之徒蠅附蟻營綱紀大壞人心駭

愕二十八年春帝敗柳林利用監徹里浙西按察使干盧等乘閒奏其專權顯貨狀帝趣召不忽木問之對曰桑葛壅蔽聖聰紊亂朝政有言者卽誣以他罪今百姓失業盜賊遽起召亂在旦夕非亟誅之恐爲宗社憂畱守賀勝亦陳其奸欺久而言者益眾帝問御史大夫月爾魯曰屢聞桑葛沮抑臺綱杜言者之口又嘗捶撻御史其所罪者何事桑葛持御史李渠等已刷文卷至令侍御史杜思敬勘驗辨論往復數四辭屈帝駐蹕土口復召問尙書省裂卷爲兩縫執奏曰前浙西按察使只必因監燒鈔受賊至千錠嘗檄臺追徵三年不報思敬曰文之次第盡在卷中今尙書省折卷持半印案訟人餘半安在其敝可見徹里抱卷至前奏曰用朱印以封紙縫者防欺也若輩爲宰相而

元史卷五十五 列傳

十一

折卷破印與人辨豈非教吏爲奸帝怒下桑葛獄仆輔政碑至七月伏誅先是行臺御史周祚嘗劾行尙書省官桑葛誣以他罪流祚於熬荅孫之地妻子家產皆沒入及是始給還要束木者桑葛妻黨也嘗鈎攻荆湖錢穀省臣擬授湖廣平章帝曰要束木小人事朕方五年授一理算官足矣覽中書所奏令人恥之比至湖廣卽籍阿里海牙家貨來上及被逮籍其家得黃金四千兩更坐不法數事帝命械至湖廣戮之其沙不丁烏馬爾妻孥並沒官姑貸其死忻都王巨濟伏誅

元史卷五十五終

										軍名黑 林昔合 刺赤連 美號以 稱也世 祖時有 諸王亦 號合必 赤又按 官古職 蒙率以 赤稱疑 合必赤 爲蒙古 官名古	
										先鋒之 一即共 高	
										合出刺 生四子 日大巴 魯刺日 小巴魯 刺日巴 兒點巴 魯刺日 脫朵顏 巴魯刺 後皆以 名爲氏	
										合關台 後爲不 答安揚 氏	
										合赤温 其子名 阿答兒 歹後爲 阿答兒 斤氏太 祖時有 哈答斤 部出於 字端察 爾同母 兄不忽 合塔吉 與阿答 兒斤氏 別合舊 自合臣 至合赤 温茲闕 名今據 祕史補	
										納眞	

元史卷五十七表 宗室世系二

										祕史作 納臣把 阿兒把 按兒郎 秃都兒 入拔都 與之譯 兒非名 音乃勇 號非名 也二子 生兀魯 日台忙 兀台忙 忽以名 皆氏爲 開國二 蒙部之 雁娶眞 別生二 又日失 子兀歹 主兀歹	
										日朵斡 刺歹	
										巴阿里台赤都忽勒 台原作 李闊 李端察 兒房懷 孕婦生 子名札 只刺再 其婦再 爲生端 察兒生 子日巴 阿里巴 後爲巴 阿鄰氏 札只刺 爲之刺 萬札之 爲札之 關氏以 非始祖 親子不	
										祕史赤 都忽勒 李闊多 子稱巴 茂年巴 阿鄰氏 太祖時 豁兒赤 封萬戶 納牙封 中軍萬 戶世祖 平時伯 皆其裔	

元史卷五十七表 宗室世系三

		元史卷五十七 表			
		宗室世系			
		六			
<p>忽都魯茫不里孛闐</p> <p>聶爾 茫原作 咩爾原 作兒忽 史作忽 秃兒</p>	<p>也子語斤按阿一阿一幹谷祕谷</p> <p>非稱象幹里作兒赤里史力</p> <p>名少古赤台蒼台蒼斤台台</p>	<p>皇叔父蒼</p> <p>皇真</p> <p>舊史太 祖紀作</p>	<p>耶速該</p> <p>耶原作 也祕史 作也速 該把阿 秃兒連 勇號為 稱也</p>	<p>皇考烈祖</p>	<p>里王罕 及王罕 滅復奔 乃蠻其 後無顯 者</p>

		元史卷五十七 表			
		宗室世系			
		七			
<p>子汗生三</p> <p>忽魯刺音</p> <p>罕一音</p> <p>作罕汗</p> <p>汗舊表</p> <p>爾故稱</p> <p>忽魯刺</p> <p>律汗子</p> <p>而葛不</p> <p>國被害</p> <p>執送金</p> <p>塔爾部</p> <p>海為塔</p> <p>嗣俺巴</p> <p>巴海汗</p> <p>汗不律</p> <p>葛不律</p>	<p>吉爾馬元</p> <p>爾作兒</p> <p>一作蒼</p> <p>兒馬刺</p> <p>阿勒壇</p> <p>按前稱</p> <p>史紀作</p> <p>阿勒壇</p> <p>後又連</p> <p>幹惕赤</p> <p>斤為稱</p>	<p>忽魯刺汗拙赤</p> <p>祕史作 忽魯刺 罕罕按 合罕即 可汗之 譯音初</p> <p>赤象古</p>	<p>生一子</p> <p>五品謀 可與伯 克之連 音此為 官名史 稱舊作 本紀即 播里也 不里令 與弟別 里古台 搏為別 折春死</p>	<p>五品謀 可與伯 克之連 音此為 官名史 稱舊作 本紀即 播里也 不里令 與弟別 里古台 搏為別 折春死</p>	<p>生一子</p>

僚忽真兀幹羅納爾
圖迭葛

僚原作
後圖原
作禿今
改祕史
作抄頂
幹兒帖
該生六

爾祕史
原作兒
其後爲
幹羅納

晃齡壇

後爲晃
齡壇氏
太祖幼
時有察
其子合
刺克當
力克當
保蒙太
祖蒙力
克蒙子
七人其
格下騰
格理以

元史卷五十七表 宗室世系十

阿魯刺惕	後爲阿 魯刺氏	太祖時 有博爾 朮爲一	傑之
音	即晃齡 之譯	合丹晃 氏	見忠義 孫伯八
力克	春死蒙 赤斤折	弟爲幹	太祖諸
勢	太祖諸	太祖諸	太祖諸
巫	太祖諸	太祖諸	太祖諸
巫	太祖諸	太祖諸	太祖諸
巫	太祖諸	太祖諸	太祖諸
巫	太祖諸	太祖諸	太祖諸
巫	太祖諸	太祖諸	太祖諸
巫	太祖諸	太祖諸	太祖諸

即其裔

雪你惕

後爲雪
你台氏

合卜圖爾

合忽

格泥格思

元史卷五十七表 宗室世系十一

大納耶耶	皇叔父 蒼里眞位下	宗室世系下 附致證	太祖時 有忽難 者命爲 萬戶使 輔長子 朮赤
出	寧王闊闊 耶里干	大哈魯罕王	寧王買間
王	寧海王亦	思魯	寧海王拔
	都爾		

靈海王阿

啟證○皇叔父答里真初太祖伐塔塔兒部答里真與族
人火察兒及按彈達令虜掠太祖怒盡奪其所獲分之軍
中答里真遂與二人叛投法烈部脫里王罕及王罕滅答
里真得來歸太祖有之其分地歲賜見食貨志○蓋王關
關出舊史世祖紀至元九年八月諸王關出請以分地
蓋海登萊三州自爲一路與諸王比歲賦惟入蓋海無輸
也凡舊表諸王名有也兒等字並例改爲耶與爾至引證
舊史諸書仍從原文舊紀至元二十年正月兩銀五兩
金衣襖一二十五年十一月賜金五兩兩銀五兩兩鈔五
錠幣帛紗羅等二千匹大德元年六月遣使乘驛視等
獄四讀詔追其驛券又元貞二年三月遣使乘驛視等
駐夏于晉王怯魯刺之地也里樞即也里干之譯音怯魯
刺即怯魯連今克魯倫河也晉王甘麻刺封怯魯連河太
祖舊興王地時叛王海都篤哇擾攘漠北故遣諸王各以
所部兵駐夏于晉王封內以防之○蓋海王拔都爾延祐
五年三月賜金印見舊史仁宗紀諸王表蓋海王買闐爾
延祐五年三月賜金印見舊史仁宗紀諸王表蓋海王買闐爾
作奴舊紀泰定三年八月封諸王買奴爲宣靖王買闐爾
賜鈔三千錠致和元年八月封諸王于山東賜金五十兩銀

元史卷五十七

五百兩幣三十匹天曆二年正月文宗遣王往皇兄周王
行在至順二年三月置王傅等官立宮相都總管府秩正
三品給銀印袋至元二年二月進封蓋王至正十六年三
月毛貴陷益都益王買奴遁至正二十五年有蓋王渾都
帖木兒禽老的沙誅之蓋買
閭親屬襲封者其世系未詳
烈祖神元皇帝五子長太祖皇帝次二擲只哈撒爾大王
次三哈赤温大王次四鐵木哥幹赤斤國王次五別里古
台大王秘史稱帖木真九歲時合撒兒七歲合赤温五歲
爲太祖異母弟長于哈赤
温鐵木哥以庶故次于後
擲只哈撒爾大王位下

王	古	伊相哥大勢都爾王齊王八不
王	千王	沙
王	阿不	

墊仙帖木必烈虎大

黃兀爾王伯木爾王

齊王玉龍齊王月魯

帖木爾

別爾帖木

爾王

脫忽大王
啟證○擲只哈撒爾大王原作擲只哈兒發撒字舊史太
祖紀元○哈撒兒合貨志作擲只哈撒兒合貨志以于太祖
扎兒元○哈撒兒合貨志作擲只哈撒兒合貨志以于太祖
諸弟中居長故以拙赤稱之拙赤蒙古語長子也擲只
拙赤譯音之轉太初年征伐各部諸弟戰功以哈撒兒
爲最蒙古源流載太祖初年征伐各部諸弟戰功以哈撒兒
爾羅斯之二十萬逆拒哈撒爾等進戰生禽納琳汗遂有郭
爾羅斯之二十萬逆拒哈撒爾等進戰生禽納琳汗遂有郭

元史卷五十七

花江北其取事爲舊史所闕他如哲渾河平乃蠻哈撒兒皆
在行間至取事爲舊史所闕他如哲渾河平乃蠻哈撒兒皆
其事功散見紀傳及元史諸部及降女真則哈撒兒多
故俱以東北地封之舊史特薛禪傳及哈撒兒則居之論
土日苦烈兒溫都兒分賜按陳及哈撒兒則居之論按陳
可木兒溫都兒分賜按陳及哈撒兒則居之論按陳
哈撒兒溫都兒分賜按陳及哈撒兒則居之論按陳
烈兒溫都兒分賜按陳及哈撒兒則居之論按陳
內蒙入于嫩江東會松花江流會陀刺河一曰洮兒河即
旗所稱討活兒河也哈撒兒分地在今嫩江西科爾沁
史所稱討活兒河也哈撒兒分地在今嫩江西科爾沁
境中州民戶爲食邑時哈撒兒已薨故撥賜其子舊史
王都濟南二府內民戶○淄川王耶魯古原傳也亦作耶
蓋都濟南二府內民戶○淄川王耶魯古原傳也亦作耶
宗紀作野苦憲宗紀作也古又作耶魯古原傳也亦作耶
紀世宗元紀作牙忽耶魯古原傳也亦作耶魯古原傳也
即位高麗三年正月脫忽亦孫哥魯古原傳也亦作耶魯
古與高麗三年正月脫忽亦孫哥魯古原傳也亦作耶魯
銀及文綺都魯當是南平王都魯而牙忽耶魯古原傳也
忽之譯音其食邑當是南平王都魯而牙忽耶魯古原傳也
王伊原作移舊史德宗紀作亦孫哥魯古原傳也亦作耶魯

○只不千大王徽吉思傳稱幹真莫長子只不干蚤世按
○表列為長者故稱蓋幹端之次則幹端為子不干之兄而稱
○子尚存者言其大故稱蓋幹端之次則幹端為子不干之兄而稱
○也尚存者言其大故稱蓋幹端之次則幹端為子不干之兄而稱
○賜金五十兩銀四百五十兩是元正二月賜諸王失忽罕來
○出阿罕等金各二百五十兩是元正二月賜諸王失忽罕來
○刺王阿罕等金各二百五十兩是元正二月賜諸王失忽罕來
○賜諸王阿罕等金各二百五十兩是元正二月賜諸王失忽罕來
○譯音諸王阿罕等金各二百五十兩是元正二月賜諸王失忽罕來
○壽王阿罕等金各二百五十兩是元正二月賜諸王失忽罕來
○權振王阿罕等金各二百五十兩是元正二月賜諸王失忽罕來
○其振王阿罕等金各二百五十兩是元正二月賜諸王失忽罕來
○脫里王阿罕等金各二百五十兩是元正二月賜諸王失忽罕來
○歡果王阿罕等金各二百五十兩是元正二月賜諸王失忽罕來
○與河王阿罕等金各二百五十兩是元正二月賜諸王失忽罕來
○舊紀王阿罕等金各二百五十兩是元正二月賜諸王失忽罕來
○匠歲王阿罕等金各二百五十兩是元正二月賜諸王失忽罕來
○支庶王阿罕等金各二百五十兩是元正二月賜諸王失忽罕來
○賜諸王阿罕等金各二百五十兩是元正二月賜諸王失忽罕來
○五九王阿罕等金各二百五十兩是元正二月賜諸王失忽罕來
○與阿九王阿罕等金各二百五十兩是元正二月賜諸王失忽罕來

元史卷五十七

哈赤者有二一稱王一稱大王舊紀至元二十五年八月
○月賜諸王阿罕等金各二百五十兩是元正二月賜諸王失忽罕來
○萬二萬八千二百五十兩是元正二月賜諸王失忽罕來
○以省糧餉史不稱諸王省赤金是元正二月賜諸王失忽罕來
○印大德元提舉司于益都王省赤金是元正二月賜諸王失忽罕來
○有千餘錠以于益都王省赤金是元正二月賜諸王失忽罕來
○王亦單稱錠以于益都王省赤金是元正二月賜諸王失忽罕來
○國黑山南北地黑山南北地黑山南北地黑山南北地黑山南北地
○岸地皆北河折東之曲蓋黑山南北地黑山南北地黑山南北地
○功地皆北河折東之曲蓋黑山南北地黑山南北地黑山南北地
○蜀塔兒分將一塔舊封也歲辛亥憲宗即位焚塔兒城午憲宗
○中統元年分將一塔舊封也歲辛亥憲宗即位焚塔兒城午憲宗
○勸進七元兒分將一塔舊封也歲辛亥憲宗即位焚塔兒城午憲宗
○冬與從昆弟阿朮書省給塔兒會地至江州分平與諸王大臣
○振所部從昆弟阿朮書省給塔兒會地至江州分平與諸王大臣
○從車駕北征八月賜金千兩銀五千兩是元正二月賜諸王失忽罕來
○三以濟州萬戶不哥于昔木兒之弟至元八年八月分地
○詔誅世昌九萬戶不哥于昔木兒之弟至元八年八月分地
○所部世昌九萬戶不哥于昔木兒之弟至元八年八月分地
○而部世昌九萬戶不哥于昔木兒之弟至元八年八月分地

元史卷五十七

及乃額陰遣使來結東歸怯憐河帖木兒怯憐河帖木兒
○怯乃額陰遣使來結東歸怯憐河帖木兒怯憐河帖木兒
○米兒河帖木兒怯憐河帖木兒怯憐河帖木兒怯憐河帖木兒
○渡河帖木兒怯憐河帖木兒怯憐河帖木兒怯憐河帖木兒
○河帖木兒怯憐河帖木兒怯憐河帖木兒怯憐河帖木兒
○也帖木兒怯憐河帖木兒怯憐河帖木兒怯憐河帖木兒
○關帖木兒怯憐河帖木兒怯憐河帖木兒怯憐河帖木兒
○月帖木兒怯憐河帖木兒怯憐河帖木兒怯憐河帖木兒
○皆帖木兒怯憐河帖木兒怯憐河帖木兒怯憐河帖木兒
○乞帖木兒怯憐河帖木兒怯憐河帖木兒怯憐河帖木兒
○諸帖木兒怯憐河帖木兒怯憐河帖木兒怯憐河帖木兒
○為帖木兒怯憐河帖木兒怯憐河帖木兒怯憐河帖木兒
○失帖木兒怯憐河帖木兒怯憐河帖木兒怯憐河帖木兒
○元帖木兒怯憐河帖木兒怯憐河帖木兒怯憐河帖木兒
○大帖木兒怯憐河帖木兒怯憐河帖木兒怯憐河帖木兒
○可知帖木兒怯憐河帖木兒怯憐河帖木兒怯憐河帖木兒
○是帖木兒怯憐河帖木兒怯憐河帖木兒怯憐河帖木兒
○子帖木兒怯憐河帖木兒怯憐河帖木兒怯憐河帖木兒
○選帖木兒怯憐河帖木兒怯憐河帖木兒怯憐河帖木兒
○世帖木兒怯憐河帖木兒怯憐河帖木兒怯憐河帖木兒
○元帖木兒怯憐河帖木兒怯憐河帖木兒怯憐河帖木兒

至德元年... 西馬... 續修四庫全書... 史部 別史類

元史卷五十七... 察合台... 察合台... 察合台... 察合台...

元史卷五十七... 察合台... 察合台... 察合台... 察合台...

Table with columns for names and titles: 河間王忽魯台, 八巴刺, 耶滅干, etc.

此為脫諸嶽澤德千率以從後閱甘者諸贈五耶八紀兄也入
 其世歐王金所至眾兵請列王肅鈔王也年減刺抵弟減入
 是祖為火二部年元三來王分堅行萬八見七干脫悟行千八
 已九安羅百鈔六元中萬攻合地五省一八上○大脫者舊紀以刺
 子封王思兩萬賜四曾來又班殆世約千部○堯王灰不一則其大
 伯封鎮賜銀五諸賜月賜叛侵劉元距孫諸鈔八六舊也表稱子王
 答鎮南金歡千王合都後即八帶遠省伯年四原復與諸月德也多八
 罕王印南五八合都後即八帶遠省伯年四原復與諸月德也多八
 王舊先世忽里兩餘餘脫歡烈鐵木兒脫歡蓋八把
 紀于表里兩餘餘脫歡烈鐵木兒脫歡蓋八把
 至大德室銀二至大脫安所敘寶一海諸元則關罕並
 元德室銀二至大脫安所敘寶一海諸元則關罕並
 七年五諸鈔千大元烈鐵木兒脫歡蓋八把
 年同帛各慶二月賜牙倫紀八把
 七月名脫差九七月賜牙倫紀八把
 賜以者二月賜牙倫紀八把
 諸後者二月賜牙倫紀八把
 王拜所二賜牙倫紀八把
 答書一封賜牙倫紀八把

元史卷五十七表

宗室世系表

太宗皇帝七子長合失大王次七陵里大王
 舊表原次三闊端大王原次四曲出大王原次五哈
 居長原次三闊端大王原次四曲出大王原次五哈

刺察爾王四原次六合丹大王次七陵里大王
 按憲宗紀有云太宗以子月良不才故不立為嗣今攷
 經世大典帝系篇及歲賜錄並無月良名而陳極續通
 鑒以合失為長子疑月良即合失之別名故有太宗不
 立之說歟舊表誤以合失為第五子今正之
 合失大王位下

海都大王汝寧王察汝寧王完汝寧王忽
 八爾 者帖木爾刺白

攻證。合失大王洪氏元史譯文禮補太祖征西夏合失
 生西夏為河西地蒙古稱河音似合失轉音為合失
 以合失志武功也合失酒早卒太宗痛之自此蒙古人
 諱言河惟稱唐古忒按唐古忒太宗痛之自此蒙古人
 唐元○海都大王憲宗紀二年夏遷海都于海押立蓋定
 大元○海都大王憲宗紀二年夏遷海都于海押立蓋定
 非請徙也洪氏謂西域書有哈押立地在阿爾泰西南伊
 黎西北巴勒喀什爾之東南今俄羅斯有關帕勒城建

諸王八旨滅謂舊欲人紀濟察里哇受千轉幣使長置及也旋攻
 朝兒以林禱舊欲人紀濟察里哇受千轉幣使長置及也旋攻
 會觀都兒滅年微山寶察諸木盡降百餘月四兒之侯里察八王
 願關分傳係八部一兒軍屯其家滿十賜復八是來木兒察人德
 既請五禿都遣見而傳取往金屬明年察給年冬時兒嗣兒五年
 畢以戶麥子使納移又其部以武帳帖月懷朵兒諸一西使請眾舊
 卿賜絲實一哇王相屯至及利宗月木懷朵兒諸一西使請眾舊
 等武幣人失察率田大察害帥赤兒魯阿王所帛察諸四兒王答命
 述宗帛三傳八來金元八兒里出兒魯阿王所帛察諸四兒王答命
 其日侯春禿寬款之北赤凡木不德降山至千瓦等禿玉龍為節軍
 故世彼來書馬所即察八兒餘乃降蹏年八兒里逃的失鈔之音賜
 後謀降書馬所即察八兒餘乃降蹏年八兒里逃的失鈔之音賜
 與慮賜省武宗史哇兒及禿諸部與本
 之使遠今昔世祖禿曲
 愧若其子祖禿曲

都言復背林音士屯十其以欠伯以欠治渾謙部以已去六
 諸戰吉東也之哈兵年九二聞州八北欠治渾謙部以已去六
 叛事利為吉轉傳守春年子且至傳不州蕭傳時乞至則都七
 王則吉五利唐河海次土其提十世又年祖以吉金居萬八
 所吉恩部之思點即都欠哈事兵二祖可好北至謙以思山極五
 據利而之屏居憂斯河取冰地與討親位所間諸七為種入去餘八
 亦吉五部故五斯河乞乞山好得命列入王蓋海都始六益見左太祖平炙志
 可思部故五斯河乞乞山好得命列入王蓋海都始六益見左太祖平炙志
 知過咸世部去回里吉思始至和互彼所鐵戶領及與年蘭祕軍賈塔北林和東
 自東風祖最回里吉思始至和互彼所鐵戶領及與年蘭祕軍賈塔北林和東
 是煩歸土當西即引至其境詔欠死兒諸部叛兵王接則好禮海至
 表兵命土水北即引至其境詔欠死兒諸部叛兵王接則好禮海至
 宗北力傳哈陸三乞兒至境詔欠死兒諸部叛兵王接則好禮海至
 室路可云進要千兒至境詔欠死兒諸部叛兵王接則好禮海至
 世無知其收期西可鶴即利吉之思見土眾
 系警其前五于取拊海元吉思見土眾
 西此部之既都之思見土眾
 路盡為眾既都之思見土眾
 金山海不克之和譯土眾

元史卷五十七

關端大王位下
 類編自紫刺帖木兒走至紫刺帖木兒走至紫刺帖木兒走至
 將追阿刺帖木兒走至紫刺帖木兒走至紫刺帖木兒走至
 木忽刺帖木兒走至紫刺帖木兒走至紫刺帖木兒走至
 而命上都兵而西鎮察罕命俱心至是還承馬邑忽刺帖木兒走至
 都命上都兵而西鎮察罕命俱心至是還承馬邑忽刺帖木兒走至
 均命上都兵而西鎮察罕命俱心至是還承馬邑忽刺帖木兒走至
 和命上都兵而西鎮察罕命俱心至是還承馬邑忽刺帖木兒走至
 至命上都兵而西鎮察罕命俱心至是還承馬邑忽刺帖木兒走至
 南命上都兵而西鎮察罕命俱心至是還承馬邑忽刺帖木兒走至
 兵命上都兵而西鎮察罕命俱心至是還承馬邑忽刺帖木兒走至
 及命上都兵而西鎮察罕命俱心至是還承馬邑忽刺帖木兒走至
 之命上都兵而西鎮察罕命俱心至是還承馬邑忽刺帖木兒走至
 出命上都兵而西鎮察罕命俱心至是還承馬邑忽刺帖木兒走至
 兒命上都兵而西鎮察罕命俱心至是還承馬邑忽刺帖木兒走至
 密命上都兵而西鎮察罕命俱心至是還承馬邑忽刺帖木兒走至
 台命上都兵而西鎮察罕命俱心至是還承馬邑忽刺帖木兒走至
 云命上都兵而西鎮察罕命俱心至是還承馬邑忽刺帖木兒走至
 被命上都兵而西鎮察罕命俱心至是還承馬邑忽刺帖木兒走至
 忽命上都兵而西鎮察罕命俱心至是還承馬邑忽刺帖木兒走至
 刺命上都兵而西鎮察罕命俱心至是還承馬邑忽刺帖木兒走至
 台命上都兵而西鎮察罕命俱心至是還承馬邑忽刺帖木兒走至
 進命上都兵而西鎮察罕命俱心至是還承馬邑忽刺帖木兒走至
 擊命上都兵而西鎮察罕命俱心至是還承馬邑忽刺帖木兒走至
 脫命上都兵而西鎮察罕命俱心至是還承馬邑忽刺帖木兒走至
 木命上都兵而西鎮察罕命俱心至是還承馬邑忽刺帖木兒走至
 兒命上都兵而西鎮察罕命俱心至是還承馬邑忽刺帖木兒走至
 于命上都兵而西鎮察罕命俱心至是還承馬邑忽刺帖木兒走至
 良命上都兵而西鎮察罕命俱心至是還承馬邑忽刺帖木兒走至
 鄉命上都兵而西鎮察罕命俱心至是還承馬邑忽刺帖木兒走至
 南命上都兵而西鎮察罕命俱心至是還承馬邑忽刺帖木兒走至
 轉命上都兵而西鎮察罕命俱心至是還承馬邑忽刺帖木兒走至
 戰命上都兵而西鎮察罕命俱心至是還承馬邑忽刺帖木兒走至
 至命上都兵而西鎮察罕命俱心至是還承馬邑忽刺帖木兒走至
 虛命上都兵而西鎮察罕命俱心至是還承馬邑忽刺帖木兒走至
 清命上都兵而西鎮察罕命俱心至是還承馬邑忽刺帖木兒走至
 橋命上都兵而西鎮察罕命俱心至是還承馬邑忽刺帖木兒走至
 忽命上都兵而西鎮察罕命俱心至是還承馬邑忽刺帖木兒走至
 刺命上都兵而西鎮察罕命俱心至是還承馬邑忽刺帖木兒走至
 台命上都兵而西鎮察罕命俱心至是還承馬邑忽刺帖木兒走至

次衛東定木關九靈刺諸即按幹押徹又時徹山海王蕭六
 派指各太兒將月王台刺諸即按幹押徹又時徹山海王蕭六
 州行子舉士皆都刺諸即按幹押徹又時徹山海王蕭六
 游使首下兵皆都刺諸即按幹押徹又時徹山海王蕭六
 兵脫使成都都刺諸即按幹押徹又時徹山海王蕭六
 進脫仗都都刺諸即按幹押徹又時徹山海王蕭六
 逼木義改迎元立懷王秦等襲封是諸王完者亦木海都魯子魯表宗
 燕將順天懷王秦等襲封是諸王完者亦木海都魯子魯表宗
 鐵四討元帝前于復引文宗舊金印○汝世宗室
 表木西都天麻上相都樞密入紀諸和元表王宗室
 宗令援十月燕王相都樞密入紀諸和元表王宗室
 室大紫月燕王相都樞密入紀諸和元表王宗室
 世都燕王相都樞密入紀諸和元表王宗室
 系居關鐵及倒樞密入紀諸和元表王宗室
 民忽兒西沙院燕關元表王宗室
 乘忽兒西沙院燕關元表王宗室
 城刺道四輔院燕關元表王宗室
 守台阿川元表王宗室
 禦已速遠秦鐵守年汝忽室

元史卷五十七

贊皇元二十七年封合贊乃合台之謬證以本紀可見又... 至元二十六年四月命甘肅行省給合的所部饑者粟合... 的合帶並合台之音轉其部蓋近甘肅又舊紀大德三年... 十一月賜諸王哈達部鈔十萬錠益即一人 襄寧王阿魯... 魯灰舊紀至元二十二年二月賜皇子脫歡諸王阿魯... 灰及只吉不花公主囊加真等鈔七千七百三十二錠馬... 六百二十九匹衣段百匹弓矢二萬又先是至元二十四... 一年七月賜貧乏者阿魯渾玉龍帖木兒等鈔七千四百... 八十錠灰與渾雙輝蓋即一人又武宗舊紀大德十年八... 月至也里失之地受諸降王秃滿明里帖木兒阿魯灰... 等降也里失之失地受諸降王秃滿明里帖木兒阿魯灰... 不花等金三百五兩銀三千七百兩蓋阿魯灰亦曾從... 海都鴛哇以叛其封襄寧王耶速不幹舊紀大德八年十... 速不幹殆襲其封襄寧王耶速不幹舊紀大德八年十... 二月賜安西王阿難答諸王阿只吉也速不幹等鈔萬四... 千錠至大二年三月封諸王也速不幹為襄寧王也... 年封表所書封年多與本紀異今並仍其舊

脫脫大王月別吉

沙藍朵爾

元史卷五十七表

宗室世系

只

哭

攻證○哈刺察爾王塔塔統阿傳太宗即位命其妻為哈... 刺察兒乳母長子玉塔塔統阿傳太宗即位命其妻為哈... 皇孫脫脫刺察兒乳母長子玉塔塔統阿傳太宗即位命其妻為哈... 塔塔統阿妻以有乳保之勞故其子也○脫脫刺察兒... 所稱夏孫脫脫刺察兒乳母長子玉塔塔統阿傳太宗即位命其妻為哈... 一二年葉密里乃定諸王子各所脫脫刺察兒之子也... 阿勒坦山西南八百里日賽爾山北徐氏松西地按察宗... 敏河源出塔爾巴哈台城東二百七十餘里之鄂爾和楚... 克山源流錫伯圖河又西流逕塔爾巴哈台城東南百里... 是為額敏河額敏伯圖河又西流逕塔爾巴哈台城東南... 洪邊平地界太宗故城密爾密爾密爾密爾密爾密爾密... 葉密爾密爾密爾密爾密爾密爾密爾密爾密爾密爾密... 統阿傳稱密爾密爾密爾密爾密爾密爾密爾密爾密爾... 雷其六盤近處也又舊紀大德元未會率所部兵從伐蜀... 諸王同名脫脫者四以年代推之此蓋哈刺察兒之子

合丹大王位下

Table with columns for rulers: 觀爾赤王, 小薛大王, 星吉班大王, 耶不千大隴王, 耶迭爾大, 耶孫脫大, 火尼大王, 交佳大王, 那海大王. Rows contain names and titles.

元史卷五十七表

宗室世系

阿妻為皇子哈刺察兒乳母則其時哈刺察兒方在懷抱... 而合丹于太宗十三年辛丑已能任軍旅之事其為庶長... 子可知志宗二年壬子遷合丹于別失八里世祖中統元... 年二月車駕至開平親王合丹阿只吉奉西道諸王合必... 與東道諸王及諸大臣勸進九月詔諸王合必赤討... 阿藍答兒渾都海大敗其軍于姑臧斬之二年六月賜... 王合丹所部軍幣帛九百匹布于姑臧斬之二年六月賜... 丹擊斬阿里不哥部將及其兵三千于皆木土臘兒至... 二年間五月分四親王以南京屬州鄭州赤王舊紀中... 皆元宗子孫也以上親王親見舊史本紀○觀爾赤王... 不于舊紀中統元年冬與觀兒赤大元賜銀者當即此... 者三蓋昆弟統入朝同賜也又至元賜銀者當即此... 千王也昆弟統入朝同賜也又至元賜銀者當即此... 諸王也昆弟統入朝同賜也又至元賜銀者當即此... 四元五年二月燕帖木兒等五百二十人入山縣人何... 願遺樞密院正官孫捕都七百人入山縣人何... 產遺樞密院正官孫捕都七百人入山縣人何... 秋遺樞密院正官孫捕都七百人入山縣人何... 居近亦集乃地按元之亦集乃路在今內蒙古復州北... 千五百里外統志元之亦集乃路在今內蒙古復州北... 旗西北與外統志元之亦集乃路在今內蒙古復州北... 二千里而近也孫合塔爾丹原作你舊紀至元二十五年正

月賜諸王火你赤銀五百兩珠一索錦衣一襲疑即火你
 者謂元史語解職官名火尼赤者謂牧羊人也名火赤
 稱如定宗以貴人赤名而省稱貴人赤者謂牧羊人也名火赤
 紀至元二十五年四月六月賜諸王小薛部銀萬兩鈔千錠
 及幣帛有差元貞元四年六月賜諸王小薛部銀萬兩鈔千錠
 六部曲所犯重者官聽之九月薛部諸王小薛部銀萬兩鈔千錠
 杖其所犯重者官聽之九月薛部諸王小薛部銀萬兩鈔千錠
 薛年所犯重者官聽之九月薛部諸王小薛部銀萬兩鈔千錠
 七地所犯重者官聽之九月薛部諸王小薛部銀萬兩鈔千錠
 封平陽而饒民賜以薛部諸王小薛部銀萬兩鈔千錠
 日所犯重者官聽之九月薛部諸王小薛部銀萬兩鈔千錠
 晉與遊牧其地則曰薛部諸王小薛部銀萬兩鈔千錠
 蓋與遊牧其地則曰薛部諸王小薛部銀萬兩鈔千錠
 其從與遊牧其地則曰薛部諸王小薛部銀萬兩鈔千錠
 為隴間而賜金印諸王表罷罷王紀至元二年二月封和火聲
 近諸王一人也又舊紀至元三年正月次廣武康里衛軍凡
 七即其處王參定為籍都撒及迪南換馬赤者合樞密院遣人
 轉王那海罕與齊王王那海罕與齊王王那海罕與齊王
 賜諸王那海罕與齊王王那海罕與齊王王那海罕與齊王
 脫里王罕與齊王王那海罕與齊王王那海罕與齊王
 大里王罕與齊王王那海罕與齊王王那海罕與齊王
 吉班部饑振鈔萬錠米五千石

元史卷五十七

脫忽大王俺都刺大愛牙赤大陽翟王大
 王平
 陽翟王圖陽翟王曲陽翟王帖
 春
 木爾赤

放諸○茂里大王茂原作茂食貨志同今改舊紀作茂
 里一作明里茂同聲明為茂之雙聲憲宗紀二年遷茂
 里于葉兒的石即今兩齊斯河源出科布多西南阿爾
 泰山西麓西北流滿為宰桑淖爾又自淖爾溢北會托

波兒河倭別河諸大川行七千餘里注北海憲宗從茂里
 年復人以鈔州隸明里又至元大德間有明里鐵木兒
 別一重人據牙忽都忽里明里鐵木兒所掠伯顏傳九
 孛鞠論明里鐵木兒明里鐵木兒明里鐵木兒明里鐵木兒
 齋歸論明里鐵木兒明里鐵木兒明里鐵木兒明里鐵木兒
 顏功按明里鐵木兒明里鐵木兒明里鐵木兒明里鐵木兒
 受諸使請息兵宗明里鐵木兒明里鐵木兒明里鐵木兒
 十師年正成宗明里鐵木兒明里鐵木兒明里鐵木兒
 京師王至上都明里鐵木兒明里鐵木兒明里鐵木兒
 木兒王明里鐵木兒明里鐵木兒明里鐵木兒明里鐵木兒
 王木兒明里鐵木兒明里鐵木兒明里鐵木兒明里鐵木兒
 元木兒明里鐵木兒明里鐵木兒明里鐵木兒明里鐵木兒
 使者脫忽自脫忽里明里鐵木兒明里鐵木兒明里鐵木兒
 云脫忽自脫忽里明里鐵木兒明里鐵木兒明里鐵木兒
 封葉兒不脫忽里明里鐵木兒明里鐵木兒明里鐵木兒
 王所來也○失河在金山西而稱蓋自脫忽里明里鐵木兒
 暗都刺火也○失河在金山西而稱蓋自脫忽里明里鐵木兒
 作暗都刺火也○失河在金山西而稱蓋自脫忽里明里鐵木兒

元史卷五十七

脫忽見于至元中禿滿見于大德至大間以年世推之則
 俺都刺當在至元大德間禿滿見于大德至大間以年世推之則
 六子舊紀至元大德間禿滿見于大德至大間以年世推之則
 軍貧乏者鈔千二百七十七錠賜親王赤其則所部建都皇
 子不可知與此里曾孫愛牙赤時代亦稱牙赤然舊表世系
 亦諸王阿牙赤雙聲當此部無以證也陽翟王圖陽翟王帖
 同時並賜阿牙赤雙聲當此部無以證也陽翟王圖陽翟王帖
 武宗紀大德十年八月至也里失之陽翟王圖陽翟王帖
 明里鐵木兒等降也里失之陽翟王圖陽翟王帖
 封于此至大德元年八月至也里失之陽翟王圖陽翟王帖
 滿為陽翟王賜金印八月至也里失之陽翟王圖陽翟王帖
 銀號諸王或稱其封號或仍稱諸王如陽翟王圖陽翟王帖
 年十二延祐五年七月諸部米二千石陽翟王圖陽翟王帖
 賜金分二百兩其部按春王與帖木兒當是兩王別給鈔萬錠來朝
 後有帖木兒其部按春王與帖木兒當是兩王別給鈔萬錠來朝
 定元陽翟王平諸王太平國王朱羅台戰于柁子山之表燕帖
 木兒及陽翟王平諸王太平國王朱羅台戰于柁子山之表燕帖

鐵木兒子唐其勢陷陣殺大平時泰定帝太子立于上都
改元天順陽翟王太平等皆翊戴泰定帝太子者也○陽
翟王帖木兒赤舊紀至順二年三月壽王脫里出陽翟王
帖木兒赤舊紀至順二年三月壽王脫里出陽翟王
千五百餘戶告饑命遠陽行省發近倉糧振之兩月蓋部
赤等有散處即陽翟王也順帝時有陽翟王阿魯輝帖木兒
者亦來朝即陽翟王也順帝時有陽翟王阿魯輝帖木兒
傳曲刺春都刺生禿滿至大元年封陽翟王阿魯輝帖木兒
襲其封至正二十一年大平傳帖木兒赤而阿魯輝帖木兒
翟王餘詳至正二十一年大平傳帖木兒赤而阿魯輝帖木兒
周王出鎮雲南行次延安遂西行至金山西北諸王察阿
使等率眾來附致和元年七月泰定帝崩于上都文宗遣
北行省平章撥發北邊諸王察阿台率師扈行至金山嶺
為陽翟王禿滿族屬嗣位居故地其世系亦未詳

定宗皇帝三子長忽察大王次二老忽太子次三和忽大

王 忽察大王位下

元史卷五十七 表 宗室世系 聖

完者耶不

于王

攷證○完者也不于王舊紀至順二年四月諸王完者也
不干所部蒙古民二百八十餘戶告饑命河東宣慰司發
粟振之百官志河東宣慰司治大同路完者也不于
或分邑有在大同者歟抑所部散處于此歟無可攷

老忽太子

攷證○老忽太子老原作腦舊紀憲宗元年六月即位子
幹難河昔列門及諸弟腦忽之心不能平有後言帝遣諸王
旭烈與忙可撒兒帥兵視之云昔烈門及腦忽皆太
宗諸孫係從父昆弟日諸弟者時不止腦忽一人

和忽大王位下

南平王圖

魯

攷證○和忽大王和原作禾耶律希亮舊傳中統元年阿
里不哥反希亮被叛兵驅至肅州又抵沙州北川踰天山
至北庭都護府二年至昌八里城踰馬納思河抵葉密里
城乃定宗潛邸湯沐邑也時六皇后之妹主后位與宗王

火忽皆欲東觀云按火忽即禾忽之轉聲傳又云三年定
宗幼子大名王遺希亮以幣帛鞍馬乃從大名王至忽只
兒世祖會宗王阿魯輝帖木兒不哥還至禁密里城既
而及從二希亮復從大名王及阿魯輝帖木兒不哥還
其即定宗也禾忽使報捷按大名倉邑紀八年丙申分
定宗幼子大名王遺希亮以幣帛鞍馬乃從大名王至忽只
則本宗所居其名實一也大名倉邑紀八年丙申分
河濱見太宗諸孫脫金一不刺城在額爾齊斯河
楚材西遊錄過瀚海千餘里有不刺城在額爾齊斯河
有池李光庭西遊錄過瀚海千餘里有不刺城在額爾齊斯河
轉音城南陰山即松樹頭嶺北有池今曰賽刺木泊西
域博羅塔刺地地理志西北地附錄普刺洪氏釋地曰
名博羅塔刺地地理志西北地附錄普刺洪氏釋地曰
刺城當在博羅塔刺地地理志西北地附錄普刺洪氏釋地曰
八刺合幣帛六萬匹又舊紀至正五年四月賜諸王
以罪命往八塔山采珠自效道經沙州特王孝忠等
等自沙州時歸火忽叛亂告警耳必入寇沙州特王孝忠等
昔班使于海都論令罷兵通火忽命而承祖安童先已克
安童以王都曲海都懼遂通火忽命而承祖安童先已克

元史卷五十七 表 宗室世系 聖

城王昔里吉等劫北平王并執安童則安童之攻克火和
大在部曲與昔班之使于海都爾巴哈台接壤塔爾巴哈
里今額爾齊斯河即元時葉密里城而火和塔爾巴哈台
也按火忽當世祖初年嘗推戴效順且和塔爾巴哈台
中始叛○南平王祖圖魯原特賜綿五斤都魯即禿
王都魯牙忽魯祖圖魯原特賜綿五斤都魯即禿
魯也牙忽魯祖圖魯原特賜綿五斤都魯即禿
元九年正月即太祖弟哈魯子與魯赤及南平王禿
與魯所部同建都魯禿魯赤及南平王禿
兀魯所部同建都魯禿魯赤及南平王禿
年魯所部同建都魯禿魯赤及南平王禿
都魯所部同建都魯禿魯赤及南平王禿
印後賜金印元凡九所封而金銀諸王印率多金蓋先賜銀
概以金印元凡九所封而金銀諸王印率多金蓋先賜銀
惟正府至元十四年潘王魯赤及南平王禿
王相府至元十四年潘王魯赤及南平王禿
進軍會同李庭玉副都統魯赤及南平王禿
路軍會同李庭玉副都統魯赤及南平王禿
學通又月舉赤魯赤及南平王禿
事作六魯赤及南平王禿
鎮守六魯赤及南平王禿
兵以應魯赤及南平王禿

爾大王都

鐵木爾

速哥帖木

朵羅不花

是子所所牙具忽百賜二其詳七攷... 是子所所牙具忽百賜二其詳七攷... 是子所所牙具忽百賜二其詳七攷...

元史卷五十七

表

宗室世系

紀等王千元之會為于可... 紀等王千元之會為于可... 紀等王千元之會為于可...

只吉台等來朝貢此二年所書... 只吉台等來朝貢此二年所書... 只吉台等來朝貢此二年所書...

末哥大王位下

元史卷五十七

表

宗室世系

洛府穆南幼望哥于末... 洛府穆南幼望哥于末... 洛府穆南幼望哥于末...

班圖大王

班圖大王原在阿拉伯國... 班圖大王原在阿拉伯國... 班圖大王原在阿拉伯國...

阿速台大王

阿速台大王原在阿拉伯國... 阿速台大王原在阿拉伯國... 阿速台大王原在阿拉伯國...

元史卷五十七

表 宗室世系

宗室世系

元史卷五十七 表 宗室世系... 元史卷五十七 表 宗室世系...

玉龍答失大王位下

撒里蠻王

衛王完澤郊王徹徹

衛王完澤郊王徹徹... 衛王完澤郊王徹徹... 衛王完澤郊王徹徹...

元史卷五十七

元史卷五十七 表 宗室世系... 元史卷五十七 表 宗室世系...

元史卷五十七

元史卷五十七 表 宗室世系... 元史卷五十七 表 宗室世系...

元史卷五十七

元史卷五十七 表 宗室世系

元史卷五十七 表 宗室世系... 元史卷五十七 表 宗室世系...

紀及柏頭傳又狀兀兒舊傳大德二年北邊諸王都哇微
王同名者按察王徽猷禿之元完澤于元貞二年賜印大
德間出當元貞大德間錫封號若靈均不薛微禿其子有叛亂之
則出元貞大德間錫封號若靈均不薛微禿其子有叛亂之
可則出元貞大德間錫封號若靈均不薛微禿其子有叛亂之
履戰皆捷召赴闕二十二年十二月稱諸王薛微禿以罪從軍
此其年遠在薛微禿死前薛微禿死前薛微禿死前薛微禿死前
命衛王完澤以別子龍封者衛輝路自憲宗時衛王完澤以別子
衛輝路自憲宗時衛王完澤以別子龍封者衛輝路自憲宗時衛王
後固無存故疑以傳疑不著于世表

元魯思不
花王

元史卷五十七 表 宗室世系 半

并王晃火嘉王火爾
帖木爾 忽 蒼沙亦思 的王 完者帖木 爾王

及證。河平王昔里吉舊史憲宗紀作昔烈吉世祖紀作
昔里吉舊史憲宗紀作昔烈吉世祖紀作昔烈吉世祖紀作
義伯八傳又作昔里吉舊史憲宗紀作昔烈吉世祖紀作
哥自昔里吉舊史憲宗紀作昔烈吉世祖紀作昔烈吉世祖紀作
帶昔里吉舊史憲宗紀作昔烈吉世祖紀作昔烈吉世祖紀作
王于阿力麻里今以叛送幸西道諸王至和林昔里吉舊史
請失烈吉哈喇八都魯見土哈傳昔里吉舊史憲宗紀作昔烈吉
按昔里吉哈喇八都魯見土哈傳昔里吉舊史憲宗紀作昔烈吉
征昔里吉哈喇八都魯見土哈傳昔里吉舊史憲宗紀作昔烈吉
分地守此不敢失凡上所使與昔里吉之過我者受太木兒

之云脫忍為太宗第七子茂里大王之子其分地在金山
西進擊脫忽而昔里吉又乘勢進擊昔里吉大破之
金宮合李庭傳所云越嶺北與昔里吉戰于北平王
行之知憲宗諸子分地于金山北也十九年正月北平王
以撒里吉年擊殺昔里吉見其當在十八年八月李庭
云兒三歲死昔里吉見其當在十八年八月李庭
木魯俱在行昔里吉見其當在十八年八月李庭
陳李庭俱在行昔里吉見其當在十八年八月李庭
其見李庭俱在行昔里吉見其當在十八年八月李庭
七三月諸王不庭遂襲執之其并誤不待辯又舊紀
失列吉于湖廣此諸王不庭遂襲執之其并誤不待辯又舊紀
貞二年九月不庭遂襲執之其并誤不待辯又舊紀
都魯俱在行昔里吉見其當在十八年八月李庭
遺使馳奏曰諸王不庭遂襲執之其并誤不待辯又舊紀
其前惡以勸未至成宗從之按速為思幼弱無知今宜
思始歸順藥木忽里阿獲其子魯思亦魯思亦魯思亦
故同歸順藥木忽里阿獲其子魯思亦魯思亦魯思亦
百兩是月所部以乳牛三月賜金百兩王魯思亦魯思亦
元史卷五十七 表 宗室世系 半

一月賜金千兩銀萬五千兩鈔萬錠二年六月賜王及
四部鈔千兩銀萬五千兩鈔萬錠二年六月賜王及
二十一年七月賜諸王鈔萬錠二年六月賜王及
名方互消史稱仁宗生此與仁宗次子安王兀魯思不
英宗同母弟是時仁宗生此與仁宗次子安王兀魯思不
安王兀魯思不花里吉舊史憲宗紀作昔烈吉世祖紀作
王兀魯思不花里吉舊史憲宗紀作昔烈吉世祖紀作
不花里吉舊史憲宗紀作昔烈吉世祖紀作昔烈吉世祖紀作
流之海島未審即此是者有諸王兀魯思不花里吉舊
封諸王兀魯思不花里吉舊史憲宗紀作昔烈吉世祖紀作
六年八月賜火帖木兒等部王兀魯思不花里吉舊史
年六月改封嘉王兀魯思不花里吉舊史憲宗紀作昔烈吉
順三年改封嘉王兀魯思不花里吉舊史憲宗紀作昔烈吉
唐其勢謀兒不花里吉舊史憲宗紀作昔烈吉世祖紀作
十二自封是年十月火帖木兒不花里吉舊史憲宗紀作
未載。嘉王兀魯思不花里吉舊史憲宗紀作昔烈吉世祖紀作

鎮西武靖	王
王棚思班	
西平王八頁哥班大	
的麻的加王	

元史卷五十七表
 宗室世系表
 西平王八頁哥班大
 的麻的加王
 鎮西武靖
 王棚思班

元史卷五十七表
 宗室世系表
 西平王八頁哥班大
 的麻的加王
 鎮西武靖
 王棚思班

元史卷五十七表
 宗室世系表
 西平王八頁哥班大
 的麻的加王
 鎮西武靖
 王棚思班

元史卷五十七表
 宗室世系表
 西平王八頁哥班大
 的麻的加王
 鎮西武靖
 王棚思班

王旭烈該遺大幹耳朱思疑所部在漠北大祖四太師耳
 宋地又蒙古語稱燕京大都亦曰幹耳朱或是還京師耳
 西寧王牙罕沙還沙州則所部在西故稱西寧王以別之
 太祖叔父答里真之裔襲封蓋王者
鎮南王脫歡位下

鎮南王老	章	鎮南王脫	不花	威順王寬	徹不花	報恩奴	接待奴	佛家奴	義王和尚
		鎮南王李	羅不花	別帖木爾	答帖木爾				

宣德王不	只	文濟王蠻	木爾不花	宣讓王帖	宣讓王帖	宣讓王帖	宣讓王帖	宣讓王帖	宣讓王帖
答失里									

元史卷五十七 表 宗室世系全
 武昌之順帝後至元五年... 宣德王不... 只... 文濟王蠻... 木爾不花... 宣讓王帖... 宣讓王帖... 宣讓王帖... 宣讓王帖... 宣讓王帖...

元史卷五十七 表 宗室世系全
 武昌之順帝後至元五年... 宣德王不... 只... 文濟王蠻... 木爾不花... 宣讓王帖... 宣讓王帖... 宣讓王帖... 宣讓王帖... 宣讓王帖...

元史卷五十七 表 宗室世系全
 武昌之順帝後至元五年... 宣德王不... 只... 文濟王蠻... 木爾不花... 宣讓王帖... 宣讓王帖... 宣讓王帖... 宣讓王帖... 宣讓王帖...

梁王松山位下

梁王王禪雲南王帖

木爾不花

出鎮雲南以皇孫梁王印賜之時皇孫甘肅刺由梁王改... 封晉王元貞二年九月梁王命法薛丹等討降元江賊王... 薛丹即法薛台二年與雲南事賜鈔千餘兩有風疾以諸王... 松山鈔千錠至大二年三月梁王在雲南有風疾以諸王... 英宗即位五月封王禪雲南王禪其地延祐七年三月... 月封雲南王禪雲南王禪其地延祐七年三月... 其子帖木兒梁王禪雲南王禪其地延祐七年三月... 年六月命梁王禪雲南王禪其地延祐七年三月... 當即太祖命親王往鎮雲南王禪其地延祐七年三月... 往北邊賜鈔二千錠王禪其地延祐七年三月... 鐵木兒舉兵大都迎立懷王梁王禪其地延祐七年三月... 泰定帝太子阿里吉八子上都王禪其地延祐七年三月... 居庸關游兵至大口前軍與燕鐵木兒戰敗于榆河... 紅橋北復戰于白浮之西至夜復敗退走昌平北... 亡與燕鐵木兒相持于白浮之西至夜復敗退走昌平北... 齊王月魯帖木兒相持于白浮之西至夜復敗退走昌平北... 見復死之雲南王帖木兒相持于白浮之西至夜復敗退走昌平北... 南王帖木兒相持于白浮之西至夜復敗退走昌平北... 帖木兒相持于白浮之西至夜復敗退走昌平北... 于吉陽軍無所著見至順元年二月舊紀稱流王禪之... 花吉陽軍無所著見至順元年二月舊紀稱流王禪之... 湘寧王迭里哥爾不花位下

湘寧王迭里哥爾不花位下

湘寧王八

致證○湖寧王迭里哥爾不花舊紀大德十一年五月武... 宗即位七月封諸王迭里哥兒不花為北寧王八月賜... 王按灰阿魯灰北寧王迭里哥兒不花為北寧王八月賜... 三千七百兩至大二年八月以阿速衛軍五百人隸諸王... 帖里不花駐和林給外萬五千錠人備四馬帖里不花當... 即送里哥兒不花之... 年三月仁宗即位四月改封親

王迭里哥兒不花為湖寧王賜金印會湖寧州... 萬二千錠皇慶元年阿速衛事徹里從湖寧王所部鈔三... 舊史徹里傳又舊紀延祐三年五月賜諸王迭里哥兒不... 花等金三百五十兩銀二千二百兩鈔三千二百錠幣帛有... 差○湖寧王入刺失里諸王表湖寧王入刺失里諸王... 入刺失里印泰定元年三月湖寧王入刺失里諸王... 罕涼開成甘肅寧夏及察罕騰兒五長官俱領于六盤... 山等處都提舉司其地近甘肅亦曰白海子又領于六盤... 府則上都北之察罕騰兒也上都北此云罷官慰司立王... 三年正月命親王入刺失里復鎮察罕騰兒所稱親王... 寧王三月命親王入刺失里復鎮察罕騰兒所稱親王... 寧王三月命親王入刺失里復鎮察罕騰兒所稱親王... 馬買住罕鈔萬五千錠金銀幣帛有差致和元八月... 忽刺台承上都之命各起所部兵遂破囊寨旋間上都覆... 至冀寧敗大都帥也速答兒所敗囊寨王被執送大都其... 次馬邑為大都帥也速答兒所敗囊寨王被執送大都其... 從湖寧王用火兒忽答兒所敗囊寨王被執送大都其... 皆見散史于湖寧王無明文殆亦同死 宗室世系 全

元史卷五十七 表 宗室世系 全

順宗皇帝三子長魏王阿不哥次二武宗皇帝次三仁宗

魏王阿不哥位下

脫不花大	王	蠻只大王	西靖王阿	魯	魏王李羅	帖木爾	唐兀台王	若爾蠻失

